



XV.  
G.  
7-18.









SS. D. N.  
**BENEDICTI XIV.**  
*O P E R A*  
IN DUODECIM TOMOS DISTRIBUTA  
*T O M U S I.*







# BENEDICTI XIV.

PONT. OPT. MAX.

O L I M

PROSPERI CARD. DE LAMBERTINIS

PRIMUM ANCONITANÆ ECCLESIAE EPISCOPI,  
DEINDE BONONIENSIS ARCHIEPISCOPI

D E

SERVORUM DEI BEATIFICATIONE

E T

BEATORUM CANONIZATIONE

*LIBER PRIMUS*

EDITIO TERTIA AUCTION, ET CASTIGATIO

A D V S U M

ACADEMIE LITURGICÆ CONIMERICENSIS.



ROMÆ, MDCCXLVII.

---

EXCUDEBANT NICOLAUS ET MARCUS PALEARINI

ACADEMIE LITURGICÆ CONIMERICENSIS TYPOGRAPHI.

SUPERIORUM FACULTATI.





SANCTISSIMO DOMINO NOSTRO  
**BENEDICTO XIV.**  
P. O. M.

EMMANUEL DE AZEVEDO SOCIETATIS JESU:



Audandum arbitror eorum consi-  
lium BEATISSIME PATER, qui  
opus nacti doctissimi hominis vigiliis ac labore par-  
tum, hanc in se curam cogitationemque susceperunt,  
ut quam latissime posset propagaretur ad hominum  
usum & cognitionem. Nam cùm ab ingeniis viro-  
rum

a

rum

rum eruditorum atque industriâ multa existere egregia opera optandum est, tum nisi ea ad omnes homines nationesque longo terrarum vel maris tractu disjunctas pervadant, intercipitur qui hauriri poterat utilitatis fructus, quemque omnino omnibus instituti operis ratio offerebat: quod par est, ne eveniat, cavere; idque Auctores ipsi vel novis elucubrandis cudendisque intenti, vel aliis quibusdam curis distracti præstare non possunt, nec vero volunt modestia quadam ingenua ac verecundia impediti. Quamobrem veterum moribus institutoque, utili sane atque egregio, fuisse accepimus qui eam omnem curam ad se transferrent, librosque veluti de scriptoris sinu susciperent, educatosque sive descriptos & recensitos atque in partes quas videretur tributos, in hominum lucem aspectumque proferrent: quod in Homero præsertim factum, multorum testimonio constat. Sed nostrorum quoque sacrorumque scriptorum multa sunt, quæ ad nos aliorum curâ industriâque edita pervenerunt; ut Ammonii libri, sive Tatiani, sive cujuscumque demum Auctoris, qui Evangelii scriptorum unum quasi contextum, quam Harmoniam vocat, elaboravit; quos libros Victor Capuanus se protulisse atque in vulgus edidisse, in præfatione narrat: nec contemnendam equidem arbitror opinionem eorum, qui Lactantii opus divinarum Institutionum ab alio quopiam quam a suo Auctore divulgatum suspicantur; qui quidem ultimam præfationis partem nuncupationemque eorum librorum Constantino Magno

addide-



addiderit, quæ in multis mss. codd. desideratur; nec verò temporibus videtur, quibus illa Lactantius scribebat, convenire. Atque hoc non eò tantum valet, ut eorum rationibus consultum sit, ad quorum manus nullo modo libri illi pervenirent, sed ceterorum quoque omnium; ut majori cum fructu legere, & tractare opera hominum eruditissimorum possint. Cum etenim, ut Patrem filii, sic Auctorem suum scripta, similitudine atque adumbratione quadam referant, juvat scriptoris ipsius personam nosse; tum aliorum quoque de ejus libris judicium; & si insigne aliquod animadversum notatumque fuerit, non ignorare: quæ omnia ab alio potius quam ab Auctore suo facienda sunt. Vides opinor BEATISSIME PATER quorsum a me hæc pluribus verbis dicta, & cujus potissimum causa delapsus sim in hunc sermonem; cui alienorum operum edendorum cura commissæ est, quam cupio probatam omnibus. Neque tamen necesse est ne muneri meo desim ut de opere ipso atque Auctore, qui omnium sermonibus litterisque celebratur, ingrediar fusè dicere. Itaque hoc solum; habituram non modò Italiam, sed transalpinas regiones, potissimum verò & præcipuo quodam nomine Lusitanos homines & Conimbricensem Academiam opus mole ingens, argumento præstantissimum, doctrina atque eruditione omnino egregium ac singulare. Magnitudo quidem operis est hujusmodi, ut tomis justis duodecim comprehendi vix possit; argumentum varium & multiplex, quo quicquid

( VIII )

ad informandos Christianorum hominum mores ; quicquid ad imbuendum valet rerum Ecclesiasticarum cognitione animum , continetur . De doctrina quid dicam ? Mirum est unum hominem aut scientia comprehendere , aut memoria retinere , aut scripto complecti tantas res , tam varias , tantis difficultatibus atque obscuritate & dissensione Auctorum impeditas potuisse : unum tot vetusta & posteriorum ætatum monumenta inspicere , scriptores legere , libros diversi adeò argumenti , exterarum linguarum , editos remotissimis regionibus , nosse , solerter examinare , quæ scitu utilia proponebantur amplecti , respuere ac refutare contraria . Atque cum quidem hominem , qui aliarum omnino rerum curis fuerit semper implicitus , gravissimis periculosissimisque muneribus occupatus ; qui nobilissimo genere natus , opulenta domo , illo veluti honorum cursu perfungi debuit , qui est hujusmodi hominibus propositus ; qui post eas artes , quibus informari nobilium juvenum ætas ad ingenium corporis habitum cultumque animi consuevit , Jurisprudentiæ traditus pernoscere eam penitus & scrutari ejus mysteria ac rimari debuit ; qui inter Consistorialis Aulæ Advocatos cooptatus , mox ad Fidei Promotoris dignitatem evectus , ac sacre Congregationis Concilii Tridentini Interpretum a secretis factus , non dico aliena omnino studia a sacre antiquitatis cognitione secutum , sed ea certe quæ multam præterea alio in genere operam cogitationemque requirunt ; qui denique in augustissi-

mum

mum amplissimorum Patrum Collegium adlectus  
 primò Anconitanam, deinde Bononiensem Eccle-  
 siam regendam suscepit; ut his vitæ conditioni-  
 bus, vix de interioribus his litteris cogitare, nedum  
 tam multa scribere potuissè videatur. Quamobrem  
 non in illo eximia quædam, qua pollet, ingenii  
 vis, non excellens memoria; non incredibilis in  
 studiis assiduitas, atque antelucanæ vigiliæ, somni-  
 que parcitas tantum valuisse dicenda est; sed Di-  
 vini Numinis singulare auxilium, quod commen-  
 tantem scribentemque prosequeretur. Nunc ad Te  
 vertor BEATISSIME PATER non tam equidem  
 suscipiendæ editionis hujus consilium Tibi ut pro-  
 bem, quod jampridem benignitate Tua atque hu-  
 manitate singulari usus non improbasti; quam ut  
 Tuo nomini inscriptum opus, Tibi consecratum  
 dedicatumque exire in vulgus patiaris. Tibi illud  
 profectò debetur, non solum illo communi more,  
 quo ad celsissimam istam sanctissimamque digni-  
 tatis Sedem, pro Ecclesiæ defensione sive institu-  
 tione Christianorum hominum suscepta opera ab  
 antiquissimis ipsis Patribus delata videmus; ut Da-  
 maso se librum super parabola de filio illo prodi-  
 go dedicasse narrat Hieronymus, & Bonifacio li-  
 brum contra Pelagianos Augustinus; sed præcipuo  
 quodam jure atque operis hujusce proprio. Ete-  
 nim quæ tam præsentì, tamque perspicuo Numi-  
 nis afflatu scripta sunt, cui æquius fuit deferri quam  
 ad eum, cui Ecclesiam docenti informantique adef-  
 se sanctissimum illum Spiritum Numenque Divi-  
 num

num confitemur ? Quod si argumentum spectetur, sunt quæ his libris continentur institutiones quædam vel ad Christianorum omnium mores emendandos disciplinamque restituendam utiles, quales a supremo morum magistro atque inspectore prodire potuissent, vel Ecclesiæ attingunt nobilissimam partem; ut de Missæ Sacrificio, de Synodo, de servorum Dei Beatificatione & Beatorum Canonizatione. Hoc postremum totum est augustissimæ amplissimæque Sedis, atque, ut cum Augustino loquar in eo ipso opere quod Bonifacio Papæ dedicavit, *altius præidentis, & præeminentis celsiore fastigio speculæ pastoralis*: in quo quidem cum potestas ejus maxima, docendique ab errore immunis facultas cernitur; tum verò quæ ejus rei causâ in examen vocantur, fidei nostræ sinceritatem veritatemque apertè demonstrant. Vitæ enim sanctitas morumque integritas, atque in perferendis duris quamlibet rebus extremisque cruciatibus singularis fortitudo; tum miræ res quæ neminem præter Deum, auctorem habere possunt (quæ sunt veræ Ecclesiæ certissimæ notæ, eæque manifestissimæ) solemnî judicio habito & legitima quæstione instituta, inter eos qui Romanæ Ecclesiæ fidem sequuntur, inveniri atque existere deprehenduntur: quæ omnia ita hîc tractantur ac luculenter explicantur, ut non modò Auctor ceteros qui cum præcessere diligentia, eruditione, scientia earum rerum vicerit; sed nemini eas deinceps retractandi, atque omnino de eodem argumento differendi relique-

liquerit locum . Quam enim accuratè ibi de virtutibus heroicis cum universis, tum singulis, de cardinalibus quæ vocantur, atque moralibus differitur ? Quam doctè de Martyrio agitur, iisque omnibus quæ ad illud, ut verum legitimumque censeatur, requiruntur ; ut non tormenta sola sed causa ; nec sola mors, nec sola voluntas sit satis ; & quamplurimi Martyrum similes fuerint, nec veris tamen Martyribus accenseantur ? Quam luculenter de Miraculis tractatio instituitur & singula eorum genera recensentur atque expenduntur ad Physicorum leges, & dogmata Theologorum ; quibus ea adjunguntur quæ ad Gratias gratis datas spectant, ad spirituum discretionem, ad multiplicem orandi modum & speciem : quo loco de Contemplatione multa, de Extasi, de Raptu, de Visionibus & Apparitionibus, de Revelationibus & Prædictionibus . Neque hæc sola sunt, in quibus scriptoris hujus cura diligentiaque versatur . Quid enim cum totum judicii ordinem, qui nostris atque antiquis temporibus adhibebatur, persequitur ; cum de processibus agit tum Ordinariis tum Apostolicis, de multiplici genere testium, eorumque numero, & conditionibus ; cum veterem Ecclesiæ disciplinam confert cum nova, ac rationem utriusque & convenientiam declarat ; cum decreta Urbani VIII. exponuntur, illustrantur, vindicantur ; cum de sacra rituum Congregatione lector informatur ejusque actis atque administris ? Quid de Cultu cum dicitur tum privato tum publico ; quæ res eum sive constituent,

sive

sive demonstrent ; quam sit ejus genus multiplex ; quibus rationibus , quibus causis , qua auctoritate sive inducatur primum , sive amplificetur , sive confirmetur ? Quid cum Beatificationis & Canonizationis origo explanatur , natura & vis explicatur , eorumque differentiae expenduntur ? Quid cum auctoritas Romani Pontificis in hujusmodi causa exponitur , asseritur , illustratur ? Infinita sunt , quae in his libris cognitu digna , pro instituti operis ratione uberrimè declarantur ; praeter ea , quae veluti segetis alienae germina carptim attinguntur , summa tamen legentis vel utilitate vel voluptate ; ut omnes ingenii , omnes doctrinae ac prudentiae copias in illis effudisse Auctorem suum certè constet : Theologica loca omnia excussa ; ex omni antiquitate atque Ecclesiastica historia insignia maximè exempla repetita ; ubique assertionum producti testes idonei ; in medium adductae reconditae tabulae ac vetusta monumenta ; omnia suis locis ordine posita ac veluti in lumine , ut de picturis dicitur , collocata : rerum distributio , consensus , comprehensio planè admirabilis . Quamobrem nisi hoc librorum ipsorum argumentum , nisi quod condendo operi adfuit singulare Dei auxilium , nisi multa praeterea idem suaderent ; excellentia , gravitas , doctrina est hujusmodi , ut Te potissimum , cujus nomini hi libri consecrentur unum deponere videantur : Sed nimirum perinde agimus , quasi aliae quæpiam rationes quaerendae atque advocandae alicunde sint , cur ad Te potissimum opera haec pertineant , quam quae est omnium certissima

verissi-

verissimaque ; quod sunt conscripta a Te , Tuoque multorum annorum labore atque industria elaborata . De quo quid dicam ? nisi dissimulationem hanc , si ea uti possem , mihi utilem judicavisse ; & maluisse , cum Tibi hos libros offerebam , alium quempiam potius quam Te , parentem atque auctorem habere . Nota est enim omnibus constantia illa , nota animi fortitudo atque severitas , qua uteris in Tuos ; & cum alienos omnes paterna quadam ac singulari cura complectaris quasi essent Tui , his vix adduceres ut communia debitaque omnibus officia sollicitudinemque impendas : quam ego laudem nisi tantam esse fatear , ut in maximo amantissimoque Principe sit omnium difficillima , communi videar hominum sensu iudicioque carere . Solent enim vel fortissimorum hominum animi , maxime cum proveciores ætate sunt , in suorum amore remollescere , atque indulgentia quadam erga illos ferri ; ut multa eorum gratia faciant , aliqua remittant , plurima impertiantur ; nonnunquam etiam totos se illis regendos gubernandosque tradant . Quorum nihil simile vidimus in Te ; cumque merito accessiones fieri soleant Pontificum Romanorum Necessariis vel copiarum , vel dignitatis ; ne hoc quidem largitus es Tuis , ut Te summa dignitate ornatum viderent , ut Tu in eorum complexu conspectuque conquiesceres . Hanc eximiam & singularem laudem Tuam mihi adversariam maxime arbitrabar ; & cum eodem amoris sensu erga libros nostros afficiamur ac in filios parentes sui , metuebam vide-

licet ne severitate illa Tua in hos uteretur , atque hoc quod Tui dicerentur , minori a Te vel clementia vel amore exciperentur . Itaque dissimulabam antea , eosque quasi alienos Tibi offerebam . Sed dum eas laudes colligo , quibus necesse est instructum fuisse qui hæc scripserit , sensi me imprudentem sapius incurrere in Te , eaque designare quæ iis qui ignorarent Auctorem suum manifesto referrent . Quis enim tanto ingenio , tanta eruditione , tanta Ecclesiasticæ historiæ scientia , tanta rerum prudentia atque experientia sit , qui hæc edisserere , explicare , constituere , definire possit ? Itaque non laborabo frustra diutius , & quoniam tueri non possum , me ista cura libero , ac confiteor a Te libros hos esse conscriptos . Neque tamen vereor ne his excipiendis durior Te severiorque præbeas . Nam idem ego qui Te Auctorem illorum librorum fateor , pernego nunc esse Tuos . Quorum igitur sunt ? Liturgicæ Academiæ Conimbricensis , Canonorum Regularium S. Crucis , Lusitanicæ nostræ . Quo loco sine me BEATISSIME PATER commemorare , quanto hos omnes beneficio affeceris cum id perfecisti , ut in Regni totius communi Athenæo ad ceteras artes quæ ibi traduntur , illæ quoque , in quibus maximè excellis sacrorum Rituum & Historiæ Ecclesiasticæ , novis patefactis scholis duabus adjungerentur . Cum vero utramque disciplinam quas ibi quasi filiolas Tuas collocaveras , indotatas esse nolles , auxisti non solum amplissimis redditibus ut Magistri ali quatuor

com-



commodè possent ; sed scientiæ doctrinæque Tuæ amplissimis copiis . In Te enim onus recepisti ut quæcumque ad earum scholarum constitutionem pertinent , ad argumentorum quæ tractanda sunt electionem & partitionem , ad librorum lectionem commentationemque id omne Tu ipse curares ; eo-que descenderes quo demitti tantum hominem eo-que loci situm vix credibile posteris videatur ; ut Te utriusque scholæ moderatorem , præfectum , magistrum exhiberes . Quo vero perpetuum in eo munere fungendo auspiciem præceptoremque haberent , nec quæ corporis compagibus finem , eadem beneficio Tuo dies afferret , libros in quibus sapientiæ doctrinæque Tuæ opes copiasque conclusisti , quasi hereditario quodam jure ad Canonicos Regulares & Conimbricensem Academiam Liturgicam pertinere voluisti , facta eis potestate ut rursus in lucem ederent & scholarum earum usui dedicarent . Atque hoc præclarissimum munus Tuum amplius adhuc majusque effecisti , cum recenferi illos denuo & nonnullis accessionibus locupletari voluisti ; cum recens editæ Canonizationis commentarios sive acta adjunxisti ; cum recentem novumque qui ederetur tractatum de Synodo egregium doctissimumque , denique Tuum , tradidisti . Est quidem hoc beneficium ex illo genere quo omnes quotidie cumulas ; atque ad eam pertinet laudum Tuarum , cujus illustria exempla eadem-que frequentissima in Te admirantur & suspiciunt universi : quemadmodum in summo negotio cum

sis, litteris tamen semper & litteratis viris velis esse otiosus; eamque inter maximarum curas admittis tamquam gravissimam fructuosissimamque qua ratione litterarum splendorem augeas propagesque, & liberales omnes disciplinas juves. Cum vero in tempora offendisses molestiarum turbarumque plena præsertim vero armorum foeta tumultibus, in quibus literæ conticescere aut minus celebrari solent; per Te tamen effectum est ut, quæ vix se tutas hujusmodi temporibus arbitrarentur, non solum in Capitolio, & celeberrimis Romæ ædibus sed in Palatio ipso Tuo stabilem quietamque sedem nanciscerentur, institutis quatuor præcipuarum facultatum Academiis, quarum conventibus cœtibusque singulis interesses; ut circumsonare inter maximas negotiorum turbas patiaris aures Tuas litterarum & disciplinarum sono. Itaque in Tua maxime tempora Teque ipsum conveniunt quæ de Magno illo decessore Tuo Gregorio prædicat Joannes Diaconus. *Tunc rerum sapientia Romæ sibi templum visibiliter quodammodo fabricarat & septemplicibus artibus veluti columnis nobilissimorum totidem lapidum Apostolicæ Sedis atrium fulciebat. Quiritium more seu trabeata latinitas suum latium in ipso latiali palatio singulariter obtinebat: refluoruerunt ibi diversarum artium studia.* Verum si inter res gestas, quæ maximæ sunt ac peræque omnes laudandæ, aliqua institui collatio & comparatio potest; in reliquis

ad litterarum gloriam amplificandam restituendamque gestis a Te ; discedere tamen a privata fortuna Tua non multum videris . Habuit hoc enim superior status sive conditio Tua ut ubicumque esses litteræ diligentius excolerentur . Itaque & dum Romæ junior esses, litteratorum conventus celebrabantur habendis de Ecclesiastica historia sermonibus quæstionibusque tractandis ; & Anconæ ac Bononiæ eadem , cum illis Ecclesiis præesses , studia floruerunt ; quorum Tu ipse in quodam libro Tuo optimus es testis ; ut mirum non sit , cum Romam esses ad Imperium & orbis universi capienda gubernacula revocatus , Historiæ Ecclesiasticæ novam scholam in Collegio Romano Tua maximè auctoritate de novo conditam fuisse atque institutam . Nunc vero majus quiddam atque altius prospexisti animo ; ut sicuti remotissimas terras regionesque longe ab Italia disjunctas cura ac sollicitudine complectereris , his quoque latioribus amplioribusque terminis scientiarum patrocinium quod jamdudum susceperas prorogares ; idque non ad breve tempus sed ad memoriam temporum omnium ac beneficium posterorum sempiternum . Itaque ut nobis prodesse , ut Canonicos Regulares , & Conimbricensem Liturgicam Academiam ornares , nunc denique in litteris ac liberalibus disciplinis tuendis suscepisse Romani Pontificis personam atque universi Christiani orbis moderatoris videris . Sed quo majus istud est ac præstantius beneficium , eo sollicitiores de referenda quoquo modo possunt gratia Canonicos præsertim

( XVIII )

S. Crucis , quos hæc maximè attingunt , reddidisti , ut extaret aliquod testimonium quo gratum animum & meritorum in se Tuorum memorem profiterentur . Subventum tamen , ut ad primum illud revertar , est opportune a Te cum librorum Tuorum quasi possessionem abdicasti ; atque ad illos , tradita Historiæ Ecclesiasticæ sacrorumque Rituum schola , transtulisti . Nam eosdem illi libros Tibi nunc pro meritis in illos Tuis reddunt atque illorum nomine a me donari Tibi ac dedicari volunt ; quos utique Tibi acceptos , dignosque ista , quam tenes , celsissima omnium sanctissimaque dignitatis sede futuros plane perspiciunt . Habes hoc Dei O. M. cujus vices geris ferme simillimum , ut Tibi suppetant quæ aliis largiaris ; Tibi verò nihil donari possit nisi a Te ipso proficiscatur . Horum ergo librorum primum , si humaniter , ut soles omnia , suscipies ; meque & , quibus singulari benevolentia junctus sum , Canonicos Regulares , ac Conimbricensem Academiam , denique Lusitaniam omnem novo maximoque beneficio cumulabis .



BENE-

## BENEDICTUS PP. XIV.

DILECTO FILIO RELIGIOSO VIRO  
EMMANUELI DE AZEVEDO  
SOCIETATIS JESU.

DILECTE FILI SALUTEM ET APOSTOLICAM  
BENEDICTIONEM.



ONCEPTA de nostris rerum Ecclesiasticarum præsertim studiis ab incunte ætate institutis apud omnes non modo Italiæ sed aliarum etiam nationum homines opinio, quod plura certe, quam quæ ad hanc usque diem in lucem prodierunt, Opera scripsimus; effecit, ut nonnulli, quemadmodum accepimus, exposcerent nedum novam nostrorum typis impressorum voluminum, sed aliorum, etiam a Nobis exaratorum librorum, ac potissimum illius, quem de Synodo satis bene longum alias adornatum nuper inter gravissimas sacrosancti Apostolatus curas furtim absolvimus, tractatus, atque omnium in unum veluti corpus colligendorum editionem. Inter ceteros vero pietate & Ecclesiastica eruditione clarissimos viros, quorum postulata excepimus, dilecti etiam Filii Religiosi viri Congregationis S. Crucis Canonico-  
rum

corum Regularium Ordinis S. Augustini in Lusitania Reformatorum supplices Nobis offerendas preces curarunt. Nos autem, qui Conimbriciæ, ad quam Civitatem obflorentissimæ Academicæ commodum frequentissima totius Lusitanicæ Juventus studiorum causa confluit, ad publicam utilitatem duas itidem Cathedras, alteram quidem sacrorum Rituum, alteram vero Historiæ Ecclesiasticæ Apostolica nostra auctoritate ac liberalitate fundavimus, vehementer lætamur; quod ejusdem Academicæ sive Universitatis Cancellarius pro tempore, atque in præsentia insimul Rector sit ille idem, qui laudatæ Congregationis Canonicorum Regularium Prior Generalis reperitur. Præterea, cum Congregatio hujusmodi per reformationem a dilecto Filio Gaspare ab Incarnatione Fratrum Minorum Ordinis S. Francisci strictioris Observantiæ Fratres expresse professi propter religiosas virtutes commendatissimo Apostolica auctoritate inceptam etsi nondum absolutam ad pristinum Regularis disciplinæ & sacrarum Literarum splendorem restituta, novis in dies pietatis & doctrinæ argumentis inclarescat; fore in Domino confidimus, ut ejusdem Congregationis Alumni potissimum, aliique Adolescentes sedulam in utraque facultate operam navantes, deinceps uberem laborum suorum fructum percipiant.

piant. Quem sane ampliore etiam iidem Canonici Regulares sibi ex nova ejusmodi omnium Operum nostrorum editione pollicentes; atque ad majorem Divini cultus propagationem majoremque Ecclesiasticæ disciplinæ notitiam ipso Gaspare ab Incarnatione auspice & duce cessurum fore sperantes; ita precibus institerunt, ut Nos, qui eamdem Congregationem præcipuo Apostolicæ caritatis studio prosequimur, grato libentique animo annuamus; ut per Te, cui ab iisdem Canonicis Regularibus præclare de tua scientiarum peritia sentientibus commissa fuit, ipsa curetur editio. Te enim in iis, quæ ad Sanctorum Canonizationes, in quibus rite sancteque habendis maxima lucubrationumstrarum pars infumitur, spectant, non mediocriter versatum esse non ignoramus: cum sæpe Te, quem ad causam Venerabilis Servi Dei Alphonsi primi Lusitanicæ & Algarbiorum Regis carissimus in Christo Filius noster Joannes eorundem Regnorum Rex Illustris hac in parte laudatissimus, atque nonnulli per eadem Regna venerabiles Fratres Antistites ad non paucas insimul aliorum Servorum Dei causas in hac alma Urbe nostra promovendas delegerunt, peculiari cum animi nostri voluptate de iisdem causis ceterisque ad literaria negotia nobiscum colloquentem audiverimus. Quem vero in universa

c

sacrorum

*sacrorum Rituum cognitione in unum pariter corpus redigenda, & in duodecim tractatus veluti totidem doctrinæ capita seorsim dividenda ordinem tenendum esse existimasti; mirum in modum laudamus. Præterea Tibi injungimus, ut ad Liturgicas institutiones, ad quas adornandas Te alias hortati sumus, absoluta eorumdem Operum nostrorum editione, iterum manum admoveas, atque publici juris facias. Partitionem insuper omnium nostrorum Operum in duodecim tomos faciendam, quemadmodum in primo tomo per Te summa industria in lucem propediem prodituro indicasti, non probamus modo, sed collaudamus etiam, non secus atque Vitas aliquot Sanctorum, qui in Metropolitana Ecclesia & Diocesi nostra Bononiensi coluntur, Italico sermone conscriptas, & a Te in Latinum translatas. Porro super sedemus Te admonere de iis omnibus, quæ in recudendis Operibus jam editis, atque in novis divulgandis necessario adhibenda sunt; satis enim superque de tua diligentia docti sumus: cupimus tamen, ut in eodem primo tomo imprimantur Apostolicæ nostræ in simili forma Brevis literæ datæ ad dilectum Filium Jacobum Facciolatum, qui suam in altera de Canonizatione Sanctorum editione operam impendit; in quibus sane literis sententiam nostram de eodem Opere, sicut de omni-*



*bus aliis intelligi volumus, apertissime declaravimus. Perge itaque, dilecte Fili, una cum dilecto Filio Religioso viro Petro Lazzeri Societatis tuæ in Romano Collegio Ecclesiasticæ Historiæ professore aliisque tecum adlaborantibus ea, qua decet, sedulitate vigilantia prudentia & contentione susceptum negotium ad optatum finem adducere; ut non tam nostram erga Te studiosam voluntatem amplius demerearis; quam ut publicam ab iis, qui in evolvendis Operibus hujusmodi quam correctissime editis nullum erratum maxime in adducendis Auctorum dictis sententiisque offenderint, commendationem consequaris; & laudatorum Canonorum Regularium Patriæque tuæ expectationem superans, ab iisdem debitam gratiam ineas, ac Tibimetipsi satisfacias. Nos interea ad prosperi successus auspiciis, & ad laborum subsidium Apostolicam benedictionem cum cælestium munerum copia conjunctam Tibi, dilecte Fili, peramanter impertimur.*

Datum in Arce Gandulphi Albanensis Diocesis sub annulo Piscatoris die xv. Junii MDCCXLVI. Pontificatus nostri anno septimo.

Cajetanus Amatus.



BENEDICTO · XIII · P · O · M  
QVOD  
ACADEMIAM · LITVRGICAM  
MAGNO · LVSI · TANIAE · TOTIVS · BONO  
CONIMBRICAE · INSTITVERIT  
REDITIVS · LIBERALITER · ADTRIBVTIS  
PERPETVAM · EFFECERIT  
SVO · ET · APOSTOLICAE · SEDIS · PATROCINIO  
CONMVNERIT  
CANONICI · REGVLARES · REFORMATI  
CONGREGATIONIS · SANCTAE · CRVCIS  
POSVERVNT

XXV

# LITURGICÆ ACADEMIÆ CONIMBRICENSIS AUDITORIBUS.

EMMANUEL DE AZEVEDO S. J.



UM verear ne quis forte vestrum existimet, hac Operum SS. D. N. BENEDICTI XIV. editione suscepta, non plus in vos esse collatum, quam quantum solet ex libro aliquo, quem facile comparare liceat, proficisci; faciendum mihi esse arbitror, ut editionis hujus causam omnem, omniaque in vos collata beneficia uberius aliquanto exponam: vetat enim gravissimus morum Magister Seneca aliorum in nos merita occultare; reprehendendosque vere putat, qui acceptorum beneficiorum testes & conscios existere multos nolunt: cum præferenda illa potius, &, nisi aliter rei natura postulet, ostentanda omnibus videantur.

Quamquam qui de vobis benemererant, atque istam clarissimam nobilissimamque Urbem ornandam susceperint, difficile est singulos commemorare. Habuit enim Urbs nostra (nostram appello quod in ea sim in Parentum peregrinatione natus) eximium ac singulare; ut non a natura dumtaxat vel soli fertilitate vel amenitate loci vel aeris salubritate commendaretur; aut quod humanæ facultatis esse videtur, Doctores in ea Præceptoresque quarumcumque disciplinarum celebratissimi doctissimique florent; sed quo, Platone teste, majus nullum a Deo impertiri hominibus donum potuit, ii admoventur ad gubernacula Civitatis vel Academiæ, qui summa integritate, excellenti prudentia, sapientiæque præditi ejus splendorem summo opere augere, commodaque amplificare possent: Quorum quidem hic duos, quorum alter Civitati gubernandæ, ejusque Sacris procurandis; alter Academiæ regendæ præest, commemorabo Cl. viros D. Michaelen ab Annunciatione Episcopum Conimbricensem, & D. Franciscum ab Annunciatione Universitatis Rectorem: atque ambo quidem in nobilissima & splendidissima domo nati; ambo in eandem Religiosam familiam virtutum omnium doctrinarumque palæstram cooptati sunt, ambo eidem clarissimo sanctissimoque Ordini primi præfuerunt, Civitatis hujus bono tuendo amplificandoque pariter dati; ut par esset semper utriusque conditio atque fortuna: de quibus usurpare profecto liceat Homerium illud; *Τῶνδ' αὖθις μὲν οὐρανόθεν ἦεν Ἀχαιοί* Iliad. 2. 373. Horum ego sine nomina sive laudes quidni conjungam, quos ambos SS. Pater BENEDICTUS XIV. \* dignos esse censuit qui ceteris ad imitandum proponerentur? Ergo cum sibi illi creditam Conimbricæ Urbis fortunam viderent, eam statim cogitationem susceperunt; qua potissimum ratione non unam, vel alteram facultatem, sed

\* Sanctissimos Dominos noster in litteris datis in forma Brevis ad Canonicos Regulares S. Augustini in Lusitania, die 5. Augusti aem. 1747. hæc habet inter cetera: Ut exempla non aliunde petita, sed demissa ac viva habetis quotidie ad imitandum oculis vestris objecta, amissis aliis de vestra Congregatione post inceptam Reformationem illustris viris, davi dumtaxat vobis proponere ducimus; & dilectum filium Franciscum ab Annunciatione modernum, & Venerabilem fratrem Michaelen Episcopum Conimbricensem alium ejusdem Congregationis Priorem Generalem ab ipso Gaspere Apostolico Reformatore ad ejusmodi officium electos. Hic qui-

dem istidem, quibus in ipsa Congregatione vestra informati eandem Congregationem sapientissimi erant, auxerantque virtutibus, commissam fidei sua Ecclesiam ac diocesim magnam cum nominis sui laude, Divini honoris incremento, & æterna Christi fideli salute administrare pergit; ille vero saluberrimis ipsis Michaelis Episcopi, & Prioris exemplis induerens non minori sapientia, prudentia & charitate spediendam Congregationem vestram moderatur, quam officium Rectoris Universitatis a charissimo in Christo filio nostro JO. ANNE Portugallia, & Algarbium Rege illustri de vobis præsertim benemerentissimo pbi collatum exercet.

sed de omnibus, quibus omnium cura commissā erat, ac de Academia & Civitate universa benemererentur. Secum itaque reputare cœperunt ac circumspexerunt animo, si aliquid esset quod addere ad Urbis dignitatem vel ad commodum vestrum possent. Res erant profecto hujusmodi ut quisvis facile judicasset, nihil posterorum industriæ Majorum diligentiam fecisse locum. Enimvero Conimbricensis Academia ita est propter Auditorum frequentiam nobilis, ut propter Magistrorum copiam cum præclarissimis Europæ totius conferenda videatur. Magistri in ea Theologiam septem tradunt, septem Jus Canonicum, decem Civile, quinque Medicinam, duo Anatomiam & Chirurgiam, unus Musicam, quinque Mathematicam & Philosophiam, duo Rhetoricam, duo linguas Hebraicam & Græcam, novem Humaniores litteras & Grammaticæ rudimenta. Quod si facultatum Professoribus adjungantur li, qui honorificentioribus in Academia muneribus funguntur, possumus centum, eoque amplius in hac quasi litteraria Republica recensere. Cui ergo in mentem venisset, aut esse quod adderetur, aut deesse aliquid ad perfectam studiorum disciplinarumque universitatem, suspicari? Sed nimirum homines eximia quadam intelligenti peripiciacia præditi vlderunt esse, quod cura ipsi sua perficere diligentiaque ad vestram eruditionem scholarumque splendorem augendum possent. Quamquam fatendum est id alienæ etiam insinuationi tribui debere, cui parendum omnino erat. Hac maxime ratione admoniti atque excitati indignum viri prudentissimi judicaverunt in florentissima regni totius Academia, ad quam celebrandam plura honestissimorum juvenum millia domo, patria, parentibusque relictis convolarent, seque Magistris octo annos ipsos instituendos informandosque traderent, non habere hic omnia, quibus possent, si velent, disciplinis omnibus scientiisque ornati atque discedere. Quæretis fortasse quid istud sit, quod deesse illi atque adjungendum scientiarum universitati putaverunt? Est hoc disciplina quadam sacrorum omnium rituum ac cæremoniarum, quæ ab Romano Pontifice, ab Episcopis, a Presbyteris, ceterisque inferioribus Ministris in Sacramentorum administratione, in sacra Liturgia, in Horis canonicis, in Benedictionibus, aliisque sacris functionibus peraguntur. Atque hujus facultatis administra. five comes potius & nutrix dicenda est Ecclesiastica Historia; quæ rebus ex omni antiquitate repetitis veterem Ecclesiæ disciplinam moreisque expianat. Non est hic loci, ut de utriusque facultatis præstantia atque utilitate dicam. Atque altera quidem ita in omnium sermonibus literisque versatur; ut nulla fortasse hoc tempore aut tanta ingeniorum contentione, aut effusiori frequentia Auditorum, aut commendatione hominum majore celebretur: itaque non illa nostram orationem laudisque desiderat. Est vero altera hujusmodi, ut ejus dignitas atque utilitas se ipsa prodāt, atque in omnium continuo oculos cogitationesque incurrat. Etenim cum ad Divinum cultum præcipue spectet Ecclesiasticas functiones rite & ex veteri Ecclesiæ disciplina, quantum tempora ususque sinunt, peragere, atque in iis id maxime videndum sit *quid deceat*; hoc vero sit hujus quam dicimus facultatis ac disciplinæ; quantum hinc in Ecclesiam atque Episcopos auxilium dimanabit, cum officinam habituri sint veluti quandam, ex qua Ecclesiastici decoris custodes peritissimi, rituum sacrorum ac cæremoniarum Magistri scientissimi diligentissimique continuo prodibunt?

Sed levia hæc sunt, si cum altero conferantur, qui est hujus disciplinæ fructus certe maximus, Fidei depositum ab hæreticorum hominum fraude, conatibus, convitiisque defendere. Cum enim dogmatum Fidei interiorem quandam cognitionem vulgi ruditas, idest maxima hominum pars, non capiat; ad ea vertuntur quæ sunt nota omnibus, quæ oculis usurpantur, quæ sub sensu cadunt; atque hunc sacrarum cæremoniarum campum nâsi in quo audacius exultent, contra eas debaccantur, illas condemnant, summaque petulantia & temeritate usi irident. Fecere hoc Hæreticorum nostri temporis Coriphæi Lutherus & Calvinus,

.. quorum

quorum alter contra Regem Angliæ scribens Catholicos *mere fatuos & stolidos* appellat, qui tot cæremoniarum veluti iugo subdantur; sibi liberam esse sacrarum functionum horas, loca, vestes: alter multo acrius & vehementius contra easdem, cum in Institutionibus suis, tum de *necessitate reformandæ Ecclesiæ* invehitur; ubique sacros ritus *ineptias, & histronicas res, adusque* compellans. Neque hi solum, sed impietatis vel socii vel heredes Joannes Oecolampadius, Theodorus Beza, Rodolphus Hospinianus; atque ut hos paulo vetustiores omittam, necnon Franciscum Burmannum, Franciscum Turretinum, Philippum à Limborch, aliosque innumeros, non multis ab hinc annis Conyers Middleton in rituum originem ipsam causamque inquirens hos per summam impudentiam traducere conatus est. Ita illi ab eo, quod præcipue causam continet, atque est dissidii inter Hæreticos & Catholicos caput, avertere quæstionem conantur, atque ad hoc plausibilis multoque vulgaris argumentum transferre: in quo a veterum Hæreticorum, idest parentum ipsorum, moribus non discedunt. Quod enim contra altaria & valorum sacrorum apparatus bellum gesserint Ariani, Manichæi, Donatistæ; Athanasius, Augustinus, & Optatus narrat; Pelagianus vero, & Vigilantium sacras vestes ornatusque & totam Catholicarum cæremoniarum feriem damnasse, testis est Hieronymus; quos secuti postea Petrobursiani, Albigenes, Valdenses; ut ex Cæsario, Matthæo Parisio, Ænea Silvio aliisque harum rerum Scriptoribus constat. Non equidem arbitror necesse esse ei, qui Catholicorum partes contra Hæreticorum audaciam tueatur, ad peculiaries ritus omnes defendendos & cæremoniarum minimas quasque descendere; poteritque eo esse contentus quod Concilium Tridentinum contra eosdem, eum de Sacramentis canones suos edidit, decrevit. Sed defugere hanc dimicationem, ad quam nos interdum Adversarii vocant, si frangere eorum audaciam volumus, non debemus: quod profecto fecere viri eruditissimi, vel cum initio erant maximarum rerum quæstionibus occupati; quorum nonnullus Schultingius in Bibliotheca sua commemorat; atque Hæreticorum ritus ipsos librosque cæremoniarum sive *Agenda* Vvittenbergensia, Lipsiensia, Saxonica, Magdeburgensia, Vvireburgensia, Heydelburgensia, Nurenburgensia, oppugnavit. Nec vero necesse est res a memoria nostra longe disjunctas repetere. Viderunt quotquot adulta ætate vivunt Romæ duos doctissimos sanctissimosque Cardinales Joannem Bonæ, Josephum Tbomasi. Hi ætatem omnem in his maxime studiis ritibusque Ecclesiasticis defendendis atque explicandis contriverunt; ne ferri non possit nonnullorum sive temeritas sive audacia, qui hujusmodi rerum cognitione leviter imbuti, vel ne tinski quidem; cum quantum inest in hac facultate non possint suspicari, sacrarum cæremoniarum studium veluti leve quoddam & nugatorium traducunt. Quin nos potius sequimur illos clarissimos sanctissimosque viros, & sacrorum rituum disciplinam penitus imbibimus? Atqui hæc est bujusmodi, ut non in medio posita scholæ non egeat; Doctoremque peritum illum quidem, atque in interioribus quibusdam studiis exercitatum nequaquam desideret. Si enim volumus eos rituum Magistros, qui illorum sint intelligentissimi, causamque eorum quæ fiunt, probe teneant, antiquitatem non ignorent, asserre originem atque explauare possint; næ hæc facultas temporis multum, multum studii, virique scientissimi disciplinam requirit. Atque utinam in hac facultate polienda perficiendaque plus sane operæ collocare Majores nostri voluissent; vel illi potius non tam in singulis rebus illustrandis, quam colligendis omnibus revocandisque ad certa capita, ac rite atque ordine disponendis, ut facultatis unius formam induerent, elaborassent. Sed necesse ager est ullus adeo secundus, quemadmodum veteri proverbio dicitur, ut omnia ferat; neque ætas una quælibet laudibus omnibus abundat, ne nihil posteriorum industrie atque ingenio reservetur. Servatum id erat BENEDICTO XIV. qui auctoritatem suam, qua nulla est major, tam vero doctrinam, qua ceteris multum præstat, ad hanc scholam constituendam, postquam ipsam facultatem expolierat perfeceratque, adhibuit. Ac primo, cum instituendæ scholæ bnjus publico bono consilium probasset, reditus qui

necessa-

necessarii erant Magistris sustentandis alendisq; abunde suppedavit. \* Præterea auspiciens se ac patronum esse atque haberi velle professus, in suam ipsæ tutelam scholam illam accepit, foreque in perpetuum Apostolicæ Sedis, edito decreto solemniter sanxit. Quid præterea addi sive ad dignitatem sive ad utilitatem poterat? Invenit tamen beneficentissimus Princeps, quo novam facultatem, omnemque Canonicorum Regularium S. Crucis Ordinem atque Academiam Conimbricensem (etenim licet in Canonicorum ipsorum ædibus schola hæc constituta sit, juventuti tamen Academicæ omni patet) honestaret; eoque descendit ut Magistrum se exhiberet scholæ constitutionem modumque ipse statueret: præsertim vero quibus in argumentis versari Magistri solertia, laborque discipulorum deberet. Placet rem omnem, uti datis ad SS. Patrem litteris complexus sum, exponere. Cum enim me congressu colloquioque suo, ad quod pluries admisit, de tota scholæ ratione quam servare oporteret, informasset, litteris ad me ex Castro Gandulphi datis jussit, ut quemadmodum eam conceperam animo, scripto exhiberem. Itaque hæc datæ sunt a me ad Sanctissimum Patrem litteræ.

### DE RATIONE NOVÆ LITURGICÆ SCHOLÆ INSTITUENDÆ.

ET si B. P. vulgaris sententia est Eruditorum quoque sermonibus litterisque celebrata, nullum jam industriæ ac diligentiae cuiusquam in disciplinis amplificandis exornandisque patere locum, omniaque esse superiorum ætatum ingenii & laboribus occupata; id tamen a veritate abesse plurimum, vel una Mathematicorum scientia declarat, quæ nostræ patrūque nostrorum memoria, ita ex humili venit ad summum, ut aliquæ ipsius partes, quemadmodum Mechanica quæ dicitur, Hydrostatica, Astronomia, atque Algebra, disciplinæ potius quædam recens inventæ, quam veteres auctæ exultæque videri possint. Quid Chronologia, eaque quam vir doctissimus Petavius Doctrinam temporum nominavit? Sic est; ut quædam die ipsa intereunt subducunturque hominum oculis, sic alia emergunt, atque in lucem hominum conspectumque veniunt, vereque dictum est veteri proverbio: *Discipulus est prioris posterior dies*. Nihil hæc attinet longius persequi, aut ceteras facultates hujusmodi appellare. Ex illis tamen eam, cujus gratia in hunc sermonem veni Sanctitati Tux commemorabo: quæ nec dum facta atque formata, sive omnino protracta in lucem, obsteritiam veluti manum (si hoc verbo uti in re tanta licet) efflagitat. Est autem, quæ in Ecclesiasticis ritibus sacrisque cæremoniis explicandis versatur, atque appellari potest *Liturgia*; si nomen hoc non adeo cogimus in angustum (quod nonnulli faciunt) ut eas cæremonias tantummodo, quæ ad Sacrificium spectant, complectatur; sed latius aliquanto diducimus, ut ritus comprehendat omnes qui ad ceteras functiones Ecclesiasticas attinent sacrorum Ministrorum; qui a veteribus Scriptoribus, ut Du-Cangius animadvertit, dicuntur *Liturgi*. Harum rerum disciplinam magnam partem excultam a doctissimis hominibus, seduloque & diligenter tractatam si negem, videar nimium aut rerum ignarus aut industriæ nostrorum hominum inimicus. Non fallar tamen si dicam, neminem fuisse hætenus qui in unum coegerit omnia a multis pertractata; aut non disputationem de ritibus, alienis omnino disquisitionibus quæstionibusque oneravit. Itaque tractationem hanc ita habuisse videntur, quasi vero esset disciplinæ alterius cujusdam pars, vel nullus potius, sed curiosorum hominum pieque otii cupientium, a severioribus disciplinis diverticulum quoddam non inane nec illibera-

\* Constitutionem *Gloria Domini* motu proprio datam die 22. Junii m. 1747. exhibebimus in Appendixibus: qua obereb reditus novæ Academicæ Liturgicæ beneficentissimus Pontifex attribuit, non

solum ut Magistri quatuor instructi perpetuo sit, sed etiam ut sua Auditorum diligentia remuneratio non desit, splendorque Academicæ conservetur.

virorum doctorum opera, si, quæ seorsum a multis explicata sunt, summi congregarentur & veluti sparsa membra in unum corpus colligerentur, disciplinæ cujusdam species & forma induceretur. In hanc me opinionem primum desecentem demisi. Operum S. T. lectio, ex qua id collegi præterea; non ferme aliunde conquirendas aut expectandas opes, quæ ad instituendam hanc disciplinam viderentur necessariæ; sed faciendum id unum, ut cogerentur, quæ ibidem inveniebantur explicata divissim, prout operis propositi ratio & occasio temporis postulabat. Neque non id S. T. significavi; vidique hoc præstare, tui esse ingenii, tuæ doctrinæ, denique tuæ in bujusmodi rebus exercitationis; a cujus profecto una congressione plus me didicisse profiteor, quam a multorum dierum opera atque intentioni Liturgicorum Auditorum lectione. Nunc quoniam id jubes, ut scriptis mandem cogitationes Tuas (sic enim appellari verius est quam meas), parendum enim vero Tibi est, ac primo illud explicandum; posse harum rerum disciplinam quamdam existere atque efformari.

Nam si Veterum, qui de artium ac disciplinarum natura scripserunt, judicia investigemus, Ars est (artem autem cum dico facultatem, sive disciplinam, sive latiori quodam vocabuli hujus usu scientiam intelligo) Ars, inquam, est multarum cognitionum ad certum finem conducentium certa collectio. Hoc ex Aristotele bono nique in hisce rebus Autore, ex Cicerone apud Diomedem, ex S. Thoma 1. 2. quæst. 57. aliisque summo consensu Philosophi docent, & Theologi. Addunt qui rem adhuc explicatius tractant, Lucianus in Indrica illa sua de Parasito fermocinatione, & Galenus in iis quæ ipsi a quibusdam adscribuntur operibus *Medicæ finitioes*, *Introdutio*, *De optima secta*, cognitiones hujusmodi, neque evidentes apertasque omnibus, nec sine labore aut hominis alicujus disciplina ad assequendum faciles esse oportere. Quæ singula huic, quam dicimus, ritum Ecclesiasticorum disciplinæ, omnino conveniunt. Nam liquet cognitionum hic plurimarum comprehensionem, & ut Galeni verbo utar, coacervationem esse: omnia enim quæ in sacris functionibus exercentur, huic veluti materiæ subsunt. Atqui eadem ad unum quendam certumque finem collimant: quem si aliquis ex me requirat, subjiciam hunc; quod in omni re servandum est, ut hic maxime spectetur teneaturque, *quid deceat*. Cum enim animus in hanc corporis concretionem demissus vinculis veluti quibusdam impediatur, quo minus ad ea quæ materiæ expertia sunt, atque extra labem terrenam posita libere evolare possit, ac necessario ascendere ad ea gradibus terrestrium rerum debeat; convenit esse quædam objecta sensibus, quæ magnifice, decore, atque apparatu quodam obita cælestium rerum magnitudinem pulchritudinemque demonstrent. Itaque (quod veterum Patrum non nemo adnotavit) Eucharistiæ Sacramentum primum conficere in eo cœnaculo Dominus voluit, quod divitis hominis erat grande atque instratum; & Magdalene pietatem a reprehensorum sermonibus vindicavit quod unguenta pretiosa liniendo corpori adhibuisset. Necessè est tamen, hæc ut, quomodo possunt, rationem aliquam & proportionem ad illam nobis speciem cælestium rerum representandam, servant. Atque hoc est ipsum quod *deceris* nomine, quoniam aptius aliud non succurrebat, expressi. Est deinde alterum; ut ab Ecclesiæ disciplina & Majorum institutis ne discedatur. Nimirum hoc, qui in cæremoniis nostris oppugnandis versantur Hæretici (oppugnant autem ferme omnes) magna animorum & studii contentione faciunt, ut novitatem objiciant Catholicis, exprobrentque, longius nos a veteri Majorum disciplina ac simplicitate illa, quam dicunt, morum institutorumque aberrasse. Nec Tu B. P. ignoras (ut taceam cetera, singulare vero aliquid proferam), quibus acrioribus maledictis, Sanctorum Canonizationem, antequam Tu de ejus antiquitate tam certa ac testata proferres, ineesferent, veluti novum aliquid *quod nec in Scriptura nec in pia antiquitate fundamentum ullum habet*, ut cuiuspiam illorum, Francisci nimirum Turretini *part. 2.*

„ *Theolog. quæst.* 7. n. 17. verbis loquar : qui in ritu illo eadem de causâ damnando  
 „ præcentores habuit vel subscriptores, Rodolphum Hofpinianum *de orig. fest. cap. 6.*  
 „ Martinum Kemnicium *exam. C. Trid. p. 3.* Joannem Henricum Heideggerum *ana-*  
 „ *tom. C. Trid. in fest. 25.* Joannem Prideaux *orat. 13. de Canoniz. SS.* Joannem Micræ-  
 „ lium *hyst. Ecclesi. l. 2. fest. 2. num. 18.* Gisbertum Voetium *dissert. de Canoniz. SS.*  
 „ *part. 3. disp. select.* Martinum Chladenium *de Sanctis fustitiis*, Casimirum Oudinum  
 „ *de Scriptor. sac. 8. tom. 1. col. 1680.* Joannem Franciscum Buddeum *orat. 4. de ori-*  
 „ *gin. Canonizat.* Non recitabo vero his antiquiores, inter quos venirent profecto  
 „ Magdeburgenses ; qui hoc præterea præstant, ut singulis Centuriis caput integrum,  
 „ quod sextum esse consuevit, impendant in rituum origines atque antiquitate inqui-  
 „ rendâ. Non debemus autem nos, quam illi sunt in oppugnandis, in tutandis atque  
 „ antiquitate quæ conveniat asserenda, minus esse diligentes ; vel, si opus sit,  
 „ commutationum, quæ in disciplina contingere recte possunt, æquitas & causæ pro-  
 „ ferendæ. Sunt hi ergo de rituum decore & antiquitate duo, vel unus potius certus  
 „ definitusque finis, qui convenientiæ nomine continetur, ad quem omnis hujus sa-  
 „ cultatis cognitio atque investigatio tendit : quem profecto assequi, nemo, esse multæ  
 „ operæ ac multarum literarum, neget. Nam quod primum spectat ; cum Tullio te-  
 „ ste, difficillimum sit in unaquaque re videre quid deceat ; multo hoc est in sacro hoc  
 „ argumento difficilior. De altero quivis per se videt, cujus hominis sit sanctissimo-  
 „ rum Patrum instituta cognoscere, traditionis veritatem expendere, antiquitatem  
 „ excutere omnem ac diligenter perscrutari. Sunt ergo hæc, quæ ad facultatis unius  
 „ constitutionem requiruntur, omnia ; satendumque est disciplinam posse quamdam  
 „ sacrorum rituum efformari, quæ seorsum per se ipsa excolatur, verseturque & do-  
 „ ceatur in adolescentium scholis.

„ Quin igitur facimus, ac proprium illi Magistrum atque auditores tribuimus,  
 „ educimusque ex ea, ubi hætenus diversata est, sive Theologiæ, sive Canonici juris,  
 „ sive Ecclesiasticæ Historiæ schola ? Ac ferme video evenisse hoc in omnibus discipli-  
 „ nis ; quod in mundi conditione Philosophi veteres ac Poetæ tradidere ; ut primum  
 „ commixta omnia confusaque simul prodirent, quæ dies postea secrevit distinctionem-  
 „ que attulit, atque expolivit : nam tractu temporis, cum excoli diligentius cœpissent,  
 „ quælibet sibi Magistrum atque auditores diversorumque invenit : antea vero unâ  
 „ omnes scholâ atque uno sortasse nomine continebantur. Atque, ut omittam quam  
 „ Tullius sæpe memorat, extitisse olim Philosophiæ atque Eloquentiæ conjunctionem,  
 „ ac Poeticæ etiam facultatis, ut Strabo, Maximus Tyrius, atque Aristoteles tradit ;  
 „ quæ erat antiquitus Theologia sive ut Clemens Alexandrinus vocat Pædagogia,  
 „ quasque profitebantur illi, quos ille Gnosticos vocat ; nisi disciplinarum omnium sa-  
 „ crarum, quas nunc in tot facultates distinguimus tribuimusque, cumulus quidam,  
 „ quæ ab eodem viro doctissimo sanctissimoque definitur *veritatis directio ad Dei contem-*  
 „ *plationem* ? aut quid antiquissimorum illorum libri fuerunt, nisi perpetuus ex præcis  
 „ Auctoribus, quæcumque ad res Divinas spectarent, sententiarum contextus, quos  
 „ ideo stromata appellarunt ; qualis ipse Clemens, & Origenes, teste Hieronymo, alii-  
 „ que antea conscripserunt : quam quidem disciplinarum congeriem quamdam, alii ad  
 „ subnascentes hæreses oppugnandas conversi, alii ad Canonicorum librorum sensû ex-  
 „ ponenda, ad fovendam alii pietatem Christianorum, distinxerunt in tres sacras facul-  
 „ tates, quas nunc sacræ Scripturæ scientiam, dogmaticam, mysticamque Theolo-  
 „ giam appellamus. Quod si ad eas, quæ nunc in scholis dominantur sacras tres alias fa-  
 „ cultates adjiciamus ævum, scholasticam Theologiam, Theologiam moralem, Ca-  
 „ nonicam facultatem, illas inter se posteriorum temporum experientia ususque distra-  
 „ xit. Nam quamquam Scholasticæ difficile sit initia statuere, quod de ejus descriptio-  
 „ ne inter Auctores nondum constat ; si tamen, ut plerique censent, eam facimus,  
 „ „ quæ



quæ præter auctoritatem, rationem maxime advocet ad placita Theologica stabilienda, ac subtiliori methodo quadam res omnes ad certa quædam capita & pronuntiata revo-  
cet, brevique modo & sermone trahet, vel ad Joannem Damascenum cum Cæsare  
Bulæo, vel ad Anselmum cum Cardinali de Aguirre, vel ad Tajonem Casaraugus-  
tanum cum Mabillonio, & ad Lanfranchi Cantuariensis ac Petri Abaelardi opera,  
vel ut vulgo faciunt ad sententiarum Magistrum Petrum Lombardum referenda est.  
Quæ sequuntur duæ, certe inferioribus temporibus hæc tantum ratione tractatæ sunt,  
ut novam quamdam disciplinam constituerent atque efformarent. Facultas enim Cano-  
nica Eugenii III. ætate a Gratiano obtinuit eam dignitatem, quem ad id Irnerii ex-  
emplum adduxit, a quo fuerat Jus civile restitutum; quemadmodum observavit Bulæus.  
Moralis vero Theologia vel ad S. Raymundi tempus, si Mabillonium sequimur, vel  
si Petrum Ballerinum, ad S. Antonini Archiepiscopi Florentini ætatem rejicienda.  
Atque hæc facultates, ut iidem Auctores narrant, unius Theologiæ nomine olim ve-  
niebant, unaque in Theologica schola tradebantur & discabantur. Quod igitur sa-  
rum in illis sapientum operâ nunc latetur, idem confido futurum, idque nos  
S. T. maxime debituros, ut Liturgica disciplina nostra proprios habeat Magistros, pro-  
prias sedes, quas habet & in quibus dominetur.

Quamobrem veniam ad id, quod mihi propositum est secundo loco; ut rationem  
certasque tribui res ac digeri in certas classes possint, partemque informem, qui-  
bus justum corpus unius cujusdam sive artis sive scientiæ efficiatur. Hanc vero ratio-  
nem sufficiens libri ipsi Ecclesiæ Romanæ usu recepti atque approbati, quibus ritus  
omnes sive cæremoniæ continentur. Ac sane lætandum esse video, quod post vindi-  
catam a sanctissimo Tridentino Concilio rituum nostrorum sanctitatem, in eo maxi-  
me versata sit Decessorum tuorum cura; ut plurimos qui antea serebantur cæremoni-  
ales libros ad paucissimos contraheret, eosque, adhibitis doctissimis prudentissi-  
misque viris, recenseret atque emendaret. Fuisse olim Ecclesiasticos, quos dicunt,  
libros sane multos, veteres Scriptores qui eorum meminerunt, declarant. Quamvis  
enim Dominicus Georgius ex intimis Sanctitatis Tuæ Sacellanis de libris agens Li-  
turgicis Romanæ Ecclesiæ *differt. 2. tom. 2. de Liturg. R. P.* hos libros omnes libro  
Evangeliorum, Lectionario, libro Sacramentorum, atque Antiphonario, quatuor his,  
definiat; qua significatione Liturgicos hic appellamus, idest quorum in functionibus  
sacris omnibus aliquis usus esset Latinarum saltem Ecclesiarum, constat sane fuisse  
plures. Quamobrem vir summus Cardinalis Bona *Divin. psalmod. cap. 18. §. 20.* re-  
ceniet Psalterium, Lectionarium, Colleccionem, Antiphonale, Hymnarium, Mar-  
tyrologium, Rituale, Cæremoniale, Sacerdotale, Pontificale, Missale, Graduale,  
Diurnum, Breviarium. Nec vero fuit vir ille doctus plus æquo liberalior. In Ahy-  
tonis Episcopi Basileensis Capitulari (*tom. 4. collect. Hard. col. 1241. num. 6.*) nomi-  
nantur, Sacramentarium, Lectionarium, Antiphonarium, Baptisterium, Computus,  
Canon Penitentialis, Psalterium, Homilie per circulum anni. In polyptico S. Remi-  
gii Remensis (*ap. Baluz. in not. ad capitular. tom. 2. col. 1159.*) Missale, Capitulare  
Evangeliorum de circulo anni, liber de computo, de ordine Baptismi, Martyrologium,  
Penitential, Passionale, Canonum volumen, Homilie quadraginta S. Gregorii. Bur-  
chardus lib. 19. decret. cap. 8. habet Psalterium, Lectionarium cum Evangelii, Sacra-  
mentorum librum, Baptisterium, Computum cum cyclo, cum commendationibus anima-  
rum, Martyrologium, Homilias per circulum anni. Ecclesiastici libri qui in antiquis  
constitutionibus ordinis Vallis-Caulium (*tom. 4. Anecd. Martene col. 1653.*) singu-  
lis monachis tribuantur hi sunt Missale, Epistolæ, Textus, Colleccionum, Graduale,  
Antiphonarium, Hymnarium, Psalterium, Lectionarium, Kalendarium. Enumerant  
certe singuli distinctorum librorum nomina: atqui alia tamen reperiuntur quæ  
præcedentibus non distinxerim *Officiale, Responsale, Benedictionales libri, libri Curie,*

22 *marii, Ordines, Apostolus, Comes.* Addendus tamen *liber Diurnus Romanorum Pontifi-*  
 23 *cum*, in quo præter formulas scribendi quibus sexto septimoque & octavo sæculo  
 24 ac nono summi Pontifices uti solerent, ritus etiam in eorum Ordinatione ac Consecra-  
 25 tione adhiberi soliti continentur. Atque optandum sane esset ut quemadmodum  
 26 de Ecclesiasticis Græcorum libris eruditissimam dissertationem scripsit Leo Allatius,  
 27 cui veluti supplementum aliam adiecit Guillelmus Cave, ita etiam veteres Latinorum  
 28 Ecclesiastici libri laudatorem aliquem narratoremque nanciscerentur.

29 Qui nunc feruntur Liturgici libri, quibus Ecclesia Romana utitur, sunt in promptu  
 30 omnibus. Præter Missale & Breviarium, quorum antiquus est usus ac nomen: nam primi  
 31 etiam in Capitulari Caroli Magni (10m. 1. Baluz. col. 724.) mentio fit; alterum, et si  
 32 Cursus nomine designatum monet Mabillonius *init. disquisit. de curs. Gallic.*, tamen ita  
 33 quoque nominatum tradit Paschasius Quesnellus, cum initio folas rubricas sive ordinem  
 34 Officiorum contineret: præter, inquam, Missale, & Breviarium tres proponendi viden-  
 35 tur Liturgico Magistro Rituale, Cæremoniale, Pontificale. *Rituale* successit in *Sacerdo-*  
 36 *talis* locum quod Rituale erat quoddam copiosius, ut Macri tradunt: longitudine ta-  
 37 men fuit, atque ipsa copia varium, ut ex ejus editionibus constat. In Venetia anni 1555.  
 38 legitur, illud collegisse summis laboribus & vigiliis atque elaborasse Albertum Castel-  
 39 lanum Venetum Ord. Præd. cujus Pontificalis recensionem ann. 1497. commemorat  
 40 Echard; hanc vero præterivit, & male Miræum putavit suæ nomine nostram hanc  
 41 designasse. In catalogo Bibliothecæ Tellerianæ recensetur *liber Sacerdotalis collectus*  
 42 *et Leonis X. auctoritate approbatus.* Rituale igitur primo loco collocavi, utpote ex  
 43 reliquis Cæremonialibus libris communiorum pluribus, quod Paulus V. anno 1614.  
 44 die 17. Junii *Ritualis Romani* nomine proposuit Apostolicis litteris; *ut uno volumine*  
 45 *quemadmodum ipse ait, comprehensæ sacri et sancti Ecclesiæ Catholica ritus, qui in*  
 46 *Sacramentorum administratione aliisque Ecclesiasticis functionibus servari debent ab iis*  
 47 *qui curam animarum gerunt, Apostolicæ Sedis auctoritate prodirent.* ad cujus volumi-  
 48 nis præscriptum in tanta Ritualium multitudine sua illi ministeria, tamquam ad publicam  
 49 et obsequiatam normam, peragerent, *nuoque ac fidei ductu inoffenso pede ambularent cum*  
 50 *consensu.* Hac quidem libri hujus commendatione reliquos similes abrogasse Ro-  
 51 manus Pontifex non videtur: quare post illum editum prodierunt in usum alii alia-  
 52 rum Ecclesiarum ut *Processionale & Pastorale* pro Ecclesia Mechliniensis, *Rituale*  
 53 *Argentinense*, alique vel his, vel similibus Ordinum, Agendorum, Cæremonia-  
 54 lium nominibus. Hujus tamen Pauli V. Ritualis Liturgicæ scholæ, cui Roma-  
 55 næ Ecclesiæ ritus attendendi præcipue sunt, habenda est ratio, quod solum  
 56 nunc est & dici vere potest *Rituale Romanum*: etsi aliud nomine hoc paginæ pri-  
 57 mæ præfixo edi ceptum sub Paulo V. quod ipse Paulus in litteris Apostolicis citatis  
 58 laudat, narratque in suo conficiendo a se consultum, Julii Antonii Cardinalis  
 59 Sanctorii. In ejus exemplo, quod in Collegio Romano extat, inveni scriptum  
 60 manu Cardinalis Bellarmini, ad cujus etiam bibliothecam pertinebat: *Hic liber*  
 61 *collectus est a Cardinali S. Severinæ longo tempore et maximo labore. Et siqui-*  
 62 *dem sub nomine prædicti Cardinalis fuisset impressus dempto illo verbo Romani*  
 63 *potuisset libere communicari cum omnibus: sed non placuit iis ad quos pertinebat,*  
 64 *ut cum nomine Romani publicaretur, et non placuit heredi Cardinalis, ut sine no-*  
 65 *mine Romani exiret: ea causa est, cur hic liber licet non aspicitur, et impressus ac*  
 66 *mutus extet in privatis bibliothecis.* Mutus est in fine, ut alibi scriptum reperi,  
 67 quod aliquas Benedictiones contineret quæ in usu non sunt. Suppletum est tamen  
 68 quod deerat, typisque editum a *De Rubricis*, cum facultatem hanc impetrasset Cl. Vignor-  
 69 lius & Fontaninus a Benedicto XIII. edita est etiam libri inscriptio ejusque frontis  
 70 præfixa *Rituale Sacramentorum Romanum Gregorii Papæ XIII. Pont. Max. jussu editum.*  
 71 *Romæ 1584.* Hujus Ritualis exemplum vidi in privata bibliotheca Quirinæ S. T. ia

quo recensabantur ii, qui in eo opere conficendo operam navarant, quod est descriptum ex alio item exemplo quod asservatur in Etsi Cardinalis Passionis litteratissimi Principis & litterarum litteratorumque hominum amantissimi instructissima bibliotheca: in utroque ergo legitur: *Rinale Julii Antonii Sanctorii Casertani S.R.E. Episcopi Cardinalis Prænensis S. Severinae nuncupati; adhibitis ad hoc opus doctissimis, & præstantissimis viris, & rerum Ecclesiasticarum peritissimis Episcopo Audomarenfi, VVilhelmo Lindano Ruremundensi Episcopo, Cesare Speciano Novariensi & postea Cremonensi Episcopo, T. Joanne Polanco Jesuita, P. Roberto Bellarmino qui postea fuit Cardinalis, Curtio Franco Canonico S. Petri in Urbe, Marcello Francolino, Federico Metio qui postea fuit Termularum Episcopus, T. Benedicte Justiniano Jesuita Rectore sacrae Penitentiariae, Francisco Penia Romanae Rosae Auditore, Ludovico Creil Sorbona Parisiensis Syndico, & Marcello Majorano Episcopo Accerrarum*. Editus est hic liber in quarta magni folii forma, quam dicunt quartum magnum: licet Meratus editum dicat in folio anno 1634. Alterum rituum Ecclesiasticorum librum dixi *Pontificale*; quod nimirum Clemens VIII. anno 1596. die 20. Februarii Constitutione *Ex quo* abrogatis aliis edidit, postquam ab eruditis viris atque in sacris caeremoniis exercitatis emendandum dedisset, testatus postea; nihil ab antiquis Pontificalium codicibus, qui tum in clarioribus Urbis ecclesiis, tum in Vaticana bibliotheca atque aliis insignibus locis asservantur alienum aut discrepans irreperisse. Post Clementem VIII. Urbanus VIII. Pontificale recensuit an. 1644. cum plurimi errores denno in Pontificale typographorum inscisia seu incuria, aliunde de causa irreperissent, ut dicitur in ejus Constitutione *Quamvis alias* Pontificali eidem præfixa: quod iterum editum est sub Benedicto XIII.; mandatu tamen ut nihil immutaretur. Ex eo ritus Confirmandi, una cum ritu parvulos baptizandi vulgatus Romæ ann. 1725. in cujus libelli fine legitur: *Roma de speciali mandato SS. D. N. Benedicti XIII.* Licet verò in sacris ritibus peragendis alio ab hoc Pontificali libro uti, Constitutione Clementis non liceat; minime tamen interdium, immo utile Magistro puto, in aliis etiam antiquioribus cognoscendis operam aliquam collocare: poterit enim singularum ætatum, vel etiam Ecclesiarum disciplinam ritusque cognoscere. Atque hanc quidem fuisse causam cur Innocentius VIII. Augustino Patricio libri hujus, in quo antea Guillelmi Durandi Episcopi Mimatensis labor versatus fuerat, emendationem commiserit, Patricius ipse in præfatione antiquissimæ editionis Romanæ anni 1485. narrat; quod nimirum ille non tam universalis Ecclesiæ quam Mimatensis suæ rationem habendam duxisset. In aliis postea editionibus, quibus Burcardus, quem sibi socium in recensione illa Patricius adfiverat, Jacobus de Lucii, Albertus Castellanus, alique manus admove- runt, alia vel addita vel omissa vel ordine commutata, prout illarum caeremoniarum usus tempore invaluerat, aut fuerat aliquo sive decreto sive consuetudine ipsa abrogatus: quod ex *scrutinio Episcoporum serotino* quod appellatur & *Pontificalibus Benedictianis* atque hujusmodi aliis quibusdam intelligere licet. *Cærimoniale*, quem tertium dedi rituum Magistro librum cognoscendum versandumque, intellexi præcipue Episcoporum, quod ad omnes Episcopali dignitate initiatos pertinet; quodque a tribus Pontificibus recognitum editumque est a Clemente VIII. Constitutione *Cum novissime* die 14. Julii 1600., ab Innocentio X. Constitutione *Quamquam alias* die 30. Julii 1650., a Benedicto XIII. Constitutione *Licet alias* die 7. Martii 1727. Sed quodd expressum id totum est (quemadmodum nuper etiam in præloquio suo ad illud adnotavit Joseph Catalanus) a Paradisi Crassi Bononiensis olim Apostolicarum caeremoniarum Magistri ac Episcopi Pissarenfis libris de caeremoniis Cardinalis, necnon e Romani ipsius Pontificis sive Pontificiæ Cappellæ Cærimoniali; hæc quoque cognoscenda sunt, Præceptorum nostro; atque alterum præcipue, quo ritus omnes explican-

,, tur

„ tur qui ad Romani Pontificis personam spectant . Ac sane habenda gratia est Christo-  
 „ phoro illi Marcello electo Corcyrensi Episcopo , quod primus anno 1516. Venetiis de  
 „ his ritibus librum ediderit Leoni X. dedicatum inscriptumque hoc titulo: *Rituum Ec-*  
 „ *clesiasticorum sive sacrarum Cærimoniarum Sanctæ Romanæ Ecclesiæ libri tres non ante*  
 „ *impressi*, quem librum titulo paulisper inverso impressum vidi in folio Romæ an. 1560.;  
 „ in octavo Colonia Agrippinæ ann. 1557. & anu. 1572; in quarto Venetiis an. 1582.  
 „ utcumque primam illam editionem ægre adeo tulerit , quem supra nominavi , Paris  
 „ de Crassis , quasi mysteria enuntiaverit , quibus enuntiatis majestas & dignitas Ro-  
 „ mani Pontificis minueretur . Sed tota Paridis querela & Marcelli accusatio , quam  
 „ in Museo Italico Mabillonius recitat , nihil continet adeo atrox ac temerarium , ut  
 „ non multum illi , ac plus fortasse quam Paridi ipsi , debeamus . Quamquam totum illud  
 „ Augustino Patricio debere nos vult Paris ; quasi ab illo opus hoc Marcellum compila-  
 „ rit , edideritque falso nomine suo , interpolatum tamen corruptumque multis in locis.  
 „ Utcumque sit , Cærimonialium librorum suppellectili ille continetur ; adificiendique  
 „ præterea in eam sunt cum Paridis ipsius liber cærimoniarum qui extat apud Martene  
 „ de antiqu. discipl. in Divin. Offic. tum Ordines Romani quos Mabillonius præ cete-  
 „ ris diligentius collegit : sunt enim omnes Romani Pontificis libri Cærimoniales ; non  
 „ is solum qui inscriptus hoc nomine inter eos reperitur Gregorii X. Est præterea  
 „ quod his adjiciamus Cærimoniale Gregorii XV. jussu editum pro Romani ipsius Pon-  
 „ tificis electione .

„ Quos hæcenus numeravi libri , nec vero non in omnium versantur mani-  
 „ bus , in partes suas ac veluti membra digेरunt hanc disciplinam . Quemadmodum  
 „ enim in Jurisprudentia sive Civili sive Canonica sit , ut per titulos , & leges sive capita  
 „ decretorum discurrentes jus universum explicemus ; idem præstare possumus , hoc  
 „ servato librorum ac partium illorum ordine , ut de ritibus ac cæimoniis omnibus  
 „ disseramus . Titulorum enim vices implere possunt sive capita sive rubricæ , quas di-  
 „ cunt , sive partes illæ in quas sunt ordine distributi . Nam quamdam distributionem  
 „ rerum in iis digerendis Majores nostri diligenter spectarunt ; ut vel ex Pontificali  
 „ constat : & initio sui Augustinus Patricius hanc repræsentavit , adjecta longa titulo-  
 „ rum tabula , cui præfixa erat hæc inscriptio : *Pontificalis Ordinis liber incipit , in quo*  
 „ *ea tantum ordinata sunt , quæ ad officium Pontificis pertinent ; qui tres in se partes con-*  
 „ *tinet : in quarum prima de Benedictionibus , Ordinationibus , & Consecrationibus perso-*  
 „ *narum ; in secunda de Consecrationibus et Benedictionibus rerum ; in tertia vero de qui-*  
 „ *buscumque Sacramentis et Ecclesiasticis Officiis agitur* . Brevis itaque præceptio est ; si ita  
 „ hanc facultatem tractandam explicandamque dicamus , quemadmodum Canonicum  
 „ sive Civile jus a Doctoribus atque earum facultatum Magistris tractatur . Habent  
 „ enim inter fe non exiguam cognationem atque affinitatem : est illud vivendi sive cum  
 „ hominibus agendi lex ; hoc fundendi Cælestibus preces , sive cum Deo agendi . Sunt  
 „ ibi dogmata , a quibus discedere non licet , libris & juris textu , ut ajunt , expressa :  
 „ hi quoque libri sunt auctoritatē Pontificum commendati , quibus conformare cæremo-  
 „ nias nostras debemus : qui quidem tantum etiam auctoritatis obtinent , ut secundum  
 „ illos judicari etiam in foro sanctum sit . Itaque librum Pontificalem allegari posse etiam  
 „ antequam a Clemente VIII. corrigeretur litterisque Apostolicis datis confirmaretur  
 „ Joannes Andreas cap. de gradatio: de penis in 6. docuit ; allegatur etiam in Clem. unic.  
 „ de jur. jur. post confirmationem habere vim legis , nec licere ab eo recedere tradit  
 „ Fagnanus in cap. Presbyter : de Sacram. non iterand. num. 41. & Cærimoniale vim ha-  
 „ bere legis Cardinalis de Luca de jurisd. disc. 31. n. 5. Urfaya tom. 5. part. 2. discept. 13.  
 „ ff. 1. num. 25. et tom. 9. part. 1. discept. 27. num. 6. aliiq; Juris interpretes tradi-  
 „ derunt . Denique habet hæc quoque rituum sacrorum facultas Glossatores quos con-  
 „ sulamus sive Doctores suos ; qui quidem ut singuli recenseantur , vix postulari ab  
 „ „ otioso

otioso potest. Quam multi enim in Missale & Breviarium scriperunt ; ut licet diversis titulis libros suos discriminare voluissent videantur , vel diversum sibi finem munusque præfinire , multitudine tamen , in idem sive argumentum sive inscriptionem inciderent. Itaque de Missæ Mysteriis libros inscriptos legimus Innocentii III. , Michaelis Sydoniensis , Francisci Titelmanni , Laſtanli Radſoldi , Angeli Conti , Joannis Superantii : de Missæ officio Joannis Brunefumſch , Henrici Diſſen , Mutii Capucini . De Missæ expositione Nicolai Cabafilæ , Joannis Baptiſtæ Monachi Caſſinatis , Joannis Serrani , Jo: Clivioei . Cæremonias illius se tradere proſeſſi M. Antonius Ghenare , Capponus a Porreſta , Melchior Huelamus , Nicolaus Aurificus , Petrus Lopez , Jo: Alcocer , Pompeus Sarnellus . In rubricis Miſſalis ſcribere Paulus Quarti , Henricus Piſart , Vallemontius : Ritus privatæ Miſſæ expoſuere Philippus Angeli , Jacobus Cardin . Cantelmus , Conſtantineus Hagerer , Splendianus Pennazzius , Pytonillus , Certani . Cavedorum in Miſſæ ſacrificio monitores ſe præbuerunt Stephanus Martinus , Petrus Matthæus de Rubeis , Alexander Sperellus , Jo: Paulus Montius , Hieronymus Franſonus . Quæſtionum dubiorumque quæ occurrerent judices Joannes de Lapide , Jacobus Junterbech , Lucas Cerracchiniuſ , del Teraize , Michael Timotheus ; cujus poſtremi admirari licet ingenii ſecunditatem qui ſexcentas quæſtiones excogitare potuerit in Miſſam , uti trecentas in Officium : de quo Officio ſive de horis Canonicis ſcriptores paſſim nominantur Joannes Beleth , Tobias Lohner , Joannes Andreas Maſſei , M. Franciſcus Samarinus , Schultingius qui omnes de Miſſa etiam ſcribere , præcipue vero Edmundus Martene de *Divin. Offic.* : præterea Petrus Perſicus , Bernardinus de Sandoval , Henricus Piſart , Benediſtus Herbeſtus , Alphonſus de Medrano , Bruno Neuſſer , Franciſcus M. Maggii , Marcellus Francolinus , Ludovicus Thomasinus , Joannes Grancolas . Nec ſane pauciores in cæremoniis explicandis verſati ſunt , quæ vel in Rituali , vel in Pontificali & Cæremoniali continentur . Non enim ii ſoli , qui libros hos ſibi univerſos explicandos propoſuere , Præceptorum ſacrorum rituum , Doſtorum ſive Interpretum numero habendi ; inter quos perpetuis nuper commentariis Cæremoniale & Pontificale illuſtrare conatus eſt Joſeph Catalanus , & Rituale Romanum non ita pridem Hieronymus Baruffaldus : ſed qui unum aliquem ritum ſecere ſuarum lucubrationum argumentum , hi legendi verſandique multo magis : video enim ſere accidere , ut doſtiores ab eis qui ſingularium rerum doſtores extitere , quam ab illis qui omnes complexi ſunt , diſcedamus .

Vereor ne dum parere S. T. conor , non commiſſi modo mihi muneris ſed modestiæ ac reverentiæ fines prætergrediar . Sed me neſcio quomodo juvandi ceteros ( quod fortaſſe non poſſum ) deſiderium , ſtudioſumque hanc ſcientiam amplificandi loquaciore ſecit , animoſque ſecerunt clementiſſimæ litteræ tuæ . Itaque non temperabo mihi antea quam explicatiorem adhuc modum propoſuero , quo tradi in ſcholis rituum ſacrorum ſcientia poſſit ; de quo ſedulo cogitanti multi occurrebant animo ; ac primùm qui Inſtitutionem Jurisprudentiæ ſive Civilis ſive Canonice rationem imitaretur , revocaretque omnia ad *Res* , *Perſonas* , *Judicia* . Deinde in mentem veniebat ſimilis huic modus , qui partes quatuor conſtituens , res omnes his quaſi membris comprehendebat , I. *De Eccleſiis* . II. *De Divinis Officiis* . III. *De Sacramentis* , *Sacramentalibus* , & *Benedictionibus* . IV. *De Eccleſiaſticis Judiciis* . Quam diſiſionem , quoniam commodè complexi res omnes videtur ; & modos plures , ut pro cujuſque arbitrio eligendi poteſtas ſit , proponere placet , explicatius hic trademus .

I. *DE ECCLESIIS* . De Eccleſiarum partibus , ornamentis , dedicatione , reconciliatione . De Eccleſiarum Præſulibus eorumque Miniſtris ; atque illorum eleſione , muneribus juxta veterem novamque Eccleſiæ diſciplinam : quo loco agetur de Romano Pontifice ejuſque eleſione & conſecratione ; de Episcopis Cardinalibus ; de Cardinalibus Treſbyteris ; de Cardinalibus Diaconis ; de Episcopis ; de Preſbyteris &c.

II. *DE*

II. DE DIVINIS OFFICIIS. De varia Ecclesiæ Occidentalis Liturgia tum orthodoxa tum heterodoxa, de ejus Authoribus, & qua lingua conscripta sit, & modo quo peragatur. Item de Occidentalis Ecclesiæ Liturgia. De Missæ celebratione. De apparatus Missæ. De rubricis libri Missalis. De defectibus in celebratione Missæ. De partibus Missæ. De Missa Romani Pontificis. De Missa Cardinalis Legati. De Missa Cardinalis in sua Diocesi vel Ecclesiâ. De Missa solemnî Cardinalis coram Romano Pontifice. De Missa Episcopi coram Romano Pontifice. De Missa privata coram Romano Pontifice. De Missa solemnî coram Cardinali Episcopo, vel Legato, vel in sua Ecclesiâ Titulari. De Missa privata coram suo Episcopo, vel Legato, vel in sua Ecclesiâ Titulari, aut Diocesi. De Missa Canonicorum.

De Psalmodia. De libris ad Psalmodiam spectantibus. De cantu Ecclesiastico. De antiquo ac novo usu psallendi in Ecclesiâ Occidentali; item in Orientali. De partibus Psalmodiæ. De rubricis circa regulas Psalmodiæ.

De festis diebus per anni circulum. De festorum celebratione & translatione. De veteri ac nova disciplina in peculiaribus Ecclesiæ solemnitatibus & diebus. De regulis seu rubricis ad dies festos spectantibus.

III. DE SACRAMENTIS, SACRAMENTALIBUS, ET BENEDICTIONIBUS. De ritibus in Baptismo in Ecclesiâ Occidentali. De antiquis & novis ritibus Baptismi. De Baptismo collato a Romano Pontifice. De Baptismo collato ab Episcopo Cardinali, seu Legato. De Baptismo collato a Cardinali non Episcopo nec Legato. De Baptismo collato ab Episcopo. De Baptismo collato a Presbytero. De ritibus Baptismi in Ecclesiâ Orientali.

De Confirmatione. De ritibus Confirmationis tum veteribus, tum nostro ævo adhibitis. De Confirmatione per Romanum Pontificem, & Cardinalem Episcopum, tum Legatum & Episcopum. De Confirmatione apud Orientales.

De Sacra Eucharistia. De Eucharistiæ adoratione, asseruatione, expositione tum in Ecclesiâ Occidentali, tum in Orientali.

De Pœnitentia. De Sacramento Pœnitentiæ, ejusque antiquitate, & ritibus in utraque Ecclesiâ. De Pœnitentiâ & absolutione publica. De Canonibus pœnitentialibus. De Jubilæis & Indulgentiis earumque ritibus atque institutione.

De extrema Unctione. De ritibus & caeremoniis in extrema Unctione adhibitis in utraque Ecclesiâ. De ritibus servandis in Christi fidelium agone; De sacro Viatico ministrando summo Pontifici, Cardinalibus, Episcopis, Presbyteris, Fidelibus. De Sepulchris & cura defunctorum tum veteribus sæculis, tum nostro. De exequiis & funere Romani Pontificis, S. R. E. Cardinalium, Episcoporum, Regum ac Principum, Presbyterorum, Fidelium omnium.

De Ordine. De Ordinationibus Presbyteri, Diaconi, Subdiaconi, inferiorum Clericorum.

De Matrimonio. De Matrimonii ritibus & caeremoniis apud Latinos, & apud Orientales.

De Benedictionibus. De Romano Pontifici reservatis; Benedictione Agnorum, Ensis; Pilei, Rofe aurea &c. De Benedictionibus Cardinalium Legatorum, tum Cardinalium Episcoporum, Presbyterorum, & Diaconorum in suis Ecclesiis. De Benedictionibus Episcoporum. De Benedictionibus Presbyterorum, quas Benedictiones collocare etiam licet diebus suis per anni circulum. De solemnibus Litanis, & Supplicationibus.

IV. DE JUDICIIS. De Sanctorum Canonizatione ejusque ritibus; De caeremoniis ac ritibus Beatificationis Servorum Dei; De Conciliis Papa præfente, & absente &c.

„ Visum tamen mihi est ad brevitatem aptius atque ad juvandam discipulorum memoriam rem ita instituere, ut librorum, quos dixi, a Romana Ecclesiâ probatorum ratio habeatur; sed partitio omnis sumatur a personis ad quas hi ritus spectant. Atque hæc videntur esse præcipue tres; Romani nimirum Pontificis, reliquorum Episco-

porum, Presbyterorum, aliorumque inferiorum Ministrorum. Hinc ergo tres mihi suboriuntur hujus disciplinæ partes; quarum prima agit de ritibus ad Romanum Pontificem pertinentibus; altera de caeremoniis, in quibus celebrandis partes sunt Episcoporum; denique tertia de ritibus, quos servare Presbyteri ac Ministri inferiores debent.

„Ritus ad Romani Pontificis personam spectantes continentur, ut diximus, Christophori Marcelli Caeremoniali, Caeremoniali Gregorii XV. cujus epitomes est quædam a Francisco Incoli elaborata; quibus adjungendæ Romanorum Pontificum Constitutiones deinceps editæ; ut Urbani VIII. *Ad Romani Pontificis*, & Clementis XII. *Apostolatus officium*. Agendum enim primo de Caeremoniis in electione Romani Pontificis usurpari solitis, in ejus ordinatione, consecratione, coronatione: de conclavi, de Cardinalium in id ingressu, de exequiis Pontificis defuncti: in quam rem multa Passerius de election. Lavorinus variar. Incubrat. de elect. canonic. tit. 4. Menardus not. 779. in Sacrament. S. Gregorii Thomassinus vet. discipl. part. 2. lib. 2. Mabillonius in commentar. ad Ord. Roman. cap. 17. Martene veter. rit. part. 2. lib. 1. cap. 8. art. 1. Plettenbergius in notis. &c. De coronatione Romani Pontificis libellum edidit Joseph Stephanus Valentinus, qui etiam de levatione seu portatione Romani Pontificis de osculatione pedum, M. Antonius Mazaronus de tribus coronis & de osculo pedum. De quo postremo argumento Saussayus in append. ad pap. nepl. Episcopos. De Romani Pontificis nomenclatura Angelus Rocca; de quo & Sirmondus ad Ennodium, Thomassinus veter. discipl. &c. Idem Rocca de tiara Pontificia, Joseph Suarez de croce veste Card. in conclavi.

„Secundo huc ritus pertinent adhiberi soliti in Beatificatione & Canonizatione Sanctorum, de quibus agit laudatum Caeremoniale & Scriptores, qui vel Canonizationis argumentum traxerunt ut Malvetius, Castellinus, Scacchus, Castellanus, Matræ, Rocca, Contelorus, Matthæucci, Agnellus Onoratus &c. vel qui Acta habitatum Canonizationum exhibuerunt Penia, Galefinus, Chiapponus &c.

„Tercio hanc partem de Caeremoniis Romani Pontificis faciunt, quæ ad ejus Consilium spectant; ritus nempe creationis Cardinalium, Consiliorum, & Congregationum, Convivii sollemnis Romani Pontificis cum Cardinalibus &c. de quibus Hieronymus Manfredus & Hieronymus Platus de Cardinal. Panvinus de Episcop. Titul. et Diacon. Cardinal. Jacobus Cohellius notitia Cardinalatus, Card. Brancatius de privileg. Card. in propr. Capp., de optione seu Episcopos, de position. Card., de Benedict. Diacon. Card. Palaeotus de consultationib. sacri Consistor. Casalius de veter. Christi. ritib. Cardinalis de Luca relat. Cur. Rom. Alemannus de pariet. Lateranens. &c. De Aulicis Romani Pontificis, Bonanni Hierarch. Ecclesiast. Ludovicus Crescollus in Mystagog. De Magistris sacri palatii Apostolici P. Fontana Ord. Præd. De Apostolici sacrarum Præfectis Angelus Rocca. Horum cognitio, ut etiam ceterorum qui de Romanorum Præfatum Collegiis sive Ordinibus scribere, Ecclesiasticorum rituum Magistrum nonnihil juvabit. Itaque non negligendi Fatinelus de Fatinelis de Collegio Referendariorum Votantium signaturæ iustitiæ; Joannes Ciampinus de Abbreviatorum de Pareo Majori dignitate & privilegiis, item de S. R. E. Vicecancellario; Hieronymus Faber & Hieronymus Andreucci de Protomarchis Apostolicis; Dominicus Berninus de sacre Romana Rotæ Auditoribus; Joseph Hortensius, & Jacobus Gregorius de Rubeis, neonen Carolus Cartharius de sacri Consistorii Advocatis &c. De Ministris qui summo Pontifici inter solemnia Sacrorum assistebant fuisse Dominicus Georgius tom. 2. dissert. 1. Liturg. Rom. Pont.

„Subjici his quarto possunt Benedictiones quas impertire vel ipse solet Romanus Pontifex; ut cereis imaginibus sacris, quas agnos Dei dicunt, rosæ aureæ, pileo, ensi &c. vel quas ex concessione ipsius alii largiuntur in sacra numismata, parvas icones sive à

„ gna Christi Crucifixi &c. qui locus esse etiam videtur ageodi de Jubilæo, præcipue de  
 „ ritibus quibus Romæ singulis vigintiquinque annis celebratur. De his libri plurimi  
 „ circumferuntur; ut ritus aperiendi portam sanctam: *Brevi enarratio rituum servato-*  
 „ *rum in aperiendo &c.* de quibus cæremoniis Rutilius Benzonius *lib. 4. de anno Jubilæi*  
 „ *cap. 1. 3.* Franciscus Maria Phœbeus, ceterique qui de Jubilæo scripserunt Navarrus,  
 „ Fabrinus, Gratianus, Pasqualigo, Cyrillus Franchus, Angelus Rocca &c. Non  
 „ omittendus liber Thomæ Mariæ Alfani Ord. Præd. inscriptus *Istoria degli anni santi*  
 „ *dal di loro sceltene cominciamento per infino a quello del regnante sommo Pontefice Be-*  
 „ *neditto XIII.* De rosæ aureæ benedictione Carolus Cartharius qui opuscula etiam alio-  
 „ rum collegit Innocentii III., Reginaldi Poli, Angeli Rocca, Guillelmi Durandi,  
 „ Jo: Baptistæ Casalii, Pauli Mariæ Quarti &c. quibus jungendus præter Aotonium  
 „ Balthassarri Raynaudus *tom. 10. oper.* ubi etiam agit de gladii & pilei initiatione;  
 „ quo de argumento scripta nuper est a S. T. eruditissima epistola. De cereis agnis  
 „ quos vocant, Panvinus, cui corollaria quædam addidit Ioseph Maria Suarezius,  
 „ Vincentius Bonardus, Raynaudus *tom. 10. oper.* Balthassarrius; & universum de  
 „ hujusmodi Benedictionibus Paulus M. Quarti, Gretserus, Martene *lib. 2. veter.*  
 „ *rit. cap. 9.* Mabillonius in *Ord. Rom.* Canonici etiam juris Interpres in *lib. 1. decret.*  
 „ *tit. 24.*

„ Hætenus de ritibus qui ad Romani Pontificis personam spectant, in quibus non  
 „ recensuimus qui in sacra Liturgia peraguntur, de quibus tomos tres edidit laudatus  
 „ Dominicus Georgius, qui multas utiles sane huic sacrorum rituum Romani Pon-  
 „ tificis tractationi dissertationes inseruit; multaque habet de sacra supellectili, de  
 „ Crucis anteferendæ ritu (de quo etiam dissertationem edidit Augustinus Fivizianus)  
 „ præterea de sacro ornatu Papæ vestibusque; de quarum aliquibus, violacæ quæ  
 „ sunt & nigra, pridem anno 1724. dissertationem ediderat: disputat vero etiam de  
 „ his Bonanni in *Hierarch. Ecclesiastica*. De his ergo locus hic agendi esse videtur, præ-  
 „ cipue de Pallio, de quo, præter eundem Georgium & juris Pontificii Interpretes, Ni-  
 „ colaus de Brailon, Christophorus Richter, Marcus Paulus Leo, Joannes Garnier,  
 „ Theodoricus Ruinart, Balthassarrius, Præsul Franciscus Blanchinus in *notis ad vitam*  
 „ *S. Leonis Papæ I. &c.* Sed de Romani Pontificis Liturgia is videtur esse commodior  
 „ locus agendi, qui communis ceterorum Presbyterorum statuetur.

„ Sequitur Liturgici cursus altera pars de ritibus qui ad Episcopos attinent;  
 „ quique omnes ferme in Pontificali, & Cæremoniali describuntur. Ac primo, qui in  
 „ Sacramentorum administatione versantur quorum minister saltem ordinarius Epi-  
 „ scopus est; Confirmationis dico, atque Ordinis: quibus addenda sacrorum oleorum  
 „ benedictio. De his, præter Martene & Menardum & Mabillonium, Morinus de *Ordi-*  
 „ *nar.*, Renaudotius *Liturg. Oriental.*, Lucas Holstenius de *ministris confirmas. De for-*  
 „ *ma confirmat. ap. Græc.* Nicolaus Papadopoli *prænot. missag. resp. 1.* Leo Allatius de  
 „ *etat. & intersit. in collat. Ordin.* Græcolas in *Breviar. lib. 2. cap. 70.* Scæchus *sa-*  
 „ *cror. elæuchristin. myroth.* Staoillaus Socolovius de *consecrat. Episcop.* &c. Michael  
 „ Amatus de *opobalsam.*

„ Huic succedit altera tractatio de Benedictionibus, seu Ordinationibus Abba-  
 „ tum, & Abbatissarum, Monachorum, Recluserum, Canonicorum, Virginum,  
 „ Viduarum, & Diaconissarum, Puerorum seu Puellarum sacrum habitum ita su-  
 „ mentium, ut nullo obstringantur Religioso voto. Præterea tractandum de Imperato-  
 „ rum, Regum, Principum, novi Militis, ac præcipue Ecclesiarum dedicatione,  
 „ & reconciliatione, benedictione Altaris vel fixi vel portatilis, Cœmeterii, Campa-  
 „ narum &c. de quibus Theologi, Canonistæ, & Liturgici scriptores ita multi, ut  
 „ deterere potius quemvis copia, quam sollicitare penuria possit. Nam si postremum  
 „ hoc de Ecclesiarum & Altarium consecratione sumamus, fusc de ea Goar. in *Eurbo-*

„ log.



log. Martene veter. rit. lib. 2. cap. 13. Franciscus Galluzzi de dedicat. Eccles. Joannes Franciscus Cececonius & Marcellus Cavalierius de eod. argum. Brancatius de consecrat. altar. Gattico de altar. portatil. Orlandi de veter. discipl. expiand. altar. Mabillonius. pref. in fac. III. Bened. §. 67. &c. præter Baronium ad an. 44. Bellarminum lib. 3. de cult. SS. cap. 5. Greferum de benedict. Eusebii Cæsariensis Commentatores ad lib. 4. vit. Constant. & Scholiastas Sidonii Apollinaris, ac Paulini. Atque hic locus esse videtur de sacrorum templorum forma atque altariis differendi, de quibus, præter modo laudatos, Mabillonius in commentar. ad Ord. R. Leo Allatius de templ. Græcor. Du-Cangius in descript. adis Sophiae ad calcem Cinnami, Sarnellus antiqu. basilicograph. Cl. Præsul Antonell. de titul. quos S. Evarist. distr. Jo. Baptista Thiers de altaribus & choris ecclesiar. Berthaldus de ara, Valelius de basilicis, Lannojus, & Jo. Ciampinus de ædific. a Constantin. M. construct. & in veter. monum. Præterea qui de ecclesiis præsertim Romanis veteribus scripsere, Paavinus, Rasponus, de Angelis, Bonannus, Rondinini, Crescimbenius &c. Nec refugienda lectio de eo argumento Hæreticorum, unde boni aliquid derivare in libros nostros possumus, vel ut eorum criminationes refutemus; ut Hospiniani de templ. Hildebrandi de sacr. public. Eccl. primit. Martini Schockii exercit. 16. de encensis, Molinæ de altarib., Cavai primitiv. Christian. Wheeleri de templ. primitiv. Christian. Van-Dale de consecrationib. Blondelli de Episcop. & Presbyt. Bingham &c. præter Magdeburgenses censur. 4. cap. 6. &c. De templorum apud veteres Christianos ornatu ac de diurno in eis cereorum usu Muratorius dissert. 16. ad S. Paulinum, Martinus de Ros de die natal. sacr. & præsan. Joannes Tomeus Mornavivius &c.

„ Tertiò: cum de ritibus Episcoporum agitur, differendum de iis, quæ servantur adhibita iudicii forma quadam, sive etiam in pœnarum irrogatione & relaxatione: quare de excommunicatione, & reconciliatione Pœnitentium, Hæreticorum sive aliorum degradatione; atque etiam restitutione, probationibus, & resimionis tractandum est; de quibus Morinus de Pœnitent. & in exercitiis. Eccles. Martene veter. rit. lib. 3. Simondus hist. pœnit. publ. Petavius de public. pœnit. & in nos. ad Epiphani. & Synesum Goar. in encolog. Albaspinus in observat. Datis canonic. discipl. præter Baronium, Bellaminum, Natalem Alexandrum, & Theologos. Ex Heterodoxis Hottingerus, Strauchius, Henichius, Bingham. De variis iudiciis, seu probationibus ad detegenda occulta seu dubia crimina Martene veter. rit. lib. 3. cap. 7. Muratorius tom. 3. antiquit. med. ævi dissert. 48. De Fornatis sive epistolis Ecclesiasticis, Priorius, Bencinus, Ferrarius; quorum postremus de ritu etiam sacrarum concionum Ecclesiæ veteris librum edidit, qui ritus Episcoporum olim, ut ipse etiam docet, proprius erat.

„ Addere possumus quartam classem rituum adhibendorum in Synodis sive Diœcesanis sive Provincialibus & Nationalibus celebrandis; atque ob argumenti similitudinem etiam OEcumenicis. De his Turrecremata, Bellarminus, Thomasius, Petrus de Marca, Martene, Marcus Mantuanus, Thomasius, Massobrius, Gavantus, Motta, Guerrerus, Lupus, Catalanus &c.

„ Post Episcopos locum sibi aliquem postulant Canonici quorum extant proprii ritus; ut videre licet in libro qui inscribitur Cærimoniale Canonicoꝝ: nec vero tam multi sunt ut peculiaris quædam tractatio illis tribuenda videatur; nisi malum alteri adjungere hominum generi, cui ritus sunt multi proprii, nimirum Monachis. De his extat eruditum opus Edmundi Martene de antiquis Monachorum ritibus; ac præter hunc illi, qui plenius agere de his velit, adeundus commentarius ejusdem in Regulam S. Benedicti; immo alii, cum Regulæ ejusdem, tum aliarum omnium Regularum, quasque Religiosæ familiæ habent, Commentatores. Sed hæc uberius tractare rudimentorum conditionem, qualia hic fieri possumus, excedere videtur;

immo hominis unitis facultatem : adeo multa sunt , nec vero satis explicata , aut quæ comprehendere brevi oratione possint . Quam multorum labor veritas est in verbulo uno explicando atque *hemine* mensura declaranda , quæ Regulæ S. Benedicti cap. 49. nominatur ? Sed hoc ad ritus Ecclesiasticos fortasse non spectat : Verba tamen *Missa* & *Communio*nis , quæ ibidem habentur , Mabillonius satis exercuerunt . Videntur itaque Præceptorum est , quod latius patere ad res omnes Tullius docuit ; considerandumque *quatenus* . Ideo feci ejus laboris argumentum ritus & caeremonias Romanæ Ecclesiæ . Quamquam hos cancellos non ita circumdedit , ut liberius divagari aliquanto non possit , & Orientalium quoque Ecclesiarum ritus considerare , præsertim vero Græcæ ; de quibus ritibus satis luculenter Habertus , Goarius , Arcudius , Allatius aliique , quos superius laudavi : in Occidentalibus tamen , præcipua vero , ut dixi , in Romana habitabit ; ac duo sedulo cavebit . Primum , ne ritus omnes , quorum meminisse rerum Ecclesiasticarum Scriptores videbit , continuo Romanæ Ecclesiæ adscribat : possunt enim esse ita aliarum proprii , ut in eam nequaquam conveniant . Ut enim sui cuique regioni mores , sua laus est ; atque *India nigrum fert ebenum* , *solis est iburea virga Sabæis* ; idem de Ecclesiarum consuetudinibus sive caeremoniis dicendum est : ac male profecto faceret , qui Ambrosianæ Liturgiæ Scriptorem aliquem ad Romanæ Scriptores revincendos ( quod tamen viris ceteroquin doctis aliquando excidit ) adducerent . Quamobrem Scriptoris genus , patria , conditio , finis ( si fieri potest ) quem sibi in scribendo proposuit , aut cujus usus elaboraverit , investigandus est . Alterum ; ut ætas Auctorum qua floruerunt adnotetur : fidem enim faciunt temporum suorum . At multæ in Ecclesiasticis caeremoniis , ut in disciplina universa , commutationes sunt . Has , saltem celebriores , recensere ; ad Scriptores , qui adversari aliis videntur , conciliandos animadvertere ; causas , quæ lucem vel ab historia mutantur , vel eidem afferunt , scrutari convenit . Sed redendum est eo unde digressi sumus .

Restat tertia pars de caeremoniis quæ a Presbyteris , ceterisque sacris Ministris exercentur . Atque horum primam veluti classem constituunt caeremoniæ *Missæ* . Quam multi de his scribant superius innui , ut nihil necesse sit hic , vel illos deum , vel alios nominare ; nisi forte Petrum le Brun , Clandium Vert , Lazarum Eocquilot , Grancolas , Bona , Martene , Gavantium & Meratium , Bossuet , atque his antiquiores , non minus tamen quam ipsi celebres Joannem Stephanum Durandum , Guilielmum Durandum ; qui ambo ceteros quoque ritus egregie explanarunt . Hi præ ceteris Magistro versandi sunt , qui singulos ritus illustrarunt . De Canone *Missæ* Gabriel Biel , Dominicus Georgius , & Franciscus Vanderveken ; præterea extat *exegesis* ex pluribus Auctoribus collecta editaque Paris. 1549. De Invocatione Spiritus sancti in Liturgiis Jo. Augustinus Orsi ; de commemoratione Romani Pontificis Cl. Præsul Nicolaus Antonellus ; Bonamicus Tydæus de formandis crucibus ; Petrus Allix de trisagii origine ; Innocentius Moknarus de Salutatione *Dominus Vobiscum* & *Pax vobis* , de qua item Angelus Rocca . De Symbolo ad *Missas* cantari solito Christianus Lupus , atque in alias partes alii ; ut de *Missa* Voivis Henricus Gorichen ; de modo celebrandæ *Missæ* coram proprio Episcopo Ludovicus Gherardi , & Horatius Christianus . Ritus peculiare in Liturgia Romani Pontificis exposuere laudatus Georgius , Mabillonius , extatque commentarius de *sacra summi Pontificis communione sacrosanctam Missam solemniter celebrantis* Angeli Rocca . Addamus his Josephum Catalanum de *codice S. Evangelii* , atque *servatis in ejus lectione* , & *usis vario ritibus* . Atque hic uberrimus sane campus in quem sacræ eruditionis industria excurrat ad disputandum de antiquissimis Liturgiis , de linguis quibus *Missa* celebratur , de tempore & loco , de sacris vasis vestibusque in celebratione sacrificii , quæ in sacris aliis functionibus adhiberi solent ; de materia sacrificii , præcipue de pane

„ azymo & fermentato, de veteribus oblationibus, de Fidelium Communione; de  
 „ Missis in Natali Christi, & pluralitate Missarum uno die; de peculiaribus ritibus  
 „ eam celebrandi Abbatum, Episcoporum, summi Pontificis; de caeremoniis in heb-  
 „ domada majori & certis aliis diebus, sive Ecclesiis usurpari solitis. Ex iis, qui anti-  
 „ quas Liturgias vel collegerunt vel explanaverunt nomen sibi famamque pepererunt  
 „ Cassander, Pamelius, Hittorpius, Mabillonius, de Sainctes, Schultingius, Re-  
 „ naudotius, Philippus Brenna, Thomas Bret, Petrus Cirvelus, Lindanus, Leo  
 „ Allatus, Grancolas, Joannes Pinus, Cardinalis Thomastus, Cajetanus Cennius,  
 „ Joseph Blanchinius, Angelus Maria Cardinalis Quirinus is, qui litteris natus,  
 „ nec sine litteris spirare posse videtur; votis etiam eruditorum omnium expetitur  
 „ collectio Codicum Sacramentorum S. R. E. Cl. Muratori, quæ jam perventura est  
 „ in hominum manus. Legendi quoque Honoratus a S. Maria lib. 5. animad. dissert. 3.  
 „ Theophilus Raynaudus de prima Missa &c. De sacris vestibus, præter supra laudatos  
 „ Dominicum Georgium lib. 1. & 2. de Liturg. R. P. Honoratum lib. 4. diff. 6. Pa-  
 „ ronium, Bona, Thomastum &c. Bartholus Bartholini de panol., Jo. Baptista  
 „ Donius de utraque panula, Sauflayus panopl. Sacerdotal. & Episcop. Didacus de  
 „ Castillo de vestib. & ornatu Aaron. Jacobus Boileau de re vestiar. homin. sac. Ca-  
 „ rolus Piazza Iris sac. Jul. Cæsar Bulengerus, Solerius sive Raynaudus de pilco,  
 „ Thiers de stola, Gallo Chamillard de coronatonsura, & habitu Clericorum, Pel-  
 „ letterius dissert. de error. Pistor. Papebrochius in propl. in appendic. post Pascha-  
 „ lem II, Mabillonius in præfat. ad sec. I. Bened. §. 9. & in sec. III. §. 1. & in  
 „ sec. VI. §. 4. Omitto Altaïeram, alioque in Anstasium Bibliothecarium, Goar, in  
 „ eucolog., Menardum ad Sacram. S. Gregor., Bollandianos tom. 1. Jun. pag. 478.  
 „ Jo. Gasparem Krause dissert. de colore sacro. Longius necesse erit in hac rituum  
 „ sacrorum parte Magistro immorari, si attingere singula horum velis, de quibus  
 „ egregie præter hos, quos laudavimus, Vicecomes; & non personarum modo sed  
 „ altarium vestes atque ornamenta, qualia olim in usu fuerunt, explanare: quod o-  
 „ mino prætereundum non videtur. De pane azymo sive fermentato Sirmondus, Ma-  
 „ billonius, Ciampinus, Macedo, Honoratus &c. De oblationibus ad altare Fran-  
 „ ciscus Berlendi, Vicecomes vol. 2. & Mabillonius præf. in sec. III. Bened. §. 6. ubi  
 „ & de pecunia erogata pro Missis: de festis diebus Jo. Fronto, Petrus Castellanus,  
 „ Spinellus, Thomastinus, Baillettus, Thiers, Guyet. De caeremoniis certorum  
 „ dierum tractatum edidit Henricus Pisart, cui addendus Boischart de dignitate ferie,  
 „ Angelus Rocca de feria, de Vignolis de festo Natalis Domini de quo argumento  
 „ Ittigius quoque hæreticus; Panvinus de baptismo Paschali, Franciscus Orlandus  
 „ de duplici lavacro in Cæna Domini. Præterea Auctores plurimi qui de lotione pe-  
 „ dum sive ut vocant pedilavio quæ vel ab Episcopis vel ab ipso Pontifice eo die fit, at-  
 „ que olim sabbato etiam ante Palmas fieri consuevit: quæ de re etiam Mabillonius in  
 „ Ord. Rom. §. 10., Menardus not. 282. in Sacramentar. S. Gregor., Martene de Divin.  
 „ Offic. cap. 22. §. 8. Addantur his Horatius Christianus praxis Pontificalis pro majoi-  
 „ ri hebdomada, alique qui universum de eo argumento scripserunt. Petrus Morettus  
 „ Romæ anno 1732. librum edidit de ritu variandi chorale indumentum in solemnitate  
 „ Paschali. Adde Suarezium & Battellum de ritu annua ablutionis altaris Patie. Se-  
 „ bastianum Paulum de ritu Ecclesie Neritine exorcizandi aquam in Epiphania. Quatuor  
 „ quam horum postremi peculiarium Ecclesiarum ritus explicant. Atque hoc curan-  
 „ dum Magistro præcipimus, ut quæ non omnibus conveniunt, sed singularum sive  
 „ ætatum, sive locorum sunt sedulo distinguat. Quod hic præcipue sciendum est, &  
 „ Liturgias diversarum Ecclesiarum secernet. In Occidente seu apud Latinos quatuor  
 „ Liturgias inter se diversas fuisse præ ceteris Mabillonius lib. 1. de liturg. Gallic. cap. 2.  
 „ narrat, Romanam, Ambrosianam seu Mediolanensem, Gallicanam, & Hispanicam  
 „ „ seu

seu Mozarabicam : In quarum singulis versari aliquantum Magistri cura debet; neque Orientales omnino præterire quas Renaudotius alligæ, quos supra retulimus explicarunt ; Romanam vero præ ceteris edisseret atque adamabit . Hujus vero triplex ab eodem Mabillonio ordo seu status consideratur . Primus ab Ecclesiæ nascentis exordio ad Gelasium usque receptus ; alter Gelasianus , qui auctorem seu amplificatorem habuit Gelasium Papam ejus nominis primum ; tertius Gregorianus ita dictus a nomine Gregorii M. qui Gelasianum Ordinem aliquantum immutavit . Hunc Gregorianum Ordinem Pamelius , Menardus , alique edidere ; Gelasianum diu desideratum in lucem protulit Cardinalis Thomassius . Nullus hoc antiquior nisi forte a Matthia Flaccio Illyrico primum editus ; sive quem Joseph Blanchinius vulgavit , appellavitque Leonianum ab Leone I. cui tribuendum existimavit .

Alteram classem partis hujus faciunt ritus in Divino Officio recitando adhibiti ; de quibus etiam quam multi scripserint superius significavi . Atque hic Magistro auctor essem , ut qui peculiares ritus disceptationum suarum argumentum faciant , hoc quoque consulat . Sed interdum vereor , quod superius etiam admoovi , ne tantum onus imponam Liturgico huic Præceptoris ut serendo non sit : adeo enim multi sunt qui de qualibet vel sacræ Liturgiæ vel Officii parte scripserunt , ut si legere eos omnes velit , magni temporis impendia facturus sit ; ut si ex. caus. , qui de hymnis Ecclesiasticis scripserunt , in manus sumere velit , occurrer præter Cardinalem Bona , & qui in simili argumento veritatis est Anacletus Siccus , *Elucidarium Ecclesiasticum* Clitovei , Gregorii Valentiani *hymnodia* , *Brevis elucidatio in hymnos Ecclesiasticos* Michaelis Timothei , Donati Martæ *enarrationes in hymnos : Explanatio in hymnos Ecclesiasticos* Pauli Palanerii , Nicodemi Grima *literalis explanatio hymnorum sacrorum* , eadem Jo. Baptistæ Postevini , aliaque hujus generis : præterea extant qui & in tenuissimam elaborarunt horum hymnorum parte ut Gabriel Felix , qui illustrandam suscepit rubricam illam hymni *Iste Confessor : si non est dies obitus &c.* Verum in formandum est Præceptor , qui cum magno animo sit , patientisque longi laboris ; libare multos Scriptores noverit , paucis se tradere . Itaque , de Latinis ac Romanæ præsertim Ecclesiæ ritibus cum agitur , dabo vel ampliorem , quam vulgo fit , sectam lucubrationem ; ut de antiqui Cursus sive Breviarii ordine , varietate , de Romani correctione atque auctoritate disceptet ; de usu cantus in Ecclesia , & loco Officii recitandi , atque habitu recitantium , de signo adhibito ad Clericos sive Monachos sive Fideles reliquos convocandos ; de nocturnis vigiliis , de assistentia Abbatis sive Episcopi in Choro , de Romani Pontificis in Cappella &c. De quibus Bona *Div. psalmod.* , Martene *discept. in Offic.* , Græcolas *commentar. histor. in Brev. Rom.* , Eustachius a S. Ubaldo *de Dei benedict.* Emmanuel Cajetanus Soufa *de graviss. auct. Brev. Rom.* Mabillon. *de Curs. Gallie. & præf. in sec. III. Bened. §. 6.* ubi de Organis Ecclesiasticis , de Choro ; Franciscus M. Magius *de cantu a D. Ambrosio in Mediolanensem Ecclesiam indulto* , Eustachius a S. Ubaldo &c. Juvabit & recentiora quoque Breviaria inspicere ; ut Romanum de Camera , celebrem Cardinalis Quignon , Lugdunense , Parisiense , Moguntinum &c. librosque in hanc rem editos ; *Projet d'un nouveau Breviaire a Paris. 1720. De reformandis bonis Canonici consultatio &c.*

Hic quoque singulares Ecclesiarum ritus , non ignorasse proderit : extat Josephi Blanchini Cong. Oratorii liber *Divinorum Officiorum antiquissimi Cursus Gothico-Hispani ad usum Ecclesiæ Tarraconensis* , Joannis de Joanne liber editus Panormi an. 1736. *De Divinis Siculorum Officiis* ; eruditissimum vero opus Antonii Bellotte inscripsum *Ritus Ecclesiæ Laudunensis* . Gabrielis Palæoti Cardinalis *Archiepiscopale Bononiense . Manuale baptisterium secundum usum Diocesis Neapolitanae* , Venet. 1762. *Rituale sive Ordinarium Ilerdensis Ecclesiæ* , Ilerdæ 1767. *Sacramentale Genuensis Ecclesiæ* ; Ecclesiæ Fervariensis . *Rituale Sacramentorum ad usum Mediolanensis Ecclesiæ* .

„ sic .

32 *sic. Ambrosianum; Rituale Parisiense. Aurelianense. Casbalaunense. Novimen-*  
 33 *se. Metense. Rituale de Bourges. de la Province de Rheims. de Poitiers. d'Au-*  
 34 *verre &c.*

35 Tertiam classem statuere possunt Cæremoniæ quibus Ecclesia utitur in admini-  
 36 strandis Sacramentis Baptismi, Pœnitentiæ, Eucharistiæ, Extremæ Unctionis, Ma-  
 37 trimonii. Hic ergo locus agendi de tempore, locoque hæc Sacramenta conferendi, ac  
 38 de Ministro, de officio Catechistæ, de Catechumenis eorumque generibus atque  
 39 exercitationibus, de nominis impositione, mutatione, ac præparatione ad Bapti-  
 40 smum, de Scrutiniis, de Symboli traditione & redditione, atque hujus fidei for-  
 41 mulæ varietate, de Baptismo infirmorum, mortuorum, energumenorum, & illo-  
 42 rum de quibus dubitatur an sint baptizati, vel rite baptizati, de monstis, de patri-  
 43 nis, de vestibus baptizati: de quibus Martene *lib. 1. veter. discipl.*, Joseph Viceco-  
 44 mes *observat. Eccles. volum. 1.* Harduin. *de baptis. in vin. &c.* Ciampinus *explicat.*  
 45 *duor. sarcophag.* Mabillonius *tom. 1. musæ Ital.* Launojus, & Jo. Nicolaus *de veter.*  
 46 *us. bapt.* Jacobus Byllius *observ. sacr.* Raynaudus *tom. 9. de spirituali Paternis.* Sauf-  
 47 sayus *de mystic. Gall. Scriptor.* Touttee, & Thomas Milles hæreticus in *S. Cyrillum*  
 48 *Hierosol.* Menardus in *Sacrament. Goar. in eucharol.* ex Heterodoxis Vossius, & Ulf-  
 49 rius *De Symbol.* Marquardus Gudius *de clinic. vet. Eccles.*, Jo. Dallæus *de cultib.*  
 50 *religios. Latinor.* Gerardus Von Maltrecht. *de susceptorib. infant.* Jo. Henricus Wed-  
 51 derkampius *de baptis. iuris.* Jo. Sartorius *Meletemas. bibl. Eccles. dissert. 7.* Bevere-  
 52 gius in *vindie. Canon.* Joannes Musæus *de ritib. primit. Eccl. Baptisinal.* Sic &  
 53 de Pœnitentiæ ritibus agendum, atque Eucharistiæ impartientiæ; de Communione  
 54 quoque in ædibus privatis, de modo asservandi Eucharistiæ, de ejus expositione  
 55 de qua Christianus Lupus, Jo. Baptista Thiers, Hadrianus Zacharia; cui addi pot-  
 56 est ritus ostensionis sacrarum Reliquiarum sive etiam translationis; de quo Ferran-  
 57 dus, Petrus Alloix, Petrus Moretus. De varia disciplina circa ritus extremæ un-  
 58 ctionis; de temporibus, & locis celebrandarum nuptiarum, de lege qua cavetur ne  
 59 certis temporibus celebrare eas liceat publico apparatu: de his cum multa Theologi  
 60 tum Auctores supra laudati. De custodia Eucharistiæ modoque eam asservandi præ-  
 61 cipue Martene *lib. 1. cap. 5. veter. Eccles. rit.* Saussayus in *panopl. Sacerd. part. 1. lib. 9.*  
 62 *cap. 4.* Gonzalez in *lib. 3. Decretal.* Mabillonius in *comment. ad Ord. Rom. cap. 20.*  
 63 Boldettus *lib. 1. cap. 10.* & Aringhus in *Rom. Subterr.* Bonarroti *de fragment. vier.* Ju-  
 64 vabit & legere ad cognoscendum veterem ritum sumendi Eucharistiæ cum Mabillo-  
 65 nium *præfat. in sec. II. Bened. g. 4.* tum SS. Justini, & Cyrilli Hierosolymitani eru-  
 66 ditissimos Scholiastes & Congregatione S. Mauri. De ritu præferendi Eucharistiæ  
 67 Sacramentum Papæ iter agentis Angelus Rocca. De communionē laica & peregrina  
 68 Albatpinæus, Lupus, Sirmondus, Petavius, Morinus &c. De extremæ unctionis  
 69 cæremoniis Mabillonius in *præfat. ad sec. I. Benedict. g. 9.* ubi & de aliorum Sacra-  
 70 mentorum administratione; quod item facit *præf. in sec. III. g. 6.*

71 Postremam partem occupat tractatio de ritibus qui communes sunt Præbyteris  
 72 aliisque inferioribus Ministris; celebranturque ad homines sublevandos vel quoquo-  
 73 modo juvandos implorata præsertim Divina ope. Hujusmodi sunt Energumenorum  
 74 exorcizatio, agenda circa ægrotos in vitæ sine positos, aut cum jam vita de-  
 75 funditi sunt, processiones, litanie; novorum fructuum, frugum, alique benedi-  
 76 ctiones. De his Benedictionibus multa Martene *lib. 3. veter. rit.* plura multo Sauf-  
 77 sayus in *panopl.* Gretserus; ex Heterodoxis Binghamus qui reliquos plerosque ritus  
 78 explicat, Pericus *de benedict.* De Processionibus Ecclesiasticis idem Gretserus, Se-  
 79 rarius, Paulus Maria Quarti, Nicolaus Sanderus, Henricus Gorichen, Jacobus  
 80 Eveillon, Vatar, Ægidius Gelenius in libro inscripto *Supplex Colonia*, Dominicus  
 81 Georgius *lib. 3. Liturg. R. P. &c.* De ritu sepulturæ & funerum Christianorum  
 82 „ Panvi-

„ Panvinius, Spondanus *de Cæmeter.*, Boldettus, Atingus, & Bosus, Gretserus,  
 „ Samuelius, Dulpheus, Hieronymus Prediera, Muratorius *differt. 17. ad Paulinum*,  
 „ Menardus in *Sacramentar.*, Mabillonius *de ritu humandi Sacerdotes veteri & novo*  
 „ *pag. 91. de cult. SS. ignet. 2. edit. Paris. 1703.* præterea Hildebrandus, Binghamus,  
 „ Bebelius, Joannes Andreas Guenstedt, Joannes Henricus Franzonius hæretici.  
 „ Sunt inter Liturgicos Auctores qui inferiores Ministros sibi instruendos susceperunt  
 „ vel omnes, ut Simon Buongiovanni, vel Acolythos ut Augustinus Valerius: ad  
 „ Ostiarios spectare ritus videtur, tempus significandi sacramentorum, campanarum  
 „ sono, de quibus campanis Rocca; similisque est disceptatio Hieronymi Magii *de tintin-*  
 „ *nabulis.* Quod si de ceteris Ministris vel Ministrorum nominibus quæ apud Veteres  
 „ occurrunt disputare velit; de his fuse Morinus *de Ordinat.*, Martene *lib. 1. antiq.*  
 „ *Ecel. rit.*, Agnellus Onoratus in *differt.*, Valesius ad *Eusebium*; Scriptores vel ortho-

„ doxi vel heterodoxi de Ecclesiastica Hierarchia ut Petavius, Hallier, Hildebran-  
 „ dus, Bingham &c.  
 „ Atque hæc sunt partes quibus recte informari posse mihi videtur hæc Liturgica  
 „ disciplina; quæ si colligantur omnes, justum corpus efficient partibus constans  
 „ præcipue tribus, minoribus autem duodecim; quas placet, ut intuitu uno in conspe-

## TRACTATUS DUODECIM

In tres Classes divisi ad quos omnes Ritus sacri  
 revocari possunt.

Prima Ritus complectitur pertinentes ad Romanum Pontificem.

Secunda ad Episcopos.

Tertia ad Presbyteros & inferiores Ministros.

I.	II.	III.
1. De Pontificis electione & ritibus qui eam vel præcedunt vel subsequuntur.	5 De Ritibus in Sacramentis ab Episcopo conferendis.	9. De celebratione Missæ.
2. De Beatificatione & Canonizatione Sanctorum.	6 De Benedictionibus Episcopi.	10. De recitatione Officii.
3. De spectantibus ad Cardinales & Rem. Pontificis Consilium.	7 De Episcopo judicialia vel quasi judicialia exercente.	11. De Ritibus in Sacramentis a Presbytero administrandis.
4 De Benedictionibus Pontificiis.	8 De Synodo.	12. De Ritibus vel ad Sacerdotes vel ad inferiores Ministros spectantibus.

„ Quod si brevius disciplinæ hujus curriculum consicere libeat, ut quatuor annis absolvi commodè possit, eosque contineat sacros ritus, qui sæpius in usu veniunt, ultimæ partes quatuor simul cum quinta & sexta conjungi possunt; atque  
 „ ea Auditoribus tradi quæ præcipua sunt, & magis necessaria, relique ceteras Eccle-

„ siasticarum caeremoniarum studiosioribus reservari; sic igitur distribui possunt.

De Sacrosancto Missæ Sacrificio.

De Officii Divini recitatione.

De Cæremoniis in Sacramentorum administratione.

De Benedictionibus, & minoribus quibusdam Ritibus.

„ Harum partium singulas copiose tractare, & cum Auditorum suorum fructu, pot-  
 „ erit sane liturgicus Præceptor, si Auctores præcipuos legendos susceperit quos hæc  
 „ tenus laudavi; et si non dubito multos inventurum præterea, in quos nunquam

„ inci-

incidi: Audiui quidem, in Lusitania cum degerem, multos cum nostrates, tum  
 exteros cum laude nominari, multos ipse vidi; quos nunc locorum intervallum atque  
 angustias temporum exclusus cognoscere non potui. Neque etiam nominavi pluri-  
 mos qui mihi ad manum sunt, universum vero de ritibus tractant, quos equidem non  
 arbitror negligendis; ut Antonii Caraccioli *Synopsis veterum religiosorum rituum*  
*atque legum*, Francisci Carriere *Fidci Catholica Digestum singula ejus dogmata et ri-*  
*tus Ecclesie juxta SS. PP. et CC. doctrinam exacte declarans*, Bauldri *Manuale sa-*  
*crarum caeremoniarum*, Molin *Praxis caeremoniarum*, quo titulo multi præterea libri  
 extant Andreæ Piscara, Bartholomæi Corsetti, ut Hæreticorum Gasparis Caloy  
*Rituale Ecclesiasticum*, Thomæ Douglas *De initio et progressu caeremoniarum in*  
*Ecclesia*.

Quamquam non video quid attinuit tam multos Auctores recensere; nisi forte  
 ut appareat non indignas res esse, quæ doceantur discanturque; aut non ita faciles,  
 ut sibi non proposuerint magna cura tractandas doctissimi homines, quos hæcenus sa-  
 ne plurimos nominavi. Ceterum unus Auctor est, in quo ab aliis divisè tractata  
 habemus omnia. Atque is est BENEDICTI XIV. doctis viris colendum suspi-  
 ciendumque nomen; de quo, quod de magno illo Gregorio Paschalis II. in epistola  
 ad Episcopos, et Regem Angliæ affirmavit, dici vere potest: *Mérito cum nos tam-*  
*quam Christiani populi Pastorem, tamquam Doctorem in omnibus venerari*. Nam ut  
 a tertio hoc genere hominum ritibusque ad eos pertinentibus ordiamur, quæcum-  
 que de Missa ejusque caeremoniis dici possunt, SANCTITAS TUA, doctissime  
 discretissimeque in tractatu super hoc argumento edito complexa est. Multa insuper  
 dicta sunt in hanc rem in Ecclesiasticis Consultis tuis sive Institutionibus, sive ut  
 dici vulgo solent, Notificationibus \* *Instit.* 11. 13. 34. 39. 77. 96. Agitur etiam  
 de eodem argumento *part. 2. lib. 4. magni Operis de Canonizat.* 55. Quæ ad Officium  
 spectant hic quoque tractantur; *cap. 13. et Instit.* 24. et 117. De Baptismi ritibus su-  
 se differitur *Instit.* 8. 84. 98. De Pœnitentia *Instit.* 4. 22. de extrema Unctione  
*Instit.* 81. De Matrimonio *Instit.* 33. 80. 87. 88. De Exequiis & funeribus *Instit.* 36.  
 107. De Benedictione sacrorum vasorum *Instit.* 20. De Benedictione animalium *In-*  
*stit.* 47. De sacris Processionibus *Instit.* 3. 28. 31. 68. 74.

Si partem alteram sacrorum rituum, sive Episcoporum personam inspicere pla-  
 cet, de Ordinatione agitur *Instit.* 2. 23. 106. de consecratione sacrorum Oleorum  
*Instit.* 81. de benedictione & consecratione Religiosarum Virginum *Instit.* 87. de  
 Confirmationis Sacramento *Instit.* 6. de Ecclesiarum dedicatione atque altarium *Instit.*  
 67. de benedictione camparum *Instit.* 47. Tandem de Synodorum celebratione,  
 quod conscripsisti, atque a Te universa Christiana respublica jamdiu expectat, non  
 dubitamus quin eruditissimum & luculentissimum opus omnis quæ in eam rem dici  
 possunt disquisque sunt a ceteris, complectatur; ejus quidem editionis oblata mihi  
 spes est a Te, cum de sacrorum tuorum Consultorum Latina editione, quæ primum  
 brevi proditura erat, mentionem mihi injecisses.

Jam vero nihil necesse est de primo rituum genere, quod ad Romanum Ponti-  
 ficem spectat, dicere. Quod enim præcipuum ibi partem obtinet Beatificatio &  
 Canonizatio Sanctorum, tam discrete, tam copiose, tam docte tractatum est a Te,  
 atque ea complexione sive comprehensione rerum; ut qui antea ea de re scripserunt;  
 hominum e manibus dimissi sint; deserintque pæne in Juris Consultorum ora litte-  
 rasque venire. Quam laudem in ceteris scriptis tuis es consecutus.

Tom. I.

f

Atque

\* Hæc Epistola scripta fuit, atque edita ante-  
 quam prodiret editio Latina Notificationum, quæ  
 imper data est in lucem ritu, *Institutionum*  
*Ecclesiasticarum*; cum vero omnia quæ hæc tomo

præfiguntur diligenter recognoscere & suggerere  
 ordinem, numerumque Notificationum quas hic  
 recto, prædictæ editioni Latinæ accommodatæ op-  
 portunitus judicavi.

10 „ Atque utinam communi hominum ac literarum Reipublicæ bono hanc facultatem a primis rudimentis initio facta, ordine tradere Sanctitati Tuae liceret. Sed  
 20 nimirum majora sunt, quæ curas cogitationeque Tuas deinceps atque impediunt,  
 21 a quibus respirare Tibi non licet, dum Christianam Religionem tueris, & Ecclesiasticam disciplinam restituisti atque confirmas. Quamobrem operæ pretium est, ut alius  
 22 aliquis ex eruditissimis tum Sanctitatis Tuae, tum aliorum, quos nominavi, libris  
 23 hæc quæ retulimus aliaque multa colligat, & facultatis hujus veluti elementa quædam atque institutiones efficiat, fonteque quibus rerum cognitio plenior hauriri in  
 24 Sanctitatis Tuae potissimum Operibus possit, significet & veluti digito commonstret.  
 25 Hos vero sive constus, sive meditationes æqui bonique faciat Sanctitas Tua, cujus  
 26 pedibus dum supplex advolvor, Apostolicam mihi benedictionem deprecor.

Nonis Augusti anno 1746.

### SANCTITATIS TUÆ

*Humillimus addictissimus Servus & Filius obsequentissimus*

Emmanuel de Azevedo Societatis Jesu.

**H**abetis, præstantissimi Academici, quæ fuerit scholæ sacrorum rituum prima veluti delineatio; quam quidem Sanctissimus Pater non benigne solum excepit, sed singulari usus humanitate ac clementia probavit etiam commendavitque, quæ retulimus omnia; solumque pro modestia egregia illa sua ad me rescribens excepit, quæ debitas ei perolveram justissimasque laudes. Deinde ea præstavit, quæ vos profecto non ignoratis, atque ad reliquarum ætatum memoriam propagabit, prædicabitque posteritas omnis, ut Liturgicæ Academicæ institutionem promovere continuo ceperit, ut professores sive lectores duos, sacrorum rituum unum, qui esset Academicæ caput attribuerit; atque alterum Ecclesiasticæ Historiæ; ut duobus substitutos quos vocant adjecerit; qui fere singulis hebdomadis dissertationes instituerent, & Academia illas, quas in Quirinali palatio coram se haberi litterarum amantissimus Pontifex jubet, Comœdiaz repræsentarent; ut hanc ita constitutam Academiam motuque proprio fundatam in suam susceperit, atque Apostolicæ Sedis tutelam. Quod vero eximi præterea beneficii loco habendum arbitror, hanc sacris caeremoniis juvenes informandi, docendique provinciam Canonicis Regularibus Reformatis Congregat. S. Crucis commisit. Magni hoc æstimandum, prædicandumque beneficium puto, in quo cum singularem suam erga Canonicos illos benevolentiam alias etiam sæpe testatam exhibuit, tum prudentiam, sapientiamque; ut optime in posterum novæ huic scholæ ac Liturgicæ facultati consultum esset. Neminem esse arbitror vestrum adeo in patria Regnoque nostro hospitum ac peregrinum, qui, Ordo ille Religiosus qua sanctitate morum sacræque eruditionis scientia polleat, ignoret; sed præcipue quam Divini cultus augendi, retinendique studio flagret. Vereor ne hoc, quod dico, sit qui gratiæ illis tribui a me putet; vel quod eruditissimis sanctissimisque viris per me ipse saveo, vel quod sum ex ea Religiosa familia cui cum ipsis necessitudo quædam, ac communis intercedit. Visum est enim Societatis nostræ moderatoribus; quod nobiscum antea Carthusiani solitarii homines, & præcipua quædam ratione meditationi celestium rerum dediti fecerant, vices veluti rependendo, idem sanctissimum arduissimum sedus inire cum hac Religiosa familia, quæ ad illorum vitam proxime accedit cum sanctarum precatationum studio, tum voto non egrediendi a Religiosis claustris quo se adstringunt dum solemnî sacramento in hanc Congregationem adsciscuntur. Atque hoc cum eorum virtutibus

tribua-



eributum est, tum meritis in Societatem nostram eximius ac singularibus, quibus par-  
rea unquam gratias referre non possumus; immortales autem semper erimus habituri.  
Habeo tamen quæ pro me ipso proferam, & iudicium de illo Ordine nostrum defen-  
dam; amplissimorum hominum, de eorum sanctitate, doctrina, ac studio Divini cul-  
tus, testimonia. Hoc nimirum est quod in ceteris ejus laudibus prædicant Lusitani  
Antistites, ex quibus Eminentissimus Thomas Cardinalis Patriarcha l. Lisbonensis  
litteris datis die 3. Decembris 1745. testatur perfectionem præsertim in Sacris celebrandis  
singularum esse, ac fervorem, seu in Sacramentorum, seu in verbi Dei administratione  
longe utilissimum: litteris adeo incumbere, ut non paucos severum examen Doctorem lau-  
rea decoraveris. Princeps vero & Præsul Braccarensis, primaria dignitate, plurimis-  
que titulis toto orbi notissimus litteris datis die 8. Februarii 1746. Talis, ait de eorum  
tyrocinio, instructio virtutum relucet, ut de suo primitivo Instituto desiderari nihil  
possit, nec tantum præfate Congregationis Alumni virtutibus florent; sed & in omnibus  
viget litterarum splendor. . . . Sunt utique illius Reformati Canonici modestie speculum in  
Dei cultu indefessi; eorum ecclesie sanctitatem respirant, nullibiq; perfectius Divina ce-  
lebrantur Officia. Quid Eborensis Archiepiscopus? Nonne honorificentissimum de ipsa  
testimonium dixit scribens die 24. Decembris 1745. Quanta viget Regularis discipline  
observantia nullis verbis satis explicari potest. Maxima cum perfectione peragunt omnia  
quæ spectant ad cultum Divinum, Chorum, ritus, & nitorem ecclesie. Ferventissime  
incumbunt prædicationi verbi Dei, nec non Sacramentorum Pœnitentie & Eucharistie  
administrationi cum magno profectu spirituali Fidelium, qui assidue consuevit ad eorum ec-  
clesias & assunt utilissimo orationis mentalis exercitio: præterea cum abundant viris liti-  
ratissimis &c.\* Idem omnino de eorum sanctitate, doctrina, ac Divini cultus studio publi-  
ce testantur omnes Lusitanie Episcopi; litterisque suis in hujus Congregationis laudes  
sepe effundunt. Præ omnibus vero SS. Domini nostri verba exhibeo, qui multa  
paucis concludit: *Grandi animi nostri exultatione percepimus Congregationem Re-  
formatam eximia Regularis discipline sanctimonia, & peculiari litterarum, & Sen-  
suum scientia, præcipuæ Lusitanie regni nobilitate ad populorum edificationem;*  
& Divini cultus incrementum mirabiliter efflorescere. Quod si discretus adhuc,  
quodque nemini occultari potuit, testimonium de eorum virtutibus laudibusque  
proferri volumus; habemus sane quod petamus ab invictissimo Rege nostro, qui  
pluries esse apud illos ac diebus aliquot diversari dignatus est: quomodo sive benevo-  
lentia, sive honoris significationem nulli præterea novimus esse imperitam. Sed  
nimirum Rex sapientissimus nequaquam dedecere majestatem suam existimavit cum il-  
lis aliquandiu vivere, qui Cælestium vitam, sanctitatem, pietatem, mutam benevo-  
lentiam referrent. Cui ergo sacrorum rituum disciplinam committi æquius fuit quam  
hujusmodi hominibus, qui tantorum virorum testimonio ad Ecclesiastici Ordinis infor-  
mationem, præter excellentem doctrinam, morum quoque summam integritatem, ac  
Divinarum caeremoniarum eximiam quandam eruditionem asserrent.

Hi ergo cum sibi a Sanctissimo Patre commissam Lusitanorum Ecclesiasticorum in-  
stitutionem viverent, nihil antiquius habuerunt quam, ut quæcumque vobis subsidia  
ad hanc adipiscendam facultatem essent, compararent. Quorum erat illud primum ut  
libris, Scriptorisque hujus discipline præclarissimis ne careretur. Intelligebant enim  
in hujusmodi præsertim facultatibus, in quibus non tantum nostræ meditationes inge-  
nueque vis in excogitando quid possit, attendi solet, quam quæ sunt Majorum doctrinæ  
decretisque tradita; insignem librorum suppellectilem necessario requiri. Itaque consi-  
lium susceperunt edendi rursus probatissima eorum opera qui de sacris caeremoniis ali-

\* Laudes hujus Reformatæ Congregationis &  
quantum debet in primis Pontifici benedictissi-  
mo; deinde vigilantissimo Reformatori; tunc

quid ritibusque scriperunt; ut Liturgicam veluti quamdam Bibliothecam consecrerent atque evulgarent. Et sane consilium est huiusmodi, quod viri docti disciplinarumque studiis assueti continuo probent. Etenim eo valet, ut huiusmodi libros adipsi sibi cuiusvis facillus, & comparare liceat; tum ut uno velut intuitu in conspectu habere quæcumque in hac facultate scripta sunt minimo labore & temporis impendio possit. Quamobrem moribus antiquissimorum temporum receptum, simile quippiam videmus, ut celebriorum Auctorum ordine positorum collectionem quamdam & veluti summam conficerent. Nullum inter profanos Auctores antiquius opus nominare possumus, quam *κατά τινος* illum, cujus extremam partem Homeri poemata constituiebant. Atqui hic erat, ut Salmasius in Solinum pag. 847. docet, non unius carminis aut poematis appellatio quædam, sed ex multis diversorum Poetsrum libris opus compositum, quod antiquorum omnem sapientiam, fabularum, ut tunc fiebat, involucris velatum; atque a prima conjunctione cæli & terræ, unde Deorum turba nata est, usque ad Ulyssis reditum totam Græcorum mythicam Theologiam comprehendebat. Ex sacris vero libris, qui sanctitate ceteros vincunt, quod Dei numine affliti homines eos scripserunt, ceteris item antecellunt antiquitate. Atqui eorum omnium complexione olim quamdam sanctam vel nomen ipsum declarat, quod iis Hieronymus, quod Avitus, quod alii veterum Patrum dederunt, qui *Bibliothecam* illos appellarunt. Id postea ab Eusebio præsertim, & Hieronymo in difficilioribus Scripturæ locis explanandis; ut in Danielis prophetia illa institutum: sed multo frequentius nostra, & Majorum nostrorum memoria, factum in sacris sanctorum Librorum Interpretibus; unde illæ *Catenæ* tot & tam multæ prodierunt; factum in Fidei dogmatis tuendis; inscriptaque opera *Orthodoxographia*, *Heresiologia*, *Græcia orthodoxa*; factum in sanctorum hominum rebus gestis describendis a Lipomann, a Surio, a Bollandianis, atque in veteri Ecclesiastica Historia a Christophorono, & Valesio: denique in rituum hac nostra facultate ab Hittorpio, Clithovæo, Cochlæo, Pamelio, Mabillonio, ceterisque quos supra nominavimus; ut omittam Pontificias illas, Patrum, aliisque Bibliothecas quas appellant tam multas, ut in his omnibus nominandis iustum sane volumen impendere Thomas Ittigius potuerit. Nec vero operam desivit in hoc genere hominum nostrorum cura. Quare cum in Hæbraicis rebus & in rebus sacris simile aliquid conari quale in profanis Grævius, & Gronovius effecerat; Voigt librorum Auctorumque recensendorum elencho proposito suavisset, primam nunc partem in Hæbraicis, alterius consilio diligentique perfici videmus. Igitur ad sacrorum rituum facultatem huiusmodi adjumentum asserre Canonici Regulares nostri cogitarunt, & præclarissimorum Liturgicorum Auctorum Bibliothecam quamdam adornarunt. Cujus quidem non una est, ut scitis, & simplex conficiendi ratio, sed triplicem nobis Veteres tradidere; unam quidem, quæ Auctorum opera ipsa, prout ab illis sunt edita exhibet: qualis Julii Africani aliorumque fragmenta Eusebius, & Hieronymus nobis sæpe representant, alteram quæ eorum Auctorum servato librorum & prisco dicendi ordine Epitomen quamdam conficit, & ut Veteres dicebant *excerpta*: quod in Bibliotheca sua Photius fecit, ac præsertim in Philostorgii historia, quam partem esse majoris cuiusdam operis multi censent: denique quæ illorum sententias doctrinamque ita uti videtur contrahit, breviusque exponit; atque hac ratione Diodorum Siculum præsertim Bibliothecam suam scripisse constat. Ex his nostri cogitant illum modum in Auctoribus edendis sequi, qui maxime idoneus ad Scriptoris cuiusque doctrinam exhibendam videbitur, atque ad utilitatem ceterorum accomodatus; brevitatis etiam habita ratione, ne in infinitum opus exerceat. Quo suscepto consilio unde ordiendum erat, aut quem primum facere Bibliothecæ Auctorem debebant, quam illum, qui enim ritus omnes suse in libris suis explanavit, tum vero præcipuum ex illis, qui ad Romani Pontificis personam spectant, de Beatificatione & Canonizatione Sanctorum adeo luculenter, adeo

docte,

docte, eleganterque tractavit, ut omnium quotquot hætenus scripserunt industriam diligentiamque vicerit, posterorumque omnium occuparit.

Itaque a maximo rerum Liturgicarum Autore & Doctore felix, faustum, fortunatumque auspiciis sumit Liturgicorum Scriptorum editio, de qua, quoniam omnis mihi cura credita est, nunc video esse mihi differendum; totamque edendorum librorum faciem, & veluti æconomiam vobis exponam. Constat igitur Operum SS. D. N. BENEDICTI XIV. editio tomis duodecim.

Tomus I. II. III. IV. erunt de Servorum Dei Beatificatione, & Beatorum Canonizatione.

Tomus V. exhibebit Acta Canonizationis ab eodem SS. D. N. celebratæ. Cum enim multa ille hac de re sapientissime prudentissimeque instituerit; hic ea ut executioni mandata sunt, conspiciuntur; quod ut proponere sibi quisque ante oculos atque usurpare possit, ea æneis tabulis quadraginta eoque amplius representanda non mediocri diligentia sumptuose curabimus.

Tomus VI. Appendices dabit apprime utiles, quæ argumenta Lectoribus suppeditare, & adjumenta ad lectionem illorum librorum afferre possint.

Tomus VII. Documenta exhibebit, quæ primo secundæ editionis tomo præponuntur; & Appendices, quæ in calce quatuor priorum voluminum hætenus continebantur.

Tomus VIII. occupat Index copiosus atque accuratus præcedentium librorum. Cum enim multa in illis contineantur, non solum sacrorum rituum studiofis sed ceteris quoque, præcipue qui historię Ecclesiasticę sacręque antiquitati cognoscendę dant operam, utilissima, commodum visum est longiori Indice, immo plurimis Indicibus diligentiusque elaboratis instruere, quam hætenus factum est, in quibus non modo præcipue res, sed Scriptores, & quæ servorum Dei causę in opere nominantur, indicentur. Nemo enim ignorat Indices hujusmodi diligenter accurateque elaborati, quantum juvent eorum laborem, qui vel jamdiu opus legerunt, singulas vero res retinere memoria non potuerunt, vel opere nondum lecto an ibidem aliquid addit, quod rem suam faciat, cognoscere rursus volunt. Et certe sine his subsidiis multa excellentium Auditorum opera eo fructu carent, qui poterat in omnes omnino homines redundare. Atque hos antecedit sive Index alius, sive potius breviarium quoddam, & operis totius epitomes; quam vel librorum lectionem ingredientibus, vel ea perfecta brevius eam repetere, & memorię præcipuas res demittere volentibus magno usui futuram speramus, quam methodum in consiciendis Indicibus SS. Dominus maxime probavit, commendavitque.

Tom. IX. tractatum sive commentarium continebit de sacrosancto Missæ Sacrificio, qui ipse quoque Liturgicę scientię magno erit subsidio, diligentissime doctissimeque quæcumque hoc de argumento ab aliis disputata sunt comprehendens.

Tomus X. in altero commentario impendetur de festis Christi Domini sanctissimęque ejus Matris; cui accessio sit nonnullorum Sanctorum de quibus Officium & Missa celebratur in Bononiensi diocesi: quam partem Italice hætenus tantum editam, nunc ab Autore locupletatam, animos stimulosque eodem addente, Latino ego sermone donavi.

Tomus XI. representabit Institutiones Ecclesiasticas, sive ut vulgo appellantur *Regulationes* ab Autore nostro editas dum Bononiensis vel Anconitanę Ecclesię Episcopus cura & vigilantia singulari nascentibus subinde articulis rerum consultum vellet.

Tomus XII. habebit luculentissimum nec antea editum diuque & multum expectatum tractatum de Synodo, quo præter, cetera editionem hanc locupletare SS. Pater voluit, quem *librum de Synodo tractantem* (verba sunt Sanctissimi Domini ad Canonicos Regulares) tanquam luculentissimum *Paternę nostrę erga vos voluntatis testimonium vestrę Academię largimur; qui & si in duodecimo postremoque Operum nostrorum tomo collari debeat, quamprimum tamen in lucem prodibit.*

Neque

Neque vero existimetis adhuc nos Opera complexos esse omnia quæ ad Liturgicam facultatem pertinent, quæque Sanctissimus Pater elucubravit. Sunt enim hæc quæ recensuimus Cardinalis solum Lambertini Opera, quæ nimirum vel ante adeptam supremam illam dignitatem conscripsit, vel privatæ tantum personæ Doctoris quæ habere auctoritatem voluit. Hanc ejus voluntatem discrete explicavit in litteris datis ad Cl. Facciolatum atque editioni Patavinæ præfixis, quas etiam hic referri ob hanc ipsam causam jussit. Itaque hoc loco subijcimus.

## BENEDICTUS PP. XIV.

DILECTO FILIO

JACOBO FACCIOLATI.

**D**ilecte Fili salutem & Apostolicam benedictionem. Cum Archiepiscopalem Bononiensem Ecclesiam præsentem gubernabemus, magnis licet oppressi eris, quas manus illud amplissimum secum affert, aliquot antelucanas horas vix non quotidie somno subtrahimus, opus non sane exiguum lucubratur in Canonizatione Sanctorum, quod quatuor in volumina distributum typis edidimus in eo digestis tot rerum monumentis ad hujusmodi scientiam pertinentibus, quæ summo labore accuratissimoque studio collegeramus, dum per tres Pontificatus maximos Promotoris Fidei ministerium gessimus. Quin etiam insuavem molestiam suscepimus Indicis conscribendi, quo complexi sumus quidquid præcipue respicit eursum & prosecutionem causarum, quæ de sacra Apostolice aguntur in Romana rituum Congregatione. Prætermisimus autem indicare tot per omnem incubationem agitates ac dissolutas quæstiones Theologicas, Philosophicas, Physicas, sacræque Historiæ, quæ congruentes nostro tractando explicandoque argumento sese obtulerunt. Concilii tenuitatis nostræ, verecunde intelleximus ab omni eruditi orbis parte ac plurimorum litteris, lucubrationem nostram non inutilem, non injunctam, non levis momenti fuisse reputatam, ac suffragasse benevolam expectationem, quæ de ipsa, fortasse immerito, commota fuerat; verum a pluribus desiderari locupletiore Indicem rerum ibi disceptatarum, quo non parum subleventur, qui sua in multiplex negotiorum partiri tempora, necesse habent. Quocirca opera pretium existimari, librum rursus, aucto syllaba, prælo subjicere, ut communi commodo, omnium desiderio subservire possit. Facile tecum ipse perpendes, possimus ne cogitare, nedum animum adijcere ad recolligendam e tam varia diffusissimaque materia novum Indicem, dum prope immensa universi Christiani gregis sollicitudine ac vigilantia, tantaque rerum gravissimarum mole, hoc præsertim difficillimo tempore, vix non obvinimur. Quidpiam tamen subduximus nocturnæ quieti, ac necessariæ relaxationi, qua inflatur animi vires oportet, ut ad agendum sufficiant. Tunc enim additi in privatam nostram bibliothecam, ac nobis propemodum resistenti, plura magni momenti addidimus instituta pridem Operi, a Nobis deinceps congesta in adeo feraci argumento, aut suppeditata recenti aliquo casu, post libri Nostri editionem expenso atque examinato. Hæc autem addita suo loco a Nobis inserita deferri ad te identidem jussimus; quare eandem de nostro eodem litterario sæm rursus evulgando cogitaveras. Te simili hortati sumus, ut, Nobis gratificatus, permolestum nobilioris condendi conscribendique Indicis negotium susceperes. Utinamque a te singulari adeo diligentia, peritia, studio paratum est, ut nihil ultra nobis optandum reliqueris, nec spem festelleris, quam de tua virgine solertiaque conceperamus. Quæ perbonorifica de te sententia ut neminem lateat, maneatque grati animi Nostri memoria, atque eximie tuæ laudis publicum documentum, Apostolicis litteris in forma Brevis testari volumus; quibus etiam palam facere, ac declarare.

elaborare opportunum duximus, Nos quicquid præcipuum ac ponderosius in Codice istum digessimus, elaborasse, dum Cardinalatus honore fungeremur. Quocirca non aliam præferre auctoritatem, quam privati Auctoris; eosdemque intra privata auctoritatis fuisse ea quoque contineri, quæ adjuvamus in hac iterata Operis editione, in lucem prodeunt, dum in suprema D. Petri Sede, licet profusus immatentes, locati sumus; exceptis Decretis, quæ a Nobis Pontificatum Maximum gerentibus de huiusmodi argumento interposita, illic inserta sunt. Hæc enim pari volumus pollere jure, quo pollent reliqua Decretorum N. strorum Sanctiones, ista ipsa super re promulgata. Perge itaque, dilecte Fili, urgere susceptum laborem: his fortasse non supervacaneum, nec inane inopportunum, qui Ecclesiasticam eruditionem, severiores disciplinas, hæc sacra Apostolicis illustrem scientiam colunt. A nobis profecto plurimam iuvis gratiam debitamque tuæ virtuti benevolentiam, ejus pignus Apostolicam Benedictionem tibi peramanter impertimur.

Datum Romæ apud Sanctam Mariam Majorem sub Annulo Piscatoris die XX. Julii MDCCXLIII. Pontificatus Nostri Anno Tertio.

Jo. Vincentius Lucchesinus.

Propositum ergo nobis fuit ut ab his abstinere quæ loquela factus universalis Christianorum, ut Innocentium IV. Princeps ille Babylon iusto verissimoque præconio appellavit, Apostolica usus auctoritate Ecclesiæ universæ mandavit legesque dixit; in quorum numerum referenda præ ceteris illa *Constit. 77. tom. 1. Bullarii* comprehensa, quæ est de dogmatibus & ritibus ab Italo-Græcis tenendis atque servandis: item decreta *Constitut. 87. de ritibus Græcorum Melchitarum* &c. quæque continentur 84. de vestibus Auditoribus causarum sacri palatii Apostolici concessis in accessu ad Cappellas *fratru* &c. His ergo omisiss, illa quæ supra enumeravimus, edemus, recensitisque, juxta præscriptam nobis a SS. D. N. rationem cura quantum poterimus, & diligentia majore. Atque ut commodis vestris omni ope, quantum in nobis situm est, prospiciamus; quod animadversum sit amplioris formæ sive faciei libros etiam magnificentiorum sui speciem præbeant, figuræ tamen esse majoris quam ut facile manibus omnium tractari verisimiliter possint, in minorem, idest, ut ego interpretor, commodiorem quam hactenus factum est compingi volumus, damusque in quarta magni folii parte quam dicunt *quartum magnum*: Ita vero brevi omnes tempore edendos eurabimus quantum conati mea aliorumque quos mihi socios adiutoresque adseivi diligentia ac sedulitate potero. Videtis, Juvenes optimi, quomodo multi sint in vestris commodis procurandis occupati, quanta vobis, vestræ eruditionis gratia moliamur. Sunt enim in hoc quoque nonnullæ partes meæ qui editionem hanc ut dixi curem, atque illum præterea a commodorum vestrorum Auctore bonorumque parente BENEDICTO XIV. mandatum acceperim viribus certe nostris longe superius, Liturgias Institutiones coniciendum, quod opus quantum studio conati, quantum diligentia industriaque potero ita curabo, ut huiusmodi rebus studiosis non parum adjumenti siliatium esse credidam.

Verum illos, quorum sunt præcipua in vos merita atque Academiam hanc vestram & Conimbriciensem urbem sibi eximia quadam ratione devinxerunt breviter indicabo; ut, quod initio dixi, omnium in nos merita palam hant innotescantque omnibus. Ac de BENEDICTO quidem Pontifice O. M. quæ fuerit ejus in vos liberalitas, quæ in Canonicos Regulares beneficentia, quæ in istam Urbem & Lusitaniam omnem humanitas ac benevolentia plane singularis diximus: etsi ne id quidem consecuti sumus ut minimum ejus in nos meritum partem complecteremur. Quam enim est; tantum Pontificem naturæ primum dotibus ornatissimum, antiquissima generis nobilitate, ingenio, doctrina excellenti atque egregia præditum; deinde muneribus acria

gestis

gestis probatum spectatumque omnibus; nunc vero in ea sede locatum dignitatis, unde orbem universum suæ custodiæ creditum, suo consilio regendum, suisque curis cogitationibusque confirmandum restituendumque videat, convertere ad vos in Liturgicis rebus informandos animum, vestram eruditionem singulari quadam cura complecti, rebus vestris in perpetuum prospicere ac providere? Hoc quidem ille pro eximio, quo in Gentem nostram amore fertur; præstitit præstatque; ut præterita beneficia novis in dies cumulet atque exornet. Sed quis a tanto Principe in minimis adeo rebus curam ac providentiam expectasset; ut quæ Conimbricæ facultates docerentur, quæ locum hactenus in Lyceo nasci non essent cognoscere ac rimari vellet? Quamquam in hoc oblectus est ille clementiæ suæ qua inter maximas gravissimæque curas, quibus ita se totum tradit, ut nihil ceteris, quæ non gravissimæ sint cogitationum impendere possit videatur; his minoribus ita consulit, providetque, ac si in majores curæ nihil diligentiusque suæ contulisset. Obsecutus est eximio quod tenetur litteras fovendi studio, quo Academiis sive nobilissimarum sacrarum disciplinarum quasi Athenæa quatuor, quæ ipse celebret, quibus interit, in palatio ipso suo excitavit. Obsecutus denique maxime, augendi Divini cultus sollicitudini ac curæ, qua & vetustissima Romæ templa reparavit, aut nova molitus est, & ritus in Canonizatione præsertim Sanctorum adhiberi solitos ad Majorum disciplinam, decoremque Ecclesiasticum exactius exigit. His igitur Sanctissimi Patris beneficiis respondere qua ratione possumus?

Adjungendus vero est summo omnium Pastori Rex ipse noster invictissimus atque optimus; cui explicare quis possit quantum debeamus. Ab eo primum id muneris habemus, quo vel jucundius, vel utilius, vel omnino majus concedi hominum generi non potest; ut inter armorum strepitum, quæ Europæ regiones ferme omnes sollicitant, nos summo otio, ac tranquillitate perfruamur. Hoc ad Regni totius felicitatem pertinet; præcipuo tamen jure quodam ad juventutem Academicam, & celeberrimam Lusitanæ Academiam. Quis enim ignorat conticescere litteras inter arma, & bellorum tumultibus scientiarum studia opprimi, ac præfocari? Nunc vero ita celebrantur, ut nullo unquam tempore Lusitania plus floruisse bonis artibus ac litterarum gloria vere possit affirmari. Si hoc unum Rex prudentissimus atque optimus præstisset, ut inimicissimos litteris armorum incursum arceret, magnum quidem illi litteræ debere viderentur. Est tamen longe majus quod ad bonarum artium, ac disciplinarum laudem amplificandam contulit, idque ei potissimum facultati, quæ hominum doctissimorum laboribus præcipue celebratur, quæ in Academia dominatur, cui primas nostris temporibus hominum commendatio, & Eruditorum ferme omnium consensus detulit. Historiam dico; quæ nunc apud nos adeo floret ut nihil sit, quod aliis nationibus hoc in studiorum genere debeamus; multa vero illæ a nobis accipere præsidia hujus doctrinæ, si volunt, possint, & debeant. Testatur hoc librorum ingens numerus in externas linguas, eamque maxime omnium, quæ harum rerum Magistra existimatur, Gallicam, conversus. Testantur præclarissima monumenta hominum studio, vigilantique & tenebris cruta, quæ omnium Eruditorum summo plausu excepta perferantur in longinquis terras. Testatur Academicorum Ordo ipse, qui Historiam illustrandæ navant operam, iique non solum Ecclesiastici viri, aut e Religiosis familiis, qui vitam ferme in litteris additi ducere consueverunt, sed Proceres, ac Regni Magnates gravissimis negotiis, publicisque muneribus impediti, supremi Curie, ac Tribunalium Præsides, Pro-Reges ipsi, atque ex Ecclesiastico cœtu, qui in Patriarchali Sacrosancta Basilica primos locos tenent, Atqui hanc Historicam facultatem non dicam Regis nostri munificentia auctam, atque amplificatam; sed pene intermortuam excitatam, ac de integro nobis largitam, atque donatam. Totum id quantumcumque est Regis nostri curæ, ac liberalitati debetur, qui nihil deesse laboriosis doctissimisque viris, sive ad studia hujusmodi peragenda, sive ad laborum fructus edendos, vulgandosque sinit, qui

qui verbis, Regiæque ope, vultu ipso unumquemque ad litterarum hanc laudem Gentis nostræ afferendam excitat atque inflammat. Hac ergo ille Historiæ tam eximia & diligenti cura, atque in ea exornanda amplificandaque studio exemplum præbuit, cur Historiæ partem, quæ ad hominum facta, eventusque rerum sacrarum, vel ad disciplinam, sacros præsertim ritus ac ceremonias explicandas pertinet, essent qui excultam hominum nostrorum ingenii, auctamque vellent. Quamquam aliud præterea in eo, qui de hac inducenda cogitarunt spectasse oportet. Quid enim non viderent, quod Lusitani omnes, immo universus terrarum orbis videt ac prædicat, singulare illius atque admirabile plane studium in iis procurandis, quæ ad Dei Sanctorumque cultum faciunt? Mirata est Lusitania, amplissima & magnificentissima templa Regis unius intervallo tam brevi excitata, altaria egregio opere, pretiosissimisque marmoribus extructa; quorum unum hoc ipso auno Romæ totius, his enim vero spectandis non infueta, oculos ad se convertit; sacram omnis generis suppellectilem immensis sumptibus collectam, atque e remotissimis etiam regionibus iu nostras terras apportatam; ut dubitari plane possit an ullus unquam fuerit, qui majores opes copiasque in hujusmodi rebus effuderit. Quamquam non sum eo verbo usus quo decuit: non enim effudit, sed ad nominis sui gloriam comparandam, ad nationis nostræ famam augendam, ad Divinam sibi opem gratiamque conciliandam impendit. Quamobrem si in nostra civitate, si in florentissima Conimbricensi Academia, si in Canonicorum Regularium ædibus duas amplissimarum facultatum scholas patefactas, si disciplinarum numerum amplificatum, si vestris commodis accessionem factam videtis, omnia inclito invictissimoque Regi adjudicanda sunt.

Intelligitis opinor, me etiam superius admonente, quantum hac in re valuit opera utriusque eorum, qui vobis præsunt, Episcopi, & Rectoris Conimbricensis, de quorum laudibus, ne vim modestiæ inferam utriusque, non plus addam ad ea, quæ superius significavi, nisi alterius de eis iudicium, qui dignum existimavit utrumque, qui Canonicis Regularibus Reformatis præessent primi, legumque recens institutarum vel revocatarum custodiam ante omnes aggredierentur. Atque hic quidem qui tale de illis iudicium tulit, nobilissimoque præconio laudis commendavit, maxime est ipse laudandus; cum præclarissimis dotibus, quibus fuit a natura, fortunæque instructus; tum eximia virtute, qua naturæ, fortunæque illa vel occultavit, vel dimisit, vel ad maximas res pro Religione patrandas convertit. Non est necesse quis ille sit, disertius explicem; nimirum R. S. D. Fr. Gaspar ab Incarnatione. Quis enim hæc enumerans in eum statim non incurrit; vel non videt his omnino, quas dixi laudibus pollere? Illum eximia quædam ac singularis Dei benevolentia in Excellentissimorum Marchionum de Gouvea nobilissimæque familiæ Mascarenhas domum, nascentem induxit; de qua domo quid dici potest quod æquare ejus dignitatem possit? Quamquam laudatores nata est eloquentissimos doctissimosque, qui familiarum, quæ in Hispania ac Lusitania nobilissimæ habentur, historiam contexuere: inter quos nominandus in primis Vir Clariss. Clericorum Regularium lumen decusque egregium, mihi vero amicitia conjunctissimus Rev. D. Cajetanus de Sousa tom. 8. 9. 10. & 11. *histor. genealog. Regiæ domus Lusitan.* & in lib. de *Magnatibus Lusitan.* Ex Societatis vero nostræ hominibus non prætereundus Joseph Cassani sermonis elegantia cultuque orationis, quem vel in ipsius ad me epistolis, quoties perfrui mihi illis licuit, admiratus sum, inter Hispaniæ Scriptores nobilis, qui tom. 8. de *insignibus sanctitate viris qui Soc. Jesu illustrantur* quatuor germanorum fratrum ex hac familia vitas scribere ingressus Excellentissimæ domus Mascarenhas laudes attingit; sateaturque maximum esse, quod ei Societas nostra debeat: vel quod D. Petrus Mascarenhas Joannis III. apud Romanum Pontificem Orator nostros homines litteris suis Regi mirifice commendavit, atque ipso Rege urgente, primos a S. Ignatio socios quos in Lusitaniam inferret, impetravit, quos viros? P. M. Simonem Rodiericum

ricium de Azevedo, qui non in Lusitaniam solum sed in Hispaniam Societatem induxit ; S. Franciscum Xaverium, qui aditum in Indias ceteris patefecit, signumque veluti extulit ad Fidem in barbaras regiones vel primo invhendam vel propagandam ; idque exemplis quibusdā laboribus, capite ipso in apertum discrimen dimicationemque vitæ obiecto : vel quod Ferdinandus Martinus Mascarenhas Algarbiæ Episcopus & Generalis Inquisitor Farense Collegium fundavit, atque amantissimum se, liberalissimumque Societatis nostræ parentem professus est; neque amorem ea, quæ finem omnibus imponit, morte interire passus testamento mandavit, ut corpus apud nos conderetur, cum quibus animo semper fuerat diversatus : vel quod conjunctissimos semper nobis amicissimosque habuit qui etiam benevolentiam hanc in alias domos propagarent . Hujus rei luculentissimum testem Roma videt Eñum Cardinalem Portocarrero ex germana sorore maritis Reverendi P. Gasparis in Hispania natum : qui quidem duo præclarissimi Viri, alter in Lusitania Regularis disciplinæ & animi demissionis, alter Romæ pietatis & moderationis exemplum, eodem consanguinitatis gradu S. Franciscum Borgiam contingunt, quo eundem contigit Serenissimus Brasiliæ Princeps, atque ejusdem soror Hispaniarum Regina : siquidem horum omnium S. Borgia sextus est avus, cujus egregia pietatis exempla Reges nostros ac Principes imitari, ac populi religionem pietatemque excitare atque inflammare videmus . Ne vero ab instituto sermone longius divertam, liceat ad Rñum Reformatorem animi cogitationemque convertere .

Ex hac ergo tali tantaque familia cum Revñus Reformator esset, cumque omnia præterea, quæ ornare alios singula solent, in eum confluxissent, nihil ex iis vir excellens quadam & sublimi mente præditus extulit, nisi ut haberet, quæ aspernaretur, rejiceretque, quo ad Deum evolare liberius posset ; atque in medio honorum cursu rebus omnibus nuntium remittens non solum in S. Francisci familiam, ut mox dicebam, sed in ejus familiæ celeberrimum quidem, sed longe ab hominum commercio remotum abdutumque Seminarium de Varatojo se recepit, ingenti Lusitaniz totius admiratione, cum susceptæ tunc austerioris vitæ, tum postea retentæ : etiam ab ea honores dignitatesque illum abstrahere conarentur. Quis enim non miraretur eum, qui opulenta in domo educatus opibus abundaret, magna que apud omnes Ordines fama vel gratia floreret, quem Rex prudentissimus juvenem adhuc celeberrimæ regni totius Academiæ præposuisset, ut longe majora expectare posset in dies augmenta vel copiarum, vel dignitatum ; omnibus quæ ipsi collata fuerant se ornamentis abdicasse, spesque in futurum tempus quilibet præcidisse . Quamquam fuerunt, qui de eximio quodam fructu, quem inexpectata illa fuga intercepisset Conimbricensi Academiæ, ac Lusitaniz toti, quererentur : quos nunc sane deponere animo mæorem, & suppressere querelas decet . Quis enim utilissimum neget ex ea S. Francisci domo, quasi ex sanctitatis officina aliquis, prodigiis atque existere hominem cumulatū virtutibus, & egregiis animi dotibus . . . Religiosissimum, tam virtutibus, quam litteris ornatissimum, adeo ardenti zelo, prudentia, ac ingenii acumine in Congregationis Sanctæ Crucis restitutione ad primum statum, unde decidit, ut ceteris familiis Religione fulgentibus sit exemplar, quemadmodum summum hunc Virum vocat laudatus Bracarensis Princeps atque Præsul : aut insignem pietatem, ælulum, prudentiam, intellectus acumen, judicii maturitatem, aliasque egregias animi dotes quibus adhuc manens in sæculo, ita eminebat, ut quodammodo supra hominem videretur assurgere ; fortunatissimum iuremerito dixerimus Congregationem, quæ tantum ac talem meritis habere Reformatorem, ut de eo prædicat Archiepiscopus Eborensis : ut omittam cetera his omnino similia in eum collata præconia omnium Lusitaniz Episcoporum . Sed quis omittere possit SS. D. N. BENEDICTI XIV. de eo luculentissima testimonia, cujus sunt illæ voces in litteris ad ipsum datis ; quas quidem aut reticere, aut non eodem, quo conceptæ sunt, contextu reddere nefas putamus : Nobis, inquit, compertum est te, dilecte fili, vero esse zelo præditum, te sa-



era eruditione polleat, te regia Majestati esse acceptissimum, & nonnullis adjectis: *Spe repleti sumus Te plura præstiturum esse, quæ nos excoGITARE non possumus. Id nobis suadet morum probitas, suadet sana quæ est in Te doctrina, suadet tua firmissima ad hæc Ecclesiæ dogmatibus, suadet tuus erga Apostolicam Sedem amor.* Ejusdem SS. Patris verba sunt alia in epistola: *Tua obdientia erga hanc sanctam Sedem, & erga nos, quam tot exemplis comprobasti.* Item quæ in aliis litteris amor vere paternus expressit: *Dilecte Fili, benevolentiam tuam erga nos conserva: nos paternæ erga te dilectionis nunquam obliviscemur, tibi quæ interim Apostolicam benedictionem plenè ulnis amplectentes elargimur.* Sed fructus, qui ex præclarissimo sacro illo rerumque omnium contemptu profluxit, non ex ipsius tantum vita repetendus est, sed eorum omnium quos ad arctiorem Religiosarum legum custodiam adduxit, in quibus veterum Patrum illorum, qui litteris omnium laudantur, exempla renovavit, restituitque eam, quæ senescere jam cœperat, deflueratque sanctissimi rigoris disciplinam, & Divini cultus tuendi amplificandique studium: de Canonicis loquor Regularibus S. Crucis, in quibus illa omnia nunc ita vigent, ut nihil præterea addi, nihil desiderari posse videatur. Sanctissimi sapientissimique viri commemoratio, Liturgiæ Academiæ Auditores optimi, a vobis aberrare fecit orationem; neque tamen valde elaborandum est, ut eo quo pertinnerat, revocemus; ad eos nimirum, quibus novæ scholæ constitutionem, atque ad Liturgicam facultatem Historiamque Ecclesiasticam adjumenta debetis. Hunc enim, quem postremo nominavi, Reverendissimum F. Gasparem ab Incarnatione inter primos numerandum esse nemo ambigat, cum referre illi propemodum acceptam ceterorum voluntatem, prudentissimi Rectoris, & vigilantissimi Præfatis, quos ad hanc virtutem formavit, quos in Religiosa vita erudit, quos educavit, debemus; multa etiam potissimum tanti viri gratia ab inclito Rege nostro in vos beneficia collata dubitare non potestis; ut quem interceptisse dicebant Conimbricensi Academiæ discessu illo suo fructum, multo jam audiorum amplioremque rependat: de SS. vero BENEDICTO XIV. affirmare certo possum. Quid ergo restat Academici, nisi tantorum hominum ad vos conversæ esse studia cum pericipiatis, Pontificis Optimi Maximi, & incliti Regis nostri humanitati ac benevolentiae respondeatis, Reverendissimi Reformatoris, Conimbricensis Antistitis, Clarissimi Rectoris, susceptam pro vobis curam ac sollicitudinem æquaquam irritam abire patiamini: hanc vero Sanctissimi Patris postremam Operum editionem sic excipiat; ut quoniam non usus vobis dumtaxat, ut ceteris, sed veluti mancipio dati sint, in his libris habitetis: alii qui eos magno cum fructu hæcenus tractarunt diversatim solummodo videantur.

# INDEX CAPITUM

## HUIUS LIBRI PRIMI.

CAP. I.	<b>D</b> E <i>superstitiosa apothefi Gentilium.</i>	Pag. 1.
II.	<i>De Martyrum juxta antiquam Ecclesie disciplinam differentiis, &amp; eorum cultu.</i>	11
III.	<i>De collectione Actuum Martyrii, &amp; eorum examine, &amp; Ecclesiastico super illis judicio.</i>	18
IV.	<i>De Martyrum notitia ab una ad aliam Ecclesiam per litteras encyclicas transmissa.</i>	26
V.	<i>De Confessoribus, &amp; eorum cultu.</i>	37
VI.	<i>De Ecclesiastico judicio requisito, antequam cultus religiosus Confessoribus exhiberetur.</i>	45
VII.	<i>De interventu auctoritatis summi Pontificis in cultu decernendo erga Martyres, &amp; Confessores.</i>	50
VIII.	<i>De ejusdem interventu auctoritatis.</i>	61
IX.	<i>De Pontificia iterum auctoritatis in Beatificationis &amp; Canonizationis negotio interventu.</i>	71
X.	<i>De Pontificia auctoritate extra Concilium, &amp; de jure beatificandi &amp; canonizandi summo tantum Romano Pontifici reservato.</i>	78
XI.	<i>De eodem privativo jure juxta scribentium assertiones.</i>	85
XII.	<i>De potestate canonizandi.</i>	91
XIII.	<i>De benefacto, ut aliquando solemnina Canonizationis expleantur.</i>	98
XIV.	<i>De subiecto Canonizationum.</i>	109
XV.	<i>De gravitate causarum Canonizationis, &amp; de his, quorum opera &amp; consilio summi Pontifices olim usi sunt in earum definitione.</i>	119
XVI.	<i>De sacrorum rituum Congregatione.</i>	127
XVII.	<i>De Protonotario, &amp; Secretario sacra Congregationis, &amp; de Rota Romana Auditoribus eidem Congregationi adscriptis.</i>	139
XVIII.	<i>De Fidei Promotore, &amp; ejus Subpromotore.</i>	147
		XIX.

- XIX. De Notario , & archivi Inspectore , Interpretibus processuum , Procuratoribus , Advocatis , & Medicis , aliisque Ministris Congregationis sacrorum rituum . [157](#)
- XX. De diligentis per Romanos Pontifices antiquiori tempore adhibitis in discussione casuum Beatificationis & Canonizationis , & de serie Actorum , qua eadem antiquiori tempore pertractabantur . [179](#)
- XXI. De Consistoriis , quæ olim cgebantur pro definiendis causis Canonizationis . [180](#)
- XXII. De serie Actorum in causis Beatificationis , & Canonizationis juxta præsens Sedis Apostolica institutum , & de diligentis , quæ in earum examine fiunt . [192](#)
- XXIII. De nonnullis ad institutum Congregationis sacrorum rituum spectantibus , quæ ante tempora sanctæ memoriæ Clementis XI. vigeant . [204](#)
- XXIV. De solemnitate Beatificationis . [209](#)
- XXV. De transitu a Beatificatione ad Canonizationem . [215](#)
- XXVI. De serie Actorum in transitu a Beatificatione ad Canonizationem . [220](#)
- XXVII. De serie Actorum in causis Martyrum , quæ introducuntur post decreta Urbani VIII. & quæ procedunt per viam non cultus . [227](#)
- XXVIII. De Actorum opinionibus quoad signa & miracula in causis Martyrum . [234](#)
- XXIX. De Ecclesiastica disciplina quoad miraculorum necessitatem in Martyrum causis . [244](#)
- XXX. De sacra Congregationis rituum consuetudine quoad miraculorum necessitatem in causis Martyrum . [255](#)
- XXXI. De serie Actorum in causis sive Confessorum , sive Martyrum , quæ introducuntur post decreta Urbani VIII. & quæ procedunt per viam casus excepti . [262](#)
- XXXII. De serie Actorum in causis sive Confessorum , sive Martyrum , quæ introducuntur post decreta Urbani VIII. quæque procedunt per viam casus excepti in transitu a Beatificatione æquipollenti ad formalem Canonizationem . [265](#)
- XXXIII. De serie Actorum in causis Beatificationis & Canonizationis introductis ante decreta Urbani VIII. & quæ post eadem decreta resu-

- refumuntur, siue sint Confessorum, siue Martyrum, siue procedant per viam non cultus, siue per viam casus excepti.* [277](#)
- XXXIV. *De Confistoriis privato, publico, & semipublico habendis pro absolutione causarum Canonizationis.* [284](#)
- XXXV. *De nonnullis aliis orationibus, quae sunt in publicis Confistoriis a Confistorialibus Advocatis.* [293](#)
- XXXVI. *De solemnitate Canonizationis.* [297](#)
- XXXVII. *De actibus cultus Servus Dei post Beatificationem deferendis.* [332](#)
- XXXVIII. *De actibus cultus Beatis post Canonizationem exhibendis.* [343](#)
- XXXIX. *De differentiis inter Beatificationem, & Canonizationem.* [353](#)
- XL. *In quo explicatur Sedis Apostolica permissio, quae per Beatificationem habetur.* [361](#)
- XLI. *In quo nonnulla indicantur de Sedis Apostolica definitiva sententia, quae in Canonizatione profertur.* [367](#)
- XLII. *De Ecclesiastico iudicio quod in Beatificationem interponitur, utrum videlicet sit infallibile, & ad Fidem Catholicam pertinet.* [408](#)
- XLIII. *De Ecclesiastico iudicio, quod interponitur in Sanctorum Canonizationem, utrum sit infallibile.* [420](#)
- XLIV. *In quo repelluntur opposita iis, quae dicta sunt in capite praecedenti.* [429](#)
- XLV. *An sit de Fide, summum Pontificem errare non posse in Canonizatione Sanctorum; & an de Fide sit, Canonizatum esse Sanctum.* [446](#)
- XLVI. *De expensis, quae fiunt tum in pertractandis causis Beatificationis & Canonizationis, tum in solemnitate, hoc est, cum in Beatorum, aut Sanctorum numerum aliqui Servi Dei, vel Beati referuntur.* [455](#)
- CAP. ULT. *De quibusdam cautionibus necessariis ad custodiam & erogationem pecuniarum ex pia Fidelium largitate collectarum pro causis Beatificationis & Canonizationis; deque nonnullis questionibus ad hanc eandem materiam pertinentibus.* [480](#)

DE AUCTORIBUS  
TUM THEOLOGIS, TUM JURISCONSULTIS, TUM ETIAM CETERIS,  
QUI SCRIPSERUNT  
DE BEATIFICATIONE  
ET  
CANONIZATIONE SANCTORUM  
DEQUE TOTA HUIUS OPERIS RATIONE

AD LECTOREM.



Numeros propemodum Theologos inuenimus, qui aliquid in suis operibus de Sanctorum Beatificatione atque Canonizatione scripserunt, si velimus singulos recensere, qui inter disputandum de hac ipsa materia disseruerunt. Sed in præsentem illos tantum indicasse sat erit, qui iustos de re hac tractatus composuerunt: deinde de Scriptoribus Jurisperitis agemus, qui argumentum idem ex professo pertractarunt: ad

extremum vero eos etiam memorabimus, qui de solemnibus apparatu pro Beatificatione, vel Canonizatione enarrationes ediderunt.

Antiquissimus igitur inter Theologos, quos viderim, qui tractatum de Canonizatione composuerit, est Auctor anonymus, cujus apud me extant mss. Hic enim opus suum exaravit anno 1592. idque dicavit Vincentio Lauræo Cardinali Montis Regalis: & plura quidem eo in opere habentur Theologico more pertractata de sanctitate, tum autem aliqua de virtutibus, necnon multa de miraculis, & horum natura: quare in huius nostri Operis decursu, quotiescumque occasio se offeret, hunc Auctorem laudabimus, ejusque sensum exponemus.

Proxime succedit Angelus Rocca ex Augustiniana familia, Apostolici sacrorum Præfectus, quippe cum scripserit temporibus Clementis VIII. cui etiam opus suum dicavit. Porro plura in eo sunt erudite collecta tum quoad requisita Canonizationis, tum quoad gradus & differentias miraculorum.

Sequitur Fortunatus Scacchus ex Ord. Eremitarum S. Augustini, pariter Apostolici sacrorum Præfectus. Scripsit nempe hic temporibus Urbani VIII. cui opus suum nuncupavit, inscriptum *de notis & signis sanctitatis Beatificandorum & Canonizandorum*. In eo autem opere non solum iuse agitur de sanctitate in genere, verum etiam de virtutibus tum

Theo-

Theologicis, tum Cardinalibus, quæ ad gradum heroicum pervenerunt. Præterquamquod ex ipsius operis argumento ac divisione colligitur, eum præterea composuisse secundum librum de Martyrio, tertium de miraculis, quartum de Beatificatione, quintum de Canonizatione, sextum de ordine judiciario harum causarum, septimum de Congregationibus, in quibus causæ pertractantur, octavum vero, quem nondum absolverat, de Missa Pontificia. Sed ex omnibus his operibus hujus insignis viri tria tantum supersunt mss., quorum unum est *de Martyrio*; alterum *de natura, quidditate, inquisitione, auctoritate, antiquitate, cultu, & quibusdam aliis annexis ad Beatificationem & Sanctificationem spectantibus*; tertium, in quo quidquid ad *Judicium directionem tam ordinariortum, quam delegatorum, & subdelegatorum ad theoriam & praxim processum in causis Servorum Dei requiritur, quantum fieri potest, dilucide explicatur*. MSS. scilicet ista extant in bibliotheca Angelica Urbis, cui dono data sunt a Petro olim Cardinali Othobono, qui postea ad summum Pontificatum evehctus Alexandri VIII. nomen assumpsit: is autem acceperat ex bibliotheca Cardinalis Corradi, uti apparet ex ipsorum operum inscriptione; qua ostenditur insuper ardens tanti Pontificis desiderium, ne quid occultum remaneret, quod studiosis posset expedire.

Quartus porro inter Auctores Theologos est Lucas Castellinus ex Dominicana familia, & sui quidem Religiosi Ordinis Procurator Generalis. Scripsit & ipse sub Urbano VIII. cui etiam dicavit opus *de certitudine gloriæ Sanctorum*; additis subinde duobus aliis tractatibus, id est *de inquisitione miraculorum in Sanctorum Martyrum Canonizatione, & de dilatione Canonizationis*. Hæc autem Castellini opera, etsi methodo carere videantur, cum saltuatim scripta sint, plura tamen habent notatu digna eruta non modo ex Theologis, præsertim vero ex D. Thoma, sed & ex Brevibus, & Romanorum Pontificum bullis, quæ maximopere professe possunt tum Procuratoribus & Advocatis, tum Fidei Promotori, tum etiam ceteris, qui ex officio in Beatificationum & Canonizationum causis judicium ferre tenentur.

Quintus est Franciscus Victonius ex FF. Minimorum familia, qui pariter tractatum *de Sanctorum Canonizatione* conscripsit tempore Urbani VIII. Sed ejus opus Gallico idiomate est exaratum; in quo tamen, etsi in Romana Curia Procuratoribus, Advocatis, & Congregationis sacrorum rituum Consultoribus non magno adjumento sit, plura sunt erudite collecta.

Sextus est Joannes Baptista Ricciolius Soc. Jesu Theologus, qui scripsit sub Clemente IX. eique opus suum nuncupavit. Ex solidis scilicet sacræ Theologiæ principiis unice ostendit *immunitatem erroris tum præctici, tum speculativi* in judicio, quod summi Pontifices serunt in Canonizationum causis.

Septimus est Philippus Maria a S. Paulo Carmelita Discalceatus.  
Edi-

Edidit enim anno 1677. *dissertationem*, in qua plura sunt utilia quoad vi-  
forum materiam; utpote cum eam compoluerit, ut demonstraret, quæ-  
dam visa, de quibus actum fuit in causa Beatificationis S. Joannis a Cruce,  
fuisse supra naturam, ideoque inter miracula recensenda.

Octavus est Cardinalis de Lauræa, qui in *suo cursu Theologico*, quem  
Innocentio XI. inscripsit, non solum agit de *heroicitate* virtutum in Beati-  
ficandis & Canonizandis requisita, verum etiam de miraculis & ho-  
rum conditionibus, ut a sacra Congregatione possint approbari, necnon  
de Martyrio. Auctor nimirum iste minime composuit justum de Beati-  
ficatione & Canonizatione tractatum; & quod consequitur, prima fa-  
cie non videtur de eo hic facienda mentio: attamen, quia fuit sa-  
cræ rituum Congregationis Consultor, & non modo institutionem, sed  
etiam usum eorum, quæ necessaria sunt ad virtutem heroicam, ad mi-  
racula, atque ad Martyrium perfectissime cognovit, non abs re existima-  
vimus ejus etiam meminisse; & eo quidem magis, quod non perfunctorie,  
sed ex professo de virtutibus ipsis egerit, de miraculis, ac de Martyrio.

Nonus est Carolus Felix de Matta Episcopus S. Severi. Edidit quip-  
pe temporibus Innocentii XI. tractatum de *Canonizatione Sanctorum*, in  
quo speciatim de sanctitate, de virtutibus, de gratiis gratis datis, &  
de miraculis disserit: ideoque opus utilitate non caret.

Decimus est Franciscus Bordonus ex Tertio Ord. S. Francisci; qui  
tractatum exaravit de *miraculis, ratione habita Beatificationis & Canoniza-  
tionis*. Post ejus obitum formis excusus fuit, & Clementi Papæ XI. dica-  
tus. Aliqua nempe eo in opere notatione digna reperiuntur; sed plura  
fortasse reperirentur, si opus ipsum a suo Auctore perfectum fuisset.

Ex Theologis demum undecimus est Jo. Baptista Memmius e Societ.  
Jesu; quippe qui, arrepta occasione Canonizationum Sanctorum, quas  
pereggit Benedictus XIII. tractatum Italico sermone edidit de *sacro ritu San-  
ctus canonizandi*. Nec omitti debet Auctor anonymus *dogmatici discursus*  
de *Sanctorum Canonizatione* formis Parisiensibus Gallico idiomate impressi  
anno 1739. post primam nostri hujus Operis editionem.

Juris autem Pontificii Professorum, qui de Canonizatione tracta-  
runt, agmen ducit Cardinalis Ostiensis in *comment. ad cap. Audivimus: de*  
*Reliq. & venerat. Sanctorum*. Scripsit etenim circa annum 1254. cum hor-  
tatu Alexandri IV. summi Pontificis jura Pontificia commentariis &  
notis illustraret: ceteri, qui idem caput *Audivimus* explicarunt, ea so-  
lummodo animadverterunt, quæ ab eodem Cardinali Ostiensi jam ad-  
notata fuere, ordinem procedendi in Beatificationis & Canonizationis  
causis potissimum respicientia. Peculiarem postea de *Canonizatione* tracta-  
tum edidit circa annum 1446. Troilus Malvetius; quod quidem opus ty-  
pis impressum est inter tractatus, qui *magni* vulgo appellantur, & in quo,  
præter ordinem procedendi in dictis causis, quædam etiam quoad vir-  
tutes, necnon plura quoad miracula examinantur: & per eadem circi-

ter tempora Martinus Laudensis parvum conscripsit tractatum *de Canonizatione S. Bernardini Senensis*. Allata vero tum a Cardinali Ostiensi, ceterisque juris Pontificii Professoribus, tum a Troilo Malvetio, collecta fuerunt & recte digesta a Jacobo Castellano de Fara Canonico Lateranensi, dum tractatum pariter *de Sanctorum Canonizatione* exaravit, quem Leoni X. summo Pontifici dicavit, in cuius præfatione hæc habentur: *Tacuit materia Canonizationis, Beatissime Pater, a tempore Sixti IV. Prædecessoris tui usque ad Apostolatum tuum augustissimum, eaque, ve'nti in remotis locata, situ quodam obducta jacebat. Tantum enim ex ea sumebatur quantum ad corroborandas alias materias frequentiores ac magis quotidianas conducere videbatur; ipsa vero principaliter & per se nunquam expetebatur. At nunc in felicissimo Pontificatu tuo in tanta celebritate versatur, tantum per ora Fidelium fere omnium evolat, ut quæ antea neglecta jacebat, nunc tanquam de tenebris & situ in lucem & claritatem evelta, per se quam maxime expetatur; & si inter sacros canones ea ipsa occurrat, affigitur eidem animus, multoque avidius ipsam, quam aliam, contemplatur: quamobrem accendebatur mihi animus magno opere ad eam, si vires meæ tulissent, per diversa loca dispersam, in unum ac breve compendium redigendam. Quod effeci tandem, Dei beneficio & ope, brevemque tractatum de Canonizatione Sanctorum secundum traditiones Canonistarum pro ingenii facultate composui. Item ante decreta generalia Urbani VIII. P. Virgilius Ceparius Soc. Jesu directorium Canonizationis Sanctorum composuit, quod nunquam tamen editum fuit; in quo profecto & plura adnotata sunt de modo ac ratione conficiendi processus in Beatificationis & Canonizationis causis, ut ex ejus præfatione deprehenditur (Licet enim, inquit, Doctores multa de Canonizatione scripserint, & peritissimi aliqui Canonistæ præclaros de hac materia tractatus ediderint, nonnulli quoque relationes diversarum causarum Canonizationis evulgaverint, quas in hoc directorio adducemus, rationem tamen conficiendi processus informativos primos apud Ordinarios locorum, expediendi litteras remissoriales pro formandis processibus secundis in genere, & tertiis in specie auctoritate Apostolica, compulsandi scripturas ex publicis tabulariis & archivis, & agitandi has causas in Romana Curia intrinsecam omnino reliquerunt) & adhuc plura extant de Romani Pontificis potestate in Canonizatione Sanctorum. Sed, cum major pars operis hujus versetur in expendendo, cujusmodi cultus præstandus sit Dei Servis nondum beatificatis, aut canonizatis (quod argumentum post decreta & Breve Urbani VIII. in quibus fere omnes de eo quæstiones definitæ fuerunt, nullum amplius sibi vindicatum locum) hac forte de causa factum est, ut directorium ipsum, quod ab Auctore vivente minime vulgatum fuit, neque post ejus obitum fuerit unquam typis impressum, atque ideo quasi inutile evaserit: quapropter & supervacui quodammodo haberi debeant exitiis hujus viri labores, spatio licet triginta annorum fuerit Postulator causarum Beatificationis & Canonizationis Servorum Dei e Soc. Jesu quemadmodum testatur ipsemet in eadem præfatione: *Quamobrem, inquit,**

cum



cum ego assiduo triginta jam annorum studio & labore, & longa harum causarum tractatione & usu didicerim, qua ratione haec causae sint ad gloriam Dei & Sanctorum honorem instituendae, inchoandae, proseguenda, ad optatum finem perducenda, ut hac mea experientia multis adjumento esse possit, decrevi hoc directorium conscribere, quo lectores instruantur. Tandem Felix Contelozius tractatum edidit de Canonizatione Sanctorum, in quo de potestate summi Pontificis, de virtutibus, de miraculis, ac de processibus tractat. Et sane, cum fuerit insignis in Romana Curia Advocatus, aptior ceteris esse potuisset ad universam materiam enucleandam; sed id minus perfecit, vel quia aliis curis & negotiis fuit distentus, vel quia, cum intuitu causarum, quae subsequentibus temporibus fuerunt in sacrorum rituum Congregatione discussae, se obtulerit occasio alia semper, eaque nova dubia examinandi, praeteritorum quam probe habuit notitiam, habere nequaquam potuit & futurorum.

Alia plura ad argumentum praesens pertinentia a juris Pontificii peritis conscripta fuere. Rosa quippe nonnullas composuit additiones ad suum tractatum de Executoribus litterarum Apostolicarum, ubi satis apte deseruit de validitate processuum in Beatificationum & Canonizationum causis; & quidem non persunctorie, sed ex professo. Joannes Migetius olim in Romana Curia Advocatus institutionem exaravit de modo conficiendi processus in eisdem causis, quae sunt typis impressa operâ Monialium Visitationis B. Mariae, utpote comparata ad probe conficiendos processus edocentes, quos informativos dicunt, de causa venerabilis Servae Dei Joannae Franciscae de Chantal ipsarum Fundatricis. Frigidianus Castagnorius disertus olim in Romana pariter Curia causarum Beatificationis & Canonizationis Patronus institutionem conscripsit pro recte conficiendis auctoritate Apostolica processibus super virtutibus & miraculis, quae & typis edita sunt Cracoviae, siquidem composita occasione causae Cracoviensis Canonizationis B. Joannis Cantii. Petrus de Quintanilla idiomate Hispano edidit opus super decretis Urbani VIII. de non cultu. Joannes Garzias de Caralaps tractatum condidit de Canonizatione Sanctorum, in quo, quippe cum factus fuerit occasione, qua Romae pertractabatur causa cultus immemorabilis B. Ollegarii, quaedam apposite spectant ad casum exceptum a decretis Urbani VIII. ratione cultus immemorabilis. Denique Michael Angelus Lapius olim Fidei Subpromotor opuscula typis vulgavit, quorum unum de herocitate virtutum in Beatificandis & Canonizandis requisita, alterum de inedia B. Nicolai de Flue, tertium de tempore, quo quis degere valeat sub aquis, & non mori: quae quidem posteriora eo spectant, ut scilicet tuto dignosci queat, & quando inedia ad longum tempus protracta excedat naturae vires; & quando inter miracula id recenseri possit, cum quis, praevia alicujus Servi Dei invocatione, incolumis evadit ab aquis, quibus aliquandiu fuit immerfus. Praeterquamquod inter quaestiones medico-legales Pauli Zacchiae pleraque sunt, ex quibus perspicuum fit, utrum

sanationes sint naturæ, an miraculo adscribendæ; quemadmodum & hujusmodi aliqua, de eodem videlicet argumento, formis excusæ sunt post consuetudines Neapolitanas Molphei tom. 2., ut & inter canonicas Jacobi Pignatelli *consultationes* multæ extant ad Canonizationis materiam universim pertinentes; nec enim omittenda est *practica Theologico-Canonica ad causas Beatificationum & Canonizationum pertractandas* edita a Fr. Augustino Matthæuccio ex Minor. Observ. familia olim sacrorum rituum Congregationis Consultore.

Porro, cum, juxta dicenda in hujus Operis progressu, Canonizationum causæ olim committerentur tribus antiquioribus Rotæ Auditoribus, qui suas proinde relationes conficiebant, nonnullæ adhuc supersunt ex ipsis relationibus, quæ insuper memorari merentur. Nempe quæ sequuntur, typis impressæ sunt: relatio causæ S. Bonaventuræ *inter ejus opera tom. 2.*; S. Francisci de Paula *post ejus vitam* conscriptam ab erudito viro Josepho Maria Perimezzi Episcopo Oppidenfi; S. Thomæ de Villanova post Contelorum *de Canonizatione Sanctorum*; S. Andreæ Corsini apud Lezanam *consult. 1.*; B. Gregorii X. post ejus *vitam* affabre, ut solebat, exaratam a P. Antonio Maria Bonuccio Soc. Jesu; S. Aloysii Gonzagæ *in Actis Bollandianis*, quibus etiam aliæ editæ comprehenduntur; S. Pii V. *in ultimo tomo annalium Bzovii*; binæ demum in causâ S. Terefiæ, quarum una super ejus miraculis, altera super virtutibus, formis excusæ fuerunt *Vienna in Austria anno 1628.*

Aliæ vero, præter typis impressas, manuscriptæ circumferuntur, quæ spectant ad causas tum SS. Andreæ Avellini, Caroli Borromæi, Didaci, Mariæ Magdalenæ de Pazzis, Philippi Nerii, Hyacinthi, Cajetani, Isidori Agricolæ, Franciscæ Romanæ, Terefiæ, Petri de Alcantara, Elisabeth Reginæ Portugalliæ, Philippi Benitii, Raymundi de Pennafort, Paschalis de Baylon, Felicis a Cantalicio, Joannis de Deo, Ludovici Bertrandi, Francisci Borgia, Francisci Xaverii, Jacobi de Marchia, Joannis a Cruce, Catharinæ de Ricciis; tum BB. viginisfex Martyrum Japonensium, Josaphat Archiepiscopi Pollocensis; tum demum Servorum Dei, Nicolai Factor, Hieronymi Æmiliani, Juliani a S. Augustino, Joannæ de Cruce.

In hisce nimirum Rotæ Auditorum relationibus, quandoquidem continent examen tum validitatis processuum, tum virtutum, tum etiam miraculorum, utcumque aliqui obloqui ausi sint, non modicum inest pondus: ideoque iis in rebus, in quibus non fuit ipsis derogatum vel a subsequenti & posteriori sacræ rituum Congregationis consuetudine, vel ab ejusdem sacræ Congregationis, aut summorum Pontificum Urbani VIII. & Innocentii XI. decretis, absonum profecto esset, easdem non admitttere alia inter scripta auctoritate pollentia. Quapropter de relationibus ipsis merito ita loquitur Castellinus *in tractatu de inquisitione miraculorum in Sanctorum Martyrum Canonizatione pag. 132. num. 36. Denique veritas expli-*

explicita, & modo prædicto corroborata, quæ continentur in prædictis relationibus magna diligentia editis, nunquam legitur, quod fuerit infirmata, sed approbata; & illa duce, processum sit fere semper, ne dicam verius simpliciter & semper, ad actum solemnem Canonizationis. Item pag. 331. Idem quoque suaderi potest, spectata conditione personarum, ac numerum eorum præstantissimorum virorum, per quos regulariter eduntur consimiles relationes: nam fere semper editæ fuere per amplissimos Patres sacre Rote Romanae Auditores, quorum spectata doctrina & eximia dignitas cunctis quidem explorata est. Præterea eandem eximiam auctoritatem dictarum relationum satis aperte declarat præstantia finis, ad quem seu propter quem conduntur; ut scilicet per illas perducatur ad desideratum exitum negotium tanti momenti, quale est in Ecclesia sancta Dei illud solemnem Canonizationis Institutum, ad quem effectum offeruntur Pontifici Romano pro tempore existenti.

Et hæc quidem de Jurisperitis, qui de Sanctorum Canonizatione tractatus, aut opera composuerunt. Sequuntur decreta, & ordo conficiendi processus in causis Beatificationis & Canonizationis Sanctorum, quæ editæ fuere auctoritate summi Pontificis Urbani VIII., aliæque novissima decreta ad idem institutum pertinentia, auctoritate summi Pontificis Innocentii XI. promulgata, de quibus in hoc Opere agendi sæpenu-mero occasio dabitur.

Earum porro relationum, quæ editæ sunt, quotiescumque ab aliquo summo Pontifice aut alicujus Servi Dei Beatificatio, aut Beati alicujus Canonizatio peracta fuit, potissimum quæ Italico idiomate conscriptæ sunt, & quarum latent Auctores, nullam hic rationem habere institui- mus: sed eas tamen luculentiores enarrationes prosequemur, quæ vel propter Auctorem antiquitatem, vel propter eorum auctoritatem, fidem sibi maxime conciliant; quare & esse queunt tanquam regula, ut ipsa Beatificationis & Canonizationis solemnia rite recteque perficiantur.

Antiquior scilicet ex his, quas prætereundas esse minime ducimus, est Ordo Romanus Jacobo Cardinali Cajetano, qui mortuus est sub Clemente VI., attributus, atque editus a Mabillonio in museo Italico tom. 2. Hunc excipit Ordo Auctoris, qui in aula Pontificia rituum formulis præerat anno 1347. typis impressus apud Raynaldum in *annal. ad eundem annum*. Tertio venit Ordo Romanus Petri Amelii ex Ordine Eremitarum S. Augustini, Editui Urbani V. qui a Mabillonio pariter evulgatus fuit in *eodem museo Italico tom. 2.* Sequitur liber Volaterrani, in quo descripta fuit Canonizatio S. Bonaventuræ, qui & extat apud Raynaldum *ad annum 1482. num. 46.* Quinto adest Ordo Canonizationis Sanctorum scriptus anno 1494. typis autem excusus tom. 3. *collect. CC. Britannicæ*. Occurrunt sexto liber sacrarum caeremoniarum, sive rituum Ecclesiasticorum Ecclesiæ Romanæ, qui nomen præferret Christophori Marcelli Archiepiscopi Corcyrensis, quique editus fuit tempore Leonis X. & ipsi dicatus; necnon Diaria Paridis de Crassis caeremoniarum Magistri sub eodem Leone X., in qui-

quibus ad amussim expōsitā sunt omnia solemnīa, quibus Canonizatio S. Francisci de Paula peracta est. Septimo loco recenseri debent Acta tum Latino, tum Italico idiomate binis libris conscripta a Francisco Penia Rotæ Auditore *de Canonizatione S. Didaci*; atque etiam ejusdem Canonizationis Acta, quæ fuerunt a Petro Galefinio Apostolico Protonotario composita, & Sixto V. nuncupata. Octavum tenet locum opus Marci Aurelii Grattarolæ, cujus est inscriptio, *Successi maravigliosi della venerazione di S. Carlo*. Nono autem referenda sunt Acta Canonizationis S. Hyacinthi, collecta & edita a Severino Cracoviensi ex Ord. FF. Præd. Decimo Acta Canonizationis S. Raymundi de Pennafort, quæ extant in ejus vita formis excusa, & notis illustrata a supra citato Francisco Penia Rotæ Auditore. Undecimo Acta Canonizationis S. Andreæ Corsini condita operâ Petri Dominici ab Jesu Carmelitæ. Duodecimo Acta Beatificationis S. Andreæ Avellini relata in opere, cujus titulus, *Successi maravigliosi della venerazione del B. Andrea Avellino*, edita vero ab Joanne Antonio Caggiano Clerico Regulari. Tum autem decimus tertius in hoc elencho locus debetur Actis Canonizationis S. Thomæ a Villanova evulgatis a P. Andrea Aznar ex Ordine Eremitarum S. Augustini. Decimus quartus deinceps Actis Beatificationis & Canonizationis S. Francisci de Sales, publica donatis luce a Dominico Cappello. Postremus Actis Canonizationis SS. Petri de Alcantara, & Mariæ Magdalene de Pazzis collectis atque in lucem prolatis ab eodem Cappello; ad quorum calcem extat etiam dissertatio Francisci Mariæ Phœbei Archiepiscopi Tarfensis de Sanctorum Canonizatione, haud insuper habenda.

Et omnes quidem modo enuntiati libri solemnīa exhibent Beatificationis, & Canonizationis. Quamquam & multa ejusdem generis habentur apud Cardinalem Ostiensem, reliquosque Pontificii juris Interpretes in commentariis ad cap. *Andrævimus*; de Reliquiis & venerat. Sanctorum; tum autem in supra memorato Angeli Roccæ opere *de Canonizatione Sanctorum*; necnon in Bzovii tractatu *de Romano Pontifice*, cum perhibeat suffragia omnia tum Cardinalium, tum Episcoporum, tum etiam aliorum pro Canonizatione S. Franciscæ Romanæ, & S. Caroli Borromæi, una cum ceteris, quæ ad solemnīa ipsarum Canonizationum perfecta fuerunt. Sed & Jo. Baptista Marius Canonicus Collegiatæ ecclesiæ S. Angeli in Foro Piscium diatribam exaravit & edidit *de mystica rerum significatione, quæ in Sanctorum Canonizatione ad Missarum solemnīa summo Pontifici offerri solent*. Quin etiam, cum typis Rev. Cameræ Apostolicæ impressæ fuerunt anno 1712. *Preces dicenda per SS. D. N. Clementem Papam XI. in Canonizatione SS. Pii V., Andrea Avellini, Felicis a Cantalicio, & Catharine Bononiensis*, eis addita est tota cæremoniæ ea in celebritate habitatum series. Præterquamquod Acta Canonizationis modo memoratorum Sanctorum una cum Actis Beatificationis Servi Dei Joannis Francisci Regis inter Beatos relati ab eodem summo Pontifice Clemente XI. collecta fuerunt, & Ro-


& Romanis typis in lucem emissâ anno 1720. ab Justiniano Chiappono Apostolicarum cæremoniarum Præfecto. Quæ nimirum omnia auctoritatis loco habenda certe sunt : ne illum postremo prætermittamus, qui iussu san. mem. Benedicti XIII. accurante Justo Fontanino Archiepiscopo Ancyrano, anno 1729. prodiit, *Constitutionum codicem*, quas summi Pontifices in solemni Sanctorum Canonizatione ediderunt ab anno 993. ad annum usque 1729.

Cum igitur tot & tanta de Sanctorum Canonizatione universim conscripta & edita sint, alicui fortasse videri possit, nihil ea de re scribendum amplius superesse; nosque idcirco oleum atque operam perdidisse, quod labores susceperimus quacumque utilitate carituros. At Operis nostri consilium atque rationem prius noscere oportet: quod ut aperiatur, in præsentis reliquum est. Nam ingenue quidem admittimus, quin & suspicimus editorum ab aliis scriptorum diligentiam, eruditionem, doctrinam, utilitatem; atque adeo ab iis plura, eaque maxima commoda in nostrum hunc tractatum derivata esse, ultro confitemur: sed post evulgata ingentia volumina de Sanctorum Actis, quæ primo collegit Bollandus & Soc. Jesu, tum autem eruditissimi alii viri ex eadem Societate profecti sunt, & laudabiliter prosequuntur, necnon post illustratam aliorum magni nominis virorum laboribus longe lateque Ecclesiasticam historiam, quoniam non pauca sane, sed bene multa publici juris facta sunt, quæ antea in bibliothecis & archivis latebant, quæque ad amplitudinem ac lucem Canonizationis negotio afferendam non parum conducere posse videbantur, hæc ipsa saltem haud inopportuno fore existimavimus suis locis disponere; quod etsi profecto melius a quovis ex tot illis antea recensitis Auctoribus præstari potuisset, nunc jam, quandoquidem obiere, nullo pacto potest. Accedit, immo vero rei caput est, quod, exceptis quatuor aut quinque ex memoratis ipsis Auctoribus, qui de Canonizatione Sanctorum tractatus condiderunt, nemo inter eos sacrorum rituum Congregationi, in qua ipsæ Beatificationis & Canonizationis causæ perpenduntur & sedulo examinantur, interfuit; aut, si quis eorum interfuit, non aliam quam Consultoris personam sustinuit. Accedit præterea, quod post Urbanum VIII. & Innocentium XI. summos Pontifices, qui jam indicata sanxerunt decreta, alia plura a summis Pontificibus eorum Successoribus, necnon a sacrorum rituum Congregatione edita sunt, quæ passim ignorantur. Postremo illud quoque accedit, quod de præsentis Apostolicæ Sedis consuetudine in Servorum Dei Beatificatione, & Beatorum Canonizatione, de concessione Missæ ac Officii, de nominum in Martyrologio Romano descriptione, aut de aliis publici cultus speciebus, quæ Beatis, aut Sanctis, servato ordine, ab Apostolica ipsa Sede indulgentur, nemo adhuc tractavit. Quam ob rem non usquequaque inutilem provinciam nos aggressuros esse putavimus, si, postquam ab anno 1701. usque ad 1708. Consistorialis Advocati munere

ex

ex Clementis XI. beneficentia fungentes multis Sanctorum Canonizationis causis, præsertim vero S. Catharinæ de Bononia, & S. Pii V. patrocinium feliciter præstitimus; deinde postquam ab anno 1703. ex singulari memorati Pontificis beneficio ad spectabile Fidei Promotoris Officium evecti, eodemque perfuncti usque ad annum 1728. ea, qua per nostrarum virium imbecillitatem nobis licuit, diligentia, nedum voce, sed & scriptis plane innumeris in evolendas Beatorum & Sanctorum causas, necnon in perpendenda sacræ rituum Congregationis decreta atque instituta nostram, qualiscumque fuerit, operam contulimus; postquam demum per tot annos ex officio assertiones eorum, qui pro Beatificatione & Canonizatione scribebant, impugnavimus, totque doctissimos viros tum ex Collegio S. R. E. Cardinalium, tum ex coetu spectabilium Romanæ Curie Præsulum, tum etiam ex Regularibus familiis loquentes, & in sacris Congregationibus suffragium suum pro rei veritate ferentes audivimus; si, inquam, post hæc omnia, de Canonizationis argumento & nos aliqua ederemus, quæ ejus saltem causarum Patronis, & Consultoribus usui fore nobismet ipsis visa sunt. An autem id e re cesserit, lectores porro viderint; quos ex animo obsecramus, ut erratis, si qua irrepperint, velint non gravate ignoscere: scripsimus enim non inter otium, sed inter Pastorales Anconitanæ primum, postea Bononiensis Ecclesiæ curas, easque non sane paucas, nec levis momenti; ideoque horis ut plurimum succisivis, nec sine incommodo ante solis ortum læpissime somno subtractis. Finem tandem facimus, omnia & singula Apostolicæ Sedis judicio subjicientes, ideoque ratum habentes, quod Oraculo illo probabitur, irritum vero, siquid reprobari forte contigerit.





# DE SERVORUM DEI BEATIFICATIONE, ET BEATORUM CANONIZATIONE LIBER PRIMUS.

IN QUO PRÆLIMINARES EXPONUNTUR CONTROVERSIE.

## CAPUT PRIMUM.

*De superstitiosa Apotheosi Gentilium.*



OS est eorum, qui de Sanctorum Canonizatione tractatum instituunt, aliqua præmittere de superstitiosa Apotheosi Gentilium. Apotheosis, quæ etiam Consecratio dicta est, nihil aliud erat, quam sollemnis alicujus hominis inter Deos adscriptio: unde apud Ciceronem *de natura Deorum lib. 2. cap. 24. consecrare Liberum*, & similia passim. Apotheosis ritum Herodianus, & Dio fulse describunt; tum apud Livium, Plutarchum in *vita Romuli*, & Lactantium *de falsa Religione* plura habentur de Romuli Apotheosi; Tacitus etiam refert, Divinos honores Augusto Imperatori post obitum delatos. Scribentium mori & nos obsequemur; dumque ex probatissimis & antiquioribus Auctoribus tentatam apud Senatum Romanum Christi Domini nostri Apothesim exponimus, potiora de ejus ritu inuimus. Tentatam diximus Christi Domini Apothesim;

sim; cum Divini iudicii sapientia effecerit, ne Christus instar falsorum Numinum Divinitatem ab hominibus accepisse videretur, & Christiana Religio per univrsam orbem statim effundenda, propagationem iudicio & auctoritate Romani Senatus obtinuisse.

2. Pilatus Judææ Præfex ad Cæsarem scribere solitus res magni momenti, quæ illic contigerant, narrationem militi ad Tiberium patratorum a Christo prodigiorum, Divinarum virtutum, excitationis ipsius a mortuis, & novæ ab eo conditæ Religionis, teste Tertulliano in *apologetico adversus gentes* cap. 21. ubi, præmissa analysi prodigiorum a Christo patratorum, ait: *Ea omnia super Christo Pilatus & ipse jam pro sua conscientia Christianus Cæsari tunc Tiberio nuntiavit. Sed & Cæsares credidissent super Christo, si aut Cæsares non essent seculo necessarii, aut si & Christiani potuissent esse Cæsares: & S. Iustinus Martyr in apologia ad Antoninum Imperatorem (quæ passim in vulgatis editionibus secunda inscribitur, etsi jamdiu communi ferme Eruditorum consensu prima habeatur) nonnullis relatis Christi prodigiis, subjungit num. 35. Atque hac ita gesta esse, ex Actis sub Pontio Pilato confectis discere potestis: & multis interjectis num. 48. quæ quidem ab eo facta esse, ex confectis sub Pontio Pilato Actis discere potestis. Diximus narrationem, & diximus Acta: eorum quippe transmissio vetustissimis & gravissimis Auctoribus innixa, Tertulliano videlicet, & Justino relatis, & Eusebio mox referendo, certa esse videtur, uti bene ponderat Calmet in sua dissertatione de Actis Pilati ad Tiberium transmissis. Nullam autem fecimus mentionem epistolæ Pilati ad Tiberium, ut salebrosam de ea quæstionem evitarem, cum varia ipsius sint exemplaria, aliud apud Cardinalem Baronium ad ann. Christi 34. n. 223. aliud apud Sixtum Senensem lib. 2. *bibliotheca sanctæ*, & aliud emendatius apud Florentinum in notis, & exercitationibus ad Apostolorum indiculum pag. 113.*

3. Cæsar Christi Apotheosim tentavit apud Senatum Romanum; sed obtinere non potuit, eam potissimum ob causam, quod ante ejus decretum affulgens Crucifixi potentia univrsam orbem ad sui cultum attraxerat: Tiberius autem a sua sententia discedere noluit, publicato edicto adversus accusatores Christianorum, uti testatur Tertullianus in *apologetico* cap. 5. ubi sic scribit: *Apud vos de humano arbitratu Divinitas pensatur. Nisi homini Deus placuerit, Deus non erit. Homo jam Deus propitius esse debet. Tiberius ergo, cujus tempore nomen Christianum in sæculum introiit, annuntiatum sibi ex Syria Palestina, quod illic veritatem illius Divinitatis revelaverat, detulit ad Senatum cum prerogativa suffragii sui. Senatus, quia non in se probaverat, respuit. Cæsar in sententia mansit, comminatus periculum accusatoribus Christianorum.*

4. Eusebius Cæsariensis lib. 2. *histor. Eccles.* cap. 2. ex vers. Rufini rem totam sic exponit: *Cum per omnem jam locum de resurrectione, & mirabilibus Domini Jesu Christi, & de ascensione ejus ad calum felix fama loqueretur, ac per omnium aures beati hujus rumoris volveretur opinio; quoniam antiqui moris erat* apud



apud Romanos, ut provinciarum Iudices, si quid sorte novi in his, quas regebant, provinciis accidisset, vel Principi, vel Senatui nuntiarent, ut ne ex his, quae gerebantur, ignorare aliquid viderentur; de resurrectione a mortuis Domini & Salvatoris nostri Jesu Christi, quae jam in omnem locum fuerat per divulgata, Pilatus Tiberio Principi refert. Sed & de ceteris mirabilibus ejus, & ut, post mortem cum resurrexisset, a quamplurimis jam Deus esse crederetur. Tiberius, quae compererat, retulit ad Senatum: Senatus autem sprevisse dicitur, pro eo quod non sibi prius hujus rei iudicium fuerit delatum; sed auctoritatem suam praevenerit vulgi sententia. Lex etenim erat antiquitus designata, ne quis apud Romanos Deus haberetur, nisi Senatus decreto atque sententia confirmatus. Porro autem pro vero hoc erat, quod gerebatur, ne Divina virtus humanis putaretur assertionibus indigere. Cumque, secundum ea quae supra diximus, renuisset Senatus, Tiberius tamen tenuit sententiam suam, ut ne quid adversus doctrinam Christi contrarium moliretur.

5. Concordat S. Joannes Chrysostomus hom. 26. in epist. 2. ad Corinthios tom. 10. pag. 624. ubi sic loquitur: Romanorum Senatus . . . hanc potestatem habebat ut Deos crearet atque conscriberet. Cum res omnes a Christo gesta nuntiata sint, Romam misit is qui Iudaeorum Nationi praeerat, sciscitans ex ipsis, num enim quoque Deum creare placeret. Id vero illi facere recusarunt, quod iniquo, atque infenso animo ferrent, ante decretum suum, atque sententiam Crucifixi potentiam effulgentem universum orbem ad sui cultum attraxisse.

6. Paulus Orosius lib. 7. histor. cap. 4. tom. 6. biblioth. PP. sic loquitur: Postquam passus est Dominus Christus, atque a mortuis resurrexit, & discipulos suos ad predicandum dimisit, Pilatus Praefes Palaestina provinciae ad Tiberium Imperatorem, atque ad Senatum retulit de passione, & resurrectione Christi, consequentibusque virtutibus, quae vel per ipsum palam facta fuerant, vel per discipulos ipsius in nomine ejus fiebant, & de eo quod certatim, crescente plurimorum fide, Deus crederetur. Tiberius cum suffragio magni favoris retulit ad Senatum ut Christus Deus haberetur. Senatus indignatione motus, cur non sibi prius secundum morem delatum esset, ut de suscipiendo cultu prius ipse decerneret, Consecrationem Christi recusavit, edictoquo constituit, exterminandos esse Urbe Christianos; praecipue cum & Sejani Praefectus Tiberii suscipiende Religioni obstinatissime contradiceret: Tiberius tamen edicto accusatoribus Christianorum mortem comminatus est.

7. S. Gregorius Turonensis lib. 1. histor. cap. 23. factum narrat: Pilatus autem gesta ad Tiberium Caesarem mittit, & ei tam de virtutibus Christi, quam de passione, vel resurrectione ejus insinuat. Quae gesta apud nos hodie retinentur scripta. Tiberius autem hoc ad Senatum recensuit; quod Senatus cum ira respuit, pro eo quod non ad eum primitus advenisset.

8 Nicephorus Callistus lib. 2. histor. cap. 8. haec habet: Consuetudo autem jam inde a plurimis annis obtinebat, ut, qui Praefecturas, aut Provincias sortiti essent, res novas quae sub eis accidissent, singulas summum Imperium habenti Caesari significarent, ut illum nihil prorsus rerum omnium lateret. Itaque de

*resurrectione ex mortuis, aliisque prodigiis Jesu Christi Tiberio Casari scribens Pilatus, cum res ejus plerasque, tum quod ex mortuis rediitque sibi ipse superstes, Deus jam a multis, & quidem precipuus inter alios Deus esse crederetur, renuntiavit. Quam rem Tiberius ad Senatum Romanum retulit. Senatus autem non esse deliberandum de ea censuit, sub illo quidem prætextu, quod ille non prius, veteri more, ipsius Senatus sententia in Deos esset relatus, re autem ipsa, quod Divina doctrina disciplina humano prorsus non indigeret auxilio. Sed enim, etiamsi Senatus ad eum modum verbum de Servatore rejecisset, Casar tamen in sententia sua persistit, salutarique predicationi impedimento non fuit.*

9 Denique apud Lampridium in *Alex. Severo* cap. 43. legitur, id ipsum fieri voluisse ab Imperatore Hadriano, & subinde ab ipso Alexandro Severo: Christo templum facere voluit, eoque inter Deos recipere. Quod & Hadrianus cogitasse fertur, qui templa in omnibus civitatibus sine simulacris jussit fieri; qua hodie idcirco, quia non habent Numina, dicuntur Hadriani, quae ille ad hoc parasse dicebatur: sed prohibitus est ab iis, qui consulentes sacra, reperebant, omnes Christianos futuros si id optato evenisset, & templa reliqua deferenda. Fama quippe mirabilium a Christo Domino patratorum percrebuerat; nec ea a solis Christianis, sed etiam ab aliis Historicis non Christianis non sine laude fuerant exposita. Ut ceteros prætereamus, illustre est de Christo testimonium Josephi Hebraei lib. 18. *antiquitatum* cap. 4. Nec enim nos præclarum Josephi de Christo testimonium credimus, pio dolo a priscis Christianis historiæ Josephi asutum; siquidem ipsum ut genuinum exhibent Eusebius in *historia Ecclesiastica*, Hieronymus in *libro de scriptoribus Ecclesiasticis*, Isidorus Pelusiota in *epistolis*, Sozomenus, & Nicephorus, atque adeo ut genuinum vindicant Valesius in *notis ad Eusebium*, Huetius in *demonstratione Evangelica*, Tillemontius *not. 40. in ruinam Judaeorum tom. 1. historia Imperatorum*.

10 Hucusque adducta, ni fallimur, nedum ostendunt, quid esset Apotheosis apud Gentiles, sed & cujus fieret auctoritate. Heterodoxi recentiores, Catholicæ Religioni, & Apostolicæ Sedi insensibilissimi, superstitionem prædictam Gentilium Apotheosim, seu Consecrationem pluribus prosequuntur, & audent asserere, Sanctorum nostrorum Canonizationem cum ea convenire, & ab ea suam originem desumpsisse; quemadmodum videri potest apud Rodolphum Hospinianum in *tractatu de origine, progressu, caeremoniis, & ritibus Fæstorum* cap. 6. & Joannem Albertum Fabricium in *bibliographia antiquaria* cap. 8. num. 24. Sed toto cælo aberrant; cum nec nostrorum Canonizatio conveniat cum Apotheosi Gentilium, nec ab ea suam deducat originem.

11 Dictum est, nostrorum Canonizationem non convenire cum Apotheosi Gentilium; primo, quia heroica nostrorum facinora, & miracula eorum intercessione a Deo patrata, multorum testium de visu proprio, & de rebus potentiae visivæ subjectis inniuntur affirmationi, quorum etiam dicta serio perpenduntur & examinantur; in Apotheosi vero Gentilium

res ut plurimum conficiebatur per testis assertionem referentis, se confecrandum vidisse ex igne redivivum cælum penetrare. Prima Apotheosis, quæ facta sit a Romanis, Romuli fuit. In honorem quippe Romuli sacrificia expleta sunt, uti bene observat Saubertus de sacrificiis cap. 5. quiddid in contrarium opinatus sit Vossius de idololatria lib. 1. cap. 12. Et prædicta Apotheosis soli innixa est testimonio Julii Proculi, qui suggerentibus senibus illis, qui Romulum occiderant, quippe timebant, ne ipsorum facinus proderetur, affirmavit, seipsum vidisse splendidis vestibus indutum, ipsumque audivisse sibi imperantem, ut templum in sui honorem erigeretur, utpote inter Divos adscripti, & ut in posterum non Romulus, sed Quirinus appellaretur; uti referunt Minutius Felix in *Octavio*, Livius lib. 1. Plutarchus in *vita Romuli*. Similia contigerunt in Apotheosi Octaviani Augusti: Nec defuit vir Prætorius (verba sunt Suetonii in ejus *vita* cap. 101.) qui se effigiem cremati eumtem in cælum vidisse jurasset; ideoque S. Justinus Martyr in apologia cit. num. 21. scribit: Nam & morientes apud vos Imperatores semper immortalitati consecrandos judicatis, ac producit, qui etiam juratus vidisse se crematum Cæsarem in cælum abeuntem dicat. Eodem sæculo mortua Drusilla Caji Caligulae soror consecrata est, atque ut ait Dio lib. 59. pag. 649. *Panthea* vocata, & Divinis honoribus per omnes urbes culta. Et Vossius quidem eam habitu Veneris cognomine Panthæ consecratam putat, & Lipsio assentitur, qui eodem refert veterem inscriptionem in qua *Venus Caelestis Augusta* nominatur. Jam vero idem Dio asserit fuisse virum quemdam Senatorii ordinis, qui eam se vidisse in cælum ascendentem juravit; sic enim subdit: *Livius etiam quidam Geminus Senator, vidisse se eam in cælum ascendentem, ac cum Diis conversantem juravit, perniciem sibi liberisque, si vanum id asseruisset, imprecatus*. Id quoque indicat Seneca in *lusu de mort. Claud.* atque in aliis aliorum Augustorum Augustarumque consecrationibus contigit. Ut vero hoc mendacium animis fortius insideret, combusto Imperatoris corpore, & in cineres redacto, aquila dimittebatur, quæ animam Principis deferre in æthera dicebatur, teste Herodiano lib. 4. num. 3. ubi post longam cæremoniarum descriptionem sic concludit: *Mox ab extremo, minimoque tabernaculo, tamquam a fastigio quodam simul cum subiecto igni, aquila dimittitur, qua in cælum creditur ipsam Principis animam deferre*.

12 Secundo, Augustorum tantum, aut Augustarum, aut aliarum mulierum sanguine Imperatoribus junctarum, factæ sunt a Gentilibus Apotheoses. Monumenta extant Apotheoseum Liviae, quæ Julia est appellata, & Faustinae; ut ex marmoribus, inscriptionibus, & numismatibus evidenter desumitur. Unius tantum privati hominis Apotheosis est celebrata, Domitiani videlicet, sed qui Imperio renuntiaverat, privatamque vitam adeo dilexerat, ut ad Imperium revocatus, purpureum indumentum resumere recusaverit. Existimarunt nonnulli, factas aliquando fuisse Apotheoses privatarum personarum; cum Trajani Pater *Divus* appellatus sit in

in admodum raro numismate, quod invenitur in Mediceo Museo : & ita opinatur eruditus Vaillant *tom. 2. numismatum Imperialium pag. 124. edit. Amstelodam. 1699.* At, ex *Divi* appellatione argumentum non desumi ad Apotheosim, late comprobavit Vignolius, dum viveret, singulari nobis amicitia carus, in suo opere *de columna Antonina cap. 5.* ita ut quicumque inter Divos solemniter Apotheosim fuisset relatus, *Divus* dicendus esset; sed non omnis appellatus *Divus*, habendus esset tamquam inter Divos relatus per solemnem Apotheosim : cum *Divi* appellatio hominem exhiberet ceteris hominibus superiorem, & ob virtutis excellentiam hominem quasi cælestem, sicuti loquitur Lactantius *lib. 1. cap. 15.* Hoc proinde sensu nonnulli Christiani Imperatores in legibus per ipsos editis, *Divi* dicti sunt ( incredibile quippe est, eos *Divorum* nomen obtinuisse, ex quo per solemnem Apotheosim inter Divos a successoribus fuerint relati ); & eodem sensu, sed per execrabilem undequaque adulationem, adhuc hodie in Civitate Ariminensi in Ecclesia Patrum Minorum Conventualium in quadam marmorea inscriptione Iſotta amica Sigismundi Pandulphi Malatestæ dicitur *Divæ*; & a Porcello, qui erat in famulatu Malatestæ, & qui fortasse inscriptionis auctor fuit, Paulus Secundus *Divus* est appellatus in quodam opere, quod illi dicavit, & cujus mentio habetur apud Gaddium *de scriptoribus volum. 2. pag. 180.* Ex quibus obiter adnotare fas sit, infirmam undequaque esse assertionem Massei, nostri, dum viveret, singularis amici, *tom. 3. antiquarum gemmarum pag. 214.* opinantis, profanum Apotheosis ritum perdurasse longo tempore etiam post publicum & liberum exercitium Christianæ Religionis, idque deducens ut nomine *Divi*, quod habetur in inscriptionibus & numismatibus prædictorum temporum. Apotheosis ergo Gentilium ad Imperatores, & feminas Augustas erat adstricta: nec in ea celebranda ullam habitam fuisse considerationem virtutum & operum egregiorum, ex eo aperte convincitur, quod homines multa vitiorum illuvie inquinati inter Deos a Gentilibus relati sint, teste S. Augustino *tom. 7. de civitate Dei a lib. 1. ad 7. ubi lib. 6. cap. 2.* observat, eos in tantam cæcitatem abiisse, ut vel Marcus Varro multis a Tullio laudibus commendatus, talia de Diis gentium litteris tradiderit, *ut si rerum velut divinarum, de quibus scribit, oppugnatore esset, atque destructor, easque, non ad Religionem, sed ad superstitionem diceret pertinere, nescio (ait) utrum tam multa in eis ridenda, contemnenda, detestanda conscriberet.* Nostræ vero Canonizationes non tantum sunt de summis Pontificibus, de Regibus, de Episcopis, sed de quocumque, nulla habita ratione dignitatis, aut generis, sed habita tantum consideratione virtutum, quibus, dum viverent, effulserunt, aut mortis pro Christi Fide initæ, necnon signorum & miraculorum, quæ ipsorum intercessione facta sunt.

13 Tercio, quia consecrandus in Apotheosi Gentilium inter Deos recenscebatur, Canonizandus autem solemniter iudicio ab Ecclesia refertur in album servorum & amicorum Dei. S. Eusebius Emisenus in *serm. de S. Ro-*

*mano*

mano Martyre tom. 6. biblioth. PP. pag. 671. quem alii S. Eucherio Lugdunensi tribuunt; ait: *Beatus Romanus, cuius admirabilem triumphum presentia exultantis Ecclesia festa concelebrant, dudum famulus, nunc etiam amicus Dei.* Præclare subdit S. Augustinus lib. 22. de Civit. Dei cap. 10. *Nobis Martyres non sunt Dii, quia unum eundemque Deum & nostrum scimus, & Martyrum; & S. Cyrillus Alexandrinus contra Julianum lib. 6. tom. 6. pag. 203. inquit. Sanctos porro Martyres neque Deos esse dicimus, neque Divino cultu scilicet illos adorare solemus, sed affectus, & honoris; quin potius summis honoribus illos ornamus, puta, quod pro veritate strenue certaverint, sinceritatemque Fidei eo usque servarint, ut animam ipsam contempserint, repudiatisque mortis terroribus, periculum omne vicerint &c. Nos autem .... non dicimus, sanctos Martyres fuisse Deos; sed illos omni veneratione prosequi solemus, eorumque loculos honoramus, tam clara virtutis remunerationem veluti quamdam ac premium ipsi immarcescibilem memoriam reponentes.* His addendus Theodoretus de Græc. affect. serm. 3. de Angelis pag. 522. tom. 4. ubi de Angelis quidem agens sic fatetur: *Hos tamen Deos non appellamus, nec Divinum illis cultum tribuimus, nec in Deum verum, & istos Divinam adorationem partimur; sed, hos quidem pluris esse, quam homines, putamus, at conservos tamen opinamur; tum serm. 8. de Martyribus pag. 597. ubi de ipsis porro Martyribus disserens hæc habet: Quid vos igitur, qui tot numero mortuos homines Deos appellastis, nobis succensetis, qui non Deos facimus, sed honoramus Martyres, tamquam Dei testes, servosque amantiissimos? pag. autem 599. At nos, o viri, nec hostias Martyribus, nec libamina deferimus; sed, ut sanctos, Deique amantes, honoramus. Qui ad Martyrium hortabantur, hortabantur ad illud obeundum, non ut Martyr fieret Deus, sed amicus Dei. Quis ergo non omnibus viribus elaboret ad tantam claritatem pervenire, ut amicus Dei fiat, ut cum Christo statim gaudet, ut post tormenta & supplicia terrena, premia divina percipiat? verba sunt S. Cypriani de exhortatione martyrii pag. 526. Concordant acta vetustissima passionis S. Felicitatis, & ejus filiorum, ubi sic legitur ap. Rinnart. pag. 24. Pro Dei amore minas hominum, pœnas, & verbera contemnuentes, Christi amici facti sunt in regno calorum. Sanctus etiam Epiphanius lib. 3. adversus Collyridianos hæresi 59. sive 79. num. 4. de ipsa Beatissima Virgine Maria subdit: *Sanctum erat Mariae corpus, fateor, non tamen Deus illa fuit. Eadem & virgo extitit, minime tamen nobis ad adorandum propiata, sed Deum adorans ipsum, qui e sua carne genitus e celo, ac paterno sinu descenderat; necnon num. 7. Verbum e Virgine susceptum corpus induens, non ideo tamen, ut hæc adorari debeat, aut, ut eam Divinam ad nativam, conditionemque transferat, neque, ut sacrificium illius in nomen offeratur &c. honoretur sane Maria; Pater vero, Filius, & Spiritus Sanctus adorentur. Mariam adorare nemo velis. Non enim mulieri, ac ne viro quidem, sed uni Deo mysterium illud, cultusque tribuitur: adeo ut nec Angeli ipsi tanto honori pares esse videantur. Denique in concilio Nicæno secundo actione tertia tom. 4. collect. Hurd. col. 150. sic statutum est: Apostolicas autem Ecclesie traditiones, per quas honorare, & adorare Sanctos, & salutare docemur, suscipimus & amplectimur, venerantes eos ut famulos**

*famulos & amicos atque filios Dei. Honor enim, qui circa devotos conservorum agitur, probationem habet bonæ voluntatis erga communem exhibitæ Dominum. Isti enim cellaria Dei, & habitacula munda, Sanctique Spiritus purissima specula facti sunt.*

14 Nempe ex his, aliisque Sanctorum Patrum sententiis ortum habuit nostrorum Theologorum doctrina de cultu, qui dicitur *Latria*, de eo, qui vocatur *Civilis*, & *Observantia* quedam humana, de alio, qui appellatur *Dulia*, necnon de alio *Hyperdulia* dicto. Tres enim sunt species excellentiæ, Divina videlicet & infinita, cui respondet prima cultus species, qui vocatur *Latria*; humana, seu naturalis, quæ posita est in virtutibus, ac dignitatibus humanis, & cui quidem respondet cultus, qui dicitur *Civilis* & *Observantia* quedam humana; tum vero media quedam excellentia inter Divinam, & humanam, qualis est gratia, & gloria Sanctorum, quæ sunt dona supra naturam, ideoque excellentissima, cui nimirum excellentiæ respondet cultus *Dulia* nuncupatus. Quia porro sanctis creaturis Humanitas Christi, si seorsum consideretur, singulariter excellit propter unionem Verbo; & similiter Beata Virgo, ut Mater Filii Dei, ita præstat aliis Sanctis, ut dici possit Domina, & Regina nostra, quod Sanctis aliis nequaquam convenit, nisi admodum imperfecte: hinc est, quod iidem Theologi dividentes *Duliam* in *Duliam* proprie dictam, & *Hyperduliam*; illam Sanctis ceteris, hanc vero soli Humanitati Christi, necnon Beatissimæ Virgini competere docent: quod argumentum late persequitur S. Thomas 2. 2. qu. 103. artic. 3. & 4. & 3. part. qu. 25. per totam.

15 *Latriæ* jam meminit S. Augustinus lib. 10. de civitate Dei cap. 1. *Latriam* quippe nostri, ubicumque sanctarum Scripturarum posuit, interpretati sunt servitutem. Sed ea servitus, quæ debetur hominibus, secundum quam præcipit Apostolus, servos dominis suis subditos esse debere, alio nomine græce nuncupari solet: *Latria* vero secundum consuetudinem, qua locuti sunt, qui nobis divina eloquia condiderunt, aut semper, aut tam frequenter, ut pene semper, ea dicitur servitus, quæ pertinet ad colendum Deum. Proinde, si tantummodo cultus ipse dicatur, non soli Deo deberi videtur. Dicimur enim colere etiam homines, quos honorifica vel recordatione, vel præsentia frequentamus. Idem lib. 20. contra Faustum cap. 21. tom. 8. At illo cultu, quæ græce *Latria* dicitur, latine uno verbo dici non potest, cum sit quadam proprie Divinitati debita servitus, nec colimus, nec colendum docemus, nisi unum Deum. De cultu autem inter *Latriam*, atque *Duliam* medio sic loquitur S. Joannes Damascenus orat. 3. de Imaginibus tom. 1. pag. 361. Neminem tamquam Deum adorare fas est, præter illum, qui natura Deus est; omnibus autem debitum honorem habere oportet propter Dominum &c. Solum creatorem, & rerum opificem Deum adoremus, cui *Latria* cultum exhibeamus, tamquam Deo pro sua natura adorando. Sanctam quoque Dei Genitricem adoremus, non tamquam Deum, sed tamquam Dei Matrem secundum carnem: adhuc omnes Sanctos seu electos Dei & amicos, quibus facilis ad ipsum patet aditus, adoremus. Consuli potest venerabilis Dei servus Card. Bellarminus de beatit. & canoniz. Sanctor. lib. 1. cap. 11. & plu-

& pluribus sequentibus. Hadrianus quoque, & Petrus de Walenburgh tom. 2. de Fidei controversiis lib. 12. punctum hoc adversus Hæreticos solidissime elucidarunt; & recte statuerunt, cum adorationis nomen significet honorem sive Deo, sive creaturis exhibitum, asserentes, soli Deo adorationem deberi, & non Sanctis, ab iis intelligi nomine adorationis actum Latræ; contra vero, qui promiscue loquuntur, & tam Deo, quam Sanctis adorationem attribuunt, eos non ita esse intelligendos, ut censeant, tam Deo, quam Sanctis eundem religiosum cultum esse exhibendum, sed Latræ cultum Deo, & cultum Dulæ Sanctis exhiberi debere; cum uterque sub generali nomine adorationis comprehensus sit, juxta illud 1. Paral. cap. 29. v. 20. *Et benedixit omnis Ecclesia Domino Deo patrum suorum: & inclinaverunt se, & adoraverunt Deum, & deinde Regem.* Ibi quippe eadem vox adorationis tribuitur Deo, & Regi; licet Deo cultus Latræ, & Regi cultus Civilis conveniret.

16 Dictum est quoque, nostras Canonizationes suam non deducere originem a superstitiosa Gentilium Apotheosi: ut enim alibi videbitur, Sanctorum Canonizatio fundatur in doctrina Catholica de cultu, invocatione, & intercessione Sanctorum, & ab antiquissima Ecclesiæ disciplina originem habet, juxta quam sapienter animadversum est, permixtum esse non debere unicuique ex arbitrio, quemlibet unum, ut sibi videtur, publico cultu tamquam in cælis existentem, & apud Deum intercessorem colere, & venerari; sed Ecclesiasticum judicium accedere debere, in quo, visis videndis, statuatur, an hic, vel ille publice colendus sit. De religioso cultu Sanctis exhibendo extant sacræ Scripturæ testimonia: Numer. quippe cap. 22. v. 31. legitur: *Aperuit Dominus oculos Balaam, & vidit Angelum stantem in via evaginato gladio, & adoravit ipsum pronus in terram;* & Josue cap. 5. v. 13. 14. 15. hæc habentur: *Cum esset Josue in agro urbis Jericho, levavit oculos, & vidit virum stantem contra se evaginatam tenentem gladium, perrexitque ad eum, & ait: Noster es, an adversarium?* Qui respondit: *Nequaquam, sed sum Princeps exercitus Domini, & nunc venio. Cecidit Josue pronus in terram, & adorans ait &c.* Item 3. Regum cap. 18. v. 7. cum Abdias Eliæ occurrisset, & eum cognovisset, *cecidit super faciem suam;* quod utique civilis observantiæ non fuit tantum testimonium; sed religiosæ venerationis, qua eximiam viri Deo acceptissimi sanctimoniam prosequabatur. Abdias quippe inter aulæ proceres conspicuus civili dignitate Eliam antecedeat. Demum 4. Regum 2. cum filii Prophetarum, qui erant in Jericho, cognovissent, spiritum Eliæ super Eliseum requievisse, venientes in occursum ejus adoraverunt eum proni in terram; & cap. 4. narratur, Sunamitidem, postquam filium suum ab Eliseo suscitatum recepit, corruisse ad pedes ejus, & adoravisse super terram: & quamvis hæc Divinæ Scripturæ testimonia sanctos homines adhuc viventes, & non mortuos respiciant; nemo tamen est, qui non videat, quod, si in viventibus, præter vitam bonis, malique communem, Sanctitas religiosum cultum promeruit, multo magis eum

B

promereri

promereri debebit eadem Sanctitas ob gratiam æternam duraturam & consummatam, & ob immortalem gloriam, quam post obitum obtinuerunt; uti satis apte Walenburchici *loc. cit.* argumentantur pag. 221. n. 33.

17 Quamvis nostri non sit instituti de controversiis Catholicæ Fidei cum Hæreticis agere in præsentī, & divinæ Scripturæ testimonia ad impugnandam eorum pertinaciam congerere; alios tamen divini eloquii locos, arrepta opportuna occasione, pro Sanctorum invocatione & intercessionē alibi afferemus; intereaque duo fas sit adnotare. Primum, non ita frequentem in Scripturis haberi mentionem invocationis Sanctorum, quod Scriptura quidem vetus tradita fuerit populo admodum proclivi ad cultum Idolorum, & superstitionem multorum Deorum, cuique proinde non parum periculi fuisset, si doctrina de Sanctorum intercessionē studiosius esset inculcata; ne ad Divinos honores mortuis exhibendos, quos etiam ignibus & lapidibus sæpe exhibuit, prolaberetur: novi autem Testamenti Scriptura in fundamento Fidei, idest in doctrina Fidei in Christum Redemptorem tradenda, potissimum sit occupata; nec multum expediret, ut Gentilibus recenter a cultu Deorum ad unius Dei Fidem conversis, de mortuorum hominum patrociniis & invocatione multa statim initio proponerentur; ne forte a vera Religione fierent alieni, quasi Deos non abjicerent, sed mutarent: uti arguit Thomas Valdensis *tom. 3. de sacramentalibus tit. 14. cap. 123.* & sequitur Ertius in *lib. 4. sent. dist. 45. §. 14.*

18 Alterum est, nostras Canonizationes originem suam non solum non desumpsisse a Gentilium Apotheosi, uti supra visum est; sed per eandem, abjectis falsis Numinibus, ablegatisque festivitibus impudentibus, quæ in eorum honorem fiebant, substitutum fuisse Sanctorum cum Christo regnantium cultum, indicatasque pias & laudabiles in eorum honorem solemnitates; uti adversus Ethnicos demonstrat Theodoretus *serm. 8. de Martyribus pag. 607. tom. 4.* ubi sic eos alloquitur: *Suos mortuos Dominus Deus noster in templa pro Diis vestris induxit, ac illos quidem cassas, vanosque reddidit &c. Pro Pandiis enim, Diasisque, & Dionysiis, & aliis Festis vestris, Petri, & Pauli, & Thoma, & Sergii, & Marcelli, & Leontii, & Panteleemonis, & Antonini, & Mauriti, aliorumque Martyrum solemnitates peraguntur; & pro illa veteri pompa, turpique rerum ac verborum obscenitate; modesta celebrantur festivitates, non ebrietatem, & jocos, risusque exhibentes; sed divina cantica, sacrorumque sermonum auditionem, & preces laudabilibus lacrymis ornatas. Tempia ipsa Idolorum conversa sunt in basilicas Martyrum, & aliorum Sanctorum. Romæ quippe templum omnium Deorum in templum omnium Martyrum, & templum Castoris, & Pollucis in templum SS. Cofinæ, & Damiani conversa sunt; & S. Gregorius lib. 2. dialogorum cap. 8. tom. 2. testatur, a S. Benedicto conversum fuisse sanum Apollinis in oratorium S. Martini; & lib. 9. epist. 71. ad Mellitum tom. 2. præcipit Augustino Episcopo Anglorum, ut sana Idolorum non destruat, sed aqua benedicta aspergat, & Reliquiis Sanctorum ornet, ac demum in templa Dei veri convertat.*

CAPUT



## C A P U T II.

*De Martyrum juxta antiquam Ecclesia disciplinam differentiis,  
& eorum Cultu.*

**U**T Martyrum idea habeatur, operæ pretium est, aliqua præmittere de Lapsis, ceterisque, qui dicto, vel facto a Fide Christi recedebant.

2 Ferventibus itaque Tyrannorum persecutionibus, nonnulli, qui nomen dederant Christo, vi tormentorum, aut metu mortis Christianam Fidem derelinquebant; & hi *Negatores, Lapsi, Blasphemi* appellati fuerunt. Nonnulli quoque ex publico cultu, quem Idolis exhibebant, particulare nomen obtinuerunt: *Idololatæ* quippe dicti sunt, ex quo Idolum coluerunt; *Sacrificati*, ex quo Idolo sacrificium obtulerunt; *Thurificati*, ex quo thus Idolo adolere ausi sunt; uti erudite observat Gabriel Albalpineseus lib. 1. *observat. Eccles. cap. 21.* parique eruditione prosequuntur Franciscus Dominicus Bencinus Abbas S. Pontii in *sua dissertat. 2. de litteris encyclicis cap. 6. §. 2. pag. 272. &c.* & P. Joseph Augustinus Orsi Ordinis Prædicatorum in sua celebri *dissertatione de capitalium criminum absolutione sect. 3. cap. 1. num. 2.* ubi etiam omnibus supra enumeratis commune asserit adhæsisse Lapsorum nomen, & in classe horum reponendos esse Libellaticos, qui, audito Præsulum, aut Proconsulum edicto de offerendo Idolis sacrificio, coram illis protestabantur, se Christum non sequi; & emissâ protestatione, a Magistratibus obtinebant libellum, per quem eximebantur ab onere publice sacrificandi, aut se tribunalibus sistebant, exhibito in manibus Judicum libello, in quo asseriebant, se Christianam relinquere Religionem. De primis loquitur Cardinalis Baronius in *annalibus ad annum Christi 253. n. 21.* ubi sic ait: *Qui igitur hunc in modum Fidem prodidissent, ac similiter prodidissent, Libellatici dicebantur, quod libellum securitatis a Magistratu conscriptum acceperant, cum negassent; & multa scitu digna leguntur collecta a modo memorato Bencino loc. cit. a num. 9. usque ad finem: Ad secundos autem respicit Plinius lib. 10. epist. (97. ex recens. Cortii, & Longolii; ex recens. Catanei epist. 101.) ad Trajanum, ubi sic loquitur: Propositus est libellus sine auctore, multorum nomina continens, qui negant, se esse Christianos, aut fuisse; cum præcunte me Deos appellarent, & imagini tuæ, quam propter hoc jusseram cum simulacris Numinum offerri, thure ac vino supplicarent; præterea maledicerent Christo. Legendus est Natalis Alexander ad *faculum tertium dissert. 5. artic. unico, proposit. 1.* ubi, allatis testimoniis Tertulliani, & S. Cypriani, nec non Concilii Illiberitani, latissime ostendit gravitatem criminis horum Libellaticorum, utpote quod ad Idololatriam accedebat.*

3 Alii erant, qui tempore persecutionum Christi Fidem non derelinquebant,

quebant, sed, ne tormenta subirent, aut violentiæ Tyrannorum succumberent, fugam arripiebant, aut se celabant, relictis omnibus, quæ possidebant; & hi Extorres dicti sunt, telle citato Cardinali Baronio in *notis ad Martyrologium Romanum ad diem 2. Januarii*, ubi hæc habet: Si adhuc autem quis timore correptus, ne Fidem proderet, sua suosque relinquens, exilio spontaneo procul a patria vitam ageret, hic appellabatur Extorris; cujus non erat despicienda conditio: nam & numero Martyrum recensendus erat, si ea de causa mortem oppetiisset; unde S. Cyprianus *epist. 56. ad Tibaritanos* subdit: Solus non est, cui Christus in fuga comes est; solus non est, qui templum Dei servans, ubicumque fuerit, sine Deo non est; & si fugientem in solitudinem, ac montibus latro oppresserit, fera invaserit, fames, aut sitis, aut frigus affligerit, vel per maria precipiti navigatione properantem tempestas, ac procella submerferit, spectat militem suum Christus ubicumque pugnantem, & persecutionis causa pro nominis sui honore morienti premium reddit, quod daturum se in persecutione promisit &c. sufficit ad testimonium Martyrii sui testis ille, qui probat Martyres, & coronat. Cardinali Baronio adherent Du Cange in *glossario ad verbum Extorres*; Gujet de *festis propriis Sanctorum lib. 2. cap. 7. quest. 11.* ubi hoc modo inter Martyres recensiti sunt illi, quorum sit commemoratio in Martyrologio Romano *ad diem 23. Junii*, qui in montibus, & speluncis tempore Diocletiani latitantes pro Christi nomine leto animo mortem subierunt; Hurtado de vero Martyrio *tract. 2. resolut. 18. num. 4.* At aliis placet, Extorres eos non fuisse, qui, ne Fidem proderent, dimissis omnibus, se subtrahebant; sed eos, qui nomen Christi coram Magistratibus libere confessi, patria per eisdem Magistratus expellebantur, ita ut expulsio in poenam confessionis irrogata esset, & accepta, juxta illud S. Cypriani in litteris de Mappalico (*epist. 8. ad Martyr. & Confess.*): Gloriata est & nuper quidem (Ecclesia) cum confessione perstante suscepta poena est, qua Confessores Christi fecit extorres; & sic hanc vocem Extorres explicant Pearsonius in *annalibus Cyprianicis ad annum Christi 250. num. 7.* & Pagi senior ad *ann. Christi juxta Baron. 252. num. 9.*

4 Alii soluta pecunia se a vexatione redimebant, palam tamen confidentes, se Christianos esse, & se nolle a Christo recedere; & hi Libellatici quoque dicti fuerunt. Quare bene Petrus Annatus in *apparatu ad positivam Theologiam lib. 3. art. 7. tit. de lapsis a Fide*, scribit: Duo fuerunt Libellaticorum genera, alii, qui Fidem negabant, alii vero, qui non negabant, sed palam profiteri non audebant, & ne ad id cogerentur, id pecunia redimebant, securitatis accipiendo libellos, ut supplicia evaderent. Tertullianus in *libro de fuga ad Fabium cap. 12.* hos condemnavit; quippe sentiebat, tempore persecutionum licitum non esse fugam arripere: *Utro igitur & de hoc tibi suggeram, definiens persecutionem, quam constat non esse fugiendam, proinde nec redimendam. Pretium interest. Ceterum, sicut fuga redemptio gratuita est, ita redemptio nummaria fuga est. Certe & hujus, timiditatis consilium est. Quod times, redimis, ergo fugis. Pedibus stetit, currens nummis. Hæc ipsum quod stetit ex redemptione, fugisti.*

Sed

Sed hanc particularem Tertulliani opinionem communis Ecclesiæ consensus reprobavit, quemadmodum colligitur ex can. 12. S. Petri Martyris, & Episcopi Alexandrini tom. 1. collect. Harduin. col. 231. *Iis enim, qui pecuniam dederunt, ut ab omni improbitatis molestia omni ex parte remoti essent, crimen intendi non potest. Damnum enim, & jacturam pecuniarum sustinuerunt, ne animæ detrimento afficerentur, vel ipsam etiam perderent: quem S. Petri Alexandrini textum sic explicat Natalis Alexander loco allegato, propositione secunda in fine: Nullum quidem crimen illis intendi potuit, qui Fidem Christi palam confessi pecunias dabant, ne ad aras traherentur, & de his loquitur S. Petrus Alexandrinus. At gravissimi tenebantur criminis rei, qui Fidem Christi palam profiteri erubescerent, nondum saviente in caput suum persecutione, pecunias offerebant, vel dabant, ne ad Fidem publice profitendam cogerentur; quamvis Christum non negarent, immo se esse Christianos dicerent, illicitaque sibi esse profana sacrificia. Denique illa vita redemptio, dato munere Iudicibus Ethnicis, licita erat, cum aberat periculum Fidei, Religionis, Ecclesiæ, vel fratrum offendiculum, cum uberius ex hac redemptione fructus spiritualis in eos, qui munus dabant, vel in Ecclesiam redundaturus sperabatur. Quæ S. Petri Alexandrini hypothesis est; alias illicita erat.*

5 Ceteri demum, qui se Christianos esse protestabantur, & pro Fide Christi poenas, & mortem sustinebant, titulum obtinuerunt Professorum, Confessorum, & Martyrum. Professores erant illi, qui non interpellati coram Præsidibus comparebant, & se Martyrio offerebant. Juxta ejusdem Cypriani sententiam (ait Cardinalis Baronius in notis ad Martyrologium Romanum ad eandem diem 2. Jan.) qui non interpellatus se Martyrio ingerebat, hic dicebatur Professor. Adhæret Spondanus epitomator annalium Cardinalis Baronii ad annum Christi 253. num. 11. & sequitur Gujet de festis propriis Sanctorum lib. 2. cap. 7. quæst. 12. Nec enim improbandum; quin potius commendatione dignum erat, & est, Christianos sponte procedere, quando eis expedire visum est, & videbitur, ad actus Fidei exteriores, puta prædicationem, confessionem, vel ad actus fraternæ charitatis; licet pro eo temporis articulo actus prædicti non essent, aut sint in præcepto, & licet hinc Tyranni sumperint, aut sumpturi sint occasionem eos occidendi; cum hæc non sit occasio data, sed accepta, juxta doctrinam Cardinalis Cajetani secunda secunde quæst. 124. art. 1. de qua alibi, & quam late exornat Hurtado de vero Martyrio tract. 5. resol. 27.

6 Confessoris nomen hodie adscribitur illis, qui sancta & laudabili vita vixerunt, & sancto demum fine in pace quieverunt. Unde Ecgbertus Episcopus Eboracensis in excerpt. cap. 28. collect. Harduin. tom. 3. col. 1964. ait: Sancti Patres, quos Confessores nuncupavimus, idest Episcopi, & Presbyteri, qui in castitate servierunt Deo; & Odo Cluniacensis in præfat. ad lib. 2. vite S. Geraldii tom. 1. biblioth. Cluniacens. & ap. Surium ad diem 13. Octob. addit: Cum igitur Confessor a confitendo vocetur .... Geraldus tanto rectius Confessor dici potest, quanto justioribus factis Deum est confessus. Non sic autem olim

olim res se habebat: cum enim S. Hieronymus titulo Confessoris insignivisset S. Isidorum Episcopum Nitriensem in Ægypto, id animadvertens Cardinalis Baronius in *notis ad Martyrologium Romanum ad diem 2. Jan. D.*, ait: *Ne quid lateat, sciendum est, diversa admodum significatione a presentis temporis usu hanc vocem a majoribus usurpatam. Illi enim neminem eo nomine appellabant, nisi eum, qui Christi Fidem interpellatus coram Fidei hostibus confessus esset.* Quocirca proprie Confessores olim dicebantur illi, qui Christum palam & coram Tyrannis, seu Fidei hostibus confessi, quolibet tormentorum, vel poenæ genere affecti, superstites tranquillam mortem obibant; juxta illud S. Cypriani *de unit. Eccles.* pag. 259. *Confessio exordium gloriæ est, non meritum jam corona, nec perficit laudem, sed initiat dignitatem: & paulo inferius: Post confessionem periculum majus est, quia plus adversarius provocatus est; cui consonat Lactantius sive alius a Lactantio Lucius Cæcilius de mortibus Persecutorum num. 16. Novies enim tormentis, cruciatibusque variis subiectus, novies adversarium gloriosa confessione vicisti.* Atque hinc factum est, quod in sacra antiquitate aliquando Confessoris nomen veris Martyribus communicatum est, teste Petro Galefino in *notis ad suum Martyrologium* 17. Kal. Februarii ad S. Felicem Confessorem: *Non desunt qui Martyris, & Confessoris nomen olim synonymum fuisse contendunt.* Adheret Franciscus Amatus Pouget in  *suis Catholicis institutionibus part. 2. sect. 4. cap. 2. §. 22.* *Olim Confessores Christi dicebantur ii solum, qui, cum testimonium perhibuissent veritati cum carceris, exilii, rei familiaris, suppliciorum, ipsiusque vite periculo, non tamen morti traditi fuerant. Confessores autem dicebantur, propter gloriosam, & publicam nominis Christi confessionem. Martyres quoque appellabantur, propter exhibitum veritati testimonium: Et exempla collecta legi possunt in defensione librorum liturgicorum Ecclesiæ Romanæ editorum a venerabili Dei servo Cardinali Josepho Maria Thomasio, quæ fuit in Urbe exarata a viro pio & docto, & typis Panormitanis impressa anno 1723. uti videri potest in cap. 5. §. 3. num. 12. & pluribus sequentibus.*

7 *Martyres tandem erant illi, qui pro vera Fidei defensione moriebantur, aut qui atrocissima tulerant pro Fide tormenta, licet fuerint superstites, et in pace quieverint; teste S. Thoma 2. 2. quest. 124. art. 4. ad quartum.* Quocirca in Conciliis habitis sub S. Cypriano nonnulli Episcopi se subscripserunt titulo Confessorum, nonnulli titulo Martyrum: & Tertullianus in *libro adversus Praxeam* cap. 1. probat, Praxæ nomen Martyris nullatenus competere, non quia fuisset post tormenta superstes, sed quia brevem tantum passus fuerat carcerationem: *De jactatione*, inquit, *Martyri inflatus ob solum, & simplex, & breve carceris caditum: & famigeratus Ecclesiæ Doctor S. Apollonius apud Eusebium lib. 5. hist. cap. 18. invehitur adversus Montanistas, qui contendebant, quemdam Themisonem, hominem de coetu ipsorum, Martyris titulo esse decorandum, licet viventem; & probat, cum Martyrem non esse appellandum, non quod post tormenta supervixisset, sed quia data pecunia e carceribus evaserat, & in libertate constitutus*

constitutus novam eructare coeperat doctrinam sensui Ecclesiæ adversantem: *Præterea*, inquit, *Themison speciosa avaritia obvelatus, qui Confessionis signum non pertulit, sed magna pecunia vi erogata vincula abiecit: cum ob eam causam modestius deinceps ac submissius agere deberet, tamquam Martyr sese effereus, ausus est exemplo Apostoli, conscripta epistola Catholica, eos quidem, qui fideiores ipso extiterant, instruere, novæ autem doctrinæ patrocinari.* Et hæc ipsa consuetudo Martyres appellandi etiam eos qui tormentis superstitēs fuerunt, comprobatur ex epistola Ecclesiæ Viennensis apud Eusebium lib. 5. hist. cap. 2. pag. 211. ubi nonnulli præ humilitate dictum nomen recusarunt, contententes; illud tantum deberi mortuis pro Christo: *Quamvis ignem impressa vestigia, quamvis vibices & vulnera toto corpore circumferrent, tamen nec se ipsos Martyres predicarent, nec a nobis ita se appellari paterentur.* Verum si quis nostrum per litteras, aut in familiari colloquio, eos Martyres appellasset, objurgabant graviter atque increpabant: *Martyris enim appellationem libentissime concedebant Christo, utpotè fido veroque testi, & primogenito mortuorum, utraque celestis principi & auctori.* Eos quoque, qui jam ex hac vita migraverant, Martyres nobis commemorabant, aiebantque: *hi jam sunt Martyres quos in ipsa confessione Christus assumi voluit, professionem ipsorum tamquam annuo obsequans.*

8 Aliæ in sacra antiquitate occurrunt Martyrum differentię; cum alii fuerint appellati Martyres *designati*, alii Martyres *consummati*, sive coronati, & alii Martyres *vindicati*.

9 Martyres *designati* erant illi, quibus mortis sententia fuerat notificata, & adhuc non fuerat executioni mandata; uti colligitur ex Tertulliano in libro *ad Martyres*: ita prorsus ut in Romana Rep. Magistratus designati erant illi, qui jam fuerant ad Magistratum electi, sed adhuc Magistratus possessionem non fuerant adepti. Martyres *consummati*, sive coronati erant illi, qui vel in tormentis, vel paulo post tormenta ipsorum tormentorum violentia moriebantur, quemadmodum desumitur ex S. Cypriano epist. 37. ubi ait: *Cum voluntati, & confessioni in carcere & vinculis accedis moriendi terminus, consummata Martyris gloria est.* Martyres demum *vindicati* erant illi, quorum felix in Domino exitus fuerat discussus, & approbatus, & quibus jam fuerat cultus Ecclesiastico iudicio delatus; & de hisce Martyribus vindicatis, de quibus etiam infra habebitur sermo, intelligenda sunt primorum sæculorum monimenta, quæ religiosi cultus exhibitionem erga Martyres, & ipsorum cineres, & memoriam præferunt. Smyrnenſis Ecclesiæ epistolæ de S. Polycarpi Martyrio amplum fragmentum in historia Eusebii insertum est, principio tamen, ac fine mutilum; cumque non ita pridem Jacobus Usserius Armachanus ex vetustissimis codicibus integram Smyrnenſem epistolam evulgasset, & Valeſius in notis ad locum Eusebianum, quæ desiderabantur, attexuisset, & magno Ecclesiasticæ disciplinæ illustrandæ lucro vulgasset, ex ea primum quidem desumitur Christianos omnes sollicitos fuisse de S. Polycarpi Reliquiis, ut communi-

carent

earent Sancto cadaveri, hoc est ut eas cultu religioso prosequerentur. Hinc in Actis Martyrii S. Ignatii ap. Ruinart. in *Act. MM.* pag. 19. prope finem legitur, Ecclesiam multis visionibus certiorē fuisse factam de recepta a Sancto Martyre beatæ vitæ retributione; & additur: Sanctum beatum diximus, vobisque diem, & tempus indicavimus; ut tempore ejus Martyrii convenientes, athleta, & generoso Christi Martyri communicemus.

10 Deinde ex eadem epistola Smyrnenſi ap. Euseb. lib. 4. *hist. cap. 15.* pag. 170. accipitur, Paganos, atque Judæos sollicitè curasse, ne beati senis Polycarpi cineres a Fidelibus colligerentur, apposita calumnia, quod illum essent tamquam Deum adoraturi: Quidam igitur suggererunt Niceta Herodis patri, fratri autem Dalces (in eadem epist. ap. Ruinart. n. 17. legitur Alces) ut Proconsulem adiret, moneretque, ne cadaver illius donaret; ne forte, ut aiebant, relicto Crucifixo, hunc deinceps Christiani colere inciperent. Et isti quidem hæc dicebant, suggerentibus, atque instantibus Judæis, qui etiam nos sollicitè observaverunt, cum e rogo corpus auferre tentarent; repulsam autem fuisse a Smyrnenſibus Clericis calumniam, qui bene aperuerunt, quo cultus genere Sanctorum Martyrum Reliquiæ a Fidelibus honorarentur: Stulti, qui ignorarent, nos nec Christum unquam posse relinquere, qui pro salute omnium, quotquot ex genere humano salvi futuri sunt, mortem pertulerit, nec alium quemquam colere: illum enim utpote Filium Dei adoramus, Martyres vero tamquam discipulos, & imitatores Domini merito amore prosequimur ob eximiam ipsorum benevolentiam, quam erga regem, ac magistrum suum declararunt. Quorum nos quoque consortes & condiscipulos fieri omnibus modis optamus.

11 Tertio ex eadem epistola Smyrnenſi habetur religiosa celebratio diei, quo Polycarpus vitam cum morte pro Domino feliciter commutavit: Atque ita nos demum ossa illius gemmis pretiosissimis cariora, & quovis auro puriora colligentes, ubi decebat, condidimus: quo etiam in loco nobis, si fieri poterit, convenientibus concedet Deus natalem ejus Martyrii diem cum hilaritate & gaudio celebrare, tum in memoriam eorum, qui glorioso certamine perfuncti sunt, tum ad posteros hujusmodi exemplo erudiendos & confirmandos.

12 Suffragantur Tertullianus, & Cyprianus. Tertullianus, qui Chilastis, seu Millenariis accessit asserentibus, æternam beatitudinem Justis non conferri, nisi post generalem corporum resurrectionem, uti legi potest in ejus libro de anima, ab hac æternæ beatitudinis dilatione Martyres excepit in libro de resurrectione carnis cap. 43. ubi ait: Nemo enim peregrinatus a corpore statim immoratur penes Dominum, nisi ex Martyrii prerogativa, paradiso scilicet, non inseris, deversurus; & in scorpiano cap. 12. subdit de Martyribus: Residere cum Domino in throno ejus &c. Sed & interim sub altari Martyrum anima placidum quiescunt: cujus exceptionis fundamentum non alia profecto in re constitui potuit, quam in publico religioso cultu, quo tunc Fideles Martyrum memoriam prosequerentur; teste erudito Thomassino in suo tractatu de celebratione festorum lib. 1. cap. 8. num. 2. ubi hæc habet: Maximum illi negotium facessere debuit cultus, & honor, quo suos Ec-

clesia

*clesia Martyres prosequeretur: nam qui fieri poterat, ut festi dies dedicarentur, & honores exhiberentur animabus a calo adhuc exulantibus, & inferis locis degentibus? Legi potest eruditus Muratorius in suo opere de paradiso post primam nostrorum voluminum impressionem edito, ubi cap. 10. pag. 87. erudite ostendit commemorationem Martyrum, quæ fiebat in antiqua Ecclesia, fuisse Eucharisticam, hoc est gratulatoriam, & lætitiæ testem; reliquorum vero Fidelium Propitiatoriam, ut Fidelium in terra viventium orationibus, illorum animæ in altera vita juvantur, qui adhuc misericordia Dei indigerent. S. Cyprianus vero epist. 38. dies natales Martyrum jubet adnotari cum omni cura & diligentia, promittitque, illorum memoriam se religiose celebraturum: Denique & dies eorum, quibus excedunt, adnotate, ut commemorationes eorum inter memorias Martyrum celebrare possimus. Quamquam Terullius fidelissimus & devotissimus frater noster, pro cetera sollicitudine & cura sua, quam fratribus in omni obsequio operationis impertit, quæ nec illis circa curam corporum deest, scripserit, & scribat, ac significet mihi dies, quibus in carcere beati fratres nostri ad immortalitatem gloriosa mortis exitu transeunt; & celebrantur hic a nobis oblationes, & sacrificia ob commemorationem eorum, quæ cito vobiscum, Domino protegente, celebrabimus.*

13 Facile esset, subsequentium Patrum testimonia congerere, cum religiosum Martyrum cultum ubique patentem commendent SS. Basilii Magni epist. 291. ad Episcopos Pontica dioceseos, Gregorius Nazianzenus orat. 6. in Martyrum festo, & orat. 18. de Sancto Cypriano, Gregorius Nissenus orat. de Sancto Theodoro Martyre, Ambrosius, sive Auctor alius sermonum, qui eidem attribuuntur, serm. 6. in finem, & serm. de Sanctis Nazario, & Celso. Cum autem in superioribus dictum sit, hæc omnia esse intelligenda de Martyribus vindicatis, de hoc non videtur ulla rationabilis institui posse controversia; cum primis etiam Ecclesiæ sæculis inter mores receptum esset, & ad Ecclesiasticam pertineret disciplinam, quod nulli putativo Martyri religiosus cultus exhiberetur, nisi ille vindicatus esset, hoc est non privato, sed publico Ecclesiastico judicio approbatus; uti desumitur ex Optato Milevitano scriptore sæculi quarti lib. 1. adversus Parmenianum, ubi loquens de Lucilla opulenta & factiosa muliere, quæ Donatistis adhærebat, scribit, fuisse correptam ab Archidiacono Cæcilianiano, quia ante sacram Communionem ossa ejusdam vel non Martyris, vel Martyris non vindicati osculabatur: Cum correptionem Archidiaconi Cæcilianiani ferre non posset, quæ ante spiritualem cibum, & potum os nescio cuius Martyris, si tamen Martyris, libare dicebatur, & cum præponeret os nescio cuius hominis mortui, etsi Martyris, sed necdum vindicati, correpta cum consensione irata recessit.

14 Vindicatum Martyrem (inquit Gabriel Albaspineus Episcopus Aurelianensis ad citata verba Optati) Optatus vocat, qui declaratus sit communi piorum sententia in eam summam dignitatem, relatus jam inter celi indigetes. Ideoque, si Archidiaconus dignam reprehensione existimavit nobilem fem-

minam, quæ privato iudicio & arbitrio cultum publicum exhibebat ei, quem Martyrem putabat, cuiusque Martyrii causa non fuerat discessa & approbata; nec Archidiaconus reprehensionis fundamentum reposuit in aliqua lege tunc lata, sed antiquiorem quodammodo supposuit legem & consuetudinem falsæ pietati mulieris adversantem; nil clarius afferri posse videtur ad suadendum, nunquam permissum fuisse privato iudicio & arbitrio aliquem uti Sanctum publico cultu venerari; quemadmodum, perpenso Optati textu, ad rem bene adnotarunt viri eruditi Franciscus Viçton. in *his tractatu de Canoniz. Sanctor. cap. 7.* Saussajus in *his apologetico Theologico pro Sanctorum cultu post Martyrologium Gallicanum pag. 30.* Lupus in *notis ad quartum Concilium Romanum S. Leonis IX. tom. 3. antiquioris editionis*, Baillet in *prefatione ad vitas Sanctorum §. 94.* Ruinart in *prefatione ad acta Martyrum sincera §. 71.* Mabillon in *prefatione ad seculum quintum Ordinis S. Benedicti §. 6. num. 95.* ubi: *Vindicatos ergo volebant Martyres, idest ab Episcopis agnitos, & approbatos: quibus concordant sequentium sæculorum monumenta alibi referenda.*

## C A P U T I I I.

*De Collectione Actorum Martyrii, & eorum Examine,  
& Ecclesiastico super illis Iudicio.*

**I**Nter ceteras Episcopalis sollicitudinis partes non ea profecto fuit postrema, ut Acta eorum, qui pro Christi Fide moriebantur, sincera colligerentur. Id defumitur ex his, quæ habentur in libro de Romanis Pontificibus. In eo quippe de S. Clemente Papa legitur: *Hic fecit septem regiones dividit Notariis fidelibus Ecclesia, qui gesta Martyrum sollicite & curiose, unusquisque per regionem suam, diligenter perquirerent;* de S. Fabiano: *Hic regiones divisit Diaconibus, & fecit septem Subdiaconos, qui septem Notariis imminerent, ut gesta Martyrum in integro colligerent;* & de S. Antero: *Hic gesta Martyrum diligenter a Notariis exquisivit, & in Ecclesia recondidit, propter quod a Maximo Prefecto Martyrio coronatus est.*

2 De harum regionum divisione, & quomodo quatuordecim antiquæ Urbis regiones, septem Notariis fuerint a Clemente distributæ, assignato videlicet duabus regionibus uno Notario, videri potest in *prolegomenis* eruditi viri Francisci Blanchini ad *Anastasium tom. 2. pag. 138.* Panvinus in *sua dissertatione impressa apud Cardinalem Rasponum de basilica Lateranensi lib. 3. cap. 14.* colligit ex Actionibus Synodi Romanæ sub S. Silvestro Papa celebratæ, Romanam Ecclesiam Notarios aluisse, qui res gestas Martyrum diverforum conscriberent. Sed Hincmarus Remensis, Petrus de Marca, Labbeus, Lupus, Cabassutius, Pagi junior eam Synodum probant esse suppositiciam, & multa suppositionis capita referuntur a Schelstrat in *2. parte antiquit. illustr. dissert. 3. cap. 8.* Ad ulteriora progreditur Baillet in *sua prefat.*



*præfat. ad vitas Sanctorum* §. 4. & audacissime asserit, narrata de Pontificibus Clemente & Fabiano solidiori robore esse comprobanda, innuens, se non multum deferre citato libro de Romanis Pontificibus. Satis tamen superque, & Clementem Notarios, & Fabianum Diaconos & Subdiaconos pro Actis Martyrum colligendis statuisse, & Anterum Martyrio fuisse ex dicta causa coronatum, probari ex allegato libro senserunt eruditione & pietate præstantes viri Cardinalis Baronius, & Florentinius in *præfatione ad Martyrologia ab ipsis edita*, Molanus ad *Martyrologium Usuardi cap. 21.* Polydorus Virgilius de *rerum inventoribus*, Bollandus in *præfatione generali* §. 2. Mabilonius in *sepe citata præfatione*, & Justus Fontaninus Archiepiscopus Ancyranus in *præfatione ad codicem Canonizationum*. Et merito: siue enim liber ille sit Anastasii, siue Damasi, siue fuerit a variis Auctoribus collectus juxta varias Eruditorum sententias, magnæ nihilominus est auctoritatis, & magno in pretio habetur; uti, cum vindicando a calumniis Caroli Molinæi, Holpiniani, Petri Halloix, & aliorum, recte contendit amicus olim noster, dum viveret, Joannes Ciampinus in *examine libri Pontificalis* sect. 12. Additur, quod in Bucheriano catalogo juxta exemplar Fossatense, & alterum Reginæ Svecorum sic legitur de Fabiano: *Hic regiones diuifit Diaconibus, & fecit septem Subdiaconos, qui septem Notariis imminerent, ut gesta Martyrum fideliter colligerent: & quamvis nonnulli suspicentur, verba hæc fuisse catalogo Bucheriano superaddita; cum nihilominus sub Fabiani successore Cornelio habeamus ex Eusebio, fuisse in Romana Ecclesia septem Diaconos, & totidem Subdiaconos, verisimile admodum est, prædicta officia Diaconibus & Subdiaconibus fuisse a Fabiano assignata; uti videri potest apud Petrum Constant tom. 1. epistolarum Romanorum Pontificum, pag. 120.*

3 Mos ille Acta Martyrum colligendi, & sincere adnotandi ab Ecclesia Romana ad alias manavit Ecclesias, ut ipse Baillet *loc. cit.* admittit: porro incertum est, utrum manaverit lege statuta, an potius exemplo. Fabianus Pontifex in sua prima epistola Decretali Episcopos admonet, ut collectioni Actorum Martyrum invigilent: *Quod etiam vos omnes agere monemus; & deinde præcipit: Et ideo fidelissimis hæc negotia committi præcipimus, ne aliqua in eis illis inueniatur.* Sed, cum plerisque commentitia hæc epistola videatur, sinceriora ex S. Cypriano addenda sunt. In epistola tempore sui secessus scripta Clero Carthaginensi mandavit, ut Acta Martyrum scriberentur, & dies consummati agonis diligenter adnotarentur, uti supra visum est; & Pontius Diaconus, qui S. Cypriani Martyrium descripsit, testatur num. 1. moribus jam receptum fuisse, ut non solum nobilium, sed etiam plebejorum hominum Martyria adnotarentur: *Ut cum majores nostri plebejis, & catechumenis Martyrium consecutis tantum honoris pro Martyrii ipsius veneratione dederint, ut de passionibus eorum multa, aut prope dixerim pene cuncta conscriperint, ut ad nostram quoque notitiam, qui nondum nati fuimus, pervenirent.* Nisi forte plebejorum nomine ibi laici

sint intelligendi, nullum in Clero Ordinem adepti: sic enim Pontius paulo inferius ait num. 3. *Multa sunt, quæ adhuc plebesus, multa, quæ jam Presbyter fecit*; sicuti bene adnotarunt Holstenius in *notis ad passionem Sanctarum Perpetua, Felicitatis &c. §. 2. versic. 1.* & P. Joseph Augustinus Orsi in *infortatione apologetica pro predictis Sanctis pag. 20.*

4 Huc spectant, quemadmodum late explicavit P. Honoratus de Sancta Maria Carmelita discalceatus, in suo opere *de critica regulis tom. 1. dissert. 4. art. 1.* spectant, inquam, Acta Proconsularia, quorum nonnulla adhuc extant; Acta videlicet a Notariis Gentilibus scripta, in quibus iudicus processus condemnationis Martyrum ad mortem, qui ab Ethnicis Magistratibus fiebat, continebatur; & quæ ad manus Christianorum deveniebant, vel quia emebantur numerata pecunia; unde Valerius alumnus & comes S. Pontii Senatoris & Martyris, ejus Acta, quæ edita sunt a Bollandistis *ad diem 14. Martii*, se descripsisse fatetur, prout ea redemerat numerata pecunia ab exceptoribus: vel quia aliquando ea consignari continebat a Christianis artem Notariatus exercentibus in tribunalibus Magistratuum Gentilium, sed tali modo, ut certamina describerent, quæ ad decus & splendorem veræ pietatis amplificandum referrebantur, a describendis autem edictis persecutionum, & poenæ mortis abstinere, ne se impietatis præberent ministros. Hinc de S. Genesio Arelateni legitur in *Act. ap. Ruinart pag. 473.* quod eam officii partem amplexus est, qua patronorum verba vel nova signorum velocitate, vel dexteræ celeritate signum vocis æquante persequeretur (abbreviatis quippe notis verba Tyranni interrogantis, & Martyris respondentis, dum proferebantur, scribebantur, quæ subinde notæ, expleto certamine, clare & fideliter explicabantur per eosdem Notarios, qui Acta conservare tenebantur; uti, congesta undique eruditione, illustrarunt Joannes Dartis in *observatione ad annales Cardinalis Baronii, Altaferra in notis ad Anastasium in vita S. Clementis tom. 2. editionis Romana pag. 42.*) & quod idem S. Genesius, abjectis tabulis, edictum persecutionis scribere noluit: *Accidit autem ut, eodem ante tribunal Iudicis exceptoris munus implente, impia atque sacrilega mandata persecutionis jussa legerentur: qua cum devotus Deo repudiaret auditus, & imprimere ceris manus sancta respuerit. Abjectis ergo ante pedes Iudicis tabulis, triste ministerium sacra jam Deo mens refugit.*

5 Huc pertinent alia, quæ supersunt, Acta Martyrum a Christianis scripta, qui se Gentilibus immiscebant, dum Martyr a Iudice interrogabatur, & dum Iudex poenas & tormenta decernebat; cuius generis esse dicuntur Acta SS. Martyrum Tergeminorum, quæ fuerunt descripta a SS. Neone, & Turbone; necnon Acta sincera passionis SS. Jacobi, & Mariani Martyrum Numidarum *apud Ruinart pag. 194.* Auctor enim qui ea scripsit, rebus gestis interfuit, & cum Martyribus in ipso agone versatus est: scripsisse quippe se testatur tum ad preces Christianorum, tum ad jussa eorundem Martyrum; *Qui contra savientes sæculi presuras,*

*suras, & Gentiles impetus habituri tam sublime certamen, pralium suum, quod instinctu celestis Spiritus inierunt, in notitiam fraternitatis per nos venire iusserunt: non quod in terris vellent corona sua gloriam per jactantiam predicari, sed ut pracedentibus experimentis multitudo plebis, & Dei populus ad exemplum Fidei posset armari; Et paulo superius: Quanto modestius petierunt, tanto efficacius impetraverunt, & nobis hoc predicanda glorie sue munus Testes Dei nobilissimi reliquerunt. Concordat Eusebius lib. 8. histor. Eccles. cap. 7. loquens de Martyribus Palæstinæ: Quæ cum gererentur, nos ipsi præsentibus aderamus. Huc tandem respicit antiqua & communis fere omnium Ecclesiarum consuetudo recitandi in conventibus publicis eorum Martyrum gesta, quorum festa peragebantur. De hac consuetudine legi potest Ruinart in præfatione ad Acta Martyrum num. 5. Et adeo diligens erat observatio de Actis in Ecclesia recitandis, quæ essent sincera, ut Gelasius I. summus Pontifex lectionem eorum in Ecclesia Romana prohibuerit, si conscripta fuissent ab infidelibus, & ignotis, aut ab hæreticis. Decretum hoc a nonnullis non Gelasio, sed Damaso, aut Hormisdæ Romanis Pontificibus tribuitur; sed uterque Pagi bene probant, Gelasium esse certum & indubitatum auctorem memorati decreti; & laudatus Justus Fontaninus in antiquissimo codice bibliothecæ Palatinæ illud invenit notatum nomine Gelasii, & edidit post antiquitates Hortæ pag. 324. En verba decreti num. 4. Item gesta Sanctorum Martyrum, quæ multiplicibus tormentorum cruciatibus, & mirabilibus Confessionum triumphis irradiant. Quis ista Catholicorum dubitet, & majora eos in agonibus fuisse perpeßos? Nec suis viribus, sed Dei gratia, & adjutorio universa tolerasse? Sed ideo secundum antiquam consuetudinem singularem cautela in sancta Romana Ecclesia non leguntur, quia & eorum, qui conscribere, nomina penitus ignorantur, & ab infidelibus, & idiotis supersæna, aut minus apta, quam rei ordo fuerit, esse putantur. Sicut Quirici cujusdam, & Julita, sicut Georgii, aliorumque ejusmodi passiones, quæ ab Hæreticis perbibentur compositæ; propter quod, ut dictum est, ne vel levis subsannandi oriretur occasio, in sancta Romana Ecclesia non leguntur. Sensus autem horum verborum est, non quod in Ecclesia Romana gesta Martyrum non legerentur, sed quod ea non legerentur, quorum Auctores erant ignoti; uti erudite ostendit Mabillonius in disquisitione de cursu Gallicano §. 1. & sequitur Ruinart loc. cit. §. 5. & comprobatur ex Epistola Hadriani Romani Pontificis ad Carolum Magnum apud Mabillonium loc. cit. num. 10. Vita Patrum sine probabilibus Auctoribus minime in Ecclesia leguntur; nam ab Orthodoxis titulata & suscipiuntur, & leguntur; in quo Pontifex se conformasse visus est Concilio Carthaginensi can. 50. ubi sic decretum est: Liceat etiam legi passiones Martyrum, cum anniversarii dies eorum celebrantur. Ad quæ verba Balsamon sic notat: Etiam si in vigesimo quarto canone præsentis Synodi Patres defuerint libros, qui legi debeant, nunc tamen adjiciunt, esse quoque legendas commemorationes passionum Martyrum in anniversariis eorum memoriis.*

6 Actorum Collectioni succedebat Examen; quocirca supra memoratus

tus Franciscus Dominicus Bencinus, quem nedum eruditionis Ecclesiasticæ, sed amicitiae gratia compellere gellio, *disertat. 2. de litteris encyclicis cap. 3. §. 1. num. 6.* hæc habet: *Honor autem his tributus Martyribus in Ecclesia primitiva, summumque omnium ordinum in Martyres æstimum, pars quædam Religionis fuit, & quin cultum religiosum involveret, nihil est dubitandum. Idcirco Ecclesiarum Antistites magna semper solertia, summoque studio caverunt, ne cui religiosum hunc cultum decernerent, qui suo e ipsa merito mandandus hoc honore non esset, ejusque rei gratia invigilarunt, ut ex certis indiciiis merita uniuscujusque didjudicaret, & causam Martyrii, vitamque Martyris penitus internoscerent. Prosequitur citatus Auctor in §. 4. ea omnia, quæ sedulo perpendebantur, antequam aliquis inter veros Martyres recenseretur. De his alibi a nobis agetur; & interea adnotare fas sit, quod non omnes, qui tormentis afficiebantur, & ex eis, vel in eis moriebantur, Martyrum consortio adscribebantur. Sæpissime quippe factum est, ut ad Martyrii laudem aut piorum Christianorum subsidia ambientes, aut scelerum suorum poenas effugientes, aut æris alieni gravitatem declinantes, pravis studiis consiliisque præposteris, sese carceribus mancipandos offerrent. Et quidem notissimum est, quod de Peregrino, quem Protheum appellat, narrat Lucianus. Tertullianus Martyrum flagitia in carceribus detentorum gravissime exaggerat, qui, obtentu quidem dandorum libellorum pro pace obtinenda, patrandorum criminum opportunitatem captabant, quæ tametsi Montanista Tertullianus acerbis urget, & Catholicæ Ecclesiæ, quæ Confessorum ejusmodi preces audiebat, impudentius objicit, non sunt tamen eis miranda, qui humanam partim imbecillitatem, partim malitiam reputant. Calumniatur ille quidem Ecclesiam, quod falsorum Martyrum officia pro lapsis exciperet, sed vitia illorum fortasse verissima describit. Examen ergo requirebatur, ut boni a malis discernerentur. Hinc Cyprianus in epistola 6. ad Rogatianum Presbyterum, & alios Confessores, inquit: *Quosdam audio inficere numerum vestrum, & laudem præcipui nominis prava sua conversatione destruere; Et in epistola 4. ad Presbyteros & Diaconos diserte bonos Confessores memorat, ut nimirum a malis falsisque discernat: Si fratres pro dilectione sua cupidi sunt ad conveniendum & visitandum Confessores bonos, quos illustravit jam gloriosis initiis Divina dignatio. Necessitas insuper examinis ex eo facile confirmari potest, quod oportebat dignoscere, an in Ecclesiæ Catholicæ unitate mortui essent, juxta illud Apostoli ad Corinth. 1. cap. 13. v. 3. Si tradidero corpus meum ita ut ardeam, charitatem autem non habuero, nihil mihi prodest: quod argumentum late persequitur S. Cyprianus in epistola ad Antonianum, & in epistola ad S. Cornelium Papam. Quærebatur præterea, an, qui tormenta passus erat, passus fuisset inani gloria, aut alio sæculari motivo ductus, juxta illud S. Hieronymi in comment. epist. ad Galatas lib. 3. cap. 5. v. 14. Vide, quantum bonum sit charitatis! si ita Martyrium fecerimus, ut nostras velimus ab hominibus Reliquias honorari, si opinionem vulgi scilicet in-*  
*trepidi**

trepidi sanguinem fuderimus, & substantiam nostram usque ad mendicitatem propriam dederimus, huic operi non tam premium, quam poena debetur, & perfidia magis tormenta sint, quam corona victoria. De causa demum mortis quaestio instituebatur, juxta illud S. Augustini: *Martyrem non facit poena, sed causa*. Unde, cum S. Epiphanius in lib. adversus haereses, haeresi 76. num. 1. gravissimas poenas exposuisset, quas Georgius Patriarcha Alexandrinus passus fuerat a Gentilibus: *Primum* (inquit) *a Gentilibus circumscriptus, ac multa perpeffus, atque ad eum, quem diximus, modum, circumductus, & fustibus percussus, totaque propemodum urbe tractus, in iis suppliciis extinctus est, ac post obitum concrematus, & cum multis pecudum, ac bestiarum ossibus in cinerem reductus, atque in ventos dispersus, talem exitum vitae consecutus est*. Quaestionem deinde proposuit, an inter Martyres esset adscribendus: *Obficere* (inquit) *nobis quispiam potest, cum haec a Gentilibus passus sit, nonne Martyrium obisse videri potest?* Et inter Martyres non esse recensendum dixit, cum morte multatus fuisset patrati sceleris causa, hoc est propter injurias, quibus populum sibi commissum affecerat: *Sed haec minime propter Christi confessionem sustinuit; quin potius ob omnem illam injuriam ac violentiam, qua Episcopatus sui tempore, quoquo eum tandem modo gesserit, civitatem omnem ac populum oppressit*.

7 Actorum Examini succedebat Ecclesiasticum Judicium, quo cultus decernebatur illis adhibendus, de quorum obitu pro Christi Fide nulla ex Actorum revolutione supererat dubitatio. Judicium hoc in unaquaque dioecesi ad suum pertinebat Episcopum; uti bene adnotarunt Cardinalis Bellarminus de Sanctor. beatit. lib. 1. cap. 8. Lupus in notis ad quartum Concilium Romanum tom. 3. antiquioris editionis pag. 565. Joseph Maria Suarez in notis ad S. Lini opera pag. 705. Phoebeus in dissertatione de Canoniz. Sanctor. impressa post Acta Canonizationis S. Petri de Alcantara, & S. Mariae Magdalene de Pazzis pag. 331. Van Espen in Jus canonicum part. 1. tit. 21. cap. 7. num. 11. Pappacoda Episcopus Lycienensis in dissertat. impressa inter allegationes Juris Consultorum collectas a Donato Antonio de Marinis allegat. 15. num. 21. Putat tamen Saussajus in apolog. Theolog. pro Sanctorum cultu pag. 32. ad calcem Martyrol. Gallicani, judicium hoc non ad quemcumque Episcopum, in cujus dioecesi aliquis mortem sustinuisset, & de quo quaereretur, an sustinuisset pro Christo, spectasse; sed examen ad Primatem delatum fuisse, qui adhibito consilio aliorum Episcoporum decernebat, quid de Martyrio sentiendum esset: *Verum* (inquit) *ex selectiori veneranda antiquitatis penu, quin & exquisitiori Patrum testimonio, hoc Jus non ita passim creditum, sed majoribus Prelatis duntaxat concessum fuisse, certo liquidius apparet: moris enim erat, ut, cum aliquis Martyrio occubuisset, rem gestam scriberet Episcopus, sub cujus ditione id accidisset, ad Primatem Episcopum; a quo, mature adhibitis in consilium collegis Episcopis, an inter Martyres is esset recipiendus, decernebatur. Favet huic assumpto S. Augustini testimonium in breviculo collationum cum Donatistis, collat. 3. cap. 13. num. 25. tom. 9. ubi describendo ritum & ordinem*  
quo

quo Acta Martyrum ad Primatem trans mittebantur, ait: *Recitarunt etiam rescripta Secundi Tigrisiani ad eundem Mensurini pacifice data, ubi & ipse narravit in Nymidia persecutores quæ egerint, & qui comprehensi, & Scripturas sanctas tradere nolentes, & multa mala passi, & gravissimis suppliciis exercitati & occisi sunt, eosque honorandos pro Martyrii sui merito commendavit, laudans, eos non tradidisse Scripturas sanctas. Sed hæc erat Africanæ Ecclesiæ consuetudo, quemadmodum adnotavit Lupus ad quartum Concilium Romanum S. Leonis IX. part. 3. antiquioris editionis pag. 568. ubi, recitato Augustini testimonio, ait: Non quovis in Africa Episcopos, licet provinciarum Primates, potuisse canonizare, sed eminentem hanc facultatem Primatili Carthaginiensi Sedi fuisse reservatam. At extra Africanam Ecclesiam in aliis Ecclesiis examen ad unumquemque Episcopum in sua diœcesi pertinebat; & ad eundem Episcopum spectabat, peracto examine, decernere, an, qui occubuerat, inter Martyres esset recensendus, & an cultus ei esset adhibendus, quod altaris potissimum, aut oratorii erectione in ejus honorem expleri consueverat. S. Gregorius Nilfenus, qui floruit sæculo quarto, in vita S. Gregorii Thaumaturgi, qui sæculo tertio floruerat, hæc de eo suam diœcesim visitante refert pag. 1006. tom. 2. Descendit rursus ad urbem, & omni circa regione undique peragrata ac perlustrata, additamentum & quasi corollarium studii erga Numen Divinum instituebat, apud omnes ubique populos faciens, ut nomine eorum, qui pro Fide decertassent, dies festi, atque solennes conventus celebrarentur. De S. Joanne Chrysostomo, qui vixit sæculo quarto, refert Sozomenus scriptor quinti sæculi, dignos honore Martyris censuisse Paulum Constantinopolitanum Episcopum Subdiaconum, & ejus Lectorem Martianum per Arianos trucidatos, & miraculorum gratia post mortem coruscantes. Alia multa & infra, & alibi habebimus, quæ suadebunt, ad unumquemque Episcopum pertinuisse, vitam & exitum perpendere eorum, qui Martyrii & Sanctitatis famæ celebres in sua diœcesi moriebantur. Alia quoque alibi fuscè exponentur de speciebus cultus, qui auctoritate Episcopali erga Martyres exhibendus decernebatur. Nunc, cum de erectione altarium, aut oratoriorum super eorum sepulcrum sermo in superioribus habitus sit, præsto est auctoritas Prudentii poetæ Christiani, qui vixit sæculo quarto, quique de passione S. Vincentii ita cecinit hymn. 5. de coronis, apud Ruinart in Act. M.M. pag. 335.*

*Sed mox subactis hostibus,*

*Jam pace Justis reddita,*

*Altar quietem debitam*

*Præstat beatis ossibus:*

Quod ipsum comprobatur ex sermone 310. alias 113. S. Augustini in natali Cypriani Martyris cap. 2. num. 2. tom. 5. oper. ubi laudat mensam in loco, ubi ille obierat, extructam: *Et tamen mensa dicitur Cypriani, non quia ibi est inquam Cypriani epulas, sed quia ibi est immolatus, & quia ipsa immolatione sua paravit hanc mensam, non in qua pascat, sive pasceatur, sed in qua sacrificium*

sacrificium Deo, cui & ipse oblati sunt, offeratur. Quapropter Donatistæ, qui circumcelliones suos, quos Taurinus Comes publica auctoritate compescuerat, Martyres occubuisse jactabant, honore erectionis altarium eos profequi auli sunt, teste Optato lib. 3. pag. 60. quorum corpora usque in hodiernum per dealbatas aras, aut mensas poterunt numerari: quod & advertitur in historia Donatistarum præclarissimi & eruditissimi viri Cardinalis Norisii part. 2. tom. 4. operum ejusdem.

8 Concordant antiquissima Acta S. Patrocli apud Bollandum ad diem 21. Januarii cap. 3. num. 12. Eusebius, qui eum in sepulcro recondiderat, ipse edificavit super corpus ejus parvam cellulam secundum quod possibilitatem habebat; itemque Acta SS. Martyrum Nicandri, & Marciani, quæ ex Vaticana, & Vallicellana bibliothecis edidit Mabillon in suo museo Italico tom. 1. part. 2. pag. 250. Requieverunt autem Christi Martyres Nicander, & Marcianus, & Daria uxor Nicandri cum filio suo in civitate Venafra. Tunc Christiani abstulerunt corpora eorum, & sepelierunt ea prope locum, in quo decollati fuerant, in quo loco fabricata est basilica ad honorem nominum ipsorum; & Ammianus Marcellinus, qui vixit sæculo quarto, quique Christianos non una vice in sua historia carpit, plene testatur de erectione oratoriorum super corporibus Martyrum lib. 22. cap. 11. Cadavera preceptorum camelis imposita vexit ad litus (Gentilium multitudo) iisdemque subito igne crematis, cineres projecit in mare (nempe Dracontii, & Diodori) id metuens, ut clamabat, ne collectis supremis, ades illis extruerentur, ut reliquis, qui deviare a Religione compulsi, pertulere cruciabiles poenas, ad usque gloriosam mortem interemerata fide progressi, & nunc Martyres appellantur. Suffragatur epistola Ecclesiarum Viennensis & Lugdunensis ad Ecclesias Asiæ & Phrygiæ apud Eusebium lib. 5. hist. cap. 1. pag. 209. in qua late exponitur Gentilium sollicitudo, ne Martyrum corpora, membra, & reliquæ a Christianis sepelirentur: Sed ne sic quidem furor illorum & immanitas adversus Sanctos conquievit . . . eorum enim corpora qui in carcere suffocati perierant, canibus objecerunt, solliciti observantes noctu atque interdiu, ne quis nostrorum ea sepultura mandaret. Post hæc quidquid aut a bestiis, aut ab igne reliquum fuerat, partim laniata, partim ambusta membra exponentes, reliquorum denique capita cum ipsis corporum truncis similiter insepulta per plurimos dies additis militum excubiis custodierunt . . . Nos vero gravissimo interim dolore premebamur, quod humare cadavera nobis non liceret: nam neque noctis tenebra nos juvare, neque auri vis flectere, neque preces ulla animos eorum commovere potuerunt. Sed omni studio atque industria cadavera custodiebant, quasi ingens lucrum facturi, si sepultura caruissent. Et Joseph Scaliger in animadversionibus ad chronicon Eusebii scribit, Martyrium proprie esse altare impositum Martyrum cineribus, quod latine Consecratio dicitur; etsi procedente deinde tempore, in omni Ecclesia Martyrii nomen obtinuerit: unde Eusebius lib. 4. vita Constantini cap. 40. templum Salvatoris a Constantino extructum appellat Martyrium.

D

CAPUT

## CAPUT IV.

*De Martyrum notitia ab una ad aliam Ecclesiam  
per Litteras Encyclicas transmissa.*

**I** Concors est Eruditorum sententia, ab una ad aliam Ecclesiam primis æræ Christianæ sæculis tum Martyrum nomina, tum pretiosæ mortis seriem per encyclicas litteras transmissa fuisse; ut nendum gloriosa certamina omnibus innotescerent, sed & cultus, Ecclesiastico iudicio in una diœcesi ab uno Episcopo introductus, ad alias, assentientibus ipsarum Episcopis, extenderetur. Florentinius in *admonit. 2. de vetustioris Martyrologii vulgandi proposito* ait pag. 8. Hinc frequenter de Martyribus epistola ultra citraque ex provinciis in provincias trans mittebantur. Ruinart autem in *prefatione ad Acta Martyrum* §. 1. num. 3. subdit: Tandem Ecclesia, quæ tantis viris ornata fuerant, post consummatum eorum Martyrium, totam rerum gestarum seriem in epistola encyclicâ descriptam ad alias Ecclesias trans mittebant; ut non solum apud se, verum etiam apud exteras regiones tam illustrium virorum memoria celebraretur. Adhæret Franciscus Dominicus Bencinus sæpe laudatus in *dissert. 1. de litteris encyclicis* §. 4. num. 14. ubi hæc habet: Sedula quoque erat primis temporibus Ecclesiarum sollicitudo dirigendi per encyclicas in universum orbem Martyrum nomina, eorumdemque Acta, & gloriosos agones, & quidquid ad Fidei, Disciplinæque integritatem ab illis fuisset præstitum denuntiandi; illa quidem, ut diptychis sacris inserta, perpetua, atque anniversaria solemnitate recolerentur; hæc vero, ut Fideles novam, peregrinamque doctrinam abs exemplis, & dictis Martyrum discerens evitare: & ipsemet Henricus Dodvellus scriptor heterodoxus, qui inter Cyprianicas dissertationes unam edidit inscriptam de paucitate Martyrum, (quam, congestis undique argumentis, Pagi senior ad *annales Cardinalis Baronii*, & Ruinart strenue ac laudabiliter profigarunt) memoratam litterarum transmissionem admittit. Quin & pro Catholicarum Ecclesiarum commercio, Ecclesia exteras etiam provincias faciebant certiores, ut eorum natale celebraretur, idque per epistolas encyclicas, quarum nonnullæ ad nos usque pervenerunt; inquit, apud citat. Ruinart. in *prefat.* §. 2. num. 13. Dodvellus. Mos hic fortasse probari posset epistola Presbyterorum Achajæ de S. Andreæ Apostoli Martyrio, quod ipsi oculis suis conspexerunt. Tillemontius in *notis ad vitam S. Andreæ* velut supposititiam impugnat. S. Philastrius Brixien sis Episcopus sæculo quarto scribens, dolet, epistolam de S. Andreæ Martyrio ab ejus discipulis primitus compositam, corruptam deinde fuisse ab Hæreticis: proindeque agnoscit hoc ipso, unam aliquam germinam vere extitisse. Videndi Bellarminus de scriptoribus Ecclesiasticis primi sæculi tit. de Presbyteris Achajæ, & Joannes Baptista Sollier tom. 7. Julii Bollandiani in *notis ad Martyrologium Usuardi* ab se editum, purgatumque



gatumque ab additamentis aliorum, ad diem 30. Novembris : quodque caput est, cum a nemine epistola fuerit suspicionis accusata hoc nomine, quod a discipulis S. Andræ data sit ad alias Ecclesias de rebus in ejus morte gestis docendas, ex hoc inferitur, nullum esse unquam suspicatum, fuisse alienum a primi seculi more similes litteras conscribere.

2 Hunc morem respexisse videtur Prudentius in hymno S. Hippolyti ad Valerianum Cæsaranugustanum Episcopum hymn. 11. de coronis, apud Ruinart in Act. MM. pag. 150.

*Prisco more diem, quem te quoque, sancte Magister,*

*Annua festa inter dinumerare velim.*

*Inter sollemnes Cypriani, vel Chelidoni,*

*Eulaliæque dies, currat & iste tibi.*

Sed quod caput est, exstant adhuc nonnullæ ex dictis epistolis; illa videlicet Ecclesiæ Smyrnenfis de Martyrio S. Polycarpi; illa Ecclesiæ Viennensis & Lugdunensis de Martyrio S. Potini Episcopi, & aliorum plurimorum; illa S. Dionysii Alexandrini Episcopi ad Fabium Antiochenum de Martyrio SS. Metræ, Apolloniæ, & aliorum plurimorum; illa Eucherii Episcopi ad Salvium Episcopum de Passione SS. Mauricii, & Sociorum; illa Theodori Episcopi Iconii de Martyrio S. Quirici, & ejus matris Julittæ; illa Ecclesiæ Gothicæ de Martyrio S. Sabæ; illa S. Vigili Episcopi Tridentini ad Simplicianum Episcopum Mediolanensem de Martyrio SS. Sifinnii, Martini, & Alexandri: nec epistolæ, quæ ab una ad aliam Ecclesiam trans mittebantur, in ea, ad quam trans mittebantur, Ecclesia exposcit relationis cursum sistebant; sed Ecclesia per epistolam de Martyrio admonita receptam epistolam ad alias trans mittebat Ecclesias: ideoque encyclica Smyrnenfis Ecclesiæ de S. Polycarpi Martyrio apud Euseb. lib. 4. hist. cap. 15. pag. 162. inscripta est quidem Ecclesia Philomelia, quæ forte a Smyrnenfi postulaverat, ut Acta Martyrii sibi trans mitteret, sed ad ulteriora progreditur, cum inscripta sit etiam omnibus aliis Catholicis Ecclesiis: Ecclesia Dei quæ est Smyrne, Ecclesie Dei apud Philomeliun & omnibus ubicunque terrarum sanctæ & catholica Ecclesia populis misericordia pax & charitas Dei Patris & Domini nostri Jesu Christi multiplicetur: & postquam in fine dictum est pag. 171: Hæc de Beato Polycarpo qui cum aliis duodecim Philadelphensibus apud Smyrnam Martyrio est coronatus; subditur (in eadem epistola ex edit. Usser.) Quæ vos posteaquam acceperitis, rogamus ut ad fratres ulterius positos epistolam trans mittatis: quod & illi Dominum benedicant, qui ex suis famulis quoscunque vult eligit. Ita in epistola 82. S. Cypriani, postquam is Clero suo Martyrium notificavit Xysti Pontificis, dicitur: Hæc peto per vos, & ceteris collegis vestris innotescant. Epistola autem supra citata Ecclesiæ Gothicæ de Martyrio S. Sabæ apud Ruinart. pag. 527. num. 6. scripta est Ecclesiæ Dei, quæ est in Cappadocia, & omnibus Ecclesiæ Catholicæ Christianis ubique gentium habitantibus, & in ejus fine leguntur hæc verba: Quam ob rem qua die Martyr coronatus est, sacrificantes;

*hoc reliquis fratribus nuntiate, ut in omni Catholica atque Apostolica Ecclesia exultantes collaudent Dominum, qui proprios servos suos elegit.*

3 Atque ab his epistolis tabulæ Ecclesiasticæ, quibus Martyrum natalitia conscripta habebantur, quæque *Fasti* a Tertulliano fuerunt appellatæ, suam originem habuerunt; uti erudite adnotavit Pamelius *ad epistolam* 37. *Cypriani*, interpretans illud Tertulliani *in libro de corona militis*, ubi ait: *Habes tuos Censuratos, tuos Fastos, nihil tibi cum gaudiis sæculi.* A Fastis porro Calendaria, Martyrologia, & Passionalia, de quibus alibi, ortum duxerunt.

4 Verum, si ab una ad aliam Ecclesiam epistolæ trans mittebantur, ut unaquæque certior fieret de iis, qui mortem pro Christo passi fuerant; nemo est, qui jure sibi suadere possit; consimiles epistolas ad Ecclesiam Romanam aliarum Ecclesiarum matrem, centrum Catholicæ unitatis, ad Romanum Pontificem Christi in terris Vicarium, & Apostoli Petri successorem non fuisse transmissas. S. Cyprianus litteras dedit hortatorias Moyfi, Maximo, aliisque Confessoribus Romanis, maceratis in carceribus ob Christi nomen, ut alacres essent & prompti ad superanda tormenta, & mortem subeundam; & ipsi ad illum aliam dederunt epistolam, quæ est 26., ubi hæc habent: *Ex tuis ergo litteris vidimus gloriosos illos Martyrum triumphos, & oculis nostris quodammodo celum ipsum ipsos petentes profecuti sumus, &c.* Hoc est ergo, quod & nobis animum in dies erigit, & ad consequendos gradus tantæ dignationis incendit. Contextus harum epistolarum viam sternit, ut jure ac merito existimare possimus, fuisse ad Ecclesiam Romanam transmissam notitiam eorum, qui in exteris regionibus Martyrium subibant pro Christo. Si enim Cyprianus Martyres in carceribus Romanis constitutos sedulo hortabatur, ut pro Christo libenter morerentur, verisimile admodum est, hoc ipsum etiam ab aliis factum esse; & si exteri Episcopi hortatorias dabant epistolas ad Martyres Romanos, cur, quæso, credi non potest ipsos ad Episcopos urbis Romæ, summosque Pontifices, per epistolas indicasse nomina eorum qui in suis regionibus Martyrium subibant? Epistolam S. Ignatii Episcopi Antiocheni ad Romanos principio sæculi secundi scriptam nonnulli asserunt pro comprobatione ejus rei, de qua modo dictum est. At, cum Ignatius Antiochenæ Ecclesiæ post Evodium Petri successorem Episcopus, a Trajano Imperatore tunc temporis Antiochiæ existente Romam missus, ut ibi in ludis publicis a bestiis devoraretur, dederit ad Romanos epistolam, in qua inter cetera leguntur hæc verba apud Ruinart in *A. N. M. M.* pag. 11. *Timeo charitatem vestram, ne ipsa me lædat. Vobis enim facile est quod vultis facere; mihi autem difficile est Deo potiri, siquidem vos non parcitis mihi: sensus eorum est obsecrandi, ut Romani abstinerent a largitione pecuniæ, amicorum intercessione, & ceteris, quæ passionem & Martyrium impedire possent, uti bene adnotavit Ruinart ad dictam epistolam; vel ne ad Deum preces funderent, ut feræ, a quibus mortem expectabat, mansuescerent, sicuti profequitur Tillemont*

mont tom. 2. in vita prædicti S. Ignatii art. 5. quod profecto nihil habet commune cum re, de qua nunc agitur.

5. Alii pro ea suadenda utuntur monumentis S. Dionysium Areopagitam respicientibus, ex cujus passionis Actis Hincmarus Remensis Archiepiscopus in sua epistola impressa apud Surinm ad diem 9. Octobris pag. 131. num. 5. edit. Colonien. ann. 1618. hæc habet: *Quos* (sermo est de lictoribus transmissis ad eum perquirendum) cum B. Dionysius ad fines Parisiorum appropinquare comperit, Sanctinum & Antoninum ad se accersivit, quibus præcepit, ut sermones & agones ipsius solerter intenderent; & memoria commendarent; ac quibus tormentorum generibus per passionum supplicia corporis vitam finiret, conspicientes, Romana Sedis Pontifici & Fidelibus, quos tunc ibidem invenerint (quia, unde in Orbem Christianorum persecutio procedebat, illic ardentius conflagrabat) per ordinem nuntiare quantocius studerent; eosque obnixè deposcerent, ut Atheniensem civibus ea nota facerent, quatenus & ipsi Domino pro cursu laborum ejus impleto gratias agerent, & erga cultum ejus bono animo fierent. At, cum hujus facti veritas ab Actorum sinceritate dependeat, & a quæstione satis nota de duobus Dionysiis, in qua Sirmondus in editione Conciliorum Gallie, & dissertatione de duobus Dionysiis, & Launojus quoque in libro de duobus Dionysiis, & alii, Dionysium Parisiensem Episcopum negant eundem esse cum Dionysio Areopagita, quem Episcopum Atheniensem esse volunt, quibus alii strenue se opposuerunt, & utriusque partis rationes summam referuntur a Schellstrat in 2. parte antiquitat. illustr. circa Concil. differt. 3. cap. 3. art. 3. unusquisque facile cognoscere poterit, tutumpro re fundamentum in citatis monumentis constitui non posse.

6. Saussajus epistolam ejusdem Dionysii exhibet, in qua S. Pontificem Clementem de Martyrio S. Eutropii Santonum Apostoli pie & reverenter admonet: *Eutropium, quem mecum in has oras ad prædicandum Christi nomen misisti, Martyrii coronam per manus Gentilium apud Santonas urbem vobis notificamus pro Domini Fide accepisse.* S. Gregorius Turonensis lib. 1. de gloria Martyrum cap. 56. loquitur de Martyrio S. Eutropii, quem a S. Clemente in Gallias missum ait, ut Christi Fidem annuntiaret: sed fabulosa ab Eruditis reputatur vita S. Eutropii scripta a S. Dionysio, ab eodem missa ad Clementem, quæque dicitur fuisse Constantinopoli reperta in schola Græcorum, & a Callisto II. in latinum versa, & in Gallæciam ad Ecclesiam S. Jacobi transmissa; uti videri potest apud continuatores Bollandianos ad diem 30. Aprilis. Bollandus autem, qui in præfatione generali ad vitas Sanctorum §. 2. transmissionem Actorum ad Romanum Pontificem admittit, Actorum, inquam, Martyrii eorum, qui in provinciis passi fuerant, ut in arce Religionis extarent monumenta gentium omnium Christo subjugatarum, ut gratiæ Deo pro victoria agerentur, ut Romani Pontificis examini supponerentur, ut denique facilius cum ceteris orbis Christiani Ecclesiis sortia Martyrum gesta communicarentur; quia & ipse dubitat de veritate Actorum S. Eutropii, ad suæ assertionis præsidium advocat epistolam

stolam Martyrum Lugdunensium, de qua Eusebius *lib. 5. hist. cap. 3. & 4.* Sed, cum hujus epistolæ a Martyribus Lugdunensibus ad Eleutherium Papam transmissæ solum supersit apud Eusebium fragmentum, in quo S. Irenæum tunc Presbyterum Lugdunensem enixe commendant (*Te per omnia ac perpetuò optamus in Deo valere, pater Eleuthere. Has litteras ut ad te perferret fratrem & collegam nostrum Irenæum hortari sumus. Quem quidem ut commendatum habebas regamus, utpote amulatorem Testamenti Christi. Quod si nobis compertum esset, locum cuiquam conferre iussitiam, eum tanquam Presbyterum Ecclesiæ (huic enim gradum obtinet) tibi imprimis commendassimus.*) nemo est, qui non videat, ex eo epistolæ, quod tantum superest, fragmento Martyriorum longinquorum notitiam, & Actorum transmissionem ad Romanum Pontificem sufficienter non esse probatas.

7 Cardinalis Baronius ad annum Christi 166. duas recitat epistolas Pii Papæ I. ad Iustum Episcopum Viennensem datas, in quarum altera hæc leguntur: *Attalus epistolas Martyrum portans ad nos venit, gaudium nobis inestimabile faciens de triumpho eorum. Qui dixit nobis, S. Verum, collegam nostrum, victorem de mundi Principe triumphasse. . . . Cura autem sanctorum Martyrum corpora sicut membra Dei, quemadmodum curaverunt Apostoli Stephanum . . . . Martyria sancta Spiritu Sancto proba . . . . Fratres nostri, quos per Attalum recognoscēs, de Tyranni sævitia jam liberati, requiescunt in Domino. Presbyter Pastor Titulum condidit, & digne in Domino obiit.* Ex his commercia apparent mutua litterarum inter Ecclesias de Martyribus jam probatis, & illæ præsertim ad Romanum Pontificem perferibi solitæ: illudque potissime observandum est, prudentissimum Pontificem sapienter monuisse, vera & sancta Martyria esse diligenter discernenda a falsis, & mature probanda ad regulas a Spiritu Sancto traditas: *Martyria sancta Spiritu Sancto proba.* Sunt quibus Pii epistolæ, de quibus agitur, suspectæ sunt, & hi præcipue sunt Tillemontius in *notis ad viram S. Pii I.* & Petrus Coustant tom. 1. *epistolarum Romanorum Pontificum in appendice pag. 19.* Sed quæ ab eis opponuntur, levia sunt, uti legenti patebit, & epistolarum sinceritatem Cardinales Baronius & Bona libenter admittunt.

8 Succedunt validissimæ pro assumpto argumento conjecturæ, nec positiva defunt cetera pro eo adstruendo fundamenta. Porro si a nobis demonstrabitur, ab Ecclesia Romana, & a summis Pontificibus admonitas fuisse ceteras sibi subditas Ecclesias de pretiosa morte illorum, qui in Urbe sanguinem pro Christo fundebant; unusquisque sanæ mentis admittere debet, ceteras inferiores Ecclesias, Romanam, summumque Pontificem certiorē reddidisse de illis, qui apud ipsas Martyres moriebantur. Porro id plenissime demonstratur ex Actis S. Ignatii Martyris, quæ inter sincera & selecta Acta Martyrum recensentur a Ruinart pag. 19. num. 6. Mortuus ille est Martyrio coronatus in Urbe; & Actorum scriptores, qui Martyrii fuerunt spectatores (*horum nos ipsi spectatores facti*) cuncta, quæ contigerant, exposuerunt; & vel ab illis, qui socii fuerant, vel ab Ecclesia

clesia Romana ( uti bene ponderat Bencinus *de litteris encyclicis disertat.* 2. cap. 3. §. 2. num. 8. ) ceteris Ecclesiis denuntiata sunt : vobisque diem , & tempus indicavimus , ut tempore ejus Martyrii convenientes , Athleta , & generoso Christi Martyri communicemus . Succedit epistola 3. S. Cypriani in qua respondet Presbyteris & Diaconis Romæ consistentibus , qui de Martyrio S. Fabiani ad eum litteras dederant : Cum de excessu boni Viri collega mei rumor apud nos incertus esset , fratres carissimi , & opinio dubia nuteret , accepi a vobis litteras ad me missas per Crementium Hypodiaconum , quibus plenissime de glorioso ejus exitu instruerer . Alia quoque se offert ejusdem Sancti Epistola 82. in qua ad Successum scribens notum facit , Xystum Pontificem Martyrio fuisse coronatum : Xystum autem in cœmeterio animadversum sciat is octavo iduum Augustarum die . Id factum est , postquam nuntius de ejus Martyrio venit ab Urbe , teste Pontio in vita memorati S. Cypriani num. 14. Jam de Xysto bono & pacifico Pastore , ac propere beatissimo Martyre ab Urbe nuntius venerat .

9 Confirmantur hucusque adducta ex eo , quod ab exteris scriptoribus celebrata legimus Martyria eorum , qui in Urbe occubuerant , & ab exteris monumentis propagatum extra Urbem eorum cultum deprehendimus ; quod absque dubio patefacit delatam ad remotas etiam regiones prædictorum Martyriorum authenticam ab Urbe notitiam . S. Felicitas una cum septem filiis , & S. Justinus Martyrio in Urbe coronati sunt sæculo Ecclesiæ secundo : prædictæ autem S. Felicitatis nedum mentio habetur in Martyrologio nomine Hieronymi vulgato , sed etiam in antiquissimis litanis Anglicanis inter vetera analecta Mabillonii pag. 68. Sanctique Justini Martyrium laudibus ornaverunt eodem , quo mortuus est , sæculo secundo Tatianus Assyrius in oratione contra Græcos post opera S. Justini , & S. Irenæus Lugdunensis Episcopus lib. 1. contra hæreses cap. 31. ; ineunte sæculo tertio Tertullianus in libro adversus Valentinianos ; sæculo quarto Eusebius Cæsariensis Episcopus lib. 4. hist. Eccles. cap. 16. S. Epiphanius hæresi 46. ; & exeunte sæculo quarto S. Hieronymus in catalogo scriptorum Ecclesiasticorum .

10 Sancti Laurentius , & Hippolytus sæculo tertio pro Christi Fide gloriosam mortem in Urbe subierunt ; & certamen S. Laurentii cecinit Aurelius Clemens Prudentius scriptor sæculi quarti , & illud quoque laudibus profecutus est S. Augustinus eodem sæculo in sermonibus 302. & tribus sequentibus ; & sæculo quinto Fortunatus Pictaviensis lib. 9. poemate 14. meminit basilicarum in Galliis Deo Optimo Maximo nomine S. Laurentii consecratarum , & eodem sæculo quinto S. Maximus Episcopus Taurinensis gloriosam S. Laurentii mortem debitis extulit præconiis in tribus homiliis editis in biblioth. PP. tom. 6. sicque S. Hippolytus Miles inter alios Sanctos recensetur in Calendario Carthaginiensi , quod est sæculi quinti , & quod editum fuit a Mabillonio tom. 3. veterum analectorum ; & S. Gregorius Turonensis scriptor sæculi sexti de hujus S. Hippolyti cultu loquitur lib. 1. hist. cap. 28. Prudentius , qui sub Theodosio juniore floruit , lib. 2. hymn. 11.

Hippo-

Hippolytum Martyrem Portuensem carminibus suis celebravit, cujus cœmeterium in agro Verano situm ætate sua summo opere venerabantur Romani, exterique. Cardinalis Baronius Prudentio vitio vertit, quod tres Hippolytos in unum confuderit, Episcopum videlicet Portuensem, Militem sub Valeriano passum, & demum Hippolytum Presbyterum Antiochenum, prius Novati discipulum, postea gloriosum Christi Martyrem sub Decio. Theodoricus vero Ruinartius, Sebastianus Tillemontius, Remigius Ceillierius, & alii contrariam prorsus teneant sententiam, & Prudentium ab hoc confusionis vitio vindicare conantur, dum unicum Hippolytum Presbyterum ab ipso laudatum dicunt, qui Novatianorum sectæ laqueis quondam irretitus, post eorum hæresim ejuratam, Martyrii palmam in Portu Romano adeptus est; & demum Fronto Duæus mediam inter hos secutus est sententiam, dum Hippolytum Episcopum Portuensem a Prudentio carmine laudatum censuit, quem Novati erroribus captum, & ante Martyrii coronam exsolutum tradidit. Dum hæc scribimus, typis Romanis editur erudita dissertatio de Portuensi Sede S. Hippolyti Episcopi & Martyris, in qua evincitur, Episcopum Portuensem, quem Prudentius elegantissimo carmine laudavit, ejus urbis prope Romam Episcopum fuisse.

11 S. Agnes in Urbe mortem pro Christo passa est, & nedum ejus nomen in citato Calendario Carthaginienſi repositum est: verum etiam ante tempus dicti Calendarii S. Augustinus *serm.* 273. & *serm.* 274. ejusdem Sanctæ Martyrium celebravit, & Sulpitius Severus in *vita S. Martini* testatus est, ab eo memoriam hujus glorioſæ Virginis cultam fuisse, & memoratus Aurelius Clemens Prudentius *hymno* 14. *de coronis* sanctitatem tantæ Virginis carminibus illustravit.

12 Conjecturis, & præſumptionibus positiva succedunt argumenta; quorum primum desumitur ex Actis S. Vigili Episcopi Tridentini, & Martyris, qui sæculo quarto mortuus est, apud Bollandianos ad diem 26. Junii cap. 2. num. 11. *Conscripta sunt autem gesta beati Viri ab his qui Martyrio ejus interfuerunt; gratiaque roborationis, ut mos erat, Papa Romano transmissæ, ut sacris Martyrum memorialibus infererentur: quæ suscepta venerabilis Episcopus Apostolicus, omnia digna memoria subscribens adjudicavit.* In fine autem Actorum habentur hæc verba: *Passus est tandem B. Vigilius Tridentinæ civitatis Episcopus, Martyr gloriosus, Theodosii & Honorii Augustorum regnantium tempore, Stilicone Consule urbis Romæ, nec non Hormisdæ Papæ Sedis Apostolicæ.* Codex ab Obrechtio Argentoratensis urbis generali Advocato commodatus fuit erudito viro Joanni Mabillonio, qui eum censuit bonæ notæ, & annos septingentos superare; apographum quoque a Mabillonio communicatum fuit sæpe memorato Justo Fontanino Archiepiscopo Ancyrano, ut ipse testatur in *præfatione ad novum codicem Canonizationum*; & ex illo codice clarissime infertur, non solum notitiam Martyrii accepti, sed etiam Acta ipsa Martyrii S. Vigili fuisse ad Romanum Pontificem trans-

transmissa, ut examinarentur; & cultus approbaretur. Examen defumitur ex verbis quæ suscepta venerabilis Episcopus Apostolicus, omnia digna memoria subscribens adjudicavit; & petita cultus approbatio ex aliis colligitur verbis, ut sacris Martyrum memorialibus infereretur. Cum autem hæc Actorum transmissio ad Romanum Pontificem facta sit, antiquioris consuetudinis inhærendo vestigiis, quemadmodum præferunt verba Actorum, ut mos erat; certum ex his esse videtur, tam sæculo quinto, quam aliis præcedentibus transmissa fuisse ad Romanum Pontificem Acta Martyrum, ut, prævio examine, cultus in eorum honorem vel introduceretur, vel, si jam auctoritate Episcopali esset introductus, Apostolicæ Sedis approbatione roboraretur. De his Actis S. Vigiliæ legi potest Mabillonius in præfatione ad sæculum quintum Ord. S. Bened. §. 6. num. 93. & legi etiam potest supra citatus Justus Fontanus in allegata præfatione; nec ulla de eorum sinceritate quæstio movetur a Baillet in præfatione ad vitas Sanctorum §. 4. ubi de eis loquitur.

13 Secundum deducitur argumentum ex petitione Eulogii Alexandrini facta S. Gregorio Magno, videlicet sæculo Ecclesiæ sexto. Petierat Eulogius a S. Gregorio cunctorum Martyrum gesta, quæ piæ memoriæ Constantini temporibus ab Eusebio Cæsariensi collecta erant. Pontifex Gregorius respondit, se in Romanis bibliothecis petitem opus Eusebii inquisivisse, nec invenisse, & innuit *epist. 29. lib. 8. indict. 1.* quid haberet, quod exhibere posset, nisi existimaret ab Eulogio jam haberi: Nos autem pene omnium Martyrum distinctis per dies singulos passionibus collecta in uno codice nomina habemus, atque quotidianis diebus in eorum veneratione Missarum solemnia agimus; non tamen in eodem volumine quis, qualiter sit passus, indicatur, sed tantummodo nomen, locus, & dies passionis ponitur: unde fit, ut multi ex diversis terris, atque provinciis per dies, ut prædixi, singulos cognoscantur Martyrio coronati, sed hæc habere vos beatissimos credimus. Putarunt nonnulli, Eusebium nil aliud de Martyribus scripsisse, quam quod in historia prostat; sed falluntur, cum collectionem de Martyribus separatim ab historia composuerit, in qua non nomen tantum, locus, & dies passionis indicabantur, sed Acta, locus, dies, integrum certamen, & alia ad Martyris & Martyrii notitiam pertinentia continebantur; ut solide ostendit Florentinus in *admonit. 3. de vetustioris Martyrologii vulgandi præfatio*. Vossius in *appendice ad lib. 2. cap. 17. de historicis Græcis* memoratum Eusebii librum latitare censuit in Eicuriali S. Laurentii bibliotheca; sed eruditus Holstenius oculatus testis in *epistola ad Magnum Ducem Erruræ* testatus est, in ea bibliotheca antiquissimum & pulcherrimum exemplar reperiri historiæ Ecclesiasticæ Eusebii, & fragmentum historiæ de Martyribus Palæstinæ; quod ab Hispanis aliquando habitum fuit pro illo libro, quem de Martyribus seorsum a se scriptum, non uno loco fatetur Eusebius. Historia de Martyribus Palæstinæ edita est apud Ruinart in *Actis Martyrum sinceris & selectis*; sed aliud opus Eusebianum, quod tempore

S. Gregorii Magni non inveniebatur, usque adhuc inventum non est. Veruntamen, cum ex allegata S. Gregorii epistola deprehendatur, omnium pene Martyrum nomina in uno codice fuisse collecta, & codicem in Ecclesia Romana assertum fuisse, satis hoc superque esse videtur, ut ab aliis Ecclesiis & ab aliis Episcopis delata ad eam censenda sit notitia eorum, qui in suis diocesibus moriebantur pro Christo per Actorum, vel authenticæ saltem epistolæ transmissionem, ut Apostolico munimine cultus eorum introduceretur, aut introductus confirmaretur.

14. Quod si adversus hucusque adducta aliquis audacter opponeret, narrata per S. Gregorium Magnum de codice, in quo omnium pene Martyrum nomina continerentur, & de quotidiana eorum memoria in sacrificio Missæ, non bene cohærere cum Calendario Bucheriano, quod ad tempora Papæ Liberii, idest ad medium sæculum quartum refertur, in quo paucorum Martyrum nomina continentur; sciat, Dodvvelum heterodoxum ab istiusmodi Calendariis argumentum deduxisse pro adstruenda somniata Martyrum paucitate. Præterquamquod autem magna nostrorum Martyrum multitudo satis aperte demonstratur auctoritate Eusebii l. 8. c. 6. qui loquens de persecutione Diocletiani, ait: *Cum innumerabilis ubique hominum multitudo custodia manciparetur, & carcer. olim homicidis, & sepulcrorum expilatoribus deputati, tunc Episcopis, Presbyteris, Diaconis, Lectoribus, atque Exorcistis complerentur, adeo ut iis, qui ob crimina condemnati fuerant, nullus jam locus superesset; & de gestis post secundum edictum subdit: Vix jam iniri numerus potest omnium, qui deinceps in singulis provinciis passi sunt Martyrum, ac præsertim eorum, qui per Africam, & Mauritaniam, per Thebaidem, & Ægyptum sunt interfecti: S. Gregorii assertio, congestis undique per eruditos viros argumentis, ab opposicione vindicatur. Legi potest egregius vir Ludovicus Antonius Muratorius pag. 200. tom. 2. anecdot. erutorum ex bibliotheca Ambrosiana, ubi non solum assert testimonium S. Leonis Magni, qui in serm. 1. de natali Apostolorum ait: Unde duo ista præclara Divini sermonis germina in quantam sobolem germinarint, beatorum millia Martyrum protestantur, qui Apostolicorum annuli triumphorum Urbem nostram purpuratis, & longe lateque rutilantibus populis ambierunt, & quasi ex multarum honore gemmarum conferta uno diademate coronarunt; itemque S. Paulini, & Prudentii; sed etiam indicem profert oleorum, sanctorumque Martyrum, quorum corpora S. Gregorii Magni temporibus Romæ quiescebant, qui in museo Septaliano Mediolani latitabat scriptus papyro Ægyptiaco, & cujus meminerat Mabillonius in suo itinere Italico. In eo autem, quod attinet ad paucos Martyres in Calendario Romano supra citato memoratos, a peritis viris jam adnotatum est, Kalendaria a Martyrologiis differre, cum in Martyrologiis omnium Martyrum, sed in Calendariis eorum tantummodo Martyrum nomen indicetur, qui in ea Ecclesia particulari, ad quam pertinebat Kalendarium, annua festivitate celebrabantur. Sozomenus lib. 5. cap. 3. scribens de*

Gaza,



Gaza, & Constantia Palæstinæ civitatibus, viginti tantum stadiis inter se diffitis, & communem rempublicam habentibus, inquit: *Utraque enim suum seorsum habet Episcopum, suum Clerum, dies item festos Martyrum suorum, & commemorationes Episcoporum, qui ipsi prefuerunt. Rursus Kalendarium Mabilloniani titulus hæc habet: Hic continentur dies natalitiorum Martyrum, & depositiones Episcoporum, quorum Ecclesia Carthagenensis amiversaria celebrat. Differentiam denique inter Martyrologia, & Kalendaria late exponit Pagi senior ad annum Christi 64. num. 6. Verum hæc Kalendaria longe a Martyrologiis differunt; singula enim Ecclesiæ, ut dixi, sua habuere Kalendaria, in quibus digesta erant nomina Episcoporum, & Martyrum, diesque notati, quibus memoria eorum anniversario cultu celebraretur; Martyrologia vero non imius loci propria, sed totius Ecclesiæ fuere communia, quippe quæ totius orbis Martyres, Confessoresque generaliter continerent; & in Kalendaris quidem nomen urbis nunquam adscribitur, cum in usum duntaxat unius Ecclesiæ comparata sint; at in Martyrologio nomina singularum urbium, & oppidorum adscribuntur, propterea quod ad usum totius Ecclesiæ institutum est. Addit Ruinart in præfatione generali in Acta Martyrum §. 2. num. 17. memoratum Kalendarium Bucherianum ad solam Ecclesiam Romanam spectasse, & ad ejus festivitates, & aliquorum etiam Martyrum nomina in eo desiderari, qui Martyrium in Urbe receperant; quod contigisse putat aut propter eorum multitudinem, aut quia eorum nomina ignorabantur: Bucherianum quippe ita *Romane Ecclesiæ proprium fuit, ut, cum S. Cypriani nomen profert, statim subjiciat locum, ubi Roma ejus festivitas celebratur, Roma celebratur in Callisti; unde liquet, de iis tantummodo Martyribus in eo agi, quorum festivitas in aliquibus Urbis titulis, aut ecclesiis colebatur; Et num. 18. Porro adeo externarum regionum Martyres in ejusmodi fastis locum non habebant, ut aliquos etiam ex iis ipsis, qui in eadem Urbe, ubi hæc consecuta sunt, Martyrium compleverant, desiderarentur; quod ob ingentem eorum multitudinem evenisse arbitramur, aut certe quod ob persecutionis fervorem plerorumque Martyrum nomina, aut sepulcra tunc ignorarentur. Unde merito vir doctus Pater Joseph Augustinus Orsi in sua dissert. apolog. adversus Samuelem Basnagium pro SS. Perpetua, Felicitate, & Sociis Martyribus gloriatur, solis illis, & Cypriano ex Martyribus exteris locum datum fuisse in Kalendario Bucheriano: In antiquissimis Kalendaris suos duntaxat, paucis exceptis, aut finitimarum provinciarum unaquæque Ecclesia Martyres exhibet; & paulo inferius: Sed, ut ad Perpetuam, & Felicitatem redeamus, quisquam ne ibit inficias, dandum id esse earum famæ, atque celebritati, quod sola cum Cypriano ex Africanis, immo & aliarum provinciarum Martyribus in Romano Kalendario locum habuerint præcis illis temporibus, quibus unaquæque Ecclesia suis contenta Martyribus, exterorum Martyrum solemnitates non nisi rarissimas adscisciebat? Quocirca, si Bucherianum Kalendarium eorum tantum Martyrum nomina exhibet, quorum festivitas annua celebritate in aliquibus Urbis titulis, aut ecclesiis colebatur, bene cohæreere potest cum assertionem Magni Gre-**

gorii de codice, in quo omnium fere Martyrum nomina continebantur, & quorum quotidiana fiebat in Missa commemoratio. De hac commemoratione loquitur S. Augustinus *serm.* 159. alias 17. *de verbis Apostoli* ubi ait *cap. 1. tom. 5. Habet Ecclesiastica disciplina, quod Fideles noverunt, cum Martyres eo loco recitantur ad altare Dei, ubi non pro ipsis oratur: pro ceteris autem commemoratis defunctis oratur. Injuria est enim pro Martyre orare, cujus nos debemus orationibus commendari.* Particulares autem Martyrum festivitates, & annuæ solemnitates ultra Missæ celebrationem multa alia complectebantur, recitationem videlicet passionis, uti supra videtur, & hymnorum, psalmodiarumque cantum. Alia item plura peragebantur, de quibus in hujus operis decursu habebitur sermo.

15 Pro comprobanda Actorum transmissione ad summum Pontificem, ut cultus in honorem Martyrum aut introduceretur, aut introductus confirmaretur, ponderatione digna videntur ea, quæ habentur apud S. Gregorium Turonensem, qui obiisse dicitur anno 595. *lib. 1. de gloria Martyrum cap. 51. pag. 782., & cap. 64. pag. 794.* S. Benignus, cujus festum celebratur die prima Novembris, discipulus fuit S. Polycarpi, & Martyrio coronatus est sub Marco Aurelio sæculo Ecclesiæ secundo. Describitur a S. Gregorio Turonensi *in allegato cap. 51. cultus, qui S. Benigno exhibebatur.* In eodem capite refertur, S. Gregorium Episcopum Lingonensem, qui eodem sæculo sexto floruit, cum nonnullis interfuerit Conciliis dicto sæculo habitis, basilicam in ejus honorem ædificasse (*de qua in spicilegio Acheriano pag. 353.*) sed tantum, postquam Acta passionis fuerant ex Italia allata, & S. Benigni intercessione Deus nova miracula patraverat: *Post paucos autem annos ab euntibus in Italiam passionis ejus historiam adlatam beatus Confessor accepit, sed & deinceps S. Martyr multis se virtutibus manifestavit in populis; nec moratus, super cryptam illam basilicam magnam jussit ædificari.* De cujus veritate facti nemo est qui dubitet, cum tota controversia in hoc sita sit, an Acta, quæ nunc supersunt, ea sint, quæ ex Italia ad sanctum Episcopum Lingonensem delata sunt, non autem, an in substantialibus fide digna sint; Tillemont *tom. 3. monuments. Eccles. in not. ad vitam S. Benigni, nota prima, Baillet in notis criticis ad eandem vitam num. 3.* Pro hoc eodem assumpto considerari possent narrata ab eodem S. Gregorio Turonensi *in historia Francorum lib. 10. cap. 31. num. 4.* de S. Briccio Episcopo Turonensi, quem nonnulli docent Romam venisse, ut sibi potestas fieret ædificandi basilicam super corpus S. Martini. Sed hoc mittamus, cum Gregorius nihil aliud referat, quam a Briccio Roma reduce ædificatam fuisse ecclesiam super corpus S. Martini: *Briccius vero septem apud Papam Urbis annis degens, idoneus inventus a crimine ad urbem suam redire jussus est. Hic ædificavit basilicam parvulam super corpus B. Martini.* Facto S. Benigni aliud simile factum habetur S. Patrocli Martyris, de quo idem S. Gregorius Turonensis *lib. 1. de gloria Martyrum citato cap. 64.* De tempore passionis hujus Sancti incertum est Eruditorum judicium, cum nonnulli eam refe-

referant ad annum 259. nonnulli ad annum 273. & alii ad quartum Ecclesiæ sæculum. Probabiliter existimari potest, ea, quæ infra narrabuntur, contigisse anno 539. quo Theudebertus, seu Theodebertus Gallorum Rex in Italiam venit, uti narrat idem S. Gregorius Turonensis *hist. Francorum lib. 3. cap. 32. pag. 133.* Id autem, quod contigit, est, noluisse Episcopum fidem adhibere Clerico multa de S. Patrocli passione ex quadam historia narranti, & dictis tantum assensum præstitisse, cum historia passionis ad se fuisset ab Italia delata, quæ conformis erat historiæ penes Clericum esistenti, ædificatamque statim fuisse ecclesiam super ejus corpus, & festum per singulos annos celebratum: *At ille non credens, nisi confitum astimans, casum, increpatum Clericum abscedere jubet, dicens: Te hac juxta votum tuum dictasse manifestum est; nam nunquam ea cum ullo homine reperisti. Post multum vero tempus, ut virtus Martyris non esset occulta, abiit exercitus in Italiam, & detulit passionis hujus historiam, sicut a Clerico tenebatur scripta: tunc confusus valde Episcopus cognovit vera esse, quæ a Clerico dicebantur, populus autem ex hoc magis honorare cepit Martyrem, constructaque super eum basilica, festivitatem ejus per singulos annos devote concelebrat.* S. Patrocli festum celebratur die 21. Januarii, ejusque nomen prædicta die memoratur in Martyrologio Romano; Cardinalis autem Baronius in notis ex S. Gregorio Turonensi narrat, & admittit ea, quæ supra dicta sunt. Et quamvis Baillet in vita S. Patrocli audacter asserat, tam Episcopum Lingonensem, quam Gregorium Turonensem a Clerico fuisse deceptos, utpote qui nedum primam S. Patrocli, sed etiam secundam pro adstruendo S. Patrocli cultu composuit, aut componi curavit historiam; nemo tamen cordatus poterit huic audacissimo, & recentissimo dicto assensum præstare, contempta antiquorum & sanctorum virorum auctoritate, quæ historiarum prædictarum somniatæ confictioni adversatur.

## C A P U T V.

*De Confessoribus, & eorum Cultu.*

**C**onfessorum nomine, juxta præsentem loquendi modum, uti supra visum est, comprehenduntur illi, qui post virtutum heroicarum exercitium, in pace mortui sunt, morte eis a Tyranno nullatenus inflicta. Sumpto itaque Confessorum nomine hoc modo, de eis, & de eorum cultu agitur in præsentem.

2 Certum esse videtur, primis etiam Ecclesiæ sæculi multa cum laude de illis Patres locutos fuisse. Inquit etenim S. Cyprianus in libro de zelo, & livore col. 509. *Non enim Christiani hominis corona una est, quæ tempore persecutionis accipitur: habet & pax coronas suas, quibus de varia & multiplici congressione victores, prostrato & subacto adversario, coronantur. Libidinem subegisse, Continentia palma est. Contra iram, contra injuriam repugnasse, corona Patientia*

*Patientia est. De avaritia triumphus est, pecuniam spernere. Laus est Fidei, fiducia futurorum, mundi adversa tolerare. Sanctus autem Ilidorus Hispalensis sæculi sexti scriptor lib. 7. originum cap. 11. eos inter Martyres recenset: Duo autem sunt Martyrii genera, unum in aperta passione, alterum in occulta animi virtute; nam multi hostis insidias tolerantes, & cunctis carnalibus desideriis resistentes, per hoc quod se Omnipotenti Deo in corde mactaverunt, etiam pacis tempore Martyres facti sunt, qui, etiamsi persecutionis tempus existeret, Martyres esse potuerunt: quod desumptum videtur ex spuris S. Joannis Chrysostomi in psalm. 95. num. 6. tom. 5. Martyrium, fratres, non eventu tantum æstimatur, sed etiam proposito.*

3 Verum, quidquid sit de his, incertum admodum est, quo præcise tempore horum Confessorum coeperit cultus in Ecclesia; teste Cardinali Bellarmino lib. 6. de Eucharistia, vel 2. de Missa cap. 20. num. 5. tom. 3. contr. 3. ubi inquit: Certum est, Martyres coepisse publice invocari, & eorum nominibus dies festos coli, & basilicas erigi ab initio plane Ecclesie; Confessores autem multo serius hunc honorem in Ecclesia meruisse. Sed, si aliis adhærere velimus, concors esse videtur eorum sententia, hujus disciplinæ initium ad sæculum quartum esse referendum. Agmen ducit Innocentius III. lib. 3. de mysteriis Missæ cap. 10. ubi ait: Ecclesia verò post tempus B. Silvestri coepit sanctorum Confessorum memoriam venerari; & B. Silvester quidem non ante sæculum quartum summus Pontifex factus est. Sequitur Cardinalis Bona rerum liturgicarum lib. 2. cap. 12. num. 3. ubi testatur, monumenta Ecclesiastica trium primorum Ecclesie sæculorum de cultu Confessorum silere. Mabillonius in præfatione ad sæculum quintum Ordinis S. Benedicti §. 6. num. 97. hæc habet: Ut Martyribus, sic etiam Confessoribus bonos publico cultu delatus ab Ecclesia est, id fieri coeptum sæculo quarto. Et Justus Fontaninus Archiepiscopus Ancyranus in præfat. ad novum codicem Canonizationum ita scribit: Hunc enim solemnem & maximum honorem in Ecclesia militanti quatuor primis Christi Domini sæculis in unos Martyres præ ceteris collatum fuisse, veterum Patrum scripta testantur. Sæculo deinde quarto Confessoribus quoque tribui coepit. Concordat Durant. de ritibus Ecclesie lib. 2. cap. 35. Et quamvis in Concilio Romano anni 597. cujus Acta legi possunt apud Labbè tom. 5. Conciliorum col. 1198. & 1199. extet decretum S. Gregorii Papæ, ut plebem coeciret, quæ in colendis summis Pontificibus recens defunctis nimis facilis erat, & de qua timeri poterat, ut non tam consilio, quam impetu quodam pio & reverentia dignitatis magis, quam prudenti æstimatione Sanctitatis, in ea obsequia prorumperet: Sicut indignas nos pro B. Petri Apostoli reverentia mens Fidelium veneratur, ita nostram infirmitatem decet semetipsam semper agnoscere, & impense sibi venerationis onera declinare: ex amore quippe Fidelium hujus Sedis Recloribus nos ultra meritum erupit, ut cum eorum corpora humanda deferuntur, hæc dalmaticis contegant, easdem dalmaticas pro Sanctitatis reverentia sibi met partendas populus scindat; & cum adsint multa a sacris corporibus Apostolorum, Martyrumque velamina, a peccatorum corpore sumuntur, quod

quod pro magna reverentia reservatur. De qua re presenti decreto constituo, ut pberetrum, quo Romani Pontificis corpus ad sepeliendum ducitur, nullo tegmine veletur. Quam decreti mei curam gerere Sedis hujus Presbyteros ac Diaconos cenſeo. Si quis vero ex eorum ordine hac curare neglexerit, anathema sit; & responderint omnes: anathema sit: ex cujus decreti verbis inferri posse videtur, nondum tunc temporis datum fuisse initium cultui Confessorum, facta videlicet a S. Gregorio mentione Apostolorum tantum, & Martyrum, nec ullo modo Confessorum; id tamen non obstat initio cultus Confessorum, quod sæculo iv. adscripsimus: vel quia causam decreti Cardinalis Baronius repetit ex impenſo studio humilitatis, qua S. Gregorius cultum ab se omnem post obitum avertere conabatur; vel quia, si manus admoveatur ad libros dialogorum ejusdem Sancti, quos circa annum 543. elucubravit, ut probat auctor præfationis ad eosdem dialogos in nova Parisiensi editione, unusquisque facili negotio deprehendere poterit, eos, de quibus in dialogis differit, maximam partem Confessores esse, quorum alii uno, vel altero sæculo prius, nonnulli paulo ante ipsum Gregorium floruerunt, & eosdem, cum hæc scriberet, non uno in loco significare Sanctorum honoribus publice fuisse exornatos, uti desumitur ex lib. i. cap. 14. & fusius ex lib. 3. cap. 15. ubi narrat, Euthicium sanctissimum Monachum tanta apud Nursiæ populos in veneratione post mortem fuisse, ut quoties pluvia decrat, & astu nimio terram longa siccitas exurebat, collecti in unum cives urbis illius, ejus tunicam levare, atque in conspectu Domini cum precibus offerre consueverint. Cum qua dum per agros pergerent exorantes, repente pluvia tribuebatur.

4. Initio cultus Confessorum sæculo iv. suffragantur monumenta quocumque & illationes, quæ fiunt a viris antiquarum Ecclesiæ rerum peritissimis. Monumenta dico sæculi iv. Sanctus enim Hieronymus in vita S. Hilarionis num. 31. tom. 2. refert, S. Antonium jussisse, ut sibi pararetur sepultura in loco ignoto, ne Pergamius vir dives ædiculam super corpus suum faceret ædificari: Causam occultandi juxta præceptum Antonii fuisse referentes, ne Pergamius, qui in illis locis ditissimus erat, sublato ad villam suam Sancti corpore, martyrium fabricaretur. S. Hilarion Antonii discipulus, dum in Cypro versaretur, mortuus est, & ab Insulæ indigenis tumulo conditus, magno in honore ac veneratione habitus fuit; cumque Hefychius ipsius discipulus Reliquias ejus Palæstinam deportasset, & in suo monasterio sepelivisset, ab eo tempore dies festus maxima hominum frequentia, & summo splendore quotannis ab indigenis celebratus est, teste Sozomeno lib. 3. cap. 14. Et sub idem tempus cum Nilammon perfectæ vitæ Monachus spiritum Deo reddidisset, dum, impetratis unius diei induciis ad deliberandum de acceptando Episcopatu Gerarum sibi oplato a Theophilo Alexandrino, preces ad Deum fundebat; testatur idem Sozomenus lib. 8. cap. 19. super ejus sepulcrum fuisse ab indigenis constructum templum, & ex tunc morem invaluisse, diem ejus mortis magna cum solemnitate celebrari: quartoque eodem labente sæculo Gregorius Nissenus Basilii,

Basilii, & Gregorius Nazianzenus Athanasii laudes die obitus eorum anniversaria celebrarunt. S. Ephrem Syrus vitam hanc mortalem clausit an. 378. Videre est hujus Sancti celebre testamentum apud Bollandum *ad diem 1. Februarii*. In eo testamento ibidem per capita distributo *cap. 2. num. 5.* sic fratres moriturus rogat: *Ne sinatis me in domo Dei poni, aut sub altari*: Et num. 6. *Attendite, fratres mei carissimi, & viscera desiderata, ne pannos meos velut Reliquias, monumenti gratia tollatis*. S. Gregorius Nissenus, quem mors abstulit anno 394. orationem exaravit de laudibus S. Ephremi, in qua de ejus cultu fert testimonium *pag. 1029. tom. 2.* Quapropter cum ita circulus ferat anni, ut hodie collaudandus ac celebrandus sit nobis S. Ephrem; & antea prämiserat *pag. 1028* hujusce cultus consuetudinem jam esse introductam: Cum ergo ea Ecclesie nostrae consuetudo sit, atque institutum, ut virtutis cultores, propterea quod ejus partes amplexi sint, coronentur &c.

5 Et, si his, quæ in Oriente contigerunt, aliqua ex Occidente superaddenda sint, obiit eodem sæculo 1v. Martinus Turonensis, & Severus Sulpitius *epist. 2.* cum parem Martyribus prædicavit: *Nam, licet ei ratio temporis non potuerit præstare Martyrium, gloria tamen Martyris non carebit, quia voto, atque virtutibus & potuit esse Martyr, & voluit*. Ejus quoque festivitas statim coli coepit; ideoque solus ex Confessoribus Officium proprium habet in vetustissimis Breviariis, teste Cardinali Bona *rer. liturg. lib. 2. cap. 12. num. 3.* cui adhæret Martene *de antiquis Ecclesie ritibus tom. 4. cap. 30. num. 3.* Quocirca Concilium Turonense primum habitum anno 461. (*tom. 2. Harduini col. 793.*) loquitur de celebritate S. Martini tamquam jam antea introducta & vulgata: *Cum ad sacratissimam festivitatem, qua Domui Martini receptio celebratur in civitate Turonorum, beatissimi Sacerdotes .... convenissent, hoc est, ad translationem corporis ipsius a Candarenſi pago ad Turonensem Ecclesiam, cujus fuerat Antistes. Quærit Thomassinus de festis lib. 1. cap. 6. num. 10. utrum prior fuerit cultus S. Hilarii Pictaviensis in Ecclesia Pictaviensi, an cultus S. Martini in Turonensi, & sic respondet: Unius Hilarii solemnitas in Ecclesia Pictaviensi cum S. Martini festo die in Turonensi de antiquitatis gloria certare posset; attamen S. Martinus aliis quibuscvis Confessoribus, quos Ecclesia universa solemniter coluit, palmam præripit; nam provincia plurima, ac regna illius solemnitatem celebrarunt: aliorum dioceses quædam, quibus præfuerant. Et profecto initio sæculi v. Symmachus Papa in Urbe ecclesiam dedicavit in honorem S. Martini. Joseph Blanchinus, Francisci Blanchini magni nominis inter Eruditos viri nepos qualibet laude dignus in prolegom. ad tom. 4. Anastasii pag. lxxix. e codice Veronensi monumentum edidit pertinens ad vitam Symmachi, quod jam vulgaverat in enarrat. Pseudo-Athanasiana in symbolum edita Verone ann. 1732. in cujus fine habentur hæc verba: Hic B. Martini ecclesiam juxta S. Silvestrem Palatini illustris viri pecuniis fabricans, & exornans, eo ipso instante dedicavit. In vetustissimo Missali Francorum apud venerabilem Dei servum Cardinalem Thomafium in lib. Sacrament. extat Missa S. Hilarii Pictaviensis, de quo Missali*

Missali ita loquitur Morinus *de sacris Ordinationibus part. 2. pag. 212. Itaque mihi videtur codex ille post annum 511. sed ante annum 560. in Gallia scriptus*. In Missali vero Mozarabico edito per Cardinalem Ximenum, cujus usus, si additamenta posteriora demperis, ante ætatem quoque S. Isidori Hispalensis vixit non in Hispania modo, sed in aliis etiam regnis, extat antiquissima Missa S. Martini Turonensis, quam inde magna ex parte exscripsit Cardinalis Bona *rer. liturgic. lib. 1. cap. 12.* Ætatem suam Missa ipsa significat his verbis, quæ leguntur in oratione post nomina, atque ita se habent: *Hunc etiam virum, quem Celicolis admirandum, Martyribus adgregatum, ætatis nostræ tempora protulerunt, jubeas auxilium nostris ferre temporibus*. Paucis ergo post obitum Martini annis Missa hæc composita est, & sic initio sæculi v.; liceatque obiter adnotare, Auctorem præfationis ante Canonem recitandæ apologiam quamdam perstruere voluisse, qua iis satisfaceret, si qui forte miraturi essent, quod ritus Missæ in honorem institueretur ejus viri, qui Martyr minime fuisset: tota enim in eo præfatio versatur, ut Martinum æquiparet Martyribus, ostendatque, non defuisse illi genus quoddam Martyrii, & præterea omnia adfuisse necessaria, ut ei licet Confessori cultus exhiberetur: *Hinc ergo inter Istos jussu numerandum, testantur facta per seculum signa post transitum, opera dum vixit mirabilia post recessum*.

6 Suffragantur quoque illationes eruditorum supra memoratæ. In Canone quippe Romano Missæ, post B. Virginem & Apostolos, Martyres duodecim nominantur, nec ulla fit mentio Confessorum, non nisi quia Canon Missæ, qui constat ex verbis Domini, ex Apostolorum traditionibus, & ex SS. Pontificum institutionibus, quemadmodum colligitur ex Concilio Tridentino *sess. 22. cap. 4.* antiquior est sæculo iv. quo publicus Confessorum cultus incepit; teste supra citato Cardinali Bona, qui *lib. 2. cap. 12. num. 3. ait: In Canone Romano, post B. Virginem & Apostolos, Martyres duodecim nominantur. Confessorum nulla fit mentio, vel quia Martyres passionem, & mortem Domini, qua in hoc sacrificio representatur, effuso sanguine, imitati sunt; vel quia Canon editus est, antequam Confessorum memoria celebraretur, de quibus silent tribus prioribus sæculis Ecclesiastica monumenta*. Confessorum fit commemoratio post Martyres in Canone Missæ ab Ambrosianis, & etiam olim fiebat a plerisque aliis, de quibus apud eundem Cardinalem Bonam, & apud Martene *de antiq. Eccl. rit. lib. 1. art. 8. num. 25.* Sed hæc sunt, & fuerunt particularium Ecclesiarum additamenta, cum Ordo Romanus eos tantum Martyres admiserit, qui in hodierno Canone sunt, Confessoribus semper exclusis. Juxta ritum Mozarabico modo memoratum, præmissa commemoratione B. Virginis, Zachariæ, Joannis, Infantium, Petri, Pauli, & reliquorum Apostolorum, & Evangelistarum, & omnium Martyrum, ait Sacerdos: *Item pro spiritibus pauperum, & recitat nomina Hilarii, Athanasii, & aliorum plurimorum, quorum nonnulli in album Sanctorum relati sunt, alii autem minime; quibus reci-*

F

tatis,

tatis, ait chorus: *Et omnium pausanium*; uti legi potest apud modernum Le Brun *tom. 2. explicat. Missæ*, ubi late exponit liturgiam Hispanicam Mozarabum. Supra dictum est, ritum eum esse antiquiorem S. Isidoro Hispalensi, quidquid nonnulli asseruerint eum adscribentes aut prædicto S. Isidoro, aut S. Ildefonso, de quibus apud Clericum *de sacrif. Missæ decis. 9. num. 26. & seqq.* Ipforum enim assertum validissime impugnatur a Natali Alexandro *ad sec. 7. cap. 4. art. 8.* Et quamvis certum ejus initium ignoretur, ex supradicta tamen oratione ejus initium adscribendum videtur illi ævo, quo solis Martyribus sollemnis cultus concedi solebat: nulum enim tunc quoad Confessores discrimen erat inter illos, qui postea Sancti declarati sunt, & alios, quibus hic titulus nunquam tributus fuit: cumque proinde eo tempore par esset utrorumque causa, nec Ecclesia adhuc declarasset, quemquam ex illis æterna frui Dei visione; pro omnibus indiscriminatum preces & sacrificia offerebantur, uti prosequitur sæpe citatus Cardinalis Bona *lib. 2. cap. 14. num. 4.* non attentis iis, quæ supra dicta sunt de Missa S. Martini, quæ extat in Missali Mozarabo; cum ea posterioribus temporibus, & longe post ejus initium in eodem fuerit reposita; quemadmodum & alia addita fuisse a SS. Leandro, Isidoro, Ildefonso, & Juliano, Natalis Alexander fatetur *loco citato*. Post introductum autem cultum Confessorum, nonnullæ Ecclesiæ phrasæ inveniuntur, quibus sacrificium pro illis dicitur offerri: *Annuere nobis, Domine, ut anima famuli tui Leonis hac profit oblatio*; consimileque illud, quod legitur in precatione Vullelmi Abbatis S. Gregorio VII. exhibita, & edita a Mabillonio *in analectis tom. 1. pag. 281.* in qua oratur pro animabus S. Augustini, & S. Monicæ ejus matris: qui quidem dicendi modus ab Innocentio III. explicatur in *cap. Cum Martha. De celebratione Missarum*, ut profit illis ad honorem, hoc est, ut magis a Fidelibus glorificentur.

7 In Concilio Moguntino anni 813. *tom. 4. Hard. col. 1015. canon 36.* ita loquitur: *Festos dies in anno celebrare sancimus, hoc est, diem Dominicum Pascha cum omni honore, & sobrietate venerari; simili modo totam hebdomadam illam observari decrevimus. Diem Ascensionis Domini pleniter celebrare. Item Pentecosten similiter, ut in Pascha. In Natali Apostolorum Petri, & Pauli diem unum. Nativitatem S. Joannis Baptista. Assumptionem S. Maria. Dedicationem S. Michaelis. Natalem S. Remigii, S. Martini, S. Andrea. In Natali Domini dies quatuor, Octavas Domini, Epiphaniam Domini, Purificationem S. Maria, & illas festivitates Martyrum, vel Confessorum observare decrevimus, quorum in unaquaque parochia sancta corpora requiescunt, similiter etiam Dedicationem templi.* Canon hic Conciliaris animadvertitur a Thomassino in suo opere supra citato *de diel. fest. celebrat. lib. 1. cap. 6. num. 11.* ubi asserit, primam hanc esse constitutionem generalem pro Confessorum cultu, cum antea eorum cultus inniteretur moribus, & decretis particularium Ecclesiarum. Sed hunc eruditum virum existimarem non bene fensisse. Inter hæreticos etenim condemnatos in Synodo Atrebatensi an. 1025.



tom. 13. *spicileg. Acheriani* cap. 11. illi recensentur, qui assererent, solis Apostolis, & Martyribus venerationem ab Ecclesia esse impendendam, exclusis Confessoribus: *Sed non idcirco ab hominibus injuste venerantur* (uti loquuntur Synodi PP. de Confessoribus) *quia percussoris gladium non senserunt. Verum si ratio temporum non potuit prestare Martyrium, gloria tamen Martyrum non caret, quia & voto & virtute, & potuerunt esse Martyres & voluerunt . . . . quia Martyrium non solum effusione sanguinis, sed abstinentia peccatorum perficitur.*

8 De initio cultus Confessorum tractat nonnulli ex his, qui de SS. Canonizatione volumina ediderunt. *Victon. cap. 5. & cap. 6.* agit de hac controversia, & concludit, veram esse assertionem Innocentii III. supra relatam, ordinarie loquendo; sed nonnullis SS. Virginibus, & Confessoribus solemnem, publicumque Ecclesiasticum cultum fuisse exhibitum tempore Pontificatus S. Silvestri. Auctor tractatus de Canonizatione ad Cardinalem Montis Regalis 3. part. cap. 7. disputata in partes quaestione, ita concludit: *Ergo constat, ab initio Ecclesia etiam Confessores Sanctis fuisse adscriptos; sed tamen solum Martyrum ratio haberi videtur, tum quia horum sunt magni exercitus, illi paucissimi, tum quia illi sunt celebriores ob gloriam confessionis, & sanguinis pro Christo effusi; unde Martyrologia ab ipsis dicta sunt, & Eusebius historias Martyrum scripisse dicitur.* Qui quidem Auctores, ut probent id, quod contendunt, nonnulla proferunt de cultu primis Ecclesiae saeculis exhibito B. Virgini Mariae, SS. Joanni Evangelistae, & Lucae, nec non SS. Annæ, & Joseph. Verum, prætermisso examine initii cultus SS. Annæ, & Joseph, de quo alibi habebitur sermo, & prætermisso quoque historiarum examine, ex quibus suas supradictas modo memorati DD. depromunt assertiones, præsens quaestio non respicit cultum B. Virginis, nec Apostolorum, nec Martyrum, sed aliorum, qui post heroicarum virtutum exercitium in Domino mortui sunt, morte illis a Tyranno nullatenus inflicta: in quo rerum themate extranea sunt exempla cultus B. Virginis, & SS. Joannis Evangelistae, & Lucae. Per Beatissimam etenim Virginem omnes Auctorem vitæ suscipere meruimus, & ejus cultus adeo celebris erat in Ecclesia ante saeculum IV., ut coacta fuerit coercere immodicum cultum eorum, qui illi tamquam Deæ sacrificium offerebant; teste S. Epiphanio *heresi* 79. ubi dictum errorem refellit, sæpius repetendo: *Sit in honore Maria, Dominus adoretur*; & S. Irenæus saeculi II. scriptor *lib. 5. advers. heres. cap. 19. num. 1.* de Heva, & Maria sic loquitur: *Esti ea (Heva) inobedierat Deo, sed hac (Maria) finis est obedire Deo; uti virginis Heva virgo Maria fieret advocata. Et quemadmodum adstrictum est morti genus humanum per virginem, salvatur per virginem.* Sanctus porro Hieronymus seu, ut aliqui putant, Fulbertus Carnotensis hæc habet in *serm. de assumpt. Mariae* cap. 1. pag. 110. tom. II. oper. S. Hieron. *Neque enim dubium est, illam, quæ meruit pro liberandis ferre pretium, posse impartiri suffragium liberatis.* *Nostra inter hæc oratio jugis ad Dominum dir-*

gatur. De S. Joanne Evangelista Christus Dominus prædixerat, ab eo bibendum esse calicem passionis: quocirca non inter Confessores, sed inter Martyres est recensendus, licet in pace quieverit, & ex serventis olei dolio, in quod fuerat immixtus, Divina protegente gratia, incolumis evaserit; ut in re simili bene ponderat S. Cyprianus (*epist. § 8. ad Lucium Papam Romanum reversum ab exilio*): *Neque enim in tribus pueris minor fuit Martyrii dignitas, quia, morte frustrata, de camino ignis incolumes exierunt. Aus non consummatus Daniel extitit in suis laudibus, quia, qui leonibus missus fuerat ad prædam, protectus a Domino vixit ad gloriam. In Confessoribus Christi dilata Martyria non meritum Confessionis minuunt, sed magnalia Divina protectionis ostendunt: ideoque Eusebius, & alii antiquiores eum Martyrem appellant, teste Tillemont in ejus vita art. 5. De Sancto denique Luca non desunt, qui eum recentent inter Martyres, & signanter S. Gaudentius Brixienfis, qui in fine sæculi IV. vivebat, quique per longum temporis spatium in Oriente suerat versatus. Alii hoc idem asserentes referuntur a Tillemont in vita S. Luca. Sed, cum certum non sit, eum Martyrem mortuum fuisse, satis erit ad rem, de qua agitur, scire, eundem a Græcis & Latinis titulo Apostoli decorari, & quæstionem de initio cultus Confessorum nihil habere commune cum cultu B. Virginis, & Apostolorum: communi quippe omnium Ecclesiarum consensu in ipso Ecclesiæ principio cultus tum B. Virgini, tum Apostolis delatus est; uti ponderat Mabillon in pref. ad sæc. 5. Ord. S. Benedicti §. 6. num. 92. Acta SS. Virginum Pudentianæ & Praxedis, patrisque ambarum Pudentis extant tom. 4. Maji Bollandiani pag. 299. Ipse Actorum scriptor se nominat Pastorem Presbyterum. Constant autem Acta duplici epistola, altera Pastoris ad Timotheum pariter Presbyterum, altera Timothei ad Pastorem, & insuper ex appendice quadam, in qua Pastor de Praxedis obitu agit. In hac postrema parte historiam totam hæc verba claudunt: *Cujus, idest Praxedis, corpus ego Pastor Presbyter sepelivi juxta patrem Pudentem via Salaria in coemeterio Priscilla, ubi florent orationes eorum usque hodie, præstante D. N. J. C., cui est honor & imperium per æterna sæcula seculorum. Amen. Planus & apertus esse videtur sensus eorum verborum, ubi florent orationes eorum usque hodie: consuevisse videntur Fideles eo accedere, ut sese Pudentis, Pudentianæ pridem defunctorum, & Praxedis post illos mortuæ, ibidemque unâ jacentium, precibus commendarent, quarum precum & orationum vim atque efficacitatem re ipsa iidem Fideles experirentur, multa inde beneficia reportantes. Et quatenus sensus prædictus retineatur, magna profecto dubitatio insurgit adversus statutam epocham initii cultus Confessorum: nec enim Pudens, nec dux Virgines necem, aut carceres aliosve cruciatus passæ sunt, attamen ab ipsa morte earum nomen invocatum est, & ipsarum sepulcrum frequentatum est, & memoria honorata & pie culta. Verum Tillemontius Acta prædicta tamquam apocrypha aperte rejicit; & Papebrochius citato tomo Maji inquit, allata*  
verba*

verba : *ubi florent orationes eorum*, tribui non posse convenienter Pastori, & sic adjecta fuisse ab alio posterioris ætatis ob adjunctam illam particulam *usque hodie*, cum hujusmodi loquendi modus longiorem temporis intercapedinem requirat, quam ut in scriptorem contemporaneum cadere possit.

## C A P U T V I.

*De Ecclesiastico Judicio requisito, antequam Cultus Religiosus Confessoribus exhiberetur.*

I Q UÆ contigerunt in cultu Martyrum, contigerunt quoque in cultu Confessorum. Quis enim unquam sibi suadere poterit, non potuisse cultum Religiosum exhiberi Martyri non vindicato, eundemque potuisse exhiberi Confessori, de cujus virtutibus & miraculis suum Ecclesia non tulisset judicium? Severus Sulpitius, qui scripsit principio sæculi v., in *vita Sancti Martini*, qui ex supradictis aut primus, aut inter primos recensetur Confessores, qui coli cœperint in Ecclesia, narrat *cap. 11.* non longe a Turonensi Monasterio fuisse altaria erecta, quod Martyr ibi sepultus esse crederetur: *Erat haud longe ab oppido (Turonensi) proximus Monasterio locus, quem falsa hominum opinio velut conspulsis ibi Martyribus sacraverat. Nam & altare ibi a superioribus Episcopis constitutum habebatur.* Sed cum nomen Martyris ignoraretur, & certa non adessent de ejus passione monumenta (subdit Sulpitius) indebitum cultum fuisse a Martino remotum, qui mortuum adjuravit, & vi adjurationis scivit, corpus non esse Martyris, sed latronis, qui propter scelera, quæ commiserat, capite fuerat damnatus: *Nomen edicit* (loquitur de sordida umbra, quæ, adjurante Martino, apparuit) *de crimine confitetur latronem se fuisse ob scelera percussum, vulgi errore celebratum, sibi nihil cum Martyribus esse commune, cum illos gloria, se poena retineret.*

2 At, ad cultum Confessorum ut descendamus, præsto sunt Canonica jura, quibus, post introductum cultum Confessorum, prohibitum fuit, cultum publicum erga quemcumque Dei servum exhiberi, proindeque sive Martyrem, sive Confessorem, si Ecclesiasticum Judicium de eorum sanctitate non præcessisset: præsto sunt antiquæ solemnes corporum Confessorum translationes, & elevationes factæ auctoritate Episcopali, in quibus initium Ecclesiastici cultus consistebat; præsto denique sunt Episcoporum decreta pro remotione cultus erga eos, qui ex errore populi, nulloque præcedente Episcopali examine, inter Beatos Confessores publico cultu fuerant recensiti.

3 Et in eo quidem, quod attinet ad Canonica jura supra memorata, ex Concilio Agrippinensi apud Ivonem *par. 3. Decreti cap. 54.* hæc habentur: *De Ecclesiis, seu Sanctis noviter inventis sine auctoritate inventoris nisi Episcopo pro-*

probante, in ejus territorio minime venerentur. Ex Capitulari Caroli Magni ad annum 805. col. 427. cap. 17. tom. 1. de Ecclesiis seu Sanctis noviter inventis statuitur, ut non colantur, nisi Episcopo probante, salva etiam & de hoc, & de omnibus Ecclesiis Canonica auctoritate. In Synodo Atrebatensi loc. cit. decernitur, ne sepultis temere Divina salvantur, nisi per provincialem Episcopum vita sepulti examinetur, si secundum Evangelium Christi fuit; & apud Guillelmum Malmesburiensem (de gestis Pontificum Anglorum lib. 1. pag. 228. inter scriptores rerum Anglicarum Savilii) S. Anselmus sic in sua Synodo statuit: Ne quis temeraria novitate corporibus mortuorum aut fontibus aut aliis rebus (quod contigisse cognovimus) sine Episcopali auctoritate reverentiam Sanctitatis exhibeat.

4 Succedunt solennes corporum translationes, & elevationes auctoritate factæ Episcopali. Sæculo vi. facta est sollemnis translatio corporis Joannis Abbatis Reomensis, opera Leopardini Abbatis, & sociorum, qui cum consilio Episcoporum sanctum altare construxerunt. Accedente licentia Aistulphi Archiepiscopi Moguntini, facta est ab Eigile Abbate Fuldeni translatio corporis B. Liobæ Abbatissæ discipulæ S. Bonifacii Moguntini Archiepiscopi & Martyris; & corpus hujus Virginis, cujus intercessione Deus dignatus est miracula patrare, collocatum fuit juxta memoriam S. Ignatii Martyris. VValburga, seu VValburgis labente sæculo viii. magnis claruit virtutibus & miraculis, & Otgarius Episcopus Eystettenfis ad locum excellentiorem & magis reverendum sollemni pompa translationem corporis explevit, teste Philippo Episcopo in vita S. VVillibaldi, quam vulgavit Jacobus Gretserus cap. 31. & 32. Othmarus Sangallensis Abbas virtutibus Christianis sæculum viii. nobilitavit, & ejus elevatio corporis facta est auctoritate Salomonis Constantiensis Episcopi diocesani; teste Hsone Monacho S. Galli apud Mabillonium in sac. 3. Benedictin. part. 2. pag. 164. quæ omnia facta sunt, perspectis vita ejus exemplis, . . . & apertis miraculorum ostensionibus. Sæculo ix., petente Fulrado Abbate, atque instantibus Clericis, facta est elevatio corporis Ursuari Laubienfis Abbatis, & festiva dies in ejus honorem statuta est, permisso Halidgarii tunc Episcopi Cameracensis, teste Fulcuino in Actis Sanctorum Benedictin. sæculo 3. part. 1. pag. 257. Sæculo x. Monachi cœnobii Sithienfis sollemni pompa corpus elevaverunt Folcuini Tarvennenfis, alias Tervannenses in Gallia Episcopi, & in loco tumuli altare construxerunt, consulto tamen prius Stephano ejusdem temporis Tarvennenfis Ecclesiæ Episcopo, teste citato Fulcuino Laubienfi Abbate inter Acta SS. Benedictin. sæculo 4., part. 1. pag. 629. Et denique sæculo x. refert Baldericus in chronico Cameracensi lib. 1. cap. 35. pag. 61. & 62. Hadulphi Episcopi Cameracensis corpus fuisse elevatum, præcedentibus miraculis, & intercedente auctoritate Engrani Episcopi Cameracensis: Hujus vero Sanctitas procedente tempore multis mirisque portentis ostensa est, quorum præcipuus testis Aeditus Monasterii S. Vedasti, Engrano Cameracensi Episcopo, visio-

*visiones, quas plerumque viderat, propalavit. Qui ergo testem idoneum animadvertens, sanctum corpus levavit; in qua elevatione, ad declaranda S. viri merita, mulier quadam ab immundo spiritu mirifice liberata est: unde Episcopus letus, verbo facto ad populum, Beati Hadulphi solemnia in numero Sanctorum notificavit.*

5 Hæ, aliæque consimiles elevationes, congesta undique Ecclesiastica eruditione, collectæ legi possunt apud Archiepiscopum Ancyranum Justum Fontaninum in sua disertat. de S. Petro Urseolo; & aliæ etiam in hujus Operis decursu a nobis exponuntur, ubi decreta pariter & præcepta Ecclesiastica occurrent, quorum ope cultus remotus est, qui ex populi errore fuerat introductus erga aliquos, quorum vita non fuerat sufficienter discussa, aut de quorum miraculis certæ non præcesserant probationes: intereaque satis erit indicare statuta S. Anselmi adversus eundem abusum, de quo scripsit etiam ad Stephanum Archidiaconum epist. 51. lib. 3. *Mando vobis ut eatis ad Rumesi & dicatis & dicendo præcipiatis Domne Abbatisse & Sanctimonialibus ex nostra parte & ex parte Episcopi Vintoniensis, & vestra; ut si nolunt me prohibere illis divinum officium facere, tunc ex toto prohibeant, ut nullus honor, qui alicui Sancto exhiberi debet, exhibeatur ab illis, aut permittant ab aliquo exhiberi mortuo illi, quem quidam volunt pro Sancto haberi. Filium autem ipsius mortui propellite a villa, nec amplius conversetur in illa. De Hugone Linconienſi Episcopo scribit Joannes Bromptonus Jornalenſis, abrogatum fuisse cultum a Monialibus monasterii Godoshomenſis, & populo adventante, introductum erga Ralmondam. Qui plura desiderat consimilium rerum exempla, præter ea, quæ alibi afferentur, legere poterit eruditissimum Patrem Christianum Lupum in notis ad 14. Concilium Romanum S. Leonis IX.*

6 Cum in superioribus loqueremur de Martyribus, diximus, Acta passionum fuisse diligenter collecta: quoad Confessores vero dicimus, eorum virtutes fuisse fideliter a probis viris descriptas, & posterorum memoriarum mandatas; sicut bene ostendit Bollandus in præfat. gener. in vit. SS. §. 2. in fine, ubi hæc habet: *At non Martyrum solum, sed aliorum quoque, qui vitam pie actam insigni opinione Sanctitatis terminassent, præcipue si prodigiis essent a morte celebrati, scribi res præclare gesta consueverunt. Quam ad rem cum alii viri probi & eruditi, tum ipsi etiam Antistites studium contulerunt. Passim occurrent toto hoc Opere exempla, essetque supervacaneum hic universos velle recensere. Habes in Januario vitas non paucas a doctissimis Monachis conscriptas, S. Hieronymo, Cyrillo, Eugippio, S. Fausto, S. Beda, Radulpho Glabro, Hugone Floressiensis, aliis; a religiosissimis Abbatibus S. Paschasio Ratberto, S. Gerardo Silvæ-majoris, B. Ealredo, Everhelmo, a sanctissimis Episcopis S. Gregorio Theologo, S. Gregorio Turonensi, S. Athanasio Magno &c.*

7 Item, cum in superioribus de Martyribus loqueremur, diximus, Acta passionum, seu eorum memorias fuisse ab una ad alias Ecclesias transfusa; & hoc modo eorum cultum ab una ad alias Ecclesias fuisse progressum,

sum, accedente consensu Episcoporum, qui illis præerant. Hoc ipsum contigisse dicimus etiam in Confessoribus: eorum quippe nomina descripta in diptychis Sanctorum ejus Ecclesiæ, in qua feliciter in Domino mortui fuerant, & in qua post obitum miraculis claruerant, delata horum omnium fama sinceris testimoniis innixa ad alios Episcopos, describebantur in diptychis aliarum Ecclesiarum, ut infra demonstrabitur. Cumque duplex esset genus diptychorum; alterum, in quo descripta erant nomina eorum, pro quibus orabatur; alterum, in quo eorum, quorum memoria agebatur, ut oblatio eis proficeret ad honorem; inscriptio in his posterioribus diptychis exhibitionem publici religiosi cultus præseferbat, teste S. Dionysio, seu alio quovis antiquo probato Auctore in *theoria sive contemplat.* 3. *Ecclesiastica hierarchia cap. 3. §. 9.* ubi sic legitur: *Sacrarum porro tabularum qua post pacem adhibetur recitatio, depradicat eos qui sancti vixerunt, atque ad probe vite perfectionem constanter pervenerunt; nos quidem eorum imitatione ad beatissimum illum statum quietemque deiformem adhortando ac manu ducendo, illos verò cum viventibus celebrando, quippe ut Theologia docet, nequaquam mortuos sed ex morte ad vitam Divinissimam translatos.*

8 Demum, cum de Martyribus diserebamus, diximus, nedum ad alias Ecclesias, sed etiam ad Sedem Apostolicam delata fuisse monumenta passionum; summorumque Pontificum auctoritatem aliquando intercessisse, ut cultus introduceretur, vel ut introductus confirmaretur. Hoc ipsum quoque contigisse dicimus de Confessoribus, ut alibi demonstrabitur, & bene innuit Florentinius in *admonit.* 2. *Martyrologio per ipsum edito præfixa.* Ibi enim sic loquitur: *Cum autem sub persecutionum rabie innumeri quotidie Martyres in quarvis fere regione excrescerent, & tandem, pace Ecclesiis reddita, plurimi, qui Deum inculpabili vita consistentes, sub Confessorum titulo pretiosioribus tabulis mererentur adscribi, & a Romana præcipue Magistra Ecclesiæ re vera adscriberentur; quot Sanctorum nomina accrevisse necesse est in antiquis sive Indicibus, sive Calendariis, non tantum Romana Urbis exemplo, quam Pontificum, & Episcoporum præcepto?*

9 Idcirco, in unum colligendo omnia, quæ hucusque dicta sunt, concludi posse videtur, Episcopos jure suo in suis diocesisbus cultum publicum aliquando decrevisse, & potuisse decernere erga Martyres vindictas, & Confessores approbatos: quæ a nonnullis particularis dicitur Canonizatio, sed ab aliis melius Beatificatio appellatur; cum Episcopale præceptum terminos suæ diocesis prætergredi non posset; eaque natura & indoles Beatificationis ut plurimum sit, ut cultus in ea permissus, intra aliquam tantum diocesim, aut provinciam sit definitus, ut infra dicetur, & sicuti bene adnotavit Gonzalez in *cap. Audivimus num. 7. de Reliq. & venerat. SS. tom. 3.* Canonizatio nunquam licuit Episcopis; Beatificatio vero *primæ Ecclesiæ sæculis ab illis fiebat.* Concordat Manriquez *tom. 1. annal. Cisterc. ad ann. 1141. cap. 8. num. 7.* ubi, non obstante erectione altaris facta auctoritate Episcopali super corpus Joannis de Sacramenia, scribit, tuisse tantum

tantum Beatificatum; & bene prosequuntur Bivarius in *comment. chron. Marci Maximi in S. Joanne Eremita vindicato* §. 5. num. 27. atque Dominicus a SS. Trinitate de *summo Pontif. Rom. cap. 18. §. Secunda Conclusio*, in *biblioth. max. Pontif. tom. 10.* Inferri quoque posse videtur, cultum ab uno Episcopo in sua dioecesi statutum, accedente aliorum Episcoporum, & sic universalis Ecclesie approbatione, una cum assensu expresso, vel tacito summi Pontificis, ad Canonizationis terminos pervenisse: cum de natura & indole Canonizationis sit, ex infra dicendis, Religiosi cultus extensio ad universam Ecclesiam, uti ad rem erudite pariter de more adnotarunt Lucas D'Acheri, & Joannes Mabillon. in *actis SS. Ord. S. Benedicti sec. v. in prefat. §. 6. num. 92.* ubi, loquendo de particulari Canonizatione, seu Beatificatione, quæ primis Ecclesie temporibus sola erat in usu, ita subdunt: *Particularis sola in usu erat, quæ tamen, accedente totius Ecclesie consensu, & approbatione, generalis evaderebat.* Idcirco bene prosequuntur Auctor tractatus manuscripti de SS. Canonizatione ad Cardinalem Montis Regalis cap. 3. §. *Ecclesia: Ecclesia plerisque post Apostolos Sanctis adscripsit per communem cultum & approbationem, ut Apostolos; Doctores, Augustinum, Gregorium Magnum, & Nazianzenum, Ambrosium, Basilium, Hieronymum, Cyrillum, Athanasium; eodem modo Martyres, ut Laurentium, Vincentium; & Virgines, ut Agnetem, Agatham, Luciam; & opinor, Sanctorum venerationem primum coepisse ab Episcopis ejus loci, in quo mortem obierunt, post universa Ecclesia est amplexata: Matta de Canonizat. SS. part. 1. cap. 3. num. 11. Bordon. controv. 13. de Canonizat. SS. sub num. 46. Molphee. consil. 46. num. 12.* Qua in re summi Pontificis auctoritatem aut tacitam, aut expressam intercessisse putat Gonzal. in *cap. Audivimus, sub num. 7. de Reliq. & venerat. SS., Garzias de Canonizatione §. 5. pag. 91. Gravina de catholic. prescript. tom. 4. quest. 5. de Canonizat. SS. pag. 321. Dominicus a SS. Trinitate tom. 3. de Eccles. milit. in bibliot. max. Pontif. tom. 10. pag. 487. Rabaudi exercit. Theolog. tom. 2. exercit. 3. cap. 1. pag. 138.* ubi: *Veteres namque Sancti non fuerunt Canonizati Romana & Apostolica Sedis auctoritate, atque supremo Judicio, sicut novissimi ab aliquot sæculis; sed eorum cultus, qui primo in certis ac particularibus Ecclesiis institutus fuerat, paulatim deinde, Romano Pontifice non contradicente, sed tacite approbante, ad alias Ecclesias pervenit: & Azorius instit. moral. part. 2. lib. 5. cap. 6. Quæres, quomodo veteres, & antiqui Patres ut Silvester, Innocentius I. Leo I. Gregorius I. &c. & plerique alii antiquiores, vel æquales fuerint inter Sanctos relati? Respondeo, eos post felicem obitum coepisse celi & celebrari communi Episcoporum, Clericorum, & laicorum consensu; accessit autem Ecclesie Romana expressa, vel tacita quedam auctoritas. Azorii porro sententiam pluribus illustrant Franciscus Viæton in suo tractatu Gallicæ conscripto de Canonizat. SS. cap. 1. & cap. 8. Cardinalis Bellarminus de SS. beatif. lib. 1. cap. 8. cujus quidem Cardinalis doctrina cum ab Anonymo quodam fuisset impugnata, sic ipse assertionem suam propugnavit in *dissert. impressa apud Pignatell. consult. 38. num. 16. & seqq. tom. 5. Opusculo, inquit,**

Tom. I. meo

meo de Sanctis lib. 1. cap. 8. distinguitur duplex Canonizatio, particularis, & universalis. Particularis dicitur, qua Sanctus aliquis, sive Martyr, sive Confessor, colendus proponitur uni particulari Ecclesie; Universalis, qua toti Ecclesie colendus proponitur, ita ut nemini Christiano liceat de ejus hominis Sanctitate, & Beatitudine dubitare: ac particularis quidem Canonizatio antiquis temporibus Episcoporum particularium judicio commissa erat; ut in eodem loco a me probatur testimonio S. Cypriani, & Thomæ Waldensis, & hoc ipsum docent Optatus, & S. Augustinus, quos Cardinalis Baronius citat. Itaque non scripsi neque sensi, ut iste Auctor videri vult me scripsisse vel sensisse, licuisse olim sine ullo Episcopali judicio, vel decreto sanctos homines publice colere. De universali autem Canonizatione docui plurimos veteres Sanctos non certa lege, sed consuetudine universalis Ecclesie, non sine expressa, vel tacita summorum Pontificum approbatione Canonizatos fuisse. Integer igitur sensus verborum meorum hic est, eos Sanctos, qui colebantur in particularibus locis decreto particularium Episcoporum, coepisse paulatim coli in Ecclesia universali, non certa aliqua lege vel decreto, sed consuetudine a summis Pontificibus consensu tacito approbata. Quod quidem verissimum esse non dubito, nec omnino video, quid contradici possit. Quæro enim, quis fuerit, ut S. Martinus, S. Nicolaus, S. Hilarius, & innumerabiles alii in universali Ecclesia publice ita colantur, ut nefas sit de eorum Sanctitate dubitare? Id enim summos Pontifices fecisse, certo decreto non constat, neque bullæ Canonizationum, neque historia ulla testantur. Episcopi autem particulares neque seorsum in Sedibus suis, neque in Conciliis congregati toti Ecclesie legem dare possunt, neque eorum judicium certam fidem facit, nisi accedat illius confirmatio, ut Dominus ait: Et tu aliquando conversus confirma fratres tuos. Quærat igitur Auctor illius scripti solidum fundamentum, si ei non placet universalis Ecclesie consuetudo, quæ S. Augustino in ejusmodi observationibus pro lege semper fuit, ut videre est in epist. 118. 119. & 120. & alibi. Quærat, inquam, solidum fundamentum, super quo nitatur Fides, quam de certa atque indubitata Beatitudine habemus veterum Sanctorum, qui non leguntur a summis Pontificibus nominatim Canonizati. Quod ipsum repetit in sua recognitione librorum, & signanter illorum de gloria, & cultu Sanctorum. Bellarmini porro doctrinam illustrat Episcopus Sarnellus in sua epist. 35. tom. 2.

## CAPUT VII.

*De interventu Auctoritatis summi Pontificis in Cultu decernendo  
erga Martyres, & Confessores.*

**E**TI nonnulla in superioribus capitibus dicta sunt de interventu auctoritatis summi Pontificis in cultu decernendo erga Martyres, & Confessores, idque peculiariter, quod ad eum primis ipsis Ecclesie sæculis Acta Martyrum pro examine & approbatione transmitterentur, ut vel cultus approbaretur, vel introductus confirmaretur, quodque sin-  
gulo-



gulorum Episcoporum decreta de cultu Martyrum, & Confessorum vim obtinere non possent in universa Ecclesia, nisi accederet tacita, aut expressa summi Pontificis auctoritas; in præsentī tamen necessarium esse videtur, præcipuos actus singillatim exponere, quibus auctoritas memorata intervenit. Et, ne oriat̃ur confusio, nunc agetur de dicto interventu a primis Ecclesiæ sæculis ad Joannem XV. summum Pontificem, ut ad consequentia deinde tempora opportune transitus fiat.

2 Primus itaque Actus, qui nobis innotescat, & de cujus veritate nulla rationabilis excitari valeat controversia, Sanctum respicit Vigilium Episcopum Tridentinum & Martyrem, qui sæculo IV. mortuus est, & cujus passionis Acta ad summum Pontificem transmissa sunt, pro cultu erga eundem statuendo; in quo Actu mentio fit præcedentis consuetudinis, uti supra visum est, atque etiam adnotavit P. Honoratus de S. Maria Carmelita discaleceatus tom. 2. *animadvert. super usu Crit. lib. I. dissert. I. art. 5. num. 1.* Porro etsi de hisce Actis S. Vigiliī in superioribus sermo habitus sit, non undequaque inopportunum videri poterit nonnulla hic addere. Antequam prædictus S. Vigilius Tridentinus Episcopus Martyrio coronatus esset, in eius diocesi occisi fuerunt in odium Fidei Sisinnius Diaconus, Martyrius Lector, Alexander Ostiarius. Ipsorum certamini Vigilium una cum pluribus Christianis præfens adsuit, eosque pro reportata victoria Beatorum honoribus continuo donavit, erecta illorum nomine ecclesia. Mox epistolam duas conscripsit, alteram ad S. Simplicianum Mediolanensem Episcopum, alteram Constantinopolim ad S. Joannem Chrysostomum, parte quoque ex Martyrum trium Reliquiis ad utrumque missa. Extant eæ litteræ apud continuatores Bollandianos *ad diem 29. Maii*, in quibus egregias virtutes Martyrum singulorum, & totius Martyrii ordinem exponit. Probabile porro est, confimiles ab eo datas fuisse litteras, quæ forte exciderunt, nec reperiuntur, ad Romanum Pontificem; sed quod modo deest, suppletur ex eo quod superest. Postremo sæculi IV. anno Vigilius ipse nobili Martyrio coronatur, cujus Martyrii Acta extant apud continuatores Bollandianos *ad diem 26. Junii*, quæ Mabillonius ipse tamquam sincera agnoscit. In memoratis Actis cap. 2. num. II. ita legitur: *Conscripsi sunt autem gesta B. Viri ab his qui Martyrio ejus interfuerunt, gratiaque roborationis (ut mos erat) Pape Romano transmiserunt, ut sacris Martyrum memorialibus infererentur: quæ suscepta venerabilis Episcopus Apostolicus, omnia digna memoria haberi subscribens adjudicavit.* Papebrochius in notis ad laudatam modo Actorum verba existimat, ad Romanum Pontificem non aliter fuisse transmissa Acta Vigiliī, quam fuerant ad Simplicianum Mediolanensem transmissa prius ab ipso Vigilio tria horum Martyrum Acta: sed vir doctus falli videtur, cum ad Romanum Pontificem fuerint transmissa, ut ab eo confirmationis robur acciperent: quocirca ipse Romanus Pontifex robur addidit approbationis suæ, non voce tantum, sed etiam scripto, ut indicant verba: *Digna memoria haberi subscribens adjudicavit*: hoc est censuit

fuit digna, quæ in memoriam Vigiliæ publice recitarentur. Et quamvis in Mabilloneo codice desint verba *roborationis gratia*, quæ habentur in Actis Bollandianis, id tamen parum refert, cum ex ipso codice Mabilloneo Apostolica comprobetur confirmatio, uti supra visum est cap. 4. num. 12.

3 Secundus Actus ad S. Joannem Chrysostomum attinet, eumque a viro docto olim audiui constitui posse in epistola Innocentii I. summi Pontificis scripta principio sæculi v. ad Arcadium Imperatorem, in qua, audita ejusdem Sancti morte, tum Arcadio ipsi, tum Augustæ, hoc est Eudoxiæ, tum denique Episcopis persecutionis in S. Episcopum conficiis, excommunicationem inurit. In ea quippe relata apud Cardinalem Baronium ad an. 407. n. 23. habentur hæc verba: *Neque de illo* ( loquitur de S. Joanne Chrysostomo ) *ita queror : ( sortem enim , seu hereditatem cum SS. Apostolis in Dei , & Salvatoris nostri Jesu Christi regno consecutus est ) & paulo post : Tametsi enim B. Joannes vitam reliquit , Fide servata , & fluctuantibus confirmatis , in æterna tamen sæcula sempiternam deliciarum , & immortalis vite hereditatem est consecutus .*

4 Assumptum hoc ex aliis monumentis confirmari posse videtur. Georgius etenim Patriarcha Alexandrinus in *vita S. Joannis Chrysostomi* num. 90. apud Surium ad diem 27. Januarii refert, duos Presbyteros, qui una cum Diacono S. Joannem in exilio comitati fuerant, Romam accessisse, & Innocentio Pontifici retulisse felicem mortem, & cælestem quam ante obitum habuit, visionem Basilisci Martyris; additque, his auditis, Papam animi deliquio, ac mœrore confectum adstantibus dixisse: *Videte, quodnam luminare Ecclesia, quam insignem Fidei præconem isti Orientis Episcopi inique in exilium relegarunt!*

5 Item, detrectantibus Orientalibus Episcopis S. Joannis nomen sacris tabulis, seu diptychis adscribere, exortaque celebri controversia, seu diffensione inter Episcopos Orientales & Occidentales, Alexander tandem Patriarcha Antiochenus, ut in gratiam cum summo Pontifice Innocentio redire posset, non solum retulit nomen S. Joannis in sacras tabulas, uti colligitur ex *epist. 19. Innocentii Papa I. apud Constant pag. 843.* sed etiam auctor fuit, ut Orientales Episcopi id ipsum facerent, teste Nicephoro lib. 14. cap. 25. sicque S. Atticus Constantinopolitanus Antistes successor Arsacii, qui, vivente S. Joanne, Sedem Constantinopolitanam invaserat, in sua epistola ad Petrum, & Ædesium Diaconos relata apud Bollandianos tom. 1. Januarii ad diem 8. §. 7. nu. 39. hoc pacto locutus est: *Ad pietatem vestram scribimus, quæ melius, quam alii, res nostras novit, ad pacem videlicet & tranquillitatem eas evasisse de sententia præcipuè piissimorum Principum, & omnium deinde Orientalium Episcoporum, ipsorumque adeo Occidentalium quoque de Joanne sacris tabulis, non ut Episcopo, sed, qui aliquando Episcopus fuerit, inserto, ut memoria ejus propter communem orbis universi pacem coheretur. Scribimus autem, ne, concordia, ubique propemodum obtinente, solis nobis ei non ad stipulantibus; simul & piissimis Principibus adversari videamur, & summe ne-*  
cessa-

*cessariis rebus nostris, ventis aliquibus adversis subortis, & Ecclesie Christi noceamus. Quocirca, si post habitam ab Innocentio I. notitiam nedum vitæ, sed & pretiosæ mortis S. Joannis Chrysostomi pronuntiavit, eum consecutum fuisse hereditatem Domini cum SS. Apostolis, de qualitate & solemnitate hujus Actus tuta videtur esse comprobatio; eo magis, cum subsequens controversia de nomine S. Joannis in sacris diptychis inscribendo ex supradictis patefaciat, cultum in ejus honorem fuisse decretum, ita ut nonnulli libenter se eidem submittentem, nomen crederent in sacris diptychis describendum, & alii eidem refragantes, a sacris diptychis delendum existimarent.*

6 At, ingenue loquendo, quæ contigerunt in causa S. Joannis Chrysostomi, referenda esse non existimarem ad rem, de qua nunc agitur. Prætermisso quippe, quod Innocentii I. epistola ab aliquibus rejicitur tamquam supposititia, ea præcipue de causa, quod Eudoxia in ipsa perhibetur adhuc superstes, quæ tamen ante tres annos & vivis excefferat, quemadmodum offendere conantur Pagi *ad an. 407. & Natalis Alexander in hist. Eccles. sæc. v. cap. 2. art. 1.* huic etenim animadversioni occurri posset, assumendo ea, quæ habentur apud Baronium, & ejus epitomatores Spondanum *ad ann. 404.* aliosque gravissimos Historicos & Auctores ibi laudatos, qui Eudoxiam ponunt Chrysostomo superstitem: vis major stare potest in hoc, quod initia Religiosi cultus erga S. Joannem Chrysostomum Ecclesiastico judicio decreti, referenda esse videntur ad translationem sacrarum ejus Reliquiarum ad Ecclesiam Constantinopolitanam sub Episcopatu S. Procli post triginta, & amplius annos ab ejus obitu; juxta erudite collecta apud Tillemont *in vita prædicti Sancti tom. 11. art. 134.* Dictum est autem, initium cultus Religiosi esse ad dictum tempus referendum, minime vero cultum privatum, aut famam Sanctitatis; cum hæc jam translationi præcessissent; uti plene habetur *in historia Ecclesiastica Fleuri tom. 6. lib. 26. pag. 224.* ubi etiam animadvertitur, translationem contigisse die 27. Januarii, & hac ipsa die festum S. Joannis Chrysostomi in Ecclesia Latina celebrari. Atque hisce quidem nullatenus obstitunt aut epistola Innocentii I. aut quæstio de nomine S. Joannis in sacris diptychis inscribendo; tum quia bene potuit Innocentius, juxta piam, quam habebat, & recte fundatam de Sanctitate Joannis opinionem, eum dicere in cælo regnantem, in actu signanter, in quo excommunicatione percellerat injustos ejusdem persecutores, absque eo, quod hinc inferri valeat decretum ullum de Religioso cultu in Ecclesia eidem exhibendo; tum quia, cum tres essent ordines eorum, quorum nomina in sacris diptychis describebantur, & ad altare inter Missarum solemnias recitabantur, primus palam Beatorum, secundus palam non Beatorum, & tertius Patrum, seu Episcoporum, quæstio de nomine S. Joannis inscribendo, ad tertium ordinem spectabat. Theophilus etenim Patriarcha Alexandrinus S. Joannis nomen ab Episcoporum tabulis deleverat, & nomen Arfacii inscripserat;

scripserat; Romani Pontifices vero tam ante, quam post Joannis mortem Arfacii nomen auferri, & Joannis nomen reponi mandarunt; ut ipsamque epistola S. Attici ostendit, & clarius demonstratur ex epistola S. Cyrilli Patriarchæ Alexandrini (tom. 5. oper. part. 2. pag. 204.) ad eundem Atticum scripta tempore, quo Cyrillus recipere recusabat nomen Joannis, quod deinde recepit, ne Romanæ Ecclesiæ gratiam & communionem amitteret: *Lectis quæ a pietate tua ad me missæ sunt litteris, Joannis nomen sacris inscriptum esse tabulis intellexi. Ubi vero eos, qui inde ad nos venerè, interrogavi, non in laicorum, sed Episcoporum catalogo adscriptum esse audivi. Porro dispicienti mihi atque in animo reputanti, an qui hoc fecere, Nicenorum Patrum decreta sequantur, & aliquantulum mentis luminibus in magnam illam Synodum intentis, universum sanctorum illorum Patrum collegium, quibusdam veluti oculis renuere, & viribus omnibus quominus ad rem eam comprobendam accurrerent, obfistere videntur. Quomodo namque inter Sacerdotes Dei censetur, illorumve feret sortem, cui Sacerdotalis dignitas abrogata est? Quomodo vero in catalogo sacrorum ministrorum erit, qui Ecclesiasticis mœnibus ejectus est?* Pars harum litterarum extat apud Facundum Hermianensem, integræ vero referuntur apud Nicephorum Callistum; & in eis S. Cyrillus canonem v. Nicænum respicit statuentem, legitime damnatum non reparari, nec in in vita, nec post obitum: quod ipsum clarius colligitur ex epist. 23. Innocentii I. summi Pontificis ad Bonifacium Presbyterum, tom. 1. epistolar. Romanor. Pontif. collectarum a Petro Constant col. 849. ubi S. Pontifex refert, se pacem impertitum fuisse Ecclesiæ Antiochenæ, ex quo Alexander Episcopus promiserat, se recitaturum nomen S. Joannis Chrysostomi non inter sanctos, sed inter mortuos Episcopos: *Se sine controversia recepturum, ac nomen Episcopi memorati inter quiescentes Episcopos recitaturum.*

7 Tertius Actus ad finem sæculi vi. vel ad initium sæculi vii. referatur. S. Maurus Abbas, discipulus S. Benedicti, in Gallias ab eo missus, constructo ibi celebri monasterio, cui quadraginta præfuit annis, miraculorum gloria clarus in pace quievit; & ejus vita conscripta fuit a Fausto Monacho, uti meminit Petrus Diaconus. Extat adhuc prædicta vita, quæ tamen dicitur interpolata sæculo ix. ab Odone Abbate Giannofolienfi; quemadmodum adnotavit Mabillonius in præfat. ad tom. 1. SS. Ord. S. Benedicti §. 5. & pluribus in locis docuerunt continuatores Bollandiani, ut videri potest in responsione Papebrochii ad oppositiones P. Sebaliani a S. Paulo art. 2. §. 38. pluribusque prosequitur Jacobus Longueval in historia Ecclesiæ Gallicanæ tom. 2. pag. 483. & seqq. At, quidquid sit de his, Leo Oitienfis in chronico Cassinensi lib. 1. cap. 3. tom. 4. Script. rer. Italic. Muras. refert, Faustum ex Galliis Romam reducem, vitam S. Mauri a se compositam Bonifacio III. Pontifici obtulisse, ut eam sua auctoritate roboraret: *Tertio interea Bonifacio Sedem Apostolicam gubernante, supradictus Faustus qui ad Gallias cum B. Mauro perrexerat, ad prædictum Lateranensem coenobium reversus est, atque a B. Theodoro qui tunc post sanctæ memoriæ Val. ut. mianum tertius eandem congregationem*

congregationem regebat, compulsus atque rogatus historiam de vita B. Mauri veracissimam composuit; quam prædictus Papa Bonifacius approbans, laude dignam duxit, suaque auctoritate roboravit.

9 Quartus succedit Actus, qui Zachariæ Pontifici adscribitur. Kilianus Episcopus Apostolicus cum Colomanno Presbytero, & Totmanno, seu Totnano Diacono Christi Fidem in civitate Herbipolensi annuntiavit; cumque Kilianus admonuisset Gosbertum Franconiæ Ducem a se baptizatum, quod ei non liceret uxorem habere fratris sui, quæ Geilana vocabatur, interfectus est anno 689. una cum sociis. Eorum subinde corpora in summa fuerunt veneratione, & ad eorum sepulcra multa facta sunt miracula, solemnisque corporum translatio contigit anno 752. uti refert Anonymus auctor vitæ S. Burkardi apud Mabillonium *sec. 3. Benedicti. par. 1. recitatae*, & desumitur ex epitaphio relato apud Cardinalem Baronium *ad an. 689. num. 15.*

*Septingentesimo quinquagesimo secundo*

*A Bonifacio Burkardo consociato*

*Hi sunt sublati, rite quoque Canonizati.*

9 Contendit Castellinus in suo tractatu de certitudine gloria Sanctorum pag. 424. §. 3. eos auctoritate Zachariæ summi Pontificis fuisse in Sanctorum album relatos; at continuatores Bollandiani in *prepyleo in Zacharia Papa pag. 121. num. 4.* de prædicto epitaphio sic loquuntur: Ita Auctor sæculi XIII. aut XIV. usitata quidem ævo suo phrasi, Canonizatos dicit, sed non ab aliis, quam a sanctis duobus Episcopis Bonifacio Moguntino, & Burkardo VVirtzeburgensi, idque per elevationem corporis de tumulo, ad quam opus tunc fuisse licentiæ Romani Pontificis gratis præsumeretur; & concordat Pagi *ad an. 689. num. 8.* Sed, si veritatem amamus, non videtur rationabiliter negari posse in ea corporum elevatione interventus auctoritatis summi Pontificis: sic enim legitur in Actis prædictorum Sanctorum apud Mabillonium *sec. 2. part. 2. Actorum SS. Ord. S. Benedicti pag. 993. num. 12.* Illustrante autem Domino merita eorum (hoc est S. Kiliani, ac Sociorum) cum consilio & præcepto Zachariæ Pape, mediante Bonifacio Archiepiscopo (Moguntino) de tumulo honorifice sublevati sunt, regnante Pipino I. Orientalium Francorum Rege. Sunt hæc Acta optimæ notæ, teste Mabillonio *pag. 991.*, & quamvis Bollandiani continuatores *ad diem 8. Julii tom. 2.* afferant, se sinceriora alia quædam Acta invenisse, in his tamen postremis Actis eadem fere reperiuntur verba, quæ sunt in aliis: Illustrante autem Domino merita eorum, cum consilio & præcepto Zachariæ Pape, mediante Bonifacio Archiepiscopo, a Burkardo I. VVurzburgensium Episcopo de tumulo honorifice sublevati sunt, regnante Pipino I. Orientalium Francorum Rege feliciter.

10 Quintus constituitur Actus in Canonizatione S. Trudperti Martyris ex familia S. Ruperti Episcopi Salisburgensis a Stephano III. qui a Cardinali Baronio dicitur IV. peracta. Ejus historiam vulgavit Canisius, & ab ea prædictam Canonizationem desumpserunt Castellinus *loc. cit.* & Molphesius

phesius *consil.* 46. num. 15. *Scriptor vitæ tom.* 3. *Aprilis Bollandiani pag.* 433. num. 30. sic fatur : *Hujus etiam tempore (ideſt Ramperti) ſanctus tunc Stephanus Papa, probatis coram ſe per teſtes idoneos ac fide digniſſimos, tam ſanctitatis inſigniis, quam paſſionis & forma & modo, quam etiam varietate miraculorum & veritate, B. Trudpertum catalogo SS. Martyrum reverenter aſcripſit, in eorumque collegio cenſuit honorandum, Domino id per innumeras declarante virtutes. Continuatores autem Bollandiani ad diem 27. Martii hiſtoriam prædictam tamquam fabuloſam rejecerunt. Adhæſit Phœbeus Tarſenſis Archiepiſcopus in ſua diſſertatione poſt Acta Canonizationis SS. Petri de Alcantara, & Maria Magdalena de Pazzis; Et in Propylæo loc. cit. num. 5. ſic legitur : Nihil plus facere ad intentum Caſtellini poteſt Canonizatio Trudperti Martyris ex familia S. Ruperti Epifcopi Ratifponenſis; quam enim fabuloſa tota ea hiſtoria ſit, & indigna in aliquam conſiderationem venire, oſtendi die 27. Martii. Sed, ut ut de hoc Actu rationabiliter dubitari poſſit, ſolemniſ elevatio corporis B. Othmari Abbatis, cujus feſtum celebratur die 16. Novembris, & cujus mentio in ſuperioribus facta eſt, non fuit celebrata ſine ſummi Pontificis auctoritate; teſte Ekkerardo de caſibus S. Galli cap. 1. inter Scriptores Alamannicos Goldaſti tom. 1. Fidem narranti Ekkerardo habere videtur Mabillon ſeculo 3. *Benedictino part.* 2. pag. 153. veretur tamen, ne is ſæculo XI. cum ſcripſerit, id dixerit ratione habita ſui temporis. At hoc gratis dictum videtur, & ex præconcepta opinione de recentiore Pontificiarum Canonizationum ætate.*

11 De Hadriano I. nonnulli tradunt, quod inter SS. retulerit S. Albanum Martyrem, teſte Macro in *notitia vocabulorum Eccleſiaſticorum* in verbo Canonizatio; idque contigiſſe refertur ad petitionem Offiæ Regis Merciorum proſecti ad limina Apoſtolorum, ſi fides præſtanda eſt Spelmanno tom. 1. *Conciliorum Angliæ pag.* 155. Sextus ergo hic Actus eſt, de quo in præſenti ſermo haberi debet. Porro is tamquam apocryphus rejicitur a Baillet in *preſat. ad vitas SS. g.* 45. & alii nonnulli eum putant irrepliſſe ex quadam æquivocatione. In vita quippe Regis Offiæ apud Matthæum Pariſium non legitur, ut illi exiſtimant, quod Rex convenerit Hadrianum Papam, ut S. Albanum inter SS. referret, ſed ut Canonizaret, ſeu privilegiis decoraret monaſterium in ejus honorem conſtructum. Ita ſentiunt Mabillonius in *preſat. ad ſæculum 5. g.* 6. & Pagi ad ann. 794. num. 13. quod ipſum confirmant ex Hadriani reſponſione ad Offam apud VVeſtmonaſterienſem ad ann. 794. & ex quo Albanus longe ante hæc tempora, teſte Beda, pro S. Martyre habebatur. Sed, cum Matthæus Pariſius in *vita Offiæ II. pag.* 28. hæc habeat : Offa igitur Rex piſſimus ſuorum Magnatum ſano acquieſcens conſilio, Divino ductus ſpiritu, tranſalpinum valde laborioſum, & ſumptuoſum iter arripit ſine mora diſpendio. Et pag. 29. Romam tandem perveniens . . . . Hadriano ſummo Pontifici ſui cauſam adventus explicans, & de loco ſimul, & B. Albano Canonizando & magnificando, cœnobioque conſtituendo devote preces porrigens, petitioni

*petitioni sua Romanam de facili Curiam inclinavit, præsertim cum Martyris inventio calitus mortalibus sit declarata; constat Offam Regem non solum ad privilegiis donandum monasterium, sed etiam ad impetrandam Canonizationem S. Albani, Romam petiisse; nullatenus obstitente allegata Hadriani responsione, cum ea duo capita complectatur, hoc est cultum erga Martyrem, & monasterii constructionem, quam præcipue responsio respicere debebat: O Regum Christianissime, Fili Offa, devotionem tuam circa Regni tui Protomartyrem, non mediocriter commendamus . . . De monasterio verò construendo & privilegiando petitioni tua assensum præbentis gratissimum: injungentes tibi in tuorum remissionem peccatorum, ut prospere ac feliciter rediens, cum Dei & mea benedictione in terram ac regnum tuum. consilio Episcoporum & Optimatum tuorum, quas volueris possessiones sive libertates B. Albani Anglorum Protomartyris cœnobio conferas. Quod si etiam admittatur, Albani cultum ante hæc tempora viguisse, id tamen ad rem non facit; cum novum non sit, cultum Episcopali auctoritate roboratum augmentum & confirmationem ab Apostolica recepisse auctoritate. Apud Spelmannum loc. cit. ubi partem inserit memoratæ vitæ Offæ scriptæ a Matthæo Parisio, non habentur verba de B. Albano canonizando, sed subduntur hæc alia de B. Albano commemorando. Sed vox hæc potestatem eandem & vim habet, ac altera canonizando; & alioquin modum loquendi magis vetustum sapit, secundum quem commemorari Martyrem, memoriam Martyris approbari, idem sonabat, ac nunc canonizari. Etenim commemorando in sacris Mysteriis Martyrem, eum censebantur adscripsisse Sanctis: quocirca ædes sacra, vel ara supra Martyris corpus, vel alibi in ejus honorem posita, appellari consuevit Memoria Martyris.*

12 In appendice ad vitam S. Suuiberti apud Surium die 1. Martii tom. 2. extat epistola S. Ludgeri Episcopi Monasteriensis, in qua narratur Stephanum Papam III. fuisse a Pipino Francorum Rege exoratum, ut S. Suuibertum canonizaret; & Pontificem ægrotantem, longoque itinere fessum, & senio confectum, inquisitionem de ejus virtutibus & miraculis nonnullis Episcopis commisisset; atque anno 804. Leonem III. in civitate VVerdensi solemniter inter Sanctos dictum Suuibertum retulisset: quam quidem S. Ludgeri epistolam in ea parte, quæ Canonizationem S. Suuiberti respicit, integram refert Cardinalis Baronius in annalibus ad dictum annum 804. num. 2. & pluribus sequentibus. Porro, si hæc epistola qualibet suspitione careret, hic septimus Actus validior ceteris esset, quos supra retulimus, quique Joannis XV. tempora præcesserunt: & sane nonnulli eam tamquam sinceram admittunt. Venerabilis Dei servus Cardinalis Bellarminus lib. 1. de Sanct. beatitudine cap. 8. n. 4. tom. 2. inquit: Primus enim Pontifex, ni forte fallor, qui Sanctos legatur canonizasse, videtur fuisse Leo Papa III.; & allegata epistola S. Ludgeri de miraculis S. Suuiberti, sic loc. cit. concludit: Hanc primam legi solemnem Canonizationem, ante quam fortasse fuerunt etiam alia, sed non mihi constat: & eum inter alios communiter se-

quantur Angelus Rocca de Canonizat. SS. cap. 5. §. Ego vero, Auctor tractatus de Canonizatione SS. manuscripti, & dicati Vincentio Lauræo Cardinali Montis Regalis cap. 2. §. Leo Tertius, Matta de Canonizatione Sanctorum part. 1. cap. 3. num. 14. Franciscus Victon. in suo tractatu Gallice conscripto de Canonizatione Sanctorum cap. 10. per totum, Macrus in suo vocabulario Ecclesiastico in verbo Canonizatio, Phoebeus Archiepiscopus Tarlensis in sua dissertat. impressa post Acta Canonizationis S. Petri de Alcantara, & S. Marie Magdalena de Pazzis, Gonzalez in cap. Audivimus sub num. 7. de Reliq. & venerat. Sanctorum, Cornelius a Lapide in comment. ad cap. 44. Eccles. §. Triplex hæc gloria, Cardinalis de Lauræa in 3. lib. sentent. tom. 3. disp. 6. art. 3. num. 47., Casalius de veteribus Ecclesia ritibus cap. 70. §. De predictis, Marchesius de Capite visibilis Ecclesia tom. 9. bibliot. max. Pontif. pag. 737. §. A Romano, Rabaudi exercit. Theolog. tom. 2. exercit. 3. cap. 1. de Ecclesia §. At potestatem.

13 Alii contra, Ecclesiastica eruditione pollentes eam epistolam censent apocrypham. Brovverus enim in notis ad vitam S. Ludgeri cap. 32. ita scribit: De epistola vero S. Ludgeri, quæ de levatione S. Suiberti, Sanctitatis approbatione, Leonis Papa in Franciam adventu, apud Surium tom. 2. extat, etsi egre adducor, ut censeam, ne publici jam usus auctoritate receptis manus afferre videar; character tamen ipse dictionis, & narrationis modus non expers anistorensia, epistolam illam facile ream peragant momentaria possessionis, insuper habita prescriptione tituli. Clarius hoc ipsum inquit Joseph Maria Sanfelicius Apostolicæ Sedis olim Nuntius ad Tractum Rheni in sua epistola, quam ediderunt continuatores Bollandiani ad diem 26. Martii pag. 640. Sane, cum curiosius scrutari initia tanta celebritatis cupido incesseris, evolutis Ecclesiasticæ vetustatis ruderibus, sateri cogor cum Patre Brovvero, epistolam illam, quæ S. Ludgero tribuitur, de vita S. Suiberti apocryphum redolere ex multiplici argumento. Morinus in comment. de administratione Sacramenti Pœnitentia lib. 10. cap. 20. num. 11. ait: Conscripta est epistola ante forsitan trecentos annos, aut ut maxime ante quadringentos, nomine S. Ludgeri ab aliquo Verdensi Monacho in sui monasterii commodum, & gloriam. Concordant continuatores Bollandiani ad dictam diem 26. Martii in vita S. Ludgeri §. 8. Lucas D'Acheri, & Joannes Mabillon in actis SS. Ord. S. Bened. & in præf. ad sec. 5. §. 6. num. 100. Pagi senior ad an. 754. nu. 7. Cumque hæc de S. Suiberti Canonizatione commenta nunc manifesta sint, iis refellendis diutius non immorabor: alter denique Pagi in vita S. Stephani II. alias III. num. 14. Nec fundamenta defunt, quibus innitatur opinio: & primo quidem, quia ea, quæ scribuntur in dicta epistola de tempore itineris Leonis III. ad Carolum Magnum, de mora ipsius in Caroli Comitatu, de variis cum eo itineribus susceptis, non concordant cum iis, quæ referuntur ab ejus temporis auctoribus, uti comparanti clare apparet: secundo, quia in allegata epistola Canonizatio S. Suiberti facta enarratur eo modo & ordine, quibus nunc fiunt Canonizationes; quod haud verisimile apparet, ex quo potissimum in Canonizationibus subse-

quen-



quenter factis ab Innocentio II. & Alexandro III. tot cæremoniæ non fuerunt servatæ: tertio, quia auctor epistolæ sæpius recitat Episcopos, Archiepiscopos, Cardinales, & Proceres Pontifici affidentes, & semper primo loco collocat Cardinales, contra morem illius temporis, & sequentium sæculorum: Innocentius enim II. in epistola de Canonizatione S. Hugonis Cardinales tertio loco ponit, & Pater Lupus *part. 5. decretorum, & canonum Synodorum generalium pag. 617.* supposititiam putat quamdam epistolam ejusdem S. Ludgeri ad Rixfridum Trajectensem Episcopum, propterea quod contra morem dicti temporis Cardinales præponit Episcopis: *Habet quasdam spuria suppositionis notas. Etenim Romanos Cardinales, contra istius sæculi morem, præponit Archiepiscopis: quarto, quia, ceteris prætermisiss, quæ plene apud citatos videri possunt auctores, temporis angustia, qua summus Pontifex apud Imperatorem moratus est, rectè adversatur tot consecrationibus ecclesiarum, de quibus in dicta epistola, & Canonizationi S. Suuiberti; ideoque apud continuatores Bollandianos loc. cit. num. 38. ita legitur: Ego dno solum quero, ad qua non arbitror posse quemquam eorum, qui & S. Suiberti vitam a S. Marcellino scriptam, & historiam Canonizationis a S. Ludgero mordicus tuentur, respondere. Primum, qui potuerit sanctissimus Pontifex tantillo spatio, quo apud Imperatorem fuit, octo videlicet dierum, tot loca tam diffita adire, tantas res exequi, & tam laboriosas, ut est ecclesiarum ita multarum consecratio &c. Alterum, cum natalem Domini celebravit in Carisiaco cum eodem Imperatore, nec nisi octo diebus apud eum in Francia subsisteret, quæ ratione fingi potest, pridie nonas Septembris, post Domini natalem menses octo, dies undecim, Canonizationem illam celebrasse?*

14. Singularis est Troili Malvetii in suo opere de Canonizatione SS. opinio, quam exponit dubio 4. num. 46. quod prima Pontificia Canonizatio fuerit facta a Nicolao I. qui inter SS. retulit Apollionem quemdam Eremitam natione Græcum. De hac vero opinione, in qua octavus constituitur Actus in præsentī discutiendus, ita sentit Angelus Rocca de Canonizatione SS. cap. 5. cujus verba sunt ea, quæ sequuntur: *Troilus Malvetius Juris Consultus Bononiensis in tractatu de Canonizatione SS. Apollionem quemdam Eremitam, natione Græcum, primum canonizatum fuisse ait; quem tempore Christi quadam in silva pastoribus predicasse, Salvatorem nostrum esse verum Messiam, ob idque clavibus ligneis a Judæis fuisse occisum, ac tandem a Nicolao hujus nominis primo, cui hoc, inquit, Martyrium a Deo revelatum fuit, in Sanctorum numerum relatum fuisse scribit. Id, quod, quantum ad Martyrium & Canonizationem pertinet, apocryphum esse reor, quia nec de nomine, nec de re ipsa apud ullum scriptorem mentionem factam esse inveni. Adde etiam, quod Malvetius dictam historiam se legisse ait in quodam vetustissimo codice, quem tamen titulo, & Auctoris nomine carere scietur. In commentario prævio ad vitam S. VValburgis num. 24. prope finem tom. 3. Februarii Bollandiani refertur Democares affirmare, S. VValburgim ab Olgario translata fuisse, cum esset consensu summi Pontificis Hadriani II. in Divorum numerum relata. Sed*

cum Democares sæculo xvi. scripserit, & VVolfangus vetus & gravis scriptor vitæ S. VValburgis, elevationem factam ab Episcopo narret, sed de Hadriano II. penitus sileat; non erit pro re, de qua nunc agitur, in Actu prædicto constituendum fundamentum: quemadmodum nec in ejusdem Hadriani epistola ad Patres Concilii Tricassini, in qua mandat sacris diptychis Nicolaum Papam I. suum prædecessorem ubique per Galliam inscribi; obstant enim quæ supra dicta sunt, cum de S. Joanne Chrystostomo agebatur, uti etiam ponderat Martene lib. I. de ritibus cap. 4. art. 8. n. 24.

15 Gesta a Joanne VIII. simul sumpta nonum constituunt Actum. Romæ quippe exagitatus confugit in Galliam; & de eo hæc habentur in quodam legendario veteri Cabillonensis Ecclesiæ a scriptore ejusdem ætatis: *Girbaldus Cabilomensis urbis Antistes ... aliorum usus consulto & consilio Episcoporum, beatissimum Dei Confessorem Lupum ... ut amplior accederet veneratio, & facilior advenientibus pateret intuitus, adhibito secum e vicino Matiscensis urbis Pontifice, & convocatis Fidelium populorum catervis, inde reverenter effusum, & Sacerdotum manibus elatum, exultantibus psallentium choris, post altare digno loco humavit, & lecticam super de more erexit.* Pergit idem scriptor narrare quomodo circa idem tempus partim inventa, partim translata ab eodem Girbaldo fuerint corpora BB. Agricolæ, Silvestri, & Desiderati; tum hæc subnectit: *Dominus Joannes (erat is Joannes VIII.) summa Sedis Romana Apostolicus Pontifex ... Gallias penetravit ... Cabilonem devenit, ubi dum duodecim dierum moras innecteret, ab Episcopo relatum est ei de inventione beatorum corporum. Sed tunc multimodo causarum fæsse gravatus, illuc accedere distulit. Cabilonem autem digressus, Augustiam Trecorum urbem petiit ... Denuo Cabilonensem civitatem repetiit, a qua cum discederet, ad monasterium S. Marcelli a præfato Episcopo est deductus. Tunc delato juxta altare B. Agricola sarcophago, Dominus Papa inibi digno honore pretiosum ejus corpus recondidit, & ut deinceps beatissimi Dei Confessores venerationi haberentur, & dies eorum gloriosi transitus festivè celebrarentur, Apostolica auctoritate injunxit.* In tota hac scriptoris hujus cœvi narratione nihil continuatores Bollandiani, qui illam tom. 2. Martii pag. 515. recitant, dignum reprehensione invenerunt, præter anni notam Actui appositam; quippe ipsi diligenter tempora supputantes, annum 878. apponendum fuisse censent, cum in citato legendario adnotetur annus 879. Qui lapsus, si modo vere illi supputant, levis est plane, & vel Notarii vitio, vel hallucinationi memoriæ facile tribuendus. Apud Saussajum in Martyrologio Gallicano ad diem 20. Novembris additur, eundem Pontificem Apostolica auctoritate, intercedente eodem Girbaldo Episcopo, inter Sanctos retulisse septem Episcopos Confessores, qui Cabillonensem urbem illustraverant sanctæ vitæ meritis, nempe Tranquillum, Desiderium, Joannem, Flavium, Veranum, Gratum, Lupum, cum Desiderato Presbytero. De Sanctitate prædictorum Episcoporum Cabillonensium plura videri possunt in Gallia Christiana tom. 4. De eorum vero Canonizatione facta a prædicto Pontifice Joanne, Baillet

quæ-

questionem movet in *discursu generali* §. 95. ex quo potissimum trium hebdomadatum tempore, quo Pontifex in civitate Cabillonensi permansit, non potuit, verisimiliter loquendo, opportunas ad rem recipere informationes. Citati autem continuatores Bollandiani *ad diem 30. Aprilis* putant, Girboldum Episcopum, inventis corporibus SS. Joannis, Desiderii, Flavii Episcoporum, & Desiderati Presbyteri, consuluisse summum Pontificem, an hos, qui communiter sancti habebantur, posset populo colendos proponere, quemadmodum cultu publico colebantur SS. Silvester, Agricola, & Lupus; atque ab eo probatum fuisse usum eos appellandi sanctos, & quod tam in honorem ipsorum, quam ceterorum SS. Episcoporum una festivitas perageretur die 30. Aprilis.

16 Ad ultimos progredimur Actus in presenti exponendos. Auctoritate Leonis VII. delatum fuisse cultum S. VVilibaldo Episcopo, referunt nonnulli; sed legendi sunt continuatores Bollandiani in *ejus vita ad diem 7. Julii* §. 5. num. 43. De S. Burckardo hæc leguntur apud Mabillonium *sec. 3. Act. SS. Ord. S. Bened. part. 1. pag. 700. Burckardi corpus circa annum 984. ab Hugone Episcopo e tumulo levatum est, permissu Benedicti Papæ VI. testante Egilwardo in fine libri tertii. Scriptor Gundensis Monachus contemporaneus tom. 3. Martii Bollandiani pag. 43. narrat corpora SS. Landoldi, ac Sociorum fuisse more veteri elevata auctoritate Episcopali, atque sigillis cautissime munita; sed Abbatem Vomarum, ut ampliorem & tutiorem eis cultum impenderet, ad Romanum Pontificem confugisse, ejusque auctoritatem implorasse, qui tunc erat Joannes XIII. quem scriptor vocat *digne memoria*, cum paulo ante defunctus esset.*

17 Alii fortasse plures Actus facti sunt, quos ignoramus, & quorum probationes non extant, opinor quia harum causarum definitio a Romanis Pontificibus fiebat in Synodis, quæ quolibet saltem anno cogeantur, & quorum Acta vix scribebantur; uti conjiciunt continuatores Bollandiani in *propleo differt. 20. num. 4. ubi sic legitur: Ejusmodi causarum definitio fiebat in Synodis, quas annue unam, aut plures Romani Pontifices celebrari coram se faciebant &c. Et, quia ejusmodi Synodorum Acta vix scribebantur, sed, ut in iis sola voce decernebantur multa, sic etiam approbatur populi religio erga eos, quorum annuntiata Synodo sanctitas, & miracula fuerant.*

## CAPUT VIII.

*De ejusdem interventu auctoritatis.*

**P**Ræcipuos in capite antecedenti, qui nobis innotuerint, recensuimus Actus, quibus summi Pontifices exhibitionem publici Religiosi cultus decreverunt erga SS. Martyres, & Confessores a primis Ecclesiæ sæculis ad tempora Joannis XV. summi Pontificis. Nunc autem hoc ipsum præstandum est a Joanne XV. ad Alexandrum III.

2 Por-

2 Porro, cum B. Udalrici Episcopi Augustæ Vindelicorum vita, & miracula ejus intercessione a Deo patrata essent celeberrima, Luitolphus Augustæ Episcopus in Concilio Lateranensi Joanni XV. & Patribus in Synodo congregatis supplicavit, ut eum in Sanctorum numerum referret; omnibusque bene ponderatis, memoratus Udalricus Sanctorum catalogo a prædicto Pontifice, Synodo laudante, adscriptus est; & integer Actus extat in *bullario Romano*, in *novo cod. Canonizat.*, & *tom. 2. Julii* apud continuatores Bollandianos, & in sæculo 5. *Aët. SS. Ord. S. Benedicti*. Idcirco solemniss est hic, qui nunc exponitur, primus Actus, adeo ut, redacta celebri questione de prima Canonizatione a summo Pontifice solemniter acta ad punctum, an fuerit ea S. Suuiberti quæ facta dicitur a Leone III. & de qua in superiori capite sermo habitus est, an ea vero S. Udalrici facta a Joanne XV. uti adnotavit vir licet heterodoxus, Joannes Albertus Fabricius in *sua bibliographia antiquaria* cap. 8. num. 25. eruditiores putent, primam eam esse S. Udalrici. Mabillon in *præf. ad Aët. SS. Ord. S. Benedicti* sec. 5. §. 6. num. 99., Pagi ad an. 993. num. 2., Fleuri *tom. 12. histor. Eccles. lib. 57. pag. 277.* Continuatores Bollandiani in *propyleo dissertat. 20. pag. 172.* ubi, post recitatam bullam Joannis XV. ita subdunt num. 2. *Si quis attulerit antiquius exemplum, & aque certum postulata per extraneos Pontifici ditioni Episcopus ab Apostolica Sede Canonizationis alienjus, libenter suscipiam: neque enim existimo, nullum extitisse; puto tamen, hujus rei initium non esse a sæculo, de quo agimus, decimo valde removendum.*

3 Requisitum fuit a Benedicto VIII. (seu ut verius nonnulli putant, a Benedicto VII.) an liceret ecclesiam construere, & in ea collocare corpus Simeonis Monachi & Eremitæ in coenobio Padolironensi agri Mantuani, qui clarus virtutibus & innumeris miraculis vitam cum morte commutaverat; & Benedictus respondit: *Si ita coruscat miraculis, ut vester homo nobis asseruit; adificate ecclesiam, collocate in ea eundem &c. tractate eum ut Sanctum.* Ita ex ejus responso colligitur, relato apud Mabillonium in *sec. 6. Bened. part. 1. pag. 168.*, & in *nov. cod. Canonizat.* typis edito, & collecto opera & studio supra cum laude commemorati Julti Fontanini Archiepiscopi Ancyran. Et hic quidem est secundus Actus in hoc temporis decursu a Joanne XV. ad Alexandrum III. suo momento præditus. Simeonis nomen descriptum est in Martyrologio Romano *ad diem 26. Julii*: ejus autem vita non integra extat apud Cardinalem Baronium in *annual. ad an. 1016.* sed integra apud Mabillonium in *sec. 6. Bened. part. 1. pag. 151.* & in ipsa quidem, quæ scripta fuit ab Auctore contemporaneo, ita legitur num. 13. *Tempore, quo pro Canonizando ejusdem S. Simeonis gloriosæ corpore, sanctam Apostolicam Sedem accessimus, quoddam de eodem S. Viro miraculum clariuit; & late prosequitur bonæ memoriæ P. Benedictus Bacchinus in historia monasterii S. Benedicti Padolironis lib. 1. pag. 31.*

4 Refert S. Petrus Damianus *tom. 2.* in ultimo capitulo vite S. Romualdi hæc, quæ sequuntur: *Post quinquennium vero a S. Viri obitu data Monachis*  
ab

ab Apostolica Sede licentia, ut supra venerabile corpus ejus altare construerent. Putat Cardinalis Baronius ad ann. 1027. num. 13. eam fuisse S. Romualdi Canonizationem: Constat autem, ipsum in Sanctorum numerum adscriptum quinquennio post ejus obitum eo tantum ritu, qui tunc erat in usu, nempe, ut petentibus concederet Apostolica Sedes super corpus ejus altare construere: & sequitur Fleuri cit. tom. 12. pag. 463. An autem tertius hic Actus ad Canonizationem potius, quam ad Beatificationem sit referendus, alibi discutietur. Nunc tantum operæ pretium esse videtur adnotare, duplicem esse opinionem de anno obitus S. Romualdi, qui annos natus centum & viginti ex hoc mundo migravit: nonnulli quippe volunt, eum mortuum fuisse anno 1027. alii anno 1037. quemadmodum videri potest in *dissertat. 2. Camaldulensi* inter exaratas a Guidone Grando Abbate Camaldulensi viro qualibet laude digno. Quod, si primæ adhærendum est opinioni, recens Actus erit adscribendus Joanni X. Si vero secundam amplecti placeat, adscribendus erit Benedicto IX. summo Pontifici: tumque prædicto Pontifici Joanni attribuendus est Actus, qui legitur in vita S. Bononii Abbatis monasterii Locedenfis ad Surium transmissa a claræ memoriæ Cardinali Palæoto Bononiæ Archiepiscopo, eruta ex duobus antiquis codicibus, & a dicto Surio inserta Actis Sanctorum ad diem 30. Augusti, ubi refertur, Episcopum Vercellensem cogitasse de altari erigendo supra ejus corpus, & hanc suam cogitationem Clero communicasse, qui censuit, expetendam esse a summo Pontifice approbationem; huncque, audita serie miraculorum ab Episcopo narrata, benigne indulisse.

5 Joanni quoque XX. & Benedicto IX. adscribitur elevatio corporis S. Adelardi Abbatis Corbejenfis, uti legitur in ejus vita conscripta a S. Gerardo Abbate Silvæ majoris cap. 5. num. 12. apud Bollandum ad diem 2. Januarii; ubi, relatis miraculis ejus intercessione factis, hæc leguntur de Abbate Richardo: *Unde, missis Legatis accipere benedictionem a Joanne Papa, qui tunc temporis Vicarius S. Petri habebatur Romæ, Pontificali Hierarchia non solum est permixtus, sed etiam Apostolica jussione jussus, quod libenter fecisset & injussus.* Cum autem actualis elevatio corporis a Joanne XX. demandata suam non habuerit executionem, nisi anno 1040. quemadmodum defumitur ex citata vita; referenda idcirco ea est ad tempora Benedicti IX. Ex quo fit, ut quartus hic Actus ad utrumque memoratum Pontificem pro peculiari utriusque ratione pertineat.

6 Sequitur quintus Actus. Poppo siquidem Trevirensis Episcopus supplices porrexit preces tam nomine proprio, quam sui Cleri, & populi Benedicti IX. summo Pontifici, ut in album Sanctorum referre dignaretur servum Dei Simeonem Syracusanum Treviris reclusum: adhibito autem Fratrum consilio, hoc est collecta Romani Cleri splendida Fraternitate, Pontifex decrevit, eum ab omnibus populis Sanctum esse nominandum, solemne ejus festum quotannis esse celebrandum, nomenque in Martyrologium cum Sanctorum nominibus suo loco inferendum. Extat Actus apud continuatores

nuatores Bollandianos *tom. 1. ad diem 1. Junii*, & in novo codice Canonizationum. Hæ Canonizationis litteræ Treviros a Benedicto per Legatum missæ sunt, quibus acceptis, Poppo Simeonem inter SS. Confessores declaravit habendum esse & colendum; ut ex sequenti colligitur inscriptione, quam ad autographum emendatam continuatores Bollandiani *loc. cit. pag. 98. retulerunt*: Anno Dominicæ Incarnationis 1042. Indictione decima Benedicti Papæ IX. Regisque III. Henrici, Conradi Regis Filii IV., Canonizatus est B. Simeon Trevirensis quarta feria xv. Kalend. Decembris, piissimo Archiepiscopo Poppone, anno Ordinationis suæ vigesimo sexto, jussu & litteris IX. Benedicti Papæ est Congregatio Canonorum ibidem ordinata.

7 Teste Burcardo Monaco *lib. de casibus monasterii S. Galli cap. 6.* Norpertus S. Galli in Alemannia Abbas impetravit a Pontifice Clemente II. Canonizationem B. VViboradæ, adminiculante Henrico Imperatore, & conjugæ ejus Agnetæ: Hoc obtinuit apud Dominum Apostolicum Clementem II. recitata vita B. VViboradæ, ejusque miraculis, de tamdiu neglecta re ab ipso Papa redargutus, quatenus ipsam, præsentē Theodorico Constantiensis Episcopo, canonizaret, & pro sancta haberi præciperet, & anniversarium ipsius diei solemnizandum institueret. De hoc autem sexto Actu plura videri possunt apud continuatores Bollandianos *ad diem 2. Maji*, apud Pagi juniorem in Clemente II. & apud Mabillonium in *præfat. ad sec. 5. Benedictinum*.

8 S. Leo IX. dum in civitate VVormatiensi morabatur, summus Pontifex designatus est; cumque statim ad Urbem accessisset anno 1049. Synodum habuit, teste Hermanno Contracto. Porro, antequam ad Urbem accederet, VValdradus Magnus Præpositus Cœnobii S. Deodati ei obtulit historiam vitæ S. Deodati Episcopi Niverniensis Romæ in Synodo approbandam. Recitata fuit in Synodo vita, & Pontifex permisit, eam legi in Ecclesia Dei: Anno ab Incarnatione D. N. J. C. 1049. indict. secunda: concurrente sexto, epacta 14. .... Quæ de pie memoria Pontifice Deodato scripta sunt, ad summum Apostolicæ Sedis apicem delata sunt, atque in provinciali Synodo ejusdem sanctæ Romanæ Ecclesiæ est constitutum, ut in præsentia Episcoporum, Abbatum, Clericorum, & laicorum recitarentur; & cum recitata fuissent, data auctoritate ab ipso summo Pontifice Leone IX. primo anno sui Apostolatus, decretum est, quatenus in Ecclesia Dei legerentur: Historia hæc vitæ S. Deodati una cum prædicta approbatione Pontificia extat apud continuatores Bollandianos *tom. 3. Junii ad diem 19. pag. 883.* eademque fuit in Gallicum idioma translata circa annum 1594. a Joanne Ruyr Secretario Ecclesiæ, & Capituli S. Deodati, qui etiam testatur, membraneum legendarium tunc adhuc fuisse asservatum in archivo Deodatenfi, in quo vita digesta est in varias lectiones.

9 In itinerario S. Leonis IX. apud Mabillonium *sec. 6. Bened.* habetur, eum postmodicum tempus Gallias petiisse, ut orthodoxæ Fidei prospiceret; deinde, post ejus reditum ex Galliis, aliud Concilium Romæ coegisse inenunte Majo anno 1050. & annuente ac laudante Synodo prædicta, inter

inter Sanctos retulisse B. Gerardum Tullensem Episcopum . Canonizationis litteræ extant apud Mabillonium *sec. 5. Bened. & tom. 4. annalium* ; & in novo codice Canonizationum ; & in Actis Conciliorum tom. 6. part. 1. Pontifex in bulla dixerat, se elevaturum ejusdem S. Gerardi corpus ; quod præstitit die 30. Octobris ejusdem an. 1050. uti habetur in notis ad ejus Constitutionem in codice Canonizationum . Et, ut omnia exponantur a S. Leone IX. summo Pontifice gesta de cultu erga Sanctos decernendo, idem anno 1052. dum Ratispone morabatur, Ven. VVolfgangum ejusdem urbis Episcopum de tumulo levavit, & corpus transtulit Ven. Erhardi ; sicuti legitur in annalibus Saxonis, apud Mabillonium in *sec. 5. Bened.* in vita S. Herardi, apud Bollandum ad diem 8. Januarii, apud Pagi ad an. 1052. & apud Pagi juniorem in vita Leonis IX. num. 34. Quocirca Hundius tom. 1. metropolis Salisburgensis in Gebhardo III. Episcopo Ratispensi ait pag. 194. Sub eodem, Leo IX. Pontifex Maximus ab Andrea Rege Hungaria propæce cum Imperatore Henrico III. constituenda accitus, Ratispone venit, & S. VVolfgangum in numerum Doctorum retulit, similiter & S. Erhardum . Adscripsit quoque Mabillonius S. Leoni IX. in Act. SS. Ord. S. Bened. ad *sec. 3. pag. 243.* Canonizationem S. Suiberti, quam alii, ut vidimus, adscribere conantur Leoni III. En verba Mabillonii num. 13. *S. Suiberti corpus e terra levatum fuisse auctoritate Leonis Papæ IX., quando Colonia ab Herimanno Archiepiscopo exceptus est, quo eodem itinere B. Gerardum Tulli-Leucorum Antistitem in numero Sanctorum computandum statuit.* Alii addunt, eundem Pontificem, qui Episcopatum Tullensem, quem ante Pontificatum administraverat, una cum Pontificatu retinuit, elevasse corpus S. Romani in eadem villa Tullenfi anno 1050. cum ad eam post Pontificatum accessisset, explendæ causa Pastoralis visitationis ; quemadmodum legitur apud Baillet in *discursu generali ad historias Sanctorum* §. 96. tum, invento corpore S. Bertini, Remensem Antistitem mandasse, ut e terra levaretur, eodem Leone IX. annuente ; uti colligitur ex monumentis relatis apud Mabillonium *sec. 3. part. 1. pag. 154. & pag. 163.* Petitum præterea aliquando fuit a sacrorum rituum Congregatione, ut in lectionibus propriis concedendis Ecclesiæ Patavinæ in honorem S. Maximi diceretur, Leonem IX. summum Pontificem Patavii exceptum a Bernardo Episcopo albo Sanctorum adscripsisse S. Maximum . Sed, cum in tabulis Patavinis exponeretur, Leonem IX. ab Episcopo invitatum Missam celebrasse, & inventionem Sanctorum canonizasse, Maximi videlicet, Fidentii, & Bellini, quorum corpora cultum publicum habuerant usque ad adventum Attilæ in Italiam, & ejus timore occultata, reperta fuerant anno 1053. Bernardo tunc temporis Episcopo ; die 13. Junii 1679. referente claræ memoriæ Cardinali Casanate, sic reformatæ fuerunt exhibitæ lectiones : *Quamobrem ad ecclesiam B. Justine accedens Pontifex, solemniter litavit, urbem ab anathemate dissolvit, & Sanctorum inventionem canonizavit* IV. nonas Augusti, qui dies festus ab Ecclesia Patavina quotannis recolitur sub titulo Inventionis S. Maximi Episcopi & Confessoris . Sanctorum albo adscri-

ptos demum fuisse ab hoc eodem S. Pontifice Leone IX. Romaricum, Amatum, & Adelphum, testatur Ruerus 1. *part. antiquit. Vogesensium lib. 4. cap. 12.* Fuisse autem hunc summum Pontificem Vogesi, & S. Romarici ecclesiam consecrassse, certum est: Beatus siquidem Lanfrancus Cantuariensis Antistes, qui per id tempus erat in comitatu Papæ, id testatur in sua epistola *tom. 6. Concil. part. 1. col. 1190.* ubi tamen consecrationis ecclesiæ meminit, sed non Canonizationis.

10 Si omnia gesta a Pontifice Leone IX. utpote ab eodem Auctore profecta, ne Actorum numerus nimis excrescat, pro uno Actu libeat computare; sequuntur gesta Alexandri Papæ II. eodem modo computanda, & octavum Actum constituentia. Obiit Theobaldus Eremita anno 1066. & Apostolicæ litteræ Canonizationis ejusdem expeditæ ab Alexandro summo Pontifice extant apud Mabillonium, qui primus eas vulgavit: item sunt impressæ apud continuatores Bollandianos *tom. 5. Junii*; & in novo cod. Canonizat. In Pontificio tamen diplomate desunt notæ chronologicæ; unde fit, ut Mabillonius eas dicat editas ab Alexandro III., & Bollandiani ab Alexandro II. Quæstio minime decisa relinquitur in notis ad hanc Constitutionem in *cod. Canoniz.* quocirca & nos porro procedentes alia ejusdem Pontificis gesta exponemus. Alexander itaque II. ante Synodum, quam habuit Mantuæ, Mediolanum perrexit, & multa utilia ibidem in Clero constituit, tumque S. Arialdu SS. Martyrum numero adscripsit; uti constat ex Landulpho juniore apud Puricellum, & apud Pagi juniorem in ejus vita num. 33.: *Passus est B. Arialdus v. Kal. Julii anno Domini 1066. de cujus morte doluit Alexander Papa; unde anno sequenti, scilicet 1067. cum idem Papa iret ad Synodum, quam Mantua celebravit, Mediolanum venit, multaque fecit statuta de statu Mediolanensis populi, & Cleri, Beatumque Arialdu SS. Martyrum catalogo adscripsit.* Et continuatores Bollandiani ad *Acta Sanctorum Junii tom. 1. ad diem 1. vitam* referunt B. Eneconis Abbatis, narrantque *cap. 4. num. 3. Petrum Episcopum Burgensem jussu Alexandri II. publicum ei cultum detulisse: Procedente deinde tempore, incredibili populorum devorione circa venerabile sepulcrum ejus accrescente, Petrus bone memoria Burgenfis Episcopus, auditis B. Eneconis miraculis, ad monasterium venit .... Quod videns venerabilis Pontifex, tanti miraculi stupore repletus, Deum, & B. Confessorem cœpit glorificare; & indutus Pontificalibus vestibus, sicut in mandatis acceperat a beato Papa Alexandro, in memoriam Dei Electi, Divina Mysteria gaudenter celebravit, decantando altisona voce cum religioso coetu Monachorum unius Confessoris Officium, scilicet: Os Justi meditabitur sapientiam &c. quod deinceps in ejus honorem decantari præcepit, instituens Episcopali auctoritate, festum ejus annualiter Kalendis Junii cum reverentia celebrari, concedendo pro B. Confessoris honore omnibus Fidelibus ad diem festum natalis ejus accurrentibus quadraginta dierum absolutionem. Deinde post multum temporis, ad usus Divini Sacrificii, in ejus nomine fabricatum est altare, in quo Divina frequentantur Sacramenta, orante B. Patrono nostro Enecone pro omnibus, qui suam fideliter gaudent frequentare memoriam.*



11 Ad gesta sub Gregorio Papa VII. progredimur, quæ nonum Actum constituunt. Inter vetera monumenta Corbejana ab Hugone Menardo collecta extat vita S. Paschasii Ratberti Abbatis, quam producunt Bollandiani *tom. 3. Aprilis pag. 464.* in qua hæc habentur: *Sub Fulcone Abbate, qui octavus decimus ab eo Corbeja præfuit, plurima ad ejus sepulcrum miracula facta sunt; quocirca auctoritate Sedis Apostolica, a VVidone Ambianorum Præsule sacrum ejus corpus IV. Idus Julii de terra levatum, ad majorem ecclesiam S. Petri honorifice translatum est, ut cum aliis SS. Adalardo, & Præcordio populo venerabundum exponeretur.* Concordat alia vita conscripta a Jacobo Sirmondo, & edita a Bollandianis *ad diem 26. Aprilis:* cumque intervenit Apostolicæ auctoritatis contigerit anno 1073. non immerito referendus videtur ad summum Pontificem Gregorium VII. teste Baillet *in vita prædicti S. Paschasii.* Apud eisdem continuatores Bollandianos *ad diem 16. Martii* virtutes & miracula referuntur S. Heriberti Archiepiscopi Coloniensis, & plane ponitur bulla Canonizationis ejusdem expedita a Gregorio Pontifice. Deest hæc in novo codice Canonizationum, & eadem caret notis chronologicis; unde fit, ut Theodoricus Custos monasterii Tuitiensis, qui eam Bollandianis reddidit, editam existimaverit a Gregorio VII. at alii editam arbitrentur a Gregorio VIII. alii a Gregorio IX. & alii a Gregorio XI. uti videri potest apud eisdem Bollandianos *loc. cit.* & apud Baillet *in vita ejusdem Sancti.* Chartuitius Episcopus vitæ S. Stephani Regis Hungariæ scriptor *apud Surium die 20. Augusti,* narrat sanctissimum Regem anno 1034. defunctum, post annos deinde 45. solemnî pompa elevatum fuisse jussu Romani Pontificis; quippe *Romani Pontificis,* inquit, *litteris mandatum fuit, ut eorum corpora eleventur, qui Pannoniam ad Dominum convertissent:* quos inter principem certe locum tenebat Stephanus Rex. Hoc ipsum Pontificium mandatum extat in Actis S. Gerardi Episcopi & Martyris *apud eundem Surium 24. Septembris.* Quare & hic Sanctus eodem, quo Stephanus, honore affectus est sub uno eodemque Rege S. Ladislao, qui pro sua insigni pietate id honoris impense deferri curaverat gentis Apostolis. Legi potest Cardinalis Baronius *ad an. 1079. in fine,* ubi Pontificium mandatum tribuit S. Gregorio VII.

12 Celebrabat Urbanus II. synodale Concilium cum magna Episcoporum, Abbatumque frequentia; & cum Bizantius Archiepiscopus Tranenensis coram universo Concilio scripta recitasset nonnulla miracula a Deo patrata intercessione Nicolai Peregrini Tranenensis, & enixe postulasset, ut Sanctorum catalogo adnumeraretur, Pontifex respondit: *Nos igitur causam ipsam eidem Fratri nostro commisimus; de ejus nimirum probitate, ac scientia nihil hesitantes, ut, quod ei revelante Domino visum fuerit, maturiori deliberatione constituat ad laudem & gloriam illius, qui gratuita misericordia famulos suos mirifice gratificare consuevit.* Et hoc quidem diploma impressum reperitur in Junio Bollandiano *tom. 1. pag. 249.* & in novo codice Canonizationum. In vita S. Godolevæ Virginis & Martyris, *apud Bollandianos*

tom. 2. Julii pag. 435. num. 99. sic legitur : *Præsul autem egregius ( sermo est de Radbodo Episcopo Tornacensi ) .... etsi Drogo venerabilis ea, ( hoc est gesta S. Godolevæ ) scribens vir omni dignus fide haberetur, utpote religiosus tanta Religionis professor, nihilominus ad omne dubitationis vulnus de credentium cordibus refecandum, præcipuos adnotabiles oppidi Ghistellensis transmisit nuntios, qui iterata examinatione rem ventilantes, sinceram facti veritatem renuntiarent; quibus fideliter iussu exsequentibus, dum veridicorum illa ratificata indubio testimonio retulissent, sacer Antistes sua illa auctoritatis commendatione confirmata, summo Pontifici, ejusque fratribus Cardinalibus præsentavit approbanda; qui cum omnibus in Romana Curia pro tunc residentibus Prelatis maturiori profundiorique adhuc rem scrutantes indagatione, cum electum Dei sponsam Virginem & Martyrem omni veneratione dignam invenissent, quam talibus tantisque omnipotens Deus glorificari voluisset sanctitatis indiciiis, unanimi consensu Sanctorum hanc catalogo adscribentes, sacra ejus ossa de terra pulvere transferenda, publicæque adorationi sublimanda præfato Episcopo commiserunt. Qui negotium benevolenter executus, anno Dominica Incarnationis 1084. .... III. Kal. Augustarum, die lune, cum devota, ut decuit, caeremoniarum exhibitione, thesaurum illum nobilem atque pretiosum, sanctum videlicet corpusculum, de terra elevans decenti illius venerationi loco collocavit. Benedictus quoque Abbas Rempseleggienfis preces eidem Pontifici exhibuit, ut inter Sanctos referret Guolgosium suum antecessorem; & Pontifex respondit, uti legitur in ejus epistola tom. 4. Gallie Christiana, ubi habentur hæc verba quæ recitat Christianus Lupus tom. 3. schol. in Synod. pag. 569. Non enim Sanctorum quisque debet canonibus admisceri, nisi & testes adsint, qui ejus miracula visa suis oculis attestentur, & plenaria Synodi firmetur assensu. Teste denique supra citato Puricello lib. 4. cap. 81. Urbanus II. in civitate Mediolanensi inter SS. Martyres retulit Herlembardum, & inter SS. Confessores Attilanum Zamorensem, seu Legionensem Episcopum; uti etiam legitur in Martyrologio Romano ad diem 5. Octobris, & latius prosequitur Pagi in vita ejusdem Urbani II.*

13 Decimus Actus in supra recensitis gestis Urbani II. statuitur, & undecimus habebitur ex gestis Paschalis II. Hic anno 1105. scribens Episcopis Anagninæ, & aliis per Campaniam constitutis, indulgit, ut III. Non. Augusti festum celebrarent Petri Episcopi Anagnini tamquam Sanctorum Catalogo adscripti, cujus vita fideliter fuerat adnotata a Brunone Episcopo Signinensi. Litteræ Pontificiæ impressæ reperiuntur in Bullario Romano, in annalibus Cardinalis Baronii, & in novo codice Canonizationum; tumque apud Mabillonium in sac. 4. Bened. part. 1. & in annalibus tom. 5. narratur eundem Pontificem SS. Confessorum canonici adscripsisse B. Angilramnum Centulensem Abbatem.

14 Sequuntur gesta Callisti II. tempore, pro Actu duodecimo habenda. Udalricus nimirum Constantienfis Episcopus, qui vitam cum miraculis conscriperat S. Conradi ejusdem Sedis Episcopi, Sedem Apostolicam prædicto tempore crebris supplicationibus interpellavit, ut eum inter Sanctos

Sanctos referret; responsumque fuit: *Vitam ejus in Concilio generali recitandam, & comprobandam. Testes insuper signorum, quæ per eum fiebant, seu facta sunt, adhibendos.* Idem sub eodem Pontifice actum fuit in Concilio Bellovacensi coacto anno 1120. præsentino Legato Apostolico, de publico cultu indulgendo in honorem S. Arnulfi Episcopi Sueffionensis. Quidquid autem gestum fuit, legitur in Actis Conciliorum tom. 6. part. 2. col. 1102. ubi habentur hæc verba: *Inter ceteros autem adfuit ipse Aldenborgensis Abbas ferens in manibus libellum de vita, & moribus, miraculorumque gestis ipsius S. Arnulfi, quem libellum ego de manibus ejus accipiens aperui, & apertum obtuli Episcopo dicens: Ecce, Domini, libellus ipse, qui, me conscio meque auctore, de vita ejus conscriptus est; cui, quod vera sunt omnia quæ narras, testimonium in fine perhibeo, & de cujus miraculis & hic quosdam, & domi plures valde testes veraces adhibeo &c.* Interim, dum hæc ab Episcopis decernuntur, quidam nobiles Magistri scholarum acceperunt libellum, & cursus perlegerunt quadam gestorum capitula. Quidam ergo eorum concurrentes ubi erant Episcopi, cum magna constantia fatebantur: *revera ex Deo non est, qui hujus Sancti exaltationi contrarius est.* Tunc Guillelmus Catalaunensis Episcopus ait: *Per Deum turpe est, quod de re tam aperta dubitamus.* Unde vos, Domine Tornacensis, cum Domini gratia, remota omni ambiguitate, statuite diem quo ad locum conveniatis, & sanctum Domini servum de terra elevando, honorifice recondatis. Lambertus Episcopus ait: *Ecce Legatus in hac ipsa basilica cum nostro Archiepiscopo Remensi, vel Turonensi eminus residet. Rogo vos, placeat vobis ante illos venire, & vestram sententiam illorum judicio confirmare.* Episcopi dixerunt: *In nomine Domini fiat.* Ut ventum est, Lambertus Episcopus dixit Domino Catalaunensi: *Rogo, agite causam meam.* Cumque ille brevi sacundia ante Legatum & Archiepiscopos causam explicuisset, tam Legatus Conon, quam & Remensis Archiepiscopus una voce responderunt: *Judicium vestre auctoritatis plene suscipimas, & decretum vestri consensus roboramus.* Ita Episcopus Lambertus convocans Abbatem, designavit diem, quo Aldenborg conveniret, idest Kalendis Maji, & viri Dei corpus sanctum de humo levatum juxta morem Gallicanæ Ecclesiæ, ceu re vera sanctum reponeret &c. Sub eodem quoque Callisto II. peracta est Canonizatio S. Hugonis Cluniacensis Abbatis, mortui anno 1109. Gelasio II. Papæ Cluniaci e vivis erepto subrogatus ibidem est Callistus hujus pariter appellationis II., isque eo loci dum adhuc moraretur, memoratum Hugonem Cluniacensem Abbatem canonizavit. Rem accurate descripsit Hugo alter Monachus in epistola ad Pontium Abbatem S. Hugonis successorem. Pars hujus epistolæ extat in Actis SS. Bollandianis tom. 3. Aprilis pag. 633., integram vero exhibet Bibliotheca Cluniacensis, & ex ea epistola hæc ad rem nostram proferuntur: *Hic (Callistus scilicet II.) secundo Cluniacum rediit, ibique festum Dominicæ circumcisionis & apparitionis devote peregit.* Qui dum inter cetera sæpius ageret de vita & miraculis B. Hugonis, non quorumlibet chartulas super his profusus exaratas attendit; sed personas authenticas in medio Cluniacensis Capituli presentatas, de Sancto, quæ viderant

derant & audierant, validius attestatas, gratanter accepit: Episcopis vero, & Cardinalibus pariter assentientibus, ad laudem & gloriam D. N. J. C., natalem tanti Confessoris tot & tantis virtutibus approbati, festivum fieri Papa decrevit.

15 Si, quæ tempore Callisti II. contigerunt, duodecimum Actum constituunt; tredecimus coalescet ex gestis sub Innocentio II. qui inter Sanctos retulit in plenaria Synodo, quam Remis habuit, Godehardum Episcopum Hildensheimensem. Diploma Pontificium extat in codice Canonizationum; & Auctor anonymus libelli de Canonizat. & translat. S. Godehardi, qui extat sac. 6. Bened. part. 1. post vitam ejusdem Sancti, inquit, pag. 433. *Præses noster Bernardus cum Majoribus nostre Ecclesie assistens, videntem opportunitatem ultro sibi collatam, ipsum Apostolicum cum omni Curia Romana aggreditur, vitæque Pastoris nostri coram ipsis recitatur, & ut per eum in Ecclesia Dei canonizetur, devotissime preces fundantur. Sed, cum consuetudo sit Romana Ecclesia in generali Concilio Sanctos Dei canonizare, quod tunc temporis in Remensem civitatem in festo S. Luca indictum fuerat, accepto consilio petitionem Ecclesia nostra usque in prædictum locum disulit, ibique definiturum certissime promissit. Tum refert, Bernardum una cum Norberto Magdeburgense Metropolitano Remis honorifice susceptum esse; & dum jam Synodus aliquot dies esset celebrata, convenisse Innocentium cum suis Cardinalibus, ipsos de causa B. Godehardi submonuisse, omnesque unanimes & concordēs in sua petitione invenisse: Postera die, subdit, cum in Synodo generali Apostolicus resideret, nullo admonente, sed Deo faciente, Apostolicus ad omnes luculentam orationem habuit, in qua disertissime petitionem nostre Ecclesie de Patrone nostro exposuit; & ut assensum præberent, devotissime postulavit. His ita gestis, Episcopus Tarraconensis, vir religiosus & litterali scientia eruditus, quo ordine translatio fieri deberet, exposuit; scilicet, si ea, qua dicebantur de Patrone nostro, Ecclesia nostra per legitimos testes, ac juramento comprobaret. His vero verbis Apostolicus se interposuit, & se a Principibus terre nostre adeo in Leodicensi Ecclesia certificatum fuisse asseruit, ut non opus esset id secundò testificari, quod lucidius Sole posset probari. Auditis autem, quæ ab Apostolico dicebantur, omnes unanimiter, ut canonizetur, assensum præbent, & ut laudes Domino persolvantur, admonēt, qui dignatur servos suos ab infirmitate hujus carnis eripere, & inter sanctos & electos suos collocare. Continuo Te Deum laudamus canitur, laus omnipotenti Deo persolvitur, & sic deinceps coadunata Synodus terminatur. Hujus Canonizationis accuratissima narratio extat cœvi scriptoris apud continuatores Bollandianos tom. 1. Maji pag. 552.*

16 Idem Innocentius canonizavit S. Hugonem Episcopum Gratianopolitanum, non post Concilium Pisanum, uti censuit Cardinalis Baronius; nec in Concilio Pisano, quemadmodum voluit Natalis Alexander; sed, habito Archiepiscoporum, Episcoporum, & Cardinalium communi consilio, triginta & octo diebus antequam Concilium Pisanum celebraretur contra Anacletum Antipapam; uti probatur in adnotationibus ad novum codicem Canonizationum, ubi litteræ Canonizationis Hugonis insertæ

sertæ sunt. In Lateranensi porro œcumenico Concilio (in plenaria Synodo, quæ apud Lateranum est per Dei gratiam congregata) Sanctorum fastis adscripsit Sturmium primum Abbatem Fuldensem; & Apostolicæ litteræ vulgatæ fuerunt a Christophoro Brovvero Fuldensi. antiquit. lib. 3. cap. 9., extantque etiam in novo codice Canonizationum.

17 Denique Eugenius III. in epistola scripta ad Egelbertum Episcopum, & Canonicos Bambergenses, quæ est impressa in novo codice Canonizationum pag. 14. & in novo Bullario Romano tom. 2., de Henrico Imperatore sic locutus est pag. 333. *Tametsi huiusmodi petitio nisi in generalibus Conciliis admitti non soleat, auctoritate tamen sancta Romana Ecclesiæ, quæ omnium Conciliorum firmamentum est, petitionibus vestris acquiescimus, atque ejusdem memorabilis viri, cujus exaltationem exquiritis, ex fratrum nostrorum Archiepiscoporum, Episcoporum, qui presentes aderant, communicato consilio, memoriam inter Sanctos de cetero fieri censemus, & anniversarium diem solemniter celebrari constituimus.* De hac Canonizatione loquitur Otho Frisingensis lib. 1. de reb. gestis Frid. I. Imp. cap. 63. ubi de sepultura Conradi Regis, inquit, eum regio cultu fuisse sepultum in ecclesiâ Bambergensi, juxta tumbam Imperatoris Henrici ejus loci fundatoris, qui nuper auctoritate Romana Ecclesiæ in loca sancta levatus pro Sancto habetur.

## CAPUT IX.

*De Pontificia iterum auctoritatis in Beatificationis,  
& Canonizationis negotio, intervenitu.*

1 **C**Apud hoc ad eandem pertinet materiam, ad quam duo proxime antecedentia capita spectant; & eandem quidem prosequitur ab Alexandri III. Pontificatus initio ad nostra usque tempora eo modo, quo fieri potest, ne in immensum excreseat.

2 Alexander itaque III. inter Sanctos retulit Eduardum Angliæ Regem, Thomam Archiepiscopum Cantuariensem, & Bernardum Abbatem Clarevallensem. Bullæ extant impressæ in Bullario Romano, in Actis Conciliorum & in novo codice Canonizationum; ubi etiam ejusdem Pontificis epistolæ referuntur, quibus omnes Ecclesiæ Prælatos, & Aversanum Episcopum de S. Thomæ Canonizatione, & Regem Francorum, Monachosque Cistercienses, & Clarevallenses de Canonizatione S. Bernardi admonuit, ut ad eorum cultum prædictos omnes excitaret. In bulla Canonizationis S. Eduardi in cit. cod. Canoniz. pag. 15. habentur hæc verba: *Vixit etiam litteris antecessoris nostri pia recordationis Innocentii Papæ, vestris quoque testimoniis inde receptis (hoc est Archiepiscoporum, Episcoporum & aliorum Prælatorum per Angliam constitutorum) quamvis negotium tam arduum & sublime non frequenter soleat, nisi in solemnibus Conciliis de more concedi; de communi tamen Fratrum nostrorum consilio, juxta votum & desiderium prædicti* Fili

Filii Regis ( hoc est Henrici ) ac vestrum , corpus ipsius Confessoris ita glorificandum censuimus , & debitis praconiis honorandum in terris , sicut eundem Confessorem Dominus per suam gratiam glorificavit in celis . In bulla Canonizationis S. Thomæ in cit. cod. pag. 16. prostant sequentia : *Præfatum Archiepiscopum in capite jejunii , multitudine Clericorum & laicorum præsentem in ecclesia , deliberato cum Fratribus nostris consilio , solemniter canonizavimus , eumque decrevimus SS. Martyrum collegio annumerandum . Ibi demum in bulla Canonizationis S. Bernardi Abbatis pag. 19. narratur , dum Pontifex esset Parisiis , multos venerabiles viros supplices preces porrexisse , ut eum inter Sanctos referret in Concilio , quod proxime erat Turonis celebrandum ; benignas item aures Alexandrum postulatis præbuisse , sed eis satisfacere non potuisse , propter magnam frequentiam aliorum , qui similia petebant : Cumque nos eidem negotio favorabili satis intenderemus affectu , supervenit multitudo & frequentia petitorum , qui in diversis provinciis rem similem postulabant . Unde cum videremus , non posse congruenter omnibus satisfacere , statutum fuit pro scandalo devitando , etiam in hoc differri . Et post alia in dicta Constitutione sic concluditur : Quibus omnibus pia consideratione pensatis , & in Concilio Fratrum nostrorum expositis . . . catalogo SS. adscribi mandavimus . Huic quoque Pontifici Alexandro adscribitur Canonizatio Theobaldi Eremitæ , & Constitutio reperitur in codice Canonizationum ; quæ a nonnullis quidem huic ipsi Pontifici , sed ab aliis Alexandro II. attribuitur , juxta ea , quæ in superioribus visa sunt . Testatur insuper Innocentius III. Pontificem Alexandrum III. exoratum a Martino Episcopo Grossetanensi , ut in SS. album referret Guillelmum Eremitam a Malavalle in Tuscia , indulgisse , ut in ejus honorem celebraretur in diocesi Grossetanensi Officium , quoadusque fieri posset sollemnis ejus Canonizatio : Ex litteris fraternitatis tuæ accepimus , quod , cum bona memoria Martinus prædecessor tuus olim ad felicitis recordationis Alexandri prædecessoris nostri præsentiam accessisset , supplicavit eidem , ut B. Guillelmum Sanctorum adscriberet catalogo venerandum . Idem vero prædecessor noster exauditorium se preces ipsius promisit tempore opportuno , & interim mandavit eidem , ut in anniversario pro Divini nominis gloria , & ejusdem Sancti memoria Officium Confessoris solemniter celebraret , & in sua diocesi faceret solemniter celebrari . Apostolicæ hæc litteræ editæ sunt a Guillelmo de Vvaha in explanatione vite S. Guillelmi pag. 326. quæ prodit Leodii an. 1693. Celebrisque est inter Decretales Gregorii IX. ad tit. de Reliq. & venerat. Sancto. Alexandri III. Decretalis , de qua alibi , in qua statuitur , non licere pro Sancto aliquem publice venerari sine Sedis Apostolicæ auctoritate .*

3 Aliæ quoque adsunt Canonizationes factæ ab Alexandro III. de quibus Historici testantur , & quarum bullæ usque adhuc latent , aut injuria temporum perierunt . S. Guarinum Bononiensem , S. R. E. Cardinalem , Episcopum Prænestinum inter SS. relatum fuisse ab Alexandro III. affirmant Scriptores cumulate inveniendi apud Bollandianos tom. 1. *Februarii* pag. 915. In manuscripto chronico , quod extabat apud Cardinalem

Baro-

Baronium, legitur, S. Helenam Sueonam viduam miræ sanctitatis a sepulcro Domini, quod petierat, revertentem, de nece Generi sui per calumniam accusatam, & ea de causa a cognatis innocentem occisam anno 1164. instante Carolo Suevorum atque Gothorum Rege, ob vitam sanctissime ductam, additis multiplicibus miraculis, inter Sanctos fuisse ab Alexandro relatam; uti videri potest apud citatum Cardinalem Baronium in addendis ad annum 1164., & late adnotavit Pagi in *vita hujus Pontificis* num. 48. Duo fuere Canuti Reges in SS. numerum publica Ecclesiæ auctoritate relati: primus Rex Daniæ, qui Martyrio sublatus est anno Domini 1086., alter fratris filius Rex Obotritorum, qui Martyr occubuit anno Domini 1132. De his duobus Sanctis Canutis plura legi possunt apud Bollandum tom. 1. *Januarii ad diem 7.*, & apud ejus Continuatores tom. 3. *Julii ad diem 10.*, nec non apud Baillet *ad eundem diem*, & apud Fleuri *histor. Eccles.* tom. 13. lib. 63. pag. 458. Hujus postremi S. Canuti Canonizatio facta dicitur ab Alexandro III.; sed bulla hæcenus inventa non est, licet fuerit diligenter perquisita, teste Archiepiscopo Ancyrano Justo Fontanino in *præfat. ad cod. Canoniz.* De Legatis tamen ad Alexandrum III. summum Pontificem a VValdemaro Rege transmissis pro impetranda Canuti junioris Canonizatione, & de eorum reditu post impetratam Canonizationem plene testantur Historici. Kranzius lib. 6. *Daniæ cap. 29.* inquit: *Quo tempore Nuntius & Oratores rediere, quos Rex ad urbem Romam misit, testificandi gratia de miraculis, quæ ad tumulum Divi Canuti fierent; quo Rex Patri peshimus filius natus-est. Erat autem annus post millesimum centesimus septuagesimus primus. Tum apud Ringstadum, ubi paternus erat tumulus, omnem Convantum omnium de Regno concivit Rex litteris a Sede Apostolica proditis. Ibi Divus Canutus solemnium precationum genere de tumulo levatus, ara consecratus imponitur. Concordat Joannes Magnus lib. 2. de vitis Pontificum Upsalensium in Stephano Archiepiscopo, ubi ait pag. 47. Eodemque tempore, una cum Eschilla Archiepiscopo Lundensi Divum Canutum Ducem & Regem Obotritorum in SS. catalogum jussu Alexandri Pape III. inscripsit. Denique Isaac Pontanus in rerum Danicarum historia lib. 6. pag. 252. narrat. VValdemarum Regem Legatos anno 1168. ad Romanum Pontificem misisse, subditque: Elapso deinde tempore, anno circiter supra millesimum centesimo sexagesimo nono, Regis Legati, quos Romam transmiserat, in patriam redierunt, litteras inter cetera referentes a Pontifice, quibus patris sui innocentissimos manes sacris honoribus venerari permittebatur. Quocirca Rex, omni Danica Nobilitate sub edicto Ringstadum evocata, circa solemne Divi Joannis, quod in æstivum solstitium incidit, & parenti caelestes honores, & filio regios celebrari constituit. Pontanus tamen litteras Canonizationis non producit, & hinc fortasse factum est, ut ad nos non pervenerint, uti supra dictum est.*

4 Ad Alexandri III. tempora referri debent ea, quæ a Paschali Antipapa facta sunt. Martinus Polonus, & Onuphrius Panvinus referunt, quatuor Pseudopontifices adversus Alexandrum III. summum Pontificem

Tom. I.

K

insur-

insurrexisset, Octavianum de Monticello, qui Victor IV. Guidonem Cremonensem, qui Paschalis III. Joannem Strumiensem, qui Callistus III. & Quartum Landonem, qui Innocentius III. vocati sunt. Paschalis in Germaniam ad Fridericum Imperatorem se recepit, & Carolum Magnum Romanorum quondam Imperatorem in SS. canonem retulit. Ante corporis Caroli elevationem nullus ei publicus cultus exhibebatur, cum pro ejus anima suffragia fierent; sicuti fiunt pro animabus reliquorum Christifidelium defunctorum; testibus Ademaro Monacho, & Gaufrido Priore Vosiensi, quorum testimonia recensentur apud Pagi in *breviar. RR. Pontif. tom. 3. in vit. Alexandri III. pag. 82. & sequentibus*. Procurante vero Friderico Ahenobarbo facta est auctoritate Paschalis III. Antipapæ solemnem Corporis elevatio, uti colligitur ex Friderici diplomate impresso apud Bollandianos *ad diem 28. Januarii*; in quo, post narrata insignia opera Caroli Magni Imperatoris, expositis petitione Henrici Angliæ Regis, & assensu atque auctoritate Paschalis, nec non consilio universorum Principum tam sæcularium, quam Ecclesiasticorum pro elevatione & exaltatione corporis ejus, atque Canonizatione (verba sunt diplomatis) refertur, solemnem Curiam in natali Domini apud Aquisgranum celebratam fuisse, & corpus magna frequentia Principum, & copiosa multitudine Cleri & populi, in hymnis & canticis spiritualibus, cum timore & reverentia fuisse elevatum & exaltatum. Post solemnem corporis elevationem nedum in Ecclesia Aquisgrani, sed etiam in quibusdam aliis Galliæ, Belgii, atque Germaniæ Ecclesiis Carolus coli cœpit, quemadmodum inter Auctores forenses adnotarunt Ostiensis in *cap. Audivimus num. 9. ibique Joannes Andreas de Reliq. & venerat. SS., Cardinalis Tusculus in verbo Canonizatio, conclus. 41. num. 9., Lezana consult. 1. num. 50., Molpheus consult. 46. num. 10., & inter eruditos bene prosequuntur testantes de cultus continuatione, Gujet. de festis propriis SS. lib. 1. cap. 5. quasi. 9. §. Tertium denique dubium, Natalis Alexander in hystor. Eccles. sec. 9. & 10. cap. 7. art. 1. in fine, Bollandiani tom. 2. Februarii, ubi ex Athenæo Osnabrugensi *schemate* 19. referunt, quantum altare ecclesiæ PP. Societatis Jesu esse Carolo Magno dictum. Verum, cum cultus hic suam originem habuerit a Pseudopontifice; non immerito dubitari potest, an ex ejus concessione, constituta dici possit vera & legitima Beatificatio. Castellinus in suo *indiculo Sanctorum canonizatorum* dicit, Carolum Magnum a nonnullis Canonizatum, ab aliis tantummodo Beatificatum denominari. Contelorius in suo *tractatu de Canonizat. SS. cap. 2. n. 2.* eum asserit dici posse tantum Beatificatum: & hæc quidem sententia retinenda videtur. Quidquid etenim sit de concessione facta ab illegitimo Pontifice, tot subsequentes legitimi Pontifices prædictam concessionem sciverunt, & per tolerantiam admiserunt: quibus si superaddatur longissimi temporis observantia, nihil deesse videtur ex iis, quæ necessaria sunt pro validitate cultus, quoad Ecclesias particulares, & sic pro sufficienti Beatificatione; uti*



uti bene adnotarunt Molanus in *natalibus Sanctior. Belgii*, Petrus Galestinus, & Maurolicus in  *suis Martyrologiis*, Ferrarius in  *catalogo SS. qui non sunt descripti in Martyrologio Romano*, omnes ad diem 28. Januarii, Bollandiani ad eandem diem, Natalis Alexander  *loc. cit.*, Spondanus ad an. 814. num. 5., Baillet in  *vita Caroli Magni ad d.*, Franciscus Victon. in  *suo tract. de Canoniz. SS. cap. 27.* Ceparius in  *suo directorio manuscripto Canonizationum cap. 12. num. 2.*

5 Alexandro III. Lucius III. successit. Hic anno 1182. inter Sanctos retulit Brunonem Episcopum Signinum; qui, postquam Ecclesiæ suæ per aliquot annos præfuerat, Cassinum se recipiens, ibique Abbas electus, populo instantē, a Romano Pontifice iussus fuit ad Ecclesiam suam redire in qua sancte mortuus est. Angelus Rocca in  *suo tract. de Canonizat. SS. pag. 130.* testatur, bullam Canonizationis asseruari Romæ in bibliotheca PP. Congregationis Oratorii; sed, utut tempore, quo auctor scribebat, ea bulla in citato loco reperiretur, certe, me instante, perquisita fuit a P. Gaspare Cerato ex ejusdem Oratorii Familia, viro diligentissimo, & in Ecclesiastica eruditione optime versato, & minime est inventa. Signiæ tamen hæc legitur inscriptio: *Æterna memoria Brunonis, quem Lucius III. Pontifex Maximus Cardinalium, & Episcoporum conventu Signi in ecclesia B. Mariæ, ubi defunctum corpus quiescebat, inter Sanctos jussit adscribi anno ab ejus abscessu LVIII. S. P. Q. S. (idest) Senatus, Populusque Signinus.*

6 Clemens III. SS. Confessorum canonici solemniter adscripsit BB. Othonem Episcopum Bambergensem, Stephanum Auctorem Ordinis Grandimontensis, Malachiam Hiberniæ Episcopum, ut ex ejus Constitutionibus in  *novo codice Canonizationum.*

7 De Cælestino III. in eodem codice per authenticas Constitutiones demonstratur, ab eo inter SS. relatum fuisse Ubaldum, Bernuwardum in Saxonia Episcopum, Joannem Gualbertum, atque Geraldum. Et præter hos in sexta lectione antiqui Breviarii Ecclesiæ Lemovicensis apud continuatores Bollandianos  *tom. 1. Aprilis hæc de S. Gaucherio Canonico leguntur pag. 853. Floruit anno Domini 1130. ; succedentibus vero temporibus ex Divina revelatione canonizatus fuit, Sanctorumque catalogo adnotatus tempore Domini Cælestini Papa, præfulante in Sede Lemovicensi Domino Sebrando; quod anno 1194. & sic tempore Cælestini III. contigisse, docent subjecti versus ex vetusto libro Prioratus Aurelianensis, Anno milleno centeno cum nonageno quarto, clara virum meritorum summa revelat. Tum etiam, si fides præstanda est Joanni Tamajo tom. 2. Martyrologii Hispanici, B. Rodelfindus ab eodem Cælestino III. inter SS. relatus est. Sed de cultu huic Beato exhibitio infra sermo redibit.*

8 Plures ab Innocentio III. Canonizationes factæ sunt, quarum extant, in Bullario Romano, & in novo codice Canonizationum, Constitutiones: sed & aliæ Canonizationes factæ referuntur ab eodem, quarum tamen Apostolicæ litteræ non inveniuntur. Anno 1202. Pontifex hic SS. factis adscripsit Gilbertum Fundatorem Ordinis Sempringhamensis

in Anglia, anno post ejus obitum decimo quarto. Duplex hujus Sancti vita ab Auctoribus anonymis scripta habetur in Actis SS. Bollandianis *ad diem 4. Februarii*; &, quamvis posterior vita Canonizationem memoret ab Innocentio factam anno 1202., cujus non meminit prior, bulla tamen Canonizationis desideratur. Apud Surium & apud Bollandianos *ad d. 4. Julii* narratur, Procopium Bohemum Abbatem Ordinis S. Benedicti pie defunctum apparuisse Blasio coenobii sui Præposito, eique mandasse, ut Romanum adiret Pontificem, ipsumque excitaret ad se in Sanctorum album referendum; tum subditur, Blasium mandatis paruisse, sed Pontifice moras neccente, ipsi etiam Procopium apparuisse, & se Procopium esse dixisse: narratio tandem his concluditur verbis: *Procopii Sacerdotem Pontifex Blasium per sagaces & expeditos cursores reductum, cum avidè, presentibus tredecim purpuratis Patribus de Procopii gestionibus audisset, Divina re facta, Sanctorum numerum illum asserit: missoque in Bohemiam Guidone S. Marie Transiberim S. Callixti Presbytero Cardinali (Legato a latere vulgo dicto) Procopium sanctum, beatum, felicemque credendum, vocandum, colendum pronunciat, eique tanti nominis, & tituli apud omnes ferendi auctor est, idque an. D. N. 1204. IV. Non. Jun. Ita apud Surium loc. cit. n. 11. De hac Canonizatione mentio habetur etiam apud Ferrarium in catal. SS. quorum nomina descripta non sunt in Martyrol. R. ad. d. 2. Junii. Fatetur autem Archiepiscopus Ancyranus Justus Fontaninus in sua præfatione ad cod. Canoniz. se bullam perquisivisse, & non invenisse.*

9. Honorium III. plures Beatorum Canonizationes peregrisse, certum est ex ejus Constitutionibus sæpe citato codici insertis; ipsumque inter BB. retulisse Robertum primo Molismensem Abbatem, postea Cisterciensis Ordinis Fundatorem, ex ejus epistola 132. lib. 6. testatur Pagi junior in vita Honorii num. 34. In vita Roberti apud Bollandianos tom. 3. Aprilis pag. 668. Apostolicum Breve exhibetur, in quo permittitur Molismensibus, ut eum tamquam Sanctum, in sua ecclesia venerentur; & Manriquez in annalibus ad an. 1222. sustinet, sub initium anni sequentis fuisse Sanctorum canonis adscriptum.

10. Animus non est, nec intentio hic prosequendi ceteras Canonizationes, & Beatificationes a subsequenter Pontificibus factas, tum quia eorum Constitutiones extant in novo codice Canonizationum, tum quia in Operis decursu non deerit occasio de illis loquendi. Adnotare tantummodo nonnulla libet de Canonizatione S. Birgittæ, quæ mortua est anno 1391. Petrus Amelius Sacrista in suo Ordine Romano impresso apud Mabilonium tom. 2. *musci Italici* num. 153. peractæ a Bonifacio IX. Canonizationis caeremonias exponit, & bulla Canonizationis extat in novo codice Canonizationum. In Concilio tamen Constantiensi, instantibus Oratoribus Regnorum Scotiæ, Daniæ, & Norvegiæ, Joannes XXIII. eam iterum canonizavit, ob dubiam apud multos, Bonifacii auctoritatem propter schisma, quod tunc maxime vigeat. De hac Canonizatione loquitur etiam Trithemius, & tomo primo operum Gersonii

sonii extat celebris tractatus *de probatione spirituum* tunc Constantiæ habitus, cum de nova Birgittæ Canonizatione ageretur. Denique, ne dubium omnino aliquid superesset de Canonizantis auctoritate, supplicatum fuit Martino V. pro nova Canonizatione. Recens autem Martini Constitutio edita est Florentiæ post Concilium Constantiense anno 1419. & est impressa ante Revelationes S. Birgittæ; pluribusque prosequuntur Pagi tom. 4. brev. RR. Pontif. in vita Joannis XXIII. pag. 387., & Spondanus ad annum Christi 1415. num. 2. Notanda sunt verba Constitutionis Martini V. confirmantis Canonizationem S. Birgittæ, quæ sunt hujusmodi: *Ad bonarum mentium, & conscientiarum serenationem puriorem*. Depulsa temporum caligine, in clara luce hodie positum est, legitimum jus Pontificatus penes Urbanum VI. ejusque successores Bonifacium IX. Innocentium VII. &c. stetit; sed cum id tunc temporis adhuc eliquatum non esset, Martinus V. necessarium esse existimavit sua indubia auctoritate Canonizationem a Bonifacio IX. factam confirmare. In bulla Canonizationis S. Catharinæ Senensis Pius Papa II. inquit... *Divino consilio factum fuisse, quod eadem schismatis tempore non fuisset in SS. album relata ab Urbano VI. aut Innocentio VII. aut Gregorio XII. ne serviente divisionis procella, quod sanctum una obedientia decrevisset, profanum altera censuisset*. Quibus profecto verbis Pius non significat cassam futuram fuisse & irritam Canonizationem, si a quoquam illorum Pontificum prodiiisset, sed futuram fuisse obnoxiam obtreccionibus eorum, qui in obedientia, ut appellabatur, Pseudopontificum Avenionensium erant; præsertim cum S. Catharina Senensis apertissime & constantissime pro Urbani VI. jure stetit, quod Virginis sanctissimæ, & miraculis ac familiari cum Deo communicatione clarissime testimonium, pondus ingens Urbani causæ addiderat.

II Ex ultimis Canonizationibus per Romanos Pontifices expletis, sola deerat bulla Canonizationis S. Elisabeth Reginæ Portugalliæ, quæ solemniter fuit inter Sanctas relata anno Jubilæi 1625. a sanctæ memoriæ Urbano VIII., uti legitur in lectionibus proprii Officii, quod in ejus festo celebratur in Ecclesia universali, & testatur Lucas VVadingus auctor contemporaneus, ac Romæ degens, in *suis annal. ad an. 1336. num. 33*. Ut ejus defectum, quantum in nobis est, suppleremus, in prima editione hujus Operis ad calcem præsentis tomi exhibuimus relationem de ejus sanctitate & miraculis factam in Consistorio secreto per Cardinalem a Monte sacri Collegii Decanum. Eadem relatio adhuc extat inter appendices hujus nostræ tertię editionis. Sed cum a nobis ad summum Pontificatum evectis, bulla quæ deerat Canonizationis S. Elisabeth fuerit expedita, eam in appendices Operis hujus rejicimus una cum iv. bullis Canonizationum peractarum a sanctæ memoriæ Clemente XII. prædecessore nostro, quæ non fuerunt insertæ in codicem Canonizationum sæpe memoratum; utpote ante dictas Canonizationes editum. Et hæc quoad interventum Pontificiæ auctoritatis in Beatificationibus & Canonizationibus dicta sufficere

cere posse videntur: ex quibus colligere fas est, nullatenus subsistere quod a nonnullis asseritur, initia videlicet Beatificationis esse referenda ad B. Gregorium Papam X. qui concessit, ut corpus B. Luchesi possit *processionaliter* deferri, sicuti arguunt *Matta de Canonizat. SS. part. 1. cap. 2. num. 17.* & *Schiara in suo Romano Pontifice art. 26. §. 1. num. 7.*; quidquid enim sit de Beatificatione S. Romualdi, nulla superest dubitatio de Beatificatione Guilhelmi Eremitæ a Malavalle in Tuscia, facta ab Alexandro III., uti supra visum est.

## C A P U T X.

*De Pontificia auctoritate extra Concilium, & de jure Beatificandi, & Canonizandi summo tantum Romano Pontifici reservato.*

**Q**UAMVIS in superioribus nonnullas retulerimus Canonizationes Sanctorum a Romanis Pontificibus factas in plenariis Conciliis, eam videlicet S. Udalrici a Joanne XV., S. Gerardi a Leone IX., S. Godehardi, & S. Sturmii Abbatis ab Innocentio II. & nonnulla quoque Romanorum Pontificum responsa attulerimus, quibus dixerunt, vitam & miracula Canonizandorum esse in Concilio generali perpendenda, antequam eorum fiat relatio in album SS.; uti colligitur ex responsis Urbani II. & Callisti II. & ex bullis, seu Decretalibus Eugenii III. & Alexandri III. editis pro Canonizatione Henrici I. Imperatoris, & Regis Eduardi; certum nihilominus esse videtur, plures alias Canonizationes illis iisdem temporibus, quibus nonnullæ in Conciliis generalibus factæ sunt, extra Concilium peractas fuisse, & eosdem Pontifices, qui Concilii generalis meminerunt pro faciendis Canonizationibus, Sanctorum Canonizationes extra Concilia fecisse. Exempla ex supra relatis desumi possunt. Ut enim cetera prætereamus, ad rem, de qua nunc agitur, satis est gesta S. Leonis IX. revocare, qui, si S. Gerardum in SS. numerum retulit in Concilio Romano, extra Concilium sanctificavit SS. V. Volfgangum, & Erhardum; gesta Benedicti VIII. & Benedicti IX. qui extra Concilium SS. albo adscripserunt duos SS. Simeones; gesta Palchalis II. qui simili modo processit in Canonizatione SS. Petri Anagnini, & Angilramni; gesta demum Eugenii III. & Alexandri III. quorum primus extra Concilium canonizavit S. Henricum Imperatorem, & alter extra Concilium nedum Sanctis adscripsit Edwardum, sed etiam Thomam Cantuariensem, Bernardum Abbatem, & alios: ita ut de summi Pontificis potestate peragendi Canonizationes extra Concilium generale nulla videatur rationabilis adesse dubitatio; & eo magis, si ad antiquissima tempora supra indicata respiciamus, quibus Beatificationes factæ ab Episcopis, sive Martyrum, sive Confessorum, vim obtinebant Canonizationis vel per expressam summi Pontificis approbationem, vel per universalem extra Concilium Ecclesiæ con-

consensum, in quo tacita summi Pontificis approbatio continebatur.

2 Similia porro contigerunt in hæresum condemnationibus, cum aliquot a Romanis Pontificibus in Conciliis, sed pleræque aliæ extra Concilia fuerint ab ipsis condemnatæ, & Pontificiæ auctoritatis interventus accesserit in earum etiam hæresum condemnatione, quæ in Synodis particularibus ab Episcopis factæ fuerunt. *Plurimi Pontifices* ( verba sunt egregii Doctoris Duvalli tom. 2. in 2. 2. de potest. Eccles. part. 2. quæst. 2. ) *Plurimi Pontifices* varios errores absque ullo generali Concilio condemnarunt, quorum condemnatio a tota Ecclesia accepta fuit; ut patet ex primis trecentis annis, in quibus nulla unquam Concilia generalia propter ingruentes persecutiones coacta leguntur, cum tamen multa in Fide quæstiones toto hoc tempore feliciter soluta & determinate fuerint per Pontificum definitiones. Nec dicant adversarii, hos errores pro hæresibus habitos non fuisse, donec his Pontificum definitionibus, Conciliorum generalium calculus accederet. Falsum enim est, omnibus, quotquot fuerunt, erroribus a Sede Apostolica damnatis, & qui jam pro hæresibus in Ecclesia habentur, semper accessisse Concilii cujusdam generalis condemnationem. Argumentum eruditissime de more prosequitur Thomassinus dissert. 4. in Synodum Gangrensem, ubi, post collecta undique illustria exempla, num. 36. ita concludit: *Quibus hac testium copia non satis est, nescio quid satis sit; constat enim abunde tot testimoniis, Ecclesiis, Episcopisque omnibus sive Synodice, sive extra Synodos, sola execratione novitatis hæreses exorientes damnantibus, vel præisse, vel accessisse, vel successisse Sedem Apostolicam, & summum auctoritatis pondus, & vim ineluctabilem, atque universalem adscisse. Si quid alia Ecclesia, Synodive perficere non poterant, ipsa efficiebat; si quid effecerant, perficiebat; si quid privatim sanxerant, id ipsa toto orbe Catholico auctorabat. Nihil invidia, nihil contentionis strepebat. Nunc, quod cetera sequerentur, ipsa dictare occupabat, certa de membrorum suorum consensu & obsequio. Nunc reliquas in impietatis apud se exorta damnationem præcurrentes ipsa lubens sequebatur, confirmabat, & sin minus tempore, certe consensu, dignitate, auctoritate antecedeat. Ita sive præfinirent alia Synodi quod, ut agebat Profer, regna sequerentur, tum demum cum Roma probasset, sive præciperet Romana Ecclesia Fidem omnibus amplectendam scribere, plerumque temporis, semper auctoritatis ordine caput membris anteibat. Cumque Fides communis sit Ecclesiarum omnium decus, non poterat illa a privatis vel Ecclesiis, vel Conciliis sanciri, nisi præsumpto, vel adhibito consensu, suffragioque principis Ecclesie, cujus unius jus erat confirmare, & promulgare quod omnes Ecclesia sequerentur.*

3 Hæc quoad Pontificiam auctoritatem extra Concilium. Nunc autem, ut transitum faciamus ad jus soli Romano Pontifici reservatum Beatificationis & Canonizationis honores indulgendi, refumenda sunt nonnulla, quæ tempore Alexandri III. acciderunt, quæque in superioribus fuerunt indicata. Cum Arnulphus Episcopus Lexoviensis Alexandro III. summo Pontifici scripisset, monasterium quoddam Gristanum scandalis undi-

undique esse repletum, & inter cetera, quemdam ejus Procuratorem loco Abbatis absentis substitutum, ebrium a duobus aliis Monachis fuisse interemptum, quia is, quem Procuratorem reliquerat, ebrius in refectorio super coenam duos de fratribus cultello percussit, atque ab eis incontinenti percuta, quam casus obtulit, intersectus, uti legitur in dicti Arnulphi epistola apud Cardinalem Baronium ad ann. 1181. num. 7. & 9., & taliter occisum a loci habitatoribus cultum Martyris obtinuisse; edita fuit a prædicto Pontifice epistola illa, quæ fuit inserta Decretalibus ad tit. 45. de Reliq. & venerat. Sanctorum: Audivimus, quod quidam inter vos diabolica fraude decepti hominem quemdam in potatione & ebrietate occisum, quasi Sanctum more infidelium venerantur, cum vix pro talibus in ebrietatibus pereimptis orare permittat Ecclesia. Dicit enim Apostolus, quod ebrii homines regnum Dei non possidebunt. Hominem ergo illum de cetero colere non præsumatis, cum, etiamsi per eum miracula plurima fierent, non liceret vobis pro Sancto, absque auctoritate Romana Ecclesie, eum publice venerari.

4 De hac Alexandri III. Decretali loquendo, magna est inter scribentes disputatio, an per illam inductum fuerit jus novum Sedi Apostolicæ reservans, privative quoad Primates, & Episcopos, & ceteros omnes, jus statuendi, utrum huic, aut illi servo Dei cultus præstari debeat, necne; ablata ceteris omnibus facultate, quam habebant, uti vidimus, in suis provinciis & diocæsisbus indulgendi Dei servis Beatificationis honores: seu potius, an jus hoc privativum fuerit ante prædictam Decretalem inductum, perinde ac si eadem latam præsupponat aliam legem, aut antiquiorem inductam consuetudinem, quæ Apostolicæ Sedis jus illud privativum reservaverit.

5 Censent nonnulli, jus novum fuisse a dicta Decretali statutum. Ita sentit Ven. Dei servus Cardinalis Bellarminus lib. 1. de SS. Beatit. cap. 8. n. 2. Quod olim licuit, modo non licet: siquidem Alexander III. & postea Innocentius III. videntes abusus, qui oriebantur circa Sanctorum cultum, prohibuerunt, ne deinceps aliquis pro Sancto coli inciperet sine Romani Pontificis approbatione. Van Espen juris Eccles. univ. part. 1. tit. 22. cap. 7. num. 14. ait: Quin & circa idem tempus (Alexandri videlicet III.) Pontifices sibi auctoritatem canonizandi privative coeperunt reservare; eaque reservatio generaliter, & ab omnibus tandem Ecclesiis recepta fuit, potissimum auctoritate cujusdam Decretalis Alexandri III. Joannes Mabillonius, & Lucas D' Acheri in sæpe citata præf. sec. 5. Bened. §. 6. n. 105. inquirunt: Jam vero Alexander III. id, tamquam unam ex majoribus causis, ad Romanum Pontificem pertinere edixit: & sequuntur Pagi in breviario Roman. Pontif. in vit. Alexandri III., Gravina in continuatione 2. part. Catholic. præscript. tom. 4. pag. 209. §. Merito vero Alexander, Sausstajus in apologet. Theolog. de SS. cultu §. 9. vers. Solemnis est, pag. 33. post Martyrolog. Gallie. Alii contra in ea sunt opinione, quod nullum jus novum fuerit inductum per Decretalem sæpe citatam. Ita docent Gonzalez in dicto cap. Audivimus sub num. 6. de Reliq. & venerat. SS. Viçton.

Victon. in tract. de Canoniz. SS. cap. 12. prope finem, Auctor tractatus Canonizationis SS. ad Cardinalem Montis Regalis 2. part. cap. 1. ubi, ponderata Alexandrina Constitutione, subdit: *Existimo autem, hanc legem esse multo antiquiorem; non enim hoc loco id statuit Pontifex, sed quasi jam constitutum commemorat, Bivarius in comment. chronici Marci Maximi in S. Joanne Eremita vindicato §. 6. & fusius hoc ipsum prosequuntur Godefridus Henschenius & Daniel Papebrochius in propyles dissert. 20. num. 6. quo in loco, pensatis verbis Alexandri, subjungunt: Hac vero loquendi forma decretum non facit, sed factum, & vulgo notum supponit.*

6 Verum, quidquid sit de hac controversia, quemadmodum certum esse videtur, uti supra dictum est, nunquam Episcopos potuisse veras peragere Canonizationes: præcipere etenim, ut aliquis tamquam Sanctus publico cultu colatur in universa Ecclesia, nec potest, nec potuit unquam ad eum pertinere, qui limitatam obtinet jurisdictionem in una diocesi, aut provincia, sed ad eum tantummodo, qui jus obtinet in universa Ecclesia: ita perspicuum apparet, Primates, Archiepiscopos, aut Episcopos olim potuisse cultum publicum indulgere erga Martyres, aut Confessores in sua provincia, aut diocesi, quod est idem ac dicere, Beatificationis honores concedere, aut advocata summi Pontificis auctoritate, aut etiam jure suo, absque eo quod ab illa dependerent, sicut ex supradictis facile colligi potest.

7 Perstitit hæc Episcopalis jurisdictio beatificandi jure proprio, & sine subjectione summi Pontificis auctoritati, usque ad tempora Alexandri III. summi Pontificis: eo quippe sæculo, quo ipse vixit, plures Beatorum corporum elevationes sola Episcopali auctoritate factæ leguntur. Ex Sigeberto refert Molanus in natalibus SS. Belgii ad diem 23. Maji, plura a Deo patrata fuisse miracula intercessione S. Guiberti Fundatoris monasterii Gemblacensis, legationemque ad Othbertum Leodiensem Episcopum fuisse susceptam, ut ei publicum cultum indulgeret; examen autem instantiæ fuisse ab eo remissum ad Fridericum suum Archiepiscopum Colonensem, qui, convocata suorum Ecclesiasticorum Synodo, petitioni libens annuit; quocirca Episcopus anno 1110. elevationem fecit beati corporis coram Abbatibus, Archidiaconis, & magna multitudine Christifidelium utriusque sexus. Continuatores Bollandiani ad diem 6. Julii ex Jacobo Mejero in annalibus Flandricis, & ex aliis Actis authenticis testantur, levatum fuisse anno 1121. corpus B. Arnulphi Episcopi Sueffionensis, auctoritate Lamberti Episcopi Tornacensis. Putat Balutius, anno Domini 1122. auctoritate Episcopali canonizatum fuisse Odonem, sive Othonem Urgellæ in Hispania Tarraconensi Episcopum; sed, cum id desumat ex diplomate e scriptis Ecclesiæ Urgellensis prolato, & edito in Marca Hispanica in appendice num. 384. pag. 1276. ubi de Petro Episcopo sic legitur: *Episcopus, & universus Canonicorum cætus, magnam atque prælaram beate memoria Pontificis Odonis celebrantes venerandam solemnitatem, natalis ejus diem annuatim canonizari,*

nonizari, & canonice ab omnibus institui, atque laudabiliter confirmari, uno ore omnes collaudant, quatenus semper deinceps inter ceteras præcipuas anni festivitates hac procul dubio digne & laudabiliter, uti Domini ac Patroni nostri Sancti Pontificis Ermengaudii, Divinis veneranda Mysteriis observetur; nemo est, qui non videat, prædictum nec esse Canonizationis decretum, uti putavit Balutius, nec esse decretum Beatificationis eo anno peractæ, sed esse decretum de festo in honorem Odonis ritu solito elevationis inter Beatos pridem relati deinceps concelebrando. Felicius Pagi junior in *vit. Alexandri III. num. 119.* testatur, Episcopos prædicto jure suo usos fuisse prope tempora electionis Alexandri III. hoc est annis sex ante ejus ad Pontificatum assumptionem: ex Mabillonio siquidem habetur, *tom. 6. annal. pag. 535. num. 28.* Hugonem Archiepiscopum Rotomagensem anno 1153. de elevatione S. Galterii seu VValterii Abbatis Pontifarenfis litteras dedisse, in quibus commemorat, *invitantibus, immo cogentibus miraculis*, Theobaldo Parisiensi, aliisque præsentibus, S. Galterii Reliquias a se levatas & translatas fuisse, concessis insuper indulgentiis in eorum gratiam, qui ipsius S. Galterii beneficia implorarent. Demum eo ipso anno, quo Alexander III. ad summum Pontificatum electus est, affirmant continuatores Bollandiani *tom. 1. Julii*, auctoritate Gerardi Tornacensis Episcopi factam fuisse corporis elevationem & translationem S. Guthagonis.

8 A primis itaque Ecclesiæ sæculis supra vidimus factas fuisse, tacita, vel expressa intercedente Pontificia auctoritate, SS. Canonizationes, & venerabilium virorum Beatificationes, salva tamen & integra Episcoporum auctoritate beatificandi, nullo etiam Pontificiæ auctoritatis invocato præsidio: & quod attinet ad Canonizationes, earum ritum esse antiquiorem Joanne XV. licet primum peractæ Canonizationis diploma sit illud S. Udalrici inter Sanctos ab eodem Pontifice relati; & licet monumenta adsint, quæ comprobant, eo potissimum tempore promotas fuisse apud Sedem Apostolicam instantias pro impetrandis Canonizationibus, quemadmodum colligitur ex *tom. 2. Monastici Anglicani pag. 125.* ubi habentur hæc verba: *Studebant plures religiosa devotione patria sua Sanctos exaltare, pia sollicitudine vitas illorum investigare, summique Pontificis auctoritate ipsos canonizare.* Edita porro ab Alexandro III. supra relata Decretali, subsequencia Ecclesiastica monumenta aperte loquuntur non solum de potestate canonizandi, sed etiam beatificandi summo Romano Pontifici privative quoad alios omnes reservata. Innocentius III. in *cit. cod. Canoniz. in bulla Canonizationis B. Chunegundis Imperatricis* de potestate canonizandi sic effatur *pag. 38.* *Cum hoc sublime judicium ad eum tantum pertineat, qui est B. Petri successor, & Vicarius Jesu Christi.* Archiepiscopus Viennensis in Gallia, & ejus Suffraganei Gregorio IX. summo Pontifici supplices preces exhibuerunt pro obtinenda Canonizatione S. Stephani Diensis Episcopi, his conceptis verbis: *Quia nemo, quantacunque meritorum prerogativa polleat, ab Ecclesia Dei pro Sancto habendus, aut venerandus est, nisi prius per Sedem Apostolicam*



*felicitatem ejus sanctitas fuerit approbata. De Thoma Comite Lancastræ, qui, cum graves egisset similitudines cum Eduardo II. Anglorum Rege, in bello captus anno 1322. securi percussus est, sama increbuit, eum pie & Martirem occubuisse: cumque populus Londinensis ejus imaginem colere cœpisset, quod ad puram Beatificationem ad summum referri poterat, Eduardus II. Stephanum Episcopum Londinensem admonuit, ut cohibeat fatuæ accedentes ad quandam tabulam S. Pauli Londonia existentem, in qua effigies Thoma quondam Comitum Lancastræ, quam absque auctoritate Ecclesiæ Romanæ tamquam rem sanctificatam colunt & adorant, asserentes ibi fieri miracula in opprobrium totius Ecclesiæ; rursumque admonet, ut dictum populum, ne ad tabulam prædictam accedere, orationes, oblationes, seu alia ad cultum Divinum tendentia, absque auctoritate Ecclesiæ Romanæ, ibidem facere præsumant, cohibeat modis omnibus; prout ex officii sui debito ad se juxta Canonicas sanctiones noverit pertinere; uti legitur in collectione Actor. public. Thoma Rymer. tom. 3. pag. 1033. ubi pariter tom. 4. pag. 268. 421. & 478. referuntur epistolæ Eduardi III. ad Joannem XXII. pro dicti Thomæ Canonizatione impetranda. Sed, an id quoad potestatem beatificandi fuerit ab omnibus Episcopis executioni mandatum, scitemur, nos maxime dubitare; fortasse quia Alexander III. in sua Decretali generaliter locutus non est statuendo, nulli posse publicum cultum deferri sine Sedis Apostolicæ auctoritate, sed sermonem ad eum defunctum in ebrietate occisum restrinxit inquit: Etiam si per eum miracula fierent, non liceret ipsum &c. Quapropter fieri potuit, ut Episcopi aliqui non putarint, doctrinam illam ab isto particulari casu ad alios casus longe diversos debere transferri, quodque de uno nequam homine in ipsa ebrietate interfecto Pontifex dixerat, intelligi voluisse dictum de quolibet viro, cujus haud dubia esset, sed certo explorata sanctitas eximia vitæ, ac frequentia essent ante & post obitum prodigia, eaque non vulgi modo, sed sapientium etiam omnium judicio comprobata. Scimus, tum Theologos, tum juris Canonici Interpretes in ea fuisse sententia, quod epistola Alexandri III. universaliter prohiberet, cultum publicum exhiberi erga quemcumque Dei servum, etiam sub prætextu miraculorum, absque Sedis Apostolicæ auctoritate; & nos huic adheremus sententiæ. Sed asseri non potest, nullum repertum fuisse, qui post Alexandri III. Decretalem in ea fuerit sententia, quod Episcopi, etiam post eam, antiquam retinuerint auctoritatem Beatificationis honores indulgendi erga Dei servum in sua diocesi. Thomas VValdenſis, qui sub Martino V. scripsit non sine præclara ejusdem Pontificis laude atque approbatione, quæ ejus libris præfixa legi potest, in tom. 3. Sacramental. cap. 122. ubi VVicleſi de Canonizatione errores doctè consutat, hæc habet pag. 227. Sed forte supponit (VVicleſi) ac supputat unum cum magistro suo Guillelmo dicente, quod Canonizatio Sanctorum seu veneratio pertinere debet Concilio generali Christifidelium tantum; quia sic, inquit, Gregorius IV. ex assensu Ludovici Imperatoris, & omnium sanctorum Episcoporum instituit, ut*

*festum omnium Sanctorum celebraretur : quod Guillelmi commentum pluribus refellere VValdensis pergit . Deinde hæc magis ad rem nostram subjicit : Quid impedit Episcopum , ne canonice inquirat de vita diutina talis Sancti , ut pleniorē trahat notitiā ? Et si eam invenerit Sanctorum cultu dignam , auctoritate Episcopali confidenter exprimere Sanctum Dei plebibus venerandum ? Et si omnis Episcopus hoc habet juris , quid maxime facere poterit Episcoporum Episcopus ?* Confundit hic VValdensis Canonizationem cum Beatificatione , sed expressis verbis potestatem admittit Episcoporum Beatificationis , seu particularis Canonizationis indulgentiæ in sua diocesi . Accedunt solemnia posteriorum temporum facta , quorum nonnulla hic recensemus . In chronico Episcoporum Mindensium ad annum septuagesimum tertium sæculi xiv . ita legitur : Eodem anno S. Felicianus Episcopus miraculis coruscare cepit : & ideo Episcopus VVedekindus festum ejus per totam diocesim Mindensem celebrari instituit . Eodem sæculo , anno videlicet 1489 . Franciscus Piccolomineus tunc Episcopus Senensis , & deinde summus Pontifex assumpto nomine Pii III . , B. Aldobrandescæ viduæ corpus solemniter elevavit , ut ex monumentis tabularii Senensis refert Lombardellus apud continuatores Bollandianos tom. 3. Aprilis ad diem 26. pag. 471. num. 37. Quid plura ? Anno 1265 . e vivis excessit B. Bonifacius Lausanensis Episcopus . Anno 1600 . ejus Reliquiæ ex humo levatæ sunt , & super aram collocatæ . Fuit id reprobatum ab Archiepiscopo Mechliniensi , qui processum de ejus Sanctitate & cultu instrui jussit , & instructum voluit a Theologis examinari , inter quos Guillelmus Estius . Completoque examine anno 1603 . decretum edidit , in quo , facta mentione antiqui cultus , sic pronunciavit : *Qua de causa nos his litteris assentimur , ut prædictum corpus in posterum elevatum maneat , & tamquam Venerabilis & Beati viri honoretur , ornetur , & devote visitetur ab omnibus Christifidelibus , & devotis personis . Non tamen honorem admittimus ei fieri , qui Canonizato proprius est : uti habetur apud continuatores Bollandianos tom. 3. Februarii pag. 152 . Papebrochius tom. 3. Aprilis pag. 993 . habita ratione alterius Decretalis Innocentii III . tit. de Reliquiis & veneratione Sanctorum , sub quo eodem titulo extat & ea Alexandri III . affirmat hoc decretum non usque adeo rigide servatum esse ; donec illud renovaret Innocentius III . post annos 40 . Et neque tunc putavisse Episcopos , sublatam sibi facultatem circa inferioris ordinis cultum ; quem Beatorum dicimus , permittendum , modo ab Officio & Missa abstineretur . Et hoc usque ad Concilium Tridentinum valuit . Cujus decretis insistsens Urbanus VIII . vetuit absque speciali Sedis Apostolica licentia deinceps aliquid novi induci , & abrogari præcipit quidquid citra eam fuerat recentius introductum . Alibi a nobis demonstrabitur etiam post Innocentium III . factam fuisse auctoritate ordinaria ab Episcopis concessionem Officii & Missæ in honorem eorum , quibus in sua diocesi indulgebant Beatificationis honores . In alio quoque loco versus Concilii Tridentini sensus explicabitur . Et ut finis tandem imponatur præsentii quæstioni , dicimus , ab Alexandro III . fuisse Episcopis sublatam beatificandi auctoritatem :*

auctoritatem : id forte non fuisse ab omnibus Episcopis executioni mandatum ; sed omnem & quamcumque controversiam fuisse sublatam per bullam Urbani VIII. editam anno 1634. de qua suo loco sermo instituetur, cum in ea clare statuti fuerint fines auctoritati Episcopali, & omnia ad cultum publicum Beatorum pertinentia, & ipsa servorum Dei Beatificatio fuerint clarissimè Sedi Apostolicæ reservata.

## C A P U T X I.

*De eodem privativo Jure juxta scribentium assertiones.*

**A**D comprobationem privativi juris Romanorum Pontificum in Beatificatione, & Canonizatione Sanctorum, operæ pretium esse videtur assertiones afferre eorum, qui de materia scripserunt.

**2** Prima autem est, quod hodie ita pertinet ad summum Pontificem Dei servos in Beatorum, & Sanctorum numerum referre, ut id interdictum sit Patriarchis, Primatibus, Metropolitanis, Archiepiscopis, & Episcopis. Contelor. de Canonizat. SS. cap. 4. per totum, & præsertim n. 14. Mattea de Canonizatione SS. par. 4. cap. 4. num. 3. & 4. Castellan. de Canonizat. SS. quæst. 3. principali §. Ampliatur præmissa, Malvet. de Canonizat. SS. dub. 2. num. 1. & seq. & signanter sub num. 12. inter tractatus magnos tom. 14. Gambar. de auctoritate Legati lib. 2. vers. Illud nosse num. 233. & num. 234. inter tractatus magnos tom. 13. part. 2. Mauchler de monarchia Ecclesie 2. part. lib. 4. cap. 7. sub num. 1. §. At Christiana, Barbosa in cap. 1. num. 6. de Reliq. & venerat. SS., Lezana consult. 1. num. 2. Dartis de benefic. sect. 1. cap. 3. pag. 12. litt. C., Van Elphen jur. Ecclesiast. part. 1. tit. 22. cap. 7. num. 15. Clemens VI. operam strenuam navavit Armenis ad Catholicam Fidem reducendis. Sed cum Armenus Patriarcha variis verborum ambagibus & involucris eluderet ejurationem errorum, sinceramque & apertam Fidei professionem, litteras ad illum Clemens Papa dedit Pontificiæ gravitatis & prudentiæ plenas, quibus versutum hominem commonet, ut clare, diserte, dilucide, pure, ac simpliciter errores detestetur, & Fidem Catholicam solum omnem exosam profiteatur. Litteras Clementis integras Raynaldus profert in annalibus ad ann. 1351. Quod nostra interest, nos ex numero 16. hanc particulam damus: *Adhuc, inquit, cum Canonizationes Sanctorum, & promotiones illegitimarum ad sacros Ordines, sint casus, qui inter alios tantummodo Romano Pontifici reservantur, & ad nullum alium Prelatum Ecclesiæ pertinentes, nisi ipse Romanus Pontifex specialiter aliquibus duxerit committendos; miramur, quod te dicis prædictos duos casus auctoritate propria velle penes te retinere, quod nullum signum est obedientiæ & reverentiæ, quas ad Romanum Pontificem in præmissis capitulis te prætendis habere. Quapropter ad hoc cogimur te requirere, ut nobis in scriptis respondeas, si vis Traditiones orthodoxorum Patrum, ac Decretales, seu Constitutiones Sanctæ & Apostolicæ ac Romanæ Sedis reverenter suscipere, docere, atque servare?*

3 Se-

3 Secunda propositio est, quod Dei servos in Beatorum, aut Sanctorum catalogum referre non pertinet ad sacrum Collegium Cardinalium, licet Sedes Apostolica vacet; quemadmodum late docent Contelor. de Canoniz. SS. cap. 6. num. 1. & seq. Matta de Canoniz. SS. part. 4. cap. 4. sub num. 4. §. Cardinalium Collegium, Castellan. de Canoniz. SS. quest. 3. principali §. Quæro quid de Collegio, Ceparius in suo director. MS. Canonizar. SS. part. 1. cap. 2. num. 16. Schiara in suo Romano Pontifice propugn. art. 26. §. 3. num. 35. & probatur ex textu in cap. Ubi periculum, De election. in 6. & in Clementina Ne Romani eod. tit.

4 Tertia propositio est, quod Legatus de latere suæ legationis auctoritate devenire non potest ad actum Beatificationis, aut Canonizationis; quemadmodum defumitur ex textu in cap. Quod translationem, De offic. Legat. & late prosequuntur Barbof. in cap. 1. num. 7. de Reliq. & venerat. SS., Lezana consult. 1. num. 3., Castellan. de Canoniz. SS. quest. 3. principali §. Quæro quid de Legato, Contelor. de Canoniz. SS. cap. 6. num. 5. Matta de Canoniz. SS. part. 4. cap. 4. sub num. 4.

5 Quarta propositio est, quod nec Beatificatio, nec Canonizatio fieri possunt a Concilio generali, aut provinciali absque interventu auctoritatis Pontificiæ; uti, prætermisissis auctoritatibus, quæ docent, statuta Conciliorum generalium tum quoad Fidem, tum quoad mores & disciplinam robore carere & efficacia, si non sint summi Pontificis auctoritate confirmata, in terminis Canonizationis late prosequuntur Pavin. in relat. S. Bonaventuræ artic. 1. versic. Ex his inferitur (inter opera S. Doctoris tom. 2.) Barbof. in cap. 1. num. 8. de Reliq. & venerat. SS., Anacletus ad lib. 3. tit. 45. de Reliq. & venerat. SS. §. 1. quest. 2. Lezana consult. 1. num. 7. & seq. Castellan. de Canoniz. SS. quest. 3. principali §. Quæro quid de Concilio, Ceparius in suo director. Canoniz. SS. part. 1. cap. 2. num. 17. & 18. Contelor. de Canoniz. SS. cap. 7. per totum, Matta de Canoniz. SS. part. 4. cap. 4. sub num. 4. §. Quod attinet, Schiara in suo Rom. Pontif. propugn. art. 26. §. 3. num. 34.

6 Ultima propositio est, quod beatificare, & canonizare non pertinet ad Concilium generale, etiam si Sedes Apostolica vacet, cum in dictis circumstantiis Concilium tantummodo exequi valeat ea, quæ pro regimine universalis Ecclesiæ sunt executioni demandanda. Dominicus a Sanctissima Trinitate in tract. de summ. Pontifice cap. 18. in biblioth. max. Pontif. tom. 10. pag. 492. Nihilominus probabilius existimo, Concilium generale tunc nec posse, nec debere canonizare, sed prius ad electionem, vel declarationem veri Pontificis procedi debere per eos, ad quos respectivo de jure pertinet; & sequuntur Castellan. de Canoniz. SS. quest. 3. principali vers. Vacante etiam Sede, Matta de Canoniz. SS. part. 4. cap. 4. sub num. 4. §. Quod habet locum, Schiara in suo Roman. Pontif. propugn. art. 26. §. 3. num. 35.

7 Quoad rationes hujus privativi juris, celebris est doctrina Glossæ in cap. Gloriosus de Reliq. & venerat. SS. in 6. in qua sic legitur: Solus Papa habet

habet non solum certos de Sanctis præ aliis extollere, sed etiam eos canonizare multiplici ratione: primò, quia ista est una de majoribus causis, qua inter Christianos proponi possit, & sic est ad Sedem Apostolicam referenda. (De Baptismo. Majores): secundò quia miracula attribuuntur Fidei; hæc igitur questio, cum sit de Fide, præcipue est ad Sedem Apostolicam referenda (24. quæst. 1. Quoties): tertio, quia ad Papam spectat declarare dubia Scripturarum (Qui fil. suis legit. Per venerabilem): Multo fortius dubia Sanctitatis, quia circa maiora majus periculum vertitur: ideo &c. (supra de elect. Ubi periculum eod. lib. supra): quartò, ne propter multorum Episcoporum simplicitatem populum decipi contingat (supra eod. tit. c. 1. & 2.): quinto, ne in infinitum contingat Sanctos multiplicari, & sic devotionem refrigescere, & Sanctitatem vilescere (80. dist. Episcopi.)

8 Et hæc rationes primum quidem communiter juris Canonici Professores, atque Theologi sequuti sunt, Turrecremata in can. Pronuntiandum, quæst. 5. num. 22. de consecrat. dist. 3. Ostiensis in cap. Audivimus, num. 10. Joannes Andreas num. 5. Innocentius num. 2. Zabar. num. 6. Antonius a Butrio num. 7. Ancaran. num. 5. vers. Quæro, Fagnan. num. 22. & num. 27. Gonzal. num. 9. vers. Accedit, Granæet. num. 2. de Reliq. & venerat. SS., Contelor. de Canonizat. SS. cap. 4. num. 5. 7. & 11. Bordon. contror. 13. de Canonizat. SS. num. 8. & num. 11. Azor. instit. moral. part. 2. lib. 5. esp. 6. quæst. 6. Pirhing. ad lib. 3. Decretal. tit. de Reliq. & venerat. SS. §. 1. notabil. 2. Dominicus a Sanctissima Trinitate de sum. Pontif. Rom. cap. 18. in biblioth. max. Pontif. tom. 10. pag. 492. Gravina de Catholicis præscription. 2. part. tom. 4. pag. 316.

9 Deinde etiam eruditiores & in Ecclesiasticis historiis peritiores adhæserunt. Ven. Dei servus Cardinalis Bellarminus de SS. beatit. lib. 1. cap. 8. n. 3. Communis sententia est, pertinere ad summum Pontificem; nam id habetur cap. Audivimus & Cum ex eo De Reliq. & venerat. SS... & patet etiam ratione; nam ad eum spectat proponere toti Ecclesie quid sit credendum, & quid agendum in iis, quæ sunt Religionis, qui toti Ecclesie præest. Hanc eandem rationem amplectuntur continuatores Bollandiani in propyleo dissert. 20. n. 5. Ad quam denique solam (nempe Sedem Romanam) hujusmodi declarationes, vel assensum pertinere, jure optimo sancitum est; eo quod jubere, ut quis a tota Ecclesia pro Sancto habeatur, ad eum tantummodo spectat, qui jus habet proponendi toti Ecclesie quid credendum, agendumque sit in iis, quæ sunt Religionis, uti procul dubio est Sanctorum Canonizatio. Sermonem habendo de errorum periculo, quod aderat in Beatificationibus, quæ fiebant ab Episcopis, Saussajus in apologet. Theolog. de SS. cultu §. 9. post Martyrol. Gallic. pag. 33. Solemnis est quidem illa Alexandri III. quam Innocentius III. firmavit, Constitutio, qua inhibuitur est, ne deinceps aliquis pro Sancto coli incipiat sine Pontificis summi approbatione... At non, ut sibi hoc jus singulariter vindicarent, hanc restrictionem decrevere supremi illi Catholice Ecclesie Moderatores. Sed id extorsit & rei gravitas, & periculi magnitudo, & ipsa Metropolitancorum, Primatumque oscitantia, qua & pridem plurima Sanctorum non nomina

nomina solum, sed & Acta neglecta in Gallia nostra exciderunt. Lupus in notis ad Concil. gener., & provinc. tom. 3. pag. 567. Ad hos errores, & errorum pericula evitanda, Alexander III. emisit salubre edictum, laudatum ab incogniti scriptoris historica compilatione: hic Papa constituit, ut nullus novus Sanctus in veneratione haberetur, nisi ex auctoritate Apostolica, & nisi sit Canonizatus a Papa, tamen ante quilibet Episcopus suum Sanctum solemniter canonizavit. Non soli populo, sed etiam quibuscumque Episcopis canonizandi potestatem deinceps interdixit. Decretum extat in Romano Bullario. Nec sine fundamento. Etenim litteræ, quibus Secundus Tigrisitanus Episcopus, ac Numidia Primas factus in provincia sua persecutiones, & variorum Martyria Mensuris Carthaginensi Episcopo, ac totius Africana Dioceseos Primati retulit, & gloriæ in ipsis morte persanctos, uti Martyres honorari, seu canonizari commendavit, lecta fuerunt in Carthaginensi Collatione, ipsarumque compendia retinemus apud Sanctum Augustinum in dictæ Collationis breviculo. Ex ipsis lucet, non quovis in Africa Episcopos, licet provinciarum Primates, potuisse canonizare, sed eminentem hanc facultatem Primatiali Carthaginensium Sedi fuisse reservatam. Quapropter longe potiori jure ipsam sibi reservare potuit Sedes Romana. Et has easdem modo adductas rationes late exornant Auctor tractatus de Canonizatione SS. ad Cardinalem Montis Regalis part. 2. cap. 2. Franciscus Viëton. in suo tractatu Gallice composito de Canonizat. cap. 12. per tot. Rabaudy in suis exercit. Theolog. tom. 2. exercit. 3. cap. 1. §. Ceterum abusus pag. 139. & §. Ad tertium respondeo pag. 147.

10 Ex causis hucusque recensitis nonnullæ sunt, de quibus in superioribus sermo habitus est, nonnullæ de quibus alibi habebitur. Porro in superioribus satis innuimus, ad eum solum pertinere definitionem, quod aliquis inter Sanctos ubique colatur, qui jus obtinet in universa Ecclesia. Deceptiones quoque aliquando irrepsisse, in superioribus indicavimus, cum privato Episcoporum judicio cultus in honorem alicujus in unaquaque dioecesi, aut provincia decernebatur, quod ipsum latius infra demonstrabitur; ubi etiam examinabitur, an quaestio miraculorum, quod est idem, ac dicere, an Canonizatio hujus, vel illius Sancti, sit quaestio Fidei. Interea vero fas sit adnotare pretium rationis a Doctoribus ponderatæ de judicio majorum causarum ad Sedem Apostolicam deferendo. Innocentius I. ad Viëtriciam Rotomagensis epist. 2. apud Petrum Constant tom. 1. col. 749. ita scribit: Si majores causæ in medium fuerint devolutæ, ad Sedem Apostolicam, sicut Synodus statuit, (Nicæna videlicet can. 18.) & beata consuetudo exigit, post judicium Episcopale referantur. Subscribunt ceteri Patres, ut ex eorum testimoniis colligitur, Sanctus videlicet Leo tom. 1. epist. 4. cap. 5. ubi hæc habet: Si qua vero causa major evenerit, quæ a tua Fraternitate illic presidente non potuerit definiri, relatio tua missa nos confudat, ut, revelante Domino, cujus misericordia profitemur esse, quod possumus, quod ipse nobis aspiraverit, rescribamus, ut cognitioni nostræ pro traditione veteris instituti, & debita Apostolica Sedis reverentia nostro examine vindicemus: ut enim

ut enim auctoritatem nostram vice nostra exercere te volumus, ita nobis, qua illic componi non potuerint, vel qui vocem appellationis emisit, reservamus; S. Hilarus Conc. tom. 4. collect. Labbei col. 1043. epist. 8. cap. 2. sic loquens: In dirimendis sane gravioribus causis, & quæ illic non potuerint terminari, Apostolica Sedis sententia consulatur; Vigilius quoque ad Auxanium Arelatensem sic epist. 7. tom. 5. Concil. collect. Labbei col. 320. scribens: Si qua vero certamina aut de Religione Fidei, quod Deus auferat, aut de quolibet negotio, quod ibi pro sui magnitudine terminari non possit, evenerint; totius veritatis indagine diligentii ratione discussa, relationis ad nos seriem destinantes, Apostolica Sedi terminanda servate; Sanctus demum Gregorius epist. 54. ad universos Regni Childeberti Episcopos lib. 5. tom. 2. oper. in qua sic effatur: Si quam vero contentionem, quod longe faciat Divina potentia, de Fidei causa evenire contigerit, aut negotium emergerit, cujus vehemens sit fortasse dubietas, & pro sui magnitudine iudicio Sedis Apostolica indigeat; examinata diligentius veritate, relatione sua ad nostram studeat perducere notionem, quatenus a nobis valeat congruus sine dubio sententia terminari. Cumque causæ majores censcantur vel a rerum gravitate, veluti si de Fide, aut capite quodam disciplinæ ad cunctas, seu plures Ecclesias pertineat agatur, vel ex dignitate personarum, veluti depositionis Episcoporum; nemo est qui non videat, Sanctorum Canonizationes, utpote universam Ecclesiam respicientes, inter causas majores esse recensendas, adeoque solius Romani Pontificis iudicio reservatas: unde Socrætes lib. 2. cap. 8. & Sozomenus lib. 3. cap. 10. scripserunt, nihil sine Papæ auctoritate definiri, aut præscribi posse, quod ad universalem Ecclesiam pertineat. Quod si juxta Lelium Jordanem in tractatu de majoribus causis, causa aliquando dicitur major ob multiplices & graves difficultates, quæ in ea discutienda occurrunt; difficultates occurrentes in examine causarum Canonizationis, de quibus in universo hoc Opere habebitur sermo, facile suadebunt eas in classem causarum majorum esse adscribendas. Porro, si causa criminalis contra Episcopum, quæ depositione, aut privatione digna sit, causa est major, a solo summo Pontifice definienda juxta Ecclesiæ disciplinam a sacro Concilio Tridentino innovatam sess. 24. cap. 5. de reformatione; ecquis crit, qui Canonizationis causam, per quam Dei servus inter Sanctos adscribitur, inter causas majores a solo Pontifice definiendas dubitet recensere?

11 Hæc quoad rationes a Doctoribus allegatas. Propius autem ad Institutum redeundo, adversus ea, quæ in superioribus dicta sunt de Concilii generalis auctoritate, nonnulla opponi posse videntur, quæ in Concilio Constantiensi contigerunt. Fertur etenim, ab eo relatum fuisse in Sanctorum, vel Beatorum numerum Rochum; in eo actum fuisse de Beatificatione Petri de Lucemburgo Episcopi Methensis, & in Cardinalem album relati a Roberto Antipapa, qui Clementis VII. nomen assumpsit; & demum ab eodem Concilio expeditas fuisse litteras Remissoriales pro formanda inquisitione super vita & miraculis Nicolai Lincopen-

sis, Brimulphi Scarenfis Episcoporum, & Ingridis Monialis Ordinis Prædicatorum. Sed quod attinet ad cultum S. Rochi delatum, alia alibi afferrentur: nunc ne quid dicamus, quod anno 1414. quo publicus cultus ei delatus est, Episcopi qui Constantiæ erant congregati, immerito sibi nomen & auctoritatem universalis Concilii arrogabant, tunc quippe adhuc in tres partes Ecclesia scissa erat; quemadmodum ad rem animadverterunt continuatores Bollandiani in *propylæo dissert.* 20. num. 21. vis potissima stat in hoc, quod, licet ad propulsandam ingruentem luem, solemni pompa imago S. Rochi fuerit, omni comitante populo, per urbem Constantiensem delata, ex hac re utique inferri valet, tunc ei fuisse exhibitum publicum cultum; minime vero tunc eum fuisse in Sanctorum, aut Beatorum album relatum. Obierat etenim anno 1327. magna virtutum & miraculorum fama, quam publicus cultus, Episcopis approbantibus, fuerat comitatus, ut alibi videbitur: in quo rerum themate unusquisque facile perspicit, minus proprie dici, Rochum fuisse canonizatum, aut beatificatum in Concilio Constantensi.

12 Quoad Petrum vero de Lucemburgo, Clemens ille VII. Antipapa, qui eum Cardinalem creavit anno 1389., & sic vix elapsis ab ejus obitu duobus annis, causam Beatificationis ipsius commisit tribus ex sua obedientia Cardinalibus; cumque multis post annis, hoc est anno 1418. Andreas de Borvil Monachus Cælestinus processum super virtutibus & miraculis Constantiam detulisset, atque tum sui Monasterii nomine, tum Consulum civitatis Avenionensis Martino V. jam electo Pontifici supplicasset, ut Petrum in Beatorum album referret; Pontifex causam tribus Cardinalibus discutiendam remisit: attamen suum ea non habuit complementum, nisi tempore Clementis VII. legitimi Pontificis, qui die 9. Aprilis 1527. litteras Apostolicas expedit, in quibus, post enarratas virtutes, post exposita miracula, precesque sibi porrectas a Francisco Episcopo Cardinali de Claromonte Legato Apostolico, & pium denique Fidelium ad ejus tumulum concursum, ipsum censuit inter Beatos referendum. Apostolicæ litteræ integre editæ legi possunt apud Joannem Lanojum in *epist.* 11. ad Ludovicum Maræsum *tom.* 5. *oper. part.* 1. *pag.* 128. & in Actis Bollandianis *tom.* 1. *Julii pag.* 611. n. 17. *pag.* 614. num. 30. *pag.* 491. n. 35. Ex quibus omnibus evincitur, Petrum de Lucemburgo non fuisse Beatificatum a Concilio Constantensi, & gesta pro ejus causa esse Martino V. legitimo Pontifici, qui Concilio Constantensi præerat, adscribenda.

13 Similia contigerunt in causa Nicolai Lincopensis, Brimulphi Scarenfis Episcoporum, & Ingridis Monialis Ordinis Prædicatorum. Cum etenim pro parte Henrici Sueciæ, Daciæ, & Norvegiæ Regis, & Episcoporum provinciæ Upsalensis supplicatum fuisset Joanni XXIII. ante suam a Pontificatu depositionem pro prædictorum Beatificatione, & litteræ eidem ante depositionem nullatenus fuissent præsentatæ; Patres Concilii Constan-



Constantienſis, attento dictarum litterarum ſenſu, nonnullis tunc in Concilio degentibus commiſerunt, ut de more inquirerent ſuper vita & miraculis. Commiſſio hæc facta fuit vivæ vocis oraculo; & inter Commiſſarios a Synodo electos erat Odo S. Georgii ad Velum aureum Diaconus Cardinalis de Columna, qui ad ſummum Pontificatum evectus Martini V. nomen aſſumpſit, qui novam ſubinde commiſſionem expedit vit anno 1418. in qua geſta antea confirmavit & approbavit, omneſque defectus ſupplevit, qui ſorte irrepiſſent; ut ex ejus commiſſione deſumitur, in Bullario Ordinis Prædicatorum accurate collecto, & notis illuſtrato ab erudito viro P. Antonino Bremond ejuſdem Ordinis alumno, ubi tom. 2. pag. 543. hæc verba Martini habentur: *Noſtra ſuper his impertientes auctoritatis adminiculum, commiſſiones, necnon mandata, ac litteras hujusmodi, Et omnia inde ſecuta rata habentes & grata, illa auctoritate Apoſtolica laudamus, approbamus pariter Et confirmamus, ac præſentis ſcripti patrocinio communimus, ſupplentes omnes defectus, ſi qui forſan intervenerint in eiſdem. Quæ proſecto declarant, nec ex hoc, nec ex aliis ſupra recensitis factis quidquam legitime deduci poſſe adverſus ea, quæ in ſuperioribus dicta ſunt de non ſufficienti auctoritate Concilii generalis abſque Romani Pontificis approbatione in decernendis Beatitatis, aut Sanctitatis honoribus erga Dei ſervos, licet virtutibus & miraculis claros. Apud Theodoretum hiſtor. Eccleſ. lib. 5. c. 26. narratur, Monachum quemdam ſanctiſſimum, cui Telemachus nomen, Romam ex Oriente veniſſe eo conſilio, ut Honorium Auguſtum adhortaretur ad abolenda, quæ reliqua etiamnum erant, gladiatorum inhumana ſpectacula. Poſt hæc Theodoretus, Valeſio interprete, ſic proſequitur: *Hic ( loquitur de Telemacho ) cum deſtandum illud ſpectaculum ederetur, ipſe quoque in amphitheatrum venit. Et in arenam deſcendens, gladiatores qui inter ſe pugnabant, compeſcere conabatur. Sed cruenta cadis ſpectatores eam rem egrè ſerentes, Et demonis qui eo ſanguine oblectabatur furorem animis ſiſis concipientes, pacis auctorem lapidibus obruerunt. Quo cognito admirandus Imperator, hunc quidem invictiſſimorum Martyrum numero adſcripſit: ſetrum vero illud ſpectaculum penitus abolevit. Videtur hic, ab Imperatore Telemachum adſcriptum numero Martyrum, nulla facta mentione Romani Pontificis, licet res Romæ geſta eſſet. At verum eſt, Pontificiam auctoritatem interſuiſſe; diciturque Honorius eum Martyrum numero adſcripſiſſe, cum curaverit, id a Pontifice fieri, ut explicat Baronius ad annum 395.**

## C A P U T X I I.

*De poteſtate canonizandi.*

- 1 **A**B utilitate Sanctos in noſtris neceſſitatibus invocandi, poteſtas canonizandi cauſam habet & fundamentum; unde Bannes in 2. 2. quaſt. 1. artic. 10. §. dubiſatur præterea ſeptimò, conſcluſ. 1. ſic ait: *Hereticum eſt negare Sanctos invocandos eſſe; ut patet ex multis Conciliis,*

ciliis, & Decretalibus . . . Ergo auctoritas est in Ecclesia ad Sanctos canonizandos; & late prosequuntur Joannes a Sancto Thoma in 2. 2. *quest.* 1. *disputat.* 9. *artic.* 2. *num.* 1. Dominicus a Sanctissima Trinitate *cap.* 18. *pag.* 489. §. *Prima Conclusio*, in *bibliot. max. Pontif.* tom. 10. Quodque notatu dignum est, Joannes ipse Dallæus inter heterodoxos non obscuri nominis auctor, *adversus Latinorum traditionem de Religiosi cultus objecto lib.* 3. *cap.* 21. cultum, & invocationem Sanctorum taliter existimat esse connexa cum Canonizatione, ut cultum, & invocationem neget, ex quo primis temporibus asserit ( licet falso, quemadmodum supra visum est ) nullum fuisse Canonizationis vestigium, & nostrarum Canonizationum disciplinam ingenue commendet, supposito dogmate nostro de cultu, & invocatione Sanctorum. En ejus verba *loc. cit.* *Si veterum de tribus primis sæculis Christianorum eadem de colendis Divis sententia, ac traditio fuit, qua nunc Latinorum est, decuisse, immo necesse fuisse ad hunc cultum rite ac legitime exercendum, eos pro singulari, qua pollebant, prudentia, aliquem constituere, qui toti Ecclesia præiret, & qui vere Divi essent hoc honore digni, publice pronuntiaret, idest qui eos ( ut Latini nunc sane ex sua hypothefi sapienter faciunt ) canonizaret. Videndus est etiam Auctor dogmatici discursus de SS. Canonizatione Gallico idiomate scripti, & post primam hujus Operis editionem Parisiis impressi anno 1739. *pag.* 87. & sequentibus, qui supra exposita plene refert.*

2. Sacri textus auctoritates, & Patrum primorum sæculorum testimonia de Sanctorum cultu in superioribus a nobis allata sunt: nunc reliquum est, ut aliqua in medium afferamus de eorum invocatione, quæ comes est prædicti cultus. Ab antiqui autem Testamenti auctoritatibus incipiendo, Jacob Patriarcha, dum filiis suis benedicebat, inquit *Gen.* 48. 16. *Angelus, qui eruit me de cunctis malis, benedicat pueris istis, & invocetur super eos nomen meum, nomina quoque patrum meorum Abraham, et Isaac. Moyses, orando Deum, sic locutus est Exod.* 32. 13. *Recordare Abraham, Isaac, et Israel servorum tuorum, quibus jurasti per te ipsum. Salomon Deum exorabat, ut reminisceretur misericordiarum David 2. Paralip.* 6. 42. *Memento misericordiarum David servi tui. Tres pueri a Nabuchodonosor condemnati, ut inter ignes vitam amitterent in fornace, misericordiam Dei implorabant propter merita Sanctorum, Daniel.* 3. 35. *Neque auferas misericordiam tuam a nobis propter Abraham dilectum tuum, et Isaac servum tuum, et Israel sanctum tuum. Deus ipse, se acceptas habere Sanctorum orationes, piumque & utile esse Sanctorum merita commemorare pro gratiis obtinendis, professus est 4. Reg.* 19. 34. *Protegamque urbem hanc, et salvabo eam propter me, et propter David servum meum; Et rursus Jerem.* 15. 1. ait: *Si steterit Moyses, et Samuel coram me, non est anima mea ad populum istum; Et lib.* 2. *Machabeor.* Onias, & Jeremias jam defuncti exhibentur, & proponuntur uti Deum exorantes pro populo: cumque Judæi, quando putarunt, a Christo in cruce Eliam invo-

invocari, *Eliam vocat iste*, uti legitur *Matth. 27. 47.* eum nec blasphemiae, nec violationis legis in simulaverint; manifesta hæc est conjectura, pium & utile apud eos fuisse Sanctos invocare.

3 Adduntur novi Testamenti auctoritates. Sanctus enim Joannes petit a Deo pacem & ab Angelis: quod est idem ac dicere, Deo porrigit preces, ut pacem tribuat; & Angelis, ut eam impetrent, uti legitur *Apoc. 1. 4. Gratia vobis, & pax ab eo, qui est, & qui erat, & qui venturus est, & a septem Spiritibus, qui in conspectu throni ejus sunt.* Viginti item quatuor seniores, qui venerabundi & prostrati sistebant coram Agno, quid aliud agebant, quam Fidelium orationes Deo presentabant? *habentes singuli citharas, & phylas aureas plenas odoramentorum, quæ sunt orationes Sanctorum, Apoc. 5. 8.* Et rursus *8. 4. Ascendit sumus incensorum de orationibus Sanctorum de manu Angeli.* Cumque Petrus Apostolorum Princeps se post obitum suum promiserit operam navaturum, ut documentorum a se traditorum reminiscerentur, *ut ex epist. 2. cap. 1. 15. dabo autem operam, & frequenter habere vos post obitum meum, ut horum memoriam faciatis; fieri absque dubio id non poterat, nisi per suam apud Deum intercessionem.*

4 Suffragantur testimonia Patrum primorum sæculorum. Irenæus, qui circa annum 178. floruit, *lib. 5. contra hæreses cap. 19. num. 1.* hæc habet: *Et si ea (loquitur de Heva) inobedierat Deo; sed hæc (id. Virgo Maria) suasa est obedire Deo, ut virginis Heva Virgo Mater fieret advocata.* Mariam ergo apud Deum advocatam vocat Irenæus, & sic ejus intercessionem apud Deum admittit. Origenes circa annum 203. *lib. 8. contra Celsum num. 34. pag. 767.* ostendit, Sanctos Deum exorare pro hominibus, & placatum reddere, sicque eorum favet intercessioni: *Nam hi ceu cognatos, & amicos videntes eos, qui ipsorum in Deum pietatem amulantur, ac Deum invocant, riteque illum precantur; eorum saluti collaborant, illis apparent, putantque sui esse officii illis obsequium præstare & quasi ex pacto venire ad beneficia salutemque eis conciliandam qui Deum orant; cui & ipsi preces offerunt.* Alia loca quæ huic invocationi aperte favent, ex eodem Origene assert Huetius in *Origenian. lib. 2. qu. 5. num. 36.* S. Cyprianus anno 248. in epistola 57. ad Cornelium col. 206. existimat, per Sanctorum apud Deum regnantium orationes homines hic degentes adjuvari, & sic utilem esse apud Deum eorum intercessionem: *Memores nostri invicem sumus, concordæ atque unanimis utrobique pro nobis semper oremus, pressuras & angustias mutua charitate relevemus.* Et, *si quis isthinc nostrum prior Divina dignationis celeritate præcesserit, perseveret apud Dominum nostra dilectio; pro fratribus, & sororibus nostris apud misericordiam Patris non cesset oratio; & in libro de habitu Virginum in fine sic ipsas alloquitur: Durate fortiter, spiritualiter pergit, pervenite feliciter; tantum mementote tunc nostri, cum incipiet in vobis virginitas honorari.* In Actis S. Maximi Martyris anni 250. apud Theodoricum Ruinart pag. 133. num. 2. sic legitur: *Mibi enim nec suses, nec ungula, nec ignis sentiendi dant dolorem, quia in me manet gratia Christi, quæ me salvum faciet in æternum, omnium Sanctorum*

rum

*rum orationibus, qui in hac colluctatione certantes, vestras superaverunt infanias, nobisque virtutum exempla reliquerunt: quibus profecto verbis, quemadmodum innuitur Sanctorum intercessio apud Deum, ita de eorum invocatione nulla videtur dubitatio superesse. Confirmatur hoc ipsum ex Actis S. Theodoti Ancyrani circa ann. 303. apud eund. Ruinart pag. 307. n. 31. ubi Martyr sic loquitur: Glorificate Dominum nostrum Iesum Christum, qui fecit, ut perficerem cursum meum, & inimicum superarem; deinceps enim in calis cum fiducia pro vobis Deum deprecabor. Celebreque est illud, de quo testatur historia Martyrii Sanctæ Potamienæ apud Eusebium lib. 6. hystor. Eccles. cap. 5. juxta ejusdem Ruinart expositionem. Ineunte sæculo tertio prædictum contigit Martyrium; & postquam Eusebius retulit, eam a vulgo vexatam percussionibus & obscenis verbis, a Basilide vero humaniter acceptam fuisse, subdit: Illa vero (hoc est Potamiena) benignitatem hominis erga se libenter amplectens, bono animo eum esse fuisse; se namque post obitum salutem ipsius a Domino impetraturam, & collata in se beneficia brevi remuneraturam esse. Porro Basilidis invictam conversionem & confessionem, propter quas capite cæsus est, narrans inquit: Cumque quidam in Domino Fratres eum adiissent, & causam subita illius atque insperate conversionis interrogarent, dixisse fertur, Potamienam tertio post Martyrium die, noctu sibi assistentem coronam capiti suo imposuisse, dixisseque, se ipsius causa Dominum orasse, atque id, quod petierat, impetrasse, nec diu postea ipsum ad Superos migraturum.*

§ Si subsequens Patrum auctoritates congerere liberet, & signanter sæculi quarti, Basilii videlicet hom. 20. de quadraginta Martyribus, Gregorii Nazianzeni in orat. 18. pro S. Cypriano, & orat. 21. pro S. Athanasio, Hilarii in psalm. 129. Nissenii in fine orationis in quadraginta Martyres, & in oratione de S. Theodoro Martyre, Ambrosii in libro de viduis tom. 4. in epist. 54. ad sororem Marcellinam, Hieronymi epistola 1., epist. 25. ad Paulam de obitu Blesilla, & fusc. in libro contra Vigilantium, Chrysostomi in oratione de S. Ignatio Martyre, in hom. de SS. Berenice &c. & in hom. 76. de SS. Florentino, & Maximino Martyribus, articulus hic totum tractatum impleret: Sed hac relicta illis provincia, qui strenue adversus heterodoxos dogma Catholicum de Sanctorum invocatione propugnarunt, inter quos jure ac merito recensendus est P. Abbas Joannes Chrysostomus Trombelli in suis dissertationibus de cultu Sanctorum Bononiæ impressis anno 1740. & anno 1741. & nobis dicatis; in superioribus aliqua attigimus de cultu, & nunc aliqua addidimus de invocatione Sanctorum, ut fundamenta delibaremus potestatis canonizandi, de qua nunc agitur. Tractantes de Sanctorum Canonizatione alios ex veteri, & novo Testamento textus desumunt, quibus potestatem canonizandi demonstrari contendunt; uti colligitur ex bullis Canonizationum, & Scriptorum animadversionibus. Cap. siquidem 44. Ecclesiastici v. 1. & 2. legitur: Laudemus viros gloriosos, & parentes nostros in generatione sua; multam gloriam fecit Dominus magnificentia sua a sæculo: & v. 15. Sapientiam ipsorum narrent populi, & laudem eorum nuntiet Ecclesia; ubi etiam

etiam inter Sanctos referuntur Henoch, Noe, Abraham, Isaac, Jacob, Moyses, Aaron, Phinees, Josue, Chaleb, Samuel, David, Elias, Eliseus. Siracides Ecclesiastici auctor ibi nonnullorum meminit, puta Enochi, Noemi, Abrahami, qui ad legem naturæ pertinebant, & deinde meminit Sanctorum legis Mosaicæ, & primum omnium extollit laudibus Moysen ipsum, virum sane absolutissimæ sanctitatis exemplar, & sæculis deinceps omnibus admirandum; tum in aliorum laudes excurrit, veluti Aaronis, Samuelis, Davidis, aliorumque, uti videri potest capite 45. & sequentibus: & quamvis capite 47. Salomonem laudibus exornet, de cujus æterna salute inter Catholicos ipsos ambigitur, & in utramque partem multis disputationibus impune disceptatur; nemo tamen est, qui textum legendo, non videat, ipsum capite 47. a versu 14. de Salomone sic locutum fuisse, ut post aliquot laudes vehementer arguat ejus scelera, neque tamen poenitentiam testetur ullam, uti facit in Davide; de quo sic ait v. 13. *Domini purgavit peccata ipsius, & exaltavit in æternum cornu ejus.* Quod si quæretur, quomodo ad Siracidem devenire potuerit notitia Sanctorum legis naturæ, cum per id tempus nulla extiterit Canonica Scriptura, facile responderi potest, Scripturæ defectum suppletum fuisse per Majorum traditionem, juxta illud Moysis *Deuter. 32. v. 7.* ubi legitur: *Interroga patrem tuum, & annuntiabit tibi, Majores tuos, & dicent tibi.* Præterquamquod non ita tuto asseri potest, Scripturam Canonicam tunc defuisse, licet ea ad nos non pervenerit; Enochi quippe sanctissimi, qui diluvium præcessit, librum extitisse, S. Augustinus opinatus est, & post eum alii apud Pererium *lib. 7. in disputatione de Enoch quæst. 6.* quo scilicet ex libro manarit prophetia illa ejusdem Enochi, quam S. Judas Apostolus in sua Canonica epistola citat *num. 14. & 15.* His præmissis ad ornatum textus, in eo profecto extat præceptum, quod a sanctis Scriptoris adnotarentur in particulari gloriosa vita & mors eorum, qui tempore ipsorum floruisent, & quod eorum gloriosa gesta a populis laudarentur, & omnibus innotescerent; illudque disciplinæ ab initio Ecclesiæ ad hæc usque nostra tempora feliciter productæ, inter Sanctos referendi viros virtutibus & miraculis insignes fundamenta statuisse videtur, & consequenter potestatis canonizandi, sine qua prædicta disciplina suo caruisset, & careret effectu. In bulla canonizationis S. Franciscæ Romanæ in *cir. cod. pag. 286.* hæc habentur verba: *Nos ex officii debito Pastoralis, qua ad Dei laudem, & Fidelium edificationem sunt, quantum in Domino possumus, promovere cupientes; ac non ambigentes, id genus esse triumphalem Canonizationis honorem, per quem sapientiam Sanctorum narrant populi, & laudem eorum nuntiant Ecclesiæ.* Et in Brevi beatificationis S. Francisci Salesii *Spiritus Sanctus, cum in Divinis Scripturis viros gloriosos, nimirum Sanctos, laudari præcipit, eorumque sapientiam & laudem narrari a populis, & nuntiari ab Ecclesiis, docet nos atque illuminat, quid nostris etiam temporibus agere debeamus.* Memoratum quoque Ecclesiastici textum ad rem præsentem ponderat Cardinalis Bellarminus

contro v.

*controv. tom.2. de SS. beatit. lib.1. cap.7. §. His ergo pramissis ; & sequitur Cornelius a Lapide in dictum cap.44. Ecclesiastici vers.2. & juris Canonici Interpretes in recensitis Ecclesiastici verbis , multam gloriam fecit Dominus magnificentia sua a seculo , substantialia dicunt contineri Canonizationis requisita , gloriosam videlicet , & heroicam vitam , & miracula excedentia vires & potentiam naturæ ; Innocentius in cap. Audivimus , num.1. Ostiensis num.5. Joannes Andreas num.4. Zabarella num.5. Ancharan. num. pariter 5. Antonius a Butrio num.7. Fagnan. num.3. de Reliquiis , & veneratione SS. Succedit novi Testamenti textus , Apostoli videlicet in epistola ad Hebræos cap.13. v.7. Mementote Præpositorum vestrorum , qui vobis locuti sunt verbum Dei , quorum intuentes exitum conversationis , imitamini fidem . Quocirca Christianus Lupus in not. ad Conc. tom.3. pag.563. inquit : Porro defunctos justos in Sanctorum Canonem , seu Ecclesiasticas tabulas solemniter referre , seu canonizare est antiquissima Ecclesia consuetudo habens exemplum ab Apostolo in epistola ad Hebræos . Et ante Lupum bene adnotaverat Thomas VValdensis tom.3. de Sacramentalibus tit.14. cap.27. ante num.4. Florentinius quoque in sua prævia admonit.2. ad Martyrologium verba affert supra citata S. Pauli pro præsentis assumpti comprobatione , & addit , alios consimile præceptum agnoscere in aliis ejusdem Apostoli verbis ad Romanos cap.12. jubentis , nos Sanctorum memoriis communicare : ubi enim in vulgatis codicibus habetur , necessitatibus Sanctorum communicantes , Origenes , Ambrosius , ac Optatus Milevitanus legunt memoriis , non necessitatibus ; & S. Hilarius lib. contra Constantium Augustinum non modo idem retinet , sed præceptum in iisdem verbis agnoscit : Apostolus ( inquit ) jubet communicare nos Sanctorum memoriis ; tñ eas damnare elegisti ?*

6 Nonnullæ a Theologis congruentissimæ excogitatæ sunt rationes , ut relictæ Ecclesiæ potestatem Sanctos canonizandi fudeant , quas in unum congerit Dominicus a Sanctissima Trinitate cap.18. in bibliot. max. Pontif. pag.491. tom.10. ut ex sequentibus ejusdem verbis desumitur ; Cur autem Christus hanc auctoritatem canonizandi Sanctos Ecclesia sue relinquere voluerit , plures non desunt congruentissima rationes ; præcipua sunt sequentes . Prima , ut etiam in terris , ubi locus agonis , legitimique certaminis eorum fuit , hanc laborum suorum mercedem , triumphique coronam utcumque reportent . Secunda , ut gloria essentiali , qua gaudent in calis , hæc accidentalis gloria respondeat ex parte Ecclesiæ militantis . Tertia , ut jungamur nos viatores cum illis per affectum ac venerationem , illi autem jam comprehensores nobiscum per intercessionem & protectionem . Quarta , ut nos eorum exemplo provocemur ad eorum præsertim virtutum imitationem , in quibus insignes fuerunt . Quinta , ut probeatur , Ecclesiam Catholicam non solum quoad legem , sed quoad personas etiam esse sanctam , dum tot justos , & Sanctos parit , ac beat . Sexta , ut inde Gentiles , & Heretici confundantur , qui non habent personas justas & sanctas , quas consecrent ; quatenus cum sola Fide , & ubi illa reperitur , vera etiam Sanctitas conjungitur . Septima , ut ita servetur , quæ in symbolo Fidei docetur Sanctorum communicatio .

7 Adversus hanc potestatem canonizandi nonnulli debacchantur Hæretici, teste Thoma VValdensi de *Sacramental. tom. 3. tit. 14. pag. 102.* VVicleffus primus fuit, qui adversus Catholicam Ecclesiam, & ejus Caput visibile, tamquam Divina sibi in Canonizatione usurpantes, vocem extollere ausus est, cujus vestigiis ingressus est Kemnicus 3. *part. examinis Concilii Trid. pag. 634.* Calvinus *lib. 3. instit. cap. 20. §. 27.* non modo Pontificem & Ecclesiam, sed Sanctos ipsos furore abreptus ferali impetit voce; & Petrus Molinæus *lib. 7. novitatis sua contro. 2. cap. 13. pag. 547. & seq.* Canonizationis materiam in jocos & cachinnos solvit. Addi possunt alii impii, irreligiosi, & damnatissimæ notæ Hæretici supradictis suffragantes, Lutherus videlicet, de quo apud Catharinum *lib. 2. de considerat. presentium temporum cap. 27.* Magdeburgenfes *cent. 4. cap. 15.* Vermillius, Lambertus Danæus, Mornæus in *præfatione mysteriorum iniquitatis*, Marcus Antonius de Dominis *lib. 1. cap. 5. quest. 4. num. 55.* Abbartus *lib. de Antichristo cap. 11.* Non defuerunt tamen ex nostris, qui diabolicas illas criminationes invictis prostraverint argumentis, uti videri potest apud Gravinam in *continuatione 2. part. Catholicarum præscriptionum.*

8 Ac oppositio quidem modo relata, quod Romanus Pontifex canonizando sibi usurpet Divina, cessat, statim ac sedulo ponderatur, nos etiam agnoscere, essentielle Beatorum gaudium, quod habent de Divinitate, augeri non posse, sed solum accidentale, quod habent de quocumque bono creato, & de omnibus, quæ in Dei honorem fiunt, & maxime de illis, in quibus de eorum gloria Deo gratias agimus, juxta doctrinam S. Thomæ in 4. *sent. dist. 12. qu. 2. art. 2.*; Romanos item Pontifices in Canonizatione sibi nullatenus asserere gaudii essentialis augmentum, quemadmodum legitur in bulla Canonizationis S. Nicolai de Tolentino in *cit. cod. pag. 161.* Licet militans in terris Ecclesia triumphantem in calis filiali & devoto veneretur affectu, ac virtutes, laudes, præconiaque Sanctorum, quantum finit fragilitas, dignissimis attollat titulis, devotis quoque precibus, solemnî ritu sacrificia laudum offerat ad decus & venerationem civium supernorum; nihil tamen illis accrescit novæ perfectionis & gloria, nec eorum perfecta felicitas nostris operibus firmari poterit, vel augeri: misericors tamen miseratorque Dominus per intercessionem meritaque Sanctorum, quos in terris celebritate congrua veneramus, mirabili dignatione imperfectum nostrum suppleri providit, ut, quod nostris meritis non valemus, eorum suffragiis assequamur: uno verbo, in Canonizatione summos Pontifices nihil aliud agere dicimus, quam declarare hos & illos Dei servos virtutibus, insigni morte, eximiisque miraculis præfulgentes, & sic in cælo triumphantes esse in Ecclesia colendos; quod quidem judicium si ab illis fieret sine præviis diligentibus, clamarent Hæretici & merito, male agi, nec tamquam Sanctos esse Ecclesiæ proponendos, quos certis argumentis Sanctos esse non constet. Sed, cum ad hæc avertenda debitum & rigorosum præcedat examen, & hinc occasionem arripiant clamandi, Papam sibi assumere in Canonizatione Divinam potestatem, nemo

est, qui eorum dicta reprehendere non debeat, & execrari; uti bene argumentatur Saussajus in cit. apolog. §. 9. sub init. Si Ecclesia Catholica, Apostolica, & Romana Sanctos sine ulla fidei & meritorum indagine, vel personarum delectu honoraret, tunc clamarent adversarii, eam promiscue Baal cum Christo miscere, tenebras cum luce confundere, nec discernere a justitia iniquitatem; cum vero omni sedulitate ac diligentia, maturique examinis libra, ac severi judicii censura, Ecclesia ipsa Sanctos inquirat ac vindicat, pretiosumque a vili sic discernit, ut inter Sanctos memoria venerandos nullum cooptet, nisi quem certo comperit Deo, fidei & operis sinceritate, fuisse acceptum; quotquot autem utriusque hujus Divinae dotis testimonio carent, ex albo Sanctorum ablegat, impiosque quosvis nec colit, nec recolit, sed a fastis suis proscribit, & execrandos judicat. Tum nihilominus ipsimet adversarii eam dilacerant, Divinaque & sibi usurpare dum sanctos nominat, & Sanctis tribuere dum decernit colendos, impertune clamitant atque perperam calumniantur.

## CAPUT XIII.

*De Benefacto, ut aliquando Solemnia Canonizationis expleantur.*

**I** B iisdem rationum momentis, ex quibus Theologi in superioribus relati comprobant, esse in Ecclesia, & in summo Pontifice, tamquam ejus visibili Capite, potestatem canonizandi, desumitur quoque, congruere, expedire, & utile esse Sanctorum Canonizationes aliquando peragere. Et primo, quia in Sanctis suis Deus laudatur, & dum servos honoramus, honor redundat in Dominum; uti legitur in bullis Canonizationum SS. Udalrici, Petri Anagnini, Hugonis, Antonii Lusitani, Bonaventurae, Antonini, Hyacinthi, Joannis Gualberti, quarum hæc sunt verba: *Nec enim quisquam Catholicus ambigit, cum & hoc Scriptura sacra testetur, quod in Sanctis suis laudatur Dominus, & qui honorat eos, ipsum Dominum prorsus honorat, ipso attestante, qui dicit, qui vos honorat, me honorat, & qui vos recipit, me recipit; & item, quod uni ex meis minimis fecistis, mihi fecistis. Eodem pertinent, quæ habentur in bulla Canonizationis S. Thomæ de Villanova in cit. cod. pag. 356. Nimirum, ut ea ratione omnipotentis Dei laus, & gloria magis magisque increbrescat, ejusdemque bonitati ac benignitati simul agantur gratiæ, qui dedit virtutem & potestatem talem hominibus.*

**2** Secundo, quia maximopere decet, ut, qui sanctus est apud Deum, sanctus etiam ab hominibus habeatur; quemadmodum habetur in bullis Canonizationum SS. Homobohi, Clarae, Ludovici Regis Franciæ, Petri de Morono, Ludovici filii Caroli Regis Siciliae, Thomæ Herfordiensis, Thomæ de Aquino, Birgittæ, Edmundi, Francisci de Sales, Rosæ Limanæ, Antonii Lusitani, ubi: *Pium & justum est, ut, quos Dominus merito sanctitatis coronat & honorat in calis, nos venerationis officio laudemus & glorificemus*



*rificemus in terris ; & in bulla Canonizationis S. Richardi : Decet , ut nostro ministerio per omnem Christiani cultus ambitum vehiculo debita venerationis incendens , profusus per Orbem gaudiis , & effusus undique laudibus honoretur in terris.*

3 Tertio, quia in Beatificationibus fervorum Dei, & Canonizationibus Beatorum, non modo sancta mater Ecclesia exaltatur, uti ad rem docet Bannes in 2.2. *quæst. 1. art. 10. §. dubitatur praterea septimò, conclus. 1. Expedi etiam hoc , ut ostendatur , quod non est abbreviata manus Domini , sed , sicut olim in primitiva Ecclesia fuerunt Christiani eximia sanctitatis , ita & nunc , & semper usque ad consummationem sæculi sunt , & erunt Fideles in sanctitate vitæ insignes ; sed etiam confunduntur Hæretici & ceteri quotquot a Catholica aberrant veritate , sicut legitur in bulla Canonizationis S. Homoboni : Et in hoc præsertim Hæreticorum confundatur perversitas , cum ad Catholicorum tumulos viderint prodigia pullulare ; in bulla Canonizationis S. Stanislai Episcopi Cracoviensis : Confundatur perversum Hæreticorum dogma , & Fidelium beata credulitas augeatur ; & in bullis insuper Canonizationum SS. Laurentii Archiepiscopi , & Hyacinthi .*

4 Quarto, quia expedit, ut apud Dominum nostri multiplicentur intercessores ; quemadmodum habetur in bulla Canonizationis S. Francisci de Assisio : *Confidentes per Dei misericordiam , Nos , & gregem Nobis commissum ejus suffragiis adjuvari , & , quem familiarem habuimus in terris , habere patronum in calis ; in bulla Canonizationis S. Dominici : Nos cum commissio Nobis grege Domini confidentes , ejus posse suffragiis per Dei misericordiam adjuvari , ut , cujus in terris solatium gratiosæ familiaritatis habere meruimus , ejus in calis potenti patrocinio gaudeamus ; in bulla Canonizationis S. Caroli Borromæi : Supplices , ut Carolus Ecclesia , quam vehementer dilexiss , proficiat etiam meritis & exemplo , adfuit patrocinio , & in tempore iracundia fiat reconciliatio ; & prostat etiam in bullis Canonizationum SS. Hugonis , Hyacinthi , Petri de Alcantara , Francisci Xaverii . Nec enim invocari possunt ut intercessores , loquendo saltem de publica invocatione , illi , quorum sanctitas ab Ecclesia legitime declarata non est .*

5 Quinto, quia non parum prodest Christifidelibus nova semper habere exempla virtutum , quæ imitentur : unde Mathathias 1. *Machabæor. cap. 2. v. 50. & 51. morti proximus filios hortatus est ad sanguinis & vitæ profusionem pro tuendis patriis legibus , proponendo illustria Patrum facinora : Nunc ergo , d filii , amulatores estote legis , & date animas vestras pro testamento Patrum vestrorum , & memento operum Patrum , quæ fecerunt in generationibus suis , & accipietis gloriam magnam & nomen æternum .*

6 Hoc ipsum desumitur ex S. Gregorio lib. 2. *moral. cap. 1. tom. 1. ubi ait , quod sacra Scriptura narrat gesta Sanctorum , & ad imitationem corda provocat infirmorum ; dumque illorum victicia facta commemorat , contra vitiorum prælia debilia nostra confirmat ; fitque verbis illius , ut eo mens minus inter certamina trepidet , quo ante se positos tot virorum sortium triumphos videt . Facit ad rem illud S. Bernardi qui in præfat. ad vitam S. Malachia col. 663.*

tom. 2. inquit : *Semper quidem opera pretium fuit illustres Sanctorum describere vitas , ut sint in speculum & exemplum , ac quoddam veluti condimentum vita hominum super terram . Per hoc enim quodammodo apud nos etiam post mortem vivunt , multosque ex his , qui viventes mortui sunt , ad veram provocant & revocant vitam . Et ante ipsum scripsit S. Eucherius Lugdunensis sive Eusebius Gallicanus hom. de SS. Petro & Paulo tom. 6. biblioth. PP. pag. 652. Armantur florum animi , dum Patrum recensentur triumphi . Passim id ipsum in bullis legitur Canonizationum ; in bulla videlicet Canonizationis S. Francisci Salefii : Antecessores nostri Spiritu Sancto instructi laudabilem in Ecclesia morem inducere , nempe in excelsa loco sanctitatem constituendi , ut , veluti lumen illius lucis vicarinum , qua de se dixit : Ego sum lux Mundi , & qui sequitur me , non ambulat in tenebris , non sub modio absconditum , sed in candelabro elatum luceat coram hominibus , eosdemque a veneratione ad imitationem , via strata ad celestis & triumphantis Ierolyma nunquam interituras delicias , dirigat , inferatque ; & in bullis præterea Canonizationum SS. Laurentii Archiepiscopi , Edmundi , Caroli Borromæi , Francisci Xaverii , Petri de Alcantara .*

7 Ultimo , quia magna in Beatificationibus & Canonizationibus adest materia spiritalis lætitiæ ; ut habetur in bulla Canonizationis S. Hyacinthi : *Benedictus Pater misericordiarum & Deus totius consolationis , qui dilectam Filii sui sponsam Catholicam & Apostolicam Ecclesiam perpetua regit providentia , atque his luctuosis temporibus multis arumnis & calamitatibus afflictam , multiplici etiam gaudio ex Sanctorum suorum gloria consolatur ; vere enim magna existit spiritalis lætitiæ materia , cum Deus illustra servorum suorum merita idem mundo manifestat , ut , dum illis ubique terrarum veneratio tribuitur , Deus ipse in Sanctis suis mirabilis prædicetur ; nam , cum aliqui servi Dei excellenti vita sanctitate & miraculis insignes jam cum Christo in calo regnantes , in terra quoque summa Romani Pontificis auctoritate Sancti esse declarantur , Rex ipse sempiterna majestatis & gloriæ in Sanctorum concilio glorificatur , Divini cultus observantia augetur , Fidelium pietas & devotio excitatur , detestanda hæreses magis magisque convincuntur , plures populo Dei ad virtutis exemplum , & suffragii patrocinium proponuntur , ut , quod fideliter petimus , id efficacius , multiplicatis intercessoribus , consequamur .*

8 In sententia , quæ a summo Pontifice solemniter in Canonizatione profertur , tres causæ finales exprimuntur ; prima est ad honorem Sanctæ & individue Trinitatis ; secunda ad exaltationem Fidei Catholicæ ; tertia ad Christianæ Religionis augmentum . In Sanctorum itaque Canonizatione honoratur & glorificatur Sanctissima Trinitas , cum , quidquid laude & præmio dignum Sancti peregerunt , non nisi Divinæ gratiæ beneficio perficere potuerint : unde Christus Dominus *Matth. cap. 5. v. 16. ait : Sic luceat lux vestra coram hominibus , ut videant opera vestra bona , & glorificent Patrem vestrum , qui in calis est ; & S. Petrus in epist. 1. cap. 2. v. 12. subdit : Conversionem vestram inter gentes habentes bonam , ut in eo , quod detractant de vobis , tamquam de malefactoribus , ex bonis operibus vos considerantes , glorificent Deum in die visitationis .*

9 In Canonizatione quoque exaltatur Fides Catholica super omnes alias sectas, in quibus nec vera sanctitas esse potest, nec vera possunt fieri miracula. Quamobrem Theologi agentes de notis Ecclesiæ Catholicæ hanc etiam notam recensent, quod in ea sunt vera miracula, & quod in nostra Catholica Ecclesia Romana omni sæculo miracula approbantur. Et Fidei quidem exaltatio in hoc præcipue consistit, quod multi ad Fidem Catholicam ex variis sectis Gentilium & Hæreticorum accedunt, visa & audita sanctimonia vitæ Christianorum perfectorum, nec non miraculorum, quæ ad ipsorum intercessionem a Deo patrantur; cum hæc sit una ex viis, per quam ad veram Fidem, auxiliante Deo, Infideles convertuntur. Unde *lib. 4. Reg. cap. 5.* narratur de Naaman Syro principe militiæ Regis Syriæ viro magno & honorato, quod, cum leprosus esset, & jussu Elisei Prophætæ septies in Jordane lavisset & mundatus fuisset, prout Propheta prædixerat, reversus ad Eliseum dixit *v. 15. Vere scio, quod non sit alius Deus in universa terra, nisi tantum in Israel;* Et *lib. 3. Reg. cap. 18. v. 39.* quando Elias ignem de cælo attraxit, ut holocaustum combureret, multitudo, quæ prius Baal adorabat, ad veri Dei Fidem conversa est, & miraculum inspicies exclamavit: *Dominus ipse est Deus, Dominus ipse est Deus;* item *Joann. cap. 11. v. 47. & 48.* legitur, quod collegerunt Pontifices & Pharisei concilium adversus Jesum, & dicebant: *Quid facimus, quia hic homo multa signa facit? Si dimittimus eum sic, omnes credent in eum;* Et *cap. 3. Act. Apost.* quando S. Petrus miraculo sanavit claudum, qui sedebat ad speciosam portam templi, in nomine Christi Jesu, & prædicavit se in hoc nomine illum curasse, multi crediderunt; quemadmodum subditur *Act. cap. 4.*

10 Demum in Canonizatione Sanctorum augetur Christiana Religio, quia, dum multiplicantur Sancti, augetur cultus Sanctorum, innotescit vita Canonizati, ejus virtutes Fidelibus proponuntur, ejusque miracula enarrantur: ex quo fit, ut crescat Fidelium devotio erga ipsos, hincque moveantur ad exercendos erga eosdem varios actus, qui pertinent ad virtutem Christianæ Religionis. Deducta hæc sunt ex formula sententiæ, quæ a summo Pontifice in Canonizatione profertur; & concordant cum aliis, quæ in superioribus adducta fuerunt ex bullis Canonizationum, aliisque monumentis. Tum ipsa autem, tum reliqua, quæ ex iisdem bullis collecta fuerunt, bene congruunt cum sermone S. Bernardi, in *vigil. SS. Apostolor. Petri & Pauli volum. 1. col. 993. num. 2. & 3.* ubi ait: *Tria sunt igitur quæ in festivitatibus Sanctorum vigilanter considerare debemus, auxilium Sancti, exemplum ejus, consensionem nostram. Auxilium ejus, quia qui potens in terra fuit, potentior est in calis ante faciem Domini Dei sui. Si enim, dum hic viveret, misertus est peccatoribus & oravit pro eis, nunc tanto amplius, quanto verius agnoscit miseria nostras, orat pro nobis Patrem, quia beata illa patria charitatem ejus non immutavit, sed augmentavit; neque enim quia impassibilis omnino, ideo & impassibilis factus est, sed nunc potius induit sibi viscera misericordie,*

*misericordia, cum ante fontem misericordia affluit. Est & alia causa, qua magis urget Sanctos, ut solliciti sint de nobis, quia, juxta vocem Apostoli, Deus providet pro nobis, ne sine nobis consumantur, sicut ait sanctus David: Me expectant iusti, donec retribuas mihi. Debemus etiam attendere exemplum ejus, quia, quamdiu in terris visus est & cum hominibus conversatus est, non declinavit ad dexteram, neque ad sinistram, sed viam regiam tenuit, donec veniret ad illum, qui dicit: Ego sum via, veritas, & vita. Intuemini humilitatem operum ejus, auctoritatem verborum ejus; & tunc videbitis, quomodo tam verbo, quam exemplo luxerit inter homines, qualia nobis vestigia dereliquerit, ut ambulemus per ea, & non erremus in eis. Vere, juxta Prophetam Semita iusti recta est, rectus callis iusti ad ambulandum. Sed & diligentiori intuitu confusionem nostram inspiciamus, quia homo ille similis nobis fuit, passibilis, ex eodem luto formatus, ex qua & nos. Quid ergo est, quod non solum difficile, sed & impossibile credimus, ut faciamus opera, qua fecit, ut sequamur vestigia ejus? Confundamur, fratres, & contremiscamus ad vocem istam, si forte hec confusio adducat nobis gloriam, si forte generet gratiam nobis timor iste: homines isti fuerunt, qui praeceperunt nos, qui tam mirabiliter processerunt per vias vite, ut vix eos homines fuisse credamus. Sic ergo in Sanctorum festivitatibus & gaudere, & confundi debemus; gaudere, quia Patronos premisimus; confundi, quia eos imitari non possumus.*

11 Atque, licet nonnulli male feriat, supposita potestate canonizandi, ejus usum audeant condemnare, aut quia novorum Sanctorum merita meritis antiquorum sunt inferiora; aut quia nostras preces Deus exaudire potest, & pro nobis miracula operari, Sanctorum antiquorum intercessione; aut quoniam novorum Sanctorum accessione, antiquorum cultus imminuitur & fere obscuratur; aut quoniam tot Sanctorum Canonizationes rem hanc sacram quodammodo reddunt contemptibilem; aut demum quia nonnulli in album Sanctorum referuntur, qui, licet virtutibus heroicis & miraculis excelluerint, sunt nihilominus inferiores aliis, qui majoribus virtutibus praediti fuerunt, vel ampliori miraculorum dono a Deo insigniti sunt, de quorum relatione in album Sanctorum nemo est qui cogitet; haec tamen, & similia Canonizationum utilitati minime adversantur, si res pro natura sua accurate consideretur.

12 Et in eo quidem, quod attinet ad excellentiam meritorum veterum Sanctorum super novorum Sanctorum merita, dicimus, Christum Dominum nostris etiam temporibus semetipsum sine testimonio non reliquisse, atque adeo Ecclesiae thesaurum novas ac veteres habere margaritas; & semper expedire, servatis servandis, novorum Sanctorum Canonizationes peragere, ut propinquiora nobis habeamus virtutum exempla, quae imitemur, utque nostri apud Deum multiplicentur intercessores; & eo magis, cum hi, qui nunc novi, veteres aliquando Sancti futuri sint. Quare Gaufridus in prologo ad vitam S. Petri Tarentasii apud Bollandianos ad diem 8. Maji tom. 2. pag. 323. ait: *Christus Jesus heri, & hodie, ipse & in aeternum; & quemadmodum nullis retro generationibus sine testimonio semetipsum reliquisset*

reliquisse cognoscitur, nec nostro credendus est tempore in hac sibi parte desse .... Sanctus olim Hieronymus causabatur contemporaneos suos sic ingenia quasi vina probare, quibus videlicet gratia ex vetustate succrescit. Quid putas, diceret, si videret, merita, quasi vina, probari? Et S. Joannes Chrysostomus orat. in SS. Juven. & Max. tom. 2. pag. 578. sic locutus est: Illi tempore superiores, isti recentiores. Ejusmodi est thesaurus Ecclesie, novas & veteres habet margaritas: sed una omnium est pulchritudo .... Quod scientes vos, non aliter priuscos, aliter recentiores colitis Sanctos; sed eadem alacritate, eodem amore, eodem affectu colitis omnes & commendatis. Non enim exploratis tempus, sed exquisitis animi fortitudinem, pietatem, fidem invictam, zelum incitatum ac servidum, & eas virtutes, quas præ se ferunt Sancti, ad quorum honorem hodie convenimus. Nissenus vero in orat. de S. Basilio fratre suo pag. 912. tom. 2. Habemus, ait, nunc etiam nos, qui constituat nobis præsentem celebritatem, genuinam & verum Ministrum, & Interpretem spiritus .... cui secundas post Apostolos partes tempus solum dat. Nam, si eodem tempore, quo Paulus, vitæ particeps humana fuisset Basilius, sicuti Silvanus & Timotheus, ita prorsus una cum Paulo litterarum monumentis celebratus esset. Atque, ut intelligatur, quod, conjecturam faciendo, a veritate non aberro, hoc modo rationem ineamus. Prætermittatur ea oratio, qua explicetur, qui Sancti quos Sanctos tempore antecesserint (temporis enim natura in præterito, & futuro, quod ad virtutem, & vitium attinet, eodem modo sese habet, cum neque hoc, neque contrarium sit: in libero enim arbitrio atque proposito voluntatis, non in tempore, bonum consistit) at fides cum fide, cum oratione oratio conferatur. Nam, si quis justus estimator fuerit in conferendis inter se miraculis, reperiet unam in ambobus gratiam, qua ex eodem spiritu juxta convenientiam, atque proportionem fidei existeret in utroque. Quod, si tempore Paulus præcedit, & multis ætatibus post Basilius exhibitus ac designatus est; Divina administrationis, quam hominum gratia suscepit, opus dicis; non affers probationem circa virtutem diminutionis. Nam & Moyses multis temporibus posterior Abrahamo, Samuel Moyse, & hoc Elias, & illo magnus Joannes, & post Joannem Paulus, & post hunc Basilius. Quomodo igitur in præcedentibus nihil tempus posterius, quod attinet ad gloriam, qua cum Deo conjuncta est, Sanctis incommodavit; ita etiam nunc in disceptatione virtutis, ætatis commodum silentio prætermittatur: pag. verò 917. Quid igitur illius in rebus Divinis splendorem atque claritudinem imminuit, quod post alios Sanctos in vita fuit, ut idcirco celebritas, atque conventus, qui illius nomine agitur, minor habeatur feriis, que Sanctorum aliorum honoris atque memoria gratia celebrantur? Præterea S. Eulogius (in apologetico sanctorum Martyrum sui temporis in biblioth. PP. tom. 15. pag. 287.) Prinsquam, inquit, eorum exequar trophea insignia, opera pretium resistere credidi imperitis, quia ore blasphemio horum temporum Martyribus derogantes, non esse illos consimiles prioribus Martyribus, volunt &c. ut mens religionum sacratissimis imbuta oraculis discat ex veritate novitios, sicuti priuscos, venerari Patrones.

13 In præfatione demum ad passionem SS. Perpetuæ, & Felicitatis, apud

apud Ruinart pag. 80. subditur : *Si vetera Fidei exempla & Dei gratiam testificantia , & adificationem hominis operantia , propterea in litteris sunt digesta , ut lectione eorum , quasi repensatione rerum & Deus honoretur , & homo confortetur ; cur non & nova documenta aque utrique causa convenientia & digerantur ? Vel quia & hac vetera futura quandoque sunt , & necessaria posteris , si in presenti suo tempore minori deputantur auctoritati , propter præsumptam venerationem antiquitatis . Sed viderint , qui unam virtutem Spiritus unius sancti , pro atatibus judicent temporum . . . . . Itaque & nos , qui sicut prophetias , ita et visiones novas pariter repromissas et agnoscimus , et honoramus , ceterasque virtutes Spiritus sancti ad instrumentum Ecclesie deputamus , cui et missus est , idem omnia donativa administrans in omnibus , prout unicuique distribuit Dominus , necessario et digerimus , & ad gloriam Dei lectione celebramus , ut ne qua aut imbecillitas , aut desperatio fidei apud veteres tantum aestimet gratiam Divinitatis conversatam , sive Martyrum , sive in revelationum dignatione ; cum semper Deus operetur , qua repromissit , non credentibus in testimonium , credentibus in beneficium .*

14 Sequuntur cetera supra opposita ; quæ profecto non sunt majoris roboris præ illo , cui modo Patrum auctoritate plene satisfactum esse videtur . Illud enim , quod Deus nostras potest exaudire preces , & pro nobis miracula operari , antiquorum Sanctorum intercessione , nimis probat , cum probet , nec ipsos antiquos Sanctos debuisse canonizari : per intercessionem quippe B. Mariæ semper Virginis , quæ est mediatrix apud Mediatorem , & sanctorum Apostolorum , qui in lege nova fuerunt primi Sancti , bene poterat Deus nostris votis annuere , & pro nobis mirabilia patrare . At , cum a Divina pendeat voluntate nostris , & nostrorum intercessorum precibus flecti , & consilium ejus ignoremus , nec ei dicere possimus , cur ita facis ? hinc est , quod Catholicæ Ecclesiæ multum expedit , ut antiquis fiat novorum accessio intercessorum , quorum precibus , experientia etiam teste , videmus , bona spiritalia & temporalia ad nos derivari ; non quia Deus non possit omnia efficere ad preces & intercessionem antiquorum Sanctorum , sed quia vult operari miracula , & nostris precibus indulgere , intercessione hujus , aut alterius Sancti , qui cursum feliciter consummarunt , & gloriæ coronam non ita pridem ab eo receperunt . Quapropter S. Augustinus ( rom. 2. in epist. 78. alias 137. col. 183. n. 3. ad Clerum , & populum Hipponensem ) ait : *Ubique quidem Deus est , & nulli continetur , vel includitur loco , qui condidit omnia . . . . Veruntamen ad ista quæ hominibus visibiliter nota sunt ; quis potest ejus consilium perscrutari , quare in aliis locis hæc miracula fiant , in aliis non fiant ? Multis enim notissima est sanctitas loci , ubi Beati Felici Nolensis corpus conditum est , quo volui ut pergerent ( nempe duo Clerici ) quia inde nobis facilius , fidelisque scribi potest , quidquid in eorum aliquo divinitus fuerit propalatum . . . . . Numquid non & Africa Sanctorum Martyrum corporibus plena est ? Et tamen nusquam hic semus talia fieri ; sicut enim , quod Apostolus dicit , non omnes Sancti habent do-*

na

na curationum, nec omnes habent dijudicationem spirituum, ita nec in omnibus *Memoriis Sanctorum* ista fieri voluit ille, qui dividit propria unicuique, prout vult. Consentit doctrina Divi Thomæ in 4. dist. 45. quæst. 3. art. 2. ubi, postquam probavit, Sanctos esse a nobis invocandos, in secundo argumento opponit, superiores Sanctos a nobis esse invocandos; in responsione autem subdit, Sanctos quidem superiores, esse magis Deo acceptos, quam inferiores, sed utile esse etiam minores Sanctos interdum orare; primo, ex majori devotione, quam aliquis habere potest ad Sanctum minorem, quam ad Sanctum majorem; secundo, ad fastidium tollendum, ex quo assiduitas unius rei fastidium parit; tertio, quia quibusdam Sanctis datum est aliquibus specialibus causis præcipue patrocinari; quarto, ut omnibus honor debitus exhibeatur a nobis; quinto, quia plurium orationibus quandoque impetratur, quod unius oratione non obtinetur: quod ipsum ab eodem S. Doctore docetur 2.2. quæst. 83. art. 11. ad quartum.

15 Alterum quod objiciebatur, novorum Sanctorum accessione antiquorum cultum imminui & fere obliterari, desumptum est ab impio Apostata Marco Antonio de Dominis, qui lib. 7. de republ. Ecclesiastica part. 3. cap. 5. num. 58. ait: *Nonnulli Sancti canonizati, veteres Sanctos ipsa totius Ecclesie decrezione ab antiquo canonizatos quoad nos certe pessunderunt; Carolus profecto Mediolani Ambrosii nomen ferme extinxit.* Verum quanti hoc sit, unusquisque facile dignoscere poterit, qui animadverterit, nos, post novas etiam Canonizationes aliorum Sanctorum, in anniversariis celebratibus veterum Sanctorum abstinere ab opere servili, in pervigiiliis eorum jejuna, in ipsorum honorem Divinum Officium recitare, Missasque celebrare, & adhuc superesse singulorum templa augusta, atque instructissima Clero & suppellectili sacra. Unde ergo provenit cultus imminutio per novorum Sanctorum Canonizationes? Et quo jure asseri valet, Mediolani, post relatum in Sanctorum album Carolum Cardinalem Borromæum, fuisse Ambrosii cultum fere extinctum, si hic integer post Caroli Canonizationem perseverat, sicut erat ante ejus Canonizationem? Assumptum latissime comprobatur a Silvestro Petrasancta Soc. Jesu Presbyt. in notis ad epist. Caroli Molinai cap. 3.

16 Illud quoque opponebatur, quod tot Sanctorum Canonizationes rem hanc sacram quodammodo reddant contemptibilem; uti etiam sensisse videtur Gersonius, approbans sententiam Magistri Henrici de Hassia, qui comprimendam esse censuit tot hominum Canonizationem; quod & censuit Petrus de Alliaco in tract. de reformat. Ecclesie cap. 3. At hoc nullum sibi potest rationabiliter locum vindicare; cum tot nec factæ sint, nec fiant, quot fieri exaggeratur, a Romanis Pontificibus Canonizationes. Alexander Papa III. dum anno 1174. erat Parisiis, ab Archiepiscopis, Episcopis, Abbatibus, & aliis Ecclesie Prælatibus in regno Franciæ constitutis exoratus est, ut Bernardum Clarevallensem Abbatem in Sanctorum album referret; quod tunc facere recusavit propter confimiles preces pro alio-

rum Beatorum Canonizatione exhibitas, ut ipse testatur in epistola edita in novo codice Canonizationum, & supra relata. Innocentius VIII. in Sanctorum numerum retulit Leopoldum; ac petitioni de canonizanda B. Catharina filia S. Birgittæ, pro qua Jacobus Archiepiscopus Upsalensis, & alii Sueciæ Antistites una cum Joanne Daniæ, Norvegiæ, & Sueciæ Rege postulabant, sic respondit, ut habetur in ejus epistola apud Raynaldum ad an. Chr. 1485. sub. num. 61. *Satisfaceremus libenter tam pio desiderio Regis ipsius & aliorum, nisi nos respectus alterius nuper factæ Canonizationis de Sancto Leopoldo teneret: nam, cum res hac magni sit momenti, non nisi rarissime fieri consuevit; aliter tantum mysterium, quantum illud est, vilesceret.* Elenchus ipse Canonizationum a Romanis Pontificibus factarum plurium sæculorum decursu nimiam Canonizationum somniamatam frequentiam evidenter excludit. Verum quidem est, recentioribus temporibus introductum esse institutum referendi in album Sanctorum unica Canonizatione plures Sanctos; sed id immodicum Canonizationum numerum non constituit, propter quem Mysterium debeat vilescere. Solemnitas Canonizationis multas exigit expensas, quarum ut amplitudo evitetur, fieri coeperunt, ut infra videbitur, Canonizationes plures Sanctos comprehendentes. Si tot fierent solemnitates, quot Sancti canonizantur, id fieri diceretur, ut Romana Aula ditesceret. Ut immoderati sumptus declinentur, fit sæpe una solemnitas, & plures simul Beati in Sanctorum album referuntur: nec id satis ad obstruendum os loquentium iniqua, qui hinc occasionem arripiunt dicendi, sacram rem ex nimia frequentia vilescere. Ultimæ demum parti oppositionis respondet S. Antoninus *Summ. histor. part. 3. tit. 23. cap. 14. de S. Catharina Senensi loquens: Scriptum est, quia spirituum ponderator est Dominus, cui soli sicut cognitus est numerus electorum in superna felicitate locandus, ita & ei soli innotescunt gradus meritum & præmiorum omnium Sanctorum, & quibus voluerit revelare. Quantum autem nobis, qui tenebris involvitur, permittitur judicare de Sanctis per conjecturas & præsumptiones ex gestis eorum, arbitror, ambigere neminem, plurimos Beatos utriusque sexus non Canonizatos ab Ecclesia, immo nec nominatos, non fuisse minoris meriti & inferioris gloria multis catalogo Sanctorum adscriptis; non enim Canonizatio adjicit ad meritum, vel præmium essentiale Beatorum, nec decernit Sanctitatis gradum, sed venerationem temporalem & gloriam, ut post ipsam possit solemniter Officium celebrari, & festivari, quod alias fieri non dicitur.*

17 Cisterciensium, & Carthusianorum monachorum exemplum poni posset. De primis etenim narrant Henriquez in *appar. ad menolog. Cisterc. cap. 11. de multitudine Sanctorum*, & Manriquez tom. 4. *annal. Cisterc. ad an. 1228. cap. 5. num. 11. noluisse quemdam alumnum suum sanctitate & miraculis clarum canonizandum proponere, ne Sancti in suo Ordine vilescerent, & ne frequens Sanctorum Canonizatio hujus existimationem apud vulgus minueret.* Ex secundis autem, licet tot inter illos vixerint heroi-



heroicis virtutibus præditi & miraculorum gratia insignes, fere tamen nullus est Sanctorum canoni adscriptus. Sed horum monachorum sensui, quatenus Canonizationi adversaretur, nedum rationes supra ponderatæ, sed etiam tot aliarum insignium Religionum obstant exempla. Anno 480. S. P. Benedictus natus est, cumque anno 494. Sublacum se contulisset, post fundata in ea solitudine duodecim monachorum monasteria ad Montem Cassinum anno 528. devenit, ubi suam regulam publicavit, de qua S. Gregorius Papa lib. 2. *dialog. cap. 36.* inquit: *Vir Dei . . . scripsit monachorum regulam discretionem præcipuam.* Sæculorum decursu nonnullæ laxitates in eum sacrum monachorum cœtum inductæ sunt, ad quas avertendas multa excogitata sunt remedia; sed præcipuum illud fuit, quod S. Berno anno 910. feliciter executioni mandavit, ope reformationis, quam in insigni abbazia Cluniacensi statuit. Decimo & undecimo sæculi Congregatio Cluniacensis fuit Ecclesiæ ornamentum: verum, cum regularis disciplina subinde in aliquibus ejus monasteriis cessasset, Robertus Monachus charitate plenus una cum viginti sociis anno 1098. annuente Hugonē Archiepiscopo Lugdunensi & Apostolicæ Sedis Legato, monasterium extruxit in silva Cisterciensi, ex qua Ordo Cisterciensis nomen assumpsit. Nihil aliud Robertus in hac nova voluit fundatione, quam observantiam regulæ S. Benedicti ad litteram, quacumque sublata dispensatione. Anno 1110. Robertus sancte ex hac vita migravit, & summus Pontifex Honorius III. juxta ea, quæ in superioribus dicta sunt, eum Beatum declaravit, & permisit, ut in ejus honorem publicus cultus in aliquibus locis exhiberetur. Roberto successit Albericus, qui postquam Ordinem Cisterciensem spatio decem circiter annorum sancte & feliciter gubernasset, anno 1109. die 26. Januarii in cinere & cilicio, & in medio suorum discipulorum vitam cum morte commutavit; & dicta die quotannis celebratur festum, & ex permissione Congregationis sacrorum rituum in ejus honorem recitatur Officium ab omnibus Italiæ Cisterciensibus. Alberico successit Stephanus, cumque anno 1113. S. Bernardus adhuc juvenis una cum triginta equitibus suis sociis se ejus regimini subdidisset, necesse fuit, aucto monachorum numero, ad alias fundationes animum convertere, inter quas præcipua fuit fundatio abbatiæ Clarevalensis, cui Bernardus ipse præfectus est anno 1115. cumque solemniter in Sanctorum album relatum fuisset, superius visum est; & infra sermo habebitur de cultu, quo apud Cistercienses Gallos colitur Petrus a Castro Novo eundem Ordinem professus, atque ab Hæreticis in odium Fidei occisus.

18 Carthusianus Ordo sæculo undecimo initium habuit. Plures ex eo prodierunt sanctitate celebres, quorum elenchum Frater Georgius Garnefelt Carthusianus edidit post vitam B. Nicolai Albergati eundem Ordinem professi. In memoriam S. Brunonis, qui dictum Ordinem fundavit, publici honores decreti sunt a Leone X. & ejus cultus a ceteris Romanis Pontificibus ampliatus est, ut alibi videbitur; sed, antequam Bruno fun-

dator in Sanctorum album relatus esset, Honorius Papa III. solemniter inter Sanctos retulerat Hugonem olim Carthusiæ Anglicanæ Priorem. Canonizationis diploma relatum fuit a Matthæo Paris *in historia Anglorum lib. 3. pag. 309.* & est insertum in novum codicem Canonizationum. Cur deinceps ex tot Dei servis, qui in dicto Ordine floruerunt, pauci solemniter in album Beatorum, aut Sanctorum relati sint, quaeritur a nonnullis. Bonifacius Ferrarius Carthusianus anno 1420. tractatum scripsit, *Cur in Ordine Carthusiensi pauci canonizati sint, & miracula nulla publica fiant.* Petrus Sutor de vita Carthusianorum inulta ad rem profert. Bonæ memoriæ Sarnellus Episcopus Vigiliensis *in suis epistolis Ecclesiasticis epist. 97. tom. 10.* ait, non tam virtutes, quam miracula requiri pro Beatificatione, & Canonizatione; subditque, horum sanctorum virorum intercessione ut plurimum miracula a Deo non fieri, ne eorum religiosa solitudo accurrentium multitudine turbetur: quod confirmat auctoritate S. Antonini *tit. 15. sue historia cap. 22. §. 2. testantis, circa an. 1175.* quemdam Carthusiæ monachum miracula multa ad sepulcrum edidisse, ut maxima multitudo hominum quotidie eo conflueret. Cum autem Prior ejus loci videret, quietem monachorum turbari, sive dissolvi ex eo concursu, & multa simul scelera ab iis, qui eo concurrerent, perpetrari; accessisse ad tumulum defuncti, eique præcepisse in virtute sanctæ obedientiæ, ut, sicuti in vita sibi obediverat, ita & nunc faciat, ac nullum de cetero miraculum edat; quod & factum est. Frequentiam e contrario miraculorum, intercessione Dei servorum, qui hunc Ordinem professi sunt, mirifice extollit & narrat Theophilus Raynaudus *operum tom. 9. in S. Brunone, punct. 10. §. 2. num. 6.* ubi tandem quaestionem propositam sic resolvit: *Non tam sollicitus fuit Ordo Carthusianus multos Sanctos suos patefacere, quam multos sanctos facere.* Porro, si meus qualiscumque sensus hac in re exquiretur, dicere auderem, in Cisterciensium, & Carthusianorum, & aliorum solitatorum cœnobiis multos Sanctos fuisse in eo, quod attinet ad Ecclesiam triumphantem, paucos vero fuisse, & esse quoad Ecclesiam militantem; in qua, ut quis canonizandus sit, probatio est necessaria virtutum in gradu heroico ex actibus exterioribus deducta, & plurium testimonium assertionibus innixa, quæ probatio difficilis est in solitariis, uti cuique consideranti patebit: ideoque videmus, Hugonem solemniter inter Sanctos relatum fuisse, cum ex Monacho Carthusiano anno 1186. electus Episcopus Lincolnienfis, anno 1200. e vivis excesserit, nedum solitatorum virtutibus ornatus, sed etiam ceteris ad gradum Episcopalem pertinentibus, ut in ejus vita apud Surium *ad diem 17. Novemb.* legi potest. S. Bruno quoque Religionis fundator, ut cetera prætereantur, per aliquot annos consiliis & doctrina Urbanum Papam II. suum discipulum adjuvit in illis tot Ecclesiæ calamitatibus, recusatoque Rhegensi Archiepiscopatu, obtentaque discedendi facultate, ad suos reditum fecit. Hic idem Ordo, dumungebar munere Fidei Promotoris, supplicavit pro  
intro-

introducenda causa Canonizationis B. Nicolai Albergati sui alumni, qui Episcopatum Bononiensem pluribus annis administravit. & inter S. R. E. Cardinales adscriptus, pluribus per universum orbem legationibus functus est, desumptis sanctitatis probationibus non tam ex gestis in solitudine, quam ex patratibus coram aliis. Hæc tamen dicta sint per transennam; cum ad rem, de qua agitur, satis sit, aliquos ex Cisterciensibus, & Carthusianis in Beatorum, & Sanctorum album esse relatos, eorumque consuetudini semper prævalere debeat universalis aliorum Ordinum Religiosorum usus ab Apostolica Sede comprobatus. Huc usque deducta, tacito nomine nostro, compendiose exposita sunt in discursu dogmatico de Canonizatione Sanctorum, post primam hujus Operis editionem Parisiis impresso anno 1739. pag. 30. et pluribus sequentibus.

## CAPUT XIV.

*De Subjecto Canonizationum.*

**Q**uotquot Martyrium pro Christo subierunt, & signis miraculisque post obitum illustres fuerunt; quotquot, post laudabile heroicarum virtutum exercitium, pretiosa in conspectu Domini morte mortui sunt, & miraculorum gloria post obitum floruerunt, sunt Canonizationis subjectum. Quocirca Innocentius III. in *bulla Canonizationis S. Homoboni* (in cod. Canoniz. num. 28.) ait: *Licet autem, juxta testimonium Veritatis, sola finalis perseverantia exigatur ad sanctitatem animæ in Ecclesia triumphante, quoniam qui perseveraverit usque in finem, hic salvus erit; duo tamen, virtus videlicet morum, et virtus signorum, opera scilicet pietatis in vita, et miraculorum signa post mortem, ut quis reputetur Sanctus in militanti Ecclesia, requiruntur: nam, quia frequenter Angelus Satana se in lucis Angelum transfiguratur, et quidam faciunt opera sua bona, ut videantur ab hominibus, quidam etiam coruscant miraculis, quorum tamen vita merito reprobatur, sicut de Magis legitur Pharaonis, et etiam Antichristo, qui electos etiam, si fieri potest, inducet miraculis suis in errorem; ad id nec opera sufficiunt sola, nec signa; sed, cum, illis precedentibus, ista succedant, verum nobis præbent indicium sanctitatis, nec immerito nos ad ipsius venerationem inducunt, quem Dominus suus ostendit miraculis venerandum. Hæc autem duo ex verbis Evangelistæ plenius colliguntur, ubi de Apostolis loquens ait: Illi autem profecti prædicabant, ubique Domino cooperante, & sermonem confirmante sequentibus signis. In eo namque, quod ait, cooperante, eos operatos esse demonstrans; et in eo, quod sequitur, sequentibus signis, eos exponens, immo Dominum in eis miraculis clarnisse. Hoc etiam Dominus usque hodie operatur in Sanctis, et potentiam suam signis evidentibus manifestat, dum vivorum curat agnitiones ad memoriam mortuorum, et eos plus posse post mortem et felicius vivere mortuos, qui in Domino moriuntur, quam, qui vivunt in mundo, demonstrat.*

2 Plana

2 Plana hæc sunt; sed, cum nonnullæ a scribentibus excitentur de Canonizationum subiecto quæstiones, opus est, eas hic referre. Prima ergo est, an Sancti veteris Testamenti possint esse Canonizationis subiectum a summo Pontifice celebrandæ. Negant S. Antoninus in Summa, uti videri potest *tom. 4. bibliot. max. Pontif. pag. 80. et 81.* & Augustinus Triumphus *de potestate Ecclesiæ quest. 17. art. 2.* & Matta *de Canonizatione SS. part. 4. cap. 3. a num. 8. & sequenti*; quia illi, quantumque fuerint præditi sanctitate, non fuerunt tempore plenitudinis gratiæ. Affirmant autem alii, Pavinus videlicet *in relatione Canonizationis S. Bonaventuræ, in principio*, Contelor. *de Canonizatione SS. cap. 10. num. 11.* Castellanus *de Canonizat. SS. num. 85.* Lezana *consult. 3. num. 129.* P. Ceparius *in suo directorio Canonizationum lib. 1. cap. 7. num. 20.* cum plerique Sanctorum veteris Testamenti in Ecclesia universali, & in plerisque particularibus Ecclesiis, summis ipsis Pontificibus annuentibus, cultum habeant. Quæstio hæc in terminis, in quibus a prædictis scribentibus proponitur, inutilis prorsus mihi videtur. Sancti quippe veteris Testamenti illi sunt, qui Christum tempore præcesserunt, qui in venturum Mediatorem & Redemptorem crediderunt, qui virtutibus, aut Martyrio illustres Deo placuerunt, & quos Deus nedum sanctos fecit, sed sanctos esse hominibus manifestavit in Divinis Scripturis; in quo rerum themate nemo non videt, quam absolum esset, & quodammodo inutile, ut apertæ declarationi a Deo factæ de eorum sanctitate sententia summi Pontificis superadderetur definiens, aliquem ex eis esse sanctum, & ideo colendum in Ecclesia universali. Si quæstio proponeretur in aliis terminis, hoc est an post adventum Christi cultus, & qualis cultus, rationabiliter a Romanis Pontificibus indulgeri possit Sanctis veteris Testamenti, animadversionem mereri posset; sed de ea alibi tractabitur.

3 Secunda quæstio est de pueris post Baptismum, & ante usum rationis decedentibus, an possint esse subiectum Canonizationis: Sed hæc quoque indiget explicatione. Vel enim agitur de pueris morientibus ante usum rationis, qui Baptismum fluminis receperunt; & hi, licet sint in gloria, & visione beatifica fruantur, nihilominus esse non possunt subiectum Canonizationis in Ecclesia, cum virtutibus heroicis, dum viverent, non fuerint illustres; uti bene perpendunt auctor tractatus de Canonizatione SS. ad Cardinalem Montis Regalis *part. 3. cap. 3.* Malvet. *de Canonizatione SS. ad tertium dubium num. 63.* Castellanus *eodem tractatu num. 69.* P. Ceparius *in suo directorio Canonizat. SS. lib. 1. cap. 7. num. 15.* & concordant antiquiores, Innocentius videlicet, & Joannes Andreas *in cap. Audivimus de Reliq. et venerat. SS.*; propositaque per Augustinum Triumphum *de potestate Ecclesiæ quest. 17. art. 1.* controversia, an Papa debeat canonizare omnes, quos constat esse in vita æterna, post nonnulla exposita argumenta affirmanti opinioni faventia, negativam sententiam amplectitur; tum quia plerique sunt in vita æterna, qui tamen canonizari non possunt propter defectum

defectum virtutum heroicarum, tum quia Papa teneretur canonizare omnes pueros baptizatos statim post Baptismum decedentes, quod est absurdum. Vel agitur de pueris ante usum rationis decedentibus post Baptismum receptum non fluminis, sed sanguinis, quod videlicet necati fuerint in odium Christi & ejus Fidei; &, de his quidem loquendo; cum S. Irenæus innocentes pueros pro Christo ab Herode interfectos Martyres appellet; cumque (ut est in homilia tertia Origenis in diversos *part. 2. oper. pag. 282. edit. Paris. an. 1604.* qualiscumque ea sit, ubi de festo SS. Innocentium: *Bene ergo et secundum voluntatem Dei eorum memoriam sancti Patres celebrari mandaverunt sempiternam in Ecclesiis, veluti pro Domino morientium*) eos Ecclesia ab antiquo tempore, sicuti sanctos Martyres, colat; rationabilis insurgere potest controversia, an ad eorum similitudinem alii pueri in odium Fidei interfecti ante usum rationis possint esse, uti Martyres, subjectum Canonizationis. Affirmative autem respondet Guyet de *festis propriis SS. lib. 2. cap. 7. quest. 15. De infantibus dubitationem omnem tollit SS. Innocentium ab Herode intersectorum exemplum, quibus absque acceleratione usus rationis tam potuit meritum Christi prodesse ad palmam Martyrii per effusionem sanguinis consequendam, quam ceteris prodest per lavacrum Baptismi ad gratiam*; eique adhæret Cardinalis Capisucchi in suis *controver. Theolog. controuv. 27. quest. 1. de Martyrio §. 16. Exigitur ergo ad verum Martyrium in persecutore intentio inferendi mortem propter Fidem exterius manifestata, et ea patiente intentio pariter exterius manifestata suscipiendi mortem propter Fidem, in ordine scilicet ad opus, quod ex propria ratione relationem habeat ad Fidem, et rursus ab ipso patiente ad Fidem referatur. In infantibus vero, qui pro Christo occiduntur, cum non habeant usum rationis, unde intentionem habere possint moriendi pro Christo, sat est intentio Ecclesie, concurrente intentione persecutoris eos pro Fide occidentis. Si autem occidantur ante Baptismum, veri Martyres sunt, quia occiduntur in odium Fidei Christiane; si vero occidantur post Baptismum, veri Martyres sunt, quia occiduntur in odium Christi, cui per Baptismum uniuntur.*

4 Favere insuper possunt nonnulla exempla. Celebratur quippe festum die 24. Januarii S. Babylæ Episcopi Antiocheni, qui tertio Ecclesiæ sæculo sub Decio Martyrio coronatus est una cum tribus pueris a se in Christiana Fide educatis, Urbano videlicet, Prilidiano, & Epolonio; ut habetur in Martyrologio Romano ad dictam diem, atque in Officio & Missa Ambrosianis. De his loquitur S. Joannes Chrysostomus in homilia quam recitavit in honorem SS. Juventini, & Maximini *tom. 2. pag. 578. Nuper B. Babylas cum tribus Pueris nos hic congregabat, hodie vero per sanctorum Militum, in acie exercitum Christi constituit; nuper quadriga Martyrum, hodie biga. Puerorum autem nomina, quæ a S. Joanne Chrysostomo inibi reticentur, referuntur a Gregorio Turonensi lib. 1. historia Franc. cap. 28. Simeon item puer Tridentinus, qui vix vigintinovem menses suæ compleverat ætatis, anno 1472. occisus fuit a Judæis in odium Christi Domini. Joannes Mat-*  
thias

thias Tiberinus doctor Medicus, qui de mandato Episcopi Tridentini corpus inspexit infantis occisi, & de genere modoque mortis interrogatus, sententiam suam juratus dicere debuit, historiam Martyrii conscripsit editam apud Surium *ad diem 24. Martii*. Statim post obitum publicus cultus eidem cœpit exhiberi tamquam Martyri, & miracula quædam vulgata sunt ejus intercessione a Deo facta. Sed anno 1475. summus Pontifex Sixtus IV. per epistolam Dominos, & officiales per Italiæ partes constitutos, ne hæc fierent, admonuit, & omnia prohibuit, ulquequo certior factus esset de veritate factorum per Commissarium, quem elegerat; uti colligitur ex ejus diplomate impresso tom. 2. *amplissima collectionis veter. scriptor. & monument. & historic. opera celeberrimi P. Edmundi Martene edita column. 1516.* En verba epistolæ: *Dilecti Filii, salutem &c. Licet inter causas majores Apostolico sit duntaxat judicio reservatum, quempiam inter Sanctos referre, & miracula approbare, nihilque adhuc certum, compertumve nostro judicio, aut approbatum sit de quodam puero Simone Tridentino per Judæos, ut dicitur, interfecto, de quo noviter fieri mandavimus, & recipi plenariam informationem: tamen accepimus, nonnullos publice etiam in predicationibus affirmare, ipsam Simonem, quem Beatum appellant, per dictos Judæos in ipsa civitate Tridentina post multa tormentorum genera cruci affixum, & occisum, & Martyrem esse, & plurimis miraculis clarescere, & alios desuper imagines depingere, chartas in modum historiarum conscribere, & publice vendere, & venditioni exponere, & propterea Christifideles contra Judæos omnes, eorumque bona incitare; adeo etiam, quod multi eorum plura exinde sint passi pericula. Attendentes itaque, hæc & similia pessima fore presumptionis, talia per bandimentum publicum in hac nostra urbe alina fieri amodo prohibuimus, & idcirco vobis tenore presentium, motu proprio, et ex Pastoralis officii debito committimus, & districte etiam sub poena excommunicationis mandamus, quatenus et vos in locis dominiorum vestrorum, ac alias regimini vestro commissis eadem fieri sub poenis, de quibus vobis videbitur, publice, & omnino interdicitis, inobedientes poena condigna plectendo, et nihilominus Judæis ipsis, quos Ecclesia in testimonium mortis Christi tolerat, firmo defensionis presidio propter hoc assistatis, donec aliud a nobis receperitis in mandatis; cum intendamus, habita ex Commissario nostro, quem propterea ad partes illas destinamus, rei veritate, in præmissis opportune & plenarie, ut justum fuerit, providere: contrariis non obstantibus quibuscunque. Datum Roma, die 10. Octobris anno 1475. anno v. Comprobatis subinde probandis, & adimpletis adimplendis, facta est Apostolica auctoritate cultus approbatio. Simeonis autem pueri miracula plene referuntur ex Jano Pyrro Pincio Mantuano apud Bollandistas *ad citat. diem 24. Martii*; ibique nedum narratur, auctoritate Gregorii XIII. ejus nomen fuisse descriptum in Martyrologio Romano, sed etiam, instante Cardinali Madrutio Episcopo & Principe Tridentino, Sixtum V. concessisse, ut de eo celebrari posset festum per universam dioecesim Tridentinam cum Officio & Missa propriis, addita in perpetuum plenaria indulgentia visitantibus*

tibus die ejus festo ecclesiam S. Petri, ubi corpus cum omnibus passionis instrumentis collocatum est. Idem Bollandistæ ex Ægidio Gelenio testantur, cultum exhiberi in diœcesi Colonienſi Joannetto puero in odium Fidei a Judæis necato; sed ingenue confitentur, se ignorare tempus mortis. Baillet ad sæpe citatam diem 24. Martii iterum refert omnia, quæ fuerunt a Bollandistis relata; additque, Richardum puerum Parisiis, & Guillelmum puerum in Anglia occisos a Judæis in odium Christi, tamquam Martyres cultum habuisse; sed ait, se non vidisse Acta autographa. In Martyrologio Romano ad diem 24. Oct. commemoratio habetur S. Aretæ, & sociorum, inter quos filius erat annorum quinque. Aretas cum sociis Martyrium subiit sæculo sexto in regione Homeritide, vel Sabæa sub tyranno Dunaano. Extat historia Martyrii ex Metaphraste apud Surium ad eandem diem 24. Octob. sed Baillet in tabula critica de veritate Actorum dubitat, cum parum deferat auctoritati Metaphrastis; de qua tamen alibi habebitur sermo.

§ Hucusque adducta sufficienter probare posse videntur, pueros in odium Fidei occisos, siue recepto, siue non recepto Baptismo fluminis, esse posse subiectum Canonizationis; quod quidem, speculative, ut ajunt, loquendo, verum esse existimarem, sed ex instituto, & in ipso facti eventu, an esset admittendum, dubitarem, cum nullum Canonizationis eorumdem adsit exemplum. Illud enim S. Babylæ Episcopi Antiocheni, & trium puerorum multis est difficultatibus implicatum; non solum quia nonnulli putant, duos fuisse S. Babylas Martyres, alterum sub Decio, alterum sub Numeriano, quos tamen redarguit Cardinalis Baronius in *annalibus*, & in *notis ad Martyrologium Romanum*; sed etiam, quia Eusebius in *histor. Eccles. lib. 6. cap. 23.* cui Baillet in *tabula critica ad diem 24. Jan.* ait unice in hac re deferendum esse, meminit Martyrii Babylæ, & non sociorum. Porro, quidquid sit de his, admissaque veritate Martyrii Babylæ, & sociorum, ex Actis editis a Bollando desumitur, socios Martyrii usu rationis præditos fuisse, cum unus esset duodecim annorum, alter novem, & tertius septem, ut habetur in veteri MS. Ripatorii, & Mombratii cap. 2. apud Bollandum, & responsiones ab eis datæ Tyranno id patefaciant; concordatque Martyrologium Romanum ad diem 24. Jan. ubi legitur, quos ille (idest Babylas) in Fide Christi instruxerat. Rursus alterum Simonis pueri Tridentini ad quamdam æquivalentem Beatificationem potius, quam ad Canonizationem est referendum; tum quia cultus fuit ei indultus in particulari ecclesia; tum quia, cum Martyrium contigerit post tempora, quibus Romani Pontifices sibi-privative quoad omnes alios jus asseruerunt beatificandi & canonizandi, nulla Pontificia exhibetur formalis aut æquivalens sententia definiens, re secundum juris solemnitatem discussa, eum esse tamquam Martyrem in universa Ecclesia colendum. Postremum vero Aretæ, & sociorum non videtur ad rem plane faciens & concludens; tum quia, juxta alibi dicenda, ex descriptione in Martyrologio Romano non

valet illatio ad Canonizationem; tum quia pueri inclusio, nulla facta ejus speciali mentione, ad integritatem potius Actorum Martyrii, quam ad Canonizationem referenda esse videtur. Præterquamquod, sicuti in Occidentali Ecclesia ex Martyribus veteris Legis soli Machabæi speciali sesto coluntur, cum postremi in veteri Lege sanguinem fuderint, sic in nova Lege expedire videtur, ut soli pueri innocentes, qui primi pro Christo, & loco Christi mortui sunt, præceptivo cultu potiantur in universa Ecclesia.

6 Tertia quæstio respicit eos, qui pie in Domino mortui sunt, sed quorum animæ purgantur, aut constat purgatas esse per ignem Purgatorii. Nihil enim inquinatum intrat in regnum cælorum, & per viam sanctam non transit pollutus; sicque, cum, dimissa culpa mortali, remaneat in hominibus aliquando reatus poenæ temporalis, remaneant aliquando peccata venialia, in quæ etiam cadunt Justî, propterea animæ ad tempus determinatum in Purgatorio detinentur.

7 Porro, si quæstio sit de illis, qui Purgatorium adhuc sustinent, speculativa, ut dicitur, potius erit, quam practica; cum citra Divinam revelationem scire nequeamus, an hujus, aut illius anima in Purgatorio detineatur. P. Christianus Lupus in notis ad 1v. Concil. Rom. tom. 3. pag. 572. docet, non posse canonizari eos, quorum animæ adhuc torquentur in purgatricibus flammis, ex quo potissimum, dum adhuc in illis sunt, earum intercessione Deus non consuevit miracula operari: Quousque purgantur eminentium etiam Sanctorum anima, consueverunt etiam corpora a miraculorum gratia suspendi: quod enim S. Ragnebertus ante lapsos septem acceptæ & ante mortem nondum completa poenitentia annos nullo miraculo inclaruerit, ejus apud Franciscum Du Chesne vita testatur.

8 Et, quia B. Petrus Damianus lib. 2. epistolarum pag. 112. refert, S. Severinum Episcopum Colonensem Purgatorii poena multatum fuisse, eo quod horarum Canonicarum pensum intempestive, & non per distincta spatia perfolverat, subdit ipse P. Lupus, hanc narrationem esse apocrypham, & nullo antiquitatis testimonio corroboratam, & merito. Petrus etenim Damiani vixit sexcentis annis post obitum S. Severini, & primus est, qui rem prædictam narraverit, uti ad rem adnotavit Cardinalis Baronius ad Martyrol. Rom. ad diem 23. Octob. Cumque S. Gregorius lib. 4. dialogorum cap. 40. tom. 2. oper. de Paschasio Diacono, qui fuit, vir mira sanctitatis elemosynarum maxime operibus vacans, cultor pauperum, & contemptor sui, hæc narret: Hic itaque cum temporibus Symmachii Apostolica Sedis Prasulis esset defunctus, ejus dalmaticam feretro superpositam demoniacus retexit, statimque salvatus est. Post multum vero temporis Germano Capuano Episcopo, cujus superius memoriam feci, medici pro corporis salute dictaverant, ut in Angulani thermis lavari debuisset. Qui ingressus easdem thermas, prædictum Paschasium Diaconum stantem & obsequentem in caloribus invenit. Quo viso vehementer extimuit, & quid illic tantus vir faceret, inquisivit. Cui ille respondit: pro nulla alia causa in hoc poenali loco deputatus sum, nisi quia in parte Laurentii contra Symma-



*Symmachum sensu. Sed quasi se, pro me Dominum deprecare: atque in hoc cognosces, quod exauditus sis, si huc rediens me non inveneris. Qua de re vir Domini Germanus se in precibus constrinxit, & post paucos dies rediit, sed jam dictum Paschasium in loco eodem minime invenit. Quia enim non malitia, sed ignorantia errore peccaverat, purgari post mortem a peccato potuit; ait idem P. Lupus, hoc unicum esse exemplum, nec rei prodesse, cum Paschasius canonizatus non esset, verum ille non erat canonizatus: & paulo post, aliud simile miraculum non scio exemplum. Sed, quidquid sit de ratione a Lupo allata, propter quam canonizari non possunt illi, quorum animæ adhuc in Purgatorio detinentur, ex quo videlicet gratia miraculorum tunc est suspensa, rationes aliæ non desunt prædictum assumptum comprobantes. Pro Canonizato etenim non oratur; & pro animabus in Purgatorio degentibus preces Deo offeruntur: Canonizatus honoratur erectione altarium, celebratione Missarum, & recitatione Officiorum in ejus honorem. quæ profecto congruere non possunt statui animæ purgantis, qui satisfaciens est & poenalis; uti bene ponderant Auctor tractatus de Canonizatione Sanctorum ad Cardinalem Montis Regalis 3. part. cap. 1., & Lezana consult. 3. num. 119. Canonizati denique sunt nostri apud Deum intercessores, & orant pro nobis; juxta doctrinam vero S. Thomæ in 4. dist. 15. quæst. 4. art. 5. quæstiunc. 2. ad secundum, animæ Purgatorii non sunt in statu merendi, & ideo magis indigent, quod pro eis oretur, quam ut ipsæ possint orare. Hæc eadem doctrina ab eodem S. Doctore exponitur 2. 2. quæst. 83. art. 11. Cum enim in tertio argumento adversus Sanctorum intercessionem sic disputandi gratia dixisset: Sicut Sancti, qui sunt in patria, sunt superiores nobis, ita & illi, qui sunt in Purgatorio, quia jam peccare non possunt: sed illi, qui sunt in Purgatorio, non orant pro nobis, sed magis nos pro eis: ergo nec Sancti, qui sunt in patria, pro nobis orant; ita deinde respondet: Ad tertium dicendum, quod illi, qui sunt in Purgatorio, etsi sint superiores nobis propter impeccabilitatem, sunt tamen inferiores quantum ad poenas, quas patiuntur; & secundum hoc non sunt in statu orandi, sed magis ut oretur pro eis. Unde Cardinalis Cajetanus subdit: Propter hoc enim (loquitur de poenis animarum purgantium) excluduntur in responsione ad tertium existentes in Purgatorio ab orando pro nobis, quia non sunt totaliter nobis superiores, sed ratione poenarum inferiores, & egentes nostris orationibus. Concordant autem plerique alii Auctores suse cumulati ab accurato viro Joanne Frescobaldo in suis dissertationibus super hoc argumento editis, quarum cum laude meminit sanctæ memoriæ Benedictus XIII. in suo serm. 28. de Purgatorio.*

9 At, si quæstio sit de illis, qui in Purgatorio fuerunt aut ex quo, dimisso mortali, debitam pro eo non perfecerunt poenitentiam, ita ut necesse fuerit temporalem poenam in Purgatorio subire; aut ex quo pro peccatis venialibus non satisfecerunt: præterquamquod neque de hoc constare potest, nisi ex revelatione Divina; nonnulli eo sub obtentu, quod in Ecclesia militante fuerunt, sunt, & futuri sunt iusti, qui nihil purgabile

habentes in hora exitus, statim post mortem in cælestia tabernacula recipiuntur, juxta illud *Psalm.* 126. v. 2. & 3. *Cum dederit dilectis suis somnum, ecce hereditas Domini filii merces fructus ventris*; quem locum Hugo Cardinalis his explicat verbis: *Ostendit, quæ sit hereditas Domini, & quomodo collecta, & quando danda, & quibus .... Cum dederit Dominus, scilicet dilectis suis somnum, idest mortem temporalem, quæ somnus dicitur, quia terminus est laboris, & inde fortior resurgit Justus, & de facili excisatur a Domino .... Ecce hereditas Domini parata est, & illis statim dabitur: nonnulli, inquam, censent, Canonizationis subjectum esse debere eos tantum Justos, qui statim post obitum in paradysum recipiuntur; cum non omnes Justo, sed perfectiores, & perfectissimi sint canonizandi, cumque Canonizationis honore decorandi sint in Ecclesia militante illi solum, quorum actiones proponi possunt Fidelibus in exemplum, quod imitentur. Quare Castellinus de certitud. glor. Sanctior. cap. 1. punct. 25. num. 52. ait: *Nomine vero Sanctorum intelligimus viros quoscumque pios & justos, innocentes atque immaculatos, qui in hac vita mortali viam mandatorum Dei alacriter cucurrerunt, illa fideliter observando, ac perseveranter, jamque vite presentis cursum beato sine clausurunt, quorum anima, nulla purgatione egentes, cali secreta penetrarunt, statim evolvendo ad gloriam, clare Deum intuentes, sicuti est.**

10 Alii e contratio doctrinam hanc sic universaliter acceptam tamquam nimis rigidam rejiciunt; ideoque P. Matthæuccius in sua practica Theologico-Canonica ad causas Beatificat. & Canonizat. tractandas tit. 2. cap. 4. num. 35. inter cetera, quæ censet non obstat Canonizationi, ponit, quod Dei servus decesserit cum minima aliqua labe poenis Purgatorii putganda; nam eo igne & Sancti, cum egent, purificantur: & paulo post: *Quæ sunt a Consultoribus nimium rigidis ponderanda, ut deducant, leves aliquas culpas ex subreptione veniales sanctitati & perfectioni servorum Dei non officere, minusque, si poenas Purgatorii debeant subire ad satisfaciendum Deo, qui impunita etiam minima non relinquit.* Re vera, quidquid sit de præsentī controversia, quam speculativam vulgariter dicemus potius, quam practicam, quemadmodum rigidus nimis esset ille censor, qui in causa Canonizationis suffragaturus, aliquem Dei servum continuato virtutum heroicarum exercitio celebrem, Canonizationis honore indignum reputaret ob commissum aliquod peccatum veniale, de cuius satisfactioe non constaret Ecclesiæ; ita profecto nimis laxus haberi deberet alius censor, qui Canonizationem crederet indulgentiam illi Dei servo, qui lapsus in mortale peccatum talia non exhibuisset poenitentia signa, ex quibus Ecclesia tuto credere posset, eum Divinae justitiæ plene satisfecisse, juxta illud S. Ambrosii apologia 1. David cap. 2. n. 6. col. 675. rom. 1. oper. ubi inquit: *Sancti autem Domini, qui consummare pium certamen gestiunt, & currere cursum salutis, scubi forte ut homines corruerint, naturæ magis fragilitate, quam peccandi libidine, acrioris ad currendum resurgunt, pudoris stimulo majora reparantes certamina, ut non solum nullum attulisse estimetur lapsus impedimentum, sed etiam velocitatis incentiva cumulasse.*

11 Quarta quæstio est de his, qui adhuc vivunt, an possint esse Canonizationis subjectum: cui omnes negative respondent, communiter loquendo; quidam vero, in aliquo casu extraordinario, affirmative dicunt esse respondendum, hoc est, si Deus summo Pontifici revelaret, aliquem esse prædestinatum, & in gratia confirmatum. Pro hoc assumpto comprobando afferunt exempla ecclesiarum ad honorem B. Mariæ Virginis adhuc viventis constructarum, in civitate videlicet Avenionensi a S. Martha, in civitate Cæsaraugustana a S. Jacobo Majore, & apud Carnotenses centum annis ante ejus nativitatem imaginem serunt consecratam ad honorem Virginis parituræ, juxta ea, quæ ad rem collecta habentur apud Dominicum a SS. Trinitate in *biblioth. max. Pontificia tom. 10. pag. 488.* & apud Lezanam *confult. 3. n. 118.* quibus quidem addi possunt argumenta tum Beatissimæ Virginis, tum S. Joannis Evangelistæ, quos nonnulli autumant nunquam mortuos fuisse, tum Eliæ, qui adhuc vivit, quique, teste Lezana *cit. confult. 3. num. 129.* canonizari potest solemnî Canonizatione, qua Sancti hodie canonizantur.

12 Verum, cum juxta Concilium Tridentinum *sess. 6. de justificatione cap. 12.* sciri non possit, nisi ex speciali revelatione, quos Deus sibi elegerit, unusquisque facile dignoscere valebit, inutile omnino esse examen hujusce controversiæ. In præsentî quippe agitur de Canonizationis subjecto juxta vias ordinarias, & dependendo a probationibus, quæ in hujusmodi judicio recipi consueverunt; nec aliter aliquando rem se habuisse asseri potest, propter vim exemplorum supra relatorum. In eo enim, quod attinet ad ædificationem ecclesiarum in honorem Beatissimæ Virginis adhuc viventis, alibi de ea sermo fiet. In eo autem, quod spectat ad eandem Beatissimam Virginem, & S. Joannem Apostolum, quos nonnulli asserunt mortuos non fuisse; licet S. Epiphanius scriptor quarti sæculi asseruerit, se declarare non posse, utrum Virgo mortua sit, an vero immortalitatis honore fuerit decorata, & probabiliorum censuerit opinionem, quod Deus ei dederit gratiam immortalitatis; hujus nihilominus gravissimi Patris sensus, aliorum &, quod caput est, Ecclesiæ universæ sensui adversatur, qui mortuam eam censent: ita ut tota controversia sit, num in civitate Ephesina, an in civitate Hierosolymitana mortua fuerit, juxta erudite collecta a Tillemont *tom. 1. sex primor. sæcul. in vita Beatissimæ Virginis artic. 7. & in notis ad eandem, & signanter nota 14. & nota 17.* Et, licet Georgius Trapezuntius, & post eum Jacobus Faber Stapulensis defendendam susceperint sententiam de exemptione S. Joannis Evangelistæ a communi hominum lege, ita ut ipse adhuc superstes novissimis decedentis mundi temporibus manum cum Antichristo collaturus sit; & Florentinius in *notis ad vetus Martyrologium* mortem admiserit Joannis, sed statim ad vitam existimaverit restitutum, ut ad exitum sæculorum perveniens, post annuntiatam Fidem, iterum tandem occumbat; hæc tamen, & similia ab aliis passim rejecta sunt, & quidquid Græci post admissum schisma tenebris

bris ignorantiae involuti autumaverint, Ecclesia certe Latina semper fuit & est in eo sensu, quod S. Joannes, sicuti ceteri homines, mortem subierit. Quocirca Polycrates Ephesinus Episcopus certiorum fecit Victorem Romanum Pontificem de obitu S. Joannis Ephesi secuto; uti videre est apud Eusebium lib. 3. cap. 25. Tertullianus autem in lib. de anima cap. 50. pag. 501. Henoch, & Eliæ dilatam dicit mortem, sed Joannem obiisse testatur: *Translatus est Henoch, & Elias, nec mors eorum reperta est, dilata scilicet. Ceterum morituri reservantur, ut Antichristum sanguine suo extinguant. Obiit & Joannes, quem in adventum Domini remansurum, frustra fuerat spes.* Consuli possunt super morte Joannis, Tillemont tom. 1. in ejus vita, Calmet in dissertat. super hoc eodem argumento, Guyet de festis propriis Sanctorum lib. 2. cap. 9. num. 11.

13. Redacta idcirco controversia ad Eliam, & Henoch, translatio quidem Eliæ adhuc viventis ex sacro Textu desumitur lib. 4. Reg. cap. 2. v. 11. & 12. *Cumque pergerent & incedentes sermocinarentur, ecce currus igneus & equi ignei dixerunt utrumque (hoc est Eliam, & Eliseum) & ascendit Elias per turbinem in celum; Eliseus autem videbat, & clamabat: Pater mi, Pater mi, currus Israel, & auriga ejus; & non vidit eum amplius.* Item de Henoch similia dicenda sunt, teste S. Paulo in epist. ad Hebr. cap. 11. v. 5. *Fide Henoch translatus est, ne videret mortem, & non inveniebatur, quia transtulit illum Deus.* Tum de utrique recepta est Patrum sententia, eos nedum jugem nunc degere vitam, sed & statuendos pariter certa die in prælium contra Antichristum, ac tandem perimendos ab adversario illo omnium Sanctorum, & post hæc restituendos in vitam & gloriam immortalem, juxta illud Apoc. cap. 11. v. 4. *Hi sunt due olive, & duo candelabra in conspectu Domini terre stantes.* De eorum verò cultu, licet adhuc viventium, sermonem habendo, quamvis Eliæ mentio fiat in Martyrologio Romano, cultuque Missæ & Officii, in Religione potissimum PP. Carmelitarum, colatur; hinc tamen nihil ad propositam de Canonizatione viventium controversiam inferri posse videtur. Ratio est, quia Ecclesia non celebrat festum Eliæ ut Beati, sed ut rapti, uti late ostendit eruditus P. de Gravefon in histor. Ecclesiast. veter. Testamenti tom. 3. pag. 264. atque consentit P. Cornelius a Lapide in Genesi cap. 5. v. 24. ubi, proposita quæstione, an Henoch, & Elias videant Deum, & sint Beati, allatoque pro parte affirmativa argumento, quod Ecclesia celebrat festum Eliæ, & Græci in ejus honorem templa erexerunt, post bene statutam negativam opinionem, sic respondet: *Græci celebrant festum Elia non Beati, sed rapti. Illo enim die tantum recolunt memoriam raptus ejus, quia raptus hic fuit admirabilis. Eodem modo & scopo Elia templa erexerunt Græci, quo festum illi instituerunt, scilicet, ut iis testarentur, & recolerent memoriam tam miri raptus Elia.* Aut quia, admittenda communiiori Theologorum opinione, Eliam, & Henochum visione & voluptate beatificam nullatenus gaudere, tum quod Dei visio negatur hominibus in hac vita degentibus, tum quod peculiare fuit Christi privilegium,

ut

ut esset simul viator & comprehensor; bene potuit Ecclesia cultum admittere in honorem Eliæ, qui constitutus in altissimo sanctitatis gradu, perseverantiæ & confirmationis in gratia dono præditus est, juxta ea quæ habentur apud Lezanam *cit. consult. 3.* In quo proinde rerum themate nemo est qui non videat, cultum Eliæ adhuc viventis nihil habere commune cum Canonizatione hominis viventis, juxta modum & morem nunc in Ecclesiâ adhibitum peragenda, absque eo quod ullum hinc sequatur absurdum: Divina quippe visione non fruebatur, sed in sinu Abrahæ quiescebat Elias, quamvis, uti legitur in historia Machabæorum, multum orabat pro populo, & sic poterat a Judæis tamquam intercessor implorari. Ex quo propterea sequitur, recte potuisse in honorem Eliæ, licet adhuc Dei beatifica visione non fruentis, sed supra laudatis donis insigniti, festum institui, & in toto Carmelitarum Ordine Officium recitari; quemadmodum satis apte argumentatur Natalis Alexander in *histor. Ecclesi. sac. v. dissert. 25. art. 2. proposit. 2. sub num. 17. §. Respondeo quarto.*

14 Alia quæstio hic esset pertractanda, an possit aliquis ad ordinem Apostolorum canonizari: sed, cum verus quæstionis sensus non alius sit, quam ut perpendatur, num aliquis Dei servus Canonizationis honore decoratus, propter insignia, quæ egit, facinora pro Fide Catholica in aliquam regionem introducenda, titulo Apostoli insigniri possit, de ea alibi susè tractabitur.

## CAPUT XV.

*De gravitate Causarum Canonizationis, & de his, quorum opera & consilio summi Pontifices olim usi sunt in earum definitione.*

**R**omani ipsi Pontifices, ad quos spectavit & spectat definitio causarum Canonizationis, earum gravitatem conceptis verbis in suis diplomatibus & bullis expresserunt.

2 Celestinus Papa III. in bulla Canonizationis S. Ubaldi Episcopi Eugubini hæc habet: *Nos vero opus istud intuentes sensum & intelligentias nostras excedere, quia potius est Divini judicii, quam humani, cum ipse solus plene noverit, qui sint ejus, suspendimus desiderium tuum aliquandiu, ut Nobis & Fratribus nostris, quid potius agendum esset, Spiritus Sancti gratia revelaret.*

3 Innocentius III. in bulla Canonizationis B. Vulfani Episcopi VVigorniensis in Anglia ait: *Cum Divinum sit judicium hujusmodi potius, quam humanum; & in bulla Canonizationis B. Chunegundis Imperatricis: Nos itaque cognoscentes, quod hoc re vera judicium sublimius est inter cetera judicia judicandum, in ipsius examinatione plenariam volumus adhibere cautelam.*

4 Honorius III. in epistola ad Archiepiscopum, Decanum, & Capitulum Eboracense, & alios Ecclesiæ Præfules supplicantes pro Canonizatione S. Guillelmi Archiepiscopi Eboracensis, sic locutus est: *Nos tamen provide*

provide attendentes, quod in tam sancto negotio non est, nisi cum maturitate plurima, procedendum; & in alia epistola ad Religiosos viros S. Mariæ de Gualdo supplicantes pro Canonizatione Joannis Eremitæ: Tanto maturiori consilio circa ea consuevimus procedendum, quanto in iis citius, quam in aliis, mole carnis gravatus humana considerationis intuitus potest falli; ut habetur apud Raynaldum ad an. 1223. num. 48. & ad an. 1218. num. 34.

5 Gregorius IX. mandans Episcopo Bononiensi & nonnullis aliis, ut inquisitionem assumerent in causam Canonizationis S. Dominici, sequentibus verbis usus est, ut habetur in bulla hujus Pontificis 89. in 1. tom. Bullarii Ord. Prædic. quæ eadem verba repetiit in alio consimili mandato inquirendi, ab eo dato in causam S. Elisabeth, sicuti legitur apud Raynaldum ad an. 1232. num. 10. Verum, etsi per virtutum insignia, quibus olim memoratus Frater extitit multiformiter insignitus, seu per famosa miracula, quibus ejus sancta rutilare dicitur sepultura, celestis Sponsa vocibus de Sanctorum esse numero debeat affirmari; tamen, quia mentibus ambiguis subito rei veritas non clarescit, & repentinis non solet miraculorum relativis quorundam spiritus exultare, eo quod omne rutilum nomen auri non impetrat, nec ebur quodlibet niveum imitatur: Nos, quos, providentia præambula, decet festinos in certis, & lentos in dubiis inveniri, discretioni vestra, de qua in Domino plenam fiduciam obtinemus, mandamus, quatenus provide attendentes, quod lux vera Sanctorum Dominus Jesus Christus signis publicis & prodigiis evidentibus trepidantia discipulorum pectora roboravit, mentes eorum nubilas de resurrectionis admiranda gloria expressa certitudinis clarificans fulcimentis, vitam & conversationem prædicti Fratris, quibus Deo & hominibus noscitur placuisse, necnon miracula, quæ, auctore Deo, de sui corporis sanctitate procedunt, habita præ oculis sola Divina reverentia majestatis, per testes idoneos studeatis inquirere, cauta diligentia & sollicitudine vigilantibus.

6 Innocentius IV. inquit in Remissoria concessa pro causa S. Rosæ Viterbiensis apud Raynaldum ad an. 1252. sub num. 7. Cum in re tam profundi judicii tanta expediat maturitatis cautela procedi, ut iis, qui perverſitatis hæretica sermone corrupti loqui audent mala de bonis, & in electis pingere maculam, ut Ecclesia sponsa Christi species decoloretur in membris, nullus insultandi Fidelibus aditus relinquatur.

7 Joannes XXII. inquiri mandavit in plerisque causas Canonizationis, in causam videlicet B. Claræ a Monte Falco, in causam Roberti Cantuariensis Archiepiscopi, in causam Philippi Archiepiscopi Bituricensis, in causam B. Gregorii Papæ X., & in causam S. Thomæ Aquinatis. In causa B. Claræ a Monte Falco hoc sermone usus est: Attendentes, quod Romana Ecclesia, præsertim in tanto Fidei negotio, consuevit cum magna maturitate procedere, ubi videlicet de re tam ardua quaritur, sensibus quidem abdita, ignota scientiis, & novo quodam probandi genere, visa utique & miraculis comprobanda: nam, si difficile existimamus, quæ in terra sunt, & quæ in prospectu sunt, invenimus cum labore; quæ in calis sunt, quis investigabit? uti legitur

legitur apud Raynaldum *ad an. 1317. sub num. 55. & eadem quidem verba repetuntur in alio mandato pro causa B. Gregorii Papæ X. quemadmodum habetur apud eundem Raynaldum ad an. 1325. sub num. 32.* In causa vero Roberti Cantuariensis Archiepiscopi sic idem Pontifex locutus est: *Circa id, quod de Canonizatione sanctæ memoria Roberti Cantuariensis Archiepiscopi supplicasti, scire te volumus, quod Romana mater Ecclesia non consuevit, super tanta causa præsertim, precipitanter aliquid agere, quin potius tale negotium solemnis executionis indagine ponderare.* In causa Philippi Archiepiscopi Bituricensis: *Sed, licet sit pium & debitum venerationi Sanctorum intendere, & eos colendos in terris populis exhibere, expedit tamen in illis illam maturitatis adhibere cautelam, ut nulla fallat incertitudo iudicium, nec ignorantia facti iudicantis solertiam circumscribas, qua tanto periculoseior foret in talibus, quanto in maioribus erraretur; sed, prudentia multa præambula, & diligenti maturitate servata, veritas exquisita sollicite deducatur in lucem, de dubiis sententia eliciatur indubia, & certitudo habeatur, & sumatur certior in incertis.* In causa demum S. Thomæ Aquinatis: *Attendentes tamen, quod Romana Ecclesia, præsertim in tanto Fidei negotio, ubi videlicet de re tam ardua queritur, cum magna consuevit maturitate procedere, quodque scriptum sit, causam, quam nesciebam, diligentissime investigabam; nam, etsi gloria Dei sit celare verbum, gloria tamen Regum est investigare sermonem; sicuti legitur apud Raynaldum ad an. 1318. sub num. 29. & sub num. 30. & ad an. 1323. num. 67.*

8 Urbanus V. nonnullis commisit Episcopis, ut inquirerent super vita & miraculis B. Delphinæ, & ait: *Nos igitur, quos non festinus, sed graves convenit in dubiis inveniri; & Nicolaus V. in facultate data Cardinalibus Episcopo, Presbytero, & Diacono procedendi in causa S. Vincentii Ferrerii sic locutus est: Verum, cum inter ceteras graviore causas, quæ apud Sedem Apostolicam agitentur, hæc gravissima sit, & in eadem omnis diligentia, & conscientie serenitas adhiberi debeat, ut in hac causa non simulata, sed solida veritas elici possit; uti habetur apud Raynaldum ad an. 1363. num. 26. & ad an. 1451. sub num. 16.*

9 Julius II. in epistola, in qua ad petitionem Henrici VII. Angliæ Regis committit Archiepiscopo Cantuariensi, & aliis Episcopis, ut inquirerent in causam Henrici VI. Angliæ Regis, inquit: *Attendentes tamen, hujus rei Divinum iudicium potius, quam humanum existere; & Leo Papa X. Advocato Consistoriali in Consistorio supplicanti pro Canonizatione S. Francisci de Paula sic respondit: Quo majori consideratione petitionem tuam super religiosi Francisci Canonizatione contemplamur, eo gravius periculosusque negotium nobis esse videtur; quippe res ipsa & Divinam majestatem tangit, & ad universalis Ecclesiæ cultum perpetuo spectat; proinde nec nos tam maturo consilio, neque tam discussa meditatione valere confidimus, quin profecto majore non egeat; quemadmodum prostat apud sæpe citatum Raynaldum ad an. 1504. sub num. 33. & ad an. 1519. sub num. 78.*

10 Quoad eos vero, quorum opera & consilio Romani Pontifices usi fuerunt,

fuerunt, & etiam num utuntur pro eis definiendis, Auctores, qui scribunt de hac Canonizationum materia, paucis se expediunt. Dicunt etenim, Romanos Pontifices usos fuisse, & uti opera Cardinalium S. R. E., & de honestate, eorum consilia debere requirere. Sanctus Antoninus 3. *part. sit. 22. cap. 5. §. 5. Molphei. consil. 46. num. 16. Maucier. de monarchia Ecclesie 2. part. lib. 4. cap. 7. sub num. 3. Castellan. in suo tractatu de Canoniz. SS. quest. 3. §. Conclude interdum, Ceparius in suo director. Canonizat. lib. 1. cap. 6. num. 31. Malvet. de Canoniz. SS. dub. 2. num. 48. & sequentibus inter tractatus magnos tom. 14. Auctor anonymus in suo tractatu ms. de Canonizat. SS. ad Cardinalem Montis Regalis cap. 5. per totum, Contelor. de Canoniz. SS. cap. 9. Matta in tractat. de Canoniz. SS. part. 4. cap. 4. num. 9. Sed, ut res hæc majori, qua fieri possit, diligentia perpendatur; operæ pretium esse censemus, tempora distinguere, hoc est illud, quod lapsum est ante institutionem Congregationis sacrorum rituum, ab illo, quod sacrorum rituum Congregationis institutionem subsequutum fuit: de quorum quidem primo in hoc capite loquemur, de altero in sequenti.*

11 Sermonem itaque habendo de tempore superiori, dicimus primò, plerasque Canonizationes expletas fuisse a Romanis Pontificibus aut in Synodis particularibus, aut in Synodis generalibus, aut paulo antequam Synodi generales haberentur, congregatis tamen jam Patribus, qui ad eas celebrandas advenerant, ut in superioribus suse expositum fuit; & tunc Romanos Pontifices in definiendis causis Canonizationis usos fuisse opera & consilio Patrum in Concilio congregatorum, aut ad Concilium vocatorum.

12 Dicimus secundo, plerasque Canonizationes eo ipso tempore factas fuisse a Romanis Pontificibus extra Concilium, & eodem modo alias peractas fuisse temporibus subsequenibus; & tunc Romanos Pontifices usos fuisse opera & consilio tum Cardinalium, tum Archiepiscoporum, & Episcoporum ad id vocatorum. Ut enim cetera prætereantur, Eugenius Papa III. in bulla Canonizationis S. Henrici Imperatoris ait: *Fratrum nostrorum Archiepiscoporum, & Episcoporum, qui presenses aderant, communicato consilio*; Alexander III. in bullis Canonizationum SS. Thomæ Cantuariensis, & Bernardi Abbatis, meminit *consilii Fratrum*; Clemens III. inter Sanctos retulit B. Malachiam Hiberniæ Episcopum, cujus vita fuerat conscripta a S. Bernardo, & in diplomate impresso post ejus vitam *10. 1. oper. pag. 697.* & iterum edito in appendice ad codicem Canonizationum, testatur, se ad id procedere *de communi Fratrum suorum consilio*; Cælestinus III. canonizavit BB. Ubaldum, Bernwardum, Joannem Gualbertum, & Gerardum; Innocentius III. BB. Homobonum, Chunegundem, Vulfstanum; Honorius III. BB. VVillelmum Bituricensem Archiepiscopum, Hugonem, alium Guillelmum Canonicum Regularem, Laurentium Dublinensem, alium Guillelmum Eboracensem Archiepiscopum; Gregorius IX. BB. Franciscum de Assisio, Antonium Ulyssiponensem, Virgilium Salif-



Salisburgensem Episcopum, Dominicum, Elisabetham; & in omnium bullis narratur, aut habitum fuisse consilium Fratrum, aut Fratrum & vicinorum Episcoporum, aut Archiepiscoporum & Episcoporum tunc apud Sedem Apostolicam existentium.

13 Dicimus tertio, quod, antequam Canonizationum causæ in summi Pontificis Consistorio, cui Cardinales, Archiepiscopi, & Episcopi supra memorati, ut alibi exponetur, intererant, proponerentur, ut in eo discuti possent, mos inductus est, ut processus collecti committerentur prævio examini nonnullorum Rotæ Romanæ Auditorum, qui Capellani Papæ dicti sunt & dicuntur, aut aliorum proborum & doctorum virorum, qui rem discutebant. Honorius III. qui inter Sanctos retulit, uti diximus, Laurentium Dublinensem, id non perfecit die, quo perficere decreverat, sed ad diem sequentem distulit, cum Capellani abessent, & Præsules a Curia recessissent; sicuti colligitur ex monumento, quod est in Archivo S. Mariæ Angensis Canoniceorum Regularium S. Augustini, quodque publici juris factum est a Guillelmo Bessin in *Conciliis provincia Rotomagensis part. 2. pag. 47.* in quo monumento hæc verba habentur: *Cum ergo tam Papa, quam Fratres voto unanimi hunc Beatum virum digne pro meritis Sanctorum catalogo decernerent protinus adscribendum, tunc propter absentiam Capellanorum Domini Papæ, Episcoporum, & extraneorum, qui jam a Curia tardio affectu recesserant, id ipsum ad diem sequentem dilatum est. Congregatis vero in crastinum Cardinalibus, vocatisque ad Curiam Archiepiscopo Burdegalensi, Episcopis quampluribus, & personis aliis, qua pro negotiis variis in Curia moram faciebant ... consenserunt omnes, illum Dei famulum tantis testimoniis approbatum, Sanctorum esse numero dignissime conscribendum.*

14 Clarius id desumitur ex Cardinali Ostiensi, qui sæculo decimotertio floruit, quique in commentariis ad cap. *Audivimus de Reliq. & venerat. SS. de prædicto more antea recepto testatur: Remissa inquisitione*, hoc est Apostolico processu in specie confecto super virtutibus & miraculis Canonizandi, *committitur examinatio in Curia aliquibus Capellanis, vel personis authenticis & discretis, qui & formant rubricas. Favent posterorum temporum monumenta: in Ordine quippe Romano Jacobi Cardinalis Cajetani, qui mortuus est sub Clemente VI. impresso apud Mabillon. in secundo tomo sui missæ Italice ita legitur num. 115. Qua inquisitione sic remissa, Dominus Papa consuevit ipsius inquisitionis examinationem committere in Curia aliquibus Capellanis suis, vel aliis personis authenticis & discretis, & in talibus expertis, que ordinent & formant rubricas super inquisitione prædicta; eademque verba ad amissim repetuntur ab Auctore, qui anno 1347. sub eodem Pontifice Clemente VI. rituum formulis præerat in Aula Pontificia, cujus Opus publici juris factum est a Raynaldo ad an. 1347. num. 34. & a Fleuri in hist. Eccles. lib. 95. tom. 20. num. 37. pag. 66. Martinus Laudensis tractatum conscripsit de Canonizat. Sanctor. occasione Canonizationis S. Bernardini Senensis factæ a Nicolao V. illumque dicavit Fratri Joanni de Capistrano*

nunc inter Sanctos relato; & in eodem tractatu ita legitur: *Remissa inquisitione, committitur examinatio in Curia aliquibus e Capellanis, vel aliis personis authenticis, que formant rubricas.* Jo: Franciscus de Pavinis Rotæ Auditor relationem exaravit totius causæ S. Bonaventuræ, eamque obtulit summo Pontifici Sixto IV. qui Bonaventuram inter Sanctos retulit, & in parte 2. art. 7. loquitur de mandato, quod fiebat Rotæ Auditoribus, aut aliis personis, ut processum examinarent, & formarent rubricas, seu summarium. Apud Spelmannum in Conciliis, decretis, & legibus Orbis Britannici tom. 2. extat monumentum sæculi decimi quinti de ordine Canonizationum, & in eo repetuntur ea, quæ in superioribus dicta sunt de hoc ipso mandato. Editio tandem sub Leone X. libro sacrarum cæremoniarum nomine Christophori Archiepiscopi Corcyrensis, ita legitur *sect. 6. cap. 1. Quibus receptis, Pontifex committat illa examinanda aliquibus Auditoribus sacri Palatii, qui videant & ordinem processum, & videant, an inquisitio & probatio est legitima, & sufficienter facta.* Unde in bulla Canonizationis S. Francisci de Paula sub Leone X. legitur: *Post complures igitur commissiones ab Aula Palatii nostri Advocato Consistoriali, & ab Auditoribus causarum ejusdem Palatii super hoc debite factas; & in bulla Canonizationis S. Antonini sub Clemente VII. subditur: Idem Leo prædecessor, eorum pio desiderio annuere volens, dilectis filiis Magistris Jacobo Simonetta, & Guillelmo Cassadoro nostris, tunc ipsius Leonis prædecessoris Capellanis, & causarum Palatii Apostolici Auditoribus commiserat, ut ipsi, & quilibet eorum de sanctitate vite, ceterisque virtutibus & miraculis ejusdem Antonini Archiepiscopi se diligenter informarent.* Concordat liber relationum conscriptus a Julio de Medicis Vicecancellario, in quo continentur res in Consistorio expeditæ tempore Leonis X., & Hadriani VI. pag. 46. Extat ille manuscriptus in bibliotheca DD. de Piis in Urbe, cujus hæc sunt verba: *Reverendi Patres Dominus Jacobus Simonetta, & Joannes Cassadorus Auditores Rota in sacro Consistorio introducti fuerunt, quibus alias per Sanctissimum Dominum Nostrum injunctum fuerat, ut viderent processum habitos in civitate Florentina de vita, & moribus, ac miraculorum corruptione B. Antonini Archiepiscopi Florentini; qui dictis processibus bene visis & examinatis, retulerunt, inquisitionem & probationes hujusmodi rite factas fuisse. Ipsi quoque Domini Auditores dixerunt, de mandato Sanctissimi Domini Nostri edicta in locis publicis se posuisse, nonnullisque testes examinasse super vita, moribus, & sanctimonia prædicti B. Antonini, quorum depositionibus elare constabat, præter ceteras animi, & corporis virtutes, quibus præditus fuerat, multa in civitate Florentina miracula fecisse; Dominusque Joannes Cassadorus nonnulla in sacro Consistorio recitavit: quibus auditis, Sanctissimus Dominus Noster de consilio RR. DD. ad ulteriora prosequi decrevit.*

15 Dicimus quarto, quod, ultra examen Rotæ Auditorum, antequam causæ Canonizationum in Consistorio proponerentur, in quo Cardinales, Archiepiscopi, & Episcopi suffragaturi congregabantur, facta est superadditio examinis unius ex Cardinalibus, qui a Romano Pontifice

ad hoc munus eligebatur, ut ex citato monumento edito a Guillelmo Bessin plene defumitur. Ibi quippe, postquam expositum fuit, quod scripta & testimonia fuerant Honorio III. summo Pontifici oblata, subditur: *Qui (sermo est de Papa) mox ea Domino Nicolao Episcopo Tusculano, quem alias huius negotii dederat auditorem, tradi fecit; qui diligenter ea discutiens, & fidei librans examine, super his gaudere se plurimum, & admirari professus est: multis vero causis & impedimentis per dies plurimos intercurrentibus, tandem die precedente vigiliam B. Nicolai, ad audientiam & examen Domini Papa, & Fratrum Cardinalium omnia inquisitionum rescripta memoratus Episcopus retulit tam de miraculis, quam de vita; & pene parte diei tertia in legendo detenta, a Domino Honorio, & Cardinalibus omnibus diligenti examinatione discussa sunt, approbata, & recepta. Concordat vita S. Stanislai Episcopi & Martyris scripta a Joanne Longino Canonico Cracoviensi, & impressa in Actis Bollandianis ad diem 7. Maji pag. 257. tom. 2. Mentio siquidem in ea fit mandati delegati ab Innocentio IV. Joanni Cajetano Cardinali Ursino, qui deinde ad summum Pontificatum evectus Nicolai III. nomen assumpsit, ut ponderaret examen eorum, qui in causa S. Stanislai testimonium reddiderant: Sollicitudine quoque, & vigilia ingenti, primum quidem summum Pontificem Innocentium IV. deinde singulos Cardinalium, loquitur Longinus auctor contemporaneus de prædictæ causæ Postulatoribus, præcipue tamen Joannem Cajetanum Tituli S. Nicolai in carcere Tulliano Diaconum Cardinalem causæ prædictæ Commissarium ad videndum dicta examina testium specialiter deputatum, de consummando Canonizationis munere frequentius obeundo vexabant.*

16 Dicimus quinto, examini unius Cardinalis trium Cardinalium examen procedente tempore subrogatum fuisse, unius videlicet ex ordine Episcoporum, alterius ex ordine Presbyterorum, & ultimi demum ex ordine Diaconorum, qui præter Rotæ Auditores rem totam sedulo perpendere & examinarent. Tempore Martini IV. actum fuit de Canonizatione S. Ludovici Regis Franciæ, quæ res progressionem habuit tempore Nicolai IV. & tandem absoluta fuit tempore Bonifacii VIII. Bonifacius autem in sua, quam habuit, concione, antequam ad Canonizationem procederet, nedum trium Cardinalium, sed aliorum etiam superadditorum mentionem fecit; uti colligitur ex dicta concione impressa apud Raynaldum ad ann. 1297. num. 58. ubi: *Tandem pro dicto negotio tempore Domini Martini commissum est negotium tribus Cardinalibus ad examinandum, qui viderunt, examinaverunt, & pro magna parte rubricaverunt ... Tempore vero Domini Nicolai IV. commissum est negotium tribus aliis Cardinalibus, Domino scilicet Ostiensi, Domino Portuensi, & Nobis in statu Cardinalatus adhuc existentibus, quia mortui erant illi Cardinales, quibus negotium prius fuerat commissum ... Temporibus autem nostris non sunt mutati Examinatores, sed tamen iterum lecta sunt plura miracula, examinata, & rubricata non solum per illos prædictos Examinatores, sed etiam per plures alios Cardinales; & volumus, ut quilibet sigillatim daret consilium*

*filium suum in scriptis, ne odio, vel amore, seu etiam timore aliquo aliquis taceret.* Omnes denique supra relati (ut ab inutili repetitione abstineamus) qui testati sunt de mandato, quod fiebat Rotæ Auditoribus, aliisque discretis personis, testimonium quoque reddiderunt de alio subsequenti, quod fiebat tribus ad minus Cardinalibus, Episcopo, Presbytero, & Diacono; & concordant bullæ Canonizationum, Sancti videlicet Nicolai de Tolentino sub Eugenio IV. S. Bernardini Senensis sub Nicolao V. S. Osmundi sub Callisto III. S. Vincentii Ferrerii, & S. Catharinæ sub Pio II. S. Leopoldi sub Innocentio VIII. S. Francisci de Paula sub Leone X. S. Bennonis sub Hadriano VI. S. Antonini sub Clemente VII. In omnibus enim prædictis Constitutionibus testantur Pontifices de causarum examine ad tres Cardinales, uti supra, delato: eademque bullæ Canonizationum plene ostendunt, examini Rotæ Auditorum, & trium Cardinalium factam fuisse accessionem examinis in Consistorio, cui Papa intererat una cum Cardinalibus, & Episcopis, quemadmodum facile demonstratur ex bullis Canonizationum SS. Edmundi, VVillelmi, Petri a Verona, Stanislai sub Innocentio IV. Claræ sub Alexandro IV. Richardi sub Urbano IV. Ludovici Regis Franciæ sub Bonifacio VIII. Petri Cælestini sub Clemente V. Ludovici filii Caroli II. Regis Siciliæ, Thomæ Herfordiensis, & Thomæ Aquinatis sub Joanne XXII. Ivonis sub Clemente VI. Elzearii sub Urbano V. Birgittæ sub Bonifacio IX. Nicolai de Tolentino sub Eugenio IV. Bernardini sub Nicolao V. Osmundi sub Callisto III. Vincentii Ferrerii, & Catharinæ Senensis sub Pio II. Bonaventuræ sub Sixto IV. Leopoldi sub Innocentio VIII. Francisci de Paula sub Leone X. Bennonis sub Hadriano VI. Antonini sub Clemente VII. Quinimmo aliquando, præter iudicium Capellanorum, & examen trium Cardinalium, exquisita fuerunt suffragia virorum doctorum in sacra Theologia, vel in iure Canonico, antequam de causa ageretur in Consistoriis cum Cardinalibus & cum Archiepiscopis & Episcopis apud Sedem Apostolicam degentibus; quemadmodum legitur in bulla Canonizationis S. Osmundi sub Callisto III. ubi: *Ac præterea triginta famosissimorum sacra Pagina, & utriusque Juris Doctorum, quorum nonnulli Episcopi, quidam Referendarii, ceteri vero Palatii Apostolici Auditores, Advocati Consistoriales, ac magna auctoritatis viri extiterunt, consilia, quæ omnia in unam eandemque sententiam pro ipsius Canonizatione Antistitis convenirent, merito attendentes &c.*

17 Adversus autem hucusque adducta opponi posse videtur, nullam fieri mentionem consilii a Cardinalibus requisiti, & præcedentium memoratorum examinum, in bullis Canonizationum S. Theobaldi, S. Hugonis, & S. Laurentii Dublinensis. Sed, cum Canonizatio S. Theobaldi facta fuerit ab Alexandro III. qui etiam inter Sanctos retulit Eduardum, Thomam Cantuariensem, & Bernardum Abbatem, in quarum Canonizationum bullis Pontifex memorat, habitum fuisse, & requisitum Fratrum consilium; dubitari idcirco rationabiliter non potest de ejusdem consilii inter-

interventu in Canonizatione S. Theobaldi. Simile iudicium ferendum est de aliis Canonizationibus BB. Hugonis, & Laurentii; peractæ siquidem fuerunt ab Honorio III. qui etiam inter Sanctos retulit VVilhelmum Bituricensem Archiepiscopum, Guillelmum Canonicum Regularem, & alium Guillelmum Archiepiscopum Eboracensem, in quarum Canonizationum bullis testatur de præcedenti examine factò, & de consilio a Cardinalibus, & Episcopis requisito. Igitur, quia in bulla Canonizationis nullus sermo fit de prædicto consilio, non videtur inferri posse, illud defuisse, quando verisimile est, quod interfuerit, & quando in aliis similibus actibus certum est interfuisse; eoque magis, cum in bulla Canonizationis S. Laurentii Dublinensis Honorius de prædicto consilio non loquatur, & nihilominus illud intercessisse, certum sit ex monumento supra indicato archivi S. Mariæ Angensis Canonicorum Regularium S. Augustini.

## C A P U T XVI.

*De Sacrorum Rituum Congregatione.*

<sup>1</sup> **S**ummus Pontifex Sixtus V. quindecim in Urbe instituit Congregationes S. R. E. Cardinalium, ut citius videlicet & diligentius negotia, quæ ad sanctam Sedem deferuntur, examinari possent; sicuti legitur in *eius Constitut. 74. Bullarii vet. tom. 2. Nos igitur magni illius Moysis exemplo adducti, qui cum Deo loquens saceri sui Jethro consilium de variis iudiciis constituendis non repudiavit, quique Dei iussu insignem senatum septuaginta Seniorum conscripsit, qui cum eo onus populi sustinerent, ne solus ipse gravaretur; Pontificium hoc onus, Angelicis plane humeris formidandum, inter Senatores orbis terræ, Fratres nostros Cardinales, apta quadam distributione pro temporum conditione, negotiorum multitudine & varietate, ipsaque utilitatis ratione salubriter partiri decrevimus. Et paulo post: Et, ut facilius, celeriusque expediantur (sermo est de iis, qui ad sanctam Apostolicam Sedem ob aliquas causas confugiunt) distinctos Cardinalium conventus & Congregationes ad certas rerum negotiorumque tractationes paratas habeant, Cardinalesque ipsi distributi muneris partem levius serant, diligentius administrent, commodius nos consulant, & denique viri primarii publicis in rebus exercitati nullo unquam tempore defint. Inter ceteras vero Congregationes ab eodem Sixto Pontifice institutas quinta est illa, quæ dicitur Sacrorum Rituum, in qua causæ Beatificationis, & Canonizationis, cultusque Sanctorum sedulo & diligenter, immo scrupulose perpenduntur, discutiuntur, & examinantur; uti desumitur ex verbis sequentibus citatæ bullæ: Diligentem quoque curam adhibeant circa Sanctorum Canonizationem, festorumque dierum celebritatem; antequam scilicet prædictæ Canonizationis causæ ad Consistorium deferantur, in quo summus Pontifex exquirat suffragia omnium S. R. E. Cardinalium, Patriarcharum, Archiepiscoporum, & Episcoporum in Urbe commorantium.*

2 Constitutio hæc Sixti V. edita fuit die 22. Januarii 1587. At, quamvis ab eodem solemniter B. Didacus inter Sanctos fuerit relatus die 2. Julii anno 1588. & de causa prædicti Beati, de qua actum fuerat temporibus summorum Pontificum Pii IV. & S. Pii V. actum etiam fuerit tempore ejusdem Sixti, & post editam ab ipso bullam supra memoratam, quemadmodum colligitur ex Actis sæpe repetitæ causæ S. Didaci collectis a Penia lib. 3. cap. 11. Pontifex nihilominus causæ cognitionem non delegavit Congregationi sacrorum rituum; quod fortasse adhuc non nominaverat Cardinales eidem adscribendos, sed mediam quamdam viam inter antiquum, & novum institutum adinvenit. Post commissam quippe causam Rotæ Auditoribus, editamque ab ipsis relationem, ejus examen minime fuit delatum ad Congregationem sacrorum rituum, aut, juxta antiquum morem, ad tres Cardinales, unum ex ordine Episcoporum, alterum ex ordine Presbyterorum, ultimum ex ordine Diaconorum; sed, antequam causa in Consistorio pertractaretur, in quo Cardinales, Archiepiscopi, & Episcopi suffragium ferunt, electi fuerunt octo Cardinales, qui, licet essent doctrina & rerum experientia præclarissimi, viros nihilominus etiam sacræ Theologiæ & juris Pontificii scientia peritissimos in consilium vocarunt, priusquam suum in causa ferrent judicium; ut habetur ex bulla Canonizationis, & late prosequitur Penia cit. lib. 3. cap. 10. Canonista, ut patuit in sexto capitulo ad Canonizationem requisito, conclusiones ab Auditoribus Rotæ firmatas, & constitutas per ipsos Romanum Pontificem, aut per Cardinales ab eo deputandos postea examinandas, & discernendas dicunt. Libri rituales, seu sacrarum ceremoniarum Romane Ecclesiæ paulo hæc distinctius ac latius consiliunt, quod ubi Auditores retulerint, rem bene esse paratam, iterum S.D.N. de consilio Fratrum committit tribus Cardinalibus, nempe Episcopo, Presbytero, & Diacono, ut diligenter examinent inquisitiones, probationes, & depositiones testium, & considerent solertissime omnia consideranda, ut, cum Sanctitati sue placuerit, in secreto Consistorio referatur. Hæc quam sint in hac Canonizatione præstita diligenter, rerum gestarum acta facile demonstrant. Ceterum, quoniam omnes illi Cardinales, quos Pius IV. & Pius V. huic Canonizationis negotio præfecerant, jam ab humanis exceßerant, propterea Sixtus Pont. Max. anno 1587. die 23. Januarii in Consistorio secreto eodem die habito Alexandro Farnesio Ostien. Marco Antonio Columna Prænestin. Episcopis, Michaeli Bonello Alexandrino, Julio Antonio Sanctorio S. Severina, Antonio Caraffa, & Constantio Sarnano Presbyteris, ac Ferdinando de Medicis, & Hieronymo Matthæo Diaconis S.R.E. Cardinalibus commisit, ut inquisitionem, probationes, & depositiones testium, aliæque omnia consideranda accuratissime & diligentissime considerarent, ut, cum Sanctitati sue hæc rite recteque examinata viderentur, ad ulteriora commode procedi posset. Fuerunt hi Cardinales (ut apparet) numero plures, quam libri rituales exposcunt, quod sapienter constitutum fuisse cernitur: Nam, ubi multa consilia, ibi salus. Erant præterea ex illis quidam sacræ Theologiæ peritissimi, alii canonum Pontificiorum, & legum cognitione præstantes, omnes vero rerum gerenda-

*rum industria ornatissimi, & in magnis rebus negotiisque pertractandis exercitatiſſimi.*

3 Inſtituta itaque ante S. Didaci Canonizationem ſacrorum rituum Congregatione, ipſaque Canonizatione expleta, aſſumpſit eadem Congregatio cognitionem cauſarum Beatificationis, & Canonizationis, antequam eadem ſubirent examen Conſiſtorii, hoc eſt omnium Cardinalium, Archiepiſcoporum, & Epiſcoporum in Romana Curia degentium; & multa tum ab Urbano VIII. ſummo Pontifice, tum ab Alexandro VII. pariter ſummo Pontifice, tum ab aliis eorum ſucceſſoribus edita ſunt decreta ad eandem Congregationem pertinentia, quæ a nobis exponuntur paſſim in hoc Opere, prout occaſio ſe offeret.

4 Hæc autem ſacrorum rituum Congregatio modo dicitur *ordinaria*, modo *anteſepratoria*, modo *preparatoria*, modo *generalis*, modo *particularis*. Congregatio *ordinaria* cogi debet quolibet ad minimum menſe in Apoſtolico palatio, in quo ſummus Pontifex habitat; quamvis id difficile propter impedimenta aliarum Congregationum modo fieri poſſit. Interveniunt autem Cardinales ſacris ritibus præpoſiti, Sacriſta, Protonotarius, Secretarius, Fidei Promotor, & Magiſtri cæremoniarum: in eaque nonnulla examinantur, quæ pertinent ad cauſas Beatificationis, & Canonizationis, ut infra exponetur: & præter huiusmodi generis negotia, alia diverſi generis in ipſa pertractantur; de locis videlicet principibus, & aliis conſimilibus rebus, juxta allegatam bullam Sixti V. *Converſas de præcedentia in proceſſionibus, aut alibi, ceteraſque in huiusmodi ſacris ritibus & cæremoniis incidentes difficultates cognoscant, ſummariè terminent & componant*. Soli Cardinales in hac Congregatione ſuffragium ferunt; ceteri vero, qui aſtant, ad interrogata reſpondent. Rurſus alia eſt ſpecies Congregationis ordinariæ ſacrorum rituum, quæ initium habuit tempore noſtri Pontificatus. Ipſi interveniunt quotquot intervenire dicti ſunt alteri memoratæ ſpeciei Congregationis ordinariæ ſacrorum rituum; ſed præter eos ſummus ipſe Pontifex intervenit. In diſcuſſione cauſarum Beatificationis, & Canonizationis aliquod interdum dubium excitatur, quod particularem diſcuſſionem meretur: & idcirco ad ſacrorum rituum Congregationem ordinariam deſertur, & coram ſummo Pontifice diſcutitur, qui, auditis Cardinalium ſuffragiis, differt reſolutionem, quam poſtmodum, novo adhibito per ſe ipſum examine, & invocato Dei auxilio, proſert. Et in hac eadem Congregatione, ſi tempus ſuper eſt, aliæ cauſæ etiam judiciales de præcedentiis, & ſacris ritibus examinantur. In cauſa venerabilis ſervi Dei Joannis de Britto, Societatis Jeſu Sacerdotis, cum eſſet oppoſitum in diſputatione ſuper Martyrio, & cauſa Martyrii ipſius, quod uſus eſſet in miſſione Madurenſi ritibus illarum regionum, auctoritate Sedis Apoſtolicæ prohibitis, habita ſuit coram nobis die 22. Aprilis 1741 Congregatio ordinaria ſacrorum rituum; & in ea diſputatio ſatis accurata inſtituta eſt, an Dei ſervus uſus fuiſſet prædictis ritibus; & ſi uſus

*Tom. I.*

*R*

*fuiſſet,*

fuiſſet, an uſus fuiſſet non utcumque, ſed prout a Sede Apoſtolica uſque ad eam diem fuerant permiſſi; & demum, ſi modo vetito uſus fuiſſet, an reatus deletus cenſendus eſſet, quatenus in progreſſu cauſæ Martyrium ſervi Dei probatum remaneret. Audivimus ſuffragia Cardinalium; reſolutionem diſtulimus, ſumpto ſpatio ad plenius cognoscendum ac recognoſcendum, & deſuper deliberandum: & deinde die 2. Julii 1741. reſpondimus & decrevimus, objectos ritus non obſtare, quominus in cauſa ſervi Dei ad ulteriora procederetur, ad diſcuſſionem videlicet dubii ſuper Martyrio, & cauſa Martyrii, necnon alterius dubii de ſignis & miraculis. Item excitata, ocaſione dubii ſuper virtutibus theologalibus & cardinalibus venerabilis ſervæ Dei Joannæ Franciſcæ Fremiot de Chantal, oppoſitione amicitie contractæ cum Maria Angelica Arnauld Portus Regii Abbatiſſa, & communicationis habitæ per litteras cum Joanne Vergerio de Hauranne Abbate Sancirano; hujus oppoſitionis examen, ex qua progreſſus cauſæ ad ulteriora impeditus remanebat, ad ſacrorum rituum Congregationem ordinariam coram nobis habendam delatum eſt: in qua auditis Cardinalium ſuffragiis, dilataque propoſiti dubii reſolutione, ut interim Divinam opem implorarem, die demum 10. Septembris 1741. decrevimus, objectas oppoſitiones non obſtare, quominus in cauſa ſervæ Dei ad ulteriora procederetur, ad diſcuſſionem videlicet dubii de virtutibus theologalibus, & cardinalibus ipſius. Aliæ quoque, ut audimus, præparantur Congregationes ordinariæ ſacrorum rituum coram nobis habendæ ob conſimiles circumſtantias; paratique ſumus ad præſtandam ipſis perſonalem aſſiſtentiam, ſi vitam & ſalutem Deus nobis continuare dignabitur.

5 Congregatio *antepræparatoria* cogitur in ædibus Cardinalis cauſæ Relatoris, cum ipſe id opportunum judicaverit; eidemque interveniunt Conſultores ſacræ Congregationis, & Magiſtri cæremoniæ. Suffragium præſtatur a ſolis Conſultoribus, minime vero a Cardinali Relatore; & in illa diſcutitur unica cauſa Beatificationis, ſeu Canonizationis, aut ſuper dubio virtutum, aut ſuper dubio Martyrii, aut ſuper dubio miraculorum. Hujus Congregationis *antepræparatoria* nulla fit mentio in decretis Urbani VIII. nec in noviffimis Innocentii XI. Fuit enim poſt inſtituta, ut animus videlicet Cardinalis cauſæ Relatoris inſtruatur; utque ipſe, auditis Conſultorum ſuffragiis, & merita, & cauſæ difficultates bene perſpectas habeat.

6 Congregatio *preparatoria*, de qua ſermo habetur in decretis generalibus Urbani VIII., cogitur ad libitum Cardinalis cauſæ Relatoris in Apoſtolico palatio, in quo ſummus Pontifex habitat; & ei interveniunt Cardinales omnes ſacris ritibus præpoſiti, Conſultores ſacræ Congregationis rituum, & Magiſtri cæremoniæ. Suffragium fertur a ſolis Conſultoribus, a Cardinalibus nequaquam; quemadmodum enim fit Congregatio *antepræparatoria*, ut inſtruatur animus Cardinalis cauſæ Relatoris, ita fit



fit Congregatio *preparatoria*, ut instruantur animi omnium Cardinalium, qui deinde in Congregatione generali mentem suam aperire debent, & suffragium dare; atque in Congregatione *preparatoria*, juxta saltem hodiernam consuetudinem, unica causa Beatificationis, aut Canonizationis discutitur, sive de dubio virtutum, sive de dubio Martyrii, sive de dubio miraculorum.

7 Congregatio postea *generalis* cogitur coram summo Pontifice; & in ea suffragium præstatur primò a Consultoribus, deinde a Cardinalibus, vel super virtutibus, vel super miraculis, vel super Martyrio; aut demum super dubio finali, an in hac, vel illa causa tutò procedi possit ad Beatificationem, seu Canonizationem; ita ut in unaquaque causa dubium virtutum, aut Martyrii, necnon dubium miraculorum tam ante, quam post Beatificationem patratorum ter examinentur, in Congregatione scilicet *ante-preparatoria*, in *preparatoria*, & in *generali*.

8 Juxta decreta generalia Urbani VIII. Congregatio hæc generalis ter quolibet anno esset cogenda pro causis Canonizationum, & Beatificationum: *Propter earum gravitatem solet Sedes Apostolica procedere cum magna maturitate; & hoc ut melius adimpleatur, pro illis referendis & discutiendis mandavit Sanctissimus Dominus noster tres Congregationes de mensibus Januarii, Maji, & Septembris coram Sanctitate sua fieri debere, prohibens agi de dictis causis extra præfatas tres Congregationes. Et rursus: Quando propter alias urgentes occupationes non poterit Sanctitas sua vacare alicui ex dictis Congregationibus, ut supra, destinatis; mandavit, ut cause hujusmodi proponantur coram se in mense immediate sequenti, & in die ab eo deputando, declarans suam voluntatem omnino esse, ut quolibet anno tres convocentur Congregationes pro dictis causis discutiendis.*

9 Pariter juxta eadem decreta tres, aut ad summum quatuor causæ proponi possunt in unaquaque Congregatione generali: *Ad hoc, ut in dictis Congregationibus coram Sanctitate sua habendis, ordinate, dilucide, ac breviter procedatur, in unaquaque ex eis referantur per Cardinales tres, vel ad summum quatuor tantum cause. Quod si Cardinales omnes non possent in congregatione generali suffragari, fit suffragiorum absolutio in prima congregatione ordinaria, & debet Secretarius omnia summo Pontifici referre; quemadmodum prosequuntur allegata decreta: Si in aliqua ex dictis tribus congregationibus post discussionem, qua erit diligentissime facienda super unoquoque processu, circa illius validitatem, virtutes, ac miracula alicujus servi Dei, non supererit tempus Cardinalibus referendi statum & merita alicujus cause; poterit de ea agi, & ad expeditionem procedi per Cardinales in prima eorum Congregatione ordinaria immediate sequenti post quamlibet ex dictis tribus Congregationibus, facta deinde relatione per Secretarium Sanctitati suæ; idemque servari permittitur circa cognitionem & examen miraculorum, qua coram Sanctitate sua erit referenda, si in aliqua ex dictis Congregationibus discuti, vel expediri non poterit.*

10 Verum hodie usus est immutatus, tum quia duæ ad summum Con-

gregationes generales quolibet anno cogi possunt, tum quia in unaquaque ex illis vix una causa discuti potest, aut super dubio virtutum, aut super dubio Martyrii, aut super dubio miraculorum; ita ut tunc solum datum sit duas Canonizationis causas discutere in una Congregatione generali coram summo Pontifice, cum in altera quidem ex illis fuit propositum dubium, quod paucis verbis absolvitur, an, stante approbatione virtutum & miraculorum, tuto procedi possit ad Beatificationem, aut ad Canonizationem, in altera vero dubium de virtutibus, aut de Martyrio, aut de miraculis; secus autem, quando in utraque causa Dubia, quæ discuti debent, aut virtutes, aut Martyrium, aut miracula respiciant.

11 Congregatio demum *particularis* illa est, cui ex mandato summi Pontificis non omnes Cardinales sacris ritibus præpositi, sed aliqui; nec omnes Consultores, sed vel nulli, vel aliqui ab eodem Pontifice eligendi, una cum Secretario, & Fidei Promotore interveniunt.

12 Ex collegio S. R. E. Cardinalium nonnulli assumuntur, ut præsent sacris ritibus, & consequenter causis Beatificationis, & Canonizationis; & horum electio ad summum Pontificem pertinet. Inter hos unus est, qui Præfecturam Congregationis exercet, & appellatur *Congregationis Præfatus*; & hic pariter a summo Pontifice eligitur. Reliqui Cardinales sunt causarum *Relatores, sive Ponentes*. Licet autem olim ipsa sacra Congregatio Cardinales eligeret causarum *Relatores, sive Ponentes*, uti colligitur ex bulla Canonizationis S. Philippi Neri, in qua narratur, sacram Congregationem munus Relatoris dictæ causæ detulisse primum Cardinali Belarmino, & eodem defuncto, Cardinali deinde Crescentio; hodie nihilominus summus Pontifex ille est, qui causam uni potius, quam alteri Cardinali referendam committit, juxta decretum editum die 25. Februarii 1665. *Sanctissimus Dominus noster Alexander Papa VII. in benigna audientia a Sanctitate sua habita mihi Secretariis significavit, mentem Sanctitatis sue esse, deinceps in unaquaque causa Beatificationis, & Canonizationis Beatorum, & servorum Dei velle Sanctitatem suammet deputare, ac subrogare in Relatorem Cardinalem sibi bene visum; ideoque in posterum ita fieri, & servari mandavit.* Cardinalis quoque, qui deputatus fuit in Relatorem processus auctoritate ordinaria confecti pro obtinenda *signatura commissionis*, confirmari solet in Relatorem causæ, postquam processus auctoritate Apostolica facti sunt: ideoque, cum in causa Cracovien. servæ Dei Solomæ Reginæ Galaciæ claræ memoriæ Cardinalis Franciotus fuisset Relator contentorum in processu Ordinarii, confirmatus fuit in Relatorem post completos Apostolicos processus, licet ipse esset distentus plurimis aliis causis Beatificationis, & Canonizationis, ita ut congrua visa fuisset addictio alius Cardinalis in Relatorem causæ dictæ servæ Dei Solomæ: *Facta relatione* (verba sunt decreti editi die 9. Decembris 1660.) *facta relatione de hujusmodi sensu Sanctissimo, Sanctitas sua e stylo sacra Congregationis nihil immutandum duxit, ac proinde Eminentiissimum Franciotum, qui commissionem ad Sanctitatem suam attulerat,*

lerat, Relatorem in eadem causa deputavit cum omnibus facultatibus &c.

13 In supra citata Constitutione 74. summi Pontificis Sixti V. in qua una cum aliis Congregationibus instituta fuit Congregatio sacrorum rituum, habentur hæc verba: *Et, quoniam Divinis oraculis admonemur, ubi multa consilia, ibi salutem adesse, eadem Congregationes pro earum arbitrio viros sacra Theologia, Pontificii, Casareique juris peritos, & rerum gerendarum usu polentes in consultationibus advocent, atque adhibeant, ut causis, questionibus, & negotiis quam optime discussis, quæ Dei gloria, animarumque salutis, & iustitia, atque equitati consentanea maxime erunt, decernantur.* Cohærenter ad hæc, præter S. R. E. Cardinales, alii interveniunt Congregationi sacrorum rituum, qui dicuntur Consultores, quique nunc a summo Pontifice eliguntur ex coetu Præfulum Romanæ Curiae, ex Clero sæculari, & regulari. Atque notatu dignum est, quod, licet omnes Consultores, uti modo dictum fuit, a summo Pontifice eligantur, aliqui tamen sunt, qui Consultores nati dici possunt; ex eo quod, statim ac determinato quodam munere, vel dignitate exornantur, intelliguntur etiam facti Consultores Congregationis sacrorum rituum. Hi autem sunt Episcopus Apostolici sacrorum Præfectus, vulgo *Sacrista*, Protonotarius Congregationis sacrorum rituum, tres antiquiores Rotæ Auditores, Auditor summi Pontificis, Assessor sanctissimæ Inquisitionis, Magister sacri palatii, Secretarius Congregationis, & Fidei Promotor.

14 Item, licet electio Consultorum regularium ex una potius, quam ex alia familia assumendorum a summi Pontificis arbitrio dependeat: ex quo tamen electio prædicta fieri consuevit, semper aliquis assumptus est ex familia PP. Dominicanorum, ex familia Minorum Observantium, & ex familia PP. Societatis Jesu; præter quos summus Pontifex Benedictus XIII. per suas litteras Apostolicas in forma Brevis expeditas die 7. Augusti, & die 1. Octobris 1725. & die 8. Augusti 1726. statuit perpetuis futuris temporibus unum Consultorem Congregationis sacrorum rituum esse assumendum ex familia Minorum S. Francisci Conventualium, alterum ex congregatione Clericorum regularium Barnabitarum, tertium ex Ordine FF. Servorum B. Mariæ Virginis. Atque, ut omnia rite quidem ac recte procedant, decessor noster Clemens Papa XII. die 11. Maji anni 1733. decrevit, ut Consultores regulares, exceptis personis in dignitate Episcopali constitutis, necnon Magistro sacri palatii, minime intersint Congregationibus, quando agitur de causis servorum Dei, qui idem regulare institutum professi sunt, quod ipsi profitentur: *Demum præcipit Sanctitas sua, ut, cum causa cujuscumque Beati, vel servi Dei Ordinem aliquem, vel Religionem, dum vita frueretur, professi, tractantur; Consultores, qui de prædicto Ordine, vel Religione sunt, Congregationibus omnibus tam antepreparatoriis, & preparatoriis, quam generali coram Sanctissimo omnino non intersint; exceptis tamen personis in dignitate Episcopali constitutis, necnon sacri palatii Apostolici Magistro.*

15 In hoc capite non agitur de singulis, quæ pertinent ad officium  
Cardi-

### 134 DE SERVORUM DEI BEATIFICATIONE

Cardinalis Præfecti, vel Cardinalium causæ Relatorum; hæc siquidem suo loco & tempore explicabuntur: nunc communia persequimur tum Cardinalibus, tum Consultoribus Congregationis sacrorum rituum. Tenentur ergo hi omnes primò diligentissime legere informationes omnes, summaria, scripturas tum facti, tum juris, animadversiones Fidei Promotoris, responsiones, & replicationes, quæ in his causis exhibentur; secundo, tenentur verbales audire informationes Procuratorum, Advocatorum, & Postulatorum; tertio, accedere statutis diebus ad Congregationes, quando coguntur, & in illis ferre suffragium; quarto, inviolabile servare secretum sub poena excommunicationis latæ sententiæ, a qua absolvi nequeunt, nisi a summo Pontifice, excluso quoque majori Pœnitentiario, præterquam in mortis articulo; quinto, debent manifestare num ore tenus, an scripto sibi fuerint causæ Beatificationum, & Canonizationum commendatæ.

16 Ideoque forma juramenti impressa in decretis generalibus, quæ ab unoquoque sive Cardinali, sive Consultore, mutatis mutandis, emittitur, est ea, quæ sequitur: *Nos infra scripti sanctæ Romanæ Ecclesiæ Cardinales Congregationis sacrorum rituum, tactis per nos sacrosanctis Evangelii coram nobis positis, juramus & promittimus fideliter exercere officium nostrum in his, quæ propendantur in Congregationibus sacrorum rituum habendis coram Sanctissimo, & non revelare, nec loqui, nisi cum aliis dictæ Congregationis Cardinalibus, tribus antiquioribus Rote Auditoribus, Consultoribus, & Officialibus prædictæ Congregationis, ac duobus familiaribus ab unoquoque nostrum deputandis, quæ fient, aut tractabuntur non solum in causis spectantibus ad dictam Congregationem, sed etiam in aliis ad illam non spectantibus, in dicta Congregatione coram Sanctitate sua, occasione discursus de rebus Magnatum, Religionum, vel aliis gravioribus occurrentibus, sub poena perjurii, & excommunicationis latæ sententiæ, a qua non nisi a summo Pontifice dimittatur, (excluso etiam majori Pœnitentiarario) præterquam in mortis articulo, absolvi possimus: & sub eadem poena perjurii & excommunicationis, de qua supra, juramus similiter & promittimus, quod, si per litteras, aut supplices libellos, sive etiam ore tenus, vel per interpositas personas commendationes a quocumque, etiam cujusvis dignitatis & præeminentiæ, nobis factæ fuerint de causis pertractandis in dictis Congregationibus, præfatas litteras scienter non aperiemus, sed clausas & sigillatas mandabimus consignari in manibus Secretarii dictæ Congregationis; si vero non informatos de contentis in prædictis litteris contigerit per nos aperiri & legi, si eadem continebunt similes commendationes tantummodo, pariter eas transmittemus ad eundem Secretarium; verum, si de aliis negotiis in prædictis litteris pertractabitur, mandabimus transcribi illam tantum partem continentem commendationem, diem datæ, & locum, necnon etiam subscriptionem illius, qui negotium commendavit, quam pervenire curabimus ad manus prædicti Secretarii; atque eisdem litteris non rescribemus, nisi de mandato dictæ Congregationis; &, saltem in ipso actu votandi, præpalabimus, a quo, vel a quibus causa fuerit nobis commendata. Et ita*

vos præ-

nos prefati Cardinales promittimus & juramus : sic nos Deus adjuvet, & hac sancta Dei Evangelia. Exorta vero controversia, num hoc iuramentum respiceret tantum Congregationes generales, quæ coram summo Pontifice haberentur, an etiam comprehenderet Congregationes antepreparatorias, & preparatorias, Sanctissimus decessor noster Clemens XII. die 11. Maji 1733. statuit, omnes comprehendere : Mandat igitur Sanctitas sua, & in virtute sanctæ obedientiæ precipit, ut secretum, quod inviolabiliter hucusque, paucis non nisi annis novæ inauditeque doctrinæ disseminatione exceptis, servatum fuit, de suffragiis nedum in generali Congregatione coram Sanctitate sua latis, sive super virtutibus, sive super miraculis Beatorum, & servorum Dei, verum etiam in Congregationibus, quæ antepreparatoria, & preparatoria nuncupantur, quæque ad illam generalem coram Sanctitate sua ordinem dicunt, & connexionem cum ea habent, omnino servetur & teneatur; ita ut nemini in posterum sub quocumque pretextu liceat vota affirmativa, negativa, aut suspensiva super memoratis virtutibus, & miraculis, aliisque rebus, difficultatibus, obstitivis, censuris, & sermonibus in prædictis Congregationibus latis & habitis alteri cuiumque, qui de Congregatione sacrorum rituum non est, sive directe, sive indirecte, propalare & referre, sub poena perjurii, & excommunicationis late sententiæ ipso facto incurrenda in formula iuramenti prestari soliti contenta & expressa, & a qua non nisi a summo Pontifice pro tempore existente, excepto etiam majori Poenitentiario, præterquam in articulo mortis, absolvi possit.

17 Pro lectione scripturarum, quæ in causis Beatificationis, & Canonizationis exhibentur, & pro earum studio potest quilibet Cardinalis uti auxilio duorum familiarium; & quilibet Rotæ Auditor ex his, qui sacræ Congregationi interveniunt, uti potest opera unius familiaris, dummodo & isti prædictum emittant iuramentum; sicuti legitur in decretis generalibus Urbani VIII. *Iuramentum prestari solitum in Congregationibus sanctissime Inquisitionis sub poena excommunicationis lata sententiæ Sanctissimo reservate, mandavit Sanctitas sua, quod omnino prestetur tam per Cardinales Congregationis sacrorum rituum, & per duos familiares ab unoquoque eorum deputandos, quam per Rotæ Auditores, & unum pro quolibet eorum arbitrio eligendum, pro videndis & transferendis scripturis necessariis & opportunis.* Post decreta porro prædicta Urbani VIII. concessum fuit Secretario sacræ Congregationis uti, instar Cardinalium, opera duorum familiarium, prout desumitur ex sequentibus decretis.

Die 18. Januarii 1653.

Quoniam in decretis hujus sacræ Congregationis editis sub Urbano Papa VIII. sel. record. non reperitur facta aliqua expressa mentio de facultate Secretarij in dando solitum iuramentum de servando secreto duobus suis familiaribus, & cum illis communicando; ideo per me questum fuit in Congregatione habita hac die 18. Januarii, ab Eminentissimis Patribus declarari, quid etiam in posterum

posterum sit observandum; & iidem Eminentissimi Patres, interpretando dicta decreta desuper emanata, declararunt, Secretarium habere facultatem dandi prædictum juramentum duobus familiaribus, & cum illis communicandi, ut facere solent ipsi Eminentissimi Domini Cardinales, & alii, qui habent dictam facultatem: Et, facta per me Secretarium relatione de prædictis Sanctissimo Domino nostro die 31. Januarii ejusdem, Sanctitas sua dixit, quod in prima proxima Congregatione habenda coram eadem Sanctitate sua providebit, prout melius sibi videbitur expedire; & interim indulget mihi, ut possim prædictum juramentum, & secretum uni tantum conferre ex meis familiaribus.

Die 10. Januarii 1654.

Cum alias die 31. Januarii 1653. Sanctissimus concesseris mihi Secretario facultatem dandi solitum juramentum de servando secreto uni ex meis familiaribus usque ad primam Congregationem habendam coram Sanctitate sua, quia in decretis sub Urbano VIII. in sanctissima Inquisitione editis nulla sit mentio de hujusmodi facultate pro Secretario; ideo in sacra Congregatione impetratus suis licentiam, ut Secretarius ejusdem sacra Congregationis possit deputare duos ex suis familiaribus, qui præstent dictum juramentum de servando secreto juxta formam decretorum.

18 Ceteri sacra Congregationis Consultores ne unius quidem familiaris opera utendi prærogativam habent, sed, si illo re vera indigeant, ex gratia impetrare possunt, quæ sæpe a summo Pontifice concessa est; ita tamen, ut nec his, nec aliis, qui uti possunt simili adjutorio, licitum sit adhibere operam alicujus, qui sit Advocatus, Procurator, aut Postulator causarum Beatificationis, & Canonizationis, juxta decretum Sanctissimi decessoris nostri Clementis XII. editum die 11. Maii 1733. Prohibet etiam Sanctitas sua, ne Advocati, Procuratores, & Postulatores prædictarum causarum Dominis Consultoribus in examinandis virtutibus & miraculis Beatorum, & servorum Dei, super quibus suffragium ferri debet, interserviant; caveatque Dominus Secretarius sacra Congregationis illos fucato titulo, sive obtentu Consultoribus interserviendi ad juramentum admittere. Incongruum enim, immo inconveniens valde est, ut, qui memoratarum causarum vel Patroni, vel Promotores sunt, earundem inde meritorum ac suffragiorum conscii & participes sint. Cumque Magistri cæremoniarum Congregationibus sacrorum rituum interveniant, licet suffragium non habeant, nec in causis Beatificationis, & Canonizationis unquam interrogentur; ne vel ipsi manifestent, quod alii celare tenentur, juramentum emittunt instar ceterorum Officialium sacra Congregationis, ut ex sequenti decreto.

Die 21.

Die 21. Junii 1632.

**O**Reo inter Eminentissimos Patres scrupulo, an inter negotia, qua tractantur in Congregationibus ordinariis, si contingat etiam agi de rebus ad Canonizationem servorum Dei pertinentibus, Magistri caremoniarum, qui intersunt, eo casu ex Aula egredi debeant; quod ipsi Magistri caremoniarum cum agre ferre demonstrarent, mandatum fuit mihi Secretario, ut exquirerem super hoc mentem Sanctissimi, prout feci; Et mens Sanctissimi fuit, ut Magistri caremoniarum præsarent juramentum de non revelando, prout alii Officiales sacrorum rituum Congregationis præsiterunt; qui Magistri caremoniarum, sequendo mentem Sanctissimi, juramentum juxta formam præscriptam pro Officialibus in manibus meis præsiterunt.

19 Verbales informationes, quæ sunt a Procuratoribus, & Advocatis, nonnullis superflue videntur; nonnulli etiam sunt, qui non audent in verbali informatione oppositiones excitare Procuratori, vel Advocato, perinde quasi id obstat juramento de servando secreto. Nihil autem ex his mihi videtur esse alicujus roboris & momenti, exemplo præsertim sacre Rotæ Auditorii. In ipso enim verbales excipiuntur informationes Procuratorum, & Advocatorum ( licet olim, suborta quæstione inter Procuratores, & Advocatos super primatu, mandatum fuisset, ut abstinerent ab informatione verbali, sub obtentu etiam, quod hic modus esset futurus utilior & convenientior, ex eo quod longiori tempore Auditores studio causarum vacare potuissent; uti legitur in decisione 17. sub titulo de Procuratoribus, coram Crescentio ) non nisi quia experientia rerum magistra patefecit, vivam vocem habere nescio quid latentis; & difficultates, quæ aliquando videntur insuperabiles, tolli vel ex una facti circumstantia per causæ Patronum suggesta, vel ex una juris responsione ab Advocato data. Cumque, non obstante juramento secreti, quod juxta Constitutionem Urbani VIII. 310. Bullarii tom. 5. dicti Auditores emittunt, sæpius in informatione verbali difficultates excitent; signum evidentissimum est, hæc dicto juramento minime obistere: aliter enim sequeretur, inutilem prorsus esse verbalem informationem, quæ semper fieri consuevit cum dispendio Postulatorum, & cum non exiguo labore tum Procuratorum, tum Advocatorum. Ratio a priori est, quia difficultatum excitatio in informatione verbali nec sensum Congregationis, nec proprium arguentis sensum per se demonstrat; non Congregationis, cum informatio verbalis Congregationem præcedat; non proprium arguentis, cum ratio dubitandi proponatur etiam ab eo, qui nullum habet dubium, nec aliquam habet difficultatem.

20 Quoad suffragium demum a Consultoribus dandum in Congregationibus, ordo præscriptus fuit in generali Congregatione habita coram summo Pontifice Alexandro VII. die 19. Februarii 1658. in cujus adnotatione facti in regestis ita legitur: *Quod per me Secretarium admoneantur*  
 Tom. I. S Con-

*Consultores, ut secretum inconcussè servent, factum attentius percurrant & perpendant, eidemque potissimum innituntur, possibilitatem miraculi in abstracto obiter tangerent, ac probationes miraculi in concreto afferant, ut in sententiis serenius breviores & utiles evadant.* Et, licet in hac adnotatione sermo fiat tantummodo de suffragiis super dubio miraculorum; attamen quæ in ea dicta sunt, proportionem servata, applicari possunt ad suffragia super dubio virtutum.

21 Quod si aliquis ex Cardinalibus, vel Consultoribus intervenire non possit propter legitimum aliquod impedimentum sacræ Congregationi, transmittere potest suffragium in scriptis ad Fidei Promotorem, vel ad Secretarium, vel etiam ad aliquem ex Cardinalibus, ut illud in dicta legat Congregatione; & ita factum fuit in Congregatione præparatoria habita die 29. Maji 1696. in qua Fidei Promotor legit suffragium Assessoris S. Officii absentis, & Secretarius suffragium Decani Rotæ pariter absentis; atque in Congregatione habita coram summo Pontifice die 9. Octobris ejusdem anni, claræ memoriæ Cardinalis de Carpeneo legit pariter suffragium Consultoris absentis.

22 Postremo Consultores sedent, cum suffragium præstant in Congregationibus antepreparatoria, & præparatoria; stant autem, cum suffragium ferunt in Congregatione generali coram Papa: quinimmo, postquam in hac suffragati sunt, exeunt ex aula Congregationis, ita ut, Cardinalibus suffragantibus, soli adsint Secretarius, Fidei Promotor, & Magistri cæremoniarum; descenditque hæc consuetudo ex decretis generalibus Urbani VIII. ubi ita legitur: *Et hi omnes, scilicet Consultores, præter Congregationis Secretarium, & Fidei Promotorem, non admittantur in Congregatione, priusquam causæ fuerint per Cardinales propositæ; & postea, eorum votis patefactis, a Congregatione recedant, ad hoc ut Cardinales possint liberius examinare merita causæ: Consultores sacra rituum Congregationis debeant in qualibet ex dictis Congregationibus adesse præforibus aula Pontificia, ubi Congregatio celebrabitur, ut, si Sanctitati suæ placuerit illos audire super aliquo articulo, seu difficultate, possint præsto esse.*

23 Quæ in superiori numero 21. dicta sunt, confirmantur ex decreto post hæc jam scripta & publici juris facta, edito a Sanctissimo decessore nostro Clemente Papa XII. En verba decreti: *Quamvis Sedes Apostolica in causis Beatificationum, & Canonizationum maxima circumspectione ac maturitate transactis temporibus semper processerit, ideoque in disceptandis dubiis, quæ in iisdem causis præcipue tam super virtutibus, quam super miraculis proponuntur, ad ferendum suffragium admitti consueverint cum Reverendissimi S.R.E. Cardinales ad id specialiter electi, tum viri in sacra Theologia, & utroque Jure versatissimi, Consultores nuncupati, qui omnes respectivè Congregationibus antepreparatoriis, præparatoriis, ac generalibus coram summo Pontifice habendis interveniunt; attamen Sanctissimus Dominus noster Clemens Papa XII. (ita rei gravitate exposita) agnoscens, quod supra enunciatis Congregationibus aliqui ex suffragantibus absque*



absque speciali causa adesse negligunt, promptumque volens super hujusmodi absentia asserre remedium, viva vocis oraculo Reverendissimo Cardinali Zondadari sacrorum rituum Congregationis Pro-Prefecto injunxit, ut presens evulgaret decretum, iis omnibus, ad quos spectat, prae manibus transmittendum, quo injungitur omnibus Consultoribus, ut supra enunciatis Congregationibus omnino interveniant, exceptis casibus infirmitatis, vel alterius legitimi impedimenti, in quibus iidem excusationem transmittant Reverendissimo Prefecto, vel Pro-Prefecto dicta sacra Congregationis, sive alteri ejus vices exercenti, qua aperte dignoscatur causa legitima ipsorum absentiae; verumtamen, ea nihilominus non obstante, eorundem vota ad manus Secretarii pervenire faciant, qui postea in praefatis sacris Congregationibus illa referre debeat. Et ita &c. die 7. Decembris 1735.

## C A P U T XVII.

*De Protonotario, & Secretario sacra Congregationis, & de Rota Romana Auditoribus eidem Congregationi adscriptis.*

**O**lim munus Secretarii in causis Canonizationum deferabatur uni ex collegio Protonotariorum Apostolicorum, uti legitur in opere de vita, miraculis, & Actis Canonizationis S. Didaci conscripto a Francisco Penia lib. 3. cap. 11. Ad decreta, quae in his conventibus per Cardinales fiebant, conscribenda Petrus Georgius Odeschalchus Sedis Apostolicae Notarius (Protonotarium Romana Curia vocat) accitus est; quod prudentissime constitutum fuisse constat, ut septem antiquorum Notariorum Romanae Ecclesiae (quos Clemens I. divisa Urbe in septem regiones, ad Martyrum gesta sollicito & fideliter inquirenda & conscribenda instituit, & Anterus, Fabiannusque Pontifices confirmarunt) vestigium aliquod in his Sanctorum Canonizationibus servari videatur, cum imitanda & conservanda, quantum fieri potest, non violanda sint, aut contemnenda antiqua Ecclesia instituta .... Hoc ergo consilio Odeschalchus desumptus, in his Cardinalium conventibus pro Canonizatione S. Didaci faciendis Secretarii officio functus est. Confirmatur id ipsum in vita S. Raymundi edita ab eodem Penia lib. 3. cap. 26. De his omnibus R. P. D. Anselmus Dandinus Protonotarius Apostolicus, & in causis Canonizationis Secretarius, rogatus instrumentum recepit. Olim quoque Sedis Apostolicae Protonotarii adnotabant decreta, quae fiebant in sacro Consistorio, teste Cardinali Papienli in epistola scripta ad Volaterranum, ubi ait: Volo, si possum, notare nonnulla ejusmodi Senatus nostri decreta, quorum recordatione & exemplis in plerisque actionibus nostris instrui & admoneri quandoque possumus. Adjuvat, mihi crede, haec diligentia multum ministerium nostrum. Consueverant olim Romani Pontifices eam curam mandare Notariis Apostolicae Sedis. Sed obsolevit mos ille, ut alii permulti, tam Pontificibus utiles, quam Romanae Sedi honorifici.

2 At hodie, cura adnotationis decretorum Consistorii delata ad ejus Secretarium, unus assumitur e collegio Protonotariorum Participantium.

qui non solum est Consultor sacræ Congregationis, sed aliqua alia peragit, quæ sunt ipsi peculiaris, & reliquis Consultoribus minime communia. Nonnulla hic explicabuntur; de ceteris alibi sermo fiet. Præcipuum autem est, quod, quando fiunt auctoritate Apostolica processus in Urbe pro aliqua causa Beatificationis, aut Canonizationis, Protonotarius intervenit examinibus testium, & in examine Notarius est Protonotario subiectus: & examen quidem non esset authenticum, nisi esset ab eodem Protonotario subscriptum, quemadmodum statutum est in decretis generalibus Urbani VIII. Nec prætereundum est, quod in commissionibus summi Pontificis sacrorum rituum Congregationi directis apponi debet clausula, quod, quando erunt conficiendi processus, & examinandi testes in Curia, eadem sacra Congregatio subdelegare debeat SS. D. N. Papæ Cardinalem Vicarium, qui per se, seu, ipso impedito, per alios tantum Episcopos ad eos deputandos, capiat informationes necessarias cum interventu Protonotarii pro tempore sacrorum rituum Congregationi destinati. Et rursus: Sanctissimo Domino nostro sic annuente, indultum est Protonotariis de numero Participantium: primo, quod in processibus fabricandis, & præcipue in examinandis testibus super Martyrio alicujus servi Dei, hic in Curia omnino intervenire debeat R.P.D. Protonotarius pro tempore sacræ Congregationis; secundo, quod examen prædictum debeat esse subscriptum ab ipso Domino Protonotario, alias examen nullam faciat fidem; tertio, quod Notarius, qui examen prædictum recipiet, in hoc actu ipso Domino Protonotario subordinatus censeatur & reputetur. Si porro Secretarius sacræ Congregationis ægrotet, aut absit ab Urbe, congruum esse videtur, ut, annuente Sanctissimo, ejus vices a Protonotario suppleantur: & ita sane factum fuit tempore absentis Tigrini Secretarii; interfuit enim Protonotarius de Rufere, tamquam Secretarius, uni Congregationi, ut adnotatur in registis die 6. Septembris 1631. totoque tempore ægritudinis bonæ memoriæ Bernardini Inghirami sacrorum rituum Congregationis Secretarii, & usque ad ejus obitum, R.P.D. Carolus Collicola tunc Protonotarius Congregationis, & deinde S.R.E. Cardinalis, ex permissione Papæ, Secretarii munere functus est.

3. Electio Protonotarii olim ad sacram Congregationem pertinebat. Ipsa enim elegit die 8. Maji 1604. in Protonotarium Joannem Antonium Fachenettum, die 7. Septembris 1613. Cosimum de Torres, die 30. Martii 1621. Stephanum Saulium, die 11. Aprilis 1631. Paulum Matthæjum, die 5. Februarii 1639. Homodeum. Et si Protonotarius aberat ab Urbe, vel ægrotabat, eadem Congregatio alium reponebat Protonotarium in locum absentis: & sic in locum Duratii absentis suffectus est ab eadem Congregatione Anguisciola, uti colligitur ex decreto edito die 3. Augusti 1652. Hodie vero summus Pontifex unum eligit ex collegio Protonotariorum, qui sacræ interfit Congregationi; & in casu ejus absentis, vel impediti, alium substituit ex eodem Protonotariorum collegio, quemadmodum factum fuit tempore infirmitatis R. P. D. Bancherii tunc Protonotarii, postea autem amplissimi S.R.E. Cardinalis. Sanctissimus enim in ejus locum

eum subrogavit, durante infirmitate, R. P. D. Prosperum de Columna modo Cameræ Apostolicæ Auditorem, ut habetur ex decreto edito die 1. Octobris 1698. Cumque præteritis annis R. P. D. Justinianus Congregationis Protonotarius Ferrariam ivisset, ut ibidem Prolegati munus obiret, Papa in ejus locum subrogavit memoratum R. P. D. Collicolam, postea Cardinalem; tum autem, occasione nonnullorum processuum, qui auctoritate Apostolica conficiebantur in Urbe, propter legitimum impedimentum prædicti Collicolæ, annuente Sanctissimo, intervenit R. P. D. Spada ex eodem Protonotariorum Participantium collegio.

4 Secretarius sacrorum rituum Congregationis, consultor est ejusdem Congregationis; sed præter ea, quæ ad unumquemque spectant Consultorem, alia quædam peragere debet, quæ sunt ipsius propria, tamquam Secretarii. Secretarius itaque unicuique Cardinali, & Consultori notificat diem, horam, & locum; quibus sacra cogitur Congregatio, necnon dubium in causa, quæ proponitur, disputandum, & quidem in scriptis per schedulam, quæ sigillo Cardinalis Præfecti obsignata ad aedes uniuscujusque transmittitur: & quia in Congregationibus ordinariis sacrorum rituum non solum discutiuntur præparatoria causarum Beatificationis, & Canonizationis, sed etiam pleræque aliæ causæ contentiosæ super materia *precedentiarum*, & similibus; solum Secretarius transmittit obsignatum ad eos, qui dictis Congregationibus interveniunt, in quo tam nomina Cardinalium Relatorum, quam causarum proponendarum inscribuntur. Die siquidem 28. Februarii anno 1682. constitutum fuit, ut solum causarum proponendarum in Congregatione ordinaria sacrorum rituum transmitteretur instar folii, quod transmittitur pro Congregatione Episcoporum, & Regularium. Præter hæc debet Secretarius in regestis adnotare omnia & singula decreta, quæ fiunt tum quoad causas Beatificationis, & Canonizationis, tum quoad alia, quæ respiciunt vel cultum Sanctorum, vel *precedentias*, & cetera omnia, quæ in sacra Congregatione peraguntur. Cumque sacræ Congregationis decreta, in iis saltem, quæ pertinent ad causas Beatificationis, & Canonizationis, vel cultus Beatorum, atque Sanctorum, robur & efficaciam non habeant, nisi postquam fuerint a summo Pontifice approbata, juxta ea, quæ habentur in decretis generalibus Urbani VIII. *Decreta super hac materia extendenda per Secretarium sacræ Congregationis concipiantur semper nomine Congregationis per verbum videtur, vel simile, servata in unoquoque negotio suprema determinatione summi Pontificis post factam relationem Sanctitati sue;* Secretarii munus est, deliberationes sacræ Congregationis, & rationes, quæ eam moverunt ad ita sentiendum, referre Papæ, ejusque responsum vel approbans, vel reprobens expectare. Nam solum tempore sanctæ memoriæ Innocentii X. ex ejus speciali mandato observatum fuit, ut relatio causarum sacræ Congregationis ibi fieret non a Secretario, sed a Cardinali Præfecto, eoque impedito, a Cardinali Ponente, quemadmodum adnotatum est in regestis meritisissimi Secretarii Caroli

Caroli Paulutii pag. 413. Insuper epistolæ, quæ expediuntur nomine sacræ Congregationis, a Secretario exarantur, & ab eodem una cum Cardinali Præfecto subscribuntur, juxta decretum editum anno 1624. *Sanctissimus Dominus noster vivæ vocis oraculo decrevit, ut deinceps litteræ quarumcumque Congregationum ab ipso etiam Secretario Congregationis subscribantur, prout Illustrissimus a Monte, facto cum Sanctitate sua verbo, in Consistorio secreto 11. Martii præsentis anni 1624. mihi Secretario retulit, ac servari in posterum mandavit.*

5 Secretarius Congregationis a summo Pontifice eligitur ex cœtu Præsulum, & ipsi ab Urbano VIII. concessus est alternis hebdomadis accessus ad Papam, necnon assignatus suit locus in publicis Consistoriis, uti pariter legitur in citatis regestis supra memorati Caroli Paulutii pag. 410. Cum autem plerique sint in Urbe Episcopi *Titulares*, & aliquarum sacrarum Congregationum Secretarii sæpe charactere Episcopali decorentur, hantque Episcopi, ut dicitur, in partibus, congruum profecto esset, ut etiam sacræ rituum Congregationis Secretarius charactere prædicto honestaretur, exemplo ejus, quod legitur in pinacotheca 3. Jani Nicii Erythræi num. 43. pag. 171. ubi, loquendo de Julio Benigno sacrorum rituum Congregationis Secretario, inquit: *Videbatur homini inesse quadam ambitio, neque quidquam ipse tam cupere, quam in specioso Antistitis habitu, ornatuque spectari.* Itaque dedit operam, ut in eorum Archiepiscoporum numero esset, quibus, cum illorum Ecclesia in Turcarum potestate sint, nulla procuratio subest, sed Archiepiscopi tantum nomen, ornatusque relinquitur. Itaque impetravit in beneficio & gratia, ut Archiepiscopus titulo tenus metropolis nescio cujus a Turcis possesse renuntiaretur. Obtinuit etiam, ut Congregationis sacrorum rituum Secretarii munere fungeretur, ad quod officium nemo admittitur, nisi in aliquo ejusmodi dignitatis gradu constitutus: Et sane, dum hæc primo scribebamus, Secretarii sacræ Congregationis munere multis abhinc annis laudabiliterungebatur R. P. D. Nicolaus de Tedeschis olim Episcopus Liparitanus, post Archiepiscopus Apamenus, tum sacræ Theologiæ, tum sacrorum Canonum scientia præstantissimus.

6 De Papæ Capellanis, sive Rotæ Auditoribus, quorum examini Canonizationum causæ committebantur, antequam fieret earum propositio in sacro Consistorio, cui Papa, Cardinales, Archiepiscopi, Episcopi intererant, aliqua in superioribus dicta sunt; nunc reliquum est, ut videamus, an idem mos causas has committendi Auditoribus Rotæ persisterit etiam post institutam Congregationem sacrorum rituum, & quando tandem cessaverit, cum hodie tres antiquiores Rotæ Auditores in sacrorum rituum Congregatione solummodo tamquam Consultores suffragium præstent, minime vero eis fiat specialis ulla commissio, nec in causis Canonizationis edant relationes, quas olim edebant.

7 Dicendum est autem, nequaquam cessasse examen Rotæ Auditorum post institutionem Congregationis sacrorum rituum, sed eisdem etiam

etiam post dictum tempus suas edidisse relationes, in quibus tum validitas processuum confectorum, tum virtutes, Martyria, & miracula sedulo examinabantur; nec suum omittebant iudicium, an causæ videlicet essent in eo statu, ut ad earum felicem exitum per solemnem Canonizationem iuxta sacros Canones deveniri posset.

8 Tribus itaque ut plurimum Rotæ Auditoribus examen causarum demandabatur, qui quidem Auditores aliquando nominabantur a sacrorum rituum Congregatione, ut contigit in causa S. Teresæ, aliquando ab ipso summo Pontifice, sicut in causa S. Aloysii Gonzagæ; semper autem illis iurisdicção dabatur per commissionem manu summi Pontificis signatam, quæ interdum expediebatur, postquam in sacra Congregatione rituum facta fuerat relatio processuum auctoritate ordinaria confectorum; quemadmodum factum fuit in causis Beatorum, vel fervorum Dei Caroli 21. Octobris 1604. Laurentii Justiniani 7. Septembris 1613. Petri de Arbus 20. Decembris 1614. Mariæ de Cabeza 21. Martii 1615. Francisci Borgiæ 28. Augusti 1615. viginti sex Martyrum Japoniæ 30. Aprilis, Nicolai Factoris 28. Maji, Petri de Alcantara 3. Junii, Felicis a Cantalicio 30. Julii 1616. Philippi Benitii 7. Octobris 1617. Stanislai Novitii Societatis Jesu 20. Novembris 1618. Sanctiæ, ac Teresæ 16. Januarii, Andræ Avellini 26. Septembris 1620. Catharinæ Ricciæ 30. Martii 1621. Bernardi Realini 23. Aprilis 1622. Cajetani Thienæi 30. Martii 1624. Joannis Rusbrochii 5. Maji 1629.; interdum, postquam in sacra Congregatione facta fuerat relatio processuum Apostolica auctoritate in genere confecti, uti colligitur ex relatione Rotæ Auditorum in causa S. Philippi Neri prope finem proemii, alias vero, postquam in sacrorum rituum Congregatione pronuntiatum fuerat super validitate processuum in specie, veluti factum fuerat in causa servæ Dei Joannæ de Cruce 10. Julii 1621. in causa B. Gregorii X. 7. Augusti 1627. & in causa servi Dei Hieronymi Æmiliani 26. Septembris 1631. Atque, ut aliquid statueretur, licet antiquiori usui magis congrueret, quod, receptis informationibus in genere, & eis ad sacram Congregationem relatis & examinatis, per eandem Congregationem expediretur commissio super probationibus in specie recipiendis, quibus apertis, causa subinde transmittebatur pro examine ad Rotæ Auditores, quemadmodum desumitur ex Ostiensi *cap. 1. num. 4. de Reliq. & venerat. Sanctorum*; summus nihilominus Pontifex Paulus Papa V. iussit, ut sacrorum rituum Congregatio, habita extrajudiciali informatione, summo Pontifici referret, causam esse in tali statu, quæ posset sacræ Rotæ Auditoribus committi, ut informationes ubique terrarum tum in genere, tum in specie reciperent, & receptas examinarent, statumque ac merita causæ tandem exponerent, teste Contelor. *de Canoniz. Sanctor. cap. 23. num. 3. & 4.*

9 Extant adhuc Acta Canonizationum SS. Didaci, & Raymundi edita a Penia, S. Caroli Borromæi edita a Marco Antonio Grattarola, S. An-

S. Andreae Avellini edita a Caggiano; & adhuc extant quamplura monumenta Coccini Rotæ Decani in archivo Collegii Romani Societatis Jesu pertinentia ad multas Canonizationum causas, & præcipue ad illam B. Gregorii X. & ad aliam S. Aloysii Gonzagæ. Ex quibus omnibus unufquisque facile deprehendere poterit, quanta maturitate, quanto studio, quanto labore, quanti temporis impendio omnia examinarent. Ut cetera quippe prætereantur, undecim conventus ab eis habiti sunt in examine causæ SS. Raymundi, & Andreae Corsini, decem in causa S. Joannis de Deo, octo in causa S. Caroli, viginti tres in causa S. Aloysii, septem in causa S. Felicis Capucini, & B. Petri Regalati, sex in causa S. Laurentii Justiniani, & quinque in causa B. Petri de Arbues: &, quando aliquod dubium intercedebat, exquirebant consilium Theologorum, si dubium erat super virtutibus; & Medicorum, si dubium erat super miraculis. Quocirca inter scripturas Coccini Rotæ Decani in memorato archivo Collegii Romani adnotatum legitur, exquisitum fuisse trium Theologorum judicium super dubio mendacii, quod a servo Dei, de cujus Canonizatione agebatur, prolatum dicebatur; & in causa S. Aloysii Gonzagæ, antequam Auditores judicium ferrent de ejus virtutibus, undecim Theologos ad consilium vocarunt, & tredecim Medicos, antequam de miraculis judicarent; quorum omnium suffragia impressa sunt in magna positione causæ S. Aloysii diligentissime condita, & edita anno 1721. a Patre Andrea Budriolo, Societatis Jesu Presbytero, & diligentissimo causæ S. Aloysii Postulatore, occasione, qua causa prædicta resumpta fuit tempore sanctæ memoriæ Benedicti XIII. qui B. Aloysium solemniter inter Sanctos retulit: ita ut non exaggerationi, sed veritati tribuenda sint illa, quæ sæpe nominatus Franciscus Penia Rotæ Auditor lib. 3. cap. 28. in vita S. Raymundi dixit de laboribus a se, & duobus sociis Rotæ Auditoribus in causa S. Raymundi exantlatis: *Hæc, quæ breviter hic sunt relata, ingenti labore ex variis processuum locis querenda & comprobanda fuerunt, ut patet ex relatione ad SS. D. N. super hac causa facta, quam qui viderit, procul dubio mirabitur, quia ratione nobis tot occupationibus distentis per tempus licuerit tam diligenter processus evolvere, tot libros, auctoresque ex omni fere scientia consulere ad veritatem indagandam, prout occasio, & natura articulorum, seu difficultatum, quæ sese offerebant, merito postulabant: Sed hæc omnia Divina gratia meritis B. Viri, ut pie credimus, abunde subministrabat.*

10 In unoquoque conventu fiebant ab Auditoribus Rotæ rescripta super proposito, quod in eo fuerat examinatum; &, quando omnium propositorum examen post multos variosque conventus fuerat feliciter completum, ab aliquo eorum totius causæ relatio componebatur; quarum relationum nonnullæ inter Acta Sanctorum collecta a Bollandianis editæ reperiuntur, & nonnullæ pariter a nobis in Operis decursu memorabuntur. Relatio subinde ab iisdem Rotæ Auditoribus subscribebatur, atque  
ab

ab iisdem etiam tum summo Pontifici, tum sacrorum rituum Congregationi exhibebatur. Idcirco in Actis Canonizationis S. Caroli scriptis & subscriptis a Mucantio Secretario Congregationis sacrorum rituum referuntur pag. 90. & 91. verba Penæ Rotæ Auditoris relationem causæ præsentantis summo Pontifici, & deinde sacrorum rituum Congregationi. Onus erat Postulatorum causæ curare, ut tot fierent relationis exemplaria, quot erant Cardinales, Præsules, & Consultores Congregationis sacrorum rituum; & onus erat Secretarii ejusdem Congregationis, post diligentem inspectionem, exemplaria prædicta authentica facere; atque ut sub oculis haberentur fundamenta, quibus hæc, vel illa res in relatione dicebatur, ad unumquemque Cardinalem, & Consultorem Congregationis transmittebatur summarium processum, ex quibus res ipsæ fuerant deductæ. Quod si favorabili sensui Rotæ Auditorum consonabat æquum judicium sacræ Congregationis, causa ad Consistorium deferrebat; si vero non consonabat, causa ulteriorem progressum minime habebat: nec enim desunt causæ Canonizationum, quæ adhuc suum complementum non habuerunt, licet Rotæ Auditores favorem de illis tulerint in suis relationibus sententiam, non nisi quia sacræ Congregationis judicium non fuit consentiens iudicio Rotali; ita ut potius exaggerationis causa, quam vere, dictum censi debeat a Castellino in tractatu de inquisitione miraculorum in Canonizatione Martyrum pag. 332. nunquam a sacrorum rituum Congregatione reprobata fuisse, quæ fuerant a Rotæ Auditoribus in suis relationibus admissæ. Abstinemus ab enumerandis causis, in quibus, uti dictum est, prodierunt favorabiles Auditorum Rotæ relationes, quæ tamen usque adhuc non fuerunt a sacrorum rituum Congregatione approbatæ; sed tantummodo adnotasse fas sit, quod ex Actis Canonizationis S. Caroli scriptis & subscriptis a Mucantio Secretario sacræ Congregationis deprehenditur, sacram Congregationem inter miracula minime recensuisse nonnulla facta, quæ Rotæ Auditores in sua relatione admiserant tamquam miracula adscribenda.

11 Penia, Grattarola, & Caggianus supra memorati plenum de modo relatis testimonium ferunt. Penia in vita S. Raymundi de Pennafort lib. 3. cap. 30. hæc habet: *Postquam Rote Auditores super tota causa suum interposuere iudicium, jussu Sanctissimi id referunt in Congregatione, mox vero Cardinales eandem Rota Auditorum relationem ab initio inchoantes diligenter perpendunt. Et in Actis Canonizationis S. Didaci lib. 3. cap. 11. Jussu insuper est, ut processis, & relationis Auditorum singulis Cardinalibus copia fieret, ut commode quisque per se intra privatos parietes causa Acta perlegere, & considerare posset, ut negotii gravitas jure optimo postulabat. De hoc more loquitur etiam Marcus Aurelius Grattarola, in libro, cui titulus, Successi maravigliosi della venerazione di S. Carlo part. 1. cap. 41. Si fecero trasferire quattordici copie di tutto il processo remissoriale, e ventidue copie della relazione degli Auditori di Rota, che distribuiamo alli Signori Cardinali, e Prelati della Congregazione*

de i riti, una copia per ciascuno, oltre le tre copie date a gli Auditori di Rota, ed altre diverse copie delli processi fatti con autorità ordinaria. Fufius id ipsum exponitur in alio opere Joannis Antonii Caggiani, cujus est inscriptio *Successi maravigliosi della venerazione del B. Andrea Avellino pars. 1. cap. 26.* ubi auctor loquitur de commissione causæ, quæ facta fuit Congregationi sacrorum rituum: *Ed avendola avuta* (causæ scilicet relationem, scriptis expositam) il Segretario (Congregationis videlicet sacrorum rituum) dagli Auditori, ne furono subito fatte copiare tante, quanti erano li Cardinali di detta sagra Congregazione, ed autenticate dallo stesso Segretario, cioè, che concordavano coll' originale; furono presentate alli Cardinali, ed insieme con essa per ciaschedun Cardinale fu fatto copiare il compendio, e sommario dei processi, e presentateglielo, conforme al solito, acciò quello si riferiva nella relazione per approvato, avessero potuto vedere originalmente nel compendio del processo, in caso che vi fosse stato qualche dubbio, o qualche difficoltà.

12 Hucusque adducta manifeste ostendunt, perdurasse examina Rotæ Auditorum post institutionem Congregationis sacrorum rituum. Nunc autem videndum est, an cessaverint post edita ab Urbano VIII. decreta sæpe in hoc Opere memoranda. Facta est horum decretorum editio anno 1625. anno 1634. & anno 1642. & sane in regestis sacræ Congregationis extant monumenta, quæ demonstrant, perstitisse examen Rotæ Auditorum etiam post editionem decretorum Urbani. Die siquidem 7. Novembris 1626. sacra Congregatio in causa Japonen. viginti trium Martyrum demandavit, ut auferretur quædam tabella appensa in clauistro Conventus S. Mariæ de Ara celi, in qua dicti Martyres erant depicti, cum subscriptione, quod fuerant a Rota Martyres declarati, in relatione scilicet, quam Auditores paulo ante exaraverant. Die 7. Septembris 1630. constitutum fuit, ut, post discussam, & approbatam validitatem processuum ab Auditoribus Rotæ, ipsa iterum discuteretur in sacrorum rituum Congregatione. Die 24. Februarii, & ultima Julii 1632. examinata fuit, sed non resoluta controversia, num Fidei Promotor scribere deberet & opponere ante, an post editionem relationis Rotalis: quodque caput est, cum in forma commissionis generalis edita in decretis generalibus habeantur hæc verba: *Ut deinde, omnibus mature examinatis, decernat, an processus hujusmodi ad Rota Auditores sint transmittendi, ut forment rubricas, suamque faciant relationem de his, qua in dictis processibus continentur; & rursus: Relationes Auditorum Rota, informationes in facto, & in jure, & alie quacumque scriptura tractantes de causis Beatificationum, & Canonizationum imprimi omnino prohibentur ante earumdem causarum terminationem; nil clarius afferri potest ad demonstrandum, examen Rotæ Auditorum minime cessasse tempore editionis decretorum Urbani VIII.*

13 Ideoque concludendum est, dictum examen cessasse tempore Pontificatus summi Pontificis Innocentii X., & in locum relationis Rotalis subrogatam fuisse consuetudinem, ut tres ex dicto coetu antiquiores interve-



terveniant Congregationi sacrorum rituum , & in ea instar omnium aliorum Consultorum ferant consultationis suffragium , teste *Matta de Canonizat. SS. part. 1. cap. 3. n. 26.* Licet autem in iisdem decretis , seu eorum declarationibus dicatur , Auditores Rota formare rubricas de iis , quæ in processibus continentur ; hoc tamen amplius non servatur , quia processus referuntur ab Eminentiſſimis Cardinalibus absque rubricatione Rota Auditorum , ex quibus tres antiquiores tantum in Congregationibus tam super virtutibus , quam super miraculis votum habent consultorum ; delato hinc onere scribendi pro causa Procuratoribus , atque Advocatis , contra causam verò Fidei Promotori , ut infra patebit , omnia denique legendi ac perpendendi Cardinalibus , & Consultoribus sacrorum rituum .

## CAPUT XVIII.

*De Fidei Promotore , & ejus Subpromotore .*

**F**idei Promotor consultus fert suffragium in Congregationibus , ut expresse legitur in ipsius Brevi impresso in decretis generalibus: *Cum facultate quibuscumque Congregationibus , quæ super Canonizationibus , & Beatificationibus hujusmodi tam coram venerabilibus Fratribus nostris S.R.E. Cardinalibus , quam etiam Nobis fient , interveniendi , & in eis votum consultivum ferendi .* Verum , præter consultationis suffragium , communicandi sunt eidem processus causarum in forma authentica , necnon omnia earumdem summaria , informationes , & scripturæ Postulatorum , atque ad ipsum pertinet difficultates excitare tum in facto , tum in jure , ut veritas magis elucescat ; quemadmodum prosequitur modo allatum Breve : *Et cum hoc insuper , ut tibi copia authentica processuum factorum , ac omnium scripturarum producendarum , ac informationum faciendarum super dubiis tempore opportuno disputandis , ad effectum ea videndi & considerandi , eisque objectiones & responsiones opportunas faciendi , desur .* Citandus præterea est in quolibet processu . Nam vel per se , vel per suum Subpromotorem quibuscumque Actibus intervenit , ut omnia rite & recte adimpleantur ; juxta ea , quæ disponuntur in Brevi sæpe memorato : *Cum hoc ut tu deinceps in omnibus processibus super dictis Canonizationibus , & Beatificationibus conficiendis , et in singulis Actibus faciendis , tamquam pars formalis et ad instar Commissarii Camera , et Fisci Procuratoris citari debeas ; quodve in interrogatoria cum protestationibus , quæ tibi videbuntur necessaria , dare , et examinibus testium , et compulsionibus jurium , et scripturarum quarumcunque , confessionibus plantarum , visitationibus sepulcrorum , et aliis quibuscumque tam in Romana Curia , quam in qualibet alia parte orbis terrarum , coram quibuscumque Judicibus , etiam delegatis per te , seu per alium Subpromotorem cum facultatibus , quæ tibi opportuna videbuntur , a te deputandum , intervenire valeas .* Accessum habet ad summum Pontificem , & ad Cardinales , ut , si neces-

sitas exigit, eisdem ore tenus informet; quemadmodum decernitur in Brevi: *Et, quando opus fuerit, tam Nos, quam dictos Cardinales informandi.* Ante decreta generalia Urbani VIII. aliquando Fidei Promotor citatus comparebat, & si perspicua erant argumenta sanctitatis, protestabatur, se nihil habere, quod proponere posset; sicuti colligitur ex Actis Canonizationis S. Caroli pag. 96. ubi sic legitur: *Joannem Baptistam Spadam Advocatum Fiscalem citatum, qui comparuerat, audire voluerunt. Qui de mandato Illustrissimorum DD. Cardinalium ingressus in aulam Congregationis dixit, se fuisse citatum ad dicendum contra argumenta examinanda super sanctitate vite pie memoria Caroli Cardinalis Borromæi in hac presenti Congregatione, et, se nihil habere, quod posset prædictis argumentis opponere, asseruit.* Post edita vero decreta Urbani VIII. nullum forte reperietur exemplum, quod in dubiis saltem principalioribus causarum, super Martyrio, & super miraculis non fuerint excitatæ difficultates a Fidei Promotoribus, etsi aliquando levissimæ ex defectu materiæ, ne muneris suo deesse viderentur; & post eadem quidem Urbani decreta difficultates, quæ a Fidei Promotoribus objiciuntur, debent in scriptis proponi, uti cavetur in iisdem decretis: *Promotor Fidei, ut melius hujusmodi cause in posterum discutiantur, teneatur in scriptis proponere difficultates eorum, quæ continentur in quolibet processu.* Usus etenim proponendi in scriptis difficultates est maximopere accommodatus recto ipsi causarum examini, præsertim cum responsiones a Procuratoribus, & Advocatis parari possint; ex quibus si plene tollantur objecta, non debet Promotor Fidei in Congregationibus erubescere id confiteri: nam, cum ipse sit Consultor simul, & Promotor; quia Consultor, suam pro veritate aperire tenetur sententiam; sicuti quia Promotor, excitare debuit difficultates, quas ratione officii excitandas existimaverat.

2. Exempla habentur in Advocato Fiscali, & Commissario Cameræ Apostolicæ, item in Advocato Fiscali, & Advocato reorum in tribunali sanctissimæ Inquisitionis. Interveniunt enim tum Fisci Advocatus, tum Cameræ Commissarius Congregationibus, in quibus agitur de re Principis, & Fisci: & quamvis acerrime in scriptis jura Fiscalia propugnaverint, si tamen eadem minus subsistentia pro veritate reputaverint, suffragium intrepide ferunt adversus Cameram, sive Fiscum. Neque aliter Advocatum Fisci, tum reorum in tribunali sanctissimæ Inquisitionis, quando sunt Consultores sacræ illius Congregationis, pro reo, vel contra reum consulunt; licet reorum Advocatus, scribendo, pro reo pugnaverit, & Advocatus Fisci, pariter scribendo, adducenda deduxerit adversus ipsum. Quin immo, si summus Pontifex, aut sacrorum rituum Congregatio demandet Fidei Promotori, ut in aliquo articulo, non ad opportunitatem sui muneris, sed pro veritate scribat, tunc debet ipse suum sensum pro veritate exponere, licet esset propitius causæ: tunc quippe non ratione muneris scribit, sed ut debitam præstet mandatis obedientiam.

Et sic

Et sic factum fuit a bonæ memoriæ Petro Francisco de Rubéis olim Fidei Promotore, jubente summo Pontifice Alexandro VII. occasione examinis cujusdam articuli in causa S. Francisci Salefii; a Prospero Bottinio olim pariter Fidei Promotore, jubente summo Pontifice Alexandro VIII. occasione examinis cujusdam articuli in causa S. Laurentii Justiniani; atque a me ipso, dum eodem munere fungebar, mandante sacrorum rituum Congregatione, & occasione disputationis quorundam præliminarium articulorum pro dirigendo iudiciorum cursu in causa servi Dei Camilli de Lellis, & in causa SS. Stanislai, & Aloysii Societatis Jesu.

3 Plura alia dicenda essent de pertinentibus ad officium Promotoris Fidei; sed hæc alibi, cum occasio se offeret, commodius explicabuntur. Interea vero aliqua alia referenda sunt de illius electione, de unione Promotoratus cum *Advocatione Fiscali*, & de prima ejusdem muneris institutione.

4 Eligitur itaque a summo Pontifice Promotor Fidei ex cœtu Advocatorum Consistorialium, uti legitur in regeſtis anni 1631. sacre Congregationis fol. 131. *Promotor Fidei, cum sit ad præſens, et in poſterum ſemper debeat eſſe de collegio Advocatorum Conſiſtorialium*. Hoc ipſum nos teſtati ſumus in noſtris litteris Apoſtolicis expeditis in forma Brevis, in quibus Advocatorum Conſiſtorialium collegio ſedile, ſeu ſcannum assignavimus in Capellis Pontificiis ante ſcannum, ſeu ſedile poni ſolitum pro Cubiculariis ad honorem. Inter cetera quippe, quibus dictum collegium illuſtratur, meminimus, quod unus ex Advocatis Conſiſtorialibus eſt Fidei Promotor: *Alter Fidei Promotor exiſtit*.

5 Ex eodem cœtu Advocatorum Conſiſtorialium eligitur etiam Fiſci Advocatus, teſte Raphaele Fulgoſio, qui floruit ſæculo XV. in l. *Binos cod. de Advocatis diverſor. judicior. Ex hoc forte deſcendit illud, quod ſervatur in Curia Romana, nam antiquior Advocatus Conſiſtorialium eſt Advocatus Fiſci Eccleſiaſtici*. Cum autem Fiſci Advocatus eſſet etiam Fidei Promotor, fuit ſubinde animadverſum, hæc officia nihil habere commune inter ſe, & idcirco poſſe ſeparari, & a diverſis perſonis ſubiri; ut etiam adnotaverat Cardinalis de Luca in relatione Curia Romana diſcuſſ. 18. num. 14. et diſcuſſ. 97. num. 95. quin immo illa ſeparatio viſa eſt maximopere expediens; vel quia, cum prædicta officia ſint plurimum laborioſa, ut exactius adimpleantur, ſejunctiono erat opportuna; vel quia parum decere videbatur, Advocatum Fiſcalem; perſonam plerumque mere laicam, & inſtantiem pro punitione delictorum, adhiberi in Beatificationis, & Canonizationis negotio mere Eccleſiaſtico; juxta ea, quæ ponderantur per Auditores Rotæ in relatione S. Hyacinthi Poloni cap. 2. *Prima eſt, non fuiſſe neceſſarium in hac cauſa conſtituere in partibus Polonia ſubſtitutum Fiſcalem, qui ad ſingulos proceſſus Actus citaretur, ſi quid opponere vellet; quia, licet in ultimo proceſſu Canonizationis S. Didaci factò de anno 1567. Fiſcalis Sanctiſſimi D.N. hic in Curia dederit interrogatoria in rotulo remiſſoria includenda pro teſtibus in partibus*

partibus examinandis in Hispania sibi Subfiscalem constituerit, qui in Actibus processus interveniret, ac fortasse in aliquibus aliis Canonizationibus id observatum fuerit, nullo tamen id expresso jure cavetur, nec numeratur per Doctores inter requisita ad Canonizationem cap. 1. de Reliq. & venerat. SS., estque nova praxis, & licet reperiretur præcepta in aliquo rituali, tamen fuit inusitata, ac fortasse minus huic negotio apta. Satis enim videtur indecorum, Fiscalem Criminalem, personam scilicet laicam, qui delinquentes accusare, & ut puniantur, petere solet, adhiberi negotio sacrosancto & mere Ecclesiastico Canonizationis Sanctorum, in quo Dominus Papa procedit ex officio, & extrajudicialiter: Bellamera Decis. 671. incipiente, Extra Rotam; quem sequitur Jacobus Castellanus tractat. de Canonizat. SS. quest. 7. vers. Quarto, quia; & quest. 8. vers. Quero, an in negotio; & in relatione S. Franciscæ Romane part. 1. art. 6. Et merito, cum non videatur æquum citare Fiscalem, qui in profanis, & criminalibus causis facinorosos accusare solet, ut os aperire possit in his quoque causis, qua sacratissima sunt, & a profanitate longe distantes.

6 Sanctæ tandem memoriæ Clemens Papa XI. mortuo Joanne Baptista Bottinio sacræ Consistorialis aulæ Advocato, & coadiutore Prosperi Archiepiscopi Bottinii patrui in utroque munere tam Advocationis Fiscalis, quam Fidei Promotoratus, officia sæpe memorata separavit; & sel. mem. Philippum Sacripantem Consistorialem Advocatum coadiutorem dedit Prospero Archiepiscopo in munere Advocati Fiscalis, meque pariter Consistorialem Advocatum ejusdem Archiepiscopi coadiutorem declaravit in munere Fidei Promotoris, uti colligitur ex ejus litteris expeditis in forma Brevis die 7. Aprilis 1708.

7 Nulla aderant muneris Fidei Promotoris vestigia sæculo decimoquarto. Ægidius enim Bellamera, qui floruit sæculo prædicto, (teste Marco Mantua de viris illustribus, inter tractatus magnos tom. 1. fol. 163.) quique fuit eximius Rotæ Auditor, in suis decisionibus tres ponit conclusiones sub titulo de Reliq. & venerat. SS. Conclusionem autem 671. quærit, an in Canonizationis negotio necesse sit illos vocare, quorum interest; & negative respondet: Extra Rotam; quod in informatione, quæ circa negotium Canonizationis alicujus, qui dicitur Sanctus esse, per Dominum Papam, vel alium de ejus mandato super vita & miraculis dicti Sancti recipitur, non est necesse vocare illos, quorum interest, per generale edictum; testaturque, sic fuisse constitutum per Cardinales: Et ita fuit conclusum per DD. Cardinales Commissarios in facto Canonizationis Do. Carosi, videlicet per Do. Alba. Flori, & S. Angeli tunc Commissarii, quibus assensit Dominus meus Sancti Eustachii, dicit quod alii DD. Cardinales in Consistorio in hoc etiam concordarunt. Conclusionem sequenti 672. docet, quod, si aliquis comparet, & se opponit Canonizationi, audiri potest pro animi instructione, si vero minime audiretur, non propterea actus esset nullus: Si Domino Papa, vel ejus Commissario super facto dictæ Canonizationis, ut in conclusione supra proxima dicitur, procedente, comparet aliquis, se dicens esse fidelem Catholicum, & se

opponat,

opponat, & dicat, quod talis processus agitandus non est, seu quod tales testes recipiendi non sunt, seu quod ad talem Canonizationem non est procedendum; si probabilia alleget, audiendus est, & si vult Dominus Papa, vel Commissarius; licet ad hoc procedens de necessitate minime teneatur secundum aliquos; & post alia plura: Attamen, licet expediat audire, non debet quis adiuvari ut partem faciens, sed solum ad informandum extra iudicium animum. Conclusionem tandem 673. animadvertit, quod non esset audiendus ille, qui compareret, & se opponeret, si id non faceret ex zelo, sed ex odio: *Licet sit dictum circa conclusionem precedentem, quod in casu dictæ conclusionis bonum est audire excipientem, & probabilia allegantem; tamen, si apparet, quod excipiens non excipit bono zelo, quem habeat ad Ecclesiam, & ad Fidem, sed potius ex odio, quod habuit adversus mortuum, vel ex inimicitia, quam habet adversus illos de genere mortui, de causis Canonizatione agitur, ille non est aliquammodo audiendus, sed potius totaliter repellendus.* Adducta itaque in conclusionibus 671. & 672. patefaciunt, tunc temporis nullum officii Fidei Promotoris adfuisse vestigium. Tenetur enim ille comparere judiciali jure, & se opponere tum Beatificationi, tum Canonizationi, ceterisque omnibus, quæ cum hac materia aliquamquam habent connexionem.

8 Prima, quam sciam, quæ occurrit, mentio Fidei Promotoris, est illa, quæ habetur in Brevis summi Pontificis Leonis X. in quo, cum in causa Canonizationis tunc Beati, nunc Sancti Laurentii Justiniani, post absolutam inquisitionem in genere, procedendum esset ad inquisitionem in specie, demandatur, ut id fiat, testes examinando cum interrogatoriis, & citato Fidei Promotore: Et; si per generalem hujusmodi inquisitionem vobis videbitur, & consiterit, super quo utriusque vestrum conscientias oneramus, probationes esse tales, ut per eas possit ad specialem inquisitionem procedi & deveniri, Nobis aliter non consultis, cum de doctrina, fide, & religione vestra plurimam in Domino fiduciam habeamus, & in aliis arduis experti simus, ad specialem super præmissis inquisitionem deveniatis, articulisque, & interrogatoriis datis, Promotoreque Fidei adhibito, citatione legitima precedente, testium productorum iuramenta recipiatis, & juxta interrogatorium, & articulorum formam examinare diligenter curetis, ac eorum dicta in scriptis fideliter redigi mandetis, ac monumenta recipiatis, quæ ad negotium hujusmodi facere videbuntur, omniaque alia accuratissime perscrutimini, quæ & necessaria & opportuna esse, & ad omnem plenam hujus rei scientiam facere cognoveritis; quæ cuncta in scriptis fideliter redacta sub vestro sigillo clausa ad Nos mittetis, ut ad Dei laudem, & Ecclesia sua sancta exaltationem, Divina inspiratione illuminati, quæ Ecclesiam suam errare non sinis, una cum Fratribus nostris S. R. E. Cardinalibus, quid faciendum ea in res sit, deliberare possimus. Et in remissoria expedita a Clemente VII. in causa S. Jacobi de Marchia apud Raynaldum ad an. 1525. num. 103. sic legitur: *Articulisque, & interrogatoriis datis, Promotoreque Fidei adhibito.*

9 In bullis quoque Canonizationum S. Raymundi Barcinonensis, & S. Hyacinthi, quæ sunt Clementis VIII. dicitur, citatum fuisse Fisci Procurato-

curatorem, eumque partes suas diligenter adimplevisse: *Qui*, hoc est Cardinales deputati (verba sunt bullæ Canonizationis S. Raymundi) *cum privatim, multisque Congregationibus inter se habitis, dilecto Filio Pompeo Mo-  
rella Fisci nostri Procuratore semper citato, & partes suas diligenter præstante, singula eorum capita, & Acta omnia sedulo examinassent.* Et rursus in bulla citata Canonizationis S. Hyacinthi §. 7. sic legitur: *Qua quidem uniuersa, citato Fisci Procuratore, recognita fuerunt.* Item §. 8. postquam dictum fuit, ab Auditoribus Rotæ exaratam fuisse relationem, subditur: *Qua quidem re ad venerabilium etiam Fratrum suorum S. R. E. Cardinalium super sacris riti-  
bus tunc deputatorum Congregationem, ut & ipsi, quid ea de re sentirent, in medium afferrent, ejusdem Gregorii jussu remissa; iidem Cardinales, attente examinatis allatarum a prædictis causarum Auditoribus conclusionum argumentis, ac Fisci Procuratore semper citato atque audito, servatisque etiam servandis, unanimi consensu, eorumdem Auditorum super scripturis, juribus, & processus exemplis exhibitis, relationem approbarunt, & rationes, quibus de illius fide, vita, & miraculis constaret, longe firmissimas esse judicarunt.* Insuper in re-  
gestis sacræ Congregationis annorum 1609. 1620. 1621. habetur, depu-  
tatum fuisse in Fidei Promotorem Joannem Baptistam Spadam sacræ Con-  
sistorialis aulæ, & Fisci Advocatum in causis Canonizationum SS. Philippi  
Nerii, Ignatii, Tereziæ, & Thomæ de Villanova.

10 Si igitur modo relata sedulo perpenduntur, nemo est, qui non videat, adhibitum quidem fuisse etiam ante decreta Urbani VIII. Fidei Promotorem in causa Beatificationis, & Canonizationis, hocque munus fuisse ut plurimum delatum Advocato Fiscali, at non tamen per modum generalis commissionis in omnibus & quibuscumque causis, sed in illis tantum, quibus summo Pontifici, & sacrorum rituum Congregationi expediens videbatur; sicut etiam desumetur ex aliis, quæ alibi dicenda sunt. Quocirca institutio officii Fidei Promotoris, qui in omnibus & singulis causis Beatificationis, & Canonizationis tamquam pars formalis, atque instar Commissarii Cameræ, & Fisci Procuratoris citandus sit, re-  
ferenda est ad summum Pontificem Urbanum VIII. qui die 11. Januarii 1631. litteras Apostolicas expedivit typis impressas inter decreta generalia, quibus Antonium Cerrum sacræ Consistorialis aulæ, & Fisci, & Cameræ Apostolicæ Advocatum constituit, uti supra, in Fidei Promotorem; quo defuncto, eodem modo idem munus collatum est Petro Francisco de Ru-  
beis, & deinde Prospero Bottinio Consistorialibus, & Fisci, Cameræque Apostolicæ Advocatis. Officiorum autem Fidei Promotoris, & Advocati Fisci separatio sanctæ memoriæ Clementi XI. debet adscribi, qui me, ut antea dictum est, tunc Consistorialis aulæ Advocatum elegit in Fidei Promotorem, delato alteri Consistoriali Advocato officio Advocati Fisci: tumque Clementis exemplo, me, licet immerente, ad Cardinalitiam dignitatem evecto a sanctæ memoriæ Benedicto XIII. fuit ab isto electus in Fidei Promotorem Carolus Albertus Cavalchinus Consistorialis Advocatus,

rus, qui magna cum laude munus sibi commissum exercuit, separatim tamen a munere Advocati Fiscalis, quod magna pariter cum laude exercebatur a Ferdinando de Valentibus similiter Advocato Consistoriali, dum hæc primo scribebamus, non sine Romanæ Curiae jactura defuncto, tunc suffecto in ejus locum Ludovico ex fratre Nepote adolescente magnæ expectationis in coadjutorem patrui cum futura successione a Benedicto XIII. electo. Postea hic idem Ludovicus de Valentibus, electo Carolo Alberto Cavalchino ad munus Secretarii Congregationis Cardinalium sacri Concilii Tridentini interpretum, (quod munus a nobis multorum annorum spatio exercitum est una cum officio Fidei Promotoris) a summo Pontifice Clemente XII. electus est in Fidei Promotorem, uti colligitur ex litteris Apostolicis expeditis die 29. Martii 1734. & sic iterum facta est unio officii Advocati Fisci Cameræ Apostolicæ cum officio Fidei Promotoris. Sed, cum in prædictis litteris Apostolicis nulla facta fuerit derogatio aliis litteris Apostolicis expeditis a sanctæ memoriæ Clemente XI. die 7. Aprilis 1708. in quibus, uti supra visum est, facta fuit separatio unius officii ab alio, necnon aliis litteris Apostolicis ejusdem Pontificis expeditis die 30. Aprilis 1714. hanc ipsam separationem pro futuris temporibus comprobantibus, de quibus hoc eodem libro primo cap. 46. §. 3. num. 16.; dicendum esse videtur, separationem adhuc persistere, absque eo quod præclusa sit Romano pro tempore Pontifici facultas in facti contingentia hæc duo officia uni personæ conferendi, si ita exigant rerum circumstantiæ, ut edoceatur exemplo Sanctiss. Decessoris nostri Clementis Papæ XII. qui, uti diximus, officium Fidei Promotoris contulit Domino Ludovico de Valentibus habenti officium Advocati Fisci Cameræ Apostolicæ.

II Fidei Promotor suum habet in Urbe Fidei Subpromotorem, qui jurare debet de servando secreto, cum quo conferre potest difficultates in causis proponendas, qui insuper assistit, tamquam Promotor Fiscalis, processibus, qui auctoritate Apostolica conficiuntur in Urbe, & ad quem pariter processus omnes causarum, scripturæ, summaria, & informationes deferuntur, ut ipse videre possit omnia, quæ videnda sunt, suasque notas, processibus examinatis, cum Fidei Promotore communicare, quemadmodum decernitur in Brevi Fidei Promotoris typis impresso inter decreta generalia; ubi etiam statuitur, eundem Subpromotorem comparere posse in Actis coram Notario, & Secretario sacre Congregationis, & coram Cardinalibus ad concordandum de facto super dubiis causarum, quæ proponuntur, & alia quæcumque nomine Promotoris agere, quæ isti videbuntur opportuna: *Quodque Subpromotorem unum eligere possit & deputare ad tuum beneplacitum in Romana Curia, qui processus hucusque factos, vel alios in futurum faciendos tam auctoritate ordinaria, quam Apostolica videre, ac in facto scribere, & comparere possit in Actis coram Notario, & Secretario dictæ Congregationis, & etiam coram dictis Cardinalibus ad concordandum factum super dubiis in Congregationibus proponendis, & alia facienda nomine & arbitrio*

tio, qua tibi videbuntur opportuna & necessaria, & cum quo etiam conferre possis difficultates, & alia omnia, qua in dictis Congregationibus tractabuntur, recepto tamen prius a te, et ab eo solito juramento de servando secreto.

12 Licet autem principale onus Fidei Subpromotoris sit compendificare & examinare processus, uti non solum habetur ex verbis Brevis modo perpenfis, sed ex novissimis etiam decretis sanctæ memoriæ Innocentii XI. §. 10. *Subpromotor Fidei a Rev. P. Promotore deputatus, cui onus incumbit primo loco spoliandi et examinandi processus (ex quibus pendet Beatificationum et Canonizationum substantia) ad effectum referendi eidem Promotori, debeat hujusmodi munus diligentissime ac cum omni rigore adimplere; proinde tamen non eximitur Fidei Promotor ab eadem accurata processuum revisione, quemadmodum colligitur ex iisdem decretis §. cit. Quatenus ipse Dominus Promotor ex diligenti & accurata revisione processuum, quam facere solet, necessarium vel opportunum duxerit. Et, si quidem in revisione processuum aliquid obstandi reperiri possit, ad Subpromotorem pertinet summarium facere obstandium, pro comprobandis his, quæ a Fidei Promotore in animadversionibus deducuntur, juxta eadem decreta sanctæ memoriæ Innocentii XI. §. 10. Idemque Subpromotor .... teneatur aliud summarium objectionale ad probationem oppositionum conficere, quod sacra Congregatio plurimum expedire cognoscit, ad hoc, ut veritas magis elucescat.*

13 Alia supersunt respicientia officium Fidei Subpromotoris, de quibus alibi agetur; cum interea adnotandum tantummodo videatur, electionem Fidei Subpromotoris, & remotionem ab officio dependere ab arbitrio Fidei Promotoris, necnon substitutionem alterius in locum illius, vel quando abest ab Urbe, vel quando ex morbo, aut ex alia causa est impeditus. Porro electio ad officium, & remotio ab officio desumitur ex recitatis verbis Brevis Fidei Promotoris in decretis generalibus Urbani VIII. *Quodque Subpromotorem unum eligere possis & deputare ad tuum beneplacitum in Romana Curia &c.* Substitutio autem alterius in locum illius, quando ipse aut abest, aut est impeditus, oritur, ut cetera prætereantur, ab observantia. Cum enim bonæ memoriæ Andreas Pierius, qui spatio fere quadraginta annorum munus exercuit Fidei Subpromotoris, decursu prædicti temporis Bononiam ivisset, ut ibidem per triennium fungeretur munere Auditoris generalis, recessisset etiam aliquando ab Urbe spatio nonnullorum mensium tuendæ sanitatis gratia, & in ultimo vitæ sine laboribus attritus impotens evasisset, ut operi sibi commissio satisfaceret; bonæ memoriæ Prosper Bottinius Archiepiscopus Myrensis & Fidei Promotor, pro tempore ejus moræ in civitate Bononiæ subrogavit bonæ memoriæ Bernardinum Peregrinum, pro tempore recessus ab Urbe Dominum Dominicum Mariam Vaccarium in Fidei Subpromotores; Joannem vero Zuccherinum, de cujus fide, integritate, & peritia experientiam habuerat non perfunctorie, coadjutorem elegit cum futura successione, statim ac Andreas ipse Pierius inhabilis factus est. Et prædictus quidem

Joannes



Joannes Zuccherinus Subpromotoris munere usque ad mortem diligentissime functus est; ita ut, non obstante officii amobilitate, attentis ejusdem meritis & longo servitio laudabiliter præstito, sanctæ memoriæ Benedictus XIII. die 16. Decembris 1726. per suas litteras in forma Brevis concesserit & indulserit, ut in eo munere permanere posset quoad viveret, prout permanfit, cum omnibus & singulis privilegiis, salariis, emolumentis, honoribus, & oneribus solitis & consuetis.

14 Quia vero in universo orbe Catholico fiunt auctoritate Apostolica processus, & neque Fidei Promotor, neque Subpromotor, qui est in Urbe, illorum confectioni interesse possunt; hinc est, quod, quando expediuntur litteræ remissoriales pro constructione processuum, Fidei Promotor eligit in loco, in quo fit processus, Subpromotorem ad eum tantum actum, ut videlicet suo nomine intersit confectioni processus; sicuti desumitur ex verbis, quæ leguntur in formula commissionis generalis impressa in decretis generalibus: *Testes examinare cum interventu Subpromotoris Fidei per eundem Promotorem in Curia nominandi*. Mos autem est hujusmodi, ut a Fidei Promotore destinetur ut plurimum in Fidei Subpromotorem Promotor Fiscalis mensæ Episcopalis illius civitatis, in qua fit processus, præstita simul & semel facultate Judicibus delegatis alium eligendi in Subpromotorem, si ita illis expediens videatur. Et consideratè profecto dictum est, a Fidei Promotore ut plurimum Promotorem Fiscalem designari in Fidei Subpromotorem; quia, si notitiam haberet alicujus viri probi & idonei, qui in loco versaretur, in quo conficitur processus, quique vellet, & posset munere fungi Subpromotoris, eum eligere posset in Fidei Subpromotorem, omisso Promotore Fiscali, sicut a me factum est in constructione processus in causa B. Peregrini Latiosi. Quin immo, si locus processus non sit maxime distans ab Urbe, potest Fidei Promotor personam sibi magis acceptam ab Urbe transmittere, quæ munere Subpromotoris fungatur. Cum enim in causa B. Hyacinthæ de Marescottis conficiendus esset auctoritate Apostolica processus in civitate Viterbiensi, ipse ego tunc Fidei Promotor operæ pretium esse censui abstinere a delectu Promotoris Fiscalis Viterbiensis in Fidei Subpromotorem; & quia egebam opera Joannis Zuccherini mei in Curia Subpromotoris, qui mecum portabat pondus diei & æstus, Antonium Franceschetti, cujus probitas & habilitas mihi erant perspectæ, Viterbium ab Urbe transmissi, qui fuit Subpromotor in illo processu, qui Viterbii conficiebatur.

15 Aliquando fuerunt quæstiones excitatæ super munere, seu officio Fidei Promotoris, necnon super illo Subpromotoris. Dum eram Fidei Promotor, sacrorum rituum Congregatio die 15. Julii 1719. mihi demandavit, ut, visis & consideratis authenticis documentis causæ S. Aloysii Gonzagæ, statum ejusdem pro veritate referrem, atque opportuna ad eam concludendam *ordinatoria* suggererem. Magno sane cum labore mandatis obtemperavi, atque, exarata longa causæ narratione, eademque

typis impressa, non modo non dubitavi ei me subscribere, sed etiam subscriptionem meam apposui omnibus documentis, quæ in positione fuerunt a Postulatoribus allata, & mihi antea communicata. In Congregatione autem habita die 7. Augusti 1723. a claræ memoriæ Cardinali Fabrono causæ B. Aloysii Relatore propositum fuit dubium de validitate subscriptionis per me appositæ documentis & summario Postulatorum, sub obtentu, quod id pertinebat ad Fidei Subpromotorem, uti statutum est in decretis generalibus Innocentii XI. §. 11. & infra demonstrabitur: meque libentissime assentiente, ut veritas elucesceret, & ut in causa gravissima nihil exhibitum dici posset, quod non esset authenticum, sacra Congregatio mandavit, ut documenta, & Postulatorum summaria a Fidei Subpromotore rursus viderentur, & ab eodem subscriberentur. Facta revisione per Fidei Subpromotorem, factaque per ipsum subscriptione omnibus & singulis documentis, quæ ab ipso recognita fuerunt tamquam authentica, ut ipse etiam antea existimaveram: ne aliquod præjudicium ex hoc facto derivaretur in munus Fidei Promotoris, persugium habitum est ad sanctæ memoriæ Benedictum XIII. eidemque facta est in supplici libello expositio totius facti: & quidem inter cetera, quod mihi, & non Subpromotori, sacra Congregatio die 15. Junii 1719. delegaverat considerationem authenticorum causæ documentorum; quod in Brevi Fidei Promotoris non aderant verba præceptiva, sed facultatem tantum sonantia quoad electionem Fidei Subpromotoris, *quodque Subpromotorem unum eligere possis, & deputare ad tuum beneplacitum in Romana Curia*; quod omnia, quæ gerebantur a Fidei Subpromotore, agebantur ex voluntate & arbitrio Fidei Promotoris, qui, quatenus voluisset, semper potuisset per se ipsum adimplere omnia & singula, quæ adimplentur a Fidei Subpromotore; quod tandem observantia concors erat litteræ Brevis, & rationi, cum in causa Spoletana Josephi a Leonissa anno 1708. in causa Florentina B. Julianæ Falconeræ anno 1709. in causa Parisiensi B. Vincentii a Paulo anno 1713. & in Aretina B. Gregorii Papæ X. anno 1714., impedito Fidei Subpromotore, ipse, sciente, vidente, & nihil omnino opponente sacrorum rituum Congregatione, summariis & positionibus Postulatorum solus subscripserim. Sanctitas sua die 12. Novembris 1724. declaravit, me tunc Fidei Promotorem potuisse, & in causa B. Aloysii etiam debuisse per me ipsum summarium recognoscere; ideoque summarium idem fidem fecisse, ac meruisse, & eo potuisse Postulatores pro libito uti.

## C A P U T XIX.

*De Notario, & archivi Inspectore, Interpretibus processuum,  
Procuratoribus, Advocatis, & Medicis, aliisque Ministris  
Congregationis sacrorum rituum.*

**I** Nstar Congregationis sanctissimæ Inquisitionis, Rev. Fabricæ S. Petri, atque Confinium, quæ suos habent in Urbe peculiare Notarios, suum etiam habet sacrorum rituum Congregatio Notarium peculiarem, juxta decretum editum die 20. Augusti 1625. *Sacra rituum Congregatio censuit, ut in posterum in causis Canonizationum servorum Dei in ipsa sacra Congregatione tractandis, deputetur aliquis Notarius ad id idoneus ad nutum ipsius sacra Congregationis, cum taxa per eandem sacram Congregationem declaranda, qua a Secretario subscribi debeat.* Et, quamvis aliquando actum fuerit de uniendo officio Notarii sacra Congregationis officiis vel Notariorum sacra Rotæ, vel Notariorum Cardinalis Vicarii; caruerunt tamen hæc omnia effectu suo. Nimis enim necessarium reputatum est, ut proprium haberet sacra Congregatio Notarium, ne Acta Canonizationum permixta remanent cum Actis aliarum causarum, quæ vel in tribunali Rotæ, vel in illo Cardinalis Vicarii discutiuntur, & ne Congregationi sacrorum rituum prærogativa auferretur, qua ceteræ prædictæ Congregationes potiuntur.

2 Olim Notarii electio ad eandem sacram Congregationem pertinebat, sicuti non solum colligitur ex delectu in Notarium Clearchi Buschi, quæ facta fuit die 24. Novembris 1625. sed etiam ex his, quæ contigerunt anno 1661. Cum enim tunc ageretur, ut diximus, de uniendo sacra ejusdem Congregationis Notario Notariis Rotæ, summus Pontifex Alexander VII. protestatus est, se nullatenus per hæc & similia præjudicium afferre voluisse juri sacra Congregationis statuendi, & removendi proprium Notarium; ut adnotavit Secretarius in registis, his verbis: *Præterea, cum Sanctitas sua intenderit officium Notariatus sacra Congregationis unire officiis Notariorum sacra Rotæ; nomine sacra Congregationis Sanctitatem suam rogavi, ut dignaretur electionem, & liberam remotionem Notarii ex numero Notariorum Rotæ faciendam dimittere arbitrio sacra Congregationis; & Sanctitas sua, ita se mandaturam Thesaurario, benigne promisit, ac se nunquam in contrarium intendisse declaravit.* At hodie immutata est consuetudo: Secretarius siquidem Congregationis, postquam intellexerit obiisse Notarium, aut officium dimisisse, certiores de hac re reddit summum Pontificem, illiusque mente perspecta, eam sacra Congregationi notificat, quæ eligit personam a Sanctitate sua Secretario nominatam, & a Secretario sacra Congregationi significatam.

3 Notarius, statim ac electus est, emitte tenetur in sacra Congregatione

gatione iuramentum de fideliter exercendo officio sibi commissio, & de observanda taxatione emolumentorum jam statuta, de qua alibi sermo fiet; & formula quidem iuramenti est ea, quæ sequitur: *Ego N. N. Notarius a sacra Congregatione specialiter deputatus in causis ejusdem sacre Congregationis, sacris sacrosanctis Dei Evangelis, juro & promitto fideliter exercere officium mihi concessum, & ad unguem observare supradictam taxam, sub poena perjurii, privationis officii ipso facto incurrenda, & restitutionis contra. & ultra dictam taxam habitorum & acceptorum, aliisque poenis arbitrio ipsius sacre Congregationis. Deberet Notarius præ foribus adesse, quando habentur Congregationes in causis servorum Dei, juxta decretum anni 1642. Idem Notarius adsit præ foribus, quando habentur Congregationes causarum Sanctorum: verum id non est amplius in usu, sed die Congregationem præcedenti adire ille consuevit Secretarium, & Fidei Promotorem, ut ab illis audiat, an sua opera indigeant, necne.*

4. Sæpe disputatum fuit, utrum ad sacre Congregationis Notarium pertinerent tantummodo causæ Beatificationis, & Canonizationis, an etiam aliæ omnes causæ, quæ in sacra rituum Congregatione discutiuntur; semper autem prodierunt resolutiones Notario favorabiles, quod ad ipsum scilicet spectarent causæ utriusque generis privative quoad alios omnes Urbis Notarios, ut ex sequenti decreto colligitur: *Cum sacra rituum Congregatio, ne tam processus causarum Beatificationum, & Canonizationum, quam alii, qui in causis controversis confici possunt, per manus Notariorum variorum tribunalium dispersi vagarentur, usque ab anno 1625. pro actiandis hujusmodi causis Clearcum Buschum in proprium & peculiarem ipsius sacre Congregationis Notarium nominaverit; cumque, hujusmodi declaratione minime obstante, Notarii A. C. ac signanter sacri palatii Apostolici in prædictis causis controversis sese ingerere cœperint; denno, habito per Jacobum Saxum anno 1681. ad sacram rituum Congregationem recursu, eadem sacra Congregatio die 24. Januarii prædicti anni, de communi Eminentissimorum Cardinalium dictæ sacre Congregationi præpositorum voto, censuit & decrevit, omnes causas penes ipsam controversas, ac in posterum controvertendas, ab eaque cognoscendas, illarumque Acta omnino spectare ad Notarium ipsius sacre Congregationis privative quoad omnes alios Notarios quorumcumque tribunalium; & ita observari mandavit, non obstantibus quibuscumque. Hinc autem declarationi ac decreto post aliquod tempus præmemorati Notarii minime obtemperantes, varias supra recensitas causas actitarunt, citationes expedierunt, processus consecrunt, aliæque peragere in præjudicium juris ac facultatum proprii Notarii sacre ejusdem Congregationis attentarunt. Proinde Cosmus Antonius de Bernardinis modernus ejusdem sacre Congregationis Notarius apud ipsam iterum institit, quatenus prædicti sacri palatii vel A. C. & aliorum tribunalium Notariis tum observantiam memorati decreti, tum restitutionem scripturarum omnium, ac processuum mandare dignaretur, iisdemque inhibere, ne in hujusmodi causis controversis, aliisque ad sacram Congregationem rituum spectantibus in posterum sese ingerere ullo modo auderent, vel præsumant.*

Sacra

*Sacra vero eadem Congregatio huiusmodi instantia die 23. Martii 1715. rescibendum duxit: Audiatur Notarius A. C. coram Eminentissimo Praefecto. Citato itaque, coram eodem Eminentissimo, sacri palatii & A. C. Notario Paulo Fatio, priusque tam in voce, quam in scriptis audito, iuribusque hinc inde deductis, visis, & mature perpenfis, propostaque denno instantia sub infra scripta die, sacra eadem rituum Congregatio iterum censuit ac decrevit, causas omnes tum Beatificationis, & Canonizationis, tum controversas, quaque quovis modo in ipsa sacra Congregatione tractantur, earumque Acta, processus &c. spectare ad proprium illius Notarium privative quoad omnes alios; necnon tum sacri palatii Apostolici, & A. C., tum aliorum tribunalium Notarios inhibendos esse, ne amplius in causis iam enuntiatis sese ingerere audeant & presumant, sub poenis arbitrio ipsius sacra Congregationis infligendis. Et ita decrevit & servari mandavit, si Sanctissimo Domino nostro visum fuerit, die 6. mensis Julii 1715.; factaque deinde per me Prosecretarium de praedictis Sanctissimae relatione, Sanctitas sua benigne annuit die 13. eiusdem mensis, & anni 1715.*

5 Aliquando etiam de Notario sacrae Congregationis quaesitum est, an ipse de necessitate adhibendus esset in confectione processuum Beatificationis, & Canonizationis, qui aliquando fiunt in Urbe, auctoritate Apostolica, a Cardinali Vicario, aut ab Episcopis ab isto deputatis: &, quamvis prima facie responderi posse visum fuerit, in dictis processibus adhibendum esse Notarium sacrae Congregationis, cum ejus auctoritate memorati conficiantur processus; contraria nihilominus opinio in usu recepta est, ita ut liberum sit Cardinali Vicario quemlibet sibi acceptum ( dummodo sit idoneus, & qualitates habeat necessarias ) destinare in hac hypothese Notarium. Procedit enim in hoc rerum statu Cardinalis Vicarius tamquam delegatus; & delegatus quidem non tenetur uti Notario delegantis, sed quemlibet alium sibi magis acceptum adhibere potest: atque re ipsa, cum in Congregatione sacrorum rituum ordinaria, die 14. Septembris 1715. de hac eadem re sermo habitus fuisset, postrema illa praevaluit opinio, quam etiam praecedens validam reddiderat observantia.

6 Notarius est etiam Inspector archivi sacrae Congregationis, vulgo *Archivista*, ita ut, statim ac quis destinatur in Notarium, designetur simul & semel in archivi Inspectorem: Operae itaque pretium est, nonnulla hic recensere de dicto Congregationis archivo.

7 Summus Pontifex Urbanus VIII. archivo sacrae Congregationis locum assignavit in palatio Vaticano, uti legitur in regestis Secretarii Caroli Paulucci pag. 413. In hoc archivo custodiuntur authentici processus causarum Beatificationis, & Canonizationis, & interpretationes autographae illorum, qui sunt extero idiomate confecti; cumque in sacrorum rituum Congregatione alia pertractentur negotia, puta praecedentiarum, & similia, processus Beatificationum, & Canonizationum retinentur in loco separato ab aliis scripturis, nec amoveri possunt, nisi de mandato vel Cardinalis causae Relatoris, vel Fidei Promotoris, causa illos videndi, quatenus

quatenus opus sit, & cum onere deinde restituendi. Claves autem loci, in quo asservantur scripturæ, retinentur a Protonotario, qui ulterius tenetur conficere inventarium dictorum processuum, & quatuor illius exemplaria, quorum unum esse debet penes ipsum, alterum penes Secretarium, tertium apud Promotorem, quartum vero remanet in archivo; & in fine cujuslibet anni fit a Protonotario, Secretario, & Promotore coram archivi Inspectore collatio inventarii cum processibus, ut videatur, an aliqui desint, & an illi, qui fuerunt crediti vel Cardinali Relatori, vel Fidei Promotori, uti supra dictum est, fuerint redditii.

8 Defumuntur hæc omnia ex decretis Innocentii XI. §. 5. & 6. *Advertens etiam* (sacra Congregatio) *quam necessaria sit diligens custodia processuum originalium, decrevit, quod ii, sicuti etiam interpretationes originales illorum, qui sunt extero idiomate confecti, retineri debeant in archivo sacre Congregationis in Vaticano in loco clauso & separato ab aliis scripturis, nec possint amoveri, nisi de ordine Eminentissimi Cardinalis Pontificis, vel ad instantiam R. P. Promotoris, ad effectum videndi, quatenus opus sit, & deinde reportandi; cujus archivi due sint claves, una penes Protonotarium Apostolicum, qui pro tempore intervenerit sacre Congregationi, & altera penes Secretarium; & clavis loci, in quo custodiuntur dicti processus, stet penes eundem Protonotarium, alterius vero, in quo retinentur alia scriptura sacre Congregationis, penes Secretarium. Idemque Protonotarius curam habeat revidendi inventarium dictorum processuum, & quatenus non adesset, illud diligenter fieri mandet cum quatuor copiis, quarum una stet penes eundem Protonotarium, altera penes Promotorem, altera penes Secretarium, & quarta in eodem archivo; & in fine anni idem Protonotarius, Promotor, & Secretarius revidere debeant dictum inventarium, & conferre cum processibus, ad effectum recognoscendi, an aliquid deficiat, & curandi, ut reporentur; & Secretarius referat in prima sequenti Congregatione.*

9 Post hæc decreta, non commodantur Procuratoribus, & Postulatoribus processus in archivo existentes: pro agendis enim causis Beatificationum, & Canonizationum utuntur aliis exemplaribus authenticis, quæ ipsis a Notario sacre Congregationis data sunt. Verum ante hæc decreta, processus archivi commodabantur; & quia aliquando causæ resumuntur, quarum processus ante decreta crediti retinentur a Procuratoribus, aut Postulatoribus, iidemque instant, ut a Notario recipiantur, & in archivo reponantur; non potest Notarius privata auctoritate hanc processuum redditionem admittere, sed illorum recognitio fieri antea debet a Fidei Promotore, uti respondit sacra Congregatio in causa Panormitana servi Dei Innocentii a Clusis die 22. Aprilis 1684. Contigit id ipsum, dum munereungebar Fidei Promotoris, in causa Grossetana servi Dei Joannis a S. Guillelmo, in qua processus traditi ante decreta non fuerunt recepti, nec in archivo repositi, nisi adhibita a me diligentia, an processus ipsi essent autographi, & concordarent cum manuali processuum commodatorum

rum existente in Actis Notarii, & an numerus foliorum processuum restituendorum responderet numero foliorum, qui erat expressus in dicto manuali: præterea omnes processus diligenter inspecti sunt, ut videretur, an aliquis defectus, aliqua litura, aut aliqua superadditio reperiri posset: & facta demum per me relatione in scriptis, quæ ad unumquemque sacræ Congregationis Cardinalem transmissa fuit, demandatum tandem est Notario, ut processum reciperet, & ad archivum referret.

10 Contingit aliquando, ut in causis Beatificationis, & Canonizationis ad sacram rituum Congregationem transmittantur processus extero idiomate conscripti. Et profecto etiam ante decreta novissima Innocentii XI. Interpretes, & Revisores adhibebantur fide digni, uti satis colligi potest ex decreto edito in causâ Antuerpien. servæ Dei Annæ a S. Bartholomæo die 31. Augusti 1670. sed, quia in decretis generalibus Urbani VIII. nihil fuerat constitutum quoad Interpretem, & Revisorem, in decretis idcirco prædictis Innocentii XI. præscriptum fuit, ut Interpreter processuum extero idiomate conscriptorum eligatur a Cardinali causæ Relatore, citato tamen & audito Fidei Promotore; & ut, facta interpretatione, vir probus ab eodem Cardinali secretò destinetur, qui ipsam recognoscat. Imponitur utrique, Interpreti scilicet, & Revisori, a Cardinale Relatore juramentum de fideliter adimplendo munere ipsis commissio; & si quidem in interpretatione deprehendatur aliquis error substantialis, Interpreter punitur arbitrio sacræ Congregationis. En verba decretorum Innocentii XI. §. 4. *Considerans quoque sacra Congregatio, quod principale fundamentum in causis Beatificationum, & Canonizationum constitui debet in fideli interpretatione processuum extero idiomate conscriptorum, & quod, licet ex laudabili observantia Interpreter semper fuerit electus ab Eminentissimo Ponente, citato & audito R. P. Fidei Promotore, nihilominus super hoc decreta generalia nihil disponunt; idcirco decrevit, quod in posterum in qualibet causa Interpreter eligatur ab Eminentissimo Cardinali Ponente, citato & audito R. P. Fidei Promotore; & pro majori cautela, postquam interpretatio fuerit facta, revideatur ab aliquo viro probò & perito, qui secretò ad hoc officium assumatur ab eodem Eminentissimo Ponente; & si reperiatur aliquis error substantialis, Interpreter severe puniatur arbitrio sacræ Congregationis; per quem Eminentissimum deferri debeat tam Interpreti, quam Revisori juramentum de fideliter sibi munus commissum adimplendo.*

11 Porro in sacrorum rituum Congregatione minime leguntur memorialia, sive scripturæ spectantes ad causas Beatificationum, & Canonizationum, nisi sint a Procuratore subscriptæ; juxta decretum editum die 18. Martii 1679. quod fuit innovatum & confirmatum die 31. Augusti 1680. *Sacra rituum Congregatio, inherendo decreto sub die 18. Martii 1679. in eadem emanato, quod in posterum non legantur memorialia Beatificationum, & Canonizationum sine subscriptione Procuratorum, iterum mandavit, quod non recipiantur*

*sur in futurum memorialia , & scriptura Beatificationum , & Canonizationum , nisi sint subscripta a Procuratoribus ; & ita decrevit , & servari mandavit die 31. Augusti 1680.*

12 Non omnibus tamen Procuratoribus Romanæ Curiae scribere permissum est in causis sæpe memoratis Beatificationum , & Canonizationum : sed , cum in Urbe collegium habeatur Procuratorum collegii sacri palatii Apostolici , in quod recipiuntur viri notæ probitatis , experientiæ , & peritiæ ; quod quidem collegium , si non institutum fuit , in meliorem saltem formam redactum est anno 1617. a summo Pontifice Paulo V. juxta ea , quæ late recensentur in *Romana juris honorifici super petitorio* 24. Martii 1702. §. *Fundamentum* , coram bon. memor. Molines decano ; hinc est , quod in novissimis decretis sanctæ memoriæ Innocentii XI. concessum fuit hujus collegii Procuratoribus , privative quoad alios , ut in his causis scribere possent , quemadmodum legitur §. 11. *Et , quia materia gravitas , & dignitas exposcit , ut pertractetur & dirigatur a viris notæ probitatis , experientia , & peritiæ ; censuit sacra Congregatio , quod ad conficiendum tam informationes in facto , quam summaria , in quibus potissime consistit causarum pondus , assumantur solum Procuratores collegii sacri palatii Apostolici , tribuendo Postulatoribus libertatem eligendi ex dicto coetu , quem voluerint . Privativa hæc facultas Procuratorum sacri palatii Apostolici confirmata fuit a sacra rituum Congregatione die 13. Augusti 1701. Cum enim nonnulli Procuratores , qui non erant ex dicto collegio , vel utentes proprio nomine , vel assumpto nomine alicujus e collegio Procuratoris , incumbere defensionibus harum causarum Beatificationis , & Canonizationis , Patroni autem collegii protestati fuerint , se esse promptos & paratos ad harum causarum patrocinium ; controversia delata ad sacram rituum Congregationem ordinariam , ipsa diebus & anno prædictis respondit pro observantia decreti Innocentiani . Veruntamen id non officit , quin summus Pontifex , vel sacrorum rituum Congregatio , accedente tamen Pontificia approbatione , indulgere possint , ut Procurator , qui non est de collegio , in causis Beatificationis & Canonizationis scribat & patrocinetur : idque sæpius factum est , non solum post decreta Innocentii XI. sed etiam post citatum decretum anni 1701. . Et merito ; tum quia causæ istæ totum hominem requirunt , & collegii Procuratores aliis Curiae negotiis ut plurimum sunt implicati ; tum quia plerique reperiuntur maximopere idonei ad harum causarum patrocinium , qui in collegium Patronorum non admittuntur ex defectu aliorum requiritorum , quæ nihil habent commune cum causis servorum Dei .*

13 Præterea in memoratis Innocentii XI. decretis cautum est , ut unusquisque Procurator eodem tempore quatuor tantummodo causis Beatificationis , & Canonizationis incumbat , ut diligentius operam suam navare valeat , sicuti colligitur ex *cis* . §. 11. *Dummodo quilibet ex eis non possit eodem tempore patrocinari plures causas , quam quatuor , ad hoc , ut eis facilius ope-*



lius operam dare possit, sub poena inhabilitatis amplius scribendi in casu contraventionis. Quibus consentiunt decreta sacræ Congregationis deinceps edita, die scilicet 26. Novembris 1678. die 19. Aprilis 1687. die 27. Julii 1720. & die 10. Decembris 1721. Attamen id de more non observatur, nec observari potest: cum enim expediat, ut aliqui causarum Procuratores se hisce Beatificationum & Canonizationum causis in totum devoteant, quatuor tantummodo causarum numerus modicus est pro continuato eorum labore. Proposita quippe una causa super *signatura commissionis*, cum exempli gratia decem, aut duodecim anni ut plurimum elabantur, antequam eadem proponi possit, post confectos processus Apostolicos; vel hoc intermedio tempore Procurator aliam causam tuendam assumet, tumque non quatuor, sed quinque erunt causæ, quibus patrocinabitur; vel eodem tempore nullam aliam causam assumet, & tunc non quatuor, sed tres erunt causæ, quibus patrocinium præstabit. Redeundum autem ad decreta novissima Innocentii XI. in illis etiam præscriptum fuit, ut Procurator, postquam electus est, possit in quocumque statu causæ mutari; dummodo concurrant legitima ratio, & licentia Eminentissimi Ponentis, & dummodo subrogetur alius ex eodem collegio Procuratorum sacri palatii Apostolici, qui omnino non habeat plures causas, quam quatuor: *Es liceat Partibus in quocumque statu causa, rationabiliter tamen, & prævia licentia Eminentissimi Ponentis, mutare Procuratorem, dummodo alius in ejus locum subrogandus sit de eodem collegio, & non habeat in totum plures causas, quam quatuor.*

14 Ponderanda est tamen dictio *rationabiliter*, quæ legitur in citato decreto: rationabilis enim causa requiritur in mutatione Procuratoris jam assumpti ad defensionem causæ Beatificationis, & Canonizationis; & examen æquitatis causæ admitti potest, non ut Procurator invitis Postulatoribus (si causa forte eum removendi esset irrationabilis) valeat amplius se immiscere negotiis Beatificationis, & Canonizationis, sed ut propriam existimationem tueri valeat, ne forte propter remotionem traduceretur tamquam vir malæ famæ, vel non integræ aptitudinis. Et sane his cohærenter videmus, in iure statutum esse, Procuratorem invitum dimitti non posse, nisi concurrente rationabili causa, juxta *text. in cap. Quamvis de Procuratoribus in 6.* etsi hæc juris censura ita procedit, ut Procurator dominus litis effectus audiri quidem valeat pro conservatione sui honoris & famæ, vocando in iudicium Dominum, a quo revocatus est, ad dicendam causam revocationis, non vero, ut in posterum causæ se immisceat. Textus est notabilis in *l. Qua omnia 25. §. Sed si adversarius ff. de Procuratoribus*; & concordant *gloss. in cap. Quamvis verbo ipso volente de Procuratoribus in 6. Adden. ad Ludovis. decis. 548. num. 14. Rota coram Cassador. decis. 2. de appellat. num. 5. & coram Seraphino decis. 195. num. 1. & 2.*

15 Scribentes in iure in his causis sunt Advocati sacræ Consistorialis aulæ: sed, quia duodenarius tantum est numerus horum Advocatorum,

& sæpenumero contingit, ut aliquis ex eis ad officia Prælatiæ assumatur, semper vero eorumdem unus sit pauperum Advocatus, alius Fisci, & Re-ver. Cameræ Apostolicæ pariter Advocatus, alius Fidei Promotor, ita ut in his causis scribere non possint; sacra idcirco Congregatio duodecim alios approbare consuevit Advocos in Romana Curia celebriores, qui in his causis patrocinium præstent, ita tamen, ut quilibet eorum eodem tempore sex tantummodo ex eisdem causis habere possit: *Advocati vero* (verba sunt decretorum Innocentii XI. §. 12.) *ad scribendum in iure assumi debeant ad libitum Postulatorum, dummodo sint ex collegio sacre Consistorialis aula, vel ex duodecim aliis approbatis a sacra Congregatione; ita tamen, ut quilibet eorum sex tantum causas patrocinari possit. Quamquam & id de more non observatur, neque observari potest, propter rationes supra allatas, cum de Procuratoribus agebatur.*

16 Prærogativa scribendi in iure in his causis iure ac merito data fuit collegio Advocatorum Consistorialium. Collegium enim illustre est, & ex probis doctisque viris compositum: ideoque Æneas Sylvius, sive Pius II. in apologia ad Martinum Mayer, qua extat in commentariis Jo: Gbellini de illo inquit pag. 737. *Vicecancellario subserviunt Auditores viri graves, & doctrina excellentes, coram quibus causa agitantur & definiuntur, suntque raro infra duodecim, cuilibet vero eorum quatuor Scribe assistunt; & Advocatorum nobilis ordo, qui patrocinantur causis, viri electi ex multis, utroque iure consulti, qui cathedras diu in scholis publicis rexerunt: neque hi, neque Auditores absque magno examine admittuntur, & necesse est, eos publice disputare, priusquam in hunc ordinem aspirare valeant. Quodque notabilius est, cum soli Advocati Consistoriales in publicis Consistoriis pro Beatificationibus, & Canonizationibus exorent; congruum esse videtur, ut ipsi etiam in dictis causis scribant, & patrocinium præstent.*

17 Medici tandem, Physici, Chirurgi, quin immo & Mathematici, quando agitur de miraculis, & quando materia id exposcit, a sacra Congregatione consuluntur, ut suum sensum in scriptis pro veritate aperiant. Statutum id fuit in decretis Innocentii XI. §. Finali. Si etenim a Postulatoribus exhibeantur scripturæ Physicorum, & Chirurgorum pro confirmatione miraculi, cuius intendunt approbationem, in eisdem præscribitur decretis, ut tunc Cardinalis causæ Relator eligat ex officio, secreto, & prævio juramento de veritate dicenda, alium Medicum, sive Chirurgum celebriorem, qui scribat pro veritate: *Cum etiam observatum fuerit, sæpe Postulatores dare scripturas Medicorum, vel Chirurgorum pro confirmatione miraculorum, & ex alia parte non fuerit solitum responderi per peritos ejusdem professionis; ideo videtur necessarium, ad hoc, ut respondeatur secundum artem, quod Eminentissimus Ponens deputet ex officio, secreto, ac prævio juramento, alium Medicum, & Chirurgum celebriorem, qui respondeat pro veritate, ad effectum videndi, an asserta miracula excedant vires naturæ. Quin etiam, ut veritas magis elucescat, sæpe fit, ut nullo quoque scribente*

bente Medico, ad opportunitatem, jussu Cardinalis Relatoris vel sacrae Congregationis, Medicus vel Chirurgus eligatur ad scribendum pro ipsa veritate: & ita pluries effectum fuit, dum munere fungebar Fidei Promotoris; & id ipsum etiam ante decreta novissima Innocentii XI. in more positum erat, ut Medici suum in scriptis proferrent judicium super miraculis, quoties dubitabatur, an factum vires naturæ excederet. Quid contigerit in causa S. Aloysii Gonzagæ, dum ea in Auditorio Rotæ pertractabatur, in superioribus visum est. Superfunt adhuc consilia Angeli Victorii, & Pauli Zacchiæ super nonnullis miraculis, quæ proponebantur examinanda in causis SS. Philippi Neri, Laurentii Justiniani, & B. Gregorii X.; & in causa S. Caroli Borromæi narrat Grattarola cap. 43. Medicos ad consilium fuisse vocatos in examine miraculorum: *Come ancora per la gran diligenza, che i Signori Cardinali usavano in istudiar benissimo tutta la causa, e consultare con molti periti Medici la materia de' miracoli, e allora congregarne molti a farci sopra collegio, dove vedevano, che vi potesse restare qualche dubbio.*

18 Ad hæc juxta decreta generalia Urbani Papæ VIII. scripturæ exaratae in causis Beatificationis, & Canonizationis typis imprimi non poterant, antequam causis ipsis finis impositus esset: *Relationes Auditorum Rotæ, informationes in factis & in jure, & alia quacumque scriptura tractantes de causis Beatificationum, & Canonizationum imprimi omnino prohibentur ante earumdem causarum terminationem.*

19 Sed, facilioris studii, & minoris impensæ gratia summus Pontifex Alexander VII. concessit, ut omnes Procuratorum, Advocatorum, & Medicorum scripturæ, ipsæque etiam animadversiones Fidei Promotoris imprimi possent; uti desumitur ex decreto edito die 19. Julii 1661. *Quamvis sel. record. Urbanus VIII. decreto edito die 31. Januarii 1631. mox relato, & impresso inter novissima decreta die 12. Martii 1642. pag. 61. in causis Beatificationum, & Canonizationum expresse prohibuerit, relationes Auditorum Rotæ, informationes in factis & in jure, & alias quasvis scripturas tractantes de causis Beatificationum, & Canonizationum imprimi, ante earumdem causarum terminationem; cum tamen experientia fuerit deinceps compertum, in illis exemplandis per amanuenses, ob eorum imperitiam vel incuriam, ut plurimum multa errata irrepere, quæ verum illarum sensum immutant, & Postulatores cogi graves impensas subire, quæ maxima ex parte minuerentur, si eisdem liceret illas typis mandare; ideo SS. D. N. Alexander Divina providentia Papa VII. utrique malo provida sollicitudine consulere volens, de consilio S. R. E. Cardinalium sacra rituum Congregationi præpositorum, in qua hujusmodi negotia discuti mandaverat, habita die 9. Aprilis præsentis anni 1661. motu proprio, & ex certa scientia, suo speciali decreto indulget & mandavit, ut in posterum informationes tam in factis quam in jure, summaria, memorialia, oppositiones R. P. D. Fidei Promotoris, responsiones, & replicationes, ac omnes & quacumque alia scriptura quomodolibet pertinentes ad causas Beatificationum, & Canonizationum* imprimi-

*imprimi & typis mandari possint & valeant; non obstantibus prefatis decretis, quibus in hac parte duntaxat Sanctitas sua specialiter & expresse derogavit, & derogatum esse voluit.*

20 Sexaginta tamen solummodo dictarum scripturarum exemplaria typis excudi possunt, nisi aliter videatur Secretario sacre Congregationis: *Insuper sexaginta tantummodo exemplaria imprimantur, nisi plura desiderentur a Secretario dicte Congregationis sacrorum rituum.* Et quamvis pro impressione, necessaria non sit licentia Vicegerentis Cardinalis Vicarii in Urbe, vel Magistri sacri palatii, quin immo pro impressione animadversionum R.P.D. Fidei Promotoris istius sufficiat subscriptio, *absque eo quod opus sit alia revisione, licentia, aut approbatione etiam Vicegerentis Cardinalis Vicarii in Urbe, ac Magistri sacri palatii; exceptis tamen oppositionibus, responsionibus, & replicationibus, aliisque scripturis ipsiusmet Promotoris Fidei, quibus sola ejus subscriptio sufficiat; scripturæ nihilominus, quæ exhibentur a Procuratoribus, & Advocatis, non solum videri & examinari debent a Fidei Subpromotore ante impressionem, neque prædicta quoquo modo imprimantur, nisi prius revisa & subscripta fuerint per Fidei Subpromotorem, uti disponit citatum decretum, a quo & hæc, & alia præcedentia verba desumpta sunt; sed dictus Fidei Subpromotor summaria ipsa, quæ sunt a Procuratoribus, antequam typis mandentur, conferre tenetur cum processibus, se subscribendo in quolibet folio, una cum attestatione suæ revisionis, sicuti sancitum fuit in decretis novissimis Innocentii XI. §. 10. Subpromotor Fidei a R. P. Promotore deputatus, cui onus incumbit primo loco spoliandi & examinandi processus (ex quibus pendet Beatificationum, & Canonizationum substantia) ad effectum referendi eidem Promotori, debeat hujusmodi manus diligentissime, ac cum omni rigore adimplere; ac summaria, quæ solent a Procuratoribus fieri, antequam typis mandentur, conserat cum processibus, subsecuta attestatione, quod fuerunt per ipsum revisa, & in quolibet folio se subscribat.*

21 Neque scripturæ, postquam impressæ sunt, statim publicari possunt, sed Fidei Subpromotor iterum eas recognoscit, conferendo videlicet summaria impressa cum exemplari manuscripto, & iterum se subscribit in fine; tum autem subscriptionem Fidei Subpromotoris subsequitur subscriptio Secretarii Congregationis sacrorum rituum, qui omnia tandem munit sigillo: *Eandemque diligentiam (verba sunt decretorum Innocentii XI. loc. cit.) conferendi cum exemplari manuscripto iterum faciat, postquam fuerint impressa, cum iterata subscriptione in fine, quam subsequatur subscriptio, & sigillum Secretarii; nec ante prædictas subscriptiones possint tam summaria, quam informationes publicari, sub gravissimis poenis, tam quoad Postulatores, quam etiam quoad impressorem, arbitrio sacre Congregationis, seu Eminentissimi Cardinalis Prefecti infligendis.* Si vero aliquod exemplar impressum apud aliquem reperitur absque subscriptione & sigillo prædictis, sæpe memoratum Alexandrinum decretum retinentem punit poena quingentorum aureorum applicandorum Rev. Cameræ Apostolicæ pro unoquoque exemplari:

plari: Omnia vero & singula exemplaria impressa consignentur eidem Secretario, ab eoque subscribantur, & sigillo ejusdem sacre Congregationis muniantur, presente impressore; si vero penes impressorem, vel alios quoscunque quavis dignitate, praeinentia, vel auctoritate, etiam speciali ac individua expressione dignos, praeter subscripta & sigillata, ut supra, aliquod aliud exemplar reperiri contigerit, talis impressor, & alius quicumque luat poenam aureorum quingentorum pro quolibet exemplari ex nunc ipso jure Camera Apostolica applicandum. Et si scripturae impressae, ex impressione, vel subscriptione, & sigillo majorem fidem minime obtinent, quam si essent tantummodo manuscriptae, uti colligitur ex eodem decreto: Expressae quoque declaravit Sanctitas sua, quod tales informationes, summaria, & alia quaecumque scriptura Canonizationum, quantumvis impressae, revivae, subscriptae, & sigillatae, ut supra, nullum prorsus probationis gradum faciant in ordine ad Beatificationem, & Canonizationem; sed eam tantummodo fidem mereantur, quam alias haberent, ut simplices copia, absque tali impressione, revisione, subscriptione, & obfignatione praeditis.

22 Harum scripturarum omnium impressio pertinet ad typographum Cameralem, quemadmodum prosequitur saepe allegatum decretum: Ut vero praesens decretum suum integrum ac plenum effectum sortiatur; eadem Sanctitas sua licentiam & facultatem hujusmodi impressionis concessit impressori seu typographo Camerali pro tempore, dummodo taxationem statutam, & alibi referendam observet. Quod si impressor (verba sunt ejusdem decreti) seu typographus Cameralis pro tempore onus imprimendi informationes ac scripturas praedictas pertinentes ad causas Beatificationum, & Canonizationum subire noluerit pro pretio, ut supra, per Sanctitatem suam statuto & taxato, aliisque conditionibus, modis, limitationibus, ac declarationibus superius expressis; tunc Sanctitas sua simili motu proprio, & certa scientia &c. facultatem & licentiam hujusmodi imprimendi dictas informationes, ceterasque omnes & singulas scripturas ad causas Beatificationum, & Canonizationum quomodolibet pertinentes, concessit omnibus & singulis impressoribus seu typographis Urbis pro eodem pretio taxato, ut supra, minorique etiam, si reperiatur, aliisque conditionibus, modis, limitationibus, ac declarationibus supra expressis. Et harum quidem scripturarum pertinentium ad causas Canonizationum, & Beatificationum impressio prohibita est extra Urbem sub iisdem censuris & poenis, quae statutae sunt in decretis Urbani VIII. adversus eos, qui sine recognitione & approbatione Ordinariorum typis mandant libros continentes gesta defunctorum cum fama, sive opinione sanctitatis. Desumitur enim id omne ex alio etiam decreto ejusdem Alexandri VII. die 23. Julii 1661. in quo, relato sensu superioris alterius decreti circa impressionem scripturarum, & facultatem imprimendi concessam typographo Camerali, haec habentur: Nihilominus eadem Sanctitas sua extra Urbem expresse inhibuit omnibus & singulis impressoribus seu typographis ubivis locorum praedictas informationes, omnesque alias scripturas pertinentes ad causas Beatificationum, & Canonizationum

num imprimi, sub quovis prætextu, causa, & quavis colore, & cum quavis auctoritate, licentia, & approbatione; Et, si qua ausu temerario contra præsentis decreti tenorem extra Urbem impressa fuerint, omni prorsus fide carere voluit & declaravit: mandans præterea, ac districte præcipiens universis et singulis hæreticæ pravitatis Inquisitoribus, Patriarchis, Archiepiscopis, Episcopis, aliisque locorum Ordinariis, ut in sua quisque diocesi, vel provincia sedulo pervigilet, ne quidquam contra superius disposita fiat, seu attentetur; et pro omnimodo præsentis decreti implemento, illud in locis consuetis de more publicari curet: sub eisdem censuris et poenis contra transgressores infligendis, qua tam in decretis anno 1625. jussu sel. record. Urbani VIII. in Congregatione SS. Inquisitionis editis super non cultu, quam in subsequentibus ejusdem litteris in forma Brevis 5. Julii 1634. confirmatoriis et declaratoriis præcedentium decretorum SS. Inquisitionis contra imprimentes libros continentes gesta, revelationes, et miracula defunctorum cum fama, seu opinione sanctitatis, sine recognitione & approbatione Ordinariorum, juxta formam ibi expressam continentur; quorum tenores Sanctitas sua ad hujusmodi effectum in præsentis decreto pro plene, & sufficienter expressis haberi voluit.

23 Ad typographum denique Cameralem pertinet typis excudere Martyrologium Romanum: tum prohibetur hujus operis impressio in aliis locis, nisi instar ejus, quod ab ipso impressum est, juxta decretum editum die 23. Martii 1630. Pertinet quoque ad eundem typographum imprimere decreta concessionis Officiorum, & Officia, quæ in honorem Beatorum, aut Sanctorum conceduntur a sacrorum rituum Congregatione; ita ut hæc & similia imprimi non possint ab alio impressore, nec in Urbe, nec extra Urbem; nisi impressores extra Urbem facultatem imprimendi acceperint ab Inquisitoribus hæreticæ pravitatis, si ibi fuerint; sin minus, a locorum Ordinariis: qui tamen omnes hujusmodi licentiam tribuere non debent, nisi ipsis fuerit exhibitum aut authenticum decretum sacræ Congregationis, aut exemplar impressum a typographo Camerali, manu Secretarii dictæ sacræ Congregationis firmatum, & sigillo obsignatum; idque, ut fraudes arceantur, quæ sæpissime in hac re contigerunt: quemadmodum colligitur ex sequenti decreto edito a sæpe memorata sacrorum rituum Congregatione die 11. Augusti 1691. Cum in dies nonnulla Sanctorum Officia, sub prætextu, quod a sacra rituum Congregatione concessa fuerint, cum lectionibus, et orationibus propriis, et aliquando etiam cum hymnis, responsoriis, & antiphonis, & passim cum majori forsitan ritu per universalem Ecclesiam, aut loca particularia recitanda, impressa conspiciantur, quamvis sacra Congregatio aut ea non concesserit, aut in aliquibus tantum peculiaribus locis, non autem in universa Ecclesia posse ea recitari indulserit; eadem sacra Congregatio hujusmodi attentatis provida sollicitudine consulere volens mandavit, ut dictæ Officiorum concessionibus, lectionibus, orationibus, antiphonis, & responsoriis respectivè, aliisque hujusmodi in posterum a typographo Camerali dimittantur imprimantur; inhibendo omnibus impressoribus seu typographis tam in Ur-

be,

be, quam extra, ubiuis locorum dicta Officia imprimi sub quovis pretextu, causa, & quavis colore, nisi facultate in scriptis accepta ab Inquisitoribus hæretica pravitatis, si inibi fuerint, sin minus, a locorum Ordinariis; qui quidem facultatem hujusmodi non prius concedant, quam originale sumptum sacra ejusdem Congregationis, vel exemplar typographi Cameralis authenticum manu Secretarii firmatum, & sigillo obsignatum ipsis exhibeatur; quod exemplar in nihilo prorsus immutatum, nihilque in eo additum, seu detractum in eo imprimi debeat: Et, si qua ausu temerario contra præsentis decreti tenorem extra Orbem impressa fuerint, ultra poenas ab hac sacra Congregatione infligendas, omni prorsus fide carere voluit & declaravit; mandans propterea omnibus & singulis prædictis hæretica pravitatis Inquisitoribus, Patriarchis, Archiepiscopis, Episcopis, aliisque locorum Ordinariis, ut in sua quisque dioecesi vel provincia sedulo pervigilent, ne quidquam contra superius disposita fiat, aut attentetur, utque præsens decretum, ac omnia & singula in eo contenta ad omnium etiam, quorum specialiter interest aut interesse poterit, notitiam ac certam scientiam deducantur; & ne aliquis illius ignorantia excipi possit, voluit pariter, ac jussit, illud imprimi ac typis mandari, ac pro omnimodo adimplemento, ut præfati locorum Ordinarii in locis consuetis sub penis, & censuris contra transgressores infligendis publicari curent.

24 Præter memoratas hæcenus personas sacrae rituum Congregationi ministrantes, Postulatores causarum etiam adfunt, de quibus alibi tractabitur: nunc enim necessarium solummodo esse videtur adnotare, Postulatores esse illos, qui electi ab universitate, aut cœtu religioso causam Beatificationis, aut Canonizationis promovente, in Romana Curia degunt; præsentque Procuratoribus, & Advocatis; & Cardinales, Consultoresque Congregationis pro juribus suæ causæ alloquuntur. Et quidem nonnulli Consultores dictæ Congregationis hoc munus antehac assumebant; sed hoc eis nunc prohibitum est ex decreto SS. Decessoris nostri Clementis Papæ XII. edito die 11. Martii 1733. Insuper, ut omnis cujuscumque privata & domestica affectionis radix amputetur, Dominique Consultores munus suum illibate & constanter exercent, ac in suffragiis ferendis, prout in Domino judicaverint, libere & indifferenter se gerant; mandat & præcipit Sanctitas sua, nemini ex Consultoribus licere officium, nomen, & partes Postulatoris causarum siue suarum, siue alterius Religionis, civitatis, loci, patriæ, & regionis, etiam sub velamine, quod alter Postulator deputatus jam sit, peragere, minisque causas antedictas aliis Consultoribus, prætextu etiam eos informandi, commendare. Ipsi vero Consultores, tales, qui id audere præsumperint, minime admittant, immo rejiciant, nec cum illis sermonem immisceant, sub eadem poena perjuri, & excommunicationis latæ sententiæ ipso facto incurrenda.

## CAPUT XX.

*De diligentis per Romanos Pontifices antiquiori tempore adhibitis  
in discussione causarum Beatificationis, & Canonizationis,  
& de serie Actorum, qua eadem antiquiori tempore  
pertractabantur.*

**C**Um in superioribus actum fuerit de personis, quarum opera & consilio Romani Pontifices usi sunt, & utuntur pro recta definitione causarum Canonizationis, in præsentis operæ pretium esse videtur, si non omnes, saltem aliquas diligentias exponere, quæ olim a Romanis Pontificibus adhibebantur pro recto examine harum causarum, necnon seriem Actorum, quæ in dictis causis olim erat in usu; ut in capite deinde sequenti, & in aliis subnectendis ordo harum causarum, qui nunc in more positus est, explicetur. Ex quo ordine, ut & ex aliis in hoc Opere passim referendis, scrupulosam, eximiam, diligentissimam Romanæ Sedis curam, quæ in harum causarum examine intercedit, unusquisque facile cognoscere poterit. Cum verò antiquiori tempore non semper, uti nunc fere semper, Beatificatio Canonizationem præcefferit, hinc est, quod in enarrandis antiquioribus diligentis initium desumetur ab eis, quæ Canonizationes ipsas respiciunt, tum in capitis fine alia pauca subduntur de ceteris ad Beatificationem pertinentibus.

2 Si ea igitur resumantur, quæ in superioribus dicta sunt de Canonizationibus peractis per Romanos Pontifices in Conciliis, ipsorum diplomatum lectio patefacit, quid tunc ageretur. Canonizatio S. Udalrici facta est in Concilio Lateranensi a Joanne XV. & quomodo res se habuerit, dignoscitur ex diplomate: *Cumque perlecta esses visa prædicti sanctissimi Episcopi, ventum est ad miracula, qua sive in corpore, sive extra corpus gesta sunt, videlicet cecos illuminasse, demones ab obsessis corporibus effugasse, paralyticos curasse, & quamplurima alia signa gessisse, qua nequaquam calamo & atramento illustrata sunt; qua omnia, lepida satis urbanitate expolita, recepinus; & communi consilio decrevimus, memoriam illius, idest S. Udalrici Episcopi, affectu piissimo & devotione fidelissima venerandam.*

3 B. Gerardus Tullenis Episcopus canonizatus fuit a S. Leone IX. in Concilio Romano; & in diplomate Canonizationis narratur, plures testes tunc etiam in humanis fuisse fidem facientes de miraculis a Deo ejus intercessione patratis: *Unde adhuc plures testes existunt, quod & idem, post mortem carnis, cum Christo Domino nostro spiritu vivens & glorians, sæpe operatus est, & sæpe adhuc operatur curans diversas languores, diversasque infirmitates.* Porro additur in eodem diplomate, venerabilem Monachum nomine Albizonem, qui Synodo intererat, hortante Udone Tullenis Præposito, preces ad Deum effudisse, ut sibi ostenderetur, cujus meriti apud ipsum effect



esset Gerardus, qui tot miraculis coruscabat, eique Gerardum apparuisse, & se in numero Sanctorum apud Deum esse, revelasse; ipsumque Leonem IX. visionem hanc Patribus in Synodo congregatis unà cum vita & miraculis plene retulisse, & tunc concordii suffragio Gerardum inter Sanctos relatum fuisse.

4 Beatus Godehardus Hildensheimensis Episcopus canonizatus fuit ab Innocentio II. in Concilio Remensi, petente Bernwardo ejusdem Ecclesiæ Episcopo, & attestantibus Episcopis & Abbatibus, qui Synodo intererant, tum laudabilem ejus vitam, tum miracula ejus deprecatione a Deo edita: *Veniens ad Nos venerabilis frater noster Bernwardus Episcopus vester, in plenaria Synodo, quæ Remis per Dei gratiam fuerat congregata, attestatione fratrum nostrorum Episcoporum, et Abbatum, et aliorum, qui secum venerant, sanctæ memoriæ Godehardum Episcopum vestrum laudabiliter vixisse in mundo, et tam in vita, quam post mortem multis miraculis coruscasse, asseruit.*

5 B. Sturmii Abbas Fuldensis ab eodem Innocentio II. in secundo Concilio Lateranensi canonizatus fuit, audita ejusdem vita, cognitis ulterius miraculis, accedente testimonio Episcoporum, qui de partibus Teutonicis venerant ad Concilium: *Nos igitur, audita vita laudabili Beati Sturmii Confessoris, cognitis etiam ex parte miraculis, quæ per ejus merita Dominus operatur, attestatione fratrum nostrorum, qui de partibus Teutonicis advenerant.*

6 In Martyrologio Romano ad diem 15. Augusti mentio fit S. Arnulphi Sueffionensis Episcopi & Confessoris. Vitam autem, & ejus miracula fuisse examinata in Concilio Bellovacensi, quod habitum fuit anno 1120. testatur Molanus in natali Sanctor. Belgii ad diem 16. Augusti: sed, quomodo res se habuerit, & quomodo expletum fuerit examen ipsum, fusius desumitur ex Actis Conciliorum to. 6. par. 2. col. 1101. &c. in super. cap. 8. relatis, ex quibus patet, ad ejus Canonizationem processum fuisse ex historia vitæ, uti animadvertit etiam Baillet in vita hujus Sancti in fine ad diem 15. Augusti: quæ quidem historia fuerat conscripta a Lisiardo S. Arnulphi successore in Episcopatu Sueffionensi, eamque Laurentius Surius inseruit ad diem 15. Augusti pag. 143. tom. 4. ubi idem Lisiardus in prefat. sic loquitur: *De veritate horum, quæ dicturi sumus, nulla cujusquam mens ambigat; quippe cum ea tam diligenter inquisita, & ad liquidum comperta sint ab iis, qui interfuerunt, ut certo constet, omnia esse verissima.*

7 Series Actorum in causis Canonizationis, postquam earum examen extra Concilia a Romanis Pontificibus fieri cœpit, quæque per multa annorum spatia continuata est, refertur in Ordine Romano Cardinalis Cajetani, apud Mabillon in museo Italico tom. 2., tum in libro sacrarum caeremoniarum edito sub Leone X., item apud Ostiensem, & alios juris Canonici Professores in commentariis ad cap. Audivimus de Reliq. & venerat. Sanctor. apud Malvetium, Castellatum de Fara, Roccam, & alios, qui speciales

composuerunt tractatus de Canonizatione Sanctorum; & summa eorum, quæ apud prædictos omnes exponuntur, est hæc, quæ sequitur:

8 *Graves primum viri & auctoritate præstantes Romano Pontifici denuntiant merita virtutesque illius, quem percipiunt a Sede Apostolica canonizari, pro cuius Canonizatione humiles supplicesque preces fundunt, nec id semel ac iterum, sed sæpe multumque repetitis postulationibus exorant ac efflagitant. Nec statim annuit Romanus Pontifex eorum precibus, qui tam grave arduumque negotium expetunt, aut protinus inquisitionem de vita, moribus, & miraculis illius, qui canonizari postulatur, fieri jubet; sed cunctanter, graviter, & quantum sibi temporis opportunum visum est (quod plane in ejus arbitrio constitutum est) distinet negotium, ut diu interpellatus, samam viri consideret, miraculorum frequentiam & continuationem exploret, ut, his diligenter perpensis, tandem diligenter omnia inquirenda decernat.*

*Rursus, si preces supplicationesque instantè apud eum fundantur, & miraculorum frequens continuatio perdurare videatur, tunc Pontifex Fratribus, idest Cardinalibus in Consistorio secreto id proponere consuevit, & aliquibus Episcopis patriæ, vel regionis convicina illius, qui dicitur Sanctus, vel aliis honestis, prudentibus, & integris viris committere solet, ut de fama, & populi devotione, de miraculis, & aliis, quæ merito nuntianda videbuntur, in genere tantum, non speciatim, aut singulatim, nec quoad veritatem quidem, sed quoad communem opinionem & samam, diligenter inquirent; & quidquid super eo negotio invenerint, fideliter Pontifici rescribant & denuntient, simulque judicium suum interponant, num super veritate prædictorum in specie ac individuo committenda inquisitio & indagatio videatur.*

*Ad hæc, si Episcopi illi, aut viri prudentes, quibus id negotium commissum fuerat, talia rescripserint ac denuntiaverint, unde jure optimo in specie veritatis inquisitio committenda videatur, iterum Romanus Pontifex, causa in secreto Consistorio cum Fratribus communicata, rogatisque sententiis, utrum inquisitio hæc committenda sit, necne, definit atque decernit.*

*Præterea, si decretum fuerit, inquisitionem esse committendam, eisdem iterum, vel aliis Episcopis, & bonis viris rescribit, jubetque, ut veritatem inquirent, primum de fama, deinde de vita, postremo de miraculis; idque faciant exactè, diligenter, fideliter, ac prudenter, juxta formam præscriptam articulorum, & interrogatoriorum, quæ diplomate Pontificio inclusa his Commissariis Judicibus transmittuntur. Quidquid vero illi invenerint, obsegnatum, sigillisque suis munitum, inclusum, & bene custoditum ad Romanum remittunt Pontificem.*

*Deinde inquisitio illa in Partibus facta & ad Papam transmissa, in Curia Romana aliquibus Capellanis, vel viris aliis auctoritate præstantibus & prudentibus committitur, eo quidem consilio, ut eam mature considerens, disponant rubricas, titulosque, aut conclusiones inde sument, & judicium suum incorrupte religioseque interponant.*

*Insuper rubricas illas, seu verius conclusiones ex processu inquisitionis collectas*

lectas atque formatas, exacta diligentia adhibita, per se Romanus Pontifex, aut per Cardinales examinat, eorum sententias rogat, atque perpendit, numquid talia exacte probata videantur, propter quæ Canonizatio merito celebranda sit.

Postea vero, his omnibus peractis, si sanctissimo Papa celebranda Canonizatio videatur, id inter Cardinales in Consistorio secreto definit.

Ad hæc, convocatis omnibus Episcopis in Romana Curia presentibus, narrat publice Papa in Consistorio ea, quæ in causa Canonizationis acta sunt. Et legitime probata: definitione vero suppressa, quæ jam in precedenti Consistorio facta est, presentium Prelatorum consilia requirit.

Mox statuitur certus aliquis dies, quo omnes conveniant, certa quoque ecclesia designatur, ut in eam multis ornatam tapetibus, & cereis accensis fulgentem, Papa, Fratres ejus, & universus Clerus, et populus conveniant: ubi concionem habens Pontifex, processum recitat, et probationes commemorat, simulque adstantes ad Deum exorandum et deprecandum hortatur, ut ipsum in hoc tam gravi negotio suo presidio tueatur, ipsique celestem Divinamque virtutem aspiret.

His rite et pie peractis, omnes genibus provoluti devote orant, et cantatur hymnus Veni Creator Spiritus, vel alius hymnus, sive antiphona rei conveniens.

Postquam hæc solemniter sunt decantata, Pontifex ab oratione consurgens definit, illum, de quo agitur, Sanctum fuisse, et Sanctorum catalogo adscribendum, et tamquam Sanctum esse venerandum, et festum ejus certo die colendum.

Postremo, Canonizationis sententia pronuntiata, cantatur hymnus Te Deum laudamus, et Pontifex celebrat Missam in honorem Sancti tunc canonizati.

9 Summa hæc desumpta fuit ad verbum ex Actis Canonizationis S. Didaci lib. 3. cap. 2., & ex Actis Canonizationis S. Raymundi lib. 3. cap. 1. collectis a Penia: cui si superaddantur alia in superioribus recensita, commissionis videlicet, quæ fiebat ut plurimum tribus S. R. E. Cardinalibus, uni ex ordine Episcoporum, alteri ex ordine Presbyterorum, & tertio ex ordine Diaconorum, ut in causa procederent, & relationem Rotæ Auditorum perpenderent & examinarent, atque causa ad Pontificium Consistorium deduceretur, nihil profecto deesse videtur eorum, quæ sunt necessaria pro compendiaria cognitione ordinis olim a sancta Sede adhibiti in tractandis & definiendis causis Canonizationis. Et sane, quamvis pleraque alia in Operis decursu, cum occasio se obtulerit, ad hoc ipsum argumentum pertinentia narranda sint; congruum nihilominus esse videtur, aliqua in presenti capite referre, quæ pro recto causarum examine & definitione a Romanis Pontificibus aliquando mandata sunt, quorum expositioni nullus fortasse alius locus, præter hunc, in ipso Operis progressu assignari commode posset.

10 Summus Pontifex Gregorius IX. non solum constituit, ut testes in causa Canonizationis S. Elisabeth examinandi interrogarentur super omnibus & singulis circumstantiis; puta quomodo sciverint ea, quæ dicunt; num autem sanationes, quæ miraculo adscribuntur, cognoverint infirmos sanitati restitutos; an eos viderint infirmos; una cum aliis, de quibus

bus alibi agetur, & de quibus in ejus epistola apud Raynald. ad an. 1232. n. 10. & ut ille, cui cura demandabatur construendi processum, ante omnia opem Divinam sedulo imploraret, quemadmodum colligitur ex ejus epistola scripta Jacobo Cardinali Sedis Apostolicæ in Hungaria Legato, cui committebat provinciam inquirendi in miracula, quæ patrata a Deo dicebantur intercessione Lucæ Archiepiscopi Strigoniensis. Ab eo (verba sunt ejusdem Pontificis apud Raynaldum ad an. 1233. num. 54.) qui est via. veritas, et vita, postules et implores, ut per suam misericordiam et gratiam aperiat tibi viam, per quam secure incedere valeas, et super his plenius cognoscere veritatem; & ut præterea testes a Judicibus delegatis examinarentur, advocatis ad hoc viris prudentibus & in jure peritis, & aliquando accitis viris religiosis Deum timentibus, sicut ex ejus epistolis editis in causa B. Elisabeth, & B. Ambrosii de Massa, impressis apud VVadingum tom. 1. annal. fol. 445. Et fol. 549.; verum etiam in causa S. Antonii, ad cujus definitionem licet nondum evoluto a morte ejus anno processerit, eumque retulerit in canonem Sanctorum, id tamen nullatenus efficere voluit, detulitque Cardinali obfistenti prædictæ festinationi præter morem sanctæ Sedis, quoad usque certior factus est ab eodem Cardinali se in somnio admonitum fuisse, placere Deo, ne diutius Antonii Canonizatio differretur; uti habetur apud Bollandianos in antiqua vita S. Antonii ad diem 13. Junii, & apud VVadingum ad an. 1232.; & in causa S. Francisci de Assisio, licet ejus sanctitatem probe, dum viveret, cognovisset, præcepit, ut causa ab illis Cardinalibus examinaretur, qui minus erant eidem faventes, teste S. Bonaventura in ejus vita impressa apud Surium cap. 15. tom. 5. ad diem 4. Octob. pag. 55. Sane, cum idem Pastor Ecclesiæ, non solum ex miraculis auditis post mortem, verum etiam experimentis in vita ipsius oculis visis, & manibus contractatis, sanctitatem ejus mirabilem plena fide certificatus agnosceret, ac per hoc in cælis glorificatum a Domino nullatenus dubitaret, ut Christo, cujus erat Vicarius, concorditer ageret, hunc in terris reddere celebrem, tamquam omni veneratione dignissimum, pia consideratione disposuit. Ad omnem quoque certitudinem faciendam orbi terrarum de glorificatione viri sanctissimi, inventa miracula, & conscripta, & testibus idoneis approbata examinari fecit per illos, qui minus inter Cardinales favorabiles negotio videbantur.

11 De hac ipsa diligentia testatur Petrus Galestinus in Actis Canonizationis S. Didaci part. 3. cap. 6. Et quo exploratius sit id, quod queritur, aliquando factum est, ut questionum, quæ ad canonizandi rationem usumque attingunt, Acta fidei & diligentia eorum potissimum Cardinalium concredita commissaque sint, qui illius Sancti, de quo ageretur, Canonizationi maximopere refragerentur. Jam vero Innocentius IV. de S. Stanislai vita inquirendi curam delegavit Raynaldo Cardinali Ostiensi, illius Canonizationem valde admodum impediens, qui deinceps, re tota perspecta, suffragatus est mirifice. Sed exemplum causæ S. Stanislai non videtur facere ad rem, cum eadem causa fuerit commissa Joanni Cajetano Cardinali; difficultates vero, quæ fuerunt in ea excitæ,

tæ, minime ab ipso, verum a Reginaldo Episcopo & Cardinali Ostiensis motæ fuerint, qui deinde miraculo commotus pro celeri & favorabili ejus resolutione pugnavit; ut ex vita conscripta a Joanne Longino Historico Canonizationi contemporaneo habetur, quæ est typis excusa apud Bollandianos ad diem 7. Maji: Cum subito, eodem Joanne Cajetano referente, audiunt (loquitur de Postulatoribus) rem claram & certam, nullaque fuscâ caligine (de quo Cardinalis ipse stomachans grandi commovebatur admiratione) ad ambiguum & infectum recidisse, Reginaldo Episcopo & Cardinali Ostiensi .... Canonizationi viri Dei Stanislai, prosper diuturnitatem & moram temporis a die Martyrii sui effluxi, perseveranter obfistente. Ita pag. 257. tom. 2.: subditque Auctor, ægrotanti Reginaldo apparuisse S. Stanislaum, & eum increpasse, quod se adversarium constituisset Martyrio, & prodigiis in ejus comprobationem a Deo patratiss; tum Cardinalem veniam deprecantem a longa & gravi ægitudine sanitati repente restitutum fuisse, ita ut valens & incolumis statim ad summum Pontificem accesserit, narratoque facto, pro Canonizatione supplicaverit.

12 Sane Innocentius IV. in citata causa S. Stanislai Jacobum Velle-trensem Minoritam in Poloniam misit, ut prototypa Actorum auctoritate Apostolica congestorum a Gnesnensi Archiepiscopo, ab Episcopo Uratislaviensi, & ab Abbate e Lucedio exploraret, ut testes iterum excuteret, atque ut nonnullos senes, qui annos centenos egressi Martyrem agnoverant, examini subiceret, & alia quædam perageret, de quibus in ejus epistola apud Raynaldum ad an. 1252. num. 8. Discretionis tue, auctoritate presentium, in virtute obedientie districte injungimus, ut a dictis Inquisitoribus, si superstites & presentes in provincia fuerint, an sic processerint, sicut sub ipsorum sigillis recepimus, perscruteris; & ipsorum Actorum exempla ad majorem certitudinem tecum portes, satiens presentari tibi eos, qui dicuntur fuisse a diversis infirmitatibus liberati, quos & quot potueris; ac illos duos centenarios, si superstites fuerint, de quibus mentio est in Actis, qui dicuntur ab aliquibus accepisse, vel eorum alterum, quod Sanctum noverunt eundem, & de ipsius clara & honesta conversatione, dum viveret, audiverunt; inquisiturus ab ipsis, an ita sit: & inspecturus nihilominus devotionem populi, & samam communem super Martyrio, & causa Martyrii, necnon & sanctitate ipsius. Inquiras insuper, utrum Cracoviensis diocesis pagani, & Ruthenis schismaticis sit confinis; ut per hoc ex ipsorum confinio lucrum provenire valeat animarum. Ad hæc, librum chronicorum, quoad capitulum pertinet ad negotium memoratum, ex archivo Ducis Polonia editum; & etiam librum annalium, & epitaphium considera diligenter: et his summatim sub obtestatione juramenti, ubi tibi visum fuerit, coram prioribus Inquisitoribus præsenti, plenius intellectis, si aliqui testes super prioribus, vel novis articulis tibi fuerint presentati, eos juratos secundum formam recipiendorum testium prudenter recipias, et diligenter examinare procures; et sic instructus ad Nos, ut per te super iis instruiamur plenius, revertaris. Datum Perusii vii. Kal. Junii, anno ix. Et de Clemente IV. qui

memo-

memoriam S. Heduvigis inter Sanctos consecravit, habetur apud Jo. Dlugossium seu Longinum *com. 1. histor. Polonia lib. 7. col. 781.* quod missi e Polonia viri graves impensius negotium sollicitare coeperunt, et non tam testimonio hominum absentium per Commissarios Apostolicos receptorum, verum etiam multorum in Curia Pontificum usi, frequentius Papam Clementem, et coetum Cardinalium de ipsius Canonizatione fatigaverunt; consentientibusque Cardinalibus fere omnibus, solus Papa Clemens cum majori maturitate gravitateque negotium acturus, rem in diem extrahendo differebat, sanctitatem B. Heduvigis novo aliquo signo experturus. Et expertus tandem est in filia ipsa sua, quam, ut idem Longinus refert, Clemens ex legitima conjugē suscepē, dum fortis adhuc laicalis esset: illam enim jamdiu luminibus orbatam sanitati atque expeditæ videndi facultati, Heduvigis ope, Deus extemplo restituit, dum Pontifex etiamnum cunctaretur Heduvigem canonizare.

13 De B. Gregorio Papa X. habetur, quod in causa S. Ludovici IX. Galliarum Regis, antequam quidquam ageret, per litteras exquisivit a Gaufrido e Bello loco Ordinis FF. Prædicatorum, qui fuerat Regis Confessarius, ut sibi vivendi modum aperiret, quem in omnibus & singulis actibus Ludovicus Rex retinuerat; quemadmodum constat ex ejus epistola apud Raynaldum ad an. 1272. num. 59. *Clara memoria Ludovici Regis Francorum præcelsa merita recolentes, de beatitudine vite sue, quæ ceteris Principibus orthodoxis beate vivendi præbebat exemplum, tanto majoris adhuc percipimus suavitatis odorem, quanto ipsum, quem virum pura mente dileximus, revocatum ad patriam recentiori memoria resinemus. Verum, licet de vite modo, quem, sui Redemptoris beneplacita prosequendo, servabat, habuerimus in parte notitiam; cupientes tamen, quod modus hujusmodi Nobis plenius innotescat, in iis potissime, quæ secretius agebantur, devotionem tuam rogamus & hortamur assente, per Apostolica tibi scripta mandantes, quatenus satisfaciens devota sollicitudine votis nostris, prædictum vivendi modum in omnibus & singulis actibus, & observantiis suis, nil ultra, quam fuerit, addito, sed veritatis pure servata substantia, seriatim Nobis, et secreto sub tuo sigillo, quam citius poteris, per certum nuntium scribere non postponas. Volumus autem, quod apud te verbum remaneat nemini referendum.*

14 De Bonifacio Papa VIII. quid ipse egerit, & quid factum fuerit tempore suorum Antecessorum in eadem causa S. Ludovici, testatur ipse Pontifex in concione, quam habuit in Consistorio, quæ typis est impressa apud eundem Raynaldum ad an. 1297. num. 58. ubi, post multa expolita, ait: *Tempore vero Domini Nicolai IV. commissum est negotium tribus aliis Cardinalibus, Domino scilicet Ostiensi, Domino Portuensi, et Nobis in statu Cardinalatus adhuc existentibus, quia mortui erant illi Cardinales, quibus negotium prius fuerat commissum; postea etiam mortuo Domino Ostiensi, subrogatus fuit sibi Dominus Sabiniensis; et ita per tot, et toties examinatum est, rubricatum, et discussum negotium, quod de hoc plus factum est de scriptura, quam unus asinus posset portare: Nos et de manu propria scripsimus, et diligenter examinavimus, multa miracula fuisse sufficienter probata.*

15 Pleraque alia ex eadem concione erui possunt; sed multo plura deduci possent ex bullis Canonizationum SS. Bernardini, Osmundi, Leopoldi, & Antonini in *novo codice Canonizationum*, ut ostendatur, multa adhuc fuisse a Romanis Pontificibus demandata ultra causarum ordinem supra expositum, per quæ maxima, qua fieri posset, diligentia, & semota quacumque fraude, veritas in eis elucesceret. Verum hæc adduxisse sufficiat, cum alia, sicut antea dictum fuit, aliis in locis hujus Operis sint exponenda.

16 Hinc itaque transeundo ad Beatificationes, prætermisiss illis, quæ ab unoquoque Episcopo fiebant in sua diocesi, quibus quidem certum est præcessisse examina jam supra memorata, & restricto sermone ad Beatificationes a solis summis Pontificibus factas, postquam ad eos delatum est jus privativum Dei servos referendi in album Beatorum: audiui aliquando qui assererent, eos nimia facilitate olim indulgisse Beatitatis honores, & permisisse, ut hic, vel ille Dei servus uno, vel alio genere publici cultus in aliquo determinato loco coleretur, addita solum salutari clausula, quod per ejusmodi facultatem Dei servus non censeretur canonizatus. Admitto & ipse profecto clausulæ adjunctionem, cujus sæpe infra mentio fiet, & de qua hic tantum adnotare fas sit, eam a Clemente VII. appositam fuisse suis litteris Apostolicis expeditis die 2. Februarii 1527. & die 15. Junii 1530. in quarum primis indulget Ordini Prædicatorum in regno Poloniæ, ut possit Officium recitare, & Missam celebrare in honorem Hyacinthi in Sanctorum album deinde relati a Clemente VIII. in ultimis vero eamdem facultatem extendit ad omnes Cathedrales prædicti regni; quæ res non modice animos Polonorum conturbavit, quippe qui forte putaverant, per Officii & Missæ concessionem eum inter Sanctos censendum esse relatum, uti colligitur ex litteris Sigismundi I. Regis ad Pontificem scriptis die 15. Martii 1530. juxta ea, quæ plene habentur in Actis Canonizationis prædicti Sancti Romæ editis anno 1594. a Fr. Severino de Cracovia causæ Procuratore pag. 234. & seqq., & pag. 244.; sed nihilominus contendo, non obitante clausulæ adjunctione, nunquam Romanos Pontifices indulgisse Beatitatis cultum in honorem alicujus servi Dei, nisi causa cognita, hoc est vel positis monumentis fide dignis, vel præmisso processu super virtutibus, Martyrio, aut miraculis, sive idem auctoritate ordinaria, sive auctoritate Apostolica esset confectus; idque etiam, antequam instituta esset sacrorum rituum Congregatio, quæ novam rationem causarum Beatificationis, & Canonizationis introduxit, de qua in sequentibus capitulis loquimur.

17 Verum, ut assumptum hoc plene demonstretur, operæ pretium est prænoscere, Romanos Pontifices aliquando nonnullos Dei servos beatificasse per se, aliquando autem aliis commississe, ut, his, aut illis comprobatis, auctoritate Apostolica denuntiarent, Dei servum inter Beatos recensendum, atque hoc, illudve genus publici cultus eidem adhiben-

dum. De Innocentio IV. fertur, quod inter Beatos retulerit Petrum Gonzalez, vulgo S. Telmum, teste Abrahamo Bzovio *ad an. 1246, num. 3.* sed, cum bulla adhuc reperta non sit, & cetera contemporanea desint monumenta, testibus Bollandianis *tom. 2. Aprilis pag. 389.* ignoratur, quomodo Beatificatio peracta fuerit. Innocentium V. inter Beatos retulisse Gregorium Papam X. perpenfis miraculis ejus intercessione a Deo patris, alibi videbitur. Innocentium VI. cognita vita, & miraculis, beatificasse Gregorium Veruculensem, constat ex ejus Apostolicis litteris inclusis in sepulcro Beati una cum ipsa vita & miraculis, uti videri potest apud Bollandianos *tom. 1. Maji pag. 536.* Eugenium quoque Papam IV. insignissimi miraculi fama commotum, inter Beatos retulisse, ut infra memorabitur, Andream Corsinum; atque edoctum vitam & miracula Ambrosii Sanfedonii id ipsum erga eum præstitisse, plenissime habetur ex iisdem Bollandianis *tom. 2. mensis Januarii p. 1070. & pag. 1076. & tom. 3. Martii pag. 245.*

18 Plures insuper Beatificationes per summum Pontificem Leonem X. editæ sunt, Francisci videlicet de Paula, Margaritæ de Cortona, Elisabethæ Reginæ Portugalliæ, ut aliæ multæ prætereantur. In Apostolicis autem litteris, quibus Beatum declaravit Franciscum de Paula, indulsit quidem, ut annis singulis Fratres Minimi possent Officium celebrare, festum agere, & imaginem publice expositam in suis ecclesiis retinere, sicuti docet Breve expeditum primo Pontificatus anno, & impressum in Actis Bollandianis *tom. 1. mensis Aprilis pag. 165.* sed præcesserat examen testium de vita & miraculis receptorum ex commissione Julii II. summi Pontificis, ut habetur ex documentis relatis *cit. tom. 1. pag. 122. & pag. 148.* Civibus similiter Cortonenfibus idem Leo concessit, ut publice venerari possent B. Margaritam cum solemnitate & Officio unius Sanctæ nec virginis, nec martyris, donec ad ejus Canonizationem ventum fuisset; sed, præter insigne prodigium integritatis corporis, & optimi odoris, suavis ultra omnem naturalem odorem, a beato corpore manantis, licet ab obitu essent delapsi ducenti decem & novem circiter anni, præter publicam vocem & famam sanctitatis ac miraculorum, & continuum populorum concursum ad ejus tumulum, præter frequentium miraculorum ejus intercessione a Deo factorum attestationem ex Apostolicis litteris Bonifacii VIII. & Eugenii IV. desumptam, facta fuerat exhibitio processus constructi a Præposito ecclesiæ Cortonenfis executore deputato a prædictis Romanis Pontificibus, uti legitur in Brevi Beatificationis Beatæ Margaritæ, nunc Sanctæ per memoratum Leonem X. expedito anno tertio Pontificatus, & exhibitio occasione Canonizationis ejusdem. Quod vero attinet ad B. Elisabetham, non modo editæ ab ejus morte historiæ heroicam ejusdem vitam referebant, sed etiam præcesserat legitime comprobata miraculorum fama, antequam Leo ad preces Emmanuelis Portugalliæ Regis concessisset, ut in ecclesiis & monasteriis civitatis, & diocesis Conimbricensis



centis recitari posset Officium in ejus honorem, & ejus imago in ecclesiis retineri, uti legitur in relatione trium Rotæ Auditorum ad Urbanum VIII. titulo *de sanctitate vite in genere*. De Clemente item Papa VII. jam supra visum est, quid egerit pro cultu B. Hyacinthi: sed, antequam concessio fieret, nedum exhibita fuerat a Sigismundo I. Poloniæ Rege Leoni PP. X. ejus vita, verum etiam præcesserat processus, quem tribus Cardinalibus, & duobus Rotæ Auditoribus idem Clemens dederat examinandum, sicut habetur in Actis supra citatis Fr. Severini de Cracovia pag. 158. & pag. 234. Paulus denique Papa III. Conventibus & Monasteriis Ordinis Prædicatorum vivæ vocis oraculo per attestationem Joannis Cardinalis Burgenfis comprobato, anno 1542. benigne concessit, ut Officium recitare possent in honorem tunc Beati, nunc Sancti Raymundi de Pennafort, uti legitur in vita ejusdem Sancti scripta a Francisco Penia Rotæ Auditore pag. 252. Verum nedum prædictus Pontifex patracionem miraculorum cognoverat ex relatione fide dignorum, sicuti constat ex ipso oraculo vivæ vocis, sed Episcopi quoque Barcinonenses statis temporibus auctoritate sua ordinaria processum construxerant super vita & miraculis, ut Canonizationem impetrare possent, anno videlicet 1279. sicque quatuor annis ab obitu Sancti, & anno pariter 1318. quemadmodum bene observavit Penia in opere citato pag. 115.

19 Afferenda nunc sunt Beatificationum exempla a Romanis Pontificibus factarum non per se, sed per suos Delegatos: etenim per hæc etiam singularis anterioris diligentæ profecto apparent argumenta. Hyacinthus S. R. E. Cardinalis, & per totius Hispaniæ circulos Sedis Apostolicæ Legatus, qui postea ad Pontificatum evehctus Cælestini III. nomen assumpsit, anno circiter 1170. dum visitabat monasterium Cellanovenſe in Gallæcia, solemnem fecit translationem corporis S. Rudesindi, Indulgentiis indictis iis, qui actui interessent, & ceteris absentibus, quos die commemorationis festi illius quotannis celebrandæ interesse contigisset. Translatio hæc in Actis dicitur Beatificatio; sed ad eam Legatus non devenit, nisi prævio examine, & habito multorum Præsulum consilio, quemadmodum legitur in citatis Actis apud Bollandianos tom. 1. mensis Martii pag. 118. ubi habentur hæc verba: *Quod ut perfectius persiceret, primo de multorum Præsulum consilio, prævio vitæ examine, & miraculorum frequentia, S. Rudesindum inter sancta Ecclesiæ Catholica Beatos adnumeravit*. Extat adhuc processus Beatificationis B. Notkeri editus a Canisio tom. 6. antiquarum lectionum, eique insertæ sunt Apostolicæ litteræ Julii Papæ II. missæ Episcopo Constantiensis, quibus exponit sibi plura narrata esse de sanctitate & miraculis prædicti servi Dei, sibi supplices precesuisse porrectas pro facultate eum publice colendi, se certam non habere narratorum notitiam, seque idcirco committere & mandare prædicto Episcopo, ut in præmissis, super quo ejus conscientiam onerabat, faceret, ordinaret, atque decerneret, prout sibi faciendum esse videbatur; cum edictione tamen, ne per

quodcumque circa præmissa fecisset & decrevisset, unquam Notkerus canonizatus censendus esset. Centum itaque, & quadraginta quatuor testimonium dicta & assertiones super vita & miraculis recepta sunt; hisque receptis, Episcopus delegatus concessit, ut die mortis Beati, Missa & Officium tamquam de Confessore recitarentur in monasterio S. Galli, atque in ecclesiis & capellis eidem monasterio subjectis, repetita clausula, quod per hæc ille canonizatus non censeretur; uti plene habetur in citatis Actis apud Canisium. Extant apud Bollandianos Acta Beatificationis B. Conradi Placentini, tertii Ordinis S. Francisci *tom. 3. Februarii pag. 160.* In eis habetur Breve Leonis X. inscriptum Episcopo Syracusano, sive ejus Vicario generali in spiritualibus, in quo, post narratam humilem petitionem incolarum & habitatorum Terræ Neti diocesis Syracusanæ pro facultate venerandi Conradum tamquam Beatum, & post expositionem quod nonnulli processus confecti fuerant super ejus vita & miraculis auctoritate ordinaria, mandat Delegato, ut de præmissis expositis se diligenter instruat, atque, si servatis servandis, vera esse repperit, auctoritate Apostolica petitam indulgeat facultatem. Delegatus pro executione rescripti Apostolici nedum testes vidit jam antea examinatos auctoritate ordinaria, sed ulterius ad novum aliorum testimonium examen devenit; compertaque expositorum veritate, auctoritate Apostolica petitioni benigne annuit. Paulus demum Papa III. in suis litteris Apostolicis typis impressis apud Bollandianos *tom. 1. mensis Aprilis pag. 380.* mandat Joanni Antonio Pullioni, ut in petitionem sibi factam a juratis Judicibus, & universitate hominum Terræ Xicli diocesis Syracusanæ de facultate exhibendi publicum cultum in honorem Guillelmi Cusfittella olim ejusdem Terræ incolæ, non sine sanctitatis ac miraculorum fama defuncti, sedulo inquireret, &, quatenus exposita veritati inniterentur, annueret petitis; addita tamen clausula, quod per hæc Guillelmus non putaretur canonizatus. Examina testimonium a Delegato facta integra habentur apud Bollandianos *loc. cit. ubi etiam pag. 393.* legi potest concessio facta auctoritate Apostolica a Delegato celebrationis festi, & recitationis Officii cum oratione propria in honorem prædicti Guillelmi.

## CAPUT XXI.

*De Consistoriis, qua olim cogeantur pro definiendis  
causis Canonizationis.*

**E**Xpletis omnibus, quæ erant extra Consistorium explenda, & de quibus in superiori capite actum est, causæ proponebantur in Consistorio coram summo Pontifice. Scire autem opus est, duplex tunc habitum fuisse Consistorium; alterum, in quod conveniebant soli S. R. E. Cardinales; alterum subsequens, in quod conventus fiebat Cardi-

Cardinalium, Archiepiscoporum, Episcoporum, & Præsulum apud Sedem Apostolicam degentium. In primo Consistorio examinabatur causa, pro qua Capellani Papæ laboraverant, & summus Pontifex de Cardinalium consiliis requirebat, an esset ad Canonizationem procedendum: quatenus autem visum fuisset procedendum esse, definitio hæc sub secreto inter Cardinales permanebat, teste Cardinali Ostiensi in cit. cap. *Audivimus, de Reliq.*, & *venerat. SS. sub num. 5. Rubrica sic facta examinantur cum exacta diligentia per Dominum Papam, & Fratres; & requirit Papa consilia eorumdem, an videantur probata talia, propter que sit Canonizatio non immerito facienda; si videatur Domino Papa, quod facienda sit, definit hoc secreto primitus inter Fratres.* Et ad hoc quidem Consistorium respexisse videtur Auctor carminum de Canonizatione S. Petri Cælestini sub Clemente V. apud continuatores Bollandianos ad diem 19. Maji pag. 478. tom. 4.

*Intulit hunc celebrem mundo, terrisque colendum*

*Esse Patrem, sacrum Confessoremque vocari*

*Decrevit, prudenter agens, cauteque recensens*

*Præteritum. Clausim sunt hæc decreta &c.*

2 In hoc ipso Consistorio non solum Pontifex Cardinales alloquebatur, & eorum consilia requirebat, neque solum Cardinales examinabant rubricas confectas a Capellanis; verum etiam legebantur testium depositiones tum super virtutibus, tum super miraculis; ut habetur in Ordine Romano Jacobi Cardinalis Cajetani sub Clemente VI. apud Mabillon. *musæ Ital. tom. 2. pag. 419. Postea in Consistorio in presencia Domini Papa, & aliorum Dominorum Cardinalium, singulariter & singillatim leguntur depositiones testium super vita & miraculis productorum; primò enim leguntur depositiones testium super vita productorum. Lectis & diligenter auditis per Dominum Papam & Cardinales, antequam ad aliud procedatur, Dominus Papa de consilio Cardinalium determinat, utrum vite excellentia illius, de quo agitur, sit plene probata, vel non; et, ipsa determinatione facta, proceditur modo prædicto ad lecturam miraculorum, et depositionum testium super ipsis miraculis productorum. Notandum tamen, quod, lecta in Consistorio depositione cujuslibet testis super quolibet articulo, vel saltem testium melius probantium, Dominus Papa de consilio Cardinalium definit, utrum illi testes plene probent articulum, de quo agitur, vel non; vel utrum . . . Et hæc scribi debent ibidem per unum de Dominis Cardinalibus, de quo Domino Papa placuerit; quibus omnibus factis, et diligenter per Dominum Papam et Cardinales examinatis, Dominus Papa debet inquirere consilia ipsorum Cardinalium, et petere ab eis, an videantur probata talia, propter que sit Canonizatio merito facienda; et, si facienda videatur, Dominus Papa ibidem in Consistorio secreta inter Cardinales definit, ipsam Canonizationem esse faciendam. Similia leguntur apud Auctorem; qui rituum formulis præerat anno 1347. juxta Raynaldum ad annum prædictum, atque in Ordine Canonizationis Sanctorum anno 1494. (tom. 3. collect. concil. Britan.) tum in bulla Canonizationis S. Vincentii Ferrerii sub Pio Papa II. narratur, tempore Calli-*

Callisti III. lectas fuisse depositiones testium in Consistorio; deinde ex more dicta ipsorum testium facis in duobus Consistoriis generalibus publice recitari. In eodemque etiam Consistorio onus erat Cardinalium deputatorum causæ merita exponere; quemadmodum legitur in bulla Canonizationis S. Bernardini sub Nicolao V. Fecimusque, per venerabiles Fratres nostros S. R. E. Cardinales per Nos deputatos, omnia per nuntios reportata in secreto Consistorio nostro diligenter particulariterque referri, quæ per Consistorium examinata sunt; sed propter gravitatem rei visum est, in aliud Consistorium differri, ut, tempore medio, quilibet Cardinalis in domo sua posset illa diligenter intueri: et in secundo Consistorio, scrutatis omnium votis, in eandem sententiam convenerunt; item in bulla Canonizationis S. Catharinæ Senensis sub Pio II. Sed pro veteri consuetudine tribus ex Fratribus nostris S. R. E. Cardinalibus; uni Episcopo, alteri Presbytero, reliquo Diacono, viva vocis oraculo commisimus, ut, debitis habitis processibus de vita et moribus ipsius Catharinæ, deque miraculis ejus sive in vita, sive post mortem patratis, & de reliquis ad Canonizationem necessariis diligenter inquirerent, Nobisque in secreto Consistorio, ut moris est, fidelem relationem facerent: Quod profecto pro regula statutum fuisse videtur in libro sacrarum cæremoniarum edito sub Leone X. qui nomen præferebat Christophori Marcelli Archiepiscopi Corcyrensis, licet re vera fuerit compositus ab Augustino Patritio Piccolomineo Episcopo Pientino, uti colligitur ex epistola Paradis de Grassis typis impressa apud Mabillon. in mss. Ital. tom. 2. In prædicto quippe libro sacrarum cæremoniarum ita legitur sect. 6. cap. 1. Cum placuerit Sanctissimo Domino nostro, referant (sermo est de Cardinalibus Episcopo, Presbytero, & Diacono, quibus causæ committebantur) in secreto Consistorio; & primo de excellentia vite, et fidei puritate; qua si judicabuntur Collegio bene probata et digna sanctificatione, tunc procedent ad narrationem et probationem miraculorum; et de consensu Cardinalium finiet summus Pontifex, vitam et miracula, quæ ita erunt, sufficienter esse probata; deinde deliberabunt, an, quæ probata sunt, videantur talia, propter quæ merito sit discernenda Canonizatio.

3 Hæc quoad Consistorium, ad quod S. R. E. Cardinales tantummodo vocabantur: quoad aliud vero, cui, præter Cardinales, intererant etiam Episcopi, & Præsules apud Sedem Apostolicam degentes, ut his insuper innotesceret status causæ, & comperta essent merita ejusdem, sermo in eo habebatur a summo Pontifice, teste Cardinali Ostiensi in cit. cap. Audivimus sub num. 5. de Reliq. & venerat. SS. Coadunatis Episcopis, qui sunt presentes in Citria, narrat publice in Consistorio ea, quæ acta sunt & probata, secreta definitionis jam facta suppressa, & requirit consilia Prælatorum. Quod fusius porro describitur ab Auctore carminum de Canonizatione S. Petri Cælestini sub Clemente V, apud Bollandianos loc. cit. De concione siquidem habita a prædicto Pontifice sic ait:

..... Deinceps  
Advocat in mediam, qua se protendit in anlam

Regia,

*Regia, Pontifices varios, cunctosque ministros  
Romana Sedis, necnon prasente Senatu  
Fatur: Et immensos suscepimus ecce labores,  
Et Fratres nostri pariter, quod nosse putamus  
Vos etiam. Quasita prius depromimus ecce,  
Et vitam, moresque sacros, firmataque scimus  
Testibus indubie Petri miracula quondam  
Mirronis; qua scita palam, nec clausa tenemus  
Ad Fidei incrementa sacra, vestramque salutem.  
Pauca tamen reclusit apex; quin cautius idem,  
Neve magis, vel forte minus dicendo labaret,  
Singula diffuso promi dictamine jussit.*

- 4 De Suffragiis autem latis ab Episcopis ita subjicit:  
*Illicet ardentes positi sub limite Sedum  
Pontifices laudanda canunt, mirandaque pandunt,  
Quisque loco residens, alternatimque resurgens  
Quisque loco, & rogitant. Pensum procedere rectum  
Iudicium Ecclesia, cunctis gaudentibus una,  
Ructavere omnes, dignum & consendere Divum.  
At Pater, auditis placidis rumoribus, inquit:  
Nec Sedi voti est, soli cui dicere festum  
Competit, aut nostro tantis subducere honori;  
Sed volumus summis Fratrum concernere dictis;  
Quodque pius nobis dignabitur, atque refundes  
Ipse Deus, prompte complebimus; huncque profusus  
Flectite vos animis; facere hoc praeordia possunt.*

5 Subsequentibus temporibus consueverunt Romani Pontifices septem, aut octo Praesules deligere, qui in Consistorio, ad quod Cardinales, & Episcopi vocabantur, universam causae Canonizationis seriem perorando exponerent; quemadmodum plene desumitur ex supra saepe citato Ordine Romano Cardinalis Cajetani in quo sic legitur pag. 420. *Assignatur per Dominum Papam certa dies ad aliquem locum aptum ad hoc, ubi convenire habeant idem D. N. Papa, et Cardinales, et alii Pralati de Curia, ac Clerus, et populus; et interim extra Consistorium deputantur per Dominum Papam octo, vel septem Pralati ad minus, de quibus eidem Domino nostro Papa videbuntur, faciendum, qui dicta die assignata habeant publice predicare. Habet etiam idem Dominus noster Papa ordinare gradus inter ipsos Pralatos, qui predicare habebunt, ut videlicet talis primo predicet, et talis secundo, et sic de aliis. Consvenerunt enim dicta dies assignari per unum mensem ante, vel per tres septimanas ad minus, ad finem. quod praedicti Pralati diligenter collationes suas potuerint studuisse, quas ipsa die assignata succinse et breviter in publico facere habebunt. Conclusiones vero dictarum collationum debent esse tales, videlicet, quod ostendant per rationes, quod dicta Canonizatio est merito facienda, et supplicent dicto Do-*

*mino*

mino nostro Papa, ut facere dignetur eandem. Idem deinde Auctor, prosequendo suam narrationem, exponit pag. 421. modum quo perorationibus Præfulum dabatur initium: *Quibus residentibus* (loquitur de Papa, Cardinalibus, Episcopis, & aliis) *surgere habet Procurator huiusmodi negotii existens ex opposito dicti Domini Papa, et, assumpta sibi aliquali auctoritate, narrare debet aliqua de huiusmodi negotio, et supplicare ipsi Domino nostro, ut Sanctitas sua audire dignetur aliquos Prælatos, qui super prædictis predicare intendunt, et nihilominus, quod placeat Sanctitati sue definire illum, de quo agitur, esse Sanctum, et Sanctorum catalogo adscribendum, et tamquam Sanctum esse a Fidelibus venerandum, ac festum ejus anno quolibet perpetuo certa die, de qua ipsi Domino nostro Papa videbitur, celebrandum; et, huiusmodi supplicatione per dictum Procuratorem facta, surgat ille Prælatus, qui primò predicare, seu collationem suam facere debet, juxta ordinationem jam dictam, et incipiat collationem suam, et eam prosequatur succincte et breviter; qua finita, surgat secundus, et faciat similiter, et sic de aliis. Concordat Auctor, qui rituum formulis præerat anno 1347. ut ex ejus opere habetur impresso apud Raynaldum ad dictum an. num. 36. et 37. hujusque ritus antiquioris compendiosa habetur commemoratio in libro sacrarum caeremoniarum Archiepiscopi Corcyrensis loc. cit. In huiusmodi Consistorio, ut apud antiquos codices legimus, solebant sex, aut octo Prælati successive orare, narrantes merita canonizandi, et supplicantes pro Canonizatione. Advocatus autem in principio tantummodo petebat a Pontifice, ut Prælati audirentur, et supplicabat, ut Canonizatio decerneretur.*

6 Quia vero, fortasse experientia teste, deprehensum fuit difficile in uno eodemque Consistorio Præfulum perorationes fieri, & suffragia Cardinalium, & Episcoporum apud Sedem Apostolicam degentium exquiri posse, tertium superadditum fuit duobus supra recensitis Consistorium; in quorum primo, sicuti dictum est, Papa scrutabatur consilia Cardinalium, in secundo fiebant perorationes, in tertio denique perquirebantur suffragia Cardinalium, & Episcoporum apud Sedem Apostolicam existentium: tum in locum tot perorationum, quæ a Præfulis fiebant, substituta fuit oratio unius ex Advocatis Consistorialibus, in qua vita, miracula, & series Actorum totius causæ copiosè exponerentur: & quia propter strepitum astantium aliquando accidebat, ut Episcopi, qui suffragium in ultimo Consistorio ferre debebant, Advocati Consistorialis orationem habitam in secundo Consistorio bene intelligere non possent, introducta fuit consuetudo, ut Consistorialis Advocatus in tertio Consistorio summam referret ea, quæ fusc in secundo exposuerat, ut insuper summus Pontifex de statu ac meritis causæ sermonem faceret, & ut Rotæ quoque Auditores, sed præsertim causæ Commissarii, interessent, qui difficultatibus, quæ excitarentur, possent satisfacere.

7 De substitutione orationis faciendæ ab Advocato Consistoriali in locum tot orationum, quæ fiebant a Præfulis, loquitur Penia in vita S. Raymundi lib. 3. in observat. ad cap. 36. Ceterum in melius hanc consuetudi-

nein reformatam satis docet sacrarum caeremoniarum usus, quo cessat multiplicatus illorum Prælatorum orantium strepitus. Quod autem ad Advocatum Consistorialem attinet, id ex antiqua satis consuetudine receptum est; cum enim ante aliquos sæcula causæ graves in Consistorio tractarentur, solis Advocatis Consistorialibus dicendi in Consistorio facultas erat. Atque inde retenta consuetudo, ut non nisi aliquis de collegio Advocatorum Consistorialium has orationes habere soleat. Sed illud præterea observari vidimus, si in collegio Advocatorum Consistorialium sit aliquis Advocatus de dominio illius Principis, qui sanctum petit canonizari, ille eligatur, ut oret; ut in hac causa, (videlicet S. Raymundi) Bernardinus Scottus Mediolanensis, pro qua intercedebat Rex Hispania Dux Mediolani. Et merito quidem dictum fuit a Penia, ex antiqua consuetudine, habita ratione temporis, quo scribebat, receptum fuisse, quod Advocatus Consistorialis in publico Consistorio de Canonizatione peroraret. In Canonizatione enim S. Bonaventuræ sub Sixto Papa IV. oratio facta fuit in publico Consistorio ab Octaviano celebri tunc temporis Advocato Consistoriali, teste Jacobo Volaterrano auctore contemporaneo apud Raynaldum ad an. 1482. num. 46. Die Mercurii post festâ Paschalia, qui fuit decimus eiusdem mensis, nempe Aprilis vocati sunt Patres in publicum senatum, qui coactis fuit in anteriori majori aula Pontificia. Relatum est in eo de mortis, et vitæ sanctimonia viri, et Patris Beatissimi Bonaventuræ, quem inter Sanctorum cœtum plures Reges, nationes, et populi referendum esse, summis precibus a Pontifice et sacro Patrum senatu efflagitabant. Orationem vero habuit de ea re clarissimus Iuriconsultus et senatorius Advocatus Octavianus; atque hæc ejus oratio typis mandata est tom. 2. opusculi S. Bonaventuræ. Item in Canonizatione S. Francisci de Paula sub Leone X. Angelus Cæsius oravit in publico Consistorio, quemadmodum legitur in bulla Canonizationis §. 37. Et de Advocato pariter Consistoriali intelligenda sunt verba libri sacrarum caeremoniarum Archiepiscopi Corcyrensis loc. cit. Fit post hæc publicum Consistorium, in quo Pontifex cum pluviali rubeo et mitra pretiosis residet, et Advocatus causa longa oratione proponit vitam, gesta, et miracula canonizandi, et demum supplicat nomine Principum et populorum, qui de ea re scripserunt, bona memoria talem adscribendum esse a sua Sanctitate in catalogum Sanctorum Christi, neque a cunctis Fidelibus pro sancto veneretur decernendum.

8 De repetitione vero compendiaria faciendi ab Advocato Consistoriali in tertio Consistorio, postquam in secundo suscipiam habuerat orationem de statu & meritis causæ, verba facit Jacobus Volaterranus in Canonizatione S. Bonaventuræ sub Sixto IV. apud Raynaldum ad an. 1482. num. 46. Postquam etenim, juxta supra expostita; Jacobus retulit, fuisse in secundo Consistorio habitam orationem ab Advocato Octaviano, quæ propter strepitum frequentissimi senatus vix potuit audiri, licet maximopere sue ric commendata ab illis, qui eam audiverunt, sic prosequitur: *Paucis cum respondisset Pontifex, commisit Prælati omnibus in Romana Curia existentibus, ut et ipsi de meritis B. Patris edocti in primo senatu ea tantum causâ cogen-*

do-sententiam dicerent. Die igitur Veneris, qui secutus est, (sunt enim duodecima mensis Aprilis) vocati in consilium fuere non Cardinales modo, sed Episcopi omnes, Abbates, & Iudices Rota Palatina, Religionum quarundam Pralati, & Procuratores earundem generales. Consilii locus fuit major aula supra primam Palatii portam, quæ in S. Petri aream spectat. In senatu iterum oravit Oñavianus, quem dixi; & quia priori senatu a paucis fuerat per strepitum auditus, eandem, ut audio, orationem recitavit cum summa attentione & commendatione. Rogati postmodum Episcopi, & ceteri sententiam dicere, Cardinalibus silentibus, Præsulum quisque, prout loco præerat, ita sententiam dixit. Et consentit bulla Canonizationis ejusdem Sancti. Clarius postea id ipsum apparet ex Canonizatione S. Francisci de Paula sub Leone X. fuisse enarrata in diariis Paridis de Grassis ceremoniarum Magistri, & apud Raynaldum ad an. 1519. num. 77. & 78. In secundo etenim Consistorio, cum Advocatus Consistorialis breviter sic locutus esset: Cum in publico proximo Consistorio coram tua Beatitudine, Reverendissimis DD. Cardinalibus ... de patria, parentibus, vita, moribus, et viginti quinque illustribus in specie, aliisque fere innumerabilibus in genere miraculis B. Francisci de Paula, ut ex Actis liquido apparet, dixissem ... tua Beatitudo, pro sua singulari pietate et clementia, desuper mature deliberare velle, dignata sunt respondere; eisdemque Pralatos, ut ea in re cogitarent, diligenterque adverterent, Deumque orarent, ne Ecclesiam errare pateretur, monuit. Cum autem, Pater Beatissime, non dubitem, per omnes monitioni tua Beatitudinis satisfactum, hancque rem jam tot testimoniis probatam, totque oculis spectatam, totque etiam palpatam manibus, totiesque, et etiam a multis præstantissimis viris, et ultimo a tribus Reverendissimis Cardinalibus diligenter studioseque cognitam et examinatam, ulteriori discussione nullatenus indigere, sed ad expeditionem ipsam veniendum sit; propterea supplico ... ut ad eam expeditionem devenire, opusque tam sanctum, Leoneque X. dignum perficere dignetur; Pontifex nonnulla subdidit de causæ gravitate, & de negotii arduitate, tandemque conclusit, se audire velle suffragia Cardinalium, & Episcoporum: Quocirca vos universos Fratres, et presentes, quos jam pridem desuper mature præcogitare monuimus, in Domino affectuose requirimus, conscientias vestras onerantes, ut secundum Deum, cujus res principaliter agitur, quidquid singulis sentitis, libere proferre velitis.

9 Hujus ejusdem repetitionis testimonium extat in bulla Canonizationis S. Bennonis sub Hadriano VI. & in bulla Canonizationis S. Antonini sub Clemente VII. De eo autem, quod attinet ad summi Pontificis allocutionem, & interventum Rotæ Auditorum, præsertim vero eorum, qui fuerunt causæ Commissarii, hæc habentur in libro sacrarum caeremoniarum edito nomine Archiepiscopi Corcyrensis sub Leone X. loc. cit. Post hæc, cum placuerit Sanctissimo Domino nostro vocentur omnes Pralati Curia in secreto Consistorio cum Pontifice et sacro Collegio, et ibi proponat breviter Sanctitas sua, ad quid vocati sint; deinde, si placet, per Advocatum faciat summam repeti vitam et miracula canonizandi, et quæ sunt probationes in genere tantum: Post



*Post hac narret, quanta cum diligentia & fide inquisitio, & processus super hac re factus sit, de multiplici & canonica attestazione, de instanti Principum & populorum postulatione. Et demum conscientiam illorum onerando, exquirat singillatim a quolibet suam in ea re sententiam; & cum omnes finierint, agit gratias de bono consilio, & hortatur eos, ut orent Deum, ne finat, se errare in tanto negotio; & sic omnes recedunt ... Poterunt interesse aliqui Protonotarii ordinarii, ut sint rogati de his, quæ gerantur. Aderunt etiam Auditores Rotæ, et maxime Commissarii causæ, ut, si quid esset declarandum, possint, ut bene informati, mentes aliorum declarare. Sequitur Rocca de Canonizatione SS. cap. 37. Quapropter Franciscus Penia in Actis Canoniz. S. Didaci lib. 3. cap. 15. ait: Non oportuit tunc quidem ab Auditoribus Rotæ aliquid rogare, cum super processu nulla exorta fuerit, aut excitata controversia, quæ illorum explicatione & industria indigeret. Hoc enim consilio Auditores potissimum illi, ad quos iudicandi processum cura mandata est, advocari solent. Protonotarii vero ad fidem exhibendam circa ea decreta, quæ in eo Consistorio censentur, solum rogandi erant.*

10 Huc usque adducta Beatificationes, & Canonizationes respiciunt; vel, ut aptius loquamur, diligentias, quæ antiquiori tempore, & ante institutam sacrorum rituum Congregationem a Romanis Pontificibus adhibebantur, antequam Beatificationis, aut Canonizationis honores servis Dei, aut Beatis indulgerentur. Sed, cum nonnulla, tamquam publicæ & notoriæ assertiones, ab aliquibus prolata sint, & proferantur, & scriptis etiam mandentur, quæ, nisi explicentur, aut examinentur, recensitis ipsis diligentis per Romanos Pontifices factis obstat posse videntur, necessarium est pro absoluta materiæ cognitione, eadem narrare, sincere exponere, necnon explicare, & pro cuiusque ratione refellere.

11 De Joanne itaque XXII. fertur, Ordini Prædicatorum obtulisse, unum se ex Dei servis Ordinem ipsum professis canonizaturum, quem ejusdem Ordinis proceres elegerint. Deducitur id ex epistola Petri de Palude Ordinis FF. Prædicatorum Vicarii in Capitulo generali apud Pamplonem congregato scripta Jacobo Aragonum, Valentiniæ, Sardinie, & Corsicæ Regi 29. Maji 1317. ex Regio archivo Barcinonensi desumpta, & relata in vita S. Raymundi de Pennafort, edita a Francisco Penia Rotæ Auditore lib. 3. cap. 13. *Progenitorum vestrorum ad dictum Ordinem nostrum affectio singularis ducit nos multipliciter & inducit, quod, licet ex Ordine prædicto collegerit Deus flores pulcherrimos in gloriam regni sui, fratres videlicet plurimos, quos celestibus dotavit virtutibus, & miraculorum multiplicium & magnarum evidentissima gratia claros fecit; tamen volentes pro viribus procurare ... B. Fratrem nostrum Raymundum Generalem Magistrum nostri Ordinis antedicti, quem non solum vestri regni singularem alumnum providentia Dei Patris produxit in lucem, quasi generale virtutum exemplar, verum & totius universalis Ecclesiæ fecit per canonicarum sanctionum disertissimum directorem, SS. P. D. N. summo Pontifici unanimiter duximus canonizandum offerre, qui se canonizaturum obtulit unum, quem duxerimus eligendum.*

12 At, si omnia perpendantur, nimia Canonizandi facilitas, quæ ex prædicta deducitur epistola, evanescet: ex ea quippe non legitime argui potest, Joannem Pontificem promississe; se illum Sanctorum fastis adscripturum ex Ordine Prædicatorum Religiosum, quem Ordo ipse canonizandum obtulisset; sed unum tantum ex illis, quem cælestes virtutes, & miraculorum gratia insignem fecissent, quemadmodum recitata epistolæ verba clare demonstrant: cumque proinde nec substantialia pro Canonizatione requisita, nec sedulum eorum examen fuerint exclusa, nimia facilitatis Joannes nec potest, nec debet redargui. Attendendum insuper, quod tunc multi beati viri de Prædicatorum Familia meritis præclarissimi occurrebant, de quorum Canonizatione agi poterat, Reginaldus videlicet de S. Ægidio, Joannes Vicentinus, Conradus Teutonicus, Laurentius Anglus, Manes Hispanus, Jordanus Saxo, Jacobus Huton, Joannes, & Nicolaus Hungari, Guillelmus Arnoldus, Pontius Hispanus, Thomas Aquinas, Hyacinthus Polonus, Ambrosius Sanfedonius, Guido Longimellus, Paganus Mergobensis, Albertus Magnus, ut ex dicti Ordinis annalibus bene animadvertit Penia in *secunda observatione ad dictum cap. 13. lib. 3.* in quo propterea rerum statu unusquisque facile sibi suaderet poterit, promissionem Joannis nihil aliud fuisse, quam providam insinuationem factam Ordini Fratrum Prædicatorum, ut is ex pluribus Beatis, quos Canonizationis honore dignos reputare poterat, vnum eligeret, cujus causa proponeretur & discuteretur, quemque in Sanctorum album ipse retulisset, nisi defuissent requisita pro ejus Canonizatione ad normam sacrorum canonum obtinenda. Additur in comprobationem prædictorum, quod in promissionis executionem Ordo obtulit Joanni canonizandum B. Raymundum, quem ipse utique non canonizavit, cum fuerit in album Sanctorum relatus a Clemente VIII. Canonizavit autem Joannes Thomam de Aquino, nihil obstantibus promissione, & supplicatione Ordinis pro B. Raymundo: quod quidem evidentissimum signum est, promissionem non fuisse debitæ rationibus atque modificationibus destitutam.

13 Examinandum sequitur famigeratum illud, quod Cardinalem Bessarionem dixisse ferunt, se valde dubitare, utrum vera essent, quæ a Majoribus de Sanctis antiquis prodita fuerunt; cum nonnullos suo tempore vidisset in album Sanctorum relatos; quorum vitam ipse in eorum causis suffragium ferens improbaverat: quod utique dictum aliquando usurpatum fuit in suffragiis aliquorum sacræ Congregationis rituum Consultorum, & typis impressum etiam in animadversionibus Fidei Promotorum, ut ceteris suaderent, magna cum maturitate procedendum esse in causis Beatificationis, & Canonizationis. Sed, si id pariter ea qua decet, diligentia ponderetur, admodum dubito, num prædictum effatum a Cardinali Bessarione manarit. Inclitus ille Cardinalis juxta nonnullos ex hac vita decessit die 18. Novembris 1472. sed juxta alios die 14. Decembris 1473. Plura extant ejusdem Opera; veruntamen in eis effatum ipsum

ipsum neutiquam reperitur. Primus porro, quem sciam, qui illud propalaverit, nullo tamen prolato testimonio, fuit Guillelmus de Bellai scriptor sæculi xvi. Composuit hic historiam suorum temporum in octo partes, seu libros distributam; Martinus vero ejus frater commentariis rerum Gallicanarum, quæ publici juris fecit, inseruit libros quintum, sextum, & septimum Operis a Guillelmo Fratre compositi. Itaque in præfatione loquitur de historiæ utilitate atque necessitate; cumque plura referat mendacia a recentioribus historicis prolata, maximum hinc asserit damnum derivari in antiquioris temporis historicos, exemplo allato Cardinalis Bessarionis, qui se de Sanctis antiquis dixit dubitare, cum viderit nonnullos suo tempore in Sanctorum album referri, quorum virtutes minime approbaverat. Per eandem omnino semitam processit Joannes Bodinus, qui in sua methodo ad facilem historiarum cognitionem cap. 4. ait: *Ferendum quidem esset (loquitur de historico) si pro salute Reipublice mentiretur, id, quod Magistratibus Xenophon & Plato permisissent, sed assentationis causa mentiri cum omnibus turpe, tum vero historicis turpissimum.* Nam, ut Bessario Cardinalis, cum inter Divos inepta quadam apotheosi Romæ quamplurimos referri videret, quorum vitam improbat, se valde dubitare dixit, *utrum vera essent, quæ ab antiquis prodita fuerint; ita mendaces historici faciunt, quo minus fidei reliquis habeatur.* Effatum ergo Cardinalis Bessarionis Guillelmo de Bellai, atque Joanni Bodino innicitur; idque oppido facit, ut rationabiliter dubitari possit, num illud fuerit a Cardinali prolatum; tum quia, juxta prudentiæ regulas, quæ a recentiori Auctore de factis, aut dictis antiquorum, nullo adducto contemporanei, & fide digni scriptoris testimonio, referuntur, contemnuntur; tum quia, juxta ejusdem prudentiæ regulas, Auctoris probitas in primis est perpendenda, ut videatur, utrum ejus dictis fides sit præstanda, necne. In eo namque, quod attinet ad Guillelmum, ut ab ejus moribus referendis absteineamus (teste quippe Bayle in suo dictionario historico & critico, Guillelmus omnem lapidem movit, ut nonnullos Universitatis Parisiensis Doctores induceret ad opinandum pro justitia divortii injuste petiti ab Henrico VIII. Angliæ Rege) ipsius verba in præfat. ad suas ogdoas. præferunt, eum male de Sanctorum Canonizationibus sensit: *idemque hic accidat* (loquitur de historicis recentioribus falsa referentibus, & sic fidei antiquorum detrahentibus) *quod alia in re merito, & jure optimo dixit Cardinalis Bessario, qui, cum Romæ tot Sanctos, quasi minorum gentium Deos, in Divorum numerum referri conspiceret, quorum vitam moresque parum probaverat, & apotheosim etiam minus probabat; enim vero recentes isti, inquit, Divi efficiunt, ut, quæ de veteribus leguntur, in suspicionem mihi veniant.* Nec enim Canonizatio est inter Deos adscriptio, nec Sancti nostri æquiparari possunt Diis minorum gentium. Quod autem spectat ad Joannem Bodinum, hic de Christiana ipsa Religione male sensit dicitur. Opus enim composuit de abditis rerum sublimium arcanis, in quo omnes Religiones revocat ad examen; instituitque

que inter Christianos, atque Naturalistas, & Judæos disputationibus, Christianos exhibet ab aliis victos & superatos; quapropter nonnullorum opinio est, ipsum vel sine ulla Religione, vel Judæum mortuum fuisse, uti legitur in epistolis Jacobi Gilot lib. 3. *epist.* 48. ad Josephum Scaligerum. De eo insuper sic loquitur Antonius Possevinus *biblioth. select. lib. 1. cap. 26. pag. 130.* *Universa igitur hac tractatione* (sermo est de methodo historiarum per ipsum edita) *hæresim sapit, quod Lutherum, Calvinum, Melanctonem, ceterosque nominet honorifice; historicos item Pencerum, Curionem, & alios usurpet ad faciendam fidem, qui & Hæretici suere, & turpissime in historiis lapsi sunt.* De eodem acrius subdit Hugo Grotius in *epist.* 353. ad Joan. Cordesium pag. 127. quod amicitiam coluerit cum doctissimis Hebræorum, *quæ in illo plenam persuasionem eam, quæ in Christianis requiritur, non parum labefactavit.* In historiis, & testimoniis citandis video, eum a vero sæpe abire, neglectu malo credere, quàm dolo; quamquam interdum vix est, ut doli suspicionem effugiat.

14 Præterquamquod sequentes Beatorum Canonizationes peractæ sunt quo tempore Bessarion Cardinalis erat, Sancti videlicet Nicolai de Tolentino ab Eugenio IV., S. Bernardini Senensis a Nicolao V., SS. Osmundi, & Vincentii Ferrerii a Calisto III., & S. Catharinæ Senensis a Pio II.; & communis quidem omnium Cardinalium consensus in Canonizationibus SS. Bernardini, Osmundi, Vincentii Ferrerii, & Catharinæ Senensis illustria extant testimonia in Constitutionibus super eis per Romanos Pontifices exaratis, cum Canonizationes ipsæ factæ sunt. In bulla quippe Canonizationis S. Bernardini Senensis ita legitur: *Scrutatis omnium votis* (loquitur Nicolaus V. de suffragiis Cardinalium) *in eandem sententiam conveniunt, tantam esse evidentiam & numerum miraculorum, necnon de vita ipsius sanctimonia, ac fidei integritate tam clarum, tamque evidens testimonium, ut in tanti viri Canonizationem animis concorditer sua vota depromerent, quorum secuti judicium, tunc canonizandum esse decrevimus.* In bulla Canonizationis S. Osmundi Callistus III. hæc habet: *Scrutantesque deinde in eodem Consistorio vota omnium venerabilium Fratrum S. R. E. Cardinalium, a omnibus debite recensitis, iidem Fratres nostri in eandem sententiam convenerunt.* In bulla Canonizationis S. Vincentii Ferrerii post obitum Callisti a Pio II. expedita sic legitur: *Idem quoque Callistus Prædecessor dictæ die, videlicet tertia Junii, Pontificatus sui anno primo, in ipsorum Cardinalium, & Prælatorum præsentia, de ipsorum omnium consensu unanimi pronuntiavit atque decrevit, Vincentium præfatum esse canonizandum.* Pius II. denique in bulla Canonizationis S. Catharinæ Senensis ita testatur: *Rogati singulatim tum omnes Cardinales, tum Præfules, qui plurimi affuerunt, sententiam dicere; totis suffragiis beata virgo digna celo & astris declamanda visa est; nec quisquam fuit, qui non magnopere Canonizationem ejus faciendam probaret.*

15 Convenerunt itaque omnes Cardinales in exhibitione publici cultus ad honorem SS. Bernardini, Osmundi, Vincentii Ferrerii, & Catharinæ

næ Senensis ; ita ut quoad hos saltem nequaquam percipi queat , Cardinalem Bessarionem a ceteris Cardinalibus dissensisse . Sola propterea remanet Canonizatio S. Nicolai de Tolentino , in cujus bulla Eugenius IV. minime testatur de unanimi Fratrum assensu , sed tantum dicit , *de Fratrum prædictorum consilio & assensu* . Attamen verba hæc unanimum certe assensum non probant , sed nec eum excludunt ; in quo rerum themate onus est asserentis , dissensum probare Cardinalis Bessarionis . Quamquam urget adhuc pro ejus assensu nimia verisimilitudo deducta ex innocentia vitæ Nicolai ; deinde ex illultri de eo testimonio S. Antonini 3. part. tit. 24. cap. 10. §. 5. *Per sex menses ante obitum ejus omni nocte ante matutinas, auribus corporalibus cantum Angelicum eum Dominus faciebat audire ; & cum esset in ultima ægitudine , quidam visitantes eum a diversis languoribus sanati sunt . Morti appropinquans , vocatis Fratribus , sic eos alloquitur : Quamvis nihil mihi conscius sim , tamen non in hoc justificatum me esse sentio seu cognosco ; & ideo , si quem lesi , si in aliquo quempiam offendi , vos ipsi judicate , & delictis parcite , ut dimittantur & vobis delicta vestra* . Et post plura exposita de felici ejus obitu : *Post mortem ejus , & sepulturam multa miracula ad invocationem nominis ejus facta sunt , cæci multi illuminati sunt , claudi plures erecti sunt , surdi auditum receperunt , loquelam muti non pauci , & (quod maximum est) sex mortui resuscitati per merita ejus ; ex his demum , quæ habentur in ipsa bulla Canonizationis , ubi dicitur Joannem XXII. de ejus Canonizatione coepisse tractare , eamque completurum fuisse , nisi obitus , & horrenda schismata supervenisissent ; itemque miracula tercentum & unum , ad quorum approbationem examinati fuerunt trecenti septuaginta & unus testes , in regestis adnotata , & in publico Consistorio relata fuisse . Prodigium denique sanguinis ex ejus brachio interdum manantis , Cardinalis Bessarionis effatum , quatenus prolatum fuisset , apertissime refelleret ; nec ipsum proferentem vir cordatus nimæ temeritatis absolvere posset ; cum omnes sciant , posse unumquemque in Congregationibus sensum suum libere asserere , sed , ceteris contradicentibus , non esse cuiquam permissum , deliberationem prævio aliorum consilio captam , & sensui suo adversantem dictis convellere . Quod si id sibi vindicat locum in omnibus & quibuscumque rebus , quid dicendum erit in re nostra , quæ adeo sancta est , & in qua Cardinales non sunt nisi Consultores , sed Papa est Judex , quæque potius Divina , quam humana censenda est ? Ad hæc igitur omnia averrenda concludendum est , nec vera esse , quæ de Cardinali Bessarione referuntur , nec ea , tamquam vera , dictis , aut scriptis esse exponenda .*



## C A P U T XXII.

*De serie Actorum in causis Beatificationis, et Canonizationis juxta  
præfens Sedis Apostolica institutum, et de diligentis  
quæ in earum examine sunt.*

1 **A**Ntequam de proposito in hujus capitis inscriptionem dicere instituiamus, duo præmittenda esse videntur; alterum, quod hic series Actorum juxta præsentem Sedis Apostolicæ consuetudinem exponitur quidem, ut uno ictu oculi videri possit quidquid in eorum examine peragitur, at citra tamen præjudicium uberius explicationis in libro sequenti, ubi unaquæque res, quæ hic attingitur, fulius explanabitur; alterum, quod, licet ex ipsa Actorum serie facile colligi possit, quanta sedulitate & maturitate Sedes Apostolica in examine harum causarum procedat, clarius tamen id ipsum apparebit, cum in eodem libro sequenti agatur singillatim de unoquoque Actu, & de uniuscujusque rationibus.

2 Cause itaque Beatificationis, & Canonizationis aliæ sunt Confessorum, aliæ Martyrum; nonnullæ item ex his introductæ erant ante decreta Urbani VIII.; nonnullæ vero post eadem decreta introducuntur; & aliquæ demum procedunt per viam ordinariam non cultus, aliquæ per viam extraordinariam casus excepti a citatis Urbani VIII. decretis.

3 Initio autem ducto a causis Confessorum, quæ introducuntur post decreta Urbani VIII. & quæ procedunt per viam non cultus; præmissis, quod Sedes Apostolica non movetur ad inquirendum, nisi præcedat fama virtutum & miraculorum, & nisi ad normam prædictorum decretorum probatum fuerit, nullum cultum publicum fuisse Dei servo, de cujus Beatificatione, & Canonizatione agendum est, usque ad id tempus exhibitum; bini primum ab Ordinario sua auctoritate ordinaria conficiuntur processus, alter de fama sanctitatis & miraculorum in genere, alter vero super non cultu; idemque Ordinarius sententiam profert super obedientia decretis Urbani VIII. & sic de cultu publico non exhibito: quod adeo verum est, ut, si Ordinarius processum super non cultu confecisset, sententiam autem ipsam non protulisset, eidem a sacra Congregatione demandari confueverit, ut sententiam proferat, prout de jure: & ita sane factum fuit in causa Indiarum servi Dei Dionysii a Nativitate 13. Julii 1675. quemadmodum insuper in sequenti libro videbitur. Veruntamen etiam juxta hodiernam consuetudinem permittitur Ordinario non conficere processum super non cultu, sed alterum tantummodo de fama sanctitatis, virtutum, & miraculorum; ceteri in hoc casu, signata commissione, conficitur postea processus ipse super non cultu auctoritate Apostolica, & sacrorum rituum Congregatio integre pronuntiat super obedientia

dientia decretis Urbani VIII. cultum publicum prohibentibus.

4 Postquam processus hi sunt absoluti, ad Urbem asportantur, & ope Secretarii sacrae Congregationis, cui deferuntur, traduntur Notario, eorumdemque apertio hoc modo perficitur. A Postulatoribus porrigitur supplex libellus sacrae rituum Congregationi ordinariae, in quo petitur, ut ad apertionem procedatur: habet enim sacra Congregatio facultatem consilia concedendi, uti legitur in decretis generalibus Urbani VIII. *Permittit insuper Sanctissimus, ut in qualibet ex Congregationibus ordinariis dissentiantur & terminentur omnia & singula concernentia apertionem omnium & singulorum processuum &c. dummodo de resolutionibus habitis super predictis fiat per dictum Secretarium relatio Sanctitati suae.* Cumque sacra Congregatio, quando annuit petitis, ita respondere consueverit, pro gratia, sive pro apertitione processuum, servatis servandis, apertio ipsa fit, citato Fidei Promotore, & allatis testibus pro recognoscendis tum sigillis, tum characteribus Judicum: testes porro a Notario interrogantur. Horum denique processuum auctoritate ordinaria confectorum apertio fit coram Cardinali Praefecto sacrae Congregationis, juxta decretum editum die 3. Decembris 1650. *Cum SS. D. N. in Congregatione habita coram Sanctitate sua die 13. Julii 1649. decreverit, per Congregationem sacris ritibus praepositam posse aperiri processus servorum Dei cum aliqua sanctitatis, aut Martyris fama, vel opinione defunctorum, auctoritate ordinaria confectos, eidemque sacrae Congregationi exhibitis, ad effectum videndi contenta in illis, et referendi Sanctitati suae, utrum locus sit interpolationi auctoritatis Sedis Apostolicae, signando Commissiones requisitas; Eminentissimi Patres consueverunt, hujusmodi apertiones esse faciendas coram Eminentissimo Cardinali Praefecto, citato R. P. D. Fidei Promotore, et servata forma in decretis super hoc emanatis.*

5 Facta processuum apertione, & obtenta a summo Pontifice delegatione alicujus Cardinalis sacrae Congregationis in Relatorem causae; electisque Interprete, ac Revifore processuum, si extero idiomate confecti fuerint, vel a Cardinali Relatore, vel a Cardinali Praefecto sacrae Congregationis, si forte Cardinalis causae Relator abesset ab Urbe, juxta decreta generalia Urbani VIII. *Quando Cardinales Ponentes causarum erunt absentes a Curia; pro interponendis decretis necessariis in causis hujusmodi, poterit adiri Cardinalis Praefectus pro tempore sacrae Congregationis, ut illa interponat pro Cardinali absente;* deveniendum est ad Operum revisionem, si Dei servus, cujus Beatificationis, & Canonizationis causa introducitur, Opera conscripserit. Sciendum est enim, uti fusius in sequenti libro demonstrabitur, quod non proceditur ad ulteriora in causis Beatificationis, & Canonizationis, nisi recognoscantur & examinentur Opera, quae a Dei servo conscripta fuerunt. Nam, quidquid sit de lege decretorum Urbani VIII., juxta hodiernum morem, si ante signaturam Commissionis deprehendatur, Dei servum Opera conscripsisse, revisio fit eorundem, antequam Commissio ipsa signetur.

6 Si Dei itaque servus Opera conscripserit, & eadem fuerint in sacrorum rituum Congregatione ordinaria revisa & approbata, post lapsum decem annorum a die traditionis processuum auctoritate ordinaria confectorum, fit locus *signaturæ Commissionis*, ut legitur in decretis novissimi Innocentii XI. §. 7. Ideo, si ita Sanctissimo visum fuerit, censuit etiam eadem sacra Congregatio, Commissionem non esse signandam, nisi post elapsum tempus decem annorum a die presentationis processuum auctoritate ordinaria confecti: quæ fecuta, ut plurimum prævio consilio Congregationis ordinariæ sacrorum rituum, cum sancta Sedes dicatur manus apposuisse, nil aliud in posterum fieri potest ab Ordinario, & processus utique, qui subinde ab eodem conficerentur, inanitatis vitio laborarent. Per solam tamen petitionem *signaturæ Commissionis*, nisi Commissio re vera signata sit, dici nequit, quod Sedes Apostolica manum apposuerit; uti colligitur ex decreto edito in causa Vivariens. servorum Dei Jacobi Salefii, & Guillelmi Saltamochii, quod est conceptum sequentibus verbis: In causa declarationis Martyrii Jacobi Salefii, & Guillelmi Saltamochii e Societate Jesu, cum in proxima præterita Congregatione habita coram Sanctissimo institutum fuisset, ut Commissio introductionis causæ per Sanctitatem suam signaretur; verum sufficientem summum Martyrii, & causæ Martyrii, eorumdem servorum Dei adhuc desiderari Sanctissimus censuisset, ex quo tunc legitimis probationibus idem sumus percipi nequiret; Possinator ejusdem causæ plenissimo jure putans, re ad Sedem Apostolicam semel producta, per appositionem manus ejusdem, Ordinariis locorum facultatem in ea procedendi omnino sublatam esse, insinuat, ut sacrorum rituum Congregatio remedium aliquod afferre dignaretur; quæ declaravit, mentem Sanctissimi fuisse, Ordinarii non ob stare, quin iidem valeant uti sua ordinaria auctoritate, die 15. Februarii 1659. Et, facta de hujusmodi declaratione Sanctissimo relatione, Sanctitas sua eam prorsus conformem acta declarationi in prædicta Congregatione asseruit, die 28. ejusdem mensis, eodemque anno 1659.

7 Aperit *signaturæ Commissionis* viam, ut procedatur ad constructionem processuum Apostolicorum. Quocirca, nisi esset confectus ab Ordinario processuum super non cultu, ille auctoritate Apostolica est conficiendus. Postquam enim Sedes Apostolica manum apposuit, non potest, uti diximus, amplius Ordinarius causæ quoquo modo se immiscere, ne gratia quidem, ut habetur ex decretis Urbani, conficiendi particularem processum super cultu non adhibito, qui formandus erit per eum, cui per summum Pontificem, vel per sacrorum rituum Congregationem hujusmodi facultas fuerit delegata. Atque in hoc etiam rerum themate, postquam processus completus est, & postquam Judex delegatus sententiam tulit super non cultu, omnia transmittuntur ad Urbem; & ea, quæ superius dicta fuerunt quoad apertionem processuum auctoritate ordinaria, sibi vindicant locum quoad hunc, alioque processum, qui conficiuntur auctoritate Apostolica; hoc tantum discrimine intercedente inter apertionem processuum auctoritate ordinaria, & apertionem processuum auctoritate Apostolica, quod illius apertio, sicut vidi-



vidimus, fit coram Cardinali Præfecto, hujus autem coram Protonotario, juxta decreta Urbani VIII. *Processus omnes in eadem sacra Congregatione presentati, figillati, & clausi per Secretarium consignari debent Notario ejusdem Congregationis deferendi ad Protonotarium deputatum ad Alia Canonizationis, per quem, præcedente decreto sacra Congregationis, & citato prius Promotore Fidei, servatis servandis, aperiri debent.*

8 Approbato a sacra ordinaria Congregatione judicio sive Ordinarii, sive Delegati super non cultu, Postulatores instare debent pro *litteris remissorialibus*, ut conficiant processum Apostolicum super fama sanctitatis & miraculorum in genere: & petitio quidem hæc fit in Congregatione ordinaria, quæ facultatem habet Judices deligendi, uti constat ex decretis Urbani VIII. *Permittit insuper Sanctissimus, ut in qualibet ex Congregationibus ordinariis discutiantur & terminentur omnia et singula concernentia &c. deputationem, et subrogationem Judicum.* Excepto autem casu, ubi conficiendus sit auctoritate Apostolica processus super non cultu, in quo litteræ inscribuntur uni Episcopo; quotiescunque agitur de processu auctoritate Apostolica construendo, sacra Congregatio inscribit *litteras remissoriales* tribus Episcopis cum clausula, ut duo ad minimum procedant. Fit itaque processus Apostolicus super fama sanctitatis & miraculorum in genere; quæ si per validum processum rite & recte probata sit, & juxta hodiernam consuetudinem per sacrorum rituum Congregationem ordinariam fuerit approbata, transitus fit ad petitionem & expeditionem novarum *litterarum remissorialium*; subinde vero ad processum super virtutibus & miraculis in specie, qui etiam conficitur auctoritate Apostolica.

9 Confecto hoc novo processu, idem ad Urbem transmittitur, & ejus fit apertio juxta modum supra expositum; tum in sacrorum rituum Congregatione ordinaria agitur de ejus validitate; qua quidem approbata, transitus postea fit ad examen momenti, primò autem virtutum, deinde miraculorum. Dubio tamen de virtutibus locus esse non potest, nisi post lapsum quinquaginta annorum ab obitu servi Dei, de cujus Beatificatione, & Canonizatione tractatur; juxta decreta Urbani VIII. quibus in hac parte nunquam intelligitur derogatum, nisi specialiter id in rescripto summi Pontificis expressum sit. En verba decretorum: *Sanctitas sua expresse prohibuit sacra rituum Congregationi, ne deinceps procedat in causis servorum Dei ad effectum Canonizationis, seu Beatificationis, aut declarationis Martyrii, nisi lapsis quinquaginta annis ab obitu illius; quin immo etiam lapsis quinquaginta annis de similibus processibus tam factis, quam faciendis agi vetuit, nisi habita prius, & expresse obtenta licentia a Sanctitate sua, vel ejus successoribus.* Sub decreto hujusmodi vult comprehendi etiam causas, in quibus modo reperiuntur expedita littera remissoriales, & compulsoriales, ac omnes alie nunc pendentes, quæ adhuc expectant perfectionem suam & complementum a facto futuro finalis determinationis. Quod ut firmitus observetur, insuper jubet, ut, si memoriale super hoc directum Congregationi porrigatur cum rescripto Sanctitatis suæ, ut aliqua ex hujusmodi

*causis ad præfatos effectus examinatur, nullum sortiatur effectum, nisi in eodem rescripto specialis prædictæ prohibitionis derogatio reperiatur.*

10 Si elapsi igitur sint anni quinquaginta a die obitus servi Dei, proponitur dubium super virtutibus primò in Congregatione antepreparatoria, secundò in Congregatione preparatoria, & tertio in Congregatione generali: absoluto autem favorabiliter dubio super virtutibus, transitus fit ad discussionem dubii super miraculis, quod pariter ter proponitur, primo scilicet in Congregatione antepreparatoria, deinde in preparatoria, demum in generali. Quod vero attinet ad numerum miraculorum, licet pleræque Beatificationes factæ sint post multorum miraculorum approbationem ( octo quippe fuerunt approbata in Beatificatione S. Andreæ Avelini, quatuor in Beatificatione S. Felicis de Cantalicio, decem & octo in Beatificatione S. Mariæ Magdalene de Pazzis, novem in Beatificatione S. Cajetani, quinque in Beatificatione S. Joannis de Deo, novem in Beatificatione S. Francisci de Sales, quinque in Beatificatione S. Rosæ Limanæ, quatuor in Beatificatione S. Pii V. ) satis tamen est, ut duo miracula approbentur pro Beatificatione obtinenda, teste *Matta de Canonizat. SS. part. 4. cap. 6. num. 9.* Re enim ipsa ad Beatificationem SS. Joannis de Cruce, Francisci Solani, & Alphonsi Mogrobescii Archiepiscopi Limani processum fuit post approbationem duorum tantummodo miraculorum; meque, dum Fidei Promotoris munereungebar, contra stimulum calcitrante, & quantum poteram obnitente, ne Beatificatio servi Dei Francisci Regis fieret ex binis tantummodo miraculis approbatis, sacrorum rituum Congregatio generalis coram sanctæ memoriæ Clemente XI. censuit, prædicta bina miracula ad Beatificationem sufficere; uti colligitur ex responso ejusdem sacræ Congregationis per eundem summum Pontificem approbato die 3. Martii 1716. Et cohærenter quidem huic ipsi consuetudini facta subinde fuit a sanctæ memoriæ Benedicto XIII. Beatificatio servæ Dei Hyacinthæ de Marefcottis post approbata duo tantum miracula, alterum a sanctæ pariter memoriæ Innocentio XIII. die 2. Julii 1722. alterum a Sanctitate sua die 13. Maji 1726. tum etiam a SS. Decessore nostro Clemente Papa XII. Beatificatio servæ Dei Catharinæ de Ricciis, approbatis similiter duobus tantum miraculis, quemadmodum desumitur ex decreto edito die 14. Augusti 1732. Fuit hæc praxis sacræ Congregationis rituum usque ad nostrum Pontificatum, nec nos aliquid quoad ipsam immutandum censuimus, dummodo tamen virtutes, aut Martyrium in causis servorum Dei procedentibus per viam non cultus fuerint probatæ per testes de visu: sed quatenus prædictarum rerum probatio fuerit innixa testibus de auditu, aliisq; probationibus subsidiariis, decretum generale edidimus die 23. Aprilis 1741 alio in loco referendum, in quo statuimus, non sufficere duo, sed quatuor miracula requiri, quæ testibus de visu probata sint pro Beatificatione obtinenda.

11 Non omnia tamen, quæ discutienda proponuntur, dubia in causis  
Bea-

Beatificationis, & Canonizationis ejusdem sunt roboris, & momenti; nec omnia proponuntur coram summo Pontifice; sed coram eo tantum in Congregatione generali proponitur dubium de virtutibus, & miraculis, & an tuto procedi possit ad Beatificationem, & ad Canonizationem, ut infra videbitur: licet resolutionis omnium aliorum dubiorum, quæ proponuntur in Congregatione ordinaria, fiat ipsi relatio per Secretarium sacræ Congregationis; & resolutio quocumque careat robore & efficacia, nisi a summo Pontifice confirmationem obtineat, sicuti supra comper-  
tum est.

12 Communis est Scriptorum opinio, teneri summum Pontificem ex honestate requirere aliorum consilia in arduis, uti bene adnotavit primus & celeberrimus Ecclesiæ meæ Bononiensis Archiepiscopus Cardinalis Gabriel Palæottus in tract. de sac. Consistorii consult. part. 1. qu. 3. qualia procul dubio sunt ea, quæ pertinent ad causas Beatificationis, & Canonizationis, ut antea visum est. Quocirca, si dubiorum minus principalium resolutio, quæ fit in Congregatione ordinaria, pluralitatem habuerit suffragiorum, & rationum momenta, quibus Suffragatores innixi sunt, & quæ, compendio facto, Sanctitati suæ a Secretario exponuntur, eidem placeant; prudenter aget, si resolutionem sua auctoritate confirmet; & id utique in more positum est.

13 Sed subit difficultas quoad dubia magis præcipua, quæ post Congregationes antepreparatorias, & preparatorias coram summo Pontifice in Congregatione generali proponuntur, quæque ut plurimum virtutes & miracula respiciunt. Pontifex enim, qui illis præest, & singula suffragatorum tum Cardinalium, tum Consultorum propriis auribus excipit suffragia, & vel per se, vel per Secretarium sacræ Congregationis unumquodque notat, aut notari jubet suffragium, non consuevit in ipsa Congregatione animum suum aperire; sed actis de more gratiis Cardinalibus sacrorum rituum, qui tanto labore & incommodo causæ studuerunt, & in ea suffragium tulerunt, se eorum orationibus commendat, ut sibi Divinum lumen affluset in re adeo gravi: interea vero Deum orat, & preces indicit, nec omittit quidquid facere potest privato studio, ut veritatem assequatur; ita ut solum quæstio numerum respiciat suffragiorum, utrum videlicet concordia omnium suffragiorum necessaria sit necessitate honestatis, ut Pontifex prudenter agat in approbatione dubiorum super virtutibus & miraculis, an major tantum pars eorundem sufficiat.

14 Non desunt exempla approbationis virtutum & miraculorum, aut etiam Martyrii, a summis Pontificibus factæ præcedente unanimi omnium suffragantium consensu. In Limana tunc servi Dei, nunc S. Thuribii Archiepiscopi, extat decretum editum die 8. Martii 1672 in quo legitur: *Sacra Congregatio unanimi voto declaravit, constare de prædictis virtutibus in gradu heroico.* In causa tunc Beatæ nunc S. Catharinæ de Bononia, extat decretum editum die 18. Januarii 1680. ubi sic legitur: *Sacra Congregatio censuit*

*consensus unanimi voto, ac nemine discrepante, constare de omnibus supradictis virtutibus in gradu heroico.* In causa tunc Beati nunc S. Caroli Borromæi, extat decretum editum die 15. Maji 1610. in quo enuntiatur, quod *nemine discrepante* quatuor miracula fuerunt approbata. In causa Pragensi tunc Beati nunc Sancti Jo: Nepomuceni 12. Januarii 1728. decretum prodiit, in quo dicitur, quod omnes *unanimi voto* ita censuerunt consistere de Martyrio, & causa Martyrii, ut procedendum esset ad discussionem signorum seu miraculorum. Alia similia prostant exempla, quæ tamen prodierunt, cum sacrorum rituum Congregationi sex, aut septem Cardinales, & totidem Consultores essent adscripti. Sed cum hodie ingens, & quodammodo excessivus sit numerus Cardinalium, & Consultorum eidem Congregationi adscriptorum, raro consingit, ut unanimis sit omnium consensus, cum agitur de approbatione virtutum, aut miraculorum, aut Martyrii: & unanimis Suffragantium concordia hodie facile reperitur, cum approbatis virtutibus, aut Martyrio, & miraculis, proponitur dubium, an tuto ad Beatificationem, aut Canonizationem possit deveniri: tunc enim, secuta jam approbatione virtutum, aut Martyrii, & miraculorum, quotquot adversarij sunt prædictorum approbationi, fasces submittunt, & in sententiam veniunt favorabilem Beatificationi, & Canonizationi. Quæ omnia retulisse operæ pretium visum est, ut appareat, non inutile, sed necessarium esse quæsitum de numero suffragiorum necessario, ut Pontifex, prudenter agendo, approbare valeat responsa sacræ Congregationis super virtutibus, Martyrio, aut miraculis. Porro in hac quæstione nonnulli afferunt, majorem partem suffragiorum sufficere juxta regulam textus in cap. 1. ubi Ostiensis num. 4. & Fagnanus n. 5. *de his quæ fiunt a majori parte Capituli.*

15 Accedit per hos, quod major pars gravior etiam præsumitur; Gloffa in cap. 1. in v. *rationabiliter*, ibique Fagnan. num. 4. *de his, quæ fiunt a majori parte Capituli.* Quod si in Congregatione SS. Inquisitionis, atque, quod notabilius est, in ipsis Conciliis generalibus, cum de articulis Fidei definiendis agitur, prevalet suffragiorum pluralitas, & summus Pontifex prudenter agere dicitur, si majori adhæreat suffragiorum parti; veluti, loquendo de Conciliis generalibus, late docent Card. a Turrecremata in sum. de Eccles. lib. 3. cap. 65. Card. Bellarminus tom. 2. *controverf. de Conciliis lib. 1. cap. 18.* Card. Jacobatius de Conciliis lib. 6. art. 3. sub num. 57. Et profecto, teste Card. Pallavicino in *hystor. Concil. Trid. lib. 16. cap. 4. num. 19.* ita res se habuit in prædicta sacrosancta Synodo, in qua sic refert Legatos Apostolicos fuisse locutos: *Dicamo le Signorie vostre con somma brevità per la parola piace, o non piace, se vogliono, o no, che si dichiari, la residenza essere di ragione Divina; acci ch'è, secondo il maggior numero delle voci, e delle sentenze, possano scriverli i decreti, come in questo santo Concilio sempre s'è usato;* potiori jure videtur ipsis, sufficere debere pluralitas suffragiorum, cum res est de definiendis dubiis pertinentibus ad causas Beatificationis, & Canonizationis.

16 Alii volunt, duas saltem ex tribus partibus Dominorum Consultorum, & omnes fere Cardinales Congregationis sacrorum rituum in unum & eundem sensum concurrere debere; juxta ea, quæ refert *Matta de Canonizat. SS. part. 5. cap. 4. num. 21.* ubi, loquendo de approbatione miraculorum, hæc habet: *Super hujusmodi dubio sunt duæ Congregationes, quæ dicuntur preparatoria; in quarum prima votum præbent tantum Domini Consultores, & in secunda coram summo Pontifice dant votum EE. DD. Cardinales, atque etiam Papa. Et, secundum quod observare potui, EE. DD. Cardinales non approbant aliquod factum pro miraculo, seu miraculoso, in quo non concurrant saltem duæ ex tribus partibus Dominorum Consultorum. Et Papa non approbat, nisi concurrant omnes fere EE. DD. Cardinales.*

17 Verum, his omiſſis, tutior & magis consentanea uſui Sedis Apostolicæ est illorum sententia, qui existimant, minime sufficere majorem suffragiorum partem, sed in re, & ad finem, de quo agitur, duas ex tribus partibus omnium suffragiorum requiri, & satis esse; & multo magis, si inter duas ex dictis tribus partibus adsint illorum secunda suffragia, quos summus Pontifex peritiores & aptiores esse judicaverit: ita tamen ut, si de miraculorum approbatione tractetur, duæ ex tribus partibus Suffragatorum conveniant in approbationem hujus, aut illius in individuo facti tamquam miraculo adscripti. Si enim una pars suffragiorum miraculo adscribendam reputaret cæci illuminationem, alia pars sanationem claudi, alia autem pars subitanæ & momentariæ liberationem a morte imminenti cum recuperatione virium; dici non posset, duas ex tribus partibus Suffragatorum approbare unum ex dictis factis tamquam miraculum; sed ad hunc finem opus esset, ut duæ ex tribus partibus miraculo censerent adscribendam aut cæci illuminationem, aut claudi sanationem, aut subitanæ illam & momentariæ cum recuperatione virium liberationem.

18 Quod itaque major pars suffragiorum non sufficiat, colligitur ex gravitate materiæ; & pro hac quidem facit exemplum electionis summi Pontificis. Licet enim olim satis esset major suffragiorum pars, ut habetur in *can. Si transitus dist. 79.* juxta tamen Decretalem Alexandri III. in Concilio Lateranensi editam, duæ ex tribus partibus Electorum requiruntur ex *text. in cap. Licet, de Election.* Nec urget exemplum Congregationis SS. Inquisitionis, aut Conciliorum generalium; quia in illis agitur de causis necessario definiendis, in quarum classe recenſeri non possunt causæ Beatificationis, & Canonizationis.

19 Quod vero duæ ex tribus partibus suffragiorum modo explicato sint necessariæ, comprobari potest ex consuetudine & instituto sanctæ Sedis, quod ego ipse testari possum, qui amplius viginti annos apud summos Pontifices munus exercui Fidei Promotoris. Addendum autem, quod uniformitas suffragiorum propter varietatem ingeniorum, & propter multitudinem Suffragatorum est quodammodo impossibilis, uti bene adnotavit Abbas

Abbas in cit. cap. 1. num. 8. de his, quæ sunt a majori parte Capituli. Deficiente igitur suffragiorum uniformitate, si illorum pluralitas non sufficit, necessarius illico apparet concursus duarum ex tribus partibus.

20 Quod tandem ea, quæ modo dicta sunt, potiori jure sibi vindicent locum, si inter duas ex tribus partibus adsint illorum suffragia, quos aptiores & peritiores summus Pontifex reputaverit, probatur. Quidquid enim sit de jure civili, de jure certe canonico non tam pluralitas, quam præstantia suffragatorum videtur esse opportuna, juxta text. in cap. Ecclesia 57. de Election.

21 Hæc sunt, quæ pertinent ad approbationem tum virtutum, tum miraculorum: quibus tamen addere fas sit, quod summi Pontifices, quando mentem suam volunt aperire super approbatione virtutum, aut miraculorum, ad se vocare confueverunt Secretarium sacre Congregationis, & Fidei Promotorem; tum vero onus est Secretarii sacre Congregationis decretum edere juxta mentem Sanctitatis suæ. Approbatis porro tum virtutibus, tum miraculis, cogitur ultima Congregatio generalis coram summo Pontifice, in qua disputandum proponitur dubium, an, stante approbatione tum virtutum, tum miraculorum, tuto procedi possit ad Beatificationem; atque, auditis tum Cardinalium, tum Consultorum suffragiis, quæ ut plurimum sunt uniformia (præmissis quippe præmittendis, & approbatis approbandis, consequens esse de jure videtur progressus ad ulteriora, hoc est ad solemnem Beatificationem; etsi, siue omnia suffragia sint concordia, siue duæ tantum ex tribus partibus suffragiorum sint uniformes, juxta recentiore sanctæ Sedis consuetudinem, idem valet) summus Pontifex animum suum in prædicta Congregatione minime exprimit, sed iterum astantium precibus se commendat, & opem Divinam implorat: tum denique, si effusis & indictis precibus censet, bonum esse, ut ad solemnem Beatificationem procedatur, accitis iterum Secretario Congregationis, & Fidei Promotore, mentem suam aperit de Beatificatione quandocumque facienda, tandemque diem statuit solemnitatis, & Secretario Brevium mandat, ut litteras Apostolicas expediat in forma Brevis cum clausulis, & indultis consuetis.

22 Comprobantur autem hæc ipsa ex sequentibus decretis.

#### VIENNEN. IN GALLIA

*Beatificationis, & Canonizationis Venerabilis Servi Dei Joannis Francisci Regis Presbyteri Professi Societatis Jesu.*

*Decretum super miraculis.*

**D**ie 28. Aprilis 1715. Dominica in Albis hora circiter 16. SS. D. N. Clemens Decima providentia Papa XI. in palatio Quirinali advocavit R. P. D. Prosperum de Lambertinis Fidei Promotorem, & me infra scriptum Prosecretarium

rinum Congregationis sacrorum rituum, nobisque dixit, elapsis diebus, videlicet die 2. labentis mensis in Congregatione habita coram Sanctitate sua propositam fuisse a Reverendiss. D. Card. Imperiali causam Viennen. in Gallia Beatificationis, & Canonizationis Ven. servi Dei Joannis Francisci Regis Presbyteri Professi Societatis Jesu, discussaque in ea dubio, an constet de miraculis post obitum in casu, & ad effectum de quo agitur, Sanctitatem suam audivisse quidem omnium suffragia, sed distulisse resolutionem, ut prius de more in tam ardua deliberatione Divinam opem imploraret. Nunc vero, cum id peregerit, ac praesertim praeteritis diebus majoris hebdomade, ac successively Paschalibus festis supremum luminum Patrem ferventius exoraverit, ut caelesti claritate mentem suam illustrare dignaretur, declaravit, se nolle diutius differre publicationem suae resolutionis; adeoque publicari jussit decretum in quo pronuntiavit, constare de duobus miraculis tertii generis; nempe de primo repentinae liberationis Joanne Mariae Peret Monialis a diuturna inferiorum artuum ad motum impotentia, & hydropo tympanite; ac de quarto instantanea sanationis Joannis Gasparis Montereymar Aniciensis ab enormi hernia. Et ita &c.

### VIENNEN. IN GALLIA

Beatificationis, & Canonizationis Venerabilis Dei Servi Joannis Francisci Regis Presbyteri Professi Societatis Jesu.

#### Decretum Beatificationis.

Cum, postquam alias, nempe die 15. Martii 1712. in Congregatione generali sacrorum rituum habita coram SS. D. N. Clemente Divina providentia Papa XI. proposita per Reverendiss. Card. Imperialem causa Viennen. in Gallia Beatificationis, & Canonizationis Ven. servi Dei Joannis Francisci Regis Presbyteri Professi Societatis Jesu, discussum fuisset dubium, an constaret de virtutibus ejusdem servi Dei tam Theologalibus, scilicet Fide, Spe, & Charitate, quam Cardinalibus, nimirum Prudentia, Justitia, Fortitudine, & Temperantia, earumque respective annexis in gradu heroico, & in casu & ad effectum &c. Sanctitas sua die 27. ejusdem mensis Martii Resurrectioni Dominicae sacra, decrevit, constare de virtutibus tam Theologalibus, quam Cardinalibus in gradu heroico &c. Ac subinde, postquam scilicet prius, nempe die 2. Aprilis 1715. in ipsa generali Congregatione habita coram Sanctitate sua propositum fuisset in praedicta causa aliud dubium, an constaret de miraculis post obitum ipsius servi Dei in casu, & ad effectum &c. eadem Sanctitas sua die 28. praedicti mensis Aprilis pronuntiaverit, constare de duobus miraculis tertii generis, nempe de primo repentinae liberationis Joanne Mariae Peret Monialis a diuturna inferiorum artuum ad motum impotentia, & hydropo tympanite, ac de quarto instantanea sanationis Joannis Gasparis Montereymar Aniciensis ab enormi hernia. Demum vero, iterum habita Congregatione generali praefata coram eodem SS. D. N. die 3. Martii currentis anni. in eaque per praedictum D. Card. Imperialem proposito dubio, an, stante appro-

tione virtutum, & duorum miraculorum, tuto procedi posset ad ipsius servi Dei Beatificationem, dicta Congregatio unanimi omnium consensu affirmative respondendum esse censueris; verum dictus SS. D. N. resolutionem de more distulit, ut in re tam gravi, & maxima cum maturitate pertractanda, antequam quidquam decerneret, tam suis, quam aliorum precibus Divini luminis opem imploraret.

His jam abunde impletis, Sanctitas sua, accitis infra scripta die coram se R. P. D. Prospero de Lambertinis Fidei Promotore, ac me prædicta Congregationis Secretario, ut memoratus servus Dei Joannes Franciscus Regis pie ac palam a Christianis colli possit, ac Societas Jesu, quæ illum protulit, de Ecclesia Catholica ceteroquin optime merita, præclaro hoc addito lumine, in dies magis illustretur, præsens decretum Beatificationis ejusdem Joannis Francisci, per litteras Apostolicas in forma Brevis cum consuetis indultis quandocumque faciendæ, expediri & publicari mandavit. Hac die 7. Maji 1716.

23 Hæc est Apostolicæ Sedis consuetudo sub sanctæ memoriæ Clemente Papa XI. a qua utique ne latum quidem unguem recedendum esse existimo: nihil enim ea accommodatius rei gravitati, & implorando Divino auxilio reperiri potest. Auctorem quoque habet ipsum Clementem XI. summum Pontificem, quem profecto doctissimum, diligentissimum, & rerum Divinarum peritissimum quotquot cum eo negotia pertractarunt, vel ejus Opera edita legerunt, fassi sunt. Testari ipse possum, me initio ejus Pontificatus tamquam sacri Consistorii Advocatum cum ipso de Canonizatione S. Catharinæ Bononiensis mæx concivis egisse; me quoque ab anno 1708. Fidei Promotoris munere ab eo cohonestatum, & usque ad ipsius obitum eodem munere fungentem, centies & eo amplius de aliis Beatificationum, & Canonizationum causis a Sanctitate sua aut inchoatis, aut absolutis multum meditatumque sermonem cum eo habuisse; nec unquam ab ejus audientia recessisse, quin plura, & quidem non exigui, sed magni momenti didicissem. Testari possunt, quotquot adhuc vivunt, seu Cardinales sacris ritibus præpositi, seu Consultores Congregationis, qui sub ejus Pontificatu Congregationibus coram ipso habitis interfuerunt, quam apte, quam doctè, quam pie in illis loquertur. Si adhuc viverent, testari possent bonæ memoriæ Inghiramus, & Collicola postmodum Cardinalis, tunc Congregationis Secretarii; testari itidem posset Reverendiss. Nicolaus Tedeschi Archiepiscopus Apamenus eodem munere Secretarii functus, quanta eloquentiæ vi, quanta eruditione, quanto ingenii acumine Clementem XI. sive de Judiciis ordinatoriis, sive de virtutibus, Martyrio, aut miraculis differentem, disputantem, objectis respondentem suspexerimus, cum ab eo vocabamur, ut nobis mentem suam aperiret super propositis causarum dubiis: ita ut non possim non vehementer commoveri, cum aliquantum immutatum post ejus obitum observaverim sacræ Congregationis institutum. In Beatificationibus quippe ab ejus obitu factis, de quibus alibi habebitur sermo, post approbata mira-



miracula, editum est decretum miracula ipsa approbata recensens, & Beatificationem indicans quodcumque faciendam per litteras Apostolicas in forma Brevis cum consuetis indultis; rescata aliquando intermedia Congregatione post miraculorum approbationem facienda, an, stante tum virtutum, tum miraculorum approbatione, tuto ad Beatificationem deveniri possit. Dictum tamen est *aliquando* tantum; quandoquidem post obitum ejusdem Clementis aliquando etiam retenta fuit consuetudo edendi decretum approbans miracula, cogendi deinde Congregationem generalem, & in ea disceptandi dubium, An, stante miraculorum approbatione; tuto deveniri posset ad Beatificationem; uti desumitur ex decretis editis in causa B. Hyacinthæ de Marefcottis *die 13. Maji, & die 14. Julii 1726.*

24 Unica illa sub Clemente XI. absoluta est causa Beatificationis, videlicet servi Dei nunc Sancti Jo: Francisci Regis, in qua modo visum est quid factum fuerit. Quare tantum addendum est, quod, quamvis in sacrorum rituum Congregatione actum non fuisset de locis, in quibus Missa, & Officium celebrari, & recitari possent in honorem beatificandi; Pontifex tamen, qui sacrorum rituum erat peritissimus, &, ratione muneris Secretarii Brevium Apostolicorum a se, dum in minoribus erat, magna cum laude exerciti, omnia & singula perfectissime sciebat, quæ ad Apostolica Brevia pertinerent, litteras Apostolicas in forma Brevis composuit super Beatificatione prædicti servi Dei Joannis Francisci Regis, atque in dictis litteris tum ritum Officii, tum locos, in quibus Missa, & Officium celebrari, & recitari possent, feliciter expressit; tum etiam pro sua eximia humanitate easdem ante publicationem perlegit coram Archiepiscopo Apameno supra nominato sacræ Congregationis Secretario, & me tunc Fidei Promotore, ut pro nostrorum munerum facultate libere diceremus, quæ dicenda esse crederemus: cumque omnia ad normam instituti sacrorum rituum Congregationis, & Sedis Apostolicæ æque & ad amissum fuissent a tanto Pontifice in suis Apostolicis litteris indulta, nec Secretarius, nec ego habuimus Sanctitati suæ quidquam referendum. Sane olim ante Beatificationem, ut infra videbitur, in sacrorum rituum Congregatione agebatur de ritu, & de locis, in quibus fieri debebat concessio Missæ & Officii in honorem beatificandi: sed, quatenus huic mori non sit adhærendum, id bene suppleri potest aut a summi Pontificis peritia, aut a peritia Secretarii Brevium. Id ipsum quippe ut plurimum pendet ab usu, qui ex lectione aliorum Brevium facile hauriri potest.

## CAPUT XXIII.

*De nonnullis ad institutum Congregationis sacrorum rituum spectantibus, quæ ante tempora sanctæ memoriæ Clementis XI. vigeant.*

**N**E quid intactum relinquatur, nunc exponenda est consuetudo, quæ vigeat ante tempora sanctæ memoriæ Clementis XI. quæ quidem cum non esset uniformis, sed varia, ex hoc ipso clarius apparebit, consuetudini sub eodem Pontifice introductæ firmitus esse adhærendum.

2 Olim itaque proponebatur, terminato iudicio super virtutibus, & expletis Congregationibus præparatoriis super miraculis, dubium de iisdem miraculis in Congregatione generali coram summo Pontifice. Consultores de more suffragabantur, deinde exhibent ab aula Congregationis, & tunc Cardinales suum præstabant suffragium; postea summus ipse Pontifex de miraculis propositis iudicium ferebat. Quod si Papæ iudicium erat approbans, iterum vocabantur Consultores, & Cardinalis causæ Relator narrabat, jam præcessisse approbationem virtutum, præcessisse etiam approbationem miraculorum eorum videlicet, quæ paulo ante de Cardinalium consilio summus Pontifex approbaverat; proponebatque, an esset procedendum ad Beatificationem. Quando vero suum tulerant Consultores super hac re suffragium, & deinde Cardinales hoc ipsum præstiterant, respondendo quod tuto procedi posset ad Beatificationem; summus Pontifex suum suspendebat iudicium, ut Divinam opem fufus & indictis precibus imploraret.

3: Univerfa hæc facti series defumitur ex Actis Beatificationis S. Francisci Saleſii a Cappello collectis & editis; eademque, compendio facto, exponitur in Intimatione Congregationis coram summo Pontifice Alexandro VII. cogendæ in causa Beatificationis prædicti S. Francisci Saleſii: *Die Martis 29. Martii 1661. in Congregatione habenda coram Sanctissimo primum Eminentiss. D. Card. Franciostus referet dubium super miraculis concordatum, & Sanctissimus accitis Consultoribus, eorum sententias audiet. Mox, iisdem aula Congregationis egredientibus, Sanctitas sua, acceptis DD. Cardinalium suffragiis, declarabit, quæ, & quot miracula concludenter probata censuerit. Post hæc D. Card. Franciostus Sanctissimo supplicabit, ut dignetur de more sententias audire super Canonizatione, seu Beatificatione servi Dei. Tunc Sanctitas sua mandabit, ut Consultores rursus accedant; qui, audito a Sanctissimo quot miracula Sanctitas sua decreverit admittenda, sententias aperient, an censeant, tuto quandocumque deveniri posse, vel non posse ad solemnem servi Dei Canonizationem, & interim indulgeri, vel non, ut Beatus nuncupetur, & de eo, tamquam de Confessore Pontifice, alicubi, verbi gratia, ubi idem Dei servus natus, aut mortuus est, ubi ejusdem corpus conditur, vel a Monialibus Visitationis, & in ecclesiis*

ecclesiis earundem ab eo institutarum, Officium, & Missa recitari, & respectivè celebrari possint. Addendo, si placuerit, quæ magis cogant in affirmativam, vel negativam, sed brevissimis verbis, idemque per DD. Cardinales præstabitur.

4 Confirmatur hæc eadem consuetudo ex decreto edito die 25. Septembris 1674. in Congregatione generali habita coram sanctæ memoriæ Clemente X. in causa Beatificationis S. Francisci Solani: quod quidem decretum est hujusmodi.

### L I M A N A

*Beatificationis, & Canonizationis Servi Dei Fratris Francisci Solani  
Ordinis Minorum Observantium S. Francisci.*

**M**ature discussis in Congregatione sacrorum rituum validitate & relevancia processuum in causa servi Dei Francisci Solani Ord. Minor. Observant. S. Francisci confectorum, iisque comprobatis; necnon consilio de sanctitate vite, ejusque celebri fama, & de heroicis virtutibus Theologalibus, & Moraliibus; demum ad relationem Eminentiss. D. Flavii Cardinalis Chisii in Congregatione habita coram SS. D. N. Clemente Divina dispositione Papa X. cognito, sese mirabilem Deum ostendisse in servo suo; nempe, comprobatis a Sanctitate sua, præviis Consultorum acerrimo examine & sententia, necnon unanimi EE. DD. Cardinalium sacris ritibus præpositorum suffragio, aliquibus clarioribus miraculis, quæ Deus intercessione servi Dei supra totius naturæ creatæ vires & ordinem operari dignatus est, nempe nono Didaci de Sævedra Chirurgi, cui in crure pertinax ulcus, ac prorsus natura insanabile momento evanuit, necnon decimo Joannis Biasæ, qui lethali sanguinis fluxu jam proclamatus, illico sanus evasit: Accitis iterum Consultoribus, eorumque sententia pariter audita, Sanctitas sua, eorumdem DD. Cardinalium unanimi consilio, ex jam approbatis satis constare censuit, Dei servum Franciscum Solanum adeo sanctitate vite, virtutibus, & miraculis coruscasse, animarumque præterea mirifica conversione, ut tuto ad ejus Canonizationem deveniri posset. Tutius tamen interim indulgeri, ut Beatus nuncupetur, & cum Officio & Missa de Comm. Conf. non Pont. juxta rubricas Missalis, & Breviarii Romani dies ejus felices exitus in proximam non impeditam transferenda quotannis pie recolatur: nempe a FF. Minor. Observant. ubique degentibus, & in ecclesiis eorum, ac Monialium ejusdem Ordinis etiam a Sacerdotibus confluentibus. In oppido vero Monillii, in quo servus Dei ortum duxit; & in civitate Limana, unde ad celos evolavit, & ubi sacrum ejus corpus requiescit; necnon in provincia Thecumana, in quam Catholica Fidei nova semina feliciter invexit, ab utroque Clero. Sanctissimus tamen indultum ejusmodi ad solamen Christianidelium, & Ecclesiæ Catholicæ decus omnino conducibile, a Deo precibus & sacrificiis expectandum statuit. Die 25. Septembris 1674.

5 Alias quoque dubium de tuto progressu ad Beatificationem minime fuit

fuit propositum in Congregatione generali coram summo Pontifice, coram quo tantum disputatum fuit de miraculis; tum vero, eorum probatione facta, propositum fuit in Congregatione ordinaria, accitis tamen de mandato Papæ etiam Consultoribus, dubium, an tuto procedi posset ad Beatificationem: ipsq̃ autem affirmanter resoluta, factaque summo Pontifici resolutionis narratione, idem distulit approbationem, ut prius Divinam opem imploraret; uti colligitur ex decreto edito in causa S. Rosæ de Lima.

### L I M A N A

#### *Beatificationis, & Canonizationis Venerabilis servæ Dei Rosæ de S. Maria Tertii Ordinis S. Dominici.*

**S**edente san. memor. Alexandro VII. cum in causa Beatificationis, & Canonizationis servæ Dei Rosæ de S. Maria Tertii Ordinis S. Dominici die 3. Maji 1665. Congregatio sacrorum rituum declarasset, constare de sanctitate vite, necnon de virtutibus in gradu heroico: Præterea die 23. Martii 1666. sacra eadem Congregatio censuisset, septimum ex allatis miraculis probationibus redundare: Subinde vero, die videlicet 4. proxime præteriti mensis Octobris in simili Congregatione habita coram SS. D. N. approbatis aliis quatuor miraculis a Deo operatis intercessionem ejusdem servæ sua Rosæ: De mandato Sanctitatis sue accitis ad Congregationem ordinariam DD. Consultoribus, in ea Eminentiss. D. Cardinalis Azzolinus in eadem causa Relator die 10. Decembris 1667. proposuit dubium, an videretur esse locus decreto Beatificationis in forma consueta edendo. Cumque EE. Patres audivissent, Consultorum sententias in affirmativam unanimi suffragio collimare, censuerunt, si Sanctissimo Domino visum fuerit, tuto posse quandocumque procedi ad solemnem servæ Dei Rosæ Canonizationem: Ac interim indulgeri, ut eadem in toto orbe Beata nuncupetur, & de ea, tamquam Virgine non Martyre, in civitate, & dioecesi Limana, necnon in universo utriusque sexus Ordine S. Dominici Missa celebrari & Officium recitari possit die prima non impedita post 24. Augusti, qua Dei serva Lima obdormivit in Domino anno 1617. Facta autem de prædictis Sanctissimo distincta relatione, Sanctitas sua se ad omnipotentem Deum preces assiduas effusuram respondit, ut sibi, quicquid ad ejus gloriam magis conducibile sit, suo digito indicare dignetur. Die 21. Dec. 1667.

6 Olim denique non uno, eodemque modo summi Pontifices approbantes sacre Congregationis sensum super tuto progressu ad Beatificationem eadem via inceserunt. In causa liquidem S. Rosæ de Lima, in qua die 21. Decembris 1667. sacra censuit Congregatio, tuto procedi posse ad Beatificationem, & de ea, tamquam Virgine non Martyre, in civitate, & dioecesi Limana, necnon in universo utriusque sexus Ordine S. Dominici Missam celebrari & Officium recitari posse die prima non impedita post 24. Augusti, qua Dei serva mortua est, summusque Pontifex Clemens IX. respondit, preces esse ad Deum effundendas, ut indicare dignaretur

retur quidquid ad sui gloriam magis conduceret, juxta sensum decreti modo relati; post effusas ad Deum preces, suam ipse Pontifex de Beatificatione facienda manifestavit voluntatem, concedendo die 8. Febr. 1668. ut pro primo anno celebrari posset festum Beatificationis servæ Dei Rosæ cum Octava solemnè in omnibus Conventibus, & monasteriis Ord. Præd. utriusque sexus, eademque die per decretum separatum designavit diem 15. Aprilis ejusdem anni pro peragenda solemnè Beatificatione in sacrosancta basilica Principis Apostolorum: tum etiam per hanc eandem viam processit Clemens Papa X. in Beatificatione S. Pii V. cum in decreto edito die 5. Aprilis 1672. diem statuerit pro habenda solemnè Beatificatione; atque hoc modo approbaverit decretum a sacrorum rituum Congregatione editum die 8. Martii 1672. in quo dictum fuerat, tuto procedi posse ad Beatificationem, necnon celebrari, & recitari Missam, & Officium in ejus honorem certis in locis in eodem decreto expressis.

7 Per consimilem vero, sed minime eandem viam, idem ipse Clemens Papa X. progressus fuit in Beatificatione B. Francisci Solani. Postquam enim die 25. Septembris 1674. sacrorum rituum Congregatio censuit, tuto procedi posse ad ejus Beatificationem, Missamque & Officium in determinatis locis celebrari & recitari posse; Pontifex, qui tunc deliberationem distulerat, ut se Divino auxilio commendaret, impletis deinde adimplendis, die 6. Octobris 1674. decretum Congregationis approbavit & expediri mandavit: & die tandem 29. Decembris ejusdem anni per aliud distinctum decretum designavit diem 30. Junii subsequens anni 1675. pro solemnè Beatificatione peragenda in basilica Principis Apostolorum. In cujus modi ac rationis comprobationem afferri insuper possunt ea, quæ contigerunt in Beatificatione Martyrum Gorcomiensium, ut in regestis sacræ Congregationis, necnon servi Dei Joannis de Cruce.

8 Temporibus demum venerabilis servi Dei Innocentii Papæ XI. expleta fuit causa Beatificationis servi Dei Thuribii Archiepiscopi Limani. Cumque Pontifex de more Divinam voluerit opem implorare, antequam decerneret de Beatificatione peragenda, post temporis tandem interval- lum, quo Deum assidue deprecatus est, acciri fecit tum Secretarium sacræ Congregationis, tum Fidei Promotorem, iisdemque demandavit, ut sacrorum rituum Congregationi notum facerent, se ad Beatificationem servi Dei Thuribii procedere velle; totius exinde facti serie a Secretario, & Fidei Promotore Eminentissimis Patribus exposita in prima, quæ habita est, Congregatione ordinaria, post gratias Domino Deo redditas, actum fuit de locis, in quibus Missa, & Officium celebrari, & recitari possent in honorem beatificandi. *Sacra igitur Congregatio* (verba sunt decreti die 13. Junii 1679. editi) *coram summo Pontifice coacta, unanimi EE. Patrum, Prælatorum, & Theologorum consensu, causam hujusmodi, etiam ad effectum Canonizationis, omnibus numeris constare censuit; adeoque nihil ad indultum Beatificationis interim concedendum desiderari posse, sed, ut quamprimum rela-*

*caretur*

pararetur in Domino, expedire judicavit die 20. Decembris 1678. Supererat tamen assensus summi Pontificis, qui in re tam gravi diu potius cunctandum, quam celeri manu procedendum, atque ad Deum recurrendum esse ratus, diutius per menses Divinam maiestatem enixis precibus exoravit, ut sibi, quod magis gloria sua conferre videretur, innueret; donec Divina tandem lux affulsit die 13. Junii S. Antonio e Patavio sacra, qua post Sacrum peractum, accersitis Secretario sacra Congregationis, necnon Archiepiscopo Myrensi Fidei Promotore, injunxit, ut sacre Congregationi referrent, nil Sanctitati sue superesse, quin decreto Beatificationis assensum præberet & litteras in forma Brevis subscribere ret. Re in Congregatione ordinaria ad Patres delata die 17. Junii, omnium una vox erupit, Deo gratias referendas, qui summo Pontifici cor tetigisset ad faciendam justitiam cum servo suo; & Sanctitatem suam exorandam, ut ad Dei gloriam, & novæ Peruviana Christianitatis solamen supremam manum litteris Beatificationis apponere properasset; quibus indulgeatur, ut, de more litteris hujusmodi in basilica Vaticana evulgatis, quotannis de eodem servo Dei Officium, & Missa de Comm. Conf. Pontif. recitari, & respectivè celebrari possint in civitate & diocesi Limana, in qua obiit; in civitate Majoricensi, in qua natus est; & in Universitate Salamantina, in qua humanis, Divinisque litteris imbutus fuit; die 27. Aprilis, in qua ejusdem servi Dei corpus translatum in Metropolitana ecclesia Lima repositum est; cum ejus ad celos transitus die 23. Martii obveniret, Quadragesima feriis, vel festis Paschalibus impedito.

9 Hæc sunt, quæ pertinent ad usum, de quo in hoc capite sermo habendus erat: ex quibus cum defumatur primo, quod in una, eademque Congregatione generali proponebatur dubium de miraculis; quod in eadem Congregatione ferebatur a summo Pontifice iudicium de iisdem; & quod tandem in ipsa Congregatione tum Cardinales, tum Consultores suum ferebant suffragium super progressu ad Beatificationem: secundo, quod dubium de tuto progressu ad Canonizationem aliquando propositum fuit in Congregatione ordinaria: accitis Consultoribus, resolutionis autem relatio summo Pontifici per Secretarium facta est; & quod demum summi Pontificis voluntas de Beatificatione explenda non uno eodemque modo patefacta est, nec uno eodemque modo de ritu & locis actum fuit, quibus Missa & Officium in honorem beatificandi celebrari poterant & recitari; nemo est, qui non videat, Clementinum institutum aptius esse. Auditis quippe Cardinalium; & Consultorum suffragiis super miraculis, summus Pontifex suum statim non præfert super illis iudicium, sed illud suspendit; ut interim, nedum privato studio, & aliorum (si velit) extra Congregationem auxilio, sed effusus etiam indictis precibus, veritatem assequatur. Aptius quoque est Clementinum institutum, ut, post approbata modo prædicto miracula, agatur in Congregatione generali coram summo Pontifice de tuto progressu ad Beatificationem. In hac etenim Congregatione aut uniformia debent esse suffragia, aut saltem duæ ex tribus partibus inaffirmans debent conspirare responsum, ut de honestate juxta

juxta supradicta resolutio approbationem possit a summo Pontifice reportare : quando , si de hoc dubio ageretur in sacrorum rituum Congregatione ordinaria , de ejus more pluralitas suffragiorum videretur esse posse sufficiens . Aptius denique est illud institutum , ut , patefacta summi Pontificis voluntate de tuto ad Beatificationem quandocumque faciendam progressu , & de Brevis expeditione cum consuetis indultis & clausulis , litteræ Apostolicæ expediantur per Secretarium Brevium , qui unico , ut ita dicam , oculi ictu quid in aliis superioribus Beatificationibus concessum sit , videre potest , quod non ita facile in sacrorum rituum Congregatione cognosci posset .

## C A P U T XXIV.

*De solemnitate Beatificationis .*

<sup>1</sup> **A**Nte tempora summi Pontificis Alexandri VII. certum est , nullam fieri consuevisse solemnitatem Beatificationis , in basilica saltem Vaticana ; verum , expletis causis , prævia discussione tum virtutum , tum miraculorum , Brevisque expedito & Postulatoribus tradito , si in Urbe fieret Beatificationis festum , fiebat tantum in ecclesia ejus Ordinis , quem Dei servus , si Regularis erat , fuerat professus ; vel in ecclesia ejus nationis , ex qua Dei servus natus erat , si gens illa propriam habebat in Urbe ecclesiam . Et plura quidem possent afferri rei hujus exempla ; sed sufficiens esse videtur illud , quod desumitur ex Actis Beatificationis S. Andreae Avellini collectis a Joanne Antonio Caggiano Clerico Regulari , & Neapoli typis impressis anno 1627. in iisdem enim Actis legitur , fuisse tum in Rota juxta morem tunc temporis vigentem , tum in sacrorum rituum Congregatione discussas virtutes , & discussa miracula ; sacram autem Congregationem die 31. Augusti 1624. sic respondisse : *Causam servi Dei Andreae Avellini Clericorum Regularium a tribus Rota Auditoribus , ac deinde a sacrorum rituum Congregatione de mandato SS. D. N. referente Illustriss. Card. Pio , diligenter discussam , cum utrobique de validitate processuum , de sanctitate vitæ , ac de miraculis tam in vitæ , quam in morte , sufficienter constare pronuntiarium fuerit , Illustrissi. Patres habendam in tali statu censuere , ut ad ipsius servi Dei solemnem Canonizationem quandocumque deveniri possit . Interim vero posse concedi censuerunt , si Sanctissimo videbitur , ut Beatus nuncupari possit , & de eodem ab omnibus Clericis Regularibus ubique existentibus Officium , & Missa de Comm. Conf. non Pontif. ipsa die eius obitus juxta rubricas Missalis , & Breviarii Romani tuto recitari , ac celebrari possit . Cui sacre Congregationis sententia SS. D. N. libenter assensit . In ipsis pariter Actis a Caggiano collectis formalis Beatificationis ab Urbano Papa VIII. editum Breve refertur : & , cum porro omnes , & quidem magnæ solemnitates hujusce Beatificationis factæ per universum tere orbem enarrentur , sed in eo ,*

Tom. I.

D d

quod

quod attinet ad Urbem, solum fiat mentio solemnitis expletæ in ecclesia S. Andreæ de Valle Conventus PP. Theatinorum; signum evidens est, quod nullum Beatificationis festum tunc temporis fiebat in basilica Vaticana. Præterquamquod in archivo dictæ basilicæ, monumenta adfunt Beatificationum in eadem factarum, quarum prima est S. Francisci Salesii, quæ facta fuit a summo Pontifice Alexandro VII.

2 Alexandro itaque Papæ VII. incongruum omnino visum fuit, quod prima Beatificationum solemnia non fierent in basilica Vaticana; & quidem merito. Cum etenim Beatificatio sit inchoata Canonizatio, hinc fit, quod si Canonizatio expletur in basilica Vaticana, in eadem etiam basilica rationabile admodum est, ut fiant Beatificationis solemnia; & eo magis, quia solemnitas in dicta basilica coram universo populo expleta æternam quodammodo conservat memoriam tantæ rei, quæ præterito tempore aliquando oblivionis periculum subibat; quemadmodum ex Actis Beatificationis, & Canonizationis S. Francisci Salesii collectis a Dominico Cappello tunc temporis cæremoniarum Magistro, & Romæ editis anno 1665. colligi potest pag. 8. Porro hujuscemodi ritus, auctore SS. Alexandro VII. sapientissime constituti, aequitatem ut assequantur omnes, mihi liceat hoc loco ejus rationes paucis edicere; ut, sicuti ipsi a Majoribus assignatas cæremonias non sine mystica significatione, legitimoque jure latas retinemus, ita et posteris non sine gravi causa indultas transmittamus.

Excubans quippe Sanctiss. noster in ea potissimum, quæ Christiani nominis sinceram Religionem (cujus ille novit nulla parva esse momenta) tuentur ac servant, eorum, quos transactæ vitæ integritas in album Beatorum refert, curam gerit singularem. Quamobrem ad illustriorem ipsorum cultum, edictum conscripsit, ne quis in posterum eo titulo ac veneratione decoretur, nisi in basilica Vaticana Principis Apostolorum, publico conventu, & sub statis quibusdam precibus ac cæremoniis. Quæ enim privata quadam ratione, & ut ita fere dicam, intra parietes domesticos, vel appensa tantummodo ad fores tabula sumi promulgationes Beatorum, dum in angustiis paucorum hominum, atque locorum delitefcunt, nonnihil lucis & gloriæ detrahunt beatificandis. At, quæ in aperto sole Romane Curie omnium gentium conspectui produntur, adstantium vocibus & proclamatione, tamquam buccinis undequaque personantibus, disseminata, per omnem terræ ambitum gloriosissime pervolant. Quamvis autem, post totius causæ discussionem, ejus officii jura per celeberrimam apotheosim resarciantur; congruum tamen est, ut & in Beatificatione, quæ inchoata Canonizatio est, sua quoque religio, & sollemnis cæremonia servetur.

Ad hanc item legem faciendam compulsi removenda ambiguitatis necessitas. Nam, cum aliquando eveniret, ut, inscia sacrorum rituum Congregatione, cui id muneris commendatum est, ipsa indulta cultus Beatorum litteris Apostolicis obfignata, Promotoribus causarum more veteri credita, in longinquas regiones asportata, & modis minime legitimis expleta fuerint; post vero longa temporum intervalla, cum ad Canonizationis postremum actum causa pergit, prædictarum litterarum

rarum



*rarum exempla neque in chartophylactis Pontificum, neque in sacra Congregationis antiquis monumentis exarata reperiantur, utpote vel incendio, vel direptione absumpta; hinc fit, ut de legitima inducti cultus potestate, & de Beati nominis concessione oriatur non spernenda suspicio. Quam ut posthac praeceperet sapientissimus Pontifex Alexander, consultissimam legem inviolabiliter deinceps observandam de palam & in basilica Vaticana enuntiando Beatorum titulo & cultu, promulgavit; nempe, ut hoc pacto memoria Actorum, & ipsa factorum series tabulis publicis, annalibus Pontificiis, sacra Congregationis commentariis, Vaticana ecclesia tabulariis, praeipue autem adstantium, & undequaque ad hac solemniam confluentium oculis ac auribus mandata, posterisque per eos tradita omnem delati nominis ac venerationis hesitationem aut scrupulum amputaret.*

3 Hæc ex Actis a Dominico Cappello collectis, ex quibus etiam palam fit, Beatificationis in basilica Vaticana peragendæ solemnitatem insequentibus potissimum actibus consistere: hoc est primo, in publicatione Indulgentiæ ab omnibus utriusque sexus Fidelibus confessis & sacra Communione resectis lucrificandæ, qui in basilica Principis Apostolorum aut Missæ solemnī pro Beatificatione canendæ intererunt, aut Beatificationis die eandem Vaticanam basilicam visitabunt; secundo, in præsentia tum Cardinalium sacris ritibus præpositorum, necnon Consultorum sacrorum rituum Congregationis, tum Cardinalis Archipresbyteri basilicæ Vaticanæ, & Canonicorum, & Cleri ejusdem ecclesiæ; tertio, in exhibitione Brevis Apostolici, quæ fit a Postulatore causæ Cardinali Præfecto sacre Congregationis, qui Postulatorem remittit ad Cardinalem Archipresbyterum Vaticanæ basilicæ pro facultate illud in basilica publicandi; quarto, in publica lectione Brevis; quinto, in solemnī cantu hymni *Te Deum laudamus*, qui ab Episcopo Missam solemnem celebraturo intonatur; sexto, in detectione imaginum servi Dei, quæ prius velo coopertæ erant tum super altari, tum ad faciem templi; septimo, in omnium assistantium veneratione; octavo, in recitatione Collectæ, quæ fit ab Episcopo Missam celebraturo in honorem Beati; nono, in thuris oblatione imagini Beati, quæ ab eodem fit Episcopo trino ductu; ultimo, in celebratione solemnīs Missæ, tum vero in accessu summi Pontificis ad basilicam Vaticanam ipsa die post Vesperas ad imaginem Beati colendam.

4 Consueverunt Postulatores causarum curare, ut a Notario Congregationis sacrorum rituum publicum conficiatur instrumentum de solemnitate Beatificationis expleta in basilica Principis Apostolorum: & in appendicibus exhibebitur instrumentum alicujus ex Beatificationibus in eadem ecclesia peractæ, ex quo uberius universus ritus prædictæ solemnitatis colligi poterit. Interea enim operæ pretium esse arbitramur hic recensere Beatificationes prædicto more perfectas.

5 Prima solemnīs Beatificatio, quæ facta fuit in basilica Vaticana, fuit servi Dei, nunc S. Francisci Salesii; & expleta fuit die 8. Januarii 1662. ejusque Acta una cum Actis Canonizationis ejusdem S. Francisci Salesii

fuerunt collecta, & typis Romæ edita a Cappello Cæremoniarum Magistro.

6 Secunda solemnis Beatificatio fuit servi Dei Petri de Arbues, alias Magistri Epilæ, Canonici ecclesiæ Metropolitanæ Cæsaraugustanæ, ac primi Inquisitoris regni Aragoniæ; eademque fuit expleta die 27. Aprilis 1664. tum nonnulla ad dictam solemnitatem pertinentia fuerunt tunc edita in Urbe.

7 Tertia solemnis Beatificatio fuit servæ Dei, nunc S. Rosæ de Lima Tertii Ordinis S. Dominici. Fuit autem perfecta die 15. Aprilis 1668. & relatio fuit typis edita juxta morem in Urbe; atque hujus quidem Beatificationis publicum extat instrumentum supra relatum.

8 Quarta solemnis Beatificatio fuit servi Dei, nunc S. Pii V. Facta autem fuit in basilica Vaticana die 1. Maji 1672. totaque series solemnitatis fuit enarrata in vita memorati S. Pii V. Romæ typis impressa an. 1712. occasione Canonizationis ejusdem, & composita a bon. mem. Equite Alexandro Maffejo.

9 Quinta solemnis Beatificatio fuit servi Dei, nunc S. Francisci Solani Ordinis Minorum Observantium S. Francisci. Fuit autem expleta die 30. Junii 1675. in basilica Vaticana.

10 Sexta solemnis Beatificatio fuit novemdecim Martyrum Gorcomiensium; undecim videlicet Ordinis FF. Minorum S. Francisci, Nicolai Pichi Gorcomiensis Guardiani, Hieronymi Vverdani Vicarii, Theodorici Fmdeni Amersfortii, Nicasii Joannis Hezii, VVilleadi Dani, Godefridi Mervellani, Antonii Vverdani, Antonii Hornariensis, Francisci Rodii Bruxellensis Sacerdotum, necnon Petri Ascanii, atque Cornelii VVicanii Laicorum; & aliorum octo, nempe Joannis Sacerdotis Ordinis Prædicatorum, Hadriani Beccani, ac Jacobi Lacopii Aldenardensis Ordinis Præmonstratensis, Joannis Ostervicani Canonici Regularis Ordinis S. Augustini, necnon Leonardi Vecchellii Buscoducensis, Nicolai Popelii VVeldani, Godefridi Dunci Gorcomiensis, & Andreæ VValderii Sacerdotum, & Parochorum Sæcularium. Fuitque hæc solemnis Beatificatio expleta die 9. Junii 1672.

11 Septima solemnis Beatificatio fuit servi Dei, nunc S. Thurbii Archiepiscopi Limani, quæ facta fuit die 2. Junii 1679. juxta formulam instrumenti supra relati.

12 Octava solemnis Beatificatio fuit servi Dei, nunc S. Joannis Francisci Regis Sacerdotis Professi Societatis Jesu. Perfecta autem fuit die 24. mensis Maji anno 1716. & ejus Acta sunt typis excusa post Acta Canonizationis SS. Pii V., Andreæ Avellini, Felicis a Cantalicio, & Catharinæ de Bononia, collecta a Justiniano Chiapponi Apostolicarum cæremoniarum Præfecto, & Romæ edita anno 1720.

13 Nona solemnis Beatificatio est B. Hyacinthæ de Marefcottis; decima B. Joannis de Prado; undecima B. Fidelis a Sigmaringa; duodecima B. Vin-

B. Vincentii a Paulo ; decima tertia B. Petri Forerii ; ( quorum aliqui jam solemniter canonizati sunt ) ; quæ omnes Beatificationes expletæ fuerunt tempore san. mem. Benedicti XIII. Decimaquarta est illa servæ Dei , nunc S. Catharinæ de Riccis Monialis expresse Professæ Ordinis S. Dominici , quæ expleta fuit die 1. Octobris 1732. sub san. mem. Clemente XII. Decimaquinta est servi Dei nunc S. Joseph de Leonissa Sacerdotis Professæ Ordinis Capuccinorum sub eodem Clemente XII. peracta anno 1737. Decima sexta demum est B. Alexandri Saulii ex Clericis Regularibus S. Pauli Barnabitis nuncupatis , primum Aleriæ , deinde Papiæ Episcopi , primo Pontificatus nostri anno facta , anno videlicet 1741. Decima septima , est servi Dei, nunc S. Camilli de Lellis fundatoris Clericorum ministrantium infirmis . In codice Canonizationum publici juris facto & diligenter condito ab Archiepiscopo Ancyrano sæpe a nobis cum laude commemorato , impressa quidem sunt Brevia prædictarum Beatificationum a Benedicto XIII. peractarum ; sed , cum desit illud Beatificationis B. Petri Forerii , utpote publicatum post codicis editionem , a nobis exhibebitur in appendicibus , ubi etiam habebuntur Brevia Beatificationis SS. Catharinæ de Riccis , Joseph de Leonissa , Camilli de Lellis , & B. Alexandri Saulii .

14 Juxta Alexandrinum decretum , ut vidimus , initium solemnitatis in Beatificatione desumendum est a basilica Principis Apostolorum ; deinde vero aliquando ex speciali gratia concessum fuit , ut , peractis in illa beatificationis solemnibus , primum Beatificationis festum fieret in aliqua determinata ecclesia privative quoad alias ; sicuti colligitur ex decreto edito die 20. Julij 1675. in quo permissum fuit , ut , post peracta in templo Vaticano D. Petri solemnia Beatificationis B. Francisci Solani , prima Beatificationis celebritas fieret in ecclesia de Araceli Urbis ; & ex decreto edito die 29. Januarii 1676. in quo pariter fuit facta consimilis eidem ecclesiæ concessio in Beatificatione Martyrum Gorcomiensium ; & ex alio demum decreto sub die 6. Aprilis 1675. in quo , post expleta in Vaticana basilica solemnia Beatificationis Beati nunc S. Joannis a Cruce , potestas facta fuit , ut primum Beatificationis festum privative quoad omnes alias ecclesias fieret in ecclesia SS. Joachim & Annæ PP. Carmelitarum Excalceatorum Hospitii Congregationis Hispaniarum in eadem Urbe existentis .

15 Præterea in Brevibus Beatificationum , servato tamen semper ordine solemnitatis prius explendæ in basilica Principis Apostolorum , conceditur , ut primo anno inchoando a Dato Brevis , festum fiat Beatificationis in ecclesiis talium , & talium locorum cum Officio & Missa , die statuenda ab Ordinariis , & intra sex menses ab iisdem præmonenda . Quia vero primo anno , a Dato Brevis inchoando , in Indiis exempli gratia difficile esset , si pro illis provinciis detur facultas celebrandi solemnia Beatificationis eadem explere ; initium anni constitui consuevit die , quo ad Indias Breve Beatificationis pervenerit . Porro ex gratia aliquando prorogatum fuit tempus anni pro sexto Beatificationis faciendi extra Urbem ,  
post

post expletum solemne festum in Vaticana basilica ; uti desumitur ex Brevi san. mem. Clementis X. expedito die 28. Martii 1676. in quo exorantibus Postulatoribus causæ Beatorum Martyrum Gorcomiensium pro anni prorogatione Pontifex benigne annuit : *Nos igitur votis hac in re , quantum in Domino possumus , favorabiliter annuere volentes &c. annum celebrationis solemniis Beatificationis præfata à Nobis præfixum , ut præfertur , ad sex menses a fine ejusdem anni computandos , intra quos eadem solemnia , servata tamen ceteraque prædictarum nostrarum litterarum forma & dispositione , celebrari libere & licite possint & valeant , auctoritate præfata , tenore præsentium concedimus , & prorogamus .* Fundamentum enim hujus concessionis fuit constitutum in exposito impossibili , quod intra annum solemnia Beatificationis celebrari possent in locis , quibus celebrationis facultas facta fuerat : Nobis nuper expositum fuit , quod solemnia quidem prædicta intra earundem litterarum præscriptum in basilica prædicta jam celebrata fuerint ; verum fieri vix possit , ut intra anni spatium ad omnes ecclesias , in quibus eadem solemnia pariter celebrandi , ut præfertur , fecimus potestatem , præfatarum litterarum nostrarum notitia perveniat . Aliquando etiam peculiari gratia facta fuit ultra locos in ipso Beatificationis Brevi designatos ampliatio ad alios locos & ecclesias , ut in illis solemnia Beatificationis primo anno possent celebrari . Instantibus etenim cl. mem. Carolo II. Hispaniarum Rege Catholico , & Marianna Regina ejusdem uxore , necnon Archiepiscopis , & Episcopis Hispaniæ , & Indiarum , venerabilis Dei servus Innocentius Papa XI. qui in Brevi Beatificationis B. Thuribii indulserat , ut solemnia Beatificationis primo anno fierent in ecclesiis tum sæcularibus , tum regularibus civitatis , & diocesis Limanæ , necnon civitatis Majoricæ , atque in collegio Oveten. Universitatis Salmaticensis , facultatem prædictam ad alios plures locos extendit ; uti colligitur ex Brevi ab eodem expedito die 27. Septembris 1679. Nos piis eorundem Regis , & Regina , ac Archiepiscoporum , & Episcoporum precibus Nobis super hoc humiliter porrectis benigne inclinati &c. ut intra annum proximum , & quoad Indias a die , quo præsentis littera illuc pervenerint , numerandum , in Cathedralibus , & Metropolitanis ecclesiis Hispania , & Indiarum , ac in una ecclesia oppidi Matriti Toletana diocesis per Ordinarium loci designanda solemnia Beatificationis memorati servi Dei Thuribii itidem cum Officio & Missa sub ritu duplici majori , die ab Ordinariis locorum respectivè constituta , & intra sex menses promulganda pariformiter celebrari valeant , auctoritate Apostolica , tenore præsentium concedimus & indulgemus ; Roma vero in ecclesiis S. Jacobi , & S. Mariæ Montis Serrati nationis Hispanorum , ac S. Caroli in Via lata , seu cursus , nationis Mediolanensis , eadem solemnia intra bimestre proximum similiter celebrari permittimus .

## CAPUT XXV.

*De transitu a Beatificatione ad Canonizationem.*

1 **U**T a Beatificatione transitus fiat ad Canonizationem, retento semper argumento causarum Confessorum, quæ procedunt per viam non cultus, de quibus tantum loquimur in præsentī, & illarum quidem, quæ introducuntur post decreta Urbani VIII. (erit enim in subsequentibus sermo de causis, quæ procedunt per viam casus excepti a decretis ejusdem Urbani, & de aliis, quæ ante prædicta decreta fuerant introductæ, quæque post eadem decreta resumuntur) opus est, ut pro obtinenda Canonizatione, nova post indultam Beatificationem miracula superveniant, & a sacra Congregatione, & a summo Pontifice examinentur, atque approbentur.

2 In decretis Urbani VIII. ita legitur: *Pro habenda certiori veritate virtutum, sanctitatis vite, & miraculorum servorum Dei, pro quorum Canonizatione instatur, mandavit Sanctissimus non debere in futurum procedi ad Canonizationem alicujus, qui aliqua veneratione, vel titulo Beati sit decoratus, nisi prius in eadem sacra Congregatione coram Sanctitate sua fuerit iterum per Cardinalem in ordine Ponentem facta plena & distincta relatio non modo eorum, quæ in processibus, & aliis scripturis continentur, & quæ illi per summos Pontifices intuitu ipsius venerationis largita fuerunt, verum etiam eorum, quæ supervenerunt post concessam eidem venerationem, de quibus constare possit, ad hoc, ut ex prædictis omnibus valeat summus Pontifex deliberare, an sit procedendum ad Canonizationem.*

3 Decretum hoc Urbani VIII. mentionem profecto facit eorum, quæ supervenerunt post concessam Beato venerationem, & consequenter miraculorum, quæ supervenerunt post concessam Beatificationem: sed, quamvis requirat, ut de his constare possit, cum tamen referatur ad relationem, quam fieri debere præscribit a Cardinali causæ Relatore, non videtur sufficienter indicare, ut exactum fieri debeat in sacra Congregatione examen miraculorum, quæ supervenerunt post Beatificationem.

4 Necessitas ergo severi examinis miraculorum, quæ post Beatificationem supervenerunt, desumi debet ex subsequuta observantia, & ex decreto san. mem. Clementis IX. quod est hujusmodi: *Sanctissimus D. N. Clemens IX. ad omnem hesitationem desuper penitus tollendam, die 10. Septembris 1668. in Congregatione habita coram Sanctitate sua declaravit, ac respectivè decrevit, quod in posterum in causis servorum Dei, qui aliqua veneratione, & titulo Beati a Romanis Pontificibus decorati sunt, Cardinalis in ordine Ponens in Congregatione coram summo Pontifice habenda plenam & distinctam relationem facere tantummodo debeat eorum, quæ cultus concessionem præcesserunt, & quæ intuitu ipsius venerationis quomodolibet largita fuerunt; ea vero, quæ post indultam*

*tam venerationem, seu cultum quomolibet supervenerunt, debeant per juridicas probationes discuti, ac, prævia matura discussione, ad juris trutinam redigi, prout hæcenus inconcusse servatum fuit, ut ex iis constare possit, num Sedes Apostolica tuto valeat ad solemnem illius Canonizationem juxta S. R. E. ritum, & canonicas sanctiones devenire.*

5 Dictum est, necessitatem rigidi examinis miraculorum, quæ supervenerunt post Beatificationem, defumi ex observantia subsecuta post decretum Urbani VIII. id autem ratum faciunt verba modo citati decreti, *prout hæcenus inconcusse servatum fuit: atque etiam defumi ex ipso decreto Clementino; quod alia ejus verba præseferunt, debeant per juridicas probationes discuti, ac, prævia matura discussione, ad juris trutinam redigi.* Porro, cum in utroque decreto tum Urbani, tum Clementis præscribatur, fieri debere tantummodo per Cardinalem in ordine Ponentem plenam & distinctam relationem eorum, quæ cultus concessionem præcesserunt, sicque tum virtutum, tum miraculorum, quorum examen & approbatio præcessit Beatificationem; statutum hoc est ad tollendam consuetudinem, quæ invaluerat, ut in transitu a Beatificatione ad Canonizationem fieret novum examen omnium, quæ jam ante Beatificationem examinata & approbata fuerant, & ideo validitatis processuum, virtutum, & miraculorum. Id vero jure ac merito statutum fuisse dicendum est: quemadmodum enim, postquam tanta maturitate ante Beatificationem perpenfa est validitas processuum, atque, ut ex dictis, ter disceptatum est dubium de virtutibus, ter itidem dubium de miraculis, & tandem, an, stante prædictorum approbatione, tuto deveniri possit ad Beatificationem; quemadmodum, inquam, iteratum examen rerum jam discussarum, atque approbatarum superfluum videri potest; ita nedum congruens, sed & necessaria esse posse videtur novorum miraculorum accessio post Beatificationem, eorumque acris discussio, ut novorum scilicet miraculorum interventu habeat summus Pontifex nova Divinæ voluntatis signa; cum a cultu tantum permisso & retriecto, qualis est, qui in Beatificatione indulgetur, transitus sit ad cultum præceptivum, atque ad universam Ecclesiam extensum, cujusmodi est ille, qui conceditur in Canonizatione; sicuti suo loco explicabitur, & ut animadvertit *Matta de Canonizat. SS. part. 4. cap. 6. num. 9.*

6 Et quidem, quod olim in transitu a Beatificatione ad Canonizationem iterum examinarentur ea omnia, quæ fuerant examinata & approbata ante Beatificationem, colligitur ex bulla Canonizationis S. Hyacinthi §. 4. 5. & 7. ex bulla Canonizationis S. Philippi Nerii §. 8. & *quatuor sequen.*, & ex bulla Canonizationis S. Ignatii Loyolæ §. 5. & 7. cum quibus concordant aliæ bullæ, & quamplura decreta, quæ sunt in regestis sacræ Congregationis rituum super causis SS. Isidori, Francisci Xaverii, Thomæ de Villanova, Ludovici Bertrandi, Paschalis Baylon, in quibus, occasione transitus a Beatificatione ad Canonizationem, præscriptum est, ut ite-

ut iterum examinarentur ea omnia, quæ fuerunt ante Beatificationem examinata & approbata.

7 In archivo Conventus S. Annæ de Urbe PP. Carmelitarum Discaleceatorum nationis Hispanicæ Acta integra extant Beatificationis, & Canonizationis S. Terefiæ in duos tomos distributa, quorum primus pertinet ad Beatificationem subscriptus fuit a Joanne Paulo Mucantio Magistro sacrarum cæremoniarum, & Secretario Congregationis sacrorum rituum.

8 In hoc primo tomo continetur commissio Clementis VIII. sacre Congregationi inscripta, ut inquirat in virtutes in genere; habetur commissio summi Pontificis Pauli V. ut inquirat in specie; completisque *processibus remissorialibus*, extat decretum sacre Congregationis demandans Cardinali Lancellotto, ut processus exhibitos videret & examinaret.

9 Causæ Postulatores informationes tum facti, tum juris una cum ditissimo documentorum summario exhibuerunt Cardinali Lancellotto, qui prius retulit punctum validitatis processuum, deinde alterum punctum super virtutibus: transmissio autem ad unumquemque Cardinalem sacre Congregationis eo documentorum summario, quod fuerat Cardinali Lancellotto exhibitum; ad ejus relationem sacra Congregatio respondit, satis, sufficienter, & abundanter constare de virtutibus, puritate, integritate vitæ, & sanctitate servæ Dei Terefiæ: tum, delegatis Cardinalibus a Monte, & Lancellotto, ut summo Pontifici referrent ea, quæ acta fuerant in hac causa; cum Cardinalis Lancellottus subinde retulisset, summum Pontificem respondisse, se velle, ut omnes similes causæ tractarentur & discuterentur prius in Rota, postea iterum examinarentur in Congregatione sacrorum rituum, & ut reliqua omnia, quæ ad miracula pertinebant in causa servæ Dei Terefiæ, examinarentur in Auditorio Rotæ; sacra Congregatio delegit Franciscum Sacratum, Joannem Baptistam Coccinum, & Alphonsum Manzanedum Rotæ Auditores, ut, citra examen articulorum jam discussorum & resolutorum in Congregatione de validitate processuum, & de sanctitate vitæ, viderent & diligenter examinarent processus, atque referrent, quid in eis circa miracula invenirent.

10 Auditores Rotæ mandatis paruerunt; editaque relatione super miraculis, eademque transmissa ad Cardinalem Lancellottum, & alios Cardinales sacre Congregationis; summus Pontifex Paulus V. jussit, ut etiam suum judicium proferrent super validitate processuum, & super virtutibus: prolato autem favorabili judicio ab iisdem super eodem argumento, & super eo quod tuto procedi posset ad Canonizationem, Cardinalis Lancellottus, ordinem proseguendo ejusdem relationis, quæ (uti dictum est) unicuique Cardinali tradita fuerat, miracula exposuit & luculenter narravit: sicque ad ejus relationem sacra Congregatio censuit, constare de virtutibus & de miraculis, & posse ad Canonizationem procedi, atque interim concedi posse Officium & Missam pro nonnullis de-

terminatis locis. Tum denique Papa annuit petitis, & litteras Apostolicas in forma Brevis expeditit super limitata concessione Officii & Missæ, in qua Beatificatio consistit.

11 Hæc habentur in primo tomo Actorum; nunc vero transeundo ad secundum, qui componi cœpit a prædicto Paulo Mucantio, sed perfectus & subscriptus fuit a Petro Ciamaricono ejus successore in officio Secretarii, in eo continetur primo, quod, prolato ab Auditoribus Rotæ judicio super validitate processuum & super virtutibus, edita tamen relatione tantummodo super miraculis; summus Pontifex jussit, ut relationem edarent, prout etiam edita fuit, super validitate processuum & super virtutibus: secundo, quod, prævio consilio sacræ Congregationis, Paulus Papa V. annuit petitis pro extensione Officii & Missæ ad alios locos in prima concessione non comprehensos: tertio, quod, supervenientibus novis petitionibus pro Canonizatione, delatoque summo Pontificatu ad Gregorium XV. per obitum Pauli V. & subrogato Cardinali Muto in locum Cardinalis Lancellotti causæ Ponentis interim defuncti, demandatum fuit eidem Cardinali Muto, ut diligenter processus examinaret, ita ut in una Congregatione ageretur de validitate processuum, in altera de sanctitate vitæ, & in tertia de miraculis; prout sane factum fuit, exhibita unicuique Cardinali informatione juridica super unoquoque ex dictis argumentis, de quo in prædictis Congregationibus tractabatur: quibus quidem favorabiliter resolutis, tandem ad Canonizationem eventum est.

12 Itaque ex huc usque dictis (ni fallimur) ad evidentiam colligitur, olim in transitu a Beatificatione ad Canonizationem examinata iterum fuisse ea omnia, quæ fuerant discussa & approbata ante Beatificationem; id autem in more hodie non esse positum, sed in transitu a Beatificatione ad Canonizationem ea tantum examinari miracula, quæ post Beatificationem supervenerunt. Quamvis autem, quia nedum in decretis sacræ Congregationis rituum pro Beatificatione, sed etiam in ipsis Beatificationum Apostolicis litteris, post approbationem virtutum & miraculorum, aliquando dictum fuit, posse summum Pontificem, quandocumque sibi libuisset, ad solemnem Canonizationem procedere & tuto devenire, eum vero interim indulgere, ut Dei servus coli possit tanquam Beatus; quemadmodum legitur tum in decretis & Brevibus Beatificationum, quæ decretum Clementis IX. præcesserunt, uti sunt litteræ Apostolicæ Beatificationis SS. Petri de Alcantara, Francisci Salesii, Joannis de Deo, Andreæ Avellini, Mariæ Magdalenzæ de Pazzis, & B. Josaphat Archiepiscopi Pollocensis; tum etiam in aliis decretis & Brevibus Beatificationum expeditis post tempora Clementis IX. usque ad tempus san. mem. Clementis XI. excepto tamen Brevis Beatificationis S. Pii V. apposita quippe fuit in omnibus clausula supra memorata: quamvis (inquam) aliquando a Postulatoribus in ejusdem clausulæ sequelam supplicatum fuerit, ut ad solemnem Canonizationem procederetur, etiam si nova post Beatificationem miracula



miracula non superveniissent; id tamen obtineri ab eis non potuit, cum responsum fuerit, prædictam clausulam fuisse appositam incitate ad limitatum cultum Beato eo tutius indulgendum; uti desumitur ex sequentibus verbis Francisci Mariæ Phœbei Secretarii Congregationis sacrorum rituum, in compendio vitæ & Actorum causæ tunc Beati, nunc S. Francisci Salesii: *Ac, quamvis ipsa ( loquitur de causa.) ad præscriptum novissimorum decretorum inchoata, instructa, & medio riguroso examine, absoluta fuerit nedum in ordine ad Beatificationem, sed & ad ipsam solemnem Canonizationem, ita ut satis fortasse videretur jam editum decretum ad hoc, ut tuto procedi posset ad actum solemnis Canonizationis, tamen Sanctissimus causam ipsam rursus ad trutinam revocari mandat, & nova miracula examinari; ut ex his, quatenus aliqua censeantur approbanda, sacra Congregatio ducatur ad finalem causæ terminationem cum decreto absoluto, quod tuto procedi possit ad actum Canonizationis. Siquidem prima pars antedicti decreti, qua firmatur, posse tuto procedi ad Canonizationem, de more apposta fuit, non determinative ad ipsam Canonizationem, sed impulsivæ ad limitatum cultum Beato eo tutius indulgendum, quò crederetur, adesse requisita etiam ad ipsam universalem venerationem decernendam. Præterquamquod responderi adhuc potuisset, quod sacra Congregatio, post approbatas virtutes & miracula, dixit, tuto procedi posse ad Canonizationem, quia de jure ad Canonizationem nihil aliud requiritur, quam approbatio virtutum & miraculorum; quod deinde eadem Congregatio dixit, interim indulgeri posse, ut servus Dei colatur tamquam Beatus, dilata Canonizatione ad aliud tempus, hoc est ad illud, quo nova miracula superveniissent, quia juxta morem Sedis Apostolicæ jam introductum Beatificatio præcedit Canonizationem, & juxta eundem morem non fit transitus a Beatificatione ad Canonizationem, nisi intermedia miracula Deus operari dignetur ad Beati intercessionem: ita ut prima verba sint relativa ad dispositionem juris, secunda vero ad Sedis Apostolicæ institutum.*

13 Sed, quia unusquisque facili negotio considerare poterat, quod saltem illis, qui usum non habent harum causarum, prædicta verba decretorum & Brevium aliquam ingerere poterant ambigendi occasionem, fuit id a me tamquam Fidei Promotore renunciatum san. mem. Clementi XI. qui cum reputasset, non esse juxta hodiernam consuetudinem locum Canonizationi, nisi præcedat Beatificatio, & nisi post Beatificationem nova miracula superveniant, noluit dictis verbis uti in Brevi Beatificationis servi Dei Joannis Francisci Regis: ipse autem existimarem, quod amplius Beatificationum Brevibus ea inferi non deberent, nedum propter tanti Pontificis auctoritatem, & propter rationes superius expensas, sed etiam quia, cum, post approbationem virtutum & miraculorum, in sacrorum rituum Congregatione generali disputetur dubium, an, stante approbatione virtutum & miraculorum, tuto procedi possit ad Beatificationem; sacra autem Congregatio respondeat, tuto procedi posse, nul-

la facta mentione Canonizationis ; non potest consequenter in Brevi Beatificationis nunc asseri , sacrorum rituum Congregationem censuisse , quod tuto procedi posset ad Canonizationem , sed quod interim indulgeri potest , ut servus Dei colatur tamquam Beatus : atque hisce quidem cohærenter clausula ipsa toties memorata minime fuit apposita aut subsequenti- bus Brevibus Beatificationum expeditis tempore san. mem. Benedicti XIII. aut Brevi Beatificationis B. Catharinæ de Ricciis expedito a summo Pontifice Clemente XII.

## C A P U T X X V I.

*De serie Actorum in transitu a Beatificatione ad Canonizationem .*

**S**eries Actorum in transitu a Beatificatione ad Canonizationem in causis Confessorum procedentibus per viam non cultus , & introductis post decreta Urbani VIII. est hæc , quæ sequitur . Postquam ad Postulatores certa pervenit notitia , Deum dignatum esse miracula operari post Beatificationem ad Beati intercessionem , supplices porriguntur preces sacrorum rituum Congregationi ordinariæ pro *signatura commissionis re assumptionis* , & pro expeditione *litterarum remissorialium* , ut super novis prædictis miraculis Apostolica auctoritate construantur processus . Signata commissione , expeditis litteris remissorialibus , constructis subinde processibus , iisdemque ad Urbem delatis , eorum fit traditio , apertio , atque interpretatio , quatenus externo idiomate conscripti sint , iisdem modis & formis , quibus fit traditio , apertio , & interpretatio aliorum processuum conditorum ante Beatificationem . Disputatio deinde de eorum validitate assumitur in sacrorum rituum Congregatione ordinaria : tum verò iudicio super validitate completo , miracula , quæ supervenerunt , ter in Congregationibus examinantur , idest primo in antepreparatoria , secundo in præparatoria , tertio in generali coram summo Pontifice : & quidem , quemadmodum quoad Beatificationem in eadem Congregatione generali disputatur dubium , *an , stante approbatione tum virtutum , tum miraculorum , tuto procedi possit ad Beatificationem* ; sic in transitu a Beatificatione ad Canonizationem , approbatis miraculis , quæ supervenerunt post Beatificationem , discutitur in Congregatione generali dubium , *an , stante approbatione miraculorum , tuto deveniri possit ad Canonizationem* . Quin immo , quemadmodum duorum miraculorum approbatio satis est pro Beatificatione , ita & comprobatio duorum , quæ supervenerint post Beatificationem , sufficit pro Canonizatione obtinenda . Nec aliquid a nobis in hoc puncto immutatum est . Licet enim a nobis , juxta alibi dicta , per decretum generale editum die 23. Aprilis 1741. statutum fuerit , in causis procedentibus per viam non cultus quatuor miracula probata

bata testibus de visu esse necessaria, ut Beatificatio obtineatur, quando virtutes, & Martyrium probata sunt testibus de auditu, & probationibus subsidiariis; in transitu tamen harum causarum a Beatificatione ad Canonizationem bina diximus miracula sufficere testibus de visu probata, quæ post Beatificationem supervenerint. Quamvis autem Castellinus in *tratt. de dilat. Canonization. pag. 57. & pag. 63.* asserat, juxta consuetudinem sanctæ Sedis non decerni Canonizationem, nisi inter miracula, quæ approbantur, aliquod reperiatur, quod sit secundi, vel primi generis; ut omnis videlicet excludatur dubitatio, an id, quod pro miraculo admittitur, re vera excefferit vires & potentiam naturæ: quod porro argumentum late prosecutus est bon. mem. Petrus Franciscus de Rubeis olim egregius Fidei Promotor in suis animadversionibus factis in causa Valentina S. Francisci Borgia super dubio, *an tuto procedi posset ad Beatificationem*: id tamen nullum habet fundamentum sive in ratione, sive in consuetudine Sedis Apostolicæ. Non in ratione, cum miracula quoque tertii generis excedant vires & potentiam naturæ, si non quoad substantiam, saltem quoad modum, sicuti suo loco explicabitur: neque etiam in Sedis Apostolicæ consuetudine, cum ex alibi referendis plene deducatur, pluries Sedem Apostolicam ad Canonizationem processisse, approbatis tantummodo duobus miraculis tertii generis, quæ post Beatificationem supervenerant; ita ut mirum esse non debeat, si citatus Petrus Franciscus de Rubeis, qui Castellinum sequendo, & exercendo munus Fidei Promotoris aliquando asseruerat, aliquod primi, vel secundi generis miraculum requiri pro obtinenda Canonizatione, ingenue postmodum confessus sit, Castellinum id asseruisse absque ullo fundamento; uti refert Matta de Canonizat. *Sanctorum part. 4. cap. 7. num. 7.*

2 Item, sicuti juxta antiquiorem usum, loquendo de Beatificatione, in una eademque Congregatione generali, quæ ut plurimum cogeatur coram summo Pontifice, non solum disputabatur de miraculis, sed etiam, facta eorum approbatione, iterum vocabantur Consultores, & post expositam a Cardinali Relatore totam facti seriem, hoc est narrationem tum virtutum, tum miraculorum approbatorum, proponebatur dubium, *an tuto procedi posset ad Beatificationem*; sic etiam in Canonizatione, juxta morem antiquiorem, eodem prorsus modo in una eademque Congregatione generali coram summo Pontifice proponebatur disputatio de miraculis, atque, eorum approbatione secuta, arceffebantur denuo Consultores, tum facta a Cardinali causæ Relatore fideli omnium, quæ præcesserunt, & ceterorum, quæ Beatificationem subsecuta erant, plena & distincta relatione, fiebat alterius dubii propositio, *an tuto (videlicet) procedi posset ad Canonizationem.*

3 Desumitur id ex decreto edito in causa Geneven. S. Francisci de Sales die 14. Februarii 1662. ubi, post enarratam approbationem miraculorum, hæc habentur: *Propterea, accitis iterum Consultoribus, & præ-*

habita per E. D. Cardinalem Franciottum ad præscriptum novissimorum decretorum plena & distincta relatione non modo eorum, quæ in processibus & aliis scripturis continentur, & quæ B. Franciscus per Sanctitatem suam intuitu venerationis largita fuerunt, verum etiam eorum, quæ accesserunt post concessam eidem venerationem, annuente Sanctissimo, sacra eadem Congregatio censuit, quandoque posse tuto deveniri ad solemnem ejusdem B. Francisci Canonizationem, juxta ritum S. R. E. & sacrorum Canonum dispositionem. Id ipsum quoque confirmatur ex his, quæ leguntur in Actis Canonizationis S. Mariæ Magdalensæ de Pazzis collectis a Dominico Cappello, & editis Romæ anno 1669. Itaque die 10. Septembris 1668. in Congregatione sacrorum rituum habita coram eodem Sanctissimo quinque de allatis miraculis post indultam Beata venerationem, prehabita matura discussione, disputata sunt; & Sanctitas sua, accitis iterum Consultoribus, tum ab iis, tum a Cardinalibus requisivit, an tuto procedi posset ad solemnem B. Mariæ Magdalensæ Canonizationem; & omnes concordibus suffragiis in affirmativam sententiam convenerunt. Nec omitti potest decretum in causa Canonizationis tunc Beati, nunc Sancti Cajetani editum die 11. Novembris 1670. in quo, expostitis approbatione miraculorum, & aliis, quæ debebant exponi, sic legitur: *Explexis igitur omnibus, quæ nova exigunt decreta san. mem. Urbani VIII. accitis iterum per Sanctissimum Consultoribus, unanimi voto eadem sacra Congregatio censuit, sic annuente Sanctissimo, quandoque tuto deveniri posse ad solemnem dicti Beati Canonizationem juxta ritum S. R. E. & sacrorum Canonum dispositionem, eumque definiri regnantem cum Deo, & universali Ecclesiæ colendum & venerandum proponi.*

4 Hoc tantum intercedit discrimen (loquendo semper intra terminos usus antiquioris sacræ Congregationis) quod super dubio, an tuto procedi posset ad Beatificationem, minime mihi constat, suffragia tum Consultorum, tum Cardinalium fuisse unquam tradita Secretario, ut reponerentur inter Acta sacræ Congregationis; quod quidem fiebat, quando proponebatur dubium de tuto progressu ad Canonizationem, quemadmodum defumitur ex Actis Canonizationis S. Francisci de Sales editis a Dominico Cappello pag. 58. ubi Franciscus Maria Phœbeus Secretarius Congregationis sacrorum rituum in quodam suo compendio totius causæ transmissæ ad Cardinales, & Consultores suffragaturos hæc habet: *Ideo, præter sententias probantes asserta miracula, afferenda sunt divisa suffragia pro efformando decreto Canonizationis, mibique in scriptis porrigenda; ut, juxta mandatum Sanctissimi, inter monumenta sacræ Congregationis reposta asserventur.* Confimilia leguntur etiam in Actis Canonizationis S. Petri de Alcantara ab eodem Cappello collectis pag. 4. atque in Actis modo citatis Canonizationis S. Francisci de Sales impressa quoque videri possunt suffragia Consultorum super dubio in Congregatione generali proposito, an tuto procedi posset ad Canonizationem.

5 Rursus, sicut antea dictum est, super dubio Beatificationis, an tuto scilicet ad eam procedi posset, aliquando habitam esse Congregationem absque

absque summi Pontificis præsentia, sed tantum cum interventu tum Cardinalium, tum Consultorum, quorum postea sensus fuit Sanctitati suæ a Secretario relatus; sic occasione Canonizationis contigit aliquando, ut dubium ex Pontificia concessione super tuto progressu ad Canonizationem fuerit propositum in aliqua Congregatione, cui summus Pontifex non interfuit, ei tamen a Secretario facta deinde fideli enarratione suffragiorum tum Cardinalium, tum Consultorum. Id autem desumitur ex decreto in causa Valentina Canonizationis tunc Beati, nunc S. Francisci Borgiæ edito die 21. Junii 1670. in quo, postquam dictum est, fuisse in Congregatione generali coram san. mem. Clemente IX. die 10. Septembris 1668. approbata nonnulla miracula, quæ post Beatificationem supervenerant, sic legitur: *Quapropter, proposito dubio per E. D. Cardinalem Chisium dictæ causæ Relatorem, an, stantibus supra narratis, Sanctissimus tuto posset devenire ad solemnem dicti Beati Canonizationem; & re mature discussa, audito prius R.P.D. Promotore Fidei tam in voce quam in scriptis, communi omnium voto censuit, Sanctitatem suam, quandocumque sibi libuerit, tuto posse ad solemnem ejusdem B. Francisci Borgiæ Canonizationem juxta S. R. E. ritum, & sacrorum Canonum dispositionem devenire, eumque definire sanctum cum Deo regnantem, atque universali Ecclesiæ proponere colendum & venerandum: Et, facta per me Secretarium eadem die de supradictis omnibus & singulis relatione Sanctissimo, Sanctitas sua medum sensum Congregationis confirmavit & approbavit, verum etiam mandavit, hujusmodi ultimum & finale decretum solemnis Canonizationis predicti Beati expediri. Quin immo ante editionem decretorum Urbani VIII. in quibus leges latæ sunt de Congregationibus coram summo Pontifice cogendis, Cardinalis Congregationis sacrorum rituum Præfectus in Consistorio tantum, vel etiam extra Consistorium summo Pontifici exponebat, causam Dei servi fuisse plene in sacra Congregatione discussam, eamque in tali statu esse, ut juxta sacre Congregationis sensum tuto procedi posset ad Canonizationem; uti percipitur ex Actis Canonizationis S. Caroli Borromæi cap. 43. collectis a Marco Aurelio Grattarola, & Mediolani editis anno 1614. Et aliquando etiam ipsi Cardinales componentes Congregationem sacrorum rituum, summo Pontifici retulerunt, se causam bene expendisse & se in ea esse sententia, ut ad illius absolutionem procedi posset; teste Francisco Penia in vita S. Raymundi de Pennasors lib. 3. cap. 34. Pontifice itaque annuente die 8. ejusdem mensis Alphonsus Cardinalis Gesualdus, Alexander Medices de Florentia, Augustinus Valerius de Verona, Dominicus Pinellus, de Monte, Gallus, Baronius, Antonianus, Ascanius Columna, Farnesius, Antonius Sanctorum Quatuor, & Perettus Cardinales Sanctissimo retulerunt, se denuo causam expendisse, & relationem Auditorum Rota diligenter vidisse atque considerasse, tandemque eam approbantes in eam venisse sententiam, ut omnia eis rite parata probataque viderentur, ut propterea posset Sanctitas sua, si vellet, ad ulteriora procedere.*

6 Temporibus vero summi Pontificis Clementis XI. duæ semper Congrega-

gregationes generales coram Sanctitate sua habitæ sunt; in quarum prima, disputato dubio de miraculis, quæ supervenerunt, fuit semper ab eodem summo Pontifice dilata resolutio, ut, ante editionem decreti super miraculorum approbatione, Divinam opem imploraret: porro in secunda, postquam, præmissis præmittendis, miracula ab eodem, accitis tum Secretario, tum Fidei Promotore, fuerunt approbata, propositum fuit subsequens dubium, *an tuto ad Canonizationem procedi possit*; sed super eo pariter, acceptis tum Cardinalium, tum Consultorum suffragiis, auditaque Cardinalis Relatoris plena ac distincta relatione de omnibus, quæ præceßerunt Beatificationem & quæ ipsam subsecuta sunt, idem Sanctissimus Pater semper distulit deliberationem, ut tum suis, tum alienis precibus Dominicum imploraret adiutorium; uti deducitur ex quatuor Canonizationum decretis in causis SS. Pii V. Andreae Avellini, Felicis a Cantalicio, & Catharinæ de Bononia typis impressis inter Acta Canonizationis eorundem edita a Justiniano Chiapponi Apostolicarum cæremoniarum Præfecto. Et hic utique ordo mihi optimus esse videtur, & retinendus ex rationibus superius adductis, ubi consimilem ordinem a tanto Pontifice servatum fuisse vidimus in Beatificatione. Non est autem amplius in more positum, ut suffragia Cardinalium, & Consultorum super dubio, *an tuto procedi possit ad Canonizationem*, committantur Secretario, ut ea conferrentur inter Acta sacræ Congregationis: conservantur etenim tantum suffragia, quæ a Cardinalibus, & Episcopis in Consistorio protulerunt, ut infra exponetur, quæ etiam mos est typis edere, quando eduntur Acta Canonizationis. Sed in eo, quod attinet ad dictum dubium, *an, supposita approbatione miraculorum, quæ supervenerunt, tuto procedi possit ad Canonizationem*, juxta præsentem consuetudinem notantur duntaxat in regestis nomina Cardinalium, & Consultorum, qui Congregationi interfuerunt, & paucis verbis adnotatur sensus uniuscujusque. Quod sane mihi videtur admodum rationabile: harum etenim causarum momentum consistit in discussione virtutum & miraculorum; ideoque, cum vix ulla possit haberi difficultas super progressu ad Canonizationem, posita tum virtutum, tum miraculorum, & eorum signanter, quæ supervenerunt, approbatione; hinc est, quod, sicuti paucis verbis suffragia Cardinalium, & Consultorum super ipso ad Canonizationem progressu absolvuntur, ita satis esse videtur, ut in regestis adnotetur sensus uniuscujusque, absque eo quod unusquisque suum suffragium in scriptis teneatur tradere Secretario.

7 At, si in unica, si in duplici Congregatione generali disputetur dubium de miraculis, quæ supervenerunt, & illud etiam, *an, stante illorum approbatione, tuto procedi possit ad Canonizationem*, cum summi Pontifices consueverint semper differre resolutionem, ut interim perpendant, quæ perpendere debent, &, quod præcipuum est, ut interim ad Dominum Deum preces effundant atque etiam effundi jubeant in eo casu, in quo censeant, procedendum esse ad Canonizationem; oportet tandem, ut suam

ut suam manifestent voluntatem , quæ manifestatio fit per editionem decreti .

8 Non uno tamen eodemque modo decretum hoc editum est , prout etiam fuit in superioribus adnotatum , quando agebatur de Beatificatione . Etenim aliquando summi Pontifices jusserunt , ut expediretur decretum Congregationis editum super miraculis , & super dubio , an tuto procedi posset ad Canonizationem ; quod est idem , ac dicere , confirmando decretum Congregationis , jusserunt , ut illud publicaretur : aliquando autem per aliam viam parum dissimilem processerunt . Temporibus sanctæ memoriæ Clementis XI. qui , juxta dicta in superioribus , semper voluit , ut duæ coram se cogerentur Congregationes generales , altera super miraculis , quæ supervenerunt , altera super tuto progressu ad Canonizationem , quique semper distulit deliberationes , nec eas , nisi Divina ope implorata , publicavit , ordo iste servabatur , videlicet fiebat Congregatio super miraculis ; tum , si post causæ examen , & effusas ad Deum preces Sanctitas sua erat in ea sententia , ut resolutio Congregationis approbari posset , ideoque approbari possent aliqua miracula , ad se vocari faciebat tum Secretarium sacræ Congregationis , tum me Fidei Promotorem , suamque exponebat voluntatem circa approbationem horum , aut illorum miraculorum : quod quidem Secretarius adnotabat in regestis sacræ Congregationis , sed decretum non edebatur , neque publicabatur . Transitus deinde fiebat ad aliam Congregationem , in qua quærebatur , an , stante approbatione horum , aut illorum miraculorum , tuto procedi posset ad Canonizationem : tum vero , si Congregatio existimabat , tuto procedi posse , & Sanctitas sua post temporum intervalla Congregationis resolutionem approbare volebat , arcessiri iterum faciebat tum Secretarium , tum me Fidei Promotorem , & edebatur atque publicabatur decretum , in quo exponebatur , nedum fuisse a Sanctitate sua approbata miracula , sed etiam dictum , tuto ad Canonizationem procedi posse . Patet sane id ex decretis quatuor causarum Canonizationis , Sanctorum videlicet Pii V. , Andreæ Avellini , Felicis a Cantalicio , & Catharinæ de Bononia typis impressis inter Acta collecta a Justiniano Chiapponi : sed id ipsum præterea demonstratur ex sequenti decreto ab eodem Pontifice edito in causa Romana , seu Polona Canonizationis B. Stanislai Kostkæ Novitii Societatis Jesu . *Proposita alias , nempe die 19. Maji 1713. in Congregatione generali sacrorum rituum habita coram SS. D. N. causa Canonizationis B. Stanislai Kostkæ Novitii Societatis Jesu , discussaque dubio , an , & de quibus miraculis constaret in casu , & ad effectum &c. Sanctitas sua , auditis tam Consul-torum , quam RR. DD. Cardinalium suffragiis , distulit ea die resolutionem , ut prius de more celestis luminis auxilium in tam gravi deliberatione imploraret . At postmodum , nempe die 12. Novembris ejusdem anni 1713. ex tredecim adductis ac discussis miraculis tria approbavit , videlicet primum instantaneæ sanationis Anna Theodora de Ligniville atrophiam , & impotentia crurum a pluribus annis*

Ton. I.

F f

labo-

laborantis, sed tamquam supra numerum, utpote secutum ante indultam eidem B. Stanislao venerationem; necnon alia duo, quæ post indultam venerationem hujusmodi supervenerunt, nempe quintum repentina sanationis Andrea Faustii Unikowski Monachi Ordinis S. Benedicti lethali morbo agrotantis, ac duodecimum instantaneæ itidem sanationis Francisci Xaverii Societatis Jesu a paralyti.

Eadem subinde generali Congregatione coram Sanctitate sua die 17. Julii proxime præteriti iterum habita, factaque a Reverendiss. D. Cardinali de Abdua juxta præscriptum decretorum plena & distincta relatione omnium in hujusmodi causa gestorum, propositum fuit ab eo dubium, an, stante approbatione trium miraculorum ut supra facta, tuto procedi posset ad solemnem Canonizationem ejusdem B. Stanislai; Ad quod omnes unanimi voce affirmative responderunt. Vero Sanctitas sua, antequam quidquam decerneret, tam suis, quam aliorum precibus se denuo ad Deum recurrere velle declaravit, ut, dirigente Domino gressus suos, eam, quam ipse monstrasset, viam tuto pede inire posset.

His demum impletis, idem SS. D. N. infra-scripta die ipsimet B. Stanislao sacra, R. P. D. Prospero de Lambertinis Fidei Promotore, ac me Prosecretario Congregationis supradictæ accitis, præsens Canonizationis ejusdem B. Stanislai quandocumque facienda decretum expediri & publicari mandavit; non modo ad novum ac insignè decus memoratæ Societatis Jesu de Cath. lica Religione multis nominibus merita, in qua scilicet B. Juvenis consummatus in brevi explevit tempora multa, sed etiam ad speciale & maxime opportunum solatium populo- rum incliti regni Polonia, ac magni ducatus Lituanie, ut, qui jam pridem patrocinio ac tutela supradicti B. Stanislai feliciter potiti sunt, ad illius præsidium in præsentibus suis necessitatibus alacrius ac ferventius implorandum excitentur. Hac die 13. Novembris 1714. Ordo tamen iste mihi non usquequaque satisfacit: haud enim video, cur fiat tantum adnotatio in regestis sacræ Congregationis, quod a summo Pontifice fuerunt hæc, aut illa miracula approbata; vel quare uno, eodemque decreto publicetur approbatio miraculorum una cum tuto progressu ad Canonizationem; quando clarior & magis aptus ordo esse videretur, si duo distincta ederentur decreta, alterum, ubi primum fuerunt a summo Pontifice approbata miracula, alterum, statim ac ipse ratam habuit resolutionem, quod tuto procedi possit ad Canonizationem.

9 Quatenus autem diceretur, quod & antiquioribus, & recentioribus temporibus in uno semper eodemque decreto facta fuit approbatio tum miraculorum, tum ulterioris progressus ad Canonizationem, ita ut minime appareat, cur ab hujusmodi instituto recedendum sit: responso tamen non deficeret, seu replicatio ad eandem animadversionem. Ideo enim citatis temporibus in uno eodemque decreto prædicta omnia fuerunt complicata, quia in una eademque Congregatione nedum fuit de miraculis disputatum, sed & actum de tuto ipso ad Canonizationem progressu: si verò tempore saltem summi Pontificis Clementis XI. introducta fuit consuetudo, ut in una Congregatione disputetur de miraculis, porro in altera



altera de tuto progressu ad Canonizationem; rationabile admodum esse videtur, ut duo edantur decreta, utque hoc pacto unicuique sessioni suum respondeat. Exemplum utique desumi potest a Beatificatione: quia enim in Beatificatione introducta fuit temporibus san. mem. Clementis XI. consuetudo, ut in una Congregatione disputaretur de miraculis, in altera vero de tuto progressu ad Beatificationem; derelictus fuit antiquus modus complicandi in uno eodemque decreto tum miraculorum approbationem, tum progressum ad Beatificationem, novusque modus introductus fuit edendi duo separata decreta, alterum super miraculis, alterum super formali Beatificatione peragenda; uti colligitur ex decretis editis in causa S. Joannis Francisci Regis supra allegatis. Statuto igitur ordine & in Canonizatione, ut duæ fiant Congregationes, altera generalis super approbatione miraculorum, altera pariter generalis super tuto progressu ad Canonizationem; aptus & congruens usus esse videretur, ut duo similiter separata decreta ederentur: & recte quidem sic factum fuit in causa S. Peregrini Latiosi, uti colligitur ex decretis editis die 4. Decembris 1724. & die 5. Februarii 1725. in causa S. Joannis de Cruce, ut ex decretis editis die 5. Februarii 1725. & die 12. Januarii 1726. & in causa S. Margaritæ de Cortona, sicuti pariter ex decretis editis die 27. Decembris 1727. & die 22. Februarii 1728. tum etiam, post dimissum a nobis Promotoris Fidei officium, id observatum in causa S. Julianæ de Falconeris. Habita quippe Congregatione generali coram summo Pontifice Benedicto XIII. super miraculis die 23. Augusti 1729. dilataque resolutione, ut Divinam interea opem Pontifex ipse imploraret, die tandem 8. Septembris ejusdem anni quatuor miracula censuit approbanda, editumque fuit decretum: coacta porro iterum Congregatione generali die 4. Octobris super tuto progressu ad Canonizationem, stante miraculorum approbatione, editum fuit separatim decretum de manifestata Sanctitatis suæ deliberatione quoad Canonizationem quandocumque faciendam.

## C A P U T XXVII.

*De serie Actorum in causis Martyrum, quæ introducuntur  
post decreta Urbani VIII. Et quæ procedunt  
per viam non cultus.*

**S**eries Actorum harum causarum æquiparatur ordini supra expolito causarum Confessorum, quæ procedunt per viam non cultus, & quæ introducuntur post decreta Urbani VIII. his tantum exceptis, quæ mox indicabuntur. In causis siquidem Confessorum præcedere debet processus auctoritate ordinaria construendus super fama virtutum & miraculorum, necnon processus ordinarius, vel Apostolicus super non cultu; præcedere etiam debet processus Apostolicus in genere;

deinde vero construitur eadem auctoritate Apostolica processus in specie super virtutibus, & miraculis: postea, resolutio prius dubio super virtutibus, si favorabiliter resolvatur etiam dubium duorum ad minimum miraculorum, cogitur Congregatio; in qua si fuerit decretum, posse tuto procedi ad Beatificationem, stante approbatione virtutum & miraculorum, fit demum sollemnis in basilica Vaticana Beatificatio. Eadem autem perfecta, si supervenerit notitia miraculorum, quæ intercessione Beati Deus operari dignatus fuerit, fit super eis auctoritate Apostolica processus; ex quibus duobus saltem approbatis, disputandum proponitur, an, stante eorum approbatione, tuto deveniri possit ad Canonizationem: & hoc quidem favorabiliter resolutio, ad solemnem proceditur Canonizationem, præmissis nonnullis aliis, de quibus infra sermonem faciemus.

2 In causis vero Martyrum, quæ procedunt per viam non cultus, & quæ introducuntur post decreta Urbani VIII. posita opinione, de qua infra, quod in causis etiam Martyrum requirantur miracula seu signa, fit processus auctoritate ordinaria, nequaquam super fama virtutum & miraculorum, sed super fama Martyrii, causa Martyrii, & miraculorum seu signorum; licet etiam expediat aliqua inferere de virtutibus, cum facilius pronuntiari possit de Martyrio, & causa Martyrii, si earum notio habeatur. Fieri etiam debet processus ordinarius, vel Apostolicus super non cultu. Porro disputandum esset dubium de fama Martyrii, & signorum seu miraculorum, dependendo a novo processu Apostolico conficiendo; sed, ut alibi videbitur, summi Pontifices in causis Martyrum procedentibus per viam non cultus solvere consueverunt ab hac Apostolica inquisitione in genere.

3 Post hæc in causis Martyrum disputatur dubium, *an constet de Martyrio, & causa Martyrii*, sicuti in causis Confessorum disputatur illud, *an constet de virtutibus*. Præterquamquod de eo, quod attinet ad hanc æquiparationem, nonnulla videntur adnotanda.

4 Primum est, quod in causis Confessorum, resolutio dubio super virtutibus, decretum publicatur, in quo, prævio sacræ Congregationis consilio, summus Pontifex pronuntiat, constare de virtutibus in gradu heroico; & decretum quidem hoc publicatur, etiam antequam transitus fiat ad discussionem miraculorum: in causis vero Martyrum nonnulli putant, vel suspendendam esse resolutionem super Martyrio, & causa Martyrii usquequo fuerint examinata & approbata miracula seu signa, sub obtentu, quod statim ac responsum fuerit, constare de Martyrio, & causa Martyrii, approbata censeatur perseverantia finalis in Fide & Charitate, ita ut superflua remaneat discussio dubii de signis & miraculis; vel adnotandam in regestis sacræ Congregationis approbationem Martyrii, & cause Martyrii, absque eo quod ad ejus publicationem procedendum sit, quæ deinde fieri debeat una cum approbatione miraculorum seu signorum. Sed, utcumque sit; utrum scilicet resolutio approbans Martyrium

adno-

adnotanda sit tantummodo in regeſtis ſacræ Congregationis, minime publicanda ante approbationem ſignorum & miraculorum; an vero eadem ſit publicanda ante miraculorum diſcuſſionem, ut in cauſis Confeſſorum publicatur reſolutio approbans virtutes (utroque enim modo negotium hoc expleri poteſt, & utroque etiam modo expletum fuit: in cauſa quippe B. Petri de Arbues adnotatum utique fuit in regeſtis decretum, conſtare de Martyrio, & cauſa Martyrii, ſed nequaquam editum fuit, niſi contextim cum decreto approbante miracula & ſigna; in cauſa vero B. Joannis de Prado editum fuit decretum approbans Martyrium, & cauſam Martyrii, tum etiam unum ex ſignis ſeu miraculis, ideoque nondum completo iudicio ſuper miraculis & ſignis, quæ ex infra dicendis in numero binario faltem ſunt neceſſaria, ut ad Martyris Beatificationem procedatur) cavendum omnino eſſe videtur ab eorum opinione, qui cenſent, ſuſpendendam eſſe reſolutionem ſuper Martyrio, & cauſa Martyrii, uſquequo fuerint approbata ſigna ſeu miracula; primò, quia id cederet in maximum cauſarum detrimentum, in quibus ſubſtantiale dubium de Martyrio, & cauſa Martyrii, quod favorabiliter reſolvi poſſet, & aliquando reſolutum fuiſſet unanimi, vel fere unanimi Suffragatorum conſilio, periculoſo iterum experimento ſubjiceretur, dilata ejus reſolutione ad tempus, quo agitur de approbandis ſignis ſeu miraculis, ob factam videlicet interim mutationem Conſultorum ſacræ Congregationis, ex cauſa vel obitus, vel diſceſſus ab Urbe, vel ſimilium; deinde, quia id adverſaretur uſui ſacræ Congregationis, quæ in cauſa B. Joſaphati Pollocenſis, in cauſa B. Joannis de Prado, & in cauſa S. Joannis Nepomuceni reſpondit, conſtare de Martyrio, & cauſa Martyrii; antequam fieret diſcuſſio miraculorum ſeu ſignorum. Et parum proſecto urget, futuram eſſe ſuperfluam diſputationem de ſignis & miraculis, poſtquam reſponſum fuit, conſtare de Martyrio, & cauſa Martyrii; tum quia dubium de Martyrio, & cauſa Martyrii in cauſis Martyrum æquivalet dubio de virtutibus in cauſis Confeſſorum; adeo ut, ſicut in his, reſoluto dubio ſuper virtutibus, utiliter inquiritur in miracula, ita id ipſum cenſendum ſit etiam in illis: tum quia, etſi, approbatis Martyrio, & cauſa Martyrii, approbata dici poteſt perfeverantia finalis in Fide & Charitate, ut, approbatis virtutibus in gradu heroico, dici poteſt, ſanctitatem quoque ipſam fuiſſe approbatam; quemadmodum tamen, hoc minime refragante, in cauſis Confeſſorum adhuc diſputatur dubium de miraculis, non niſi quia Eccleſia nedum ſanctitatis certitudinem deſumere intendit ex teſtibus, qui de virtutum exercitio aſſeveraverint, ſed & eandem ſanctitatem comprobari expoſcit ex aliis teſtibus, qui miracula referant a Deo interceſſione ſervorum Dei, de quorum virtutibus actum eſt, patrata; ita etiam in cauſis Martyrum, poſita opinione de neceſſitate ſignorum & miraculorum, diſputatur dubium de iſdem, eo quod Eccleſia verum Martyrium, & veram cauſam Martyrii deſumere intendit nedum ex teſtibus, qui totam ſeriem

seriem Martyrii deposuerunt, verum etiam ex aliis, qui signa & miracula renuntiant a Deo patrata ad ostendendam Martyrii, & causæ Martyrii veritatem.

5 Alterum notandum est, quod in causis Confessorum, quando disputatur dubium de virtutibus, non est permixtum illius resolutionem suspendere, ut interim de miraculis decernatur, atque ut unico contextu utrumque dubium resolvatur. Ex Ordine quippe Romano Cardinalis Cajetani, & ex Romano Cæremoniali supra relatis plene desumitur, resolvendum prius esse dubium de virtutibus, quam transitus fiat ad discussionem miraculorum: deinde vero, quod caput est, cum in causa B. Hyacinthæ de Marefcottis, dum fungebamur munere Fidei Promotoris, propositum fuisset dubium, an, *suspensa resolutione super virtutibus, transitus fieri posset ad examen miraculorum*, nobis ipsis ratione officii contra petitionem, Postulatoribus autem pro petitione strenue pugnantibus, Congregatio generalis coram sanctæ memoriæ Clemente XI. coacta, negatione respondit, ut ex sequenti decreto edito die 6. Decembris 1712. plene desumitur: *In causa Viterbien. Beatificationis, & Canonizationis servæ Dei Sororis Hyacinthæ de Marefcottis super dubio, an in casu, de quo agitur, hoc est, nondum resolutis dubio super virtutibus, congruat ad ulteriora procedere in discussione miraculorum; sacra eadem rituum Congregatio censuit, & Sanctissimus approbavit, non congruere, quod procedatur ad ulteriora in discussione miraculorum, suspensa resolutione super dubio virtutum, sed permittendam esse novam causæ propositionem coram Sanctissimo super eodem dubio virtutum.* Atque ita quidem in ipsa causa subinde factum est.

6 Quamvis enim diceretur, quod in dubio virtutum occurrunt aliquando difficultates petitiæ vel ex defectu probationum, vel ex actuum qualitate, ita ut pro eo dubio resolvendo opus esse videatur miraculorum assumere discussionem; item, quod, si nonnulli asserunt, procedi posse ad Canonizationem alicujus servi Dei, quando ejus intercessione Deus miracula operatur, licet non constet de virtutibus, aut quia testes non adsunt quidquam de eis deponentes, aut quia demum nullus scripsit ejus gesta, ut adnotavit Cardinalis de Lauræa in 3. sent. tom. 4. disput. 20. de miraculis artic. 25. §. 4. num. 1119. poterit potiori jure judicium suspendi de virtutibus, ut interim de miraculis decernatur; denique, quod ita factum fuit in causa Segobien. S. Joannis de Cruce.

7 Hæc nihilominus, & similia non visa fuerunt apta ad rem, de qua agebatur, hoc est ad suadendum, quod, *suspensa deliberatione super virtutibus, transitus fieri posset ad examen miraculorum.* Nam, si probationes sufficientes deficiant, libere respondendum est, non constare de virtutibus. Si in earum examine occurrant actus ambigui, aut extraordinarii, totius vitæ contextus bene perpensus patefacit, utrum a bono, an a malo sine profluxerint: neque regulæ defunt alibi exponendæ, quæ demonstrant, num actus extraordinarii a Divina inspiratione, & ab instinctu supra naturam

ram emanaverint. Effatum vero Cardinalis de Lauræa equiparari potest dicto aliorum, qui docent ad Canonizationem procedi posse, si constet de virtutibus, licet non constet de miraculis; uti refert Pater a Panormo olim sacre Congregationis Consultor *in suo scrutinio doctrinarum cap. 3. artic. 14. num. 18.* Quocirca, sicuti dictum hoc in usum non admittitur, ita nec illud. Postremo exemplum causæ S. Joannis de Cruce exposito modo minime procedit: judicatum quippe fuit, constare de virtutibus, antequam transitus fieret ad discussionem miraculorum; sed, quia opus erat, ut ad submovendam quamdam difficultatem nonnulli actus capitulares viderentur, mandatum fuit, ne decretum publicaretur, nisi facta discussione eorum, quæ in quibusdam libris continebantur; quemadmodum liquet ex sequenti decreto: *Ad relationem Eminentiss. Card. Ginetti in Congregatione sacrorum rituum habita coram Sanctissimo declaratum fuit, constare de virtutibus in gradu heroico in causa servi Dei Joannis de Cruce, ideoque in ea ad ulteriora procedi posse; die 7. Septembris 1662.* Hujusmodi decretum minime publicari, Sanctissimus annuit, nisi, previo assensu Sanctitatis sue, postquam exhibitum, discussum, & approbati fuerint libri Actorum capitularium, necnon processus fabricati in tribunali Nuntiature Apostolica Hispaniarum. Et insuper Sanctitas sua pariter imperavit Nuntio Hispaniarum, ut ejusmodi libros transferibi & extrahi curet, & alia documenta ad sacram Congregationem transmittat.

8 In causis vero Martyrum, cum facilius expediantur, quam causæ Confessorum, facile etiam permittitur, ut unâ cum dubio de Martyrio, & causa Martyrii alterum proponatur de signis seu miraculis; uti colligitur ex rescripto in causa Brasiliens. Ignatii Azevedo, & sociorum die 7. Januarii 1671. Item in causa B. Joannis de Prado die 3. Aprilis, & die 29. Maji 1688. propositum fuit dubium, an constaret de Martyrio, & causa Martyrii: atque editum fuit rescriptum, ut examinarentur signa seu miracula; discussis autem signis & miraculis die 28. Januarii 1692. & die 3. Octobris 1693. sacra Congregatio die 10. Martii 1703. mandavit, ut causa proponeretur super dubio Martyrii una cum altero super signis & miraculis. Et in causa quoque Beati nunc S. Fidelis de Sigmaringa facta est contextim propositio & resolutio utriusque dubii, de Martyrio videlicet, & de signis seu miraculis; ut habetur ex decreto edito die 15. Februarii 1729. in ejus vita typis edita Romæ eodem anno pag. 175. & sequen. Et coherenter ad hæc, cum post nostram ad summum Pontificatum assumptionem proposito in Congregatione preparatoria sacrorum rituum dubio super virtutibus venerabilis servi Dei Pauli Buralis Cardinalis de Aretio, plerique Consultores, suspensa resolutione super virtutibus, respondissent, nobis esse supplicandum pro facultate agendi de miraculis, ut tutius ferri posset iudicium super virtutibus, memores antiquæ praxis sacre Congregationis, Secretario Congregationis nobis pro facultate instanti respondimus, ut mox videbitur; & jussimus, responsum inter regesta sacre Congregationis referri: *Relato per me infra scriptum Secretarium consilio plerorumque Con-*  
sul-

*sultorum in Congregatione preparatoria super virtutibus venerabilis servi Dei Pauli Buralis Cardinalis de Aretio nuncupati die 3. currentis Aprilis expectentium, ut ad iudicium de virtutibus ejusdem servi Dei certius ferendum, ex indulto Pontificio liceret miracula quoque una cum virtutibus proponi, simul & expendi; SS. D. N. Benedictus Papa XIV. ad mentem Congregationis generalis in simili causa coram fel. recor. Clemente Papa XI. habita jam die 6. Decembris 1712. sibi tunc Promotori Fidei optime perspectam, respondit: In causis non Martyrum, cum ex veteri Sedis Apostolica insinuo, ac more Majorum in bullis summorum Pontificum Nobis expresso & commendato, canonizandorum sanctitas, seu virtutes in gradu heroico debeant utroque, hominis videlicet per se, ac Dei per miracula loquentis, testimonio probari, rite atque ordinate procedendo, non prius esse de Divino testimonio querendum, quam humano satis ( quantum est ex hac parte ) constiterit probari: ad differentiam doctrina, seu mysteriorum Fidei, qua fides humano nequeunt ingenio comprehendere, ita Divino potius, quam humano, pertinere testimonio confirmari, juxta illud Marc. ult. Prædicaverunt ubique, Domino cooperante, & sermonem confirmante sequentibus signis. Itaque non esse in hac, aut alia causa simili ulla tenens miscenda seu complicanda virtutum, & miraculorum dubia, sed separatim ac successive proponenda: immo nec transponenda esse, aut differenda, ut suspensa resolutione super virtutibus, ad miracula expendenda procedatur. Atque ita Sanctitas sua in causis non Martyrum servari mandavit; hac die 10. Aprilis 1742. Per quod decretum rejectus censendus est etiam modus in nonnullis causis Beatificationum aliquando insinuat, referendi videlicet occasione disputationis dubii super virtutibus servorum Dei Confessorum miracula eorum intercessione a Deo patrata: non quidem ut ad eorum approbationem esset instituendum examen; sed ut iisdem perlectis, suffragaturi, quatenus vellent, possent suum efformare de virtutibus iudicium, juxta decretum Congregationis particularis in causa servi Dei Francisci Caraccioli die 18. Septembris 1736. hoc enim est misceere virtutes, & miracula, quod in nostro decreto vetitum est. Nec ullo modo meretur asferri exemplum causæ servi Dei Francisci Caraccioli; cum favorable super virtutibus dicti servi Dei responsum fuerit a nobis prolatum, prævio consilio Congregationis generalis sacrorum rituum coram nobis habitæ, nulla habita consideratione testium de miraculis testimonium redditum, sed tantum testium virtutes in gradu heroico referentium. Præterquamquod addere fas sit, quod vel miracula proferuntur, & una cum virtutibus exponuntur cum animadversionibus Fidei Promotoris nedum super virtutibus, sed etiam super miraculis, vel cum animadversionibus ejusdem Fidei Promotoris tantum super virtutibus. Si secundum miraculorum narratio parum aut nihil prodesse poterit, cum ex animadversionibus lumen pro veritate assequenda defumatur. Si primum, in re ipsa complicatum utrumque dubium de virtutibus, & miraculis, tacito dubii nomine super miraculis: quod sane admitti non potest in causa de necessitate non definienda, & in qua si difficultates magnæ occurrunt vel quoad*

quoad probationem, vel quoad relevantiam, cum agitur de virtutibus, respondendum est, *non constare*: & si de sufficientia probationis, & de virtutum relevantia rationabile dubium non apparet, respondendum est, *constare*.

9 Expleto iudicio super Martyrio, & causa Martyrii, necnon super signis seu miraculis, proponitur in Congregatione generali dubium, *an, stante praeiudiciorum approbatione, tuto deveniri possit ad solemnem Beatificationem*. In memorata causa B. Joannis de Prado editum fuit die 27. Martii 1712. decretum, in quo sanctae memoriae Clemens XI. censuit, constare de Martyrio, & causa Martyrii, & de uno tantum miraculo tertii generis: postea, cum quidem Postulatores satis esse putarent pro tuto progressu nedum ad Beatificationem, verum etiam ad Canonizationem, approbationem Martyrii, & causae Martyrii, & unius miraculi; me tunc Fidei Promotoris officium exercente, disputatum fuit in Congregatione generali coram eodem san. mem. Clemente XI. sequens dubium, *an, stante decreto per SS. D. N. edito, constare videlicet de Martyrio, & causa Martyrii, necnon de uno tantum miraculo tertii generis, tuto procedi possit ad ulteriora, hoc est ad Beatificationem, sive ad Canonizationem; sed a Sanctitate sua publicatum fuit decretum istud: Sanctissimus D. N. auditis suffragiis Consultorum, & DD. Cardinalium sacrae rituum Congregationis, suspensa resolutione articuli in abstracto, an, quomodo, & quare ad Beatificationem Martyrum requirantur miracula; super quo articulo Sanctitas sua, inherendo praxi, quam alias tenuit hac sacra Congregatio, dixit, se nihil nunc velle declarare, solummodo decrevit in casu, de quo agitur, expectandam esse approbationem alterius miraculi seu signi, ad hoc, ut tutius deveniri possit ad Beatificationem servi Dei Joannis de Prado; die 29. Novembris 1712. Et his utique cohaerenter, proposita die 17. Februarii anno 1728. discussione alterius miraculi seu signi in Congregatione generali coram san. mem. Benedicto XIII., dubioque favorabiliter resoluta, & Sanctitate sua sanationem propositam approbante tamquam miraculum tertii generis, expeditum fuit decretum die 5. Martii 1728. sollemnis Beatificationis suo loco, & tempore peragenda; prout deinde perfecta fuit in basilica Principis Apostolorum die 24. Maji ejusdem anni: ita ut amplius dubitandum non sit seu de necessitate interventus duorum miraculorum aut signorum in causis Martyrum pro Beatificatione obtinenda, seu de sufficientia duorum miraculorum etiam tertii generis; eoque magis, cum ad Beatificationem Petri de Arbues, & Martyrum Gorcomiensium, praevia duorum miraculorum approbatione, ventum sit, ut ex decretis infra referendis constabit. Nec amplius quoque dubitandum erit, an in causis Martyrum procedentibus per viam non cultus, sit obtinenda sollemnis Beatificatio, antequam ad Canonizationem procedatur. Urget quippe non modo memoratum exemplum causae B. Joannis de Prado, sed urgent etiam exempla antecedentia & subsequencia aliarum causarum Martyrum, quae processerant & processerunt per viam non cultus. Enim*

vero ante causam B. Joannis de Prado processum fuit ad Beatificationem in causis Martyrum Josaphati Pollocensis, & supradictorum Petri de Arbues, ac Gorcomiensium, uti colligitur ex Constitutione 304. Urbani VIII. Bullarii tom. 5. & ex Constitutione 139. Alexandri VII. Bullarii tom. 6. & ex alio Brevi Beatificationis Martyrum Gorcomiensium, quod in Appendicibus impressum exhibebitur: tum etiam in causa ipsa B. Fidelis de Sigmaringa, quæ processit per viam non cultus, quæque expedita fuit post causam B. Joannis de Prado, solemniter expleta fuit Beatificatio post approbationem Martyrii, & causæ Martyrii, necnon signorum seu miraculorum, omissa tantum Congregatione generali, in qua de more disputandum erat dubium, an, stante approbatione Martyrii, & causæ Martyrii, necnon signorum seu miraculorum, tuto procedi possit ad Beatificationem. Quod quidem procul dubio disputatum fuisset, nisi san. mem. Benedictus XIII. ab eadem disputatione Postulatores solvisset. At pleræque tamen recensitæ Martyrum causæ complementum solemniter Canonizationis expectant, idque profecto obtinere non poterunt, nisi novis supervenientibus signis seu miraculis, necnon facta duorum ad minimum approbatione, uti fit in causis Confessorum, & uti quoque animadvertit Gravina tom. 4. continuationis secunda partis Catholic. præscript. pag. 350.

## CAPUT XXVIII.

*De Auctorum opinionibus quoad signa, & miracula in causis Martyrum.*

**I**N capite antecedenti positum fuit, miracula seu signa esse in causis Martyrum necessaria pro obtinenda Beatificatione, & Canonizatione. In præsentī autem exponendæ sunt Auctorum opiniones super eadem necessitate. Porro in sequenti tractabitur uberius de Ecclesiæ consuetudine, necnon de usu Sedis Apostolicæ quoad eandem post introductam disciplinam privativæ discussionis, & resolutionis causarum Beatificationis, & Canonizationis penes ipsam sanctam Sedem.

2 Nonnulli itaque constanter docent, miracula in Martyrum Canonizationibus non esse necessaria. Ita enim Augustinus Triumphus *de potest. Eccles. quæst. 16. art. 3.* ubi proposita quæstione, *utrum Papa eundem modum servare debeat in Canonizatione Martyrum, & Confessorum*, postquam inter contraria argumenta secundo loco proposuit illud, quod sequitur: *Signa sanctitatis requiruntur in Martyre, sicut in Confessore; sed miracula sunt signa attestationis sanctitatis; ergo operatio miraculorum requiritur in Canonizatione utriusque; sic eidem respondet: Ad secundum est dicendum, quod plus est inquirere per causam, quam per signa. Quamvis ergo miracula sint signa attestationis sanctitatis, non tamen sunt per se causa, cum possit convenire malis miracula facere, ut supra dictum est: sed pati pro Christo, & pro confessione Fidei est per se*



per se causa sanctitatis; unde, ista existente absque omni signo miraculoso, debet aliquis pro Martyre canonizari. Quam quidem sententiam fuisse amplectuntur Turrianus in 2. 2. tract. de Fide disp. 17. dub. 2. Rocca de Canonizat. SS. tom. 1. oper. cap. 35. ubi scribit: *Martyrium itaque pro Christo Domino, proque Fidei confessione, Charitate intercedente, susceptum, (cum ex se causa sanctitatis existat) facit, ut aliquis, nulla alia nec miraculorum, nec operum misericordie inquisitione prævia (quæ tamen pro Confessoribus canonizandis est necessaria) pro Martyre canonizari, & Sanctorum catalogo adscribi queat, ac debeat*; Rodolphus in vita S. Bonaventuræ part. 2. art. 2. Macedo controv. select. controv. 4. cap. 2. in principio §. Observandum tamen; Verticell. de Apost. Miss. tit. 1. quest. 33. num. 22. Carena de S. Officio part. 2. tit. 17. §. 12. nu. 42. Lezana consult. moral. 1. num. 16. Molphei. consil. 46. num. 61. Gonzal. in cap. 1. sub num. 5. vers. In Martyribus autem, tit. de Reliq. & venerat. SS. Bordon. controv. 13. num. 34. Cardinalis de Lugo tom. 1. de just. & jur. disputat. 10. sect. 1. num. 4. Pasqualig. ad Lauret. de Franchis de controversiis inter Episcopos, & Regulares num. 1238. Silveira in opusculis opusc. 2. resolut. 21. quest. 4. num. 16. Auctor tractatus de Canonizatione Sanctorum ad Cardinalem Montis Regalis cap. 4. ubi hæc habet: *Et certe ex dictis clarum est, sanctos Episcopos olim miracula non exegisse, sed tantum penam, & causam; quas ob causas Doctorum communis assertio est, non esse opus in Martyre tanta inquisitione, quanta est opus in Confessore, & Ecclesia in Officio Martyrum nullam miraculorum mentionem facit; & latissime Baldel. Theolog. moral. tom. 2. lib. 3. disput. 14. per tot. Joannes Franciscus Pavinus in relatione causæ S. Bonaventuræ part. 2. art. 2. atque Auditores Rotæ in relatione Martyrum Japonensium art. 3., & in relatione Martyris Iosaphat Pollocensis part. 2. §. Quam assertionem. Nec omitti potest auctoritas eruditissimi Christiani Lupi, qui tom. 3. ad Synod. gener. & provinc., & signanter ad quartum Concilium Romanum sub S. Leone IX. pag. 570. & sequent. hæc habet quoad miracula non requirenda in Canonizatione Martyrum: *His enim a Christo Domino facta est singularis promissio; ideoque, professam in carcere Fidem, & constantem pro ipsa mortem esse consummatam ipsorum gloriam, seu iustitiam, scripsit S. Cyprianus, & aliud nihil ad ipsorum requisivit Canonizationem.**

3 Alii vero adversam sequuntur sententiam, & idcirco pugnant pro necessitate miraculorum etiam in causis Martyrum. Ita Ostiensis in summa. titul. de Reliq. & venerat. SS. num. 4. De Martyribus autem non fit tanta examinatio, sed queritur tantum de miraculis, & causa, propter quam passi sunt: eique consentiunt S. Antoninus in summa part. 2. tit. 12. cap. 8. de Reliquiis §. 1. Rosella in v. Canonizatio, versic. Vide quantum; Auctor candelabri aurei correcti cap. 17. num. 7. Albericus in dictionario, v. Canonizatio, vers. Martyribus vero; Castellan. de Canonizat. SS. qu. 5. vers. 6. Malvet. de Canoniz. SS. dub. 3. num. 5. post medium, inter tractatus magnos tom. 14. fol. 99. a tergo, versic. Martyribus vero; Mascard. de probationibus lib. 1. concl. 261. num. 9. Chassaneus in catalogo gloria mundi part. 3. considerat. 49. versic. In

*Martyribus enim; Eminentissimus Cardinalis Petra in suis laudatissimis comment. ad Constit. Apost. tom. 2. pag. 108. num. 16. Et sequentibus, Et tom. 3. pag. 130. num. 21. Et sequentibus; Matta de Canoniz. SS. part. 4. cap. 7. num. 27. Et sequentibus; Pignatell. consult. 72. num. 9. tom. 4. Pirhing. ad tit. Decretal. de Reliq. & venerat. SS. num. 4. ibique Anaclel. §. 1. num. 11. Hurtado de vero Martyrio tract. 7. resolutione 44. §. 4. ubi: Canonizatio, aut vindicatio Martyrium facta a summo Pontifice per diploma & bulla expeditionem, requirit necessario tamquam formam, quod fiat inquisitio miraculorum ad minus post mortem factorum a Martyre, qui vindicatur; quod adeo certum existimo, quod summus Pontifex, sicut nunquam huc usque vindicavit Martyrem, nisi probatis ex ipso miraculis.... ita nunquam vindicabit, nisi probentur de ipso, & ad ipsius invocationem vera miracula; Matthæus. in praxi Theolog. Canon. ad causas Beatificat. & Canoniz. tract. 4. cap. 3. a num. 1. ad 31. atque inter Eruditiones id ipsum docere visi sunt Molanus in natali Sanctorum Belgii ad diem 4. Aprilis, ubi, facta mentione Hildeberti Abbatis Martyris Gandensis pro Christi Fide interfecti, hæc habet: Nec mirum alicui videatur, huius Martyris nullam fieri memoriam in Gandavensi Ecclesia, nam & alii fuerunt in Belgio Martyres, quorum Martyria non celebrantur; satis enim fuit Majoribus nostris, eos Martyres patris festis honorare, qui post sua Martyria miraculis claruerunt, qua nulla fortassis Hildebertus coronatus edidit; & Joannes Mabillon. in epistola ad Theophilum Gallum sub nomine Eusebii Romani de cultu SS. ignotorum §. 17. & rursus §. 18. ubi: Verum sac, ista miracula (loquitur de miraculis, quæ patrantur intercessione sanctorum Martyrum ignotorum) vera et certa esse: sane hæc præcessisse debuerant, quo Sancti illi pro veris ac certis haberentur, et colerentur; nec subsequens miracula factum præcedens comprobant.*

4 Inter has invicem oppositas sententias nonnulli porro quasdam medias opiniones secuti sunt. Fortunatus Scacchus in suo opere *MS. de Confessoribus, et Martyribus* sect. 10. cap. 2. ita loquitur: Advertendum quoque erit, multipliciter posse contingere, aliquem interfici in odium Christianæ et Catholicæ Religionis; servata videlicet forma iudicii, vel nulla servata forma iudicii: priori modo aliquis Dei servus carceri mancipatur, interrogatur de religione, torquetur, ut neget Christum; quem cum negare abnuerit, capite, vel alio mortis genere condemnatur, et idem indictam pro Christo mortem acceptat: nulla vero servata iudicii forma, aliquis Dei servus in odium Religionis Catholicæ interficitur, quando conspiratione aliqua nonnullorum Ethnicorum, Schismaticorum, vel Hæreticorum facta interficitur, ut S. Petro Martyri contigisse legimus; vel etiam conspiratione impiorum, sicuti S. Thome Archiepiscopo Cantuariensi, qui ab impiis interfectus legitur, quod iura Ecclesiastica contra Regem Angliæ tueretur, cui gratum se facturos cum nonnulli existimarent, eundem adorfi interfecerunt; in odium quoque virtutis alicujus Evangelicæ, aliquis Dei servus interficitur ab aliquo Principe, aut Magnate, nulla servata iudicii forma, sed ex ira, et furore per se ipsos, vel suos ministros: et, quia hi omnes sanguine fuso Christo testimonium reddunt, de utrisque quaritur, an ad illorum Canonizationem miracula requi-

*requirantur* : & , hac quidem distinctione præmissa , concludit ipse Scacchus , miracula non esse necessaria in Canonizatione Martyrum primi generis , cum certa sit Ecclesia de ultimo actu voluntatis , acceptionis videlicet mortis pro Christo , & mortis utique in odium Christi inflictæ ; sed e contrario eadem esse necessaria in Martyribus secundi generis , cum in his de perseverantia finali & ultimo voluntatis actu Ecclesiæ non constet ; quæ idcirco miracula cogitur expectare , ut sic interfectum publico cultui exponat , eum inter Beatos , vel Sanctos recensendo .

5 Alii autem per aliam viam incedunt ; distinguendo videlicet inter necessitatem , & utilitatem . Ita Castellin. *de certis. glor. SS. cap. 8. punct. 20. per tot.* , & latius in alio , quem edidit , tractatu de *inquisitione miraculorum in SS. Martyrum Canonizatione* ; quippe *conclus. 4. pag. 47.* hæc habet : *In solemnibus vero Martyrum Canonizatione simpliciter et absolute non sunt necessaria miracula etiam post mortem operata* ; tum *conclus. 5. pag. 50.* ait : *Non debet , nec potest negari , quin miracula in Canonizatione Martyrum vel in actu ipsius Martyrii , seu post Martyrium operata sint vere utilia , ut clarius & tutius cunctis pateat per huiusmodi signa , Martyrem , seu Martyres , de quibus agitur , pro Fide Christi , & in Fide Charitate formata , corporis mortem sustinuisse* : Et *pag. 141.* resumendo materiam docet , si plane & sufficienter constet aliunde de evidentia causæ , ob quam quis vere pro Christo patitur Martyrium , tunc nullo pacto miracula requiri ; subdit tamen , non esse omnino superflua , si voluntarie adhibeantur : si vero non plane constet de evidentia causæ Martyrii , concludit , miracula non solum esse valde utilia , sed etiam necessaria . Cum ipso autem Castellino concordat Gravina in *continuat. partis 2. tom. 4. Catholic. præscript. pag. mibi 350.* & Cardinalis de Laueræ in *3. sent. part. 2. tom. 3. disp. 20. art. 8. num. 127.* atque in *suffragio per eum lato in causa Martyrii B. Joannis de Prado* , ubi sic locutus est : *De signis seu miraculis , licet multa in hoc Martyrio adsint , dico , nunquam esse curandam ; nisi , cum adest dubium , an pro Fide , vel pro motivo politico aliquis Catholicus interficiatur , ad tollendum dubium miracula requiruntur* : tum etiam ejusdem sententiæ meminit Hurtado de *vero Martyrio resolut. 44. §. 3.*

6 Item , ut prosequamur enarrationem aliarum opinionum , alii sunt qui tradunt , non esse in more habendam sententiam , quæ miracula excludit , nisi quando cum Martyrio aliquod prodigium aut signum contigerit . Contelor. de *Canonizat. SS. cap. 21. num. 31.* ita sentit . Quare P. Blancus ex Dominicana Familia Secretarius olim Congregationis Indicis , & vere doctus Consultor sacræ Congregationis rituum in suo , quod edidit , suffragio in causa Martyrum Japonensium ita locutus est : *Duo in præsentis causa sunt discentiæ ; primum , an in causis Martyrum sint necessaria miracula ; secundum , an constet de primo , secundo , nono , & decimoquarto Martyrio : Quod attinet ad primum ; si proponatur dubium in genere , sententia negans , in causis Martyrum esse necessaria miracula , probabilitate non caret , dummodo tamen sine ipsis Deus aliqua alia speciali via manifestis indicis , servorum suorum sanctissimo*

*sanctimoniam Ecclesia militanti revelaverit. In causis enim tanti momenti induci non debet Ecclesia ad solemnem Martyrum Canonizationem solo humano testimonio, atque favore pulsata. Et ita facillime conciliatur praxis hujus sacre Congregationis cum antiqua Ecclesia consuetudine; quæ, licet sine miraculis quandoque declaraverit, quosdam servos Dei pro Christo interfectos fuisse veros Martyres, nunquam tamen id præstitit absque alio æquivalenti motivo desumpto ex aliquo, quod eveniret sive ante Martyrium, sive in ipsa actu Martyrii, sive post. Hos sequitur supra citatus Em. Cardinalis Petra alleg. tom. 3. pag. 231. num. 28. ubi ait, sufficere prodigia & signa, si adfint concludentes probationes Martyrii.*

7 Placuerunt insuper aliis aliæ opiniones. Quandoquidem nonnulli apud Baldellum *Theolog. moral. tom. 2. lib. 3. disp. 14. num. 18.* dixerunt, miracula in illis Martyribus requiri, qui non fuerunt, dum viverent, dignitate aliqua, vel vitæ sanctitate insignes; secus in aliis, qui, dum viverent, aut dignitates, aut vitæ sanctitatem adepti sunt: quibus etiam assentiri videtur Bordon. *de miraculis medit. 4. sub num. 17.* ubi: *Nihilominus eorum Martyrum vita, qui nullum fecerunt miraculum, diligenter est examinanda; quæ si laudabilis & irreprehensibilis probata fuerit per antecedens ad minus triennium, videtur probata sanctitas per Martyrium.* Alii demum distinxerunt inter Beatificationem, & Canonizationem, asserendo, pro Martyrum Beatificatione miracula non requiri, sed eadem esse pro Canonizatione necessaria.

8 Si in hoc capite quæstio esset resolvenda, an requirantur, necne, miracula in causis Martyrum, exponenda esset in eo Ecclesiæ & Sedis Apostolicæ disciplina, sine qua quæstio ipsa absolvi non potest; sed, quia caput istud nimis prolixitatis vitium incurreret, quæstionis resolutio una cum consuetudine Ecclesiæ & Sedis Apostolicæ ad caput sequens remittitur: & ideo in hoc tantum examinandæ & resolvendæ proponuntur mediæ illæ opiniones, de quibus novissime sermo habitus est. Et quantum quidem attinet ad duas ultimo loco relatas, mihi videntur eæ quacumque probabilitate carere. Si enim in causis Martyrum de necessitate inquiratur in Martyrium, & causam Martyrii, nec fortasse refert, utrum aliquis fuerit antea sceleribus inquinatus, teste Cardinali Bellarmino, aliisque infra referendis, dummodo tamen mortem pro Christo patiatur; nemo est qui non videat, minime probabilem esse eorum opinionem, qui volunt, miracula requiri in illis, qui ante Martyrium non fuerunt aliqua dignitate præditi, vel sanctitate illustres, ea vero in aliis non requiri, qui prædictas, dum viverent, habuerunt qualitates; sicut ad rem bene argumentatur Baldell. *loc. cit.* *Talis distinctio est plane nova, & voluntaria, neque ullum habet Auctorem classicum sive Theologum, sive Canonistam; et Christus Dominus, sine ulla distinctione, aut acceptatione personarum, sed maxime universaliter promisit beatitudinem iis omnibus, qui pro ipsius confessione mortem subiissent; et usus Ecclesia in colendis Martyribus solum fuit, ut nulla ratio haberetur*

*beretur sive de dignitate, sive de sanctitate, dum viverent, sed solum de morte, et causa mortis.* Porro, si ex supradictis deprehenditur, etiam in causis Martyrum procedentibus per viam non cultus primo ad Beatificationem, deinde ad Canonizationem deveniri; nulla ratio suadet, miracula esse quidem posse necessaria, ut Martyr per summum Pontificem præceptive colendus proponatur universali Ecclesiæ; eadem vero minime requiri, quando per eundem Pontificem Martyr ex permisso proponitur colendus, non Ecclesiæ universæ, nec universo orbi, sed aliquibus particularibus Ecclesiis, & locis: multoque magis, quia si in causis Martyrum miracula requiruntur, ut certius constet de Martyrio, & causa Martyrii, ut infra videbitur; & de Martyrio utique & de causa Martyrii nequaquam agitur post Beatificationem, sed antequam Beatificatio indulgeatur. Quare, cum prædicta sententia fuerit a Postulatoribus late propugnata, & signanter a bonæ memoriæ Thoma Advocato Montecatinio celeberrimo harum causarum Patrono in causa B. Joannis de Prado; sacrorum rituum Congregatio eam, uti supra visum est, rejecit, & miracula censuit examinanda, antequam Beatitatis honores Sedis Apostolicæ judicio Joanni ipsi decernerentur. Quod autem spectat ad alias supra relatas opiniones; sive loquamur de ea, quæ distinguit inter eos Dei servos, qui, servata forma judicii, mortui sunt pro Christo, & alios, qui ex eadem causa mortui sunt, nulla tamen judicii forma servata; sive verba fiant de alia, quæ dicit, utilia quidem esse, sed non necessaria miracula, maxime vero, quando aliunde constat de Martyrio, & causa Martyrii; sive demum sermo sit de alia, quæ, exclusis miraculis, exposcit prodigia aut signa; urgent adversus eas difficultates, quæ magni profecto sunt roboris & momenti, quæque nullam ex dictis sententiis suadent re ipsa esse retinendam.

9 In causis Confessorum miracula requiruntur; & miraculorum necessitatem verbis alibi relatis, atque hic etiam referendis exponit Gregorius IX. in bulla Canonizationis S. Antonii Patavini (in nov. cod. Canoniz. pag. 65. & in nov. Bullar. Rom. tom. 3. pag. 272.): *Nos attendentes, quod, licet ad hoc, ut aliquis sanctus sit apud Dominum in Ecclesia triumphante, sola sufficiat finalis perseverantia, juxta illud; Esto fidelis usque ad mortem, & dabo tibi coronam vitæ; ad hoc tamen, ut sanctus habeatur apud homines in Ecclesia militante, duo sunt necessaria, virtus morum, & veritas signorum; merita videlicet, & miracula, ut hæc, & illa sibi ad invicem contestentur; cum nec merita sine miraculis, nec miracula sine meritis plene sufficiant ad perhibendum inter homines testimonium sanctitati. Sed, dum merita sana procedunt, & clara succedunt miracula, certum præbeant indicium sanctitatis, ut nos ad ipsius venerationem inducant, quem Deus ex meritis præcedentibus, & signis subsequenter exhibet venerandum; quæ duo ex verbis Evangelistæ plenius colliguntur: Illi autem profecti prædicaverunt, ubique Domino cooperante, & sermonem confirman- te sequentibus signis &c.*

10 Ante Gregorium IX. Alexander Papa III. de miraculis in causa S. Thomæ

S. Thomæ Cantuariensis Martyris ita locutus est in epistola ad omnes Prælatos Ecclesiæ (in nov. cod. Canoniz. pag. 17.): *Quamvis autem de sanctitate ipsius dubitare non possit, qui ejus & laudabilem conversationem attendit, & gloriosam considerat passionem; voluit tamen Redemptor atque Salvator noster, ejus sanctitatis insignia magnificis radiare miraculis, ut, qui pro Christo insuperabilis virtutis constantia necessitates & pericula pertulit sui laboris & certaminis, in æterna beatitudine cognoscatur ab omnibus percepisse triumphum. Nos vero, auditis innumeris & magnis miraculis, quæ jugiter per Sancti illius merita fieri universitas narrat Fidelium &c. prædictum Archiepiscopum solemniter in Ecclesiâ, magno ibidem Clericorum, & laicorum collegio præsentē, in capite jejunii, deliberato Fratrum nostrorum consilio, canonizavimus. Idem in epistola ad Episcopum Averlanum (ibid. pag. 18.): Audistis siquidem, & maxima pars orbis, Divina gratia revelante, cognoscit, qualiter omnipotens Dominus, qui mirabilis & gloriosus est in Sanctis suis, eum potentia virtutis suæ, a die, qua per Martyrii palmam calos, sicut indubitanter credimus, victor introivit, magnifice in terris glorificavit, & sub nomine ipsius multa quotidie miraculorum signa non cessat operari; unde Nos, deliberato consilio... ipsum canonizavimus. Si itaque Gregorius IX. quoad Confessores distinguit Ecclesiam triumphantem, pro qua dicit sufficere virtutes, ab Ecclesia militante, pro qua exposcit miracula, ut certa esse possit etiam de virtutibus; & Alexander Papa III. in Martyribus distinguit etiam Ecclesiam triumphantem, pro qua gloriosam ait satis esse passionem, ab Ecclesia militante, pro qua miracula exigat, ut haud dubia esse possit de gloriosa passione; insertur, sicuti in Confessoribus, licet, servata quacumque forma judicii, constet de continuato virtutum heroicarum exercitio usque ad obitum, & in ipso etiam obitu, miracula non modo sunt utilia, sed & necessaria, idem etiam dicendum esse de Martyribus, quamvis de eorum gloriosa passione, sicque de Martyrio, & causa Martyrii, servata quacumque forma judicii, plenissime appareat.*

II Uno verbo, eadem rationes, ut infra videbitur, quæ militantes pro necessitate miraculorum in causis Confessorum, militantes similiter pro necessitate miraculorum in causis Martyrum: in quo rerum statu nulla est dictarum sententiarum, de cujus probabilitate non videatur esse dubitandum: & ideo ad rem subdit Hurtado de vero Martyrio resol. 44. §. 3. *Ceterum sententia ista media medium rationis non attingit; nam, seclusa revelatione, plene & sufficienter constare nequit de evidentia causa Martyrii, quod sit ex Charitate, & pro Fide Christi, nisi adsit miraculorum probatio saltem post mortem; & paulo post: Tandem, quia causa Martyrii tam certò debet constare, ut Martyr vindicetur publico Ecclesiæ testimonio, ac constet sanctitas vitæ alicujus S. Confessoris; uterque enim proponitur publice colendus a Fidelibus, & in utroque est par errandi periculum: atqui, nisi sanctitas vitæ præbetur miraculis in vita, & post vitam, non est sufficienter probata... ergo etiam hodie, nisi causa Martyrii miraculis saltem post mortem probetur, non erit sufficienter probata, ut Martyr hodie*

hodie juridice vindicetur a Papa. Quare sicut Ecclesia, ad excludendam omnem fraudem & deceptionem, non consuevit canonizare Confessores sine operatione miraculorum probantium, sanctitatem ipsorum non apparentem, sed veram esse, & hanc consuetudinem in praxi retinuit; sic, ad excludendam similem fraudem, qua potest contingere in probanda causa Martyrii, adhibet in practica hodierna operationem miraculorum saltem post mortem Martyris.

12 De alia postea opinione, quæ, si non miracula, saltem prodigia aut signa exposcit, hæc habentur apud Baldellum loc. cit. num. 17. *Contra enim est, quia Contelorus difficile poterit hæc admiranda & prodigiosa distinguere a veris miraculis.* Quod quidem ut dilucidius percipiatur, posito ex alibi dicendis, miraculum esse illud, quod vel quoad substantiam facti, vel quoad subjectum, in quo fit, vel quoad modum faciendi superat vires naturæ; non incongruenter quis dicere posset, signum esse illud, quod ex concursu plurium circumstantiarum admirationem suscitât, quamvis earum nulla sive conjunctim, sive seorsum accepta naturæ vires excedat.

13 Celeberrimus est in Ecclesiastica historia eventus sæculi II., cum in Marci Aurelii bello adversus barbaros Christianorum legio, quæ Fulminatrix nuncupata est, suis precibus e cælo pluvias & fulmina deduxit, quibus porro pluviis extincta fuit periculosa exercitus sitis, fulminibus vero attrita est acies barbarorum; teste eodem Marco Aurelio in sua epistola ad Senatam edita ad calcem 1. apolog. S. Justini num. 71. quod in plurimam Religionis nostræ auctoritatem ab Eusebio convertitur, itemque a Gregorio Nisseno, & multo magis a Tertulliano in apologetico, & in libro ad Scapulam. Scatent quoque consimilibus eventibus Sanctorum vitæ. Non enim ita facile procul a naturæ viribus abduci poterit, quod ibi non raro legentibus occurrit, sive quod calamus atramentum scribendæ capitali sententiæ non effuderit, sive quod sella judicis confracta fuerit, sive quod in eorum exilii articulo ingens grando ceciderit, sive quod mortem illorum cometa proxime præcesserit, sive quod morti eorum successerit terræmotus: quam in rem bene subdit Silvester Petrasancta in *thaumasia vera Religionis tom. 1. in proleg. §. 19. pag. 11.* Aliis miracula libuit quadrifariam partiti, ut nimirum quartam classem eorum constituant effecta quadam, in quibus neque res ipsa, neque modus vim & potestatem natura, aut æverni superant, sed ex adjunctis, aut ex circumstantiis, quas vocant, liquet ea Numini duntaxat adscribi debere; descendunt videlicet flamma de calo ad imperium Elie, potuissent eas immittere mali Genii, sed minime tamen in ea occasione, qua probari debuit & reddi comperta Dei majestas & vera ejus Divinitas; quia incumbit Divina providentia, dum res tam gravis & tam pertinens agitur, prohibere, ne populo nîquæ illudatur.

14 Verum, his & similibus minime obstantibus, verissimam esse puto assertionem Baldelli, hoc est difficile admodum esse, in re, de qua nunc agitur, differentiam reperire inter miraculum, & signum. Idque ut funditus probetur, primo ponendum est, non posse ex concursu plurium

circumstantiarum, quarum nulla sive conjunctim, sive seorsum excedat vires naturæ, inferri aliquod signum rei alicujus supra naturam. Unde Abulensis in commentar. super illud Isaia cap. 7. *Ecce Virgo concipiet*, ait, pag. 5. col. 3. *Nam ea, qua naturaliter fiunt, non sunt signa eorum, qua supernaturaliter accidunt; cum non habeant aliquam coherentiam cum illis .... Nam, si aliquid naturale esset signum eorum, qua supernaturaliter accidunt .... cum omnia equaliter a Deo proveniant, fieret, ut omnia naturaliter facta aliquorum supernaturalium signa forent, quod inconveniens est. Naturalia ergo supernaturalium operationum .... signa non sunt.* Ponendum est quoque, gratiam, & sanctitatem esse entia supra naturam, & sic a nulla creatura cognoscibiles per effectus mere naturales, sed tantum per effectus, qui naturæ vires aliquo modo excedant, hoc est per miracula; juxta D. Thomam 2. 2. qn. 178. art. 1. ubi probat, debere dari in Ecclesia gratiam miraculorum, ut homo sensibilis modo sibi convenienti deveniat ad cognitionem credendorum, quæ naturalem captum superant: *Necesse est quod sermo prolatus confirmetur ad hoc quod credibilis fiat. Hoc autem fit per operationem miraculorum secundum illud Marc. ult. Et sermonem confirmante sequentibus signis: & hoc rationabiliter. Naturale enim est homini ut veritatem intelligibilem per sensibiles effectus comprehendat. Unde sicut ductu naturalis rationis homo pervenire potest ad aliquam Dei notitiam per effectus naturales, ita per aliquos supernaturales effectus, qui miracula dicuntur, in aliquam supernaturalem cognitionem credendorum homo inducitur.* Quapropter, si ad rem præsentem signum debet esse supra naturam, si debet aliquo modo excedere vires naturæ, necessario erit referendum ad miraculum tertii generis, hoc est ad illud, quod saltem quoad modum superat habilitatem naturæ. Cum vero ex supradictis in Beatificationibus, & Canonizationibus sufficiant miracula tertii generis, ex his infertur, nedum difficile, sed & impossibile esse in re, atque ad finem de quo agitur differentiam reperire inter miraculum, & signum: & plane quidem eventus supra recensiti ad classem miraculorum tertii generis referuntur, teste D. Thoma part. 1. quest. 105. art. 8. *Tertio modo excedit aliquid facultatem naturæ quantum ad modum & ordinem faciendi; sicut, cum aliquis subito per Divinam virtutem a febre curatur absque curatione & consueto processu naturæ in talibus, & cum statim aer Divina virtute in pluvias densatur absque naturalibus causis, sicut factum est ad preces Samuelis, & Elia: & hujusmodi tenent infimum locum in miraculis.* Illi etiam, qui præfate scripserunt de materia Beatificationis, & Canonizationis, quique fuerunt Consultores Congregationis sacrorum rituum, dixerunt, vel nullam statuendam esse differentiam inter miracula, & signa, uti late habetur apud P. Philippum Mariam a S. Paulo Carmelitam Discalceatum in suo Theologico examine de quodam miraculo tunc Beati, nunc Sancti Joannis a Cruce pag. 71. & pluribus sequens. vel omnino inter se convenire miracula, & signa ex parte causæ, cum utraque a Deo prove-  
niant & sint supra vires naturæ, solamque differentiam esse quoad effectum,



Atum, cum miraculum sit ordinatum ad bonum præsens personæ, vel communitatis; signa vero sint indicia futurorum malorum, vel, si bonorum; non tamen præsentium, ut apud Cardinalem de Lauræa in 3. lib. sent. tom. 4. disp. 20. de miraculis art. 3. num. 44. Matthæuc. in præf. Theol. Canon. ad causas Beatificat. & Canonizat. tit. 3. cap. 1. §. 3. & ipsum etiam D. Thomam, qui ad ea verba epistolæ D. Pauli ad Hebræos cap. 2. confestante Deo signis, & portentis, inquit lect. 1. Signis quoad minora miracula, ut sanatio claudi, vel febris .... Portentis, quantum ad majora, sicut suscitatio mortui: Et 2. 2. quæst. 178. art. 1. Ad tertium (subdit) dicendum, quod in miraculis duo possunt attendi. Unum quidem est id, quod fit, quod quidem est aliquid excedens facultatem naturæ; & secundum hoc miracula dicuntur virtutes: aliud est id, propter quod miracula fiunt, scilicet ad manifestandum aliquid supernaturale; & secundum hoc communiter dicuntur signa. Propter excellentiam autem dicuntur portenta, vel prodigia, quasi procul aliquod ostendunt. Quam quidem D. Thomæ doctrinam Auctores de Canonizatione tractantes amplectuntur atque exornant, Rocca de Canonizat. Sanctor. cap. 22. Castellin. de inquisit. miraculor. in Martyrum Canonizat. pag. 136. Quippe eadem doctrina maxime favet assumpto, cum plane ostendat, unam eandemque rem juxta diversos respectus modo dici miraculum, modo signum; & signum saltem quoad modum debere excedere vires naturæ, atque adeo in re, de qua nunc agimus, confundi cum miraculo tertii generis.

15 At dices, cur in sacrorum rituum Congregatione, quando proponuntur causæ Martyrum, proponitur dubium, an constet de miraculis, seu signis; quando autem proponitur causa alicujus Confessoris, proponitur dubium, an constet de miraculis? Ex hoc namque colligi posse videtur, intercedere juxta sensum sacræ Congregationis differentiam inter signum, & miraculum. Pro hac difficultate submovenda satis esset respondere, mentem sacræ Congregationis non esse desumendam ex dubiis, quæ in ea proponuntur, sed ex ejus decretis & resolutionibus a summo Pontifice confirmatis: veruntamen, ut lectores scire possint, cur in causis Martyrum proponatur dubium complexivum tum miraculorum, tum signorum, in causis autem Confessorum dubium proponatur comprehendens tantum miracula, reminisci debebunt, olim causas Canonizationis discuti consuevisse a Rotæ Auditoribus, antequam earum fieret propositio in sacrorum rituum Congregatione; & judicium quidem Rotæ Auditorum robore caruisse seculum ab approbatione per dictam sacram Congregationem faciendam, ut alibi dictum est: ideoque cum Rotæ Auditores in suis relationibus infra allegandis secuti fuerint sententiam, quæ in causis Martyrum excludit necessitatem miraculorum, & crediderint, sufficere signa quædam insolita & mirabilia, quamvis severe miracula dici non possent; hinc factum est, ut, delato ad sacram Congregationem examine relationis Rotalis, proponi coeperit dubium complexivum tum miraculorum, tum signorum. Sed, quia reponi posset, debuisse dubium mutari, postquam

Auditores Rotæ cessarunt a relationibus, & postquam sacra Congregatio, ut infra, adhæsit opinioni vera miracula requirenti etiam in Martyrum Canonizationibus, concludendo porro, quod si facta non fuit immutatio, locus esse debeat illationi, quod ipsa sacra Congregatio differentiam agnoscat inter miracula, & signa; necesse est idcirco, ut alia pro absoluta instituti cognitione subdantur. Et prætermisso quidem, novum non esse, quod modus agendi propter aliquas circumstantias introductus, mutatis etiam circumstantiis, perseveret; momentum consistit in hoc, quod, etsi sacra Congregatio in omnibus & singulis causis Martyrum vera miracula exquisiverit tum pro Beatificatione, tum pro Canonizatione, ab ea nihilominus nunquam huc usque editum est generale decretum, quo cautum sit, miracula ipsa esse necessaria in causis Martyrum, nec ullum super argumento miraculorum statuendum esse discrimen inter causas Martyrum, & Confessorum: sine autem hujus decreti editione nulla esse poterat, aut potest esse necessitas memoratam faciendi immutationem, eoque magis, quia ex supradictis ipsa miracula etiam dicuntur signa; atque hoc pariter modo fuerunt in Evangelio appellata. De conversione siquidem aquæ in vinum dicitur: *Hoc fuit initium signorum Jesu*; de multiplicatione quinque panum, & duorum piscium: *Illi homines cum vidissent, quod Jesus fecerat signum*; de cæco nato illuminato: *Quomodo potest homo peccator hac signa facere?* de resurrectione Lazari: *Audierunt, eum fecisse hoc signum*; & infra: *Cum signa fecisset coram eis*. Hoc eodem vocabulo miracula exprimuntur in bullis Canonizationum SS. Homoboni, Laurentii Episcopi Dublinensis, Antonii Patavini, Stanislai Martyris, Francisci, & Richardi, ac SS. Claræ, & Hedvigis Ducis Poloniæ, & passim in aliis, minime attempta particula seu, de qua in dubio, an constet de miraculis, seu signis: quandoquidem ea particula aliquando *disjunctivam*, aliquando *copulativam*, & aliquando *declarativam*, & *expositivam* importat orationem, juxta late allegata apud Barbosa de diction. usu frequen. dist. 110.

## CAPUT XXIX.

*De Ecclesiastica disciplina quoad miraculorum necessitatem in Martyrum causis.*

**S**I antiquiora Ecclesiæ monumenta percurramus, atque etiam si ad nonnulla non adeo antiqua manum admoveamus, difficile profecto non erit reperire, actum fuisse in causis Martyrum non solum de Martyrio, & causa Martyrii, & sic de pretiosa eorum morte, sed etiam de virtutibus, quibus, dum vixerant, floruerunt; absque eo quod hinc inferatur necessitas in virtutes ipsas inquirendi in omnibus & singulis Martyrum causis, ita ut pro Martyre declarando minime sufficiat mors pro Christo constanter recepta, sed præterea necesse sit, ut ante passionem Martyr in virtutibus Theologicis se consuetudine exercuerit.

2 Inter

2 Inter antiquiora Ecclesiæ monumenta recensenda est epistola encyclica Ecclesiæ Smyrnenſis apud Eusebium *lib. 4. cap. 15.* in qua univēſis Fidelibus Martyrium S. Polycarpi denuntiātum est. In ea quippe non solum expositum fuit, quod orationis præsidio, & insigni mansuetudinis argumento se præparavit, antequam ad amphitheatrum duceretur, sed præterea cetera narrantur, quæ antecedentem ejus sanctitatem præseferēbant. En verba epistolæ (*ibid. pag. 169.*) *Semper enim etiam ante caritatem ob sanctioris vite honestatem ab omnibus cultus fuerat.* Item inter non adeo antiqua Ecclesiastica monumenta referri possunt, quæ leguntur in bulla Canonizationis S. Thomæ Cantuariensis: *Quamvis autem de sanctitate ipsius dubitare non possit, qui ejus & laudabilem conversationem attendit &c.* Insuper quæ habentur in bulla Canonizationis S. Petri Martyris: *Ipsē namque veritatis filius, & bonitatis alumnus, conversatione conspicuus, spectabilis fama, & opinione mirabilis, miro præfulſisse nitore munditiæ, virginitatem integre custodisse, nec mentis habuisse, nec corporis corruptelam, & nullius mortalis criminis sensisse contactum, firma suorum Confessorum assertione narratur.* Ea quoque tandem, quæ extant apud Raynaldum ad ann. 1252. num. 8. ubi Innocentius Papa IV. committit Jacobo Velleſtrenſi Minoritæ, ut in causa Stanislai Martyris non solum inquirat in Martyrium, & causam Martyrii, verum etiam duos senes tunc adhuc viventes examinet, qui de ejus sancta conversatione poterant testari: *Ac illos duos centenarios, si supersites fuerint, de quibus mentio est in Actis, qui dicuntur ab aliquibus accepisse, vel eorum alterum, quod Sanctum noverunt eundem, & de ipsius clara & honesta conversatione, dum viveret, audierunt; inquisiturus ab ipsis, an ita sit; & inspecturus nihilominus devotionem populi, & famam communem super Martyrio, & causa Martyrii, necnon & sanctitate ipsius.* Atque ex his quidem & similibus inferri nequaquam valet ipsa necessitas præexistentiæ virtutum in gradu heroico, ut quis pro Martyre habeatur, adeo ut pro Martyre decernendo minime sufficiat mors in odium Christi inflicta a tyranno, & pro Christo a Martyre recepta. Ceteris enim obviis prætermisſis exemplis, celebre est illud sæculi v. quod contigit in S. Jacobo interciso, qui cultum habet in utraque Ecclesia, Latina, & Græca. Is in gratiam Iſdegerdis Regis Persarum Christum negavit; cumque propterea mater ejus, & uxor ab ejus consuetudine se subtraxissent, in se reversus, pro Christi confessione Regem adivit, a quo irato membratim jussus est concidi, & capite obtruncari; ut ex ejus Actis apud Surium, Allatium, & alios desumitur. Celebre quoque est Martyrium Casti, & Æmilii, de quibus in libro de lapsis col. 377. ita loquitur S. Cyprianus: *Sic hic Casto, & Æmilio aliquando Dominus ignoravit. Sic in prima confessione devictos, victores in secundo prælio reddidit, ut fortiores ignibus fierent, qui ignibus ante cessissent, & unde superati essent, inde superarent.* Prior lapsus illis non obſtitit, quominus uti Martyres colerentur: eorum quippe nomen legitur in pervetusto calendario Ecclesiæ Carthaginiensis xi. kal. Junii; & S. Augustinus in die eorum natali sermonem habuit, qui est

est 285. part. 2. tom. 5. oper. ubi, postquam disseruit de Petri negatione, & conversione, subiungit col. 1146. *Tale aliquid factum esse arbitror etiam in his Martyribus Sanctis Casti, & Amilio, quorum diem hodie celebramus.* Unde bene Cardinalis Bellarminus lib. 1. de Indulg. cap. 2. num. 9. post 4. contro-  
versiam de poenitentia tom. 3. inquit: *Dummodo constet, aliquem esse vere Martyrem, Ecclesia non dubitas, eum inter Sanctos & Beatos numerare, etiamsi ante Martyrium multis flagitiis fuerit cooperatus; promissio enim Domini generalis est, Matth. 10. 32. Omnis, qui confitebitur me coram hominibus, confitebor & ego eum coram Patre meo: & late prosequuntur Verricel. de Apost. mission. tit. 1. qu. 33. num. 20. & 21. Scacchi. de not. & sign. sanctis. sect. 2. cap. 3. in fine; atque Auditores Rotæ in relatione B. Isaphas Pollocensis part. 2. §. Ex his perpendimus.*

3 Quæ dicta sunt de virtutibus in causis Martyrum, dici etiam possunt de signis & miraculis; hoc est de eis in antiquis Ecclesiæ monumentis habitam fuisse rationem, cum de Martyrio agebatur & ejus vindicatione, absque eo quod hinc inferri possit eorum necessitas, ut quis pro Martyre coheretur. Et profecto, quod de eis ratio haberetur, desumitur primo ex citata epistola Ecclesiæ Smyrnenfis, quæ sic loquitur de cælesti visione, quam Sanctus habuit Polycarpus: *Ceterum triduo antequam comprehenderetur, noctu inter orandum solutus in somnum videre sibi visus est cervical quo caput reclinabas, totum repente flamma consumptum. Quam ob causam e somno excitatus statim visum suum exposuit; idque quod sibi eventurum erat prænuntiavit, familiaribus suis aperte prædixit se pro Christo flammis absumptum iri: secundo ex Actis SS. Perpetuæ, Felicitatis, & sociorum, quæ vir eruditus Joseph Augustinus Orsi ex Dominicana Familia nuper in sua dissertatione apologetica vindicavit adversus Samuelem Basnagium, in quibus narratur, aprum in Satorum immissum, in ipsum potius venatorem iras & impetum vertisse, item ursum in eundem incitatum de cavea prodire noluisse; & Perpetuam, cum a ferocissima vacca vexaretur, adeo in extasim raptam fuisse, ut nullum doloris sensum fuerit experta: tertio ex epistola Lugdunensium, ubi refertur, B. Blandinam reticulo inclusam, & tauro objectam, & ab eo diu in altum jactatam, nihil eorum, quæ fiebant, penitus sensisse tum ob spem & comprehensionem eorum, quæ credebant, bonorum, tum ob familiarem congressum, quem cum Christo in oratione habebat: demum ex passione S. Theodoti Anycrani, & septem Virginum principio sæculi iv. relata a Nilo teste oculato; ex passione S. Vincentii Levitæ, quæ pariter ad principium pertinet sæculi iv. quamque ex pluribus codicibus tum MSS. tum editis publicæ commoditati restituit Ruinartius in Act. Martyrum; ex passione S. Theodoti Presbyteri sub Imperatore Constantio apud Mabillon tom. 4. analect. ex passione SS. Bonosi, & Maximiliani sub Juliano Imperatore, quam ex codice MS. B. Mariæ Silvæ majoris edidit citatus Ruinart in opere allegat. pag. 278. ubi post insertum in idem opus librum Eusebii Pamphili Cæsariensis Episcopi de Martyribus Palæ-*

Palæstinæ, portenta admiratus in eodem libro relata ait *in notis num. 36.* Ex hoc, aliisque portentis, quæ passim Eusebius narrat, collige, rejicienda non esse Martyrum Acta eo nomine, quod quandoque in eis ejusmodi insolita miracula a Fidelibus interfecta sint. Etre vera in disputatione excitata inter recentiores Eruditos de miraculis, quæ in Actis Martyrum referuntur, nec Baillet, nec Tillemontius audent asserere, suspicione laborare ea Martyrum Acta, in quibus miracula exponuntur; sed ea tantum, quibus magna inferitur miraculorum copia: quod tamen strenue impugnatur a P. Honorato de S. Maria Carmelita Discalceato in *animadv. super usu crit. tom. 1. dissert. 4. artic. 3.* ubi plura affert exempla Actorum, quæ a supradictis utique prædicantur tamquam authentica, & in quibus nihilominus multa fane insignia miracula narrantur.

4 Quod autem ex his non valeat illatio ad necessitatem signorum & miraculorum, ut quis pro Martyre habendus sit, facile demonstratur: tum quia ex alibi dictis, quando aliquis Martyrio occubuerat, aut Episcopus, sub cujus ditione id acciderat, rem totam scribebat ad Prælatum, & hic, adhibitis in consilium Episcopis, mature decernebat, an is, de quo agebatur, Martyr occubisset, & inter Martyres esset adscribendus & colendus; aut Episcopus ipse, habito Cleri sui consilio, id ipsum decernebat, Martyrio, & causa Martyrii sedulo examinata, nullo unquam facto de miraculis verbo: tum quia, cum sæculo IX. celebre in Hispania Martyrium contigisset Martyrum Cordubensium, & collecto subinde Conciliabulo, nonnulli Pseudoeписcopi Regi Arabum tunc Cordubæ imperanti suassent, ut decretis & constitutionibus Martyrium vetaretur, pro Fide Cordubæ mortuos dixerunt non esse inter Martyres recensendos, ex eo potissimum, quod miracula instar antiquorum Martyrum non edidissent, & eorum corpora incorrupta non permansissent; quemadmodum desumitur ex notis Binii ad d. conciliabulum apud Cardinalem de Aguirre tom. 3. Concil. Hispan. pag. 149. & ex fide relatis apud Cardinalem Baronium ad an. 852. S. Eulogius Martyr Archiepiscopus Toletanus egregium opus edidit, cui titulus *memoriale Sanctorum*, quod est typis impressum tom. 15. Biblioth. PP. pag. 243. in cujus quidem operis lib. 1. strenue contendit, miracula non esse necessaria, ut mortuus pro Christo inter Martyres recensetur; hæc enim habet pag. 247. *Instabat quoque universitas Ethnicorum .... Letabatur namque, quod in vindictam sui Doctoris tot contemptorum corpora prostravisset, nulla novitate prodigiorum obstante, qua horrorem posset scelerosis incutere &c. Et hoc ipsum plerisque nostrorum parvipendulis verum non esse videbatur Martyrium, quod non ad confusionem incredulorum, vel roboracionem Fidelium aliquod ostensares miraculum. Assertiones autem istæ acriter a S. Eulogio impugnantur; tum quia, teste S. Gregorio, in sæculi fine, & tempore Antichristi aberunt ab Ecclesia signa virtutum, & tamen aderunt veri Martyres occisi ab Antichristo; tum quia, ut ipse loquitur, signa virtutum nec omnibus data, nec passim quocumque tempore sunt exercenda; quia & hi, qui hoc munus divinitus acce-*

acceperunt, nisi Spe, & Fide probatis, nequeunt erogare .... desistente enim Fide querentium, largitas erogantium quassatur. Addit porro miracula in morte primorum Martyrum intercessisse, quia Deus præviderat, ea esse profutura: Miraculorum vero signa ideo olim per servos suos Dominus congruenti tempore præstabat mundo, quoniam, præscia Divinitate, proficere nihilominus præsolantibus ea sciebat, nec in vanum currere operarios virtutum cognoverat: ut saltem prodigiorum novitatibus cederent, qui sacre legis præcepta salutaria respuebant; eratque temporibus illis satis congruum, Dei Martyres signis conriscare virtutum, quoniam rudem diffusum Christianismum nunc instructione verborum, nunc exhortatione scripturarum, nunc ostensione signorum, nunc etiam trophæis inclitis passionum conabantur solidis radicibus fieri firmum in cordibus credentium populorum. Denique, ne ex his aliisque in eo opere fuscè relatis aliquis existimaret, eum vim miraculorum enervare voluisse, ita concludit: Nec nos ita prosequentes miraculorum penitus abdicamus insignia celesti dono quibusdam collata & congruenti tempore Dei per dispensationem nationibus ordinata, sed latratibus rabidorum canum obviam venimus, qui Martyrum mortuorum intentionem exinanire attentant, dum eos de miraculis redarguere sperant.

5 Uno verbo S. Eulogius confitetur, miracula non adfuisse in passione Martyrum Cordubensium, etsi adfuerint in passionibus antiquorum Martyrum; sed miraculorum defectionem adscribit incredulitati barbarorum, & totis viribus conatur ostendere, mortuos pro Fide fuisse inter Martyres recensendos: quod utique non fecisset, si tunc constans viguisset disciplina de non recipiendis inter Martyres illis, qui miraculorum gloria caruissent.

6 Argumentum itaque refertur ad illud tempus, quo cognitio causarum Beatificationis, & Canonizationis ad Sedem Apostolicam privative delata est: & hoc quidem tempore inspecto, primo loco se offert Canonizatio S. Canuti junioris Daniæ Regis & Martyris, quæ anno 1164. facta est ab Alexandro III. summo Pontifice. Verum, cum ex alibi dictis desint Apostolicæ litteræ Canonizationis S. Canuti, tuto asseri nequit, fuisse requisita pro Canonizatione miracula; idque tantum verisimiliter asseri potest, conjectura defumpta ex Canonizatione S. Thomæ Cantuariensis ab eodem Pontifice celebrata, pro qua scilicet obtinenda facta est miraculorum discussio, ut mox videbitur.

7 Secundo igitur loco obvia fit Canonizatio S. Thomæ Archiepiscopi Cantuariensis facta ab eodem Alexandro Papa III. De miraculis autem Thomæ intercessione patris a Deo statim ac ille Martyrio coronatus fuit, disertè testimonium dicit Radulphus de Diceto in imaginibus historiarum (inter historia Anglicana scriptores Trevysden tom. I. pag. 557.) his verbis: Circa Pascha Dominus Iesus Christus, qui in Sanctis suis semper est & ubique mirabilis, gloriofissimæ Martyris sui Thomæ Cantuariensis Archiepiscopi vitam laudabilem, & insuperabilem in morte constantiam crebris cœpit irradiare miraculis, ut, qui pro tuenda libertate periclitantis Ecclesiæ suam & suorum proscriptionem

tot annis sustinuit, dignum cognoscatur ab omnibus reportasse triumphum. VVilhelmus quoque Senonenſis Archiepiſcopus in ſua epiſtola, ( *qua eſt 80. lib. 5. inter eas hujus Sancti editas a P. Chriſtiano Lupo* ) poſt enarratam mortem S. Epiſcopo Cantuarienſi illatam, non omittit relationem miraculorum; ut ex verbis dictæ epiſtolæ ſcriptæ Pontifici Alexandro deſumitur; Et, quia poſt viri ſancti tranſitum, operante Domino, memoranda quadam ex crebra multorum relatione audivimus accidiffe, omnino præteriri non debent. Dicitur namque, & conſtanter aſſeritur, poſt paſſionem ſuam multis apparuiſſe in viſi, quibus perhibet, ſe non mortuum eſſe, ſed vivere, & non vulnera, ſed vulnerum tantum cicatrices oſtendit. Sane de Martyrio, & cauſa Martyrii hujus Sancti non una fuit inter Magiſtros Pariſienſes ſententia. Petrus enim Cantor ſtabat pro Martyrio & cauſa Martyrii, dum Magiſter Rogerius contrarium aſſerebat, & nonnulli id ipſum ſentiebant, poſito defectu miraculorum, teſte Cæſareo ſcriptore contemporaneo in biblioth. PP. Ciſterc. to. 2. in dial. miraculor. diſtinct. 8. cap. 69. Thomas Epiſcopus Cantuarienſis, qui noſtris temporibus pro Eccleſiæ libertate uſque ad mortem dimicavit, nullis miraculis in ſuis perſecutionibus coruſcavit, ſatisque de illo poſt occiſionem diſputatum eſt. At commiſſa ſubinde miraculorum juridica cognitione Apoſtolicis in Anglia Legatis, atque habita certa eorum notitia, Alexander eum retulit in numerum ſanctorum Martyrum ut ex ſuperius allata ejusdem epiſtola ad omnes Prælatos Eccleſiæ, ( in cit. cod. Canoniz. pag. 17. ) clare deſumitur: Nos vero, auditis innumeris & magnis miraculis, quæ jugiter per Sancti illius merita fieri, univerſitas narrat Fidelium, & ſuper his non ſine magno gaudio per dilectos Fratres noſtros Albertum Tituli S. Laurentii in Lucina, & Theodinum Tituli S. Vitalis Preſbyteros Cardinales atque Apoſtolica Sedis Legatos, qui eadem miracula tanto perſpicacius didicerunt, quanto amplius ſunt loco vicini, præcipue certiorem effecti, & plurium aliarum perſonarum teſtimonio fidem, ſicut debemus, adhibentes, prædictum Archiepiſcopum ſolemniter in eccleſia, magno ibidem Clericorum, & laicorum collegio præſente, in capite jejunii, deliberato Fratrum noſtrorum conſilio, canonizavimus, ipſumque decrevimus Sanctorum catalogo adſcribendum. Qua in re Alexander ſecutus eſt exemplum ſui Antecęſſoris Clementis II. qui, antequam eſſet reſervatum privativum juſ harum cauſarum Sedi Apoſtolicæ, haud aliter proceſſit ad Canonizationem Virginis VViboradæ ab Hungaris in odium Fidei occiſæ, quam diſcuſſa cauſa unâ cum miraculis ejus interceſſione a Deo patrat, teſte Burkardo Monacho S. Galli lib. de caſibus dicti Monaſterii cap. 6. ( inter ſcriptores rerum Alamannic. Goldaſti tom. 1. par. 1. & ap. Mabillon. ſec. 6. Bened. par. 1. ) in Nortperto Abbate ſequentibus verbis ſupra relatis & nunc iterum referendis: Obtinuit etiam adminiculante Henrico Imperatore & conjuge ejus Agnete, hoc apud Dominum Apoſtolicum Clementem II. recitata vita B. VViboradæ ejusque miraculis, de tamdiu neglecta re ab ipſo Papa redarguens, quatenus ipſam, præſente Theodorico Conſtantiensi Epiſcopo canonizaret, & pro ſancta haberi præciperet, & anniverſarium ipſius diei ſolemnizandum inſtitueret.

8 Occurrunt tercio loco ea, quæ contigerunt in causa B. Petri de Castro novo in Gallia Narbonensi Monachi Cisterciensis Legati Apostolici & contra Hæreticos Albigenſes Fidei Inquisitoris, qui gladiis impiorum occubuit die 16. Februarii anno Domini 1208. & sic tempore summi Pontificis Innocentii III. Fit itaque ejus commemoratio in Martyrologio Sauffaji, in Martyrologio universalis in additionibus ad diem 16. Februarii, & in menologio Cisterciensium; publicusque cultus ei deferatur die 5. Martii ad S. Gellium in Gallia, & in domibus Ordinis Cisterciensis ejusdem regni, testimonium perhibente Baillet in ejus vita ad diem 5. Martii. Historia autem mortis eidem inflictæ jussu Raymundi Comitis Tolosani ex odio in eum concepto, quia in ipsius ore verbum Domini non erat alligatum ad faciendam vindictam in nationibus, & increpationes in populis, uti loquitur Innocentius III. infra referendus (Comitem enim de perpetratis nequitiiis jussu redarguebat) plene describitur a Petro Vallium-Sarnaji Monacho Cisterciensi in historia Albigenſium typis impressa tom. 7. biblioth. Cisterc. cui magna utique fides præstanda est; cum fuerit nepos & comes Guidonis Abbatis Cisterciensis, postea Carcaffonensis Episcopi, unius ex duodecim Abbatibus, quos dictus Innocentius ad Albigenſium hæresim expugnandam misit, teste Natali Alexandro in histor. Eccles. sæc. 13. cap. 4. art. 1. Narrat Petrus Monachus miracula a Deo patrata; & signanter, Martyris corpus in clauſtro monachorum S. Egidii tumulatum, & post longum tempus in Ecclesiam translatum, ita sanum inventum esse atque illæsum, ac si ipsa die fuisset tumulatum; miramque fragrantiam de corpore & vestibus emanasse, quemadmodum legitur cap. 12. adeo ut de cultu delato post bene probatum Martyrium, & causam Martyrii, & post discussa atque approbata miracula non videatur esse dubitandum. Quamvis enim opponi possit, Petrum anno 1208. Martyrem fuisse ab Innocentio declaratum, licet tunc nulla miracula secuta fuissent, ut habetur ex eius epistolis ad Archiepiscopos Narbonensem, Arelatensem, Ebreduensem, Aquisensem, & Vienneſem, & ad Comites, ac Barones & universos milites per dictas provincias constitutos, quæ sunt trigesima prima & trigesima secunda in novo codice Canonizationum: Qui profecto (inquit citat. epist. 31.) cum ob fidem & pacem, quibus nulla prorsus est causa laudabilior ad Martyrium, sanguinem suum fuderit, claris jam, ut credimus, miraculis coruscasset, nisi hoc illorum incredulitas impedit, de quorum similibus in Evangelio legitur; quod Jesus non faciebat ibi virtutes multas propter incredulitatem eorum: quia, quamquam lingua non Fidelibus, sed Infidelibus sint in signum, Salvator tamen presentatur Herodi, qui, teste Luca, valde gaviſus est, viso ipso, pro eo, quod signum aliquod videre fieri ab illo sperabat & facere dedignatus est signum, & reddere interroganti responsum; sciens, quod in operatione signorum non credulitatis inductio, sed vanitatis illum admiratio delectabat. Licet autem illa prava & perversa generatio non sit digna, ut tam cito, sicut forsitan ipsa quarit, de suo sibi Martyre detur signum, expeditisse tamen credimus ei, ut unus iste pro ipsa, ne tota pereat, moreretur, quæ

conta-



*contagio hæretica pravitatis infecta, per interpellantem occisi sanguinem a suo melius revocetur errore, quam vivus eam potuerit revocare: non videtur tamen, hinc propositum concludi; cum Pontifex in prædictis epistolis ad ulteriora non procedat, hoc est vel ad permittendum, ut cultus Martyri deferatur in aliquibus locis, vel ad præcipiendum, ut ille in universali Ecclesia colatur; quibus in rebus consistit Beatificatio, aut Canonizatio. Decernit itaque Papa in iisdem litteris, ut subdantur anathemati quoquoque cædis participes fuerunt; Indulgentias largitur vindicantibus sanguinem justum; absolvit subditos Comiti a juramento fidelitatis & potestatem facit terram ejus occupandi, salvo jure Domini directi; Legatos suos excitat ad opus prosequendum, & ad ponendam animam suam, si fuerit necesse, in tam glorioso certamine; ad Comites & Barones sermonem convertit, ut hæreticam studeant abolere perfidiam, & sectatores ipsius, quos ipsis Saracenis dicit esse peiores: sed cum de cultu Martyri præstando nullum verbum faciat, & in eisdem litteris aperte se credere fateatur, futura fuisse miracula, nisi incredulitas obstitisset, fas est conjicere, dilatos fuisse Beatitatis honores, usquequo miracula, quæ expectabantur, supervenirent: eoque magis, quia ex supradictis ab approbatione Martyrii, & causæ Martyrii minime valet illatio ad cultum, seu cultus concessionem; & etiam quia, cum idem Pontifex Innocentius ante prædictas epistolas in Sanctorum album retulerit Homobonum, Chunegundem, & VVulstanum in Anglia Episcopum, atque mandaverit, ut in die depositionis S. Homoboni festum devote a Christifidelibus celebraretur, necnon Collectam atque orationes in commemoratione S. Chunegundis, & S. VVulstani recitandas composuerit, & monumentis Canonizationum inseruerit, his autem similia nequaquam præstiterit erga Petrum, signum evidentissimum est, eum in prædictis epistolis approbasse quidem Martyrium & causam Martyrii, sed a præstatione cultus abstinuisse, eo quia miracula deficiebant.*

9 Se offert quarto Martyrium B. Joannis Episcopi primum Mantuani, deinde Vicentini, qui pro Ecclesiastica libertate tuenda mortem obivit. De ejus morte verbum fit *in cap. Intelleximus. de judiciis, & de poenis intersectoribus inflicti in cap. Ad aures. de poenis*: Testatur autem Ughellius *in Episcopis Vicentinis*, Honorium Papam III. præcepisse constructionem processus pro cultu secundum juris solemnitate eidem deferendo: & de cultu quidem delato nulla dubitatio; sed in processu Apostolico plura miracula ad ejus intercessionem patrata referuntur, ut videri potest apud Bollandianos *ad diem 16. Martii*.

10 Se offerunt quinto loco binæ Martyrum Canonizationes factæ ab Innocentio IV. Petri videlicet Martyris ex Ordine Prædicatorum, & Stanislai Episcopi Cracoviensis. De hisce Canonizationibus mentio fit apud Pagium juniorem *in breviario Roman. Pontificum in vita Innocentii IV. num. 57. & 58*. In Brevis commissionis, quæ a Pontifice directæ fuit Archiepiscopo Mediolanensi, Episcopo Laudensi, & Præposito S. Nazarii, im-

presso in historia S. Petri Martyris post primam editionem hujus tomi, composita a Petro Thoma Campana Ordinis Prædicatorum viro erudito, & typis edita anno 1741. lib. 3. cap. 4. sic legitur: *Clerus & populus Mediolanensis per communes ac fideles nuncios Nobis humiliter & cum instantia supplicarunt, ut ad gloriam Dei, robur Fidei, depressionem perfidia, ac Christiana devotionis augmentum, eosdem inclitos viros (Petrum videlicet de Verona, & Dominicum Ordinis Prædicatorum Fratres ab Hæreticis in odium Fidei occisos) quos regnare cum Christo in Ecclesia triumphanti pretiosa eorum mors, & multifaria prodigiorum argumenta significant, curaremus in Ecclesia militanti Sanctorum catalogo aggregare: & in bulla Canonizationis S. Petri (cit. cœd. Canonizat. pag. 85.) miracula referuntur, & Papa testatur, se in ea fecisse diligenter inquiri: Ceterum quia convenit, ut, quem Dominus in calo magnificat, mundus colat, Nos de sanctitate vite, ac veritate miraculorum ipsius Martyris inquiri scimus diligenter. Item in epistola ad omnium Ecclesiarum Prelatos (ibid. pag. 87.) sic loquitur: Quod plene, ac liquido patuit in ipsius B. Petri Martyris passione, quia post gloriosum & recolendum ejus Martyrium sic suorum multitudinem, atque eminentiam miraculorum Fides resplenduit, quod quamplurimi Hæretici, eorumque credentes, ipsius Dei tot, & tantorum ostensione signorum agnita virtute, ad illius lumen de suorum errorum senebris propere redierunt. Porro in bulla Canonizationis S. Stanislai idem Pontifex memorat, lumen cæcis, auditum furdis, verbum mutis, claudis gressum, epilepticis cerebri robur, & dæmoniis, immundis ab eis ejectis spiritibus, corporum requiem ad ejus nominis invocationem subito a Deo collata fuisse: & in hac utique S. Stanislai causa tanta severitate fuerunt miracula examinata ac discussa, ut Joannes Cardinalis Cajetanus in suis litteris scriptis ad Episcopum Cracoviensem, & ejus Capitulum, de severo prædicto examine loquens, hæc habuerit, uti legitur in ejus epistola apud Longinum (in vita prædicti Sancti typis impressa apud Bollandianos ad diem 7. Maji pag. 259. tom. 2.) Præposito Procuratori diximus quasi parabolice: necessarium habet Sanctus vester unum finaliter operari miraculum, quod discordantes in miraculis mirabiliter facias concordare. Et factum est, quod, ubi morbus gravior, ibi salus est suborta propinquior; & subito prius discordes conversi sunt unanimiter ad concordatam concordiam, decernentes uniformiter talem virum Canonizatione dignissimum, & per ea, quæ fecit, miracula, quorum extas luculenta probatio, veraciter esse sanctum.*

II Occurrit sexto Breve summi Pontificis Alexandri IV. qui, post maturum examen relationis Martyrii atque miraculorum, cultum indulgit in ecclesia S. Mariæ de Sandomiria, & elargitus est Indulgentiam visitantibus eandem ecclesiam die anniversaria mortis quadraginta novem Martyrum Ordinis Prædicatorum, qui in Conventu sui Ordinis civitatis Sandomiriæ, dum post Completorium de more canebant antiphonam, *Salve Regina*, a Scythis devastantibus eandem civitatem, prout Divina inspiratione nocte præcedenti fuerant admoniti, pro Christi Fide occisi fue-

fuerunt; uti post Michiovium, Cromerum, & Bzovium adnotavit Castellin. *de dilat. Canoniz. SS. pag. 131.*

12 Obvia fit septimo loco celeberrima olim causa Catalani Fabri, & Palchalis Religioforum Ordinis Minorum, qui Martyres dicebantur, cum in dioecesi Lugdunensi fuissent ab Hæreticis occisi. Summus etenim Pontifex Joannes XXII. inquisitionem commisit Episcopo Valentino, & inter cetera præscripsit, ut in miracula inquireret, quemadmodum legitur apud Raynaldum *ad an. 1321. num. 17. Presentium auctoritate committimus & mandamus, quatenus, vocatis & adhibitis tecum aliquibus probis viris, tam de vita & conversatione dictorum Fratrum, quam de professione Fidei facta per eos, dum erant in agone recepti Martyrii constituti, & de spontanea susceptione dicti Martyrii, quam de dictis miraculis, ac ipsorum circumstantiis universis, secundum datam tibi a Deo prudentiam, diligenter inquirens, Nobis, qua inveneris, studeas fideliter per tuas litteras nuntiare.*

13 Occurrit octavo loco Martyrium S. VVernheri a perfidis Judæis in odium Fidei occisi anno 1287. apud VVesaliam villam Trevirensis diocesis, cum esset annorum fere 14. Acerbissimam profecto ille mortem sustinuit continuato per triduum Martyrio: minime tamen colitur Officio aut Missa, nec usque adhuc in Sanctorum album relatus est; sed tantummodo ejus memoria est in benedictione, atque in aliquibus locis, licet sine Officio & Missa, ex immemorabili sorte consuetudine colitur tamquam Martyr. Extat processus super ejus Martyrio confectus tempore Martini Papæ V. anno 1418. auctoritate Apostolici Legati Jordani Cardinalis Ursini: & ipsum utique Legatum non tam in Martyrium, & causam Martyrii, quam in miracula judiciali more inquisivisse, constat ex ejus Actis apud Bollandianos *ad diem 19. Aprilis.*

14 Se offert nono loco Martyrium Angeli ex Ordine Carmelitarum inter Beatos relati a Pio II. summo Pontifice, ut ex Joanne Balæo adnotarunt Bollandiani *tom. 2. mensis Maji pag. 57. Dicit de Pio Papa II. quod Angelum Carmelitam Martyrem canonizavit ... sed hoc de sola Officii concessione, aut, ut nunc vocamus, Beatificatione intelligendum esse, bene monet Lezana. Porro, omissa controversia magnis animorum motibus agitata inter P. Papebrochium Societatis Jesu, & P. Sebastianum a S. Paulo Carmelitam super miraculo compressionis cursus fluminis Jordani, dum Angelus una cum sociis ex nimia defluentium aquarum excrefcentia illud trajicere non poterat; de aliorum sane miraculorum patratione certa non desunt argumenta, antequam ad ejus Beatificationem fuerit a sancta Sede processum, ut ex iisdem Actis Bollandianis desumitur *pag. 58. Ex loco, ubi prius jacuerat corpus, fons vitæ aqua nitidissima & suavissimi odoris emanavit; ex ea vero parte, ubi caput Martyris quiescebat, cœpit fluere medicinalis olei liquor ... multique egroti illo die solemniter descendunt per gradus fontis, lustrari corpus eorum, implorantes Martyris auxilium, et sensim, populo spectante, recipiunt sanitatem, præsertim bernici, et paralytici.**

## 254 DE SERVORUM DEI BEATIFICATIONE

15 Se offerunt decimo loco Martyres Berardus, Petrus, Othonus, Accursius, & Adjutus ex Ordine FF. Minorum, qui fuerunt in Beatorum numerum relati a Sixto IV. & quorum fit commemoratio in Martyrologio Romano *ad diem 16. Januarii*. Apostolicæ litteræ autographæ sunt in archivo S. Mariæ de Ara-cæli Urbis, typis autem impressæ in Actis Bollandianis *tom.2. mensis Januarii pag.71.* & in eorundem similiter Martyrum causa nedum discussum fuisse Martyrium, atque occasionem Martyrii, verum etiam examinata fuisse miracula, convincitur ex citatis ipsis litteris Apostolicis, ubi: *Pro Christo mortem subierunt, & Martyrii palmam gloriose promerentes, plurimis miraculis in ipsa morte, & post claruerunt.*

16 Occurrit denique Martyrium septem aliorum FF. Minorum apud Septam in Mauritania Tingitana, Danielis videlicet, Samuelis, Angeli, Domni, Leonis, Nicolai, & Hugolini, qui ob Euangelii prædicationem, & Mahumeticæ Sectæ confutationem, capitibus abscissis, Martyrii palmam anno 1221. adepti sunt. Eorum nomina referuntur in Martyrologio Romano *ad diem 13. Octobris*. Paulo autem post eorum gloriosum obitum Dionysius Primogenitus Regis Alphonso Portugalliæ a Rege Marochitano impetravit, ut eorum corpora in Hispaniam transferrentur; & hujus equidem translationis occasione Deus dignatus est miracula operari, a quorum patratiōe miraculorum cultus habuit initium, & die 8. Octobris eorum festum celebrari incepit, uti late habetur apud Baillet *in eorum vita ad diem 13. Octobris*. Deinde, cum Fratres Minores cultus approbationem obtinere cupientes, supplices preces exhibuissent Leoni X. ipse prædictum cultum approbavit, data etiam facultate eorum nomina invocandi in litiis, ut ex ejus Brevi typis impresso apud VVadingum *tom. 16. fol. 7.* plene desumitur. Quamvis enim miraculorum mentio non fiat in eodem Brevi Leonino, ea tamen referuntur in lectionibus propriis, quæ recitantur in Ordine FF. Minorum S. Francisci die 13. Octobris, necnon in chronicis Marci Ulyssiponenfis *part.1. lib.4. cap.34.* Et, ne quis crederet, ea patrata fuisse post dictum Breve, satis erit librum conformitatum legere *2. part. pag.87.* Magnæ quippe est auctoritatis, ut alibi videbitur, & scriptus fuit anno 1385. in quo loc. *cit.* hæc habentur: *Filius Regis Portugalliæ pro dono petiit, & accepit, & in Hispaniam transtulit, (sermo est de corporibus horum Beatorum) per quorum suffragia Deus multa mira operatur ad gloriam suam & honorem.*



## C A P U T X X X.

*De sacra Congregationis rituum consuetudine quoad Miraculorum necessitatem in causis Martyrum.*

**P**ost institutam sacrorum rituum Congregationem, nonnullæ Martyrum causæ fuerunt in ea propositæ atque expeditæ; quarum prima fuit viginti trium Martyrum Japonensium ex Ordine S. Francisci, ac trium ex Societate Jesu. Itaque juxta morem tunc temporis receptum discussa fuit causa a tribus Rotæ Auditoribus, Coccino, Manzanedo, Pirovano, & ab eis edita fuit relatio. In tertio autem relationis articulo iidem fufe quidem probarunt, miracula in causis Martyrum non esse necessaria; uti aliqua tamen mirabilia proposuerunt, quæ miracula tertii generis jure & merito dici poterant: quin immo unum in medium attulerunt, quod non solum mirabile, sed & verum miraculum dixerunt. Delata postea causa ad sacrorum rituum Congregationem, ipsa utique processit ad ulteriora, sed quod sibi constitisset de Martyrio, & miraculis; uti colligitur ex sequenti decreto: *In causa Canonizationis viginti sex Martyrum, referente Illustriss. Cardinali Muto, sacrorum rituum Congregatio censuit, constare de Martyrio, & miraculis; ideoque, si Sanctissimo placuerit, posse deveniri ad actualem Beatificationem, & Canonizationem: 3. Julii 1627. Item ex Brevis Beatificationis eorumdem edito in Actis Bollandianis tom. I. mensis Februarii pag. 740. & apud Castellinum de certit. glor. SS. pag. 485. ubi: Referente dilecto Filio nostro Tiberio Tituli S. Priscæ Presbytero Cardinali Muto nuncupato, discussa, censuerunt, constare de Martyrio, & miraculis.*

2 Secunda causa fuit B. Josaphat Martyris Pollocensis: &, quia tunc vigeat etiam consuetudo prævii examinis trium Rotæ Auditorum, edita idcirco relatione a Coccino, Pirovano, & Merlino, iidem in parte secunda fufe probare conati fuere, miracula in causis Martyrum non esse necessaria; ac proinde emendandam asseruerunt lectionem Ostiensis antesignani in sum. lib. 3. de Reliq. & venerat. SS. opinionis miracula requirentis, ita ut in locum verborum: *Sed quaritur tantum de miraculis, et causa propter quam passi sunt*: substituenda dixerint hæc alia: *Sed tantum quaritur de Martyrio, et causa passionis*. Emendandam, inquam, tum quia Ostiensis constituere volebat differentiam inter Martyres, & Confessores, quæ sine dictorum verborum emendatione haberi non poterat; tum quia in commentariis ad cap. Audivimus, de Reliq. et venerat. SS. postquam sermonem habuit de requisitis in Canonizatione Confessorum, & signanter de miraculis, subdit sub num. 5. *Hic autem ordo non semper ad unguem hactenus est servatus, et maxime, quando agebatur de Martyrizatis pro Fide; illi enim consueverunt facilius & levius expediri, nullo amplius facto verbo de miraculis*. Subinde tamen ipsi Rotæ Auditores in part. 4. relationis nonnulla miracula a Postulatoribus propo-

proposita retulerunt, iisdemque relatis, ita dixerunt: *Super quibus tamen probationibus circa miracula cum agentes pro venerabili Iosaphato non multum infisterent, transivimus ad excussionem prodigiorum et signorum quorundam admirabilium post mortem Praefulis secutorum, quibus videtur Deus voluisse comprobare veritatem ejus Martyrii.*

3 Post editum judicium Rotale causa delata fuit ad sacrorum rituum Congregationem, & in ea propositum fuit dubium, an constaret de Martyrio, & causa Martyrii; sacra autem Congregatio censuit constare: *Propositum fuit dubium ab Eminentiss. Pamphilio, an constet de Martyrio, & causa Martyrii; & sacra Congregatio censuit, constare de Martyrio, & causa Martyrii: 9. Augusti 1642.* Tum Secretarius sacrae Congregationis excitavit difficultatem, an essent necessaria miracula in causis Martyrum; & sacra Congregatio demandavit, ut articulus in abstracto examinaretur: *Cum ad instantiam mei Secretarii excitatura fuisset dubium, an in declarandis Martyribus esset a sacra Congregatione, prater examen Martyrii, & causa Martyrii, inquirendum etiam de miraculis, non quidem tamquam necessariis ad faciendum Martyrem, juxta communiorum opinionem Theologorum & sacrae Rotae, sed tamquam probationes certiores & illustriores ipsius causa Martyrii, & praesentium actus interni finalis in Martyre, juxta praxim alias secutam ab eadem sacra Congregatione in Japonen. xxvi. Martyrum 3. Julii 1627. factum fuit de hoc verbum per Eminentiss. Pamphilium Ponentem, & sacra Congregatio mandavit, disputari dubium in abstracto, & interim in hac causa videri etiam de miraculis: die 6. Augusti 1642.* Verum sacrae Congregationis Consultores non fuerunt invicem concordēs, ut ex sequenti suffragiorum relatione percipitur, quae est typis impressa apud Mattam de Canoniz. Sanctor. part. 5. cap. 3. num. 1. *Disputatum fuit in genere pro causis Martyrum, quae solent in sacra Congregatione examinari, utrum pro declarando Martyre a Sede Apostolica requirenda sint miracula; & aliqui, scilicet P. Lucas, P. Alciatus, licet hic ambigue, Reverendissimi Albicius, Ghislerius, Dunozet, & Homodeus, fuerunt in voto, quod non sint requirenda, ex eo, quod Martyrium ad instar Baptismi operatur in instanti remissionem peccatorum, & confert gratiam, & ex eo, quod innumerabiles Martyres colantur in Ecclesia, de quorum miraculis non constat, nec Ecclesia de illis mentionem facit. Alii vero fuerunt in voto, quod requirantur, scilicet Reverendiss. Oregius Sacrista, Magister sacri palatii, Episcopus civitatis Plebis, Promotor Fidei, si non constet de actu interno, & ego, ex eo quod ad consummandum Martyrium requiratur voluntas probata patiendi pro Fide, vel justitia, & permanio in charitate usque in finem; quae veritas, cum resideat in corde, cujus tantum Deus scrutator est, & pendeat ab actu interno finali, non potest probari, nisi per signum a Deo, quod est miraculum, sive mirabile. Sed videbantur concordari ista opiniones ex suppositione, quod nimirum, dato vero Martyrio, miracula non sint necessaria; ad hoc vero, ut in individuo hoc, & hoc Martyrium probetur verum, miracula requirenda esse: die 13. Sept. 1642.* Et ideo sacra Congregatio articulum illum in abstracto propositum non resolvit:

solvit : quia tamen agebatur de re gravissima , statuit actu ipso adhærere opinioni tutiori miracula requirenti , eo maxime , quod hæc sanctæ Sedis consuetudini esset uniformis : *Proposito per Eminentiss. Pamphilius Ponentem , stante discrepancia prædictarum opinionum , quid agendum esset in causa servi Dei Josaphat Archiepiscopi Pollocensis , an procedendum ad ulteriora , non confitto de miraculis , an vero de miraculis cognoscendum ; sacra Congregatio nihil in tam ardua questione declarare volens , transiit cum opinione tutiore & validiore , cum agatur de summa re , in qua Sedes Apostolica accuratissime procedere debet ; & juxta antiquam praxim unanimi consensu mandavit , examinari miracula : die 13. Septembris 1642. Tum postea his cohærenter editum fuit a summo Pontifice Urbano VIII. Breve Beatificationis , de quo in Bullario Romano ( tom. 5. bull. 304. dicti Pontificis §. 1. ) Congregatio sacrorum rituum die 2. Martii 1641. censuit , constare de validitate processus ; die vero 13. Septembris 1642. constare de Martyrio , & causa Martyrii ; die demum 22. Novembris ejusdem anni 1642. constare etiam de miraculis ; ideoque eidem Congregationi videri , si Nobis placeret , posse dictum servum Dei Josaphat Beatorum Martyrum catalogo adscribi .*

4. Tertia causa est B. Petri de Arbues , de qua quidem quando actum fuit , jam ab aula recesserat mos editionis relationum Rotalium . Petrus itaque Franciscus de Rubeis Fidei Promotor suas exaravit animadversiones una cum apparatu ad materiam Beatificationis , & Canonizationis Martyrum . In hoc autem testatus est usum miracula requirendi in causis Martyrum : *Perpetua , & constans Ecclesiæ Romana consuetudo fuit , in Martyribus etiam miracula exigere ad eorum Beatificationem , & Canonizationem , ut veri Martyrii consummatio , & gloria ob illud in caelesti Jerusalem adepta illis , quasi Dei digito , manifestetur Ecclesiæ militanti . Ideoque , post approbatum Martyrium , & causam Martyrii , transitus factus est ad discussionem miraculorum , uti colligitur ex sequenti sacre Congregationis decreto : Proposito per Eminentiss. D. Card. Sacchetti dubio , an constet de Martyrio , & causa Martyrii servi Dei Petri de Arbues , Sanctissimus , prævia discussione , de Fratrum consilio censuit , constare de Martyrio , & causa Martyrii ; ac præinde ad ulteriora procedendum esse , nempe ad discussionem miraculorum , si quæ operari dignatus est Omnipotens intercessione vel intuitu ejusdem servi Dei : die 12. Decembris 1661. Examinata propterea , & approbata fuerunt miracula , quemadmodum ex hoc alio decreto desumitur : Acriter discusso dubio proposito per Eminentiss. Chysium , an constaret de duodecim miraculis desumptis ex processu compulsoziali , sacra rituum Congregatio habita coram Sanctissimo die 25. Septembris 1663. declaravit , constare de tertio , & sexto miraculis &c. ac præinde , facta per eundem Card. Chysium plena & distincta relatione eorum omnium , qua in eadem causa gesta sunt , deque sanctitate vite , virtutibus , Martyrio , & causa Martyrii , prodigio effervescentie & multiplicationis sanguinis , & miraculis supradictis , sacra eadem Congregatio censuit , quandocumque tuto deveniri posse ad solemnem Canonizationem Petri Arbuesii juxta ritum &c. attento*  
Tom. I. K k quod

quod agitur de Martyre cum prodigiis & miraculis mature discussis & formiter approbatis. Interim vero, donec ad actum sollemnis Canonizationis deveniatur, Sanctissimus litteras in forma Brevis super cultu Beati eidem Dei servo in ecclesia Metropolitana Casaraugusta cum Officio & Missa de Communi unius Martyris non Pontificis desumendis prestando annuit concedendas. Atque ad normam quidem hujus definitionis editum est a summo Pontifice Alexandro VII. Breve Beatificationis, de quo in Bullario tom. 6. bull. 139. ejusdem Pontificis.

5 Quarta causa est Martyrum Gorcomiensium, quæ pariter per eandem viam processit, discussionis videlicet, atque approbationis miraculorum, antequam ad Beatificationem progrediretur. En sacræ Congregationis decretum: *Acriter discusso dubio proposito per Eminentiss. D. Card. Azcolinum, an constaret de duodecim miraculis desumptis ex processu remissoriali, & compulsoriali confectis super Martyrio, & causa Martyrii, ac miraculis novemdecim Martyrum Gorcomiensium &c. sacrorum rituum Congregatio habita coram Sanctissimo D.N. Clemente Divina providentia Papa X. die 25. Septembris 1674. declaravit, constare de quarto, & quinto miraculis instantaneæ sanationis Theodori Dinchii a nativitate, & Ægydii Tilmanni Diaconi, intestinalis hernia pertinacibus & difformibus jacturis per plurimos annos laborantium, qui statim, emisso voto, integri, sanique, ac si nunquam simili morbo correpti fuissent, reperti sunt: eique consentit Breve Beatificationis expeditum a Clemente X. & typis Cameralibus impressum anno 1675. Cum itaque mature diligenterque discussi & perpenſi fuerint per Congregationem venerabilium FF. nostrorum S.R.E. Cardinalium sacris ritibus præpositorum processus de hujus sanctæ Sedis Apostolica licentia confecti super Martyrio, & causa Martyrii &c. ac super signis, prodigiis, & miraculis, quæ ad manifestandam mundo finalem eorum perseverantiam a Deo edita & patrata fuisse dicebantur &c.*

6 Quinta causa est B. Joannis de Prado, in qua quid actum fuerit, in superioribus fuisse relatum est.

7 Sexta causa est S. Joannis Nepomuceni, quæ licet minime processerit per viam non cultus, sed per viam casus excepti, propter quod opus erit de ea infra iterum loqui; super eadem tamen, quantum attinet ad præsentem inspectionem, satis erit referre, quod, resolutio dubio super Martyrio, & causa Martyrii, disputatum fuit in Congregatione generali die 11. Januarii 1729. dubium: *an, & de quibus miraculis constet in casu, & ad effectum &c.* tum autem, approbatis duobus miraculis de secundo genere, & duobus aliis de tertio genere, expeditum fuit die 16. Februarii 1729. decretum Canonizationis quandocumque faciendæ, quæ profecto paulo post facta fuit in basilica Lateranensi.

8 Septima causa est tunc Beati nunc Sancti Fidelis a Sigmaringa. Fuit in ea disputatum dubium complexivum Martyrii, causæ Martyrii, & signorum seu miraculorum; editoque responſo, quod constabat de Martyrio, & causâ Martyrii, necnon de quatuor miraculis tertii generis, ut patet ex decreto



decreto edito die 24. Februarii 1729. solemnia Beatificationis expleta fuerunt in basilica Lateranensi .

9 Series hæc monumentorum ostendit , quod , licet nunquam editum fuerit generale decretum de necessitate miraculorum in causis Martyrum pro obtinenda Beatificatione , aut Canonizatione ; nunquam tamen formalis Beatificationis , & Canonizationis honores Martyribus indultos fuisse a Sede Apostolica , nisi ad approbationem Martyrii , & causæ Martyrii miracula accessissent : quod mihi satis esse videtur pro statuenda Romanæ Sedis disciplina de minime beatificandis , aut canonizandis Martyribus absque miraculis . Quamvis enim id durum aliquibus videatur , vel quia communiter Doctores docent , facilius expediri causas Martyrum , quam Confessorum , vel quia Martyrium supplet vicem Baptismi , *juxta text. in can. Baptismi vicem , & in can. Catechumenum . de consecrat. dist. 4.* vel quia ipsum Martyrium ab homine adulto sua sponte susceptum ac toleratum pro Christo est per se proxima & certissima causa Beatitudinis Martyris , secundum illud Matthæi 10. 32. & Lucæ 12. 8. *Quicumque me confessus fuerit coram hominibus , confitebor & ego eum &c.* & Marci 8. 35. *Qui autem perdidit animam suam propter me , inveniet eam &c.* vel quia in antiquiori Ecclesia ad Martyrum Canonizationem procedebatur sine miraculis ; vel tandem quia sine miraculis de omnibus necessariis potest certo constare ( de causâ quippe mortem inferendi ex parte Tyranni constare potest per odium , quo prosequitur Christianam Religionem , per ipsam quæstionem & actum judicii , quo reum interrogat , per oblatam liberationem , si forte velit Fidem negare , aut aliquid facere contra Fidem , & denique per prolatam sententiam ; de causâ movente ex parte acceptantis , & mortem sustinentis certo constare potest , si coram Tyranno Fidem & Evangelium non erubuit , si in tormentis hilaritatem & gaudium præstulit ; de causâ disponente ex parte Martyris constare potest , hoc est de actu contritionis & poenitentiae , si videlicet habeat copiam Confessarii , & sacramentaliter confessus sit , vel saltem , si a Deo veniam petiit & dedit alia signa interni doloris , quando non potuit sacramentaliter confiteri ; & demum de perseverantia in his omnibus constare potest , si neque verbis , neque signis propositi mutationem indicavit , sed potius e contrario se habuit uniformiter , & voluntariam passionem præstulit quoadusque mansit usus rationis & libertatis , sive potentiae ad peccandum ) hæc nihilominus & similia tanti mihi roboris & momenti non sunt , ut in ipso facti eventu consilium præstare possim ab exposita disciplina recedendi .

10 Re vera , si quotquot sententiam amplexi sunt , quæ in Martyribus necessitatem miraculorum excludit , expresse constitentur , tutiorem esse sententiam , quæ miracula exposcit , cur erit recedendum ab opinione tutiore in causâ non necessaria , sed arbitraria , hoc est quæ non debet ex necessitate a Romano Pontifice definiri ; obloquentibus potissimum Hæreticis adversus nostrorum Martyrum Canonizationes , nostrisque Catholicis

passim hortantibus, ut ad eas procedatur, servatis servandis, adhibitaque quacumque diligentia, nec ulla prætermiſſa, quæ certitudini iudicii conducere poſſit? Neque enim video obſtare poſſe, vel quod facilius cauſæ Martyrum expediantur, quàm cauſæ Confeſſorum, vel quod antiquioribus temporibus cauſæ Martyrum ſine miraculis expedirentur; tum quia facilitas expeditionis non conſiſtit in excluſione miraculorum; ſed in ſeria indagine virtutum, & totius vitæ curſus, quæ in cauſis Confeſſorum aſſumitur, non aſſumitur autem in cauſis Martyrum, in quibus quæſtio reducitur ad mortem, cauſam mortis, diſpoſitionem ſanctæ eam recipiendi, atque in eadem diſpoſitione perfeverantiam; tum quia minime culpanda, quin potius maxime commendanda eſt Eccleſiæ Romanæ conſuetudo, quæ, crescente hominum malitia, ad obſtruendum os loquentium iniqua, in re tanti momenti nova induxit experimenta, quæ antiquioribus temporibus charitate plenis, & malitia vacuis in uſu non erant. Neutiquam etiam attendendum, quod Martyrium ſuppleat vicem Baptiſmi, quodque etiam ſine miraculis conſtare poſſit de omnibus & ſingulis veri Martyrii requiſitis: primo, quia, ut Martyrium ſuppleat vicem Baptiſmi, necesse eſt, ut omnia habeat requiſita veri Martyrii, & ideo nihil implicat, quod Eccleſia miracula expoſcat, ut de illis certior fiat, juxta illud D. Gregorii lib. 4. dialog. cap. 6. tom. 2. oper. *Si igitur vitam anima manentis in corpore deprehendis ex motu membrorum, cur non perpendis vitam anima poſt corpus etiam per oſta mortua in virtute miraculorum?* qui ibidem alloquens Petrum Diaconum, & agens de Martyribus dixerat: *Ecce hi, qui animas in mortem poſuerunt, atque animarum vitam poſt mortem carnis eſſe crediderunt, quotidianis miraculis coruſcant: tum concludit in perſona Petri Diaconi: Nulla, ut opinor, huic allegationi ratio obſiſtis, in qua ex rebus viſibilibus cogimur credere quod non videmus.* Deinde quia, ſicuti ſine miraculis dicitur conſtare poſſe de omnibus & ſingulis requiſitis veri Martyrii, ita etiam ſine miraculis conſtare poteſt de omnibus & ſingulis veræ ſanctitatis requiſitis, ex teſtimonium videlicet dicentibus de continuato uſu virtutum in gradu heroico, ex actibus virtutum ab iſdem teſtibus relatis, ex integra vitæ ſerie per juridicos proceſſus manifeſtata, ex Confeſſariorum atteſtationibus de puritate conſcientiæ, morum innocentia, arduoque in virtutibus progreſſu, & demum ex pretioſa morte in conſpectu Domini, quæ per prædictos teſtes & Confeſſarios comprobari poteſt. Quocirca, ſi nihilominus pro Beatificatione, aut Canonizatione Confeſſorum miracula requiruntur, ut novo probationum genere ea confirmentur, quæ a teſtibus de vita & virtutibus dicta fuerunt, utque Eccleſia tot probationibus edocta certa ſit, ſe nullam omnino omiſſiſſe diligentiam, quæ in re tanti momenti fieri potuiſſet; iſertur, quod, utcunque ſit, an ſine miraculis conſtare poſſit de omnibus & ſingulis Martyrii requiſitis, necne, atque adeo admiſſo, quod de eis ſine miraculis conſtare poſſit, id non ſufficiet, ut ad Beatificationem, ſeu Canonizationem Martyris procedatur ſine miraculis,

raculis, tamquam novis probationibus ad rerum relatarum, atque a testibus comprobatarum confirmationem advocatis, & ut sciant omnes, adhibitam fuisse diligentiam quamlibet in causæ definitione, quæ inter majores recensetur: eoque magis, quia, sicuti possibile est, quod, non obstantibus testium & Confessoriorum attestationibus, Virgines, aut Confessores vitam in occulto duxerint laxiorem, pro quo timore avertendo miracula requiruntur, sub ea certa spe, Deum non esse illa patraturum eorum intercessione, quorum mores & gesta ipsi grata non fuerint & accepta; ita fieri potest, ut, haud obstantibus dictis testium, mortem sustinentes pro Christo aliquem interiorem actum vanæ gloriæ, vel impatientiæ pepererint, aut ut mortem inferentes odium quidem Christianæ Religionis præfeterint, sed ex alia causa ad eam inferendam fuerint inducti: in quo rerum itatu unusquisque dignoscere potest, non sine ratione miracula requiri, ut exposita pericula excludantur, ea semper recurrente firma spe, Deum non esse miracula patraturum intercessione eorum, qui integrum & purum propriæ vitæ sacrificium eidem non obtulerint; juxta doctrinam D. Thomæ 2. 2. *quest.* 178. *art.* 2. *Operatur enim ea Deus ad hominum utilitatem, et hoc dupliciter; uno quidem modo ad veritatis prædicata confirmationem; alio modo ad demonstrationem sanctitatis alicujus.....* secundo autem modo non fiunt miracula nisi a Sanctis, ad quorum sanctitatem denuntiandam miracula fiunt vel in vita eorum, vel etiam post mortem. Cui ad rem subdit Medina in 3. *part. quest.* 43. *conclus.* 2. *Miraculum enim verum quod sola Divina virtute fieri potest, est veluti quoddam sigillum Dei quo utitur in testimonium, et confirmationem veritatis.* Consonat illud D. Gregorii, qui *dialog. lib.* 3. *cap.* 31. *tom. cit.* ut solida auctoritate probaret Martyrium Herminegildi filii Leovigildi Regis Visigothorum, jussu patris Ariani occisi in Hispania, quia noluerat communicare cum Episcopo Ariano, ait: *Sed pro ostendenda vera ejus gloria, superna quoque non defuere miracula; nam coepit in nocturno silentio psalmodia canere ad corpus ejusdem Regis, & Martyris audiri, atque ideo veraciter Regis, quia & Martyris. Quidam etiam ferunt, quod illic nocturno tempore accensa lampades apparebant; unde & factum est, quatenus corpus illius, ut videlicet Martyris, jure a cunctis Fidelibus venerari debuisset....* Qua in re considerandum nobis est, quia totum hoc agi nequaquam posset, si Herminegildus Rex pro veritate mortuus non fuisset.



## C A P U T    X X X I.

*De serie Actorum in causis sive Confessorum, sive Martyrum, qua introducuntur post decreta Urbani VIII. Et qua procedunt per viam casus excepti.*

**E**X alibi dicendis constabit, Urbanum VIII. prohibuisse quidem exhibitionem publici cultus erga Dei servos non Beatificatos, aut Canonizatos a Sede Apostolica, at exemisse tamen ab hac sua lege eos Dei servos, qui cultum publicum antea obtinuissent, vel spatio temporis immemorabilis, vel ex Apostolicis indultis, vel ex permissione sacrae Congregationis, vel per Patrum virorumque sanctorum scripta.

2 Quando ergo agitur de Dei servis sive Confessoribus, sive Martyribus, qui non sub lege, sed sub exceptione Urbana sunt comprehensi, & in quorum causis petitur progressus ad solemnem Canonizationem, conficitur ab Ordinario auctoritate sua ordinaria processus super fama virtutum, & miraculorum, si agitur de Confessore; aut super fama Martyrii, & signorum seu miraculorum, si de Martyre: tum una cum processu isto conditur eadem auctoritate ordinaria ab eodem Ordinario alter processus super casu excepto a decretis Urbani VIII. Quatenus autem non fuisset ab Ordinario confectus hic processus super casu excepto, conficitur porro auctoritate Apostolica post signatam commissionem, sicque introducta causa in sacram Congregationem: postquam etenim Sedes Apostolica manum apposuit, non est permillum Ordinariis, se hisce causis immiscere, ad finem etiam conficiendi processum super obedientia decretis Urbani VIII.

3 Processus ab Ordinariis conditi ad sacram Congregationem transmittuntur, atque aperiuntur modis & formis alibi memoratis. Non expectatur in hisce causis decennium, antequam de earum introductione, & ideo de signanda commissione tractetur, ut in secundo tomo videbimus; sed, apertis exemplatisque processibus, proponitur ut plurimum in sacra Congregatione ordinaria dubium; *an sit signanda commissio introductionis*; eoque favorabiliter resoluta, transitus fit ad discussionem alterius dubii in eadem Congregatione ordinaria; *an sit confirmanda sententia iudicis ordinarii, vel delegati super casu excepto a decretis Urbani VIII.* Non sufficit enim, quod Ordinarius, aut Delegatus processum conficiant super casu excepto, sed ulterius necesse est, ut suam proferant sententiam, quam quidem, quatenus minime protulissent, sacra Congregatio mandat, ut proferant; quemadmodum colligitur ex decreto edito die 23. Martii 1669. in causa Cracovien. B. Chune Gundis, atque ex aliis decretis emissis die 3. Martii, & die 29. Decembris 1674. in causa Barcinonen. B. Oldegarii.

4 Si sententia Ordinarii, vel iudicis delegati faveat casui excepto a decretis

decretis Urbani VIII. eademque confirmationis robur obtineat a sacra Congregatione, & sacre Congregationis responsum a Pontifice approbetur; Dei servus, in cuius causa hæc fuerunt obtenta, dicitur *æquipollenter* Beatificatus. Cum enim Beatificatio nihil aliud sit, quam permissio cultus pro aliquibus determinatis locis, de cultus autem permissione dubitandum non sit, quotiescumque casus exceptus a decretis Urbani approbetur, de *æquipollenti* idcirco Beatificatione minime dubitandum esse videtur.

5 In hac Beatificatione *æquipollenti* nulla fiunt solemnia, cum decretum Alexandrinum supra relatum sibi vindicet locum in formalibus tantum Beatificationibus: unde cœtus illi, quorum interest, casum exceptum a decretis Urbani VIII. fuisse approbatum, gratiarum tantum actionem Domino Deo deferre possunt illis modis & formis, quibus gratias agere possent pro quocumque alio spirituali recepto beneficio.

6 Elenchum in superioribus exhibuimus formalium Beatificationum. Quamobrem in præsentis operæ pretium esse censemus, elenchum asserere harum Beatificationum *æquipollentium*, hoc est eorum Dei servorum, quorum cultus tamquam exceptus a decretis Urbani VIII. fuit a Sede Apostolica approbatus. Non continebit tamen elenchus iste declarationem omnium casuum exceptorum, nec fundamenta exceptionum, aut cetera ad unumquemque servum Dei pertinentia: ac proinde non illos Dei servos continebit, qui, post approbatum casum exceptum, fuerunt in Sanctorum album relati; sed eos tantum, in quorum causis, approbato casu excepto, non fuit usque adhuc deventum ad solemnem Canonizationem. Reliqua enim ad unumquemque ex his Dei servis pertinentia in secundo tomo exponentur.

7 Tempore Urbani VIII. modo supra indicato *æquipollenter* fuit beatificata Columba Reatina Virgo Tertii Ordinis Sancti Dominici de Poenitentia.

8 Tempore Innocentii X. per approbationem cultus immemorabilis *æquipollens* Beatificatio concessa est Beatis Bernardo Ptolemæo fundatori Congregationis Montis Oliveti, Nicolao Flue Eremitæ Helvetio, & Bernardino de Feltro Ordinis Minorum.

9 Tempore Alexandri VII. approbatus fuit cultus immemorabilis B. Ferdinandi III. Regis Castellæ, & Legionis.

10 Tempore Clementis IX. approbatus fuit casus exceptus in causa B. Margaritæ de Sabaudia Tertii Ordinis S. Dominici.

11 Tempore Clementis X. facta est approbatio cultus immemorabilis, & casus excepti a decretis Urbani VIII. in causis Beatorum Petri Paschasis Ordinis B. Mariæ de Mercede Redemptionis Captivorum, Ludovicæ Albertoniæ Tertii Ordinis S. Francisci, Jacobi de Mevania Ordinis Prædicatorum, Salomæ Reginæ Aliciæ, seu Galaciæ Monialis Professæ Ordinis S. Claræ, Oldegarii Episcopi primum Barcinonensis, deinde Archiepiscopi Tarraconensis.

12 Tem-

## 264 DE SERVORUM DEI BEATIFICATIONE

12 Tempore Innocentii Papæ XI. approbatus est cultus immemorabilis Beatorum Joannis Cantii Presbyteri sæcularis & Professoris Academicæ Cracoviensis, Amedei Ducis Sabaudicæ III., Simonis de Lipnica Sacerdotis Ordinis Minorum S. Francisci de Observantia, Petri Armengol Religiosi Professi Ordinis B. Mariæ de Mercede Redemptionis Captivorum, Antonii a Stronconio Laici Professi Ordinis Minorum Observantium Sancti Francisci.

13 Tempore Alexandri VIII. facta est approbatio cultus immemorabilis B. Chunegundis Reginæ Poloniæ.

14 Tempore Innocentii XII. similia contigerunt in causis Beatarum Mariæ de Socos Monialis Professæ Ordinis B. Mariæ de Mercede Redemptionis Captivorum, Joannæ filiæ Alphonsi V. Regis Lusitanicæ & Religiosæ Ordinis S. Dominici, Humilianæ de Circulis, Helenæ Enselminæ Ordinis S. Francisci, Zitæ Virginis Lucensis, Mariæ de Capite, vulgo nuncupatæ *della Cabeza* uxoris S. Isidori Agricolæ, Beatorumque Augustini Dalmatæ Ordinis Prædicatorum Episcopi Zagabrienfis deinde Lacerini, ac Jacobi Illyrici vulgo *de Bistefo* Laici Ordinis Minorum Observantiæ S. Francisci.

15 Tempore Clementis XI. approbatus est cultus immemorabilis Beatorum FF. Joannis Sacerdotis, & Petri Laici Martyrum Ordinis Minorum S. Francisci, Terefiæ, & Sanciæ Monialium Ordinis Cisterciensis, quæ vulgo dicuntur *Sanctæ Regine*, Lucie de Narnia Ordinis S. Dominici, Salvatoris ab Horta Ordinis Minorum Observantium S. Francisci, Ceslai Odorvantii Ordinis Prædicatorum, Liberati de Lauro *Sancti* nuncupati Ordinis FF. Minorum S. Francisci de Observantia, Gregorii Papæ X., Alexii Falconerii unius ex fundatoribus Ordinis Servorum Matris Dei, Seraphini de Asculo sive de Monte Granario Laici Professi Ordinis Minorum Capuccinorum S. Francisci, Humilitatis Abbatissæ & fundatricis Monialium Congregationis Vallis Umbrosæ.

16 Tempore Innocentii XIII. approbatus est cultus immemorabilis Beatorum Dalmatii Ordinis S. Dominici, atque Andreæ de Comitibus Ordinis Minorum S. Francisci.

17 Tempore Benedicti Papæ XIII. approbatus est cultus immemorabilis Beatorum sex ex septem fundatoribus Religiosi Ordinis Servorum B. Mariæ Virginis, hoc est Bonfilii Monaldini, Joannis Manetti, Benedicti Antellenfis, Bartholomæi de Amideis, Ricoveri Lippii, Gerardini Softenei. Cultus etenim septimi fundatoris, idest B. Alexii de Falconeriis, jam fuerat ut mox diximus, antea comprobatus. Tum etiam sub eodem Pontifice approbatus est cultus immemorabilis B. Serapionis Martyris Religiosi Professi Ordinis B. Mariæ Virginis de Mercede Redemptionis Captivorum. Initio autem ducto ab approbatione cultus immemorabilis B. Lucie de Narnia usque ad approbationem cultus immemorabilis B. Serapionis, approbationes omnes contigerunt, dum fungebar munere Fidei Promotoris.

18 Novissime vero, tempore videlicet summi Pontificis Clementis XII. approbatus est cultus immemorabilis B. Joannis de Dukla Ordinis Minorum Observantium S. Francisci, B. Benedicti Papæ XI. Ordinis Prædicatorum, B. Michelinæ Tertiariæ Ordinis Minorum Conventualium, B. Ritæ five Margaritæ de Cassia, B. Claræ de Montefalco, servi Dei Joannis Angeli Porro Ordinis Servorum. Et postquam summus Pontificatus ad Nos immerentes licet delatus est, facta est approbatio casus excepti, sive cultus immemorabilis B. Coletæ Virginis Ordinis S. Claræ, B. Stephanæ de Quinzanis Monialis Ordinis Prædicatorum, B. Alvari de Corduba Sacerdotis Professi ejusdem Ordinis, B. Petri Gonzalez Sacerdotis Professi Ordinis Prædicatorum, B. Gerii a Monte Sancto *Sancti* nuncupati, B. Benedicti a S. Philadelphia Laici Professi Ordinis Minorum Observantium Reformatorum, B. Francisci Patritii Ordinis Servorum B. Mariæ Virginis, B. Nicolai Albergati S. R. E. Cardinalis & Episcopi Bononiensis, B. Pacifici a Ceradano Ordinis Minorum S. Francisci de Observantia.

## CAPUT XXXII.

*De serie Actorum in causis sive Confessorum, sive Martyrum, quæ introducuntur post decreta Urbani VIII. quaque procedunt per viam casus excepti, in transitu a Beatificatione æquipollenti ad formalem Canonizationem.*

1 **A**pprobato casu excepto a decretis Urbani VIII. ut ab hac Beatificatione æquipollenti transitus fiat ad formalem Canonizationem, obtenta prius facultate, ne processus Apostolicus in genere conficiatur, quæ ex alibi dicendis facile indulgetur, cum agitur de causis procedentibus per viam casus excepti, proponendum est dubium in causis Confessorum; an constet de virtutibus Theologalibus, & Cardinalibus: in causis autem Martyrum; an constet de Martyrio, & causa Martyrii. Porro, expleto favorabiliter judicio super virtutibus, aut super Martyrio, proponitur in causis Confessorum dubium; an constet de miraculis, quæ post indultam venerationem supervenerunt: in causis autem Martyrum; an constet de signis seu miraculis, quæ supervenerunt post indultam venerationem; sive id fiat separatim a dubio super Martyrio, & causa Martyrii, sive simul cum ipso, uti supra visum est. Denique, quatenus duo ad minimum miracula approbentur, fit locus ultimo dubio; an, flante approbatione virtutum, & miraculorum, aut Martyrii, & cause Martyrii, & signorum sive miraculorum, tuto procedi possit ad solemnem Canonizationem.

2 Hic tamen procedendi ordo nonnullis aliquando displicuit: aliquibus quippe nimis laxus, aliis autem nimis rigidus visus est. Visus est nimis aliquibus nimis laxus, quia, cum in causis Beatorum, quæ procedunt

T.m.I.

L I

cedunt

cœdunt per viam non cultus, quatuor miracula sint necessaria pro Canonizatione obtinenda, duo scilicet ante, & duo post Beatificationem; in causis vero, quæ procedunt per viam casus excepti, duo tantum miracula dicantur esse necessaria, quæ post indultam venerationem supervenerint, videtur causa non Beatificati melioris esse conditionis causa Beatificati: qua in re aliquod inordinatum continetur.

3 Difficultas hæc ipsa fuit a Fidei Promotoribus pluries propofita in examine harum causarum, & signanter quando proponebatur dubium; an, flante approbatione virtutum, et duorum miraculorum tertii generis, tuto ad Canonizationem procedi posset. Prosper enim Bottinius Archiepiscopus Myrensis & Fidei Promotor egregius eam propofuit in causa tunc Beati, nunc Sancti Joannis de Capistrano, atque in causa tunc Beatæ, nunc Sanctæ Catharinæ de Bononia: & ex ratione quidem modo ponderata dixit, tuto in prædictis causis, quæ processerant per viam casus excepti, non posse deveniri ad Canonizationem, cum videlicet duorum tantum miraculorum tertii generis approbatio accessisset ad unamquamque ex causis prædictis. Ipse quoque ad officium Fidei Promotoris assumptus hanc eandem difficultatem excitavi in causa tunc Beati, nunc Sancti Stanislai Novitii Societatis Jesu. Verum, cum, ipsa difficultate secundum juris solemnitatem discussa, sacrorum rituum Congregatio generalis censuerit, in omnibus prædictis causis tuto posse ad Canonizationem deveniri, uti desumitur ex decreto edito in causa S. Joannis de Capistrano die 13. Junii 1679. ex decreto edito in causa S. Catharinæ die 17. Maji 1707. atque ex decreto edito in causa S. Stanislai die 13. Novembris 1714. tria hæc exempla, quæ, re mature ac jure discussa, prodierunt, ostendunt, dubitandum non esse de usu sacræ Congregationis quoad sufficientiam duorum miraculorum tertii generis, quæ post indultam venerationem supervenerint, pro obtinendo Canonizationis decreto in causis procedentibus per viam casus excepti. Præterquamquod, habita approbatione duorum miraculorum tertii generis, expeditum fuit solemniter Canonizationis decretum in causa etiam S. Agnetis Virginis Ordinis Prædicatorum quemadmodum desumitur ex decreto edito die 12. Maji 1726.

4 Et horum utique omnium ratio est, quia, cum textus in cap. *Venerabili. de test. et attestat.* constituat, ut pro obtinenda Canonizatione inquiratur super *vita, et miraculis*, pluralis locutio in numero binario vera est, juxta textum in cap. 40. de regul. jur. in 6. et in l. *Ubi numerus ff. de testibus*: & idcirco communis est opinio Doctorum, duo miracula sufficere pro Canonizatione impetranda, uti probant Contelox. de Canonizat. SS. cap. 20. num. 9. Castellin. de certis. glor. SS. cap. 8. punct. 23. §. *Tertia conclusio*, Pignatell. consult. 18. per tot. tom. 5. Bordon. de miraculis mediat. 4. num. 20. Auditores Rotæ in relatione S. Felicis tit. de miraculis §. *Numerus autem*; in relatione S. Hyacinthi tit. de miraculis versic. *Sed his non obstantibus*; et in relatione S. Andrea Corsini part. 2. num. 203. post primam consultationem Lezana.

§ Itaque



5 Itaque, si de jure duo miracula sufficiunt pro Canonizatione obtinenda; nemo est, qui non videat, quatuor miraculorum interventum, duorum videlicet ante, & duorum post Beatificationem, in causis procedentibus per viam non cultus, originem habere a consuetudine Sedis Apostolicæ: quod utique institutum cum non fuerit etiam extensum ad causas procedentes per viam casus excepti, in his standum est juris communis constitutioni. Quatenus vero subdatur, consuetudinem esse etiam ad has causas extendendam, ne non Beatificatus sit melioris conditionis Beatificato; repeti potest, quod post approbationem casus excepti, Dei servus dicendus est Beatificatus Beatificatione æquipollenti, atque adeo, quod ex quocumque capite proveniat declaratio casus excepti, sive a ratione immemorabilis, sive a ratione concessionum cultus jam factarum a Sede Apostolica, de præexistentia aliorum miraculorum ante indultam venerationem vehementissima urget præsumptio. Hæc porro a nobis scripta sunt, antequam ad summum Pontificatum licet immerentes fuerimus evecti. Ad summum autem Pontificatum evecti, cum serio consideraverimus, quod in causis procedentibus per viam casus excepti virtutes, & Martyrium probentur per testes de auditu, & probationes subsidiarias, decretum edidimus die 23. Aprilis 1741. in quo recedendum esse censuimus ab antiqua praxi procedendi ad solemnem Canonizationem ex duobus tantum miraculis; sed quatuor esse statuimus miracula necessaria, testibus de visu comprobata, ut in causis procedentibus per viam casus excepti, probatis virtutibus, aut Martyrio per subsidiarias probationes, solemnis obtineri possit Canonizatio.

6 Satisfecimus huc usque eis, qui ordinem sacræ Congregationis tamquam nimis laxum improbant: nunc operæ pretium est perpendere alia, quæ opponuntur ab his, qui eum nimis rigidum censent. Rigorem isti constituunt in necessitate proponendi dubium super virtutibus, vel super Martyrio post approbationem casus excepti a decretis Urbani VIII. Dicunt etenim, casum exceptum aliquando quidem constitui in sola immemorabili possessione cultus, sed etiam aliquando in Apostolicis litteris summorum Pontificum, ex quibus fit concessio Officii & Missæ in honorem Dei servi, sive, quod ejus nomen describatur in Martyrologio Romano: illud etiam interdum contingit, ut post approbationem casus excepti fiat prædictorum concessio a summis Pontificibus, prævio sacræ Congregationis consilio. Si post hæc igitur, ut ad Canonizationem procedatur, requiritur formalis discussio virtutum, cum fieri possit ut non approbentur, hac in re non modica continetur absurditas; quod scilicet dicatur, non constare de virtutibus eorum Dei servorum, in quorum honorem, Pontificia intercedente auctoritate, Missa celebratur, & recitatur Officium, nonnunquam etiam cum lectionibus propriis, in quibus referuntur virtutes, quæ postmodum reprobantur. Addunt, in hisce causis virtutes examinari non posse nisi dependendo a probationibus subsidiariis,

hoc est ab Historicis, & testibus de auditu, cum testes de visu in his antiquissimis causis, qui de virtutibus verba deponant, reperiri non possint; & ideo, quando virtutes prædicto modo examinantur, nulla ratione responderi posse dubio disputato, idest, constare de virtutibus, siquidem constare exposcit probationes apertissimas, atque, ut ajunt, luce meridiana clariores.

7 Favet huic assumpto decretum summi Pontificis Clementis IX. editum anno 1668. supra relatum, & hic iterum referendum: *Sanctissimus D. N. Clemens IX. ad omnem hesitationem desuper penitus tollendam, die 10. Septembris 1668. in Congregatione habita coram Sanctitate sua declaravit ac respective decrevit, quod in posterum in causis servorum Dei, qui aliqua veneratione & titulo Beati a Romanis Pontificibus decorati sunt, Cardinalis in ordine Ponens in Congregatione coram summo Pontifice habenda plenam & distinctam relationem facere tantummodo debeat eorum, quæ cultus concessionem præcesserunt, & quæ intuitu ipsius venerationis quomodolibet elargita fuerunt. Ea vero, quæ post indultam venerationem seu cultum quomodolibet supervenerunt, debeant per juridicas probationes discuti, ac, prævia matura discussione, ad juris trutinam redigi, prout hætenus inconcusse servatum fuit; ut ex iis constare possit, num Sedes Apostolica tunc valeat ad solemnem illius Canonizationem juxta S.R.E. ritum & canonicas sanctiones devenire.*

8 Enimvero, si juxta decretum Clementinum de illis Dei servis, quibus a Sede Apostolica veneratio indulta est, nequaquam discuti, sed tantum referri debent ea, quæ cultus concessionem præcesserunt, formalis autem discussio contrahitur ad ea, quæ ab indulta veneratione supervenerunt, jure ac merito inferri posse videtur, in causis horum Dei servorum esse disputanda tantummodo miracula, nec ullo modo disputationi esse subjiaciendas virtutes; multoque magis, quia duo hoc idem assumptum comprobantia reperiuntur exempla: primum ex causa Canonizationis S. Philippi Benitii, in qua sequens prodiit decretum: *Sacrorum rituum Congregatio censuit, posse concedi, ut procedatur ad ulteriora in causa B. Benitii absque discussione dubii, an constet de virtutibus tam Theologalibus, quam Cardinalibus & annexis in gradu heroico; extantibus Brevis & litteris Apostolicis Leonis X. & Pauli V. & Urbani VIII. emanatis tam super illius Beatificatione, quam super approbatione lectionum, & aliis, ac cultu immemorabili: quodque hujusmodi dubium proponatur in Congregatione habenda coram Sanctissimo de his, quæ supervenerunt post indultam eidem Beato venerationem, ad formam decreti facti die 10. Septembris 1668. in Congregatione generali habita coram SS. D. N. Clemente IX. sita Sanctitati sue visum fuerit: alterum vero ex decreto edito in causa S. Laurentii Justiniani, quod ita se habet: *Eadem sacra Congregatio, audito Rev. D. Archiepiscopo Myrensi Fidei Promotore in scriptis & in voce, censuit ex omnibus simul junctis posse procedi ad ulteriora in discussione miraculorum intercessione dicti Beati ab omnipotenti Deo patratorum ad effectum, de quo agitur, si SS. D. N. placuerit: et, facto de prædictis verbo cum Sanctissimo per**

*per me Secretarium, etiam presente prefato Rev. Fidei Promotore, Sanctitas sua benigne annuit.* Cum enim causa S. Laurentii Justiniani processerit per viam calis excepti, nec in illa fuerint secundum juris solemnitatem disputatæ virtutes, sed disputatio formalis fuerit redacta tantum ad miracula, quæ supervenerunt ab indulta veneratione, ut ex præposito colligitur decreto; nil clarius afferri posse videtur ad suadendum, neutiquam esse in hujusmodi causis disputandas virtutes, sed disputationem esse solum institutendam de miraculis, quæ post indultam supervenerunt venerationem.

9 Verum, ut modo expositis fiat satis, utque Sedis Apostolicæ consuetudo una cum fundamentis, quibus innititur, perspicua fiat; prænoscere opus est, exhibitionem publici cultus aliquando fuisse permissam atque etiam permitti, ejusque concessionem aliquando factam fuisse & etiam fieri, prævia utique fama non levi, nec arbitraria, sed gravi & bene fundata virtutum & miraculorum, aut Martyrii & signorum, in honorem aliquorum Dei servorum, qui pretiosa morte in Domino occubuerunt, at absque eo quod tamen ullum præcesserit juridicum examen dependens a processibus ordinario, & Apostolico, aut a processu Apostolico super virtutibus, & miraculis, vel super Martyrio, & signis. Quod quidem ex alibi dicendis comprobatur, interim vero est præponendum; quemadmodum pariter ponendum atque admittendum est, multas factas fuisse, & adhuc fieri a Sede Apostolica publici cultus concessionem in honorem Dei servorum post discussas approbatasque virtutes una cum miraculis, aut post discussum approbatumque Martyrium una cum causa Martyrii, signis, ac miraculis.

10 Quibus positis ac præmissis, dicimus, olim quidem in causis secundi generis, quando a Beatificatione procedendum erat ad Canonizationem, iterum examinari consuevisse ea omnia, quæ fuerant ante Beatificationem examinata & resoluta; sed in præfens hunc morem ab aula recessisse, cum in hisce causis post Beatificationem nunc ea tantum examinentur, quæ ab indulta veneratione subsecuta sunt, ut in superioribus visum fuit: in causis autem primi generis semper institutum fuisse examen virtutum, non obstante præcedentium indultorum concessione, utpote facta sine prævio juridico earundem examine; quod ipsum dicimus, semper factum fuisse in causis Martyrum, in quibus actum est de Martyrio, & causa Martyrii etiam post concessionem Indultorum, quando eadem facta est sine prævio juridico examine tum Martyrii, tum causæ Martyrii, & signorum; ita tamen ut differentia constituenda sit in qualitate examinis, cum aliquando illud expletum fuerit per modum formalis dubii, aliquando vero per modum relationis, non qualiscunque, sed juridicæ & dependentis a processibus auctoritate ordinaria, atque Apostolica, vel Apostolica tantum confectis, & aliquando sane in particulari sacrorum rituum Congregatione, aliquando autem in Congregationibus antepreparatoriis, præparatoriis, & generalibus, de more aliarum causarum. Quamobrem, cum

cum causæ procedentes per viam casus excepti non ad secundam, sed ad primam classem ut plurimum pertineant; mirum esse non debet, si post approbatum casum exceptum, ut a Beatificatione æquipollenti transitus fiat ad Canonizationem, necesse sit, ut virtutes in Confessoribus, & Martyrium, & causa Martyrii in Martyribus examinentur.

II Diximus, examina hæc semper facta fuisse, antequam fieret Canonizatio, licet amplissima venerationis Indulta præceserint, quotiescunque facta fuit eorum concessio sine prævio juridico examine dependente a processibus rite confectis super argumento virtutum heroicarum, seu Martyrii. Patet hoc nempe exemplis causarum SS. Hyacinthi, & Raymundi, Isidori Agricolaë, & Andreæ Corsini. Hyacinthus enim, & Raymundus in Sanctorum album relati sunt a Pontifice Clemente VIII. Et, licet in honorem ipsorum summus Pontifex Paulus III. indulgisset, ut Officium recitari posset, uti colligitur ex bulla 27. §. 5. & ex bulla 77. §. 57. Clementis VIII. tom. 3. Bullar. Rom.; necessarium nihilominus fuit, ut assumeretur formalis discussio virtutum tum in Rotæ Auditorio, tum in sacra Congregatione, juxta morem tunc temporis receptum, antequam deveniri posset ad formalem Canonizationem. Similia his contigerunt in aliis allegatis causis SS. Isidori Agricolaë, & Andreæ Corsini: facta quippe fuit formalis discussio virtutum, antequam ille a Gregorio XV. hic autem ab Urbano VIII. summis Pontificibus fuerint in Sanctorum album relati; licet Isidorus esset in antiquissima publici cultus possessione, quemadmodum constat ex relatione facta in Consistorio per Cardinalem de Monte, & ex relatione trium Rotæ Auditorum tit. 2. de sanctitate vite in genere; quæ relationes typis impressæ sunt post Contelor. de Canonizat. SS. & licet usque ab anno 1440. causa insignis miraculi, quod intercessione B. Andreæ Corsini a Deo patratum fuerat in civitate Florentina, Eugenius Papa IV. qui in dicta civitate tunc morabatur, adeo amplam in ejus honorem fecisset cultus concessionem, ut Cardinales astantes reputaverint, Andream tunc fuisse in Sanctorum album ab eo relatum; sicuti legitur in ejus vita scripta a Petro Andrea Castaneo, quam Bollandus publici juris fecit ad diem 30. Januarii tom. 2. Facta quoque fuit ab Urbano VIII. Canonizatio S. Elisabeth Reginæ Portugalliæ, & formale virtutum examen non defuit, quamvis Leo Papa X. publici cultus exhibitionem in ejus honorem permisisset; veluti colligitur ex relatione facta in Consistorio a supra memorato Cardinali de Monte, tit. de Actis cause. De formali nimirum examine virtutum in omnibus hisce causis assumpto post concessionem dictorum Indultorum nullo modo est dubitandum, cum adhuc extent relationes factæ ab Auditoribus Rotæ super virtutibus prædictorum Sanctorum longe post Indultorum concessionem, atque ex regeſtis sacre Congregationis dignoscatur, judicio Rotali successisse examen sacre Congregationis super virtutibus. Cumque venerationis Indulta in causis prædictis utique concessa fuerint sine prævio juridico examine virtutum, manifesta hinc

hinc deducitur consequentia, a formali virtutum examine eximi non posse eas causas, in quibus concessio cultus sine prædicto formali examine facta est; quod ipsum ulterius constabit exemplis infra subjiciendis.

12 Diximus quoque, differentiam nonnunquam intercessisse in qualitate examinis, cum istud interdum expletum fuerit per modum dubii formalis hujusmodi verbis concepti, *an constet de virtutibus Theologicalibus et Cardinalibus*; alias vero per modum relationis, non qualicumque, sed juridicæ & dependentis a processibus auctoritate ordinaria, atque Apostolica, vel Apostolica tantum confectis. Per modum quippe dubii formalis expletum fuit examen in causis S. Joannis de Capistrano, S. Catharinæ de Bononia, B. Bernardini de Feltro, S. Julianæ de Falconerijis, S. Agnetis de Monte Politiano, S. Peregrini Latiosi: quamvis in omnibus prædictis causis præcessisset declaratio casus excepti a decretis Urbani VIII. aut ratione immemorabilis, ut in causa S. Julianæ, aut ratione Indultorum a summis Pontificibus jam concessorum; & licet fere in omnibus prædictis causis jam facta fuisset concessio Officii & Missæ vel in ipsis Indultis, in quorum sequelam declaratus est casus exceptus a decretis Urbani VIII. ut in causis S. Catharinæ, S. Agnetis, & S. Peregrini Latiosi, vel per ipsam separatam Officii & Missæ concessionem factam post declarationem casus excepti ratione immemorabilis, & ante assumptum examen super virtutibus, ut in causa S. Julianæ: quod ipsum similiter contigit in causa S. Joannis Nepomuceni, in qua facta fuit formalis dubii disputatio, *an constet de Martyrio, & causa Martyrii*, post declarationem casus excepti a decretis Urbani VIII. ratione immemorabilis, & post separatam concessionem Officii & Missæ in ejus honorem.

13 Per modum deinde relationis, non qualicumque, sed juridicæ & dependentis a processibus auctoritate ordinaria, atque Apostolica, vel Apostolica tantum confectis, expletum fuit examen in causa S. Joannis a S. Facundo. Nam ante venerationis Indultum factum utique fuerat quoddam virtutum examen a tribus Cardinalibus, tum autem a Cardinali Antoniano exhibita fuerat sacræ Congregationi relatio; sed, petentibus Postulatoribus progressum ad Canonizationem, opposuit Petrus Franciscus de Rubeis tunc Fidei Promotor, eam relationem fuisse historicam, non judicialem atque ex processibus conditam: & sacra quidem Congregatio die 13. Augusti 1667. mandavit, confici summarium probationum ex processibus defumendarum respondens relationi Cardinalis Antoniani, eoque exhibito, die 21. Julii 1668. declaravit, per deducta ex processibus confectis ante indultam S. Joanni venerationem plene constitisse de virtutibus pro solemnī Canonizatione requisitis. Item in causa S. Stanislai Kostkæ, cum post declaratum casum exceptum a decretis Urbani VIII. ratione amplissimorum Indultorum in ejus honorem concessorum Postulatores omnino vellent, omisso dubio super virtutibus, proponere dubium super miraculis, quæ ab indulta veneratione supervenerant; Prosper Bottinius Ar-

Archiepiscopus Myrensis tunc Fidei Promotor objecit, Indulta veneratio- nis concessa fuisse sine prævio formali examine virtutum: ideoque san. me. Clemens Papa X. die 6. Martii 1676. jussit, ut in Congregatione particu- lari examinarentur processus *pro recognoscendis virtutibus dicti Beati in gra- du heroico, non tamen per modum formalis disputationis dubii, sed ad effectum de- terminandi, ut procedi posset ad discussionem miraculorum*: tum postea, cum in Congregatione subinde habita unanimiter dictum fuisset, posse ad ul- teriora procedi, si Sanctissimo placuisset, Sanctitas sua benigne annuit; & tempore defuncti san. mem. Clementis XI. expletum fuit examen super miraculis.

14 Diximus tandem, in hisce causis aliquando perfectum fuisse exa- men in particularibus Congregationibus, alias vero factum fuisse in Con- gregationibus præparatoriis, & generalibus, sicuti fit in causis proceden- tibus per viam non cultus. Primo scilicet modo factum est examen virtu- tum, uti vidimus, in causa S. Stanislai tempore Clementis X., in causa etiam S. Catharinæ de Bononia tempore Innocentii XI. de ejus quippe virtutibus actum est in Congregatione ordinaria sacrorum rituum. Et, quamvis tempore san. mem. Clementis XI. facta fuisset Congregatio ante- præparatoria super virtutibus S. Julianæ de Falconeriis in ædibus bon. me. Cardinalis Fabroni causæ Relatoris, ut transitus deinde fieret ad Congre- gationem generalem; item tempore Innocentii XIII. facta quoque fuisset Congregatio antepæparatoria super virtutibus S. Agnetis de Monte Poli- tiano, ut deinde etiam transitus fieret ad Congregationem præparatoriam, & generalem; sanctæ nihilominus memoriæ Benedictus XIII. inhærens mori a suis Antecessoribus servato in causis S. Stanislai, & S. Catharinæ benigne indulgit, ut examen virtutum in causis S. Julianæ, & S. Agnetis expleretur in Congregatione particulari quinque Cardinalium ex adscri- ptis Congregationi sacrorum rituum, cui quoque interfuerunt Secretarius Congregationis eorundem rituum, & ego tunc Fidei Promotor: & demum sub eodem Pontifice Benedicto in Congregatione quoque particulari pro- positum fuit & examinatum dubium de Martyrio, & causa Martyrii in causa S. Joannis Nepomucepi: in Congregatione ordinaria sacrorum ritu- tum habita die 17. Maji anni 1732. propositum fuit, & favorabiliter re- solutum dubium in causa S. Catharinæ Fliscæ Adurnæ; eodemque modo in Congregatione ordinaria habita die 9. Maji currentis anni 1733. appro- batæ fuerunt virtutes B. Seraphini de Asculo Laici Ordinis Capuccinorum sequentibus verbis: *ita constare, ut procedi posset ad discussionem miraculorum*; quæ ipsissima utique verba leguntur etiam in decreto approbationis virtu- tum B. Joannis Cantii facta in Congregatione ordinaria die 4. Julii 1733. Verum, sicut in causa S. Joannis de Capistrano sub Alexandro VII. actum fuit, ita & in causa S. Peregrini Latioli sub Clemente XI. Me enim eo tem- pore Fidei Promotore contendente, ut examen fieret in tribus Congrega- tionibus antepæparatoria, præparatoria, & generali, expletum pro- fecto

fecto fuit in huiusmodi Congregationibus examen ipsum virtutum .

15 Uno verbo, si ante declarationem casus excepti a decretis Urbani VIII. non præcessit formale examen virtutum, quod nunquam præcedere potuit, quando agitur de causis, quæ post decreta Urbani VIII. introducuntur, & de quibus loquimur in præfenti, quodque etiam sæpiissime minime præcessit, etiam si loquamur de causis ante decreta Urbani VIII. introductis, de quibus in capite sequenti; quamquam in eis aliquando facta sit amplissimorum Indultorum concessio, semper opus est, ut in transitu a Beatificatione æquipollenti ad Canonizationem examinentur & perpendantur virtutes, quando res est de Confessore; examinentur autem ac perpendantur Martyrium & causa Martyrii, cum res est de Martyre; ( hæc enim in prædictis causis sunt substantialia, atque a sacris Canonibus præscripta ) sive id fiat per modum formalis dubii, sive per modum relationis, sive in Congregatione particulari, sive in consuetis Congregationibus, dummodo tamen relatio sit non historica, sed iudica, & fundamentum habeat in processibus auctoritate ordinaria, & Apostolica; vel Apostolica tantum confectis, & dummodo Fidei Promotor videat & perpendat, quæ juxta munus suum ab eo sunt videnda ac perpendenda .

16 Pro hujus capitis complemento nihil aliud nunc superest, quam ut antea oppositis a nimium rigorem adstruentibus respondeamus . Opponebatur nempe, post approbatum casum exceptum, & multo magis, si approbatio facta sit dependendo a Pontificiis Indultis super concessione Officii & Missæ, incongruum prorsus esse, ut de virtutibus agatur; eo, quia, si de illis agitur & disputatur, periculum imminet, ne approbata reprobentur . Verum id non est tanti roboris & momenti, ut a necessaria sacræ Congregationis consuetudine sit propterea recedendum . Non enim fit approbatio casus excepti a decretis Urbani VIII. nisi præcedat *signatura commissionis*, & sic, nisi constet, uti suo loco videbitur, de fama virtutum & miraculorum, aut de fama Martyrii & miraculorum seu signorum; quod ad cultus publici permissionem satis est, cum agitur de Dei servis, seu Beatis, qui sint in antiquissima cultus possessione, & multo magis, si antea a summis Pontificibus facta sit in honorem eorum concessio Indultorum venerationis: nec enim credi potest, quod temere processerint . Porro, si Postulatores progressum ad ulteriora non petant, nihil aliud in illis causis requiritur: si vero ad ulteriora procedere velint, hoc est ad Canonizationem, quæ cultum præceptivum significat ad universam Ecclesiam extensum, adimplere debent, quæ a sacris Canonibus adimplenda præscribuntur: ideoque tenentur proponere dubium super virtutibus, si agitur de Confessore; super Martyrio, si de Martyre: cessante omnino conficto reprobationis approbatorum periculo, cum nunquam fuerint approbatæ virtutes, aut Martyrium, sed tantum fama virtutum, aut Martyrii, ac miraculorum; quæ quidem fama, quatenus etiam virtutes, aut Martyrium minime approbarentur, non ob id continuo cessaret;

Tom. I.

M m

cum

cum disputatio super virtutibus & Martyrio respiciat futuram Canonizationem, & hæc utique duo bene possint stare simul, constare videlicet de fama virtutum, aut Martyrii pro cultu permisso, & non constare de virtutibus in individuo, aut de Martyrio pro cultu præceptivo.

17 Opponebatur adhuc, virtutum & Martyrii examen in hisce causis non posse fieri, nisi dependendo a probationibus subsidiariis, hoc est a testibus de auditu, & Historicis: in quo rerum themate responderi non potest; *constare de virtutibus, aut Martyrio*; cum *constare* exposcat probationes luce meridiana clariores. Prætermisso autem, quod videtur responderi posse, *constare*, dependendo a probationibus etiam subsidiariis, quæ in genere suo perfectæ sint, & dummodo casus sit tantum capax subsidiariæ probationis, juxta textum in cap. *Pro humani. de homicidio in 6.*, ubi sic legitur: *Et, postquam probabilibus constiterit argumentis, aliquem scelus tam execrabile commississe*; vis major stat in hoc, quod proposito dubio: *an constet de virtutibus*; vel: *an constet de Martyrio*, in causis procedentibus per viam casus excepti non respondetur absolute & simpliciter: *constare*; sed respondetur: *ita constare de virtutibus, ut deveniri possit ad discussionem miraculorum*; ut factum est in causa S. Peregrini Latiofi, in causa S. Agnetis de Monte Politiano, & in causa S. Julianæ de Falconeriis; tumque in causa S. Joannis Nepomuceni responsum fuit: *ita constare de Martyrio, ut ad miraculorum, seu signorum discussionem posset deveniri*. Cum enim in causa S. Peregrini Latiofi, quando agebatur de tuto progressu ad Canonizationem, ipse tamquam Fidei Promotor objecissem, non sufficere approbationem virtutum expressam verbis nuper relatis, sacra Congregatio censuit, eam esse utique sufficientem, utpote congruam causæ procedenti per viam casus excepti: qui certe rescribendi modus exaggeratum periculum reprobationis approbatorum funditus evertit; quia, si proposito dubio de virtutibus, aut Martyrio affirmanter responderi non possit, sic erit respondendum: *non ita constare de virtutibus, aut Martyrio, ut tuto procedi posset ad Canonizationem*.

18 Sequitur examen decreti Clementis IX. quod editum est an. 1668. Sed, retento themate in superioribus indicato, quod olim in transitu a Beatificatione ad Canonizationem iterum examinarentur ea, quæ ante Beatificationem fuerant examinata, sicque, quod duplex fieret virtutum & miraculorum examen, alterum ante Beatificationem, alterum post; insuper autem, quod excluso per Clementinum decretum iterato virtutum examine post Beatificationem statutum sit, ut nova tantum miracula examinarentur, quæ post Beatificationem supervenissent; nemo est, qui non videat, novum quidem post Beatificationem non debere fieri examen virtutum, si ante eam factum sit; at hinc tamen minime inferri, quod illud fieri etiam non debeat post Beatificationem æquipollentem in causis, in quibus ante eam factum non est.

19 Decretum itaque Clementinum sic pluries explicatum fuit in suis ani-



animadversionibus factis in causis S. Stanislai, & S. Catharinæ de Bononia a Prospero Bottinio Archiepiscopo Myrensi Fidei Promotore; & ipse quoque eodem munere fungens eam amplexus sum decreti intelligentiam in animadversionibus a me factis in causis S. Julianæ de Falconeriis, S. Peregrini Latiofi, S. Agnetis de Monte Politiano, & S. Joannis Nepomuceni. Et sacra quidem Congregatio in ipso facti eventu exposita omnia sua auctoritate roboravit, voluitque, ut ad virtutum discussionem in prædictis causis procederetur, etiamsi præcessisset approbatio casus excepti a decretis Urbani VIII. In cujus quoque assumpti comprobationem consideratione dignum videtur, eandem sacram Congregationem, post approbatum casum exceptum in causis B. Bernardi Ptolemæi, B. Joannis Cantii, S. Catharinæ Fliscæ Adurnæ, ac B. Ferdinandi III. Castellæ Regis, litteras remissoriales expedivisse, ut conficerentur processus super virtutibus & miraculis: quod utique non fecisset, si in causis precedentibus per viam casus excepti, post ejus approbationem censuisset, agendum esse tantum de miraculis, quæ supervenerunt, nec esse necessarium juridicum examen virtutum. Cumque hæc contigerint post decretum Clementis IX. si pro recta Constitutionis intelligentia multum prodesse dicendum est, quæ subsecuta est, observantiam, & eo magis, quando observantia ipsa suum, sicut hic, habuit initium atque progressum, re secundum juris solemnitatem discussa; unusquisque facile cognoscere poterit, Clementinum certe decretum sibi vindicare locum in causis, in quibus venerationis indulta concessa sunt, prævio judiciali virtutum examine, tumque per illud aboleri iteratum examen virtutum, attamen examen earumdem virtutum, atque etiam, si opus sit, Martyrii neutiquam excludi, nisi id ante indulta factum fuerit.

20 Neque obstat dicenda sunt exempla causarum SS. Philippi Beniti, & Laurentii Justiniani. In eis enim minime fuit omissum examen super virtutibus, cum ex multis demonstrationibus & argumentis Postulatores ostenderint, virtutes ipsas fuisse examinatas, discussas, atque approbatas, & quidem dependendo a processibus Apostolicis ante concessionem Indultorum: in quo rerum themate bene fuit a sacra Congregatione mandatum, ut procederetur ad discussionem miraculorum, quæ ab indulta veneratione supervenerant. Tempore nimirum san. mem. Alexandri VIII. cum actum fuisset de Canonizatione S. Laurentii Justiniani, demandatum est Prospero Bottinio Archiepiscopo Myrensi tunc Fidei Promotori, ut sermonem ederet pro veritate super ejusdem causæ progressu. Eodem autem mandatis morem gerente, cum, nullatenus recedendo a supra exposita intelligentia decreti Clementini, immo vero ea jure comprobata, argumentis undique congestis ostendisset, examinatas jam fuisse atque approbatas in ea causa virtutes in gradu heroico ante approbationem casus excepti; re jure ipso discussa, in sacrorum rituum Congregatione editum est decretum super progressu ad ulteriora, hoc est ad discus-

tionem eorum, quæ supervenerant post indultam venerationem. In causa quoque S. Aloylii Gonzagæ sacrorum rituum Congregatio die 15. Julii 1719. mihi tunc Fidei Promotori injunxit, ut, visis & consideratis authenticis causæ documentis, statum ejusdem pro veritate referrem, atque opportuna ad eam absolvendam *ordinatoria* suggererem. Pro commissi igitur muneris complemento satis prolixam edidi causæ relationem, in qua, semper servata supra exposita intelligentia decreti Clementini, probavi, ante approbationem casus excepti fuisse plene discussas, approbatasque in gradu heroico virtutes tum in Rotæ Auditorio, uti tunc in more positum erat, tum in sacra Congregatione. Excitatis autem super hoc assumpto nonnullis difficultatibus, novum in sacra Congregatione *ordinaria* disputatum fuit dubium: *an virtutes, & miracula Beati fuerint jam sufficienter examinata & approbata, ita ut ulteriore nunc examine & approbatione non indigeant ad effectum Canonizationis*: cui demum dubio die 18. Augusti 1725. responsum fuit affirmatione, & responsio ipsa fuit a summo Pontifice confirmata.

21 Post approbatum cultum immemorabilem septem BB. Fundatorum Ordinis Servorum B. Mariæ Virginis, & concessum in eorum honorem Officium cum lectionibus propriis una cum Missa pro universo Ordine ab ipsis instituto, & pro civitate & diocesi Florentina, post nominum descriptionem in Martyrologio Romano, putabant Postulatores, omiſſa virtutum juridica indagine, sibi fas esse disputationem assumere de miraculis. Habita est coram nobis ad summum Pontificatum evectis Congregatio *ordinaria* sacrorum rituum die 13. Januarii 1742. allatisque a nobis supra recensitis fundamentis & rationibus necessitatem inducentibus præviæ discussionis virtutum, editum est sequens decretum: *Fiat relatio juridica virtutum in gradu heroico singulorum Beatorum, & communicetur Fidei Promotori; & instantia proponatur in sacrorum rituum Congregatione ordinaria: & quatenus favorabilis edatur resolutio a summo Pontifice approbanda, proponatur dubium super miraculis cum iisdem scripturis coram Sanctissimo, & Cardinalibus sacra Congregationis*. Dictum est: *fias relatio juridica virtutum*; & non fuit dictum, quod disputetur dubium de virtutibus, in obsequium præcedentium rescriptorum, quæ Postulatores exemerant ab examine dubii super virtutibus: sed relatio juridica virtutum communicanda Fidei Promotori, æquipollet formali examini virtutum. Dictum est: *cum iisdem scripturis*; cum jam paratæ essent scripturæ, & distributæ pro examine miraculorum.



## CAPUT XXXIII.

*De serie Actorum in causis Beatificationis, & Canonizationis introductis ante decreta Urbani VIII. & quæ post eadem decreta resumuntur, siue sint Confessorum, siue Martyrum, siue procedant per viam non cultus, siue per viam casus excepti.*

**N**onnullæ Beatificationum, & Canonizationum causæ erant introductæ ante editionem decretorum Urbani VIII. quarum subinde petitur progressus, ut suum post decreta Urbani habeant complementum.

2 Series Actorum in hisce causis initium habet a *commissione reassumptiva*, quæ dicitur *in statu, & terminis*. Pro hac autem impetranda fit petitio sacrorum rituum Congregationi ordinariæ; a qua quidem, si accedant requisita alibi memoranda pro ea obtinenda, favorabile habetur rescriptum a summo Pontifice deinde confirmandum.

3 Resumpta per hanc commissionem causa, docendum est de obedientia decretis Urbani VIII. quocirca expediuntur *litteræ remissoriales* pro conficiendo auctoritate Apostolica processu super non cultu, si causa per hanc viam progredi debet; vel super casu excepto ab ipsis Urbani decretis, si causæ progressus esse debet per hanc aliam viam casus excepti.

4 Confecto processu aut super non-cultu, aut super casu excepto, prolataque a Iudice delegato sententia, de ejus viribus disputatur in sacrorum rituum Congregatione ordinaria: tum, si quidem pro ejus validitate ac iustitia responsum fuerit, summo jure opus esset, ut expedirentur *litteræ remissoriales* pro conficiendo auctoritate Apostolica processu super fama virtutum, & miraculorum, si de Confessore; aut super fama Martyrii, & causæ Martyrii, necnon signorum aut miraculorum, si de Martyre agitur. Verum in causis, quæ resumuntur post decreta Urbani VIII. concedi consuevit solutio ab hoc judicio in genere, ut alibi videbitur.

5 Perfecto itaque judicio super non cultu, aut super casu excepto, si tractatur de causis, quæ procedunt per viam non cultus, in sacrorum rituum Congregatione ordinaria agitur de validitate processuum; postea, admissa eorum validitate, in tribus Congregationibus, antepreparatoria, præparatoria, & generali, disputatur dubium de virtutibus, si de Confessore; dubium vero de Martyrio, & causa Martyrii, si de Martyre res est: in quibus pariter tribus Congregationibus tractatur de miraculis; atque, si duo saltem approbentur, proceditur ad solemnem Beatificationem, tum autem, novis supervenientibus miraculis, ad solemnem Canonizationem modis & formis supra expositis.

6 Quod si causæ procedant per viam casus excepti, expleto judicio super

super obedientia decretis Urbani VIII. agendum est de virtutibus, aut de Martyrio, & causa Martyrii, vel in particulari Congregatione, si ita placeat summo Pontifici, vel in tribus Congregationibus, antepreparatoria, preparatoria, & generali; postmodum transitus fit ad discussionem miraculorum in prædictis tribus Congregationibus; & demum, quatenus duo saltem approbentur, quæ supervenerint ab indulta veneratione, proceditur ad solemnem Beatificationem iisdem modis & formis supra recensitis.

7 Plana utique hæc sunt: at in eo tamen, quod attinet ad has causas, quæ resumuntur post decreta Urbani VIII. difficultas habetur super hoc argumento, an, si ante decreta Urbani VIII. pronuntiatum fuerit super validitate processuum, super virtutibus, aut Martyrio, aut super miraculis, de his iterum agendum sit post causam resumptam.

8 Itaque quoad processuum validitatem, si sacra rituum Congregatio, post eam approbatam, examen causæ commisit, uti consueverat, Rotæ Auditoribus, ut, quid de virtutibus, Martyrio, aut miraculis sentiendum sit, cognoscant, causa ipsa resumpta, de validitate processuum non erit agendum; cum in eisdem Urbani VIII. decretis caveatur, ne Rotæ Auditores super validitate pronuntient, si de ea iudicium jam latum sit ab ipsa sacra Congregatione. Si vero causa a sacrorum rituum Congregatione commissa fuerit Rotæ Auditorio, ut etiam validitatem processuum cognoscat; tunc aut iudicium Rotale approbens ipsam validitatem confirmationis robur obtinuit a sacra Congregatione, aut non obtinuit: si obtinuit, de processuum validitate, causa resumpta, agendum non erit; secus autem, si minime obtinuit.

9 Quod vero attinet ad virtutes, & Martyrium, causamque Martyrii, vel de eis habita est ratio in sacrorum rituum Congregatione ante decreta Urbani VIII. dependendo a solo processu confecto per Ordinarium auctoritate sua ordinaria, prout olim sæpe fiebat, quando concedebantur Indulta Officii & Missæ, ut alibi videbimus: & tunc procul dubio, post causam resumptam, conficiendus est auctoritate Apostolica processus; ac dependendo ab hoc, & ab alio jam confecto per Ordinarium, agendum est de virtutibus si de Confessore, aut de Martyrio si de Martyre, sive causa procedat per viam non cultus, sive per viam casus excepti. Et ita sane res se habuit in causa S. Peregrini Latiosi, in qua, nihil obstante virtutum approbatione facta dependendo a processu ordinario pro concessione Officii & Missæ, opus fuit, ut Postulatores post causam resumptam conitui curarent auctoritate Apostolica processum super virtutibus; & tunc dependendo ab hoc & ab illo, dubium de virtutibus proponi. Nec enim, ut alibi videbitur, hodie ad formalem Beatificationem, & multo minus ad solemnem Canonizationem proceditur ex solo processu ordinario, sed ex utroque, hoc est ex ordinario simul, atque Apostolico.

10 Vel de virtutibus, Martyrio, causaque Martyrii actum est in sacrorum

crorum rituum Congregatione dependendo ab utroque processu, ordinario videlicet, atque Apostolico; & tunc subdistingendum esse videtur: vel enim, remissa cognitione, ut eo tempore solemne erat, ante videlicet decreta Urbani VIII. super virtutibus, Martyrio, causaque Martyrii ad Rotæ Auditorium, prolatoque ab Auditoribus Rotæ super illis favorabili iudicio, iudicium ipsum Rotale approbatum fuit in sacrorum rituum Congregatione, vel non fuit approbatum, utpote in eadem sacra Congregatione ante decreta Urbani VIII. minime propositum. Si iudicium Rotale non fuit approbatum, resumpta causa, rataque facta obedientia decretis Urbani VIII. necesse est, ut subinde agatur de virtutibus, si de Confessore; aut de Martyrio, & causa Martyrii, si res est de Martyre: cum ex alibi dictis plane constet, numquam fuisse sufficiens iudicium Rotæ Auditorum, nisi confirmationis robur obtinuisset a sacra Congregatione. Quamobrem, cum ante decreta Urbani VIII. Auditores Rotæ suum utique favorabile iudicium tulissent super virtutibus servorum Dei Hieronymi Æmiliani, Nicolai Factoris, & Catharinæ de Ricciis, uti colligitur ex relationibus per eos editis, quæ adhuc extant, sed ante decreta ipsa Urbani VIII. minime fuissent prædictæ relationes suppositæ examini sacre Congregationis; resumpta causa post decreta Urbani VIII. rataque facta obedientia decretis, antequam Fidei Promotoris officium mihi commissum fuisset, propositum fuit in sacrorum rituum Congregatione antepreparatoria dubium, an constaret de virtutibus servi Dei Nicolai Factoris; dum vero fungerer munere Fidei Promotoris, in Congregationibus antepreparatoria, & preparatoria idem dubium disputatum fuit in causa servi Dei Hieronymi Æmiliani, & in causa pariter servæ Dei Catharinæ de Ricciis; omnes enim hæ causæ procedebant per viam non cultus: tum autem de eorum similiter virtutibus actum est in Congregationibus antepreparatoria, preparatoria, ac generali, & in hac quidem dubium fuit feliciter sub Benedicto XIII. absolutum.

II Sed, si ante decreta Urbani VIII. iudicium Rotale super virtutibus confirmationem obtinuit in sacrorum rituum Congregatione, tunc, resumpta causa, rataque facta obedientia decretis, transitus fieri debet ad discussionem miraculorum, nullo amplius facto virtutum examine; cum iteratum virtutum examen a decreto Clementis IX. supra relato sublatum sit. Ideoque, dum munereungebar Fidei Promotoris, statim ac notum fuit in causa B. Gregorii X. quod, dependendo a processibus ordinaria, & Apostolica auctoritate confectis suum Rotæ Auditores favorabile tulerant super virtutibus iudicium, quodque id etiam fuerat a sacrorum rituum Congregatione confirmatum, resumpta causa, raroque facto cultu immemorabili, transitus factus est ad discussionem miraculorum. Similiter in causa S. Aloyfii Gonzagæ, quia ante decreta Urbani VIII. fuerant ejus virtutes plenissime discussæ atque approbatæ tum in Rotæ Auditorio, tum in sacrorum rituum Congregatione, resumpto iudicio post

Urba-

Urbani VIII. decreta, & rato habito casu excepto, nequaquam novum examen de virtutibus factum est; sed, excitatis nonnullis difficultatibus, juxta superius dicta, propositum fuit & feliciter resolutum in sacrorum rituum Congregatione ordinaria dubium: *an virtutes fuissent sufficienter examinata & approbata, ita ut ulteriori examine & approbatione non indigerent ad effectum Canonizationis.*

12 Denique quoad miracula, vel agitur de causis procedentibus per viam non cultus, vel de causis procedentibus per viam casus excepti. Si agitur de causis procedentibus per viam non cultus, aut ante decreta Urbani VIII. judicium Rotale nedum super virtutibus, sed etiam super miraculis approbationem obtinuit in sacrorum rituum Congregatione; vel de miraculis post Rotale judicium actum non est in eadem sacrorum rituum Congregatione. Si de miraculis actum non est in sacrorum rituum Congregatione, tunc, resumpta causa post decreta Urbani VIII. ratoque facto non cultu, instituendum est in sacra Congregatione judicium de miraculis. Quapropter, dum hæc primò scribebamus, in sacrorum rituum Congregatione tractabatur de miraculis servæ Dei nunc Sanctæ Catharinæ de Ricciis, licet in Rotæ Auditorio ante decreta Urbani VIII. approbatis; nimirum quia ante eadem decreta, miracula prædicta non fuerunt in sacra Congregatione discussa. Quod si ante Urbani VIII. decreta, duo saltem miracula fuerint discussa & approbata tum in Rotæ Auditorio, tum in sacra Congregatione; judicii ordo exposcit, ut, resumpta cum suis requisitis causa, ratoque facto non cultu, petitio fiat pro formali Beatificatione: pro ea quippe obtinenda nihil aliud requiritur, quam approbatio virtutum, & duorum miraculorum. Cum enim approbatio miraculorum tum in Rotæ Auditorio, tum in sacra Congregatione fingi non possit, nisi præponatur approbatio virtutum tum in eodem Rotæ Auditorio, tum in ipsa sacra Congregatione; hinc fit, quod, concurrentibus omnibus requisitis pro formali Beatificatione, formalis ipsa Beatificatio in eo rerum statu sit indulgenda, tum autem, novis supervenientibus miraculis, procedendum sit ad Canonizationem.

13 Si vero quæstio respiciat causas procedentes per viam casus excepti, & in quibus ante decreta Urbani VIII. nedum virtutes, verum etiam miracula fuerunt approbata; de hisce quidem causis sermonem instituendo, aut judicium Rotale super miraculis confirmationis robur obtinuit ex sacrorum rituum Congregatione, aut minime obtinuit. Si minime obtinuit; causa resumpta, atque approbato casu excepto, de miraculis ipsis agendum est in sacrorum rituum Congregatione, eademque debent approbari, ut transitus fiat ad solemnem Canonizationem. Si vero obtinuit; poterit de illis haberi ratio pro extremo Canonizationis judicio, dummodo tamen secuta sint ab indulta veneratione; cum in decreto Clementis IX. præscriptum sit, ut habeatur formalis discussio eorum, quæ indultam venerationem sunt subsecuta. Exemplum desumi potest ex causis S. Thomæ de Vil-

de Villanova, S. Ludovici Bertrandi, & S. Paschalis Baylon : in his enim causis ante decreta Urbani VIII. fuerat facta discussio & approbatio tum virtutum, tum miraculorum in Rotæ Auditorio, atque in sacra Congregatione, quæ etiam censuerat, tuto procedi posse ad Canonizationem; uti, quoad causam S. Thomæ, colligitur ex serie Actorum Romæ impressa anno 1658. pag. 4.; quoad causam S. Ludovici, ex summano privilegiorum Ordinis Prædicatorum collecto ab Antonio Gonzalez pag. 164.; & quoad causam S. Paschalis, ex regeſtis sacre Congregationis. Supervenerunt autem decreta Urbani VIII. ac tum, resumtis causis, ratoque habito casu excepto, dum Postulatores progredi vellent ad formalem Canonizationem, animadverso, quod miracula approbata patrata fuerant ante, non post indultam venerationem, opus fuit, novas reportare *litteras remissoriales* pro construendo processu super miraculis secutis ab indulta veneratione; quibus quidem approbatis, tandem ad solemnem prædictorum Beatorum Canonizationem ventum est. Contra vero res se habuit in causa S. Aloysii Gonzagæ. Cum enim ante decreta Urbani VIII. in ea præcessisset iudicium tum Rotæ Auditorum, tum sacre Congregationis & virtutes approbans & miracula, me licet tamquam Fidei Promotore tunc urgente exemplis supradictarum causarum, ut pro obtinenda Canonizatione novi conficerentur processus super novis miraculis; ostenso tamen per efficacissimas probationes a Postulatoribus, miracula approbata contigisse post indultam venerationem, ita ut dubitandum non esset de integro complemento decretorum tum Urbani VIII. tum Clementis IX., re secundum juris solemnitatem discussa, in sacrorum rituum Congregatione deliberatum est, ut, dependendo ab approbatis, & sine novorum miraculorum ope, transitus fieret, prout factum est, ad solemnem Canonizationem. Ideoque Postulatores causarum introductarum ante decreta Urbani VIII. quæ procedunt per viam casus excepti, & in quibus approbatæ fuerunt virtutes, aut fuit approbatum Martyrium, bene inspicere debent, utrum miracula (sive ante decreta Urbani VIII. fuerint approbata, sive non fuerint) facta sint ante, an post indultam venerationem. Si etenim ante indultam venerationem facta sunt; vel expedit ipsis novas obtinere *remissoriales* pro conficiendis processibus super miraculis, quæ ab indulta ipsa veneratione supervenerunt, quatenus quidem supervenerint; vel expectare tenentur, ut Deus nova miracula suorum Beatorum intercessionem operari dignetur. At, si miracula post indultam venerationem facta fuerint, ipsorum onus est aut urgere pro eorum approbatione, quatenus tamen hæc ante Urbani decreta facta non fuisset; aut tantum ostendere, post indultam venerationem facta esse, si ante decreta Urbani VIII. fuerint approbata. Ex quarum cognitionum defectu fortasse factum est, ut causa Canonizationis S. Jacobi de Marchia in longiora tempora protracta sit. Sixtus quippe Papa IV. concefferat, ut corpus S. Jacobi ex humo extraheretur, atque in ecclesia honorifice collocaretur; tum Leo Papa X.

indulserat, ut quotidie Fratres S. Mariæ Novæ civitatis Neapolitanæ accedere possent processionaliter ad illius sepulcrum cantando hymnum cum oratione, & præterea dimiserat omnibus ac singulis utriusque sexus Christi fidelibus, qui cantui prædicto interessent, unum annum & quadraginta dies pro qualibet vice de poenitentis, quæ illis injunctæ fuissent; quemadmodum habetur ex monumentis relatis apud VVadingum in *annal. tom. 14. pag. 165. & sequen.* Porro ante Urbani VIII. decreta facta fuerat approbatio virtutum & miraculorum, uti desumitur ex Constitutione 24. ejusdem Urbani in *Bullar. Rom. tom. 5. & miracula* profecto, quæ fuerant approbata, erant posteriora tempore Leonis X. qui venerationem indulserat. Cum autem, resumpta causa post decreta Urbani VIII. ratoque habito casu excepto, Postulatores causæ S. Jacobi minime quidem institissent pro formali Canonizatione, sed petiissent *litteras remissoriales* pro comprobatione nonnullorum miraculorum paulo ante id tempus intercessione Beati a Deo factorum, illisque tandem approbatis, pro formali Canonizatione supplicassent; causa Beati, quæ finem consequi potuisset sub Urbano VIII., suam tantum habuit perfectionem sub Benedicto XIII. Nisi forte id contigisse dicendum sit, eo quia Leoninum Indultum in forma authentica non potuerit inveniri tempore Urbani VIII. quod subsequenti-bus deinde temporibus inventum est.

14 Ad hæc, hic explicandum esset, quandonam miracula secuta dicantur post indultam venerationem; sed de hac re commodius alibi disseremus. In præsentem namque solummodo tractabimus controversiam, de qua inter Scriptores, utrum pro Canonizatione sufficiant miracula post obitum, an necessaria etiam sint miracula a Deo patrata intercessione servi Dei, dum erat in humanis.

15 Communis itaque est Scriptorum opinio, necessaria esse miracula post obitum. Ita nempe colligitur ex bulla Canonizationis S. Homoboni, atque ex doctrina S. Thomæ 2. 2. *quest. 178. art. 2. in corpore*; sed late id docent Contelor. de *Canonizat. SS. cap. 20. num. 2. & sequent.* Castellin. de *certitud. gloriæ SS. cap. 8. puncto 21. Matta de Canonizat. SS. part. 4. cap. 7. num. 15. & sequent.* Pignatell. *consult. 81. num. 3. tom. 4. Bordon. controuv. 13. m. 28. & 29. Auditores Rotæ in relatione S. Franciscæ Romanæ part. 3. art. 1. de miraculis in genere §. 5. Quinto præmittendum*; in relatione S. Cajetani tit. de *miraculis servi Dei §. Miracula comprobant*; in relatione S. Casbarina de Ricciis tit. de *miraculis §. Ideo*; in relatione S. Elisabeth Regine Portugalliæ 3. part. de *miraculis §. Ad hunc autem effectum*; in relatione S. Joannis de Cruce art. 3. de *miraculis §. Et quavis ad hunc effectum*; & in relatione S. Andrea Corsini part. 2. num. 206. & sequentibus, edita post primam consultationem Lezana.

16 Subduntque pariter Scriptores, miracula in vita patrata non usquequaque esse inutilia, si concurrant etiam miracula post obitum: sic enim Matta loc. cit. num. 20. Castellin. loco pariter citat. cap. 8. punct. 25. Mathæus. in *practica Theologico-Canonica ad causas Beatificas. & Canonizat. tit. 3. cap. 8.*



cap. 8. §. 1. num. 13. Auditores Rotæ in relatione S. Andrea Corfini part. 2. num. 206. post primam consult. Lezana; atque in relatione S. Isidori Agricola art. 3. de miraculis §. Et quamvis ad hunc effectum. Quocirca videmus, in bullis Canonizationum rationem etiam haberi miraculorum a Deo patratum intercessione fervorum suorum, dum vivebant; in bullis videlicet Canonizationum S. Udalrici, S. Petri Episcopi civitatis Anagninæ, S. Thomæ de Villanova, S. Petri de Alcantara, S. Rosæ, S. Cajetani, & S. Pii V.; & in bulla quidem Canonizationis B. Simeonis Syraculani in novo codice Canonizationum pag. 4. postquam dictum fuit, eum claruisse miraculis, de miraculis ipsis in vita patratibus additur, donum servis suis a Deo dari, ut & iidem ipsi super spe Divina retributionis, habentes Sancti Spiritus fidei pignus, fiducialius ac fortius inniterentur, & gentes Divina mysteria intuentes, omni superstitione postposita, ad viam Christianæ veritatis ex intimo cordis affectu converterentur: tum de dono miraculorum post obitum subditur, illud a Deo dari, ut, corporeis exuviis in sepulcro positis, & membris in favillas resolutis, sentientibus atque videntibus mirabilia, fides inculcetur & cumlaretur, eos illic feliciter vivere, ubi vera est & æterna vita.

17 Verum, ut ad præsentem sanctæ Sedis consuetudinem descendamus, distinguenda est Canonizatio a Beatificatione. Nimirum, siue causæ procedant per viam non cultus, siue per viam casus excepti a decretis Urbani VIII. cum, ut transitus fiat a Beatificatione æquipollenti, vel formali ad Canonizationem, quæstio miraculorum reducat ad ea, quæ secuta sunt post indultam venerationem; in quo proinde rerum themate nemo est, qui non videat, nullam posse haberi rationem miraculorum in vita secutorum; controversia erit redigenda ad formalem Beatificationem in causis procedentibus per viam non cultus, pro qua scilicet obtinenda, præter discussionem atque approbationem virtutum, necesse est, ut discutiantur & approbentur saltem duo miracula. Porro in hoc iudicio non erunt rejicienda miracula in vita secuta, quæ poterunt certe discuti atque approbari, sed minime sufficient pro impetranda Beatificatione, nisi una cum ipsis accedant & approbentur alia duo miracula post obitum secuta; & pro hoc utique assumpto facit decretum sacre Congregationis in causa S. Mariæ Magdalænæ de Pazzis editum die 2. Maji 1626. cujus hæc sunt verba: *Actum est de processu ancilla Dei Sororis Mariæ Magdalænæ de Pazzis Carmelitane, referente Illustrissi. D. Card. Pio, ad effectum cognoscendi de miraculis; & quoad miracula facta in vita, approbatum fuit miraculum primum, secundum, tertium, quartum, quintum, sextum, septimum, octavum, & nonum; quo vero ad miracula post mortem, in primis sacra Congregatio censuit, probatum esse, quod corpus dictæ ancilla Dei spiraret suavem odorem, & tempore examinis testium esset incorruptum. Quod vero a genibus & cruribus ejusdem ancilla Dei scaturiret oleum odoriferum, fuit habitum pro miraculo; sicut etiam quatuor miracula facta in personam Mariæ de Rouai, necnon miraculum factum in personam Magdalænæ Rondoni, & illud factum in personam Petri Alli:*

## 284 DE SERVORUM DEI BEATIFICATIONE

*omnia prædicta fuerunt iudicata miracula; unde sacra Congregatio, si Sanctissimo placuerit, censuit, posse deveniri ad Beatificationem.*

18 Quid autem dicendum erit in casu, ubi, si agatur de Beatificatione formali, ex pluribus miraculis duo approbentur, quorum alterum factum sit in vita, alterum post obitum servi Dei? Poterit ne horum miraculorum ope sic factorum procedi ad Beatificationem? Ipse profecto affirmanter responderem, tum quia apta casui videtur propositio, quod miracula in vita secuta, si non sufficiunt, nihilominus profunt, tum quia hoc modo processum est ad Beatificationem S. Alphonſi Thurbii, quem admodum colligitur ex sequenti decreto sacre Congregationis edito die 13. Junii 1679. *Ceterum plura etiam miracula ab omnipotenti Deo ejus intercessionem patratam nec desiderari posse, compertum fuit; inter quæ sane probationibus magis redundantia visa sunt, quod Dei servus degens in præſenti vita, ob penuriam aquæ, incolis oppidi S. Ludovici de Madate provincia de Guailas nativum solum deferere cogitantibus, Miſſæ sacro confecto, ex arida, uti Moyses exſilice virga pulſu, producto ſigno Crucis fluentium aquæ a Deo obtinuit, quod perenne ſatis adhuc irrigandis agris aſſuit; poſt mortem vero peſtoralis, quam Dei ſervus ferebat, Crucis contactu Joannes de Codois hoſtili gladio in peſtore tranſverberatus & ad arterias inhumaniter deſoſſus, integer e cubili momento surrexerit. Sacra igitur Congregatio coram ſummo Pontifice coacta, unanimi EE. Patrum, Prælatorum, & Theologorum conſenſu, cauſam hujusmodi etiam ad effectum Canonizationis omnibus numeris conſtare cenſuit, adeoque nihil ad Indultum Beatificationis interim concedendum deſiderari poſſe; ſed, ut quamprimum relaxaretur, in Domino expedire, iudicavit.*

## C A P U T XXXIV.

*De Conſiſtorii privato, publico, & ſemipublico habendis pro abſolutione cauſarum Canonizationis.*

1 **E** Dito decreto de tuto ad Canonizationem progreſſu, non eſt ullo modo neceſſe, ut ſummus Pontifex ſtatim ad conſilium advocet Cardinales omnes, & Episcopos. Id enim non fit, niſi poſita in Pontifice deliberatione de peragenda ſolemni Canonizatione, ſi, & quatenus judicio conſiliarii Congregationis ſacrorum rituum accedat ſacri Conſiſtorii judicium pariter conſiliarium, ut infra exponetur. Ipſa autem de ſolemni peragenda Canonizatione deliberatio ſumi nequaquam conſuevit, niſi novæ petitiones populorum, Principum, ac Regum iterum iterumque exhibeantur, & niſi adſit temporum opportunitas. Ex qua quidem alia dilatione fit, ut ſummi illi Pontifices, qui aliquando ediderunt decreta de tuto ad Canonizationem progreſſu, ipſi minime fuerint, qui ſolemnitatem deinde Canonizationis peregerunt; quemadmodum res ſe habuit in Canonizatione B. Stanislai Koſtkæ, ubi decretum de tuto progreſſu

gressu ad Canonizationem fuit editum a san. mem. Clemente XI. uti supra visum est, solemnia vero Canonizationis expleta fuerunt a Benedicto XIII. & quemadmodum pariter factum fuit in Canonizatione B. Julianæ de Falconeriis, in qua decretum de tuto progressu ad Canonizationem editum fuit ab eodem Benedicto XIII. solemnia verò Canonizationis facta fuerunt a summo Pontifice Decessore nostro Clemente XII. Quod porro quando fieri contingat, Successor non revocat ad examen gesta coram Antecessore, sed, illis utique positis, procedit ad ulteriora, hoc est ad exquirendum consilium tum Cardinalium omnium, tum Episcoporum, & deinde ad actum sollemnis Canonizationis.

2 Posita ergo in summo Pontifice deliberatione de sollemni Canonizatione peragenda, si, & quatenus iudicio Congregationis sacrorum rituum accedat Consistorii iudicium; ad consilium & ad suffragium præstandum advocantur Cardinales omnes in Urbe degentes, tum Patriarchæ, Archiepiscopi, & Episcopi, etiam *Titulares* omnes, in eadem Urbe commorantes. Quidquid enim sit, an Episcopi *Titulares* necessario vocandi sint ad Concilia generalia, necne; & quidquid sit, an in eis habeant de jure suffragium decedens, necne; qua tamen in re, negativa opinio videtur esse magis accepta; probabile nihilominus est, eos vocari posse; & quatenus vocentur, suffragii decedentis prærogativa frui; uti late ostendit Andreas Hieronymus Andreucci Societatis Jesu in suo *diligenti tractatu de Episcopis Titularibus*, dum hæc primo scribebamus, edito, part. 2. num. 118. & seq. Neque Episcopi ipsi Orientales communionem habentes cum Catholica Apostolica Romana Ecclesia, & similiter in Urbe commorantes a consilio & suffragio excluduntur. Memoratu enim profecto dignum est non solum, quod san. mem. Clemens XI. Antecessorum suorum exemplis inhærendo, Episcopos omnes Orientalis Ecclesiæ in Urbe, uti supra, degentes audire voluit in Canonizatione, quam peregit, quatuor SS. Pii V., Andreæ Avelini, Felicis a Cantalicio, & Catharinæ de Bononia, sicut etiam præstitum fuit in aliis Sanctorum Canonizationibus a san. mem. Benedicto XIII. verum etiam, quod in Consistorio semipublico, in quo excepit suffragia de Canonizatione S. Catharinæ de Bononia, cum in quodam ex suffragiis mentionem fieri intellexisset celebris prædictionis ab ea factæ de excidio imperii Orientalis, & de casu urbis Constantinopolitanæ in manus Turcarum in pervigilio Pentecostes anni 1453. conversus ad dictos Orientales Episcopos ita ex tempore locutus est (*inter ejusdem orationes Consistor. 44.*) *Vos vero, Orientales Præsules, celestem misericordiarum Patrem potissimum exorate, ut, intercedentibus B. Catharina meritis, qua imperii Orientalis excidium, Græcorum in Spiritum Sanctum blasphemis ita promerentibus, prædixit, per ineffabilem Divinae suae bonitatis abundantiam Gracia vestra, quam Nos in visceribus gerimus paterna Charitatis, post diuturnam poenitentiam, hoc est miseram tot annorum servitutem, concedere tandem dignetur, ut pristinam consequi libertatem, suosque valeat errores desestari.* Sed hæc obiter dicta sint. Nunc ut re-

ut redeamus ad Episcopos, quorum suffragia a summis Pontificibus exquiruntur, præter eos, qui in Urbe commorantur, ut Episcoporum numerus augeatur, nedum omnes & singuli benigne admittuntur, qui ad Urbem zelo, solemnisque Canonizationis occasione adveniunt, sed invitantur, ut in Urbe se fiant, illi præterea, qui ad Urbem fortuito accesserunt vel propter suarum Ecclesiarum negotia, vel, ut sacrorum liminum visitationem explerent; & tandem Secretarius Congregationis Cardinalium sacri Concilii Tridentini interpretum, qui est etiam Secretarius Congregationis super residentia Episcoporum, ad Urbem vocat per litteras encyclicas Episcopos intra centesimum ab Urbe lapidem existentes: ita ut jure ac merito san. mem. Clemens XI. in sua allocutione facta in Consistorio semipublico (*inter citat. orationes Consistor. 41.*) in quo actum fuit de Canonizatione S. Pii V. confessum illum Cardinalium, & Episcoporum præferre dixerit imaginem antiquorum Conciliorum Romanorum: *Reliquum nunc est, ut in hoc sacro consensu veterum Conciliorum Romanorum imaginem præferente de Sanctorum cultu solemniter ei decernendo, qui vere, dum esset summus Pontifex, terrena non metuit, sed ad caelestia regna gloriosus migravit, diuturniori quavis cunctatione posthabita, deliberemus.* Quod autem ex voluntate summi Pontificis Episcopi præsentis in Curia jus habeant ferendi suffragium in Consistoriis, quæ coguntur pro Sanctorum Canonizationibus, testatur Genuen. in praxi Archiep. Curia Neapolit. cap. 122. in fine.

3 Ut autem summus Pontifex excipere valeat suffragia tum Cardinalium omnium in Urbe degentium, tum Episcoporum, initium desumitur a Consistorio secreto, cui soli interveniunt S. R. E. Cardinales; in quo Consistorio inquiritur, an deveniendum sit ad solemnem Canonizationem, necne, de qua re singuli Cardinales suas sententias aperiunt per verbum *placet*, aut *non placet*. Porro, ut Cardinales, qui non sunt adscripti Congregationi sacrorum rituum, sicut & illi, qui eidem adscripti sunt, vel merita sciant causarum Canonizationis, vel in memoriam revocent ea omnia, quæ in dictis causis facta sunt, & quæ, servatis servandis, præcesserunt; Cardinalis Præfectus Congregationis sacrorum rituum relationem in dicto Consistorio secreto super vita, miraculis, & actis Canonizationis legere consuevit: & nonnullæ profecto adhuc extant Cardinalium Præsectorum relationes aut typis impressæ in Actis Canonizationum editis, aut extra Acta ipsa evulgatæ. Præterquamquod aliquando, loco relationis Cardinalis Præfecti, editum fuit quoddam summarium totius causæ: ita enim res se habuit in Canonizatione S. Hyacinthi; quemadmodum legitur in Actis ejusdem collectis a F. Seraphino de Cracovia. Hodie vero a Secretario Congregationis sacrorum rituum componitur quoddam compendium vitæ, virtutum, & miraculorum, nec non actorum in causa Canonizationis. Impossibile siquidem esset, ut legi possint omnes testimonii depositiones, sicut olim fiebat, juxta ea quæ antea dicta sunt; cum tunc testes pauca verba deponerent, nunc autem eorum examina paucis expediri neque-

nequeant, quia pluribus interrogatoriis satisfacere tenentur, ita ut compendium hocce aptissime fuerit pro prædicta lectione substitutum: & eo magis, cum ad Consistoria in præsens non deveniatur, nisi pluries visis & ponderatis omnium testium depositionibus una cum animadversionibus Fidei Promotoris in sacrorum rituum Congregatione. Quod si contingat, Secretarium esse impeditum, prædictum componitur compendium ab ipso Fidei Promotore: veluti, cum ægrotante bon. mem. Inghirami Secretario Congregationis sacrorum rituum, san. mem. Clemens XI. mihi tunc Promotori Fidei imperavit, ut exararem compendia vitæ, virtutum, miraculorum, & actorum in causis Canonizationis SS. Pii V., Andreæ Avelini, Felicis a Cantalicio, & Catharinæ de Bononia; quæ porro compendia, uti se habebant, posita fuerunt a Justiniano Chiapponi in Actis dictæ Canonizationis subinde typis excusis & in appendicibus quoque integra exhibebuntur.

4. Dictis itaque in rebus consistit quidem totum negotium Consistorii secreti: attamen, ut dilucida narratione, unicoque intuitu cuncta sciri & videri valeant ad Consistorium ipsum pertinentia, operæ pretium est adnotare; primo, in intimatione Consistorii secreti notificari unicuique Cardinali, quid in eo agendum sit; secundo, ad unumquemque Cardinalem transmitti formis impressum compendium supra memoratum compositum vel a Secretario sacræ Congregationis, vel a Fidei Promotore; tertio, summum Pontificem ante omnia in dicto secreto Consistorio allocutionem habere ad Cardinales, iisdem exponendo, se de eorum consilio expectare, utrum ad solemnem Canonizationem sit deveniendum, necne; quarto, Cardinalem Præfectum compendiariam quamdam & strictam relationem totius causæ aliis Cardinalibus astantibus perlegere, quæ quidem, ne aliis tædium afferat, utpote qui jam formis impressam perlegerunt relationem Secretarii, aut Fidei Promotoris, compressior & strictior esse consuevit; quinto, absoluta relatione, summum Pontificem Cardinales interrogare, an ipsis placeat, ut ad solemnem Canonizationem juxta morem Sedis Apostolicæ procedatur; sexto, denique Cardinales assurgentes, unum post alium, aperto capite respondere *placet*, aut *non placet*; ac postremo, hunc eundem ordinem observari non solum, si de unius, sed & si de plurium Sanctorum Canonizatione sit agendum: absoluta quippe relatione primæ causæ, summique Pontificis a Cardinalibus requisitioni, an sit in ea ad Canonizationem procedendum, ab iisdem Cardinalibus data responsione, Cardinalis Præfectus facit relationem alterius causæ, & sic deinceps usque ad ultimam; cuiusmodi ordo servatus fuit in Consistorio secreto factò a san. mem. Clemente XI. pro Canonizatione quatuor Sanctorum commemoratorum, ut in Actis Justiniani Chiapponi videri potest.

5. Consistorium secretum, quod cogitur pro Canonizatione, excipitur a publico Consistorio, ad quod per intimationem vocantur Cardinales omnes, Decani, seu antiquiores Episcoporum Assistentium, & non Assi-

stentium Protonotariorum, Auditorum Rotæ, Clericorum Cameræ Apostolicæ, Votantium Signaturæ Justitiæ, Abbreviatorum, & Advocatorum Consistorialium, ut collegas suos admoneant, & cappis induti interfint. Intimatione quoque vocantur Secretarii Congregationis sacrorum rituum, & Promotor Fidei, & præter hos Gubernator Urbis, Vicecamerarius, Oratores Principum, Principes folii, Conservatores Urbis, Oratores civitatum subditarum, Magister sacri hospitii, & ceteri, quos acciri solemne est.

6 Omnibus in hoc Consistorium patet aditus, & in eo Advocatus Consistorialis longa oratione fufe exponit vitam ac miracula ejus de cujus agitur Canonizatione, necnon petitiones Regum, & Principum, aliorumque pro Canonizatione supplicantium. Licet autem, expletis aliis orationibus Advocatorum Consistorialium, quæ fiunt in aliis Consistoriis, & in quibus similiter exoratur pro alicujus Canonizatione, Fidei Promotor opponere consueverit & protestari, ut infra videbitur; nulla tamen ab eodem Fidei Promotore emittitur protestatio post orationem ab Advocato Consistoriali in hoc publico pro Canonizatione Consistorio recitatam. Et id utique jure optimo factum esse videtur. Nam, si in Actis Canonizationis S. Hyacinthi collectis a F. Seraphino de Cracovia legitur, Fiscalem Curix, qui in ea causa munus gesserat Fidei Promotoris, non opposuisse amplius, postquam dictum fuit, constare de ejus sanctitate & de duobus miraculis; potiori profecto ratione adstruendum videtur, non debere Fidei Promotorem ullam in Consistorio publico, de quo agitur, emittere protestationem; tum quia pro executione sui muneris in discussione causæ opposuit omnia, quæ opponere debebat & scriptis & voce, tum quia, absoluto in sacra Congregatione rituum examine causæ & prævio Cardinalium placito in secreto Consistorio de Canonizatione facienda, incongruum re vera esse videretur, si Fidei Promotor in dicto Consistorio protestationem emitteret: ederetur quippe protestatio, ut omnia rite fierent & recte, utque adimplenda adimplerentur, (propterea enim edi consuevit) cum jam omnia rite quidem ac recte facta essent, & adimplenda pariter essent adimpleta.

7 Absoluta Advocati Consistorialis oratione, nomine summi Pontificis emittitur responsio a Præsule, qui est a secretis Brevium ad Principes, in qua ait, Sanctitatem suam omnes hortari, ut jejuniis, orationibus, ac precibus Divinum implorent adjutorium; & præterea ipsam audire velle in proximo Consistorio sensum tum Cardinalium, tum Episcoporum in re tanti momenti; quarum quidem responsionum nonnullæ in Appendicibus exhibebuntur.

8 Si vero plures Beati unica Canonizatione canonizandi sint, non unum, sed plura habentur publica Consistoria: impossibile quippe est, plusquam duas haberi Advocatorum Consistorialium orationes in uno publico Consistorio.

9 Ultimum autem Consistorium semipublicum appellatur; eo quia non solum Cardinalibus, sed & Episcopis facultas datur suffragium ferendi, ut scribit Petrus Galefinus in *Actis Canonizationis S. Didaci part. 3. cap. 12.* Quia verò in ejusmodi Consistorio jus suffragandi præter Cardinales omnibus etiam Antistitibus, ut dixi, permissum est, semipublici nomine illud appellatur in commentariis quotidianis veteribus rituum Pontificalium. Neque enim suffragii Episcoporum requisitio est ullo modo habenda tamquam superflua; eo quod in præcedenti secreto Consistorio fuerit a Cardinalibus dictum sibi placere, ut ad Canonizationem procederetur; id quippe nihil aliud præferret, quam deliberationem procedendi ad ulteriora, hoc est ad exquirenda Præfulum suffragia; quemadmodum bene explicavit Penia in *vita S. Raymundi lib. 3. cap. 35.* ubi postquam ponderavit, quod in antiquis sacrarum cæremoniarum libris, & in commentariis Doctorum ad cap. *Andivimus. de Reliq. & venerat. SS.* legebatur & legitur, Pontificem definire in antecedenti Consistorio, Canonizationem esse faciendam, hæc subdit: *Quod ait sacer liber, in hoc Consistorio definire Pontificem, Canonizationem esse faciendam, prudenter accipiendum est pro ulteriori processu, idest omnia jam ita videri preparata atque probata, ut non sit dubitandum, quin Canonizatio fieri possit, ideoque ad alios actus deveniendum: idque comprobatur etiam ex bulla Canonizationis S. Raymundi sub Clemente VIII. ubi, innuendo hoc semipublicum Consistorium, quod cogitur post secretum, sic habetur (in cod. Canoniz. pag. 275.) Petivimus, ut, consideratis atque examinatis omnibus Actis, id præcise dicerent, quod Spiritus Sanctus eis daret eloqui, & an B. Raymundus Sanctis adscribendus esse videretur. Nec minus clara est bulla Canonizationis S. Teresie sub Gregorio XV. in qua, relatione facta de præcedenti Consistorio secreto, aperte legitur, in eo fuisse definitum, ut ad ulteriora procederetur.*

10 Antequam autem semipublicum hoc cogatur Consistorium, publicæ indicuntur preces ad Divinam opem implorandam in re tanti momenti, hoc est in decernenda Beatorum Canonizatione; precibusque expletis, ad semipublicum Consistorium per intimationem vocantur Cardinales omnes, Patriarchæ, Archiepiscopi, & Episcopi Romæ degentes: & in intimatione quidem iisdem notum fit, sententiam ferri debere super Canonizatione, quam scriptam & subscriptam unusquisque tradet Secretario Congregationis sacrorum rituum. Ad hoc idem Consistorium vocantur etiam Protonotarii Apostolici, duo antiquiores Rotæ Auditores, Secretarius Congregationis sacrorum rituum, & Procurator Fiscalis Cameræ Apostolicæ. Non vocabatur utique Fidei Promotor; sed san. mem. Clemens XI. voluit, ut ipse tamquam Fidei Promotor vocarer & semipublicis interesset Consistoriis a Sanctitate sua habitis pro Canonizatione SS. Pii V., Andreæ Avellini, Felicis a Cantalicio, & Catharinæ de Bonia; quod etiam fuit in Actis dictæ Canonizationis adnotatum a Justiniano Chiapponi pag. 87. Facto etiam publico Consistorio, ad unumquemque

Patriarcham, Archiepiscopum, & Episcopum in causa Canonizationis suffragaturum transmittitur illud idem compendium vitæ, virtutum, miraculorum, necnon Actorum in causa, quod transmissum fuerat ante primum secretum Consistorium ad Cardinales, ut singuli omnia edocti sententiam suam ferre possint.

11 Consistorii semipublici initium desumitur ab allocutione summi Pontificis, qui Cardinalium, & Episcoporum sententias super facienda Canonizatione exquirat: & licet quæstio olim, in Canonizatione videlicet S. Didaci, excitata fuerit, an in uno eodemque Consistorio Cardinales, & Episcopi deberent ferre suffragium; attamen, cum in præcedentibus Canonizationibus in uno eodemque Consistorio nedum Cardinales, sed & Episcopi suffragium tulissent, sic etiam in dicta Canonizatione factum est, teste Petro Galefinio in *Actis ejusdem Canonizationis* loc. cit. Dubitatum est, an Cardinales simul, & reliqui ordine *Præsides* suffragium ferrent. Res diu incerta & obscura ita discussa est, ut omnes eo tps in Consistorio suffragium ferrent, cum in œcumenicis Conciliis id fieri solemne sit, tum etiam in causis gravissimis, quemadmodum Innocentium IV. in causa Friderici Imperatoris, Clementem V. in Concilio Viennensi de re quorundam Principum maxima, Pium II. in Canonizatione item B. Catharina Senensis, & Leonem X. itidem fecisse, cum Franciscum de Paula in Sanctos retulit, ex Actorum monumentis compertissimum fuit.

12 His itaque cohærenter suffragium primo præstatur a Cardinalibus, deinde ab Episcopis; & si quidem aliquis ex Cardinalibus, aut Episcopis accedere nequeat ad Consistorium propter aliquod legitimum impedimentum, ut puta infirmitatis, suum transmittit suffragium ad Secretarium sacræ Congregationis, sicut habetur ex Actis Canonizationis S. Petri de Alcantara, & S. Mariæ Magdalænæ de Pazzis pag. 255. Absolutis porro suffragiis, summus Pontifex iterum alloqui consuevit, iterumque se aliorum orationibus commendat; tum, quatenus ad solemnem Canonizationem procedere velit, diem statuit, quo ea est peragenda. Cumque, juxta supra exposita, huic semipublico Consistorio interfint Procurator Fisci, & Cameræ Apostolicæ, necnon Protonotarii, dictus Procurator Protonotarios Apostolicos præfentes orat, ut unum, vel plura publica conficiant instrumenta de sententiis Cardinalium, Patriarcharum, Archiepiscoporum, atque Episcoporum, & de summi Pontificis oratione ac deliberatione: ubi antiquior eorumdem Protonotariorum Apostolicorum sui collegii nomine respondere consuevit, *Vobis Testibus*; vocando videlicet in testes hujus rei eos, qui stantes tunc reperiuntur juxta thronum Pontificium. Hic vero obiter adnotare fas sit, quod, etsi Petrus Galefinius in *cir. Actis Canonizationis S. Didaci* part. 3. cap. 12. referat, non solum Cardinales, & Episcopos, verum etiam Auditores Rotæ, Protonotarios, & Abbates, ceterosque omnes sententias suas in dicta Canonizatione tulisse: Deinde Pontifex de B. Didaco in Sanctorum numerum adscribendo sententias dici jussit,



jussit, tum suo quique ordine Cardinales, postea Patriarcha, Archiepiscopi, Episcopi, Auditores Rota, Protonotarii, Abbates, ceterique omnes qui aderant, uno consensu ac libere dixerunt, illum, cujus vita sanctitas, ac miracula nota & testata erant, dignum esse, qui in Sanctis adscriberetur; in eo tamen, quod attinet ad Auditores Rotæ, & Protonotarios, certum est, eos suffragia non tulisse. Vocati etenim fuerunt Auditores Rotæ ad semipublicum Consistorium, cum tunc Canonizationum causæ eorum examini committerentur, ut, si forte aliqua difficultas fuisset excitata, parati essent ad opportunas responsiones suppeditandas: Protonotarii vero vocati fuerunt, sicuti etiam nunc vocantur, ad conficienda instrumenta de gestis & definitis in eodem Consistorio; teste Francisco Penia in *iisdem Actis Canonizationis S. Didaci lib. 3. cap. 15.* Non oportuit tunc quidem ab Auditoribus Rota aliquid rogare, cum super processu nulla exorta fuerit, aut excitata controversia, quæ illorum explicatione & industria indigeret. Hoc enim consilio Auditores potissimum illi, ad quos judicandi processum cura mandata est, advocari solent. Protonotarii vero ad fidem exhibendam circa ea decreta, quæ in eo Consistorio censentur, solum rogandi erant: cum quo concordat liber sacrarum cæremoniarum Archiepiscopi Corcyrensis *sect. 6. cap. 1.* Poterunt interesse aliqui Protonotarii ordinarii, ut sint rogati de his, quæ gerantur. Aderunt etiam Auditores Rota, & maxime Commissarii causæ, ut, si quid esset declarandum, possint, ut bene informati, mentes aliorum declarare: & ut bene etiam adnotavit Rocca de Canonizat. *SS. cap. 37. de tertio Consistorio.*

13 Juxta prædictum librum sacrarum cæremoniarum *sect. 6. cap. 1.* huic Consistorio non solum Patriarchæ, Archiepiscopi, & Episcopi interesse debent, ut suam proferant sententiam, sed hujus etiam prærogativæ essent Abbates participes efficiendi: In hoc Consistorio debent esse Patriarcha, Archiepiscopi, Episcopi, Abbates, ad quos tantum pertinet dicere sententiam suam. Verum, etsi ignoro, quo tempore prætermittæ fuerit requisitio suffragii Abbatum, si tamen conjecturis locus esse potest, cum a summo Pontifice Gregorio XIII. insignissimæ quædam abbatæ fuerint collegiis ab ipso institutis unitæ, & earum, quæ sunt in locis Urbi conterminis, fiat ut plurimum collatio Cardinalibus; hinc forte evenit, ut, fere nullis in Urbe, aut circa Urbem Abbatibus extantibus, habentibus territorium separatum, & jurisdictionem in Clerum & populum, de quibus quidem Cæremoniale loquebatur, qui Cardinalitia dignitate non fulgeant, non amplius facta sit, nec fieri potuerit Abbatum, uti talium, advocatio ad hæc Consistoria, ut in eis suam proferant sententiam. In diariis insuper Paridis de Crassis celeberrimi cæremoniarum Magistri sub Leone X. habetur, prædictum Pontificem in hoc Consistorio suffragia Pœnitentiariorum requisivisse, dum agebatur de Canonizatione S. Francisci de Paula; sed post dictum Pontificem id amplius factum non est.

14 In Consistoriis hisce semipublicis Cardinales singillatim affurgunt detecto capite, cum suas incipiunt ferre sententias; tum sedentes tecto

capite eas prosequuntur. Patriarchæ vero, Archiepiscopi, Episcopi, ferentibus sententias Dominis Cardinalibus, sedent tecto capite; stant autem, cum Papa loquitur: sed, antequam eorum quisquam loqui incipiat, & similiter, postquam proprium tulerit suffragium, genuflectit; assurrexerant enim omnes, statim ac primus Patriarcha sententiam laturus surrexit, atque adeo stant, donec ultimus Episcoporum sententiam ferre desierit. Non amplius inter Episcopos, & Protonotarios quæstio est de primatu, cum eadem sublata fuerit a Pio Papa II. in sua Constitutione 4. *quæ est in Bullar. nov. Rom. tom. 3. part. 3.* & in qua jure ac merito, abrogatis omnibus contra facientibus, voluit, Episcopos præferri Protonotariis: *Nec Ordo Episcoporum* (ita legitur in ejus commentariis a Jo: Gobellino compositis lib. 3. pag. 115.) consuetudinem Romana Curia animo serebat æquo, quæ Notarios Apostolicos anteponebat. Contra plurimi, morem Curia sacram esse legem, & nullo mutandam pacto, censebant; scandalum ingens futurum, & orbem quodammodo ruiturum, affirmantes, si quid adversus Notarios statueretur. At Pius altitudinem Episcopalis eminentiæ animo volvens, quæ nihil est in Ecclesia sublimius, & quod ipse Romanus Præsul Jesu Christi Vicarius Episcopi nomine consentatur, Notarios corruptela quadam, non consuetudine, prælatis Episcopis judicavit; idque deinceps prohibuit, edita lege, quam totus sermo orbis collaudavit. Notarii, etsi ambiendo contra niterentur, & multa in Præsulem probra jactarent, legem tamen vel invito receperunt.

15 Sedent itaque Episcopi nedum in his Consistoriis, verum etiam in Pontificia Capella. Sed, si aliqui ex ipsis Consultores sint sacrarum Congregationum, quæ coram Pontifice habentur, ut puta sanctissimæ Inquisitionis, generalis sacrorum rituum, in Congregationibus ipsis minime sedent, sed stant; intersunt enim non ut Episcopi, sed ut Consultores: nisi forte ipsorum alicui, ut sederet, concederetur ex Pontificia benignitate, impotentia aut ægritudinis causa, quemadmodum in pinacotheca altera Jani Nicii Erythræi in *vita P. Gregorii de Valentia* pag. 13. huic concessum legitur a Clemente VIII. cum interesset celeberrimis Congregationibus de auxiliis Divinæ gratiæ, quæ coram dicto Pontifice cogebantur: Hoc interim notum omnibus est, quod Clemens Pontifex, cum summa ipsius erga Gregorinum voluntatis significatione eos illi honores habuerit, qui vix præstari cupiam solent; ut mense Martio, in ea disputatione, quæ ceteris finem attulit, cum Gregorius ita vehementer ex stomacho laboraret, ut stare non posset, atque Pontifex ejus esset audiendi in primis cupidus, sedentem disputationi operam dare permiserit. In quo ille declarare visus est, quanti hominem faceret, cui id concesseris, quod ipsis etiam Episcopis denegatur.

16 Postremo, si unica Canonizatione plures Beati canonizandi sint, non unum, sed plura habentur Consistoria semipublica; cum impossibile sit, ut in uno Consistorio omnia excipi possint Congregatorum suffragia pro omnibus Sanctis canonizandis: quare mos inolevit, ut tot semipublica Consistoria habeantur, quot sunt Beati, de quorum agitur Canonizatione,

zatione. Nonnullæ porro ex allocutionibus habitis in hisce Consistoriis, & nonnulla pariter ex suffragiis in iisdem Consistoriis latis exhibebuntur in Appendicibus.

17 Supra sermo habitus est de Urbis Abbatibus, qui Consistoriis intererant. Si quis autem scire veller numerum Abbatum Urbis, & nomina abbatiarum, quæ olim erant in Urbe, historiam legat P. Casimiri Romani Ordinis Minorum, cui titulus „*Memorie istoriche della Chiesia e Convento di S. Maria in Araceli di Roma* „, cap. 2. pag. 9. & seqq. publici juris factam post primam editionem hujus Operis.

## C A P U T XXXV.

*De nonnullis aliis orationibus, quæ fiunt in publicis Consistoriis a Consistorialibus Advocatis.*

1 IN superioribus aliquid innuimus de quibusdam orationibus, quæ fiunt pro Beatificatione, & Canonizatione Sanctorum ab Advocatis Consistorialibus in publicis Consistoriis; licet hæc Consistoria non congregentur, ut in proximo habeatur Canonizatio. Scire autem impresentiarum oportet, unum ex Advocatis Consistorialibus in unoquoque publico Consistorio orationem recitare de vita & gestis alicujus Dei servi; licet proxime non sit futura ejus Beatificatio, aut Canonizatio: postea narratis egregiis servorum Dei operibus, Advocatum Consistorialem in quolibet publico Consistorio pro illorum exorare Beatificatione, aut Canonizatione: tum Fidei Promotorem solemnem emittere protestationem adversus ea, quæ oratorio ritu relata fuerunt ab Advocato, instando, vel ut vera ostendantur exposita; vel, si jam sunt ostensa, atque a sacrorum rituum Congregatione, annuente Sanctissimo, approbata, ut non procedatur, nisi servatis servandis, ad Beatificationem, aut Canonizationem: & huic demum instantiæ summum Pontificem respondere consuevisse his verbis: *sacrorum rituum Congregatio audiat, & referat*: quæ quidem omnia in regestis dictæ sacræ Congregationis Secretarius adnotare tenetur.

2 Orationes istæ Advocatorum Consistorialium in publicis Consistoriis summopere decent majestatem causarum introductarum, vel introducendarum Beatificationis & Canonizationis servorum Dei: tametsi profecto non sunt ipsæ absolute & simpliciter necessariæ ad rem & ad finem, de quo agitur: ita ut nullo negotio dari possit casus, quo procedatur ad Beatificationem, & Canonizationem alicujus servi Dei, cujus tamen merita Advocati Consistoriales in publicis Consistoriis minime peroraverint.

3 Mentio fit harum orationum in decretis generalibus Urbani VIII. his verbis: *Item mandatum est, ut declamationes de rebus profanis & plerumque de atrocioribus criminibus confictis & imaginariis, quæ fieri solebant in* Con-

*Consistorio publico ab aula Consistorialis Advocatis, quando Legati Sedis Apostolica in eorum reditu ad Urbem excipiuntur in eorum Consistorio, vel quando per summum Pontificem traduntur pilei Cardinalitii novis Cardinalibus creatis, vel admittuntur Legati Principum ad præstandam obedientiam Sedi Apostolica, abrogentur, & earum loco subrogentur propositiones causarum servorum Dei, qui fama sanctitatis conspicui mereantur adscribi in numero Sancti-rum, sive Beatorum; pro quibus poterunt instare apud summum Pontificem Advocati petendo, committi, prosequi, vel expediri respectivæ causas arbitrio Sanctitatis suæ.*

4 Pro hujus autem decreti intelligentia necesse est nonnulla referre, & signanter antiquo tempore Advocatos Consistoriales causas omnes Consistoriales in Consistorio ipso perorasse. Et formulæ profecto nonnullæ exordiorum factarum ab iisdem orationum legi possunt in codice MS. qui extat in archivo Vaticano, quique conscriptus fuit circa annum 1199. ab Ægidio Fulcarario Bononiensi, editus autem a Carolo Chartario in suo syllabo Advocatorum sacri Consistorii pag. 7. Porro hic perorandi mos recessit ab aula, cum causæ in tribunalibus Urbis, minime vero in Consistorio, tractu temporis cœperunt agi & definiri; adeo ut Pancirolus in suo opere de claris leg. Interpret. lib. 2. cap. 52. scribat, loquendo de collegio Advocatorum Consistorialium: *Continet hic Ordo decem gravissimos Jurisconsultos, qui innumeris privilegiis donati, soli clientum, qui in Consistorio litigant, causas defendere consueverant. Sed hodie, decrecentibus negotiis in senatu, fere otiosi apud alios Romana Curia Iudices mercede patrocinium præstant. Demum, quia, postquam summus Pontifex in publicum Consistorium descendit, aliquod elabitur tempus omnino vacuum, dum novi Cardinales, vel Oratores expectantur: consuetudo invaluerat, ut tunc unus ex Advocatis Consistorialibus declamando factum exponeret fictitium & criminofum, supplicaretque, ut signaretur commissio, & sic demandaretur confectio processus criminalis adversus malefactorem, sive rebellem, de cuius confectis facinoribus ipse differuerat. Desumuntur nimirum hæc omnia ex Gomefio in compendio utriusque Signaturæ (inter ejusdem comment. in regulas Cancellar. pag. 153.) ubi, postquam enarravit, quod summus Pontifex in publico Consistorio commissionem signabat nonnullarum causarum criminalium confectarum, rationem quærit, cur id fieret; tum vero, nonnullis allatis, quæ ab ipso reprobantur, ita concludit: Reduendo igitur ad propositum, concludo, ideo Papam in Consistorio publico signaturam illarum commissionum illorum casuum introduxisse, ut tempus illud vacuum, quo vel novi Cardinales, vel Oratores introducendi expectantur, agendo aliquid, consumatur; nam, hæc faciendo, non etiam desinit, quando casus veri accidunt & proponuntur, justitiam ministrare. Nam hic mos & stylus hodiernus signandi supplicationes in Consistorio, & mandare, fieri processus criminales adversus malefactores, & rebelles, ad instantiam Procuratoris Fisci antiquus fuit, &c. Igitur dum ista in Consistorio aguntur, interim Cardinales creandi, vel novi Oratores, aut Legati a legatione redeuntes introducuntur, pro quibus*

quibus omnibus recipiendis solet Consistorium publicum cum observatione quarundam caeremoniarum indicî. Formula etiam antiquæ declamationis legi potest apud Chartarium in *alleg. syllabo Advocat. Consistor. pag. 257. & seq.* Istæ ergo orationes de rebus protanis, & plerumque de atrocioribus criminibus confictis & imaginariis, sublatae sunt a summo Pontifice Urbano VIII. juxta litteram decretorum in superioribus relatam, atque earum loco laudabiliter statutum est, ut fierent orationes de gloriosis gestis servorum Dei, qui cum sanctitatis fama obierunt, instando pro introductione, progressu, aut terminatione causarum Beatificationis, & Canonizationis eorumdem.

5 Hoc Urbani VIII. decretum prodiit, re in Consistorio secreto plene discussa; quocirca in *libris Actuum Consistorialium* ita legitur: *Roma apud S. Petrum in palatio Apostolico feria secunda die 27. Januarii 1631. fuit Consistorium secretum, in quo SS. D. N. Urbanus Papa VIII. proposita questione, an expediret abolere consuetudinem, quam hæcenus servaverunt Advocati Consistoriales, cum sunt publica Consistoria, proponentes causas fictitias; & rationibus per Sanctitatem suam adductis abolitionem hanc suadentibus, auditisque Reverendissimorum Dominorum Cardinalium sententiis approbantium & consentientium, decrevit, ut infra:*

6 Decernimus & mandamus, loco dictarum commentitiarum narrationum, posthac ab Advocatis Consistorialibus agendum esse de genere, natalibus, ac virtutibus eorum, qui cum magna opinione sanctitatis obierunt, & pro quibus sunt instantia, ut in Beatorum, seu Sanctorum numerum adscribantur: & eosdem Advocatos se continere debere in hujusmodi relationibus habendis intra terminos præscriptos in instructione de mandato nostro tradenda.

7 Cum autem in decreto Consistoriali modo relato mentio fiat institutionis Advocatis Consistorialibus tradendæ de modo, quo in Consistorio perorare debent, institutio ipsa est ea, quæ sequitur.

8 Primo: Electio, causarum spectet ad Secretarium sacrae rituum Congregationis pro tempore, qui adnotabis in cedula ab ipso subscribenda nomen servi Dei unicuique Advocato per turnum assignandi.

9 Secundo: Quilibet Advocatus per octo saltem dies ante propositionem in Consistorio ipsammet relaxet in manibus prædicti Secretarii, a quo, si quid compertum fuerit contra dispositionem eorum, qua continentur in præsentî instructione, amoveri debeat omnino, & accommodari ad mentem ejusdem Secretarii.

10 Tertio: De miraculis in individuo nihil afferatur, sed, narrando seriem vitæ, permittitur, agi solummodo de virtutibus, de miraculis autem in genere tantum.

11 Quarto: Idem de fama sanctitatis a die obitus usque ad præsentia tempora, referendo asperitatem vitæ, vigilias, orationes, jejunia, elemosynas, disciplinas, aliaque opera meritoria a Beatificatis patrata.

12 Quinto: Similiter & de populorum concursu ad sepulcrum, de oblationibus, ac de instantiis multiplicatis Principum virorum.

13 *Sexto: De gloria militantis Ecclesie in Beatificationibus Sanctorum, deque excitatione ad heroicas virtutes eorumdem exemplo.*

14 *Septimo: Instantie debent fieri a Procuratoribus causarum, a quibus prestabuntur solita honoraria huc usque erogata a Curia criminali Urbis Gubernatoris.*

15 *Octavo: Advocatus proponens habeat & teneat in manibus commissionem in forma signandi ad effectum illam relaxandi, cui Sanctitas sua mandaverit.*

16 *Nono: Promotor Fidei, cum sit ad presens & in posterum semper esse debeat de collegio Advocatorum Consistorialium, immunis sit a propositione dictarum causarum; esset enim inconveniens, eum, qui ratione sui officii opponere debet processibus Beati fabricatis seu fabricandis, ad hoc, ut in re tanti momenti veritas magis elucescat, prestare in eisdem causis suum favorabile patrocinium.*

17 *Præscripta in hac institutione hodie etiam in more posita sunt, exceptis tantummodo capitibus septimo, & octavo: perfolvuntur enim hodie emolumenta Advocato peroranti a Curia criminali Gubernatoris Urbis, ut infra dicitur, cum de expensis quæ fiunt in his causis, agetur; & Advocati quidem Consistoriales minime habent in manibus commissionem in forma signabili, quando in publico Consistorio de gestis servorum Dei, & de petitione pro illorum Beatificatione, aut Canonizatione sermonem faciunt. Fuit id nempe executioni mandatum, statim ac edita fuit institutio; postmodum vero contraria tenuit consuetudo: ideoque in regestis sacre Congregationis hæc habentur: Fuit Consistorium publicum in in Monte Quirinali pro tradendo pileo seu galero rubeo EE. DD. Cardinalibus Balneo, & Pallotta; & hoc primum Consistorium publicum, in quo sacra aula Consistoriales Advocati, relicto ritu fingendi sibi casus facinorosos, proposuerunt prima vice causas servorum Dei, instando pro eorum Canonizationibus; & ex Advocatis fuit primus Joseph Baila, qui, proposita causa Vallisletana servæ Dei Sororis Anna a S. Augustino Monialis Carmelita; secundus vero fuit Julius de Cinciis, qui, proposita causa Florentina servæ Dei Sororis Dominica a Paradiso fundatricis monasterii de Cruce, ambo insteterunt, præ manibus commissionem habentes, signari pro expeditione causarum; & ego Tegrinus Tegrinus Episcopus Assisensis, uti sacrorum rituum Congregationis Secretarius, inter sui cum exemplari narrationis narranda &c. Quibus peractis, Sanctissimus mandavit, consignari mihi utramque commissionem cum rescripto, quod rituum Congregatio audiat & referat; prout in executionem ego ipse in dictis commissionibus manu mea signavi rescriptum, quod mandavit Sanctissimus extendi in regesto Congregationis ad perpetuam rei memoriam.*

18 *Prærogativa est igitur insignis collegii Advocatorum Consistorialium, cui plurimum annorum spatium ipse adscriptus fuit, has omnes in publicis Consistoriis habere orationes. Nam & tempore Sixti V. Comes de Olivares Orator Regis Catholici introductus quidem fuit in publicum Consistorium, sed Horatius Burghesius sacre Consistorialis aulae Advocatus orationem habuit pro publico cultu decernendo in honorem S. Bertrandi.*

teste

teste Chartario in *syllabo Advocatorum Consistorialium* pag. 208. & etiam tempore Clementis VIII. cum Vicarius, quem dicunt Provisionis, una cum oratoribus Cleri Mediolanensis, & consilii generalis dictæ civitatis ad Urbem accessisset pro impetranda Canonizatione tunc Beati, nunc Sancti Caroli Borromæi, & perorare voluisset in Consistorio; Clemens prædictus, auditis momentis rationum collegio Advocatorum Consistorialium favorabilium, collegii annuit petitioni, & Vicarii prædicti loco Bernardinus Scottus sacre Consistorialis aulæ Advocatus supplices orando exposuit preces pro S. Caroli Canonizatione, teste Marco Aurelio Gratarola in *suo opere de veneratione S. Caroli cap. 20. Letta la lettera della città, il Signor Bernardino Scotti Avvocato Consistoriale Milanese, che fu poi Auditore di Rota, come diremo al suo luogo, recitò l'orazione, che segue, stando inginocchiato vicino a gli Ambasciatori, il quale officio s'era apparecchiato di fare il Vicario di Provisione, ma fu impedito dal collegio degli Avvocati Consistoriali, i quali dissero, che de jure apparteneva a loro tal carico.*

## C A P U T XXXVI.

*De solemnitate Canonizationis.*

**I**nterruptum ordinem nunc resumendo, & ad rem nostram redeundo, postquam expleta sunt omnia, quæ sunt explenda, nedum in secreto Consistorio, verum etiam in Consistoriis publico. & semipublico, statuitur a summo Pontifice dies faciendæ Canonizationis; quæ quidem diei definitio in ultimo Consistorio manifestari consuevit. Ut autem omnia ad ipsius Canonizationis solemnitatem pertinentia debito ritu & compendio exponantur, fit

## §. I.

*De civitate, in qua fieri debet Canonizatio.*

**M**ajor solemnium Canonizationum numerus Romæ, in qua urbe summi Pontifices residere consueverunt, habitus est. Attamen multa non desunt exempla Canonizationum factarum extra Romam, atque eo in loco, vel civitate, in qua summi Pontifices morabantur. Ex supra recensitis hujusce rei antiquiora desumi possunt exempla: in præsens vero sermonem habendo de recentioribus, Gregorius IX. fecit Canonizationem BB. Francisci de Assisio, & Elisabeth in civitate Perusina, B. Antonii Lusitani in civitate Spoletana, B. Dominici in civitate Reatina; Innocentius IV. BB. Edmundum Cantuariensem, & VVillelmum Briocensem Episcopos Lugduni, BB. autem Petrum a Verona Perusii, ac Stanislaum Cracoviensem Assisii solemnî ritu inter Sanctos retulit; Alexander

Tom. I.

P p

IV.

IV. B. Claram in civitate Anagnina; Urbanus IV. B. Richardum in civitate Viterbiensi; Clemens IV. B. Hedvigem in eadem civitate; Bonifacius VIII. B. Ludovicum Regem Franciæ in Urbe-Veteri; Clemens V. B. Petrum de Morono in civitate Avenionensi; Joannes XXII. BB. Ludovicum Episcopum Tolosanum, Thomam Herfordiensem, ac Thomam Aquinatem; ut & Clemens VI. B. Ivonem in memorata civitate Avenionensi canonizaverunt.

## §. I I.

*De loco, seu templo, in quo solemnitas Canonizationis expletur.*

3 **S**olemnis Canonizationis decretum in aula Concilii, quando in Conciliis fiebant Canonizationes, publicabatur: ideoque, conventu facto in palatio Lateranensi, Joannes XV. in ipsa aula Concilii, & coram Patribus decretum protulit de Canonizatione B. Udalrici Episcopi Augustæ Vindelicorum. Innocentius autem IV. qui in civitate Perusina, uti diximus, solemnî ritu inter Sanctos retulit B. Petrum Martyrem, decretum Canonizationis evulgavit in platea templi FF. Prædicatorum, astante Cleri & populi multitudine: cumque idem Assisii, ut pariter diximus, inter Sanctos retulisset B. Stanislaum, in ipso templo in quo solemnitatem explebat, inter Missarum solemnia ambonem conscendens sententiam emisit; uti legitur in Actis a Longino conscriptis lib. 3. art. 13. & ut bene adnotatur Bollandiani in *propylæo differt.* 20. num. 8. pag. 173. Ab eo nimirum tempore initium habuit pia consuetudo, ut solemnia Canonizationis in templo expleantur; & cum quidem Romæ Pontifices morantur, Canonizationes omnes, si unam aut alteram excipias, de quibus infra, factæ sunt in basilica Vaticana S. Petri de Urbe, uti bene ponderat Maphæus Vegius Cubicularius Eugenii IV. in suo tractatu de rebus memorabilibus basilicæ Vaticane, qui conservatur in archivo Capituli: *Quid majus Canonizatione Sanctorum, quæ ibi (scilicet in basilica Vaticana) pro majori nimirum dignitate & gloria celebratur? Dignitate, propter Principum Ecclesiæ confortia; gloria, propter omnium gentium inundantem occursum; & sicut habetur in Ordine Canonizationis anni 1494. (tom. 3. collect. Conciliorum Britannia pag. 638.) Quibus peractis, si canonizandus aliquis sit, in ecclesia, immo basilica Principis Apostolorum de Urbe, conficitur apparatus inscriptus.* Subdit autem Panvinus in suo tractatu de præstantia basilicæ Vaticane, qui pariter manuscriptus asservatur in archivo Capituli, Sanctorum Canonizationes factas fuisse in basilica Vaticana, eo etiam tempore, quo summi Pontifices habitabant in Laterano: *Quod majus mysterium Canonizatione Sanctorum, quæ in basilica S. Petri, pro majore nimirum dignitate ac gloria tantum, perpetuo celebrata est, etiam cum Romani Pontifices Laterani habitarent? In ea enim Eugenius IV. S. Nicolaum Tolentinum Ord. S. Augustini, Nicolaus V. S. Bernardinum*



*nardinum Senensem Ord. Minor. , Callistus III. S. Vincentium Hispanum Ord. Prædicat. , Sixtus IV. S. Bonaventuram Ord. Minor. , Innocentius VIII. S. Leopoldum Austriæ Ducem , Leo X. S. Franciscum Paulensem Calabrum institutorem Ord. Minim. , Hadrianus VI. S. Antoninum Archiepiscopum Florentinum, & S. Bennonem Germanum Episcopum Misnensem canonizarunt . Et concordat Tiberius Alpharanus in suo opere MS. infra citando; quod ipsum conservatur in archivo basilicæ S. Petri , ubi sic legitur : Canonizationes Sanctorum perpetuo in ea ( nempe in basilica Vaticana ) celebrat . Porro cum referat Paris de Crassis cæremoniæ Magister in suis diariis , se Leonem X. summum Pontificem interrogasse de templo , in quo facienda esset Canonizatio S. Francisci de Paula , quæ deinde facta est in basilica S. Petri , propterea quia basilica hæc tunc temporis ruinam minabatur ; colligi ex eo potest , extra casum , seu ruinæ periculum , nullam de peragenda Canonizatione in eadem basilica dubitationem esse potuisse . Consentiunt alii , qui de hac eadem re scripserunt , quique asserunt , Canonizationem juxta antiquissimam consuetudinem fieri debere in basilica Vaticana , si Pontifices Romæ morerentur . Sic scribit Petrus Galestinus in *Actis Canonizationis S. Didaci part. 3. cap. 13.* Illud in more jam diu positum est , ut , cum Romæ Pontifices manent , in sacrosancta basilica Vaticana B. Petri Apostolorum Principis actus Canonizationis ab iis celebretur , quemadmodum celebratum ejusmodi , quæ multis abhinc ætatum sæculis ritu solemniori acta sunt , commentarii rituales veteres demonstrant . Penia in *Actis Canonizationis S. Raymundi lib. 3. cap. 38.* ait : Apud S. Petrum in Vaticano consecratio est facta , in qua ecclesia celebrari solent Canonizationes , quando Romæ sunt ; & merito , quia tam insignis actus jure huic ecclesie debere videbatur . Dominicus Cappellus in *Actis Beatificationis & Canonizationis S. Francisci Salesii part. 1.* scribit , uti supra dictum est , ab Alexandro VII. fuisse statutum , solemnia Beatificationis peragi in Vaticana basilica , ut ibi fieret Beatificatio , ubi fit Canonizatio ; & in *Actis Canonizationis SS. Petri de Alcantara , & Mariæ Magdalænæ de Pazzis pag. 273.* hoc ipsum confirmat , Sanctæ demum Sedis observantia hæc Auctorum assertiones mirifice comprobant , cum juxta eam videamus , quod & antiquis , & mediis , & recentioribus temporibus Sanctorum Canonizationes in prædicta basilica perfectæ sunt . Verum , cum supra monuerimus , unam aut alteram Canonizationem extra Vaticanam basilicam a Pontificibus Romæ commorantibus factam fuisse ; prima ex his est S. Birgittæ , quam Bonifacius IX. causa ægritudinis explevit in Capella sacri palatii prope S. Petrum : sed , cum , perfecta Canonizatione , convalesceret , die sequenti in basilicam Vaticanam descendit , in qua Missam , quam impeditus celebrare non potuerat , solemniter celebraret ; prout quidem egit , teste Petro Amelio Sacrista Urbani V. in suo Ordine Romano apud Mabillonium *ton. 2. musæi Ital.* Altera est S. Joannis Nepomuceni , quæ solemniter facta fuit a san. mem. Benedicto XIII. in basilica Lateranensi , quam antea consecraverat ; in qua etiam basilica Beatificationem perfecit Dei servi nunc San-*

cti Fidelis a Sigmaringa Ordinis Capuccinorum, ut superflua evitarentur expensae. Basilica siquidem Lateranensis ornata adhuc erat ob paulo ante expletam S. Joannis Canonizationem. Sed, cum ante hanc Canonizationem, de praecedentium Pontificum more, idem Pontifex in basilica Vaticana solemni ritu inter Sanctos retulisset BB. Thuribium, Jacobum Picenum, Agnetem a Monte Politiano, Peregrinum Latiofum, Joannem a Cruce, Franciscum Solanum, Aloysium Gonzagam, Stanislaum Koskam, Margaritam a Cortona; cumque sub eodem Pontifice, ante Beatificationem S. Fidelis a Sigmaringa, in ipsa Vaticana basilica facta sit solemnis Beatificatio Hyacinthae de Marefcottis, & Joannis de Prado, necnon, post memoratam Beatificationem S. Fidelis sub eodem Pontifice, peracta sit in ipsa etiam basilica Beatificatio BB. Vincentii a Paulo, & Petri Forerii; nemo est qui non videat, jus ex consuetudine descendens stare pro basilica Vaticana, ut in ea videlicet, commorantibus Romae Pontificibus, fiant solemnia Canonizationis. Post haec jam primò scripta & typis edita, expleta est a SS. Decessore nostro Clemente Papa XII. anno 1737. in basilica Lateranensi unica actio Canonizatio SS. Vincentii a Paulo, Joannis Francisci Regis, Catharinae Eliscae Adurnae, & Julianae de Falcone-riis; & in eadem basilica paulo post expleta fuerunt solemnia Beatificationis S. Joseph de Leonissa. Canonizatio praedictorum Sanctorum expleta est in praedicta basilica, ut summus Pontifex sine valetudinis detrimento eidem interesset; & solemnia Beatificationis in eadem basilica expleta sunt, utpote jam ornata pro Canonizatione paulo ante facta. Veneramur quidquid a san. mem. Benedicto XIII. factum est pro insigni basilica Lateranensi, quam, uti diximus, consecravimus. Eadem veneratione prosequimur quidquid a SS. Decessore nostro ejusdem basilicae favore factum est, in qua Pontificia liberalitate & Pontificia magnificentia Capellam a fundamentis extruxit in honorem S. Andrae ex suo Corsino genere procreati: sed putamus, haec nullum praedictum asserere debere antiquissimae consuetudini, juxta quam tum solemnes Canonizationes, tum Beatificationes in basilica Principis Apostolorum, in qua nos multorum annorum spatio Canonicalem Theologalem Praebendam obtinuimus, peractae sunt, quoties Romani Pontifices fuerunt in Urbe. Fas etiam sit nonnulla addere de basilicae Vaticanae praestantia, quae hausimus ex opere MS. Tiberii Alpharani de basilicae Vaticanae antiquissima & nova structura, quod opus fuit absolutum anno 1577. In basilica ergo Vaticana, & non alibi, Imperatores diademata de manu Romani Pontificis suscipere consueverunt. Reges quoque si Romae coronari contigisset, non alibi ea celebritas facta est, quam in eadem basilica. Praeterea quoque non modicum augent ejusdem basilicae praestantiam & dignitatem praecipua quaeque nostrae Religionis mysteria, & Romanae Apostolicae Sedis, Pontificiaeque jurisdictionis facta, quae in eadem basilica perpetuo celebrata fuisse noscuntur. Nemo peregrinus in eam admittebatur, nisi prius rectae Fidei summam formulam obtulisset.

Don-

Donationes civitatum, provinciarum, & regnorum, factæ S. Romanæ Ecclesiæ, super altare majus S. Petri oblatae sunt. Rectores patrimoniorum S. Romanæ Ecclesiæ noviter instituti, item Duces Ecclesiasticæ militiæ creati, ad ejus aram maximam juramentum præstabant. Pontifex census regnorum, provinciarum, & civitatum, ac solemnes protestationes, in ejusdem porticu suscipere solet. Episcopi, & Metropolitani obedientiam S. Romanæ Ecclesiæ super altare S. Petri jurabant. Pallia de corpore S. Petri ibidem tantum assumuntur pro Archiepiscopis, & Patriarchis. Solemnes Episcoporum, Patriarcharum, Regum, Imperatorum excommunicationes, absolutionesque in hac una tantum basilica sunt celebratae. Cujus limina, subjectionis & devotionis ergo, Episcopi ex debito visitant. In hæresim lapsi suos errores ante Confessionem B. Petri abjurabant. Romanusque ipse Pontifex designatus solemne sacramentum, quod *Indiculus* appellabatur, in ecclesia S. Petri præstabat de sanctis Fidei dogmatibus usque ad mortem tuendis. Ejusdem Pontificis electi recta Fidei confessio, dogmatica epistola inclusa, ex hac basilica ad omnes Christianos mittebatur. Romani Pontifices falsis criminibus impetiti, in eadem basilica ante Confessionem B. Petri juramenta de sua innocentia præstabant. Anno Jubilæi solus Romanus Pontifex, aut, eo ægrotante, Cardinalis Legatus ab eo deputatus, portam sanctam suis manibus aperit, & claudit: in ea ipse coronatur & consecratur: & in ea sepeliendus est saltem ad certum tempus. Post hæc omnia fuscè relata, memoratus Tiberius Alpharanus ait, uti supra etiam visum est, Sanctorum Canonizationes perpetuo fieri in Vaticana basilica. Quæ laudabilis consuetudo, tot rationibus & monumentis innixa, ut in posterum omnino servetur, nec ullo modo ab ea recedatur, nos ipsi in initio secundi anni nostri Pontificatus, constituimus, & Constitutionem edidimus in Appendicibus referendam, de Sanctorum Canonizationibus, & Beatificationibus, quæ Romæ peraguntur, non alibi celebrandis, quam in basilica Vaticana, ut ibi videri potest *num. 2.* Porro post editam prædictam Constitutionem nonnulla nobis exposita fuerunt. Primum, quod in libro sacrarum cæremoniarum Romanæ Ecclesiæ sæpe allegato, in quo *lib. 1. sect. 6. cap. 1.* fuscè describitur ritus Canonizationis, nulla fit mentio basilicæ Sancti Petri, sed ecclesiæ in genere: *cum Pontifex venit ad ecclesiam.* At animadversio hæc nullo innixa est fundamento; cum paulo post subdantur hæc alia verba *cap. 2. Cum vero Pontifex pervenerit ad porticum S. Petri, excipitur ibi a Clero Urbis in modum supplicantium parato.* Alterum est, quod, præter Canonizationem S. Udalrici, quam in aula Concilii Lateranensis expletam diximus, aliæ Sanctorum Canonizationes factæ fuerunt in Urbe extra basilicam Vaticanam, & præsertim illa S. Henrici Imperatoris, quæ facta est ab Eugenio III. in ecclesia S. Mariæ trans Tiberim; SS. Ubaldi, & Joannis Gualberti, & Homoboni; quarum primæ dicuntur expletæ a Cælestino III. in ecclesia Lateranensi, & ultima in eadem quoque ecclesia ab Innocentio III.

tio III. ut ex datis bullarum colligitur : prima enim data est trans Tiberim , & alia Laterani . Potuissent alia superaddi exempla Canonizationum , videlicet S. Gerardi Episcopi Tullenſis , quæ facta est Romæ in Synodo in ecclesia Salvatoris , in basilica videlicet Lateranensi ; Sturmii Abbatſ Fuldenſis , quæ facta est in plenaria Synodo apud Lateranum . Verum ne hoc quidem robur habet , aut efficaciam . Data siquidem bullarum Canonizationis probat , bullam fuisse subscriptam a summo Põntifice in loco in eadem bulla indicato : sed non probat solemnitatem Canonizationis fuisse factam in eodem loco , & multo minus in basilica in eadem regione sita . Sciunt omnes , Canonizationem S. Joannis Nepomuceni fuisse solemniter factam in basilica Lateranensi a summo Pontifice Benedicto XIII. & nihilominus bulla Canonizationis data non est Laterani , sed apud S. Petrum , in palatio videlicet Vaticano , in quo idem Pontifex habitabat : & citata bulla extat in codice Canonizationum Archiepiscopi Ancyrani . Ex hoc ergo , quod bulla Eugenii III. pertinens ad Canonizationem S. Henrici Imperatoris data sit trans Tiberim , non bene infertur , Canonizationem fuisse factam in ecclesia S. Mariæ trans Tiberim ; sed tantum bullam fuisse ab eo Pontifice subscriptam in Transiberi , ad quem locum se receperat , ut evitaret insanum Romanorum furorem , quemadmodum fufe legitur apud Pagium juniorem in *vita dicti Pontificis* . Simili responsione eliduntur exempla Canonizationum SS. Ubaldi , Joannis Gualberti , & Homoboni . Et in eo quod attinet ad Canonizationem S. Joannis Gualberti , extat adhuc relatio Auctoris contemporanei apud Bollandianos *tom. 3. mensis Julii pag. 337.* ex qua defumitur , eam factam fuisse in Consistorio , non in ecclesia , coram Cardinalibus , & Episcopis , qui ibi nominatim recensentur : quod profecto nihil habet commune cum nostra assumptione , in qua agitur de Canonizationibus post tempora Innocentii IV. in Urbe factis , & in ecclesia , non in Concilio , nec in Consistorio . Ad classem earum , quæ præcesserunt temporibus Innocentii IV. & in Concilio expletæ sunt , pertinent ceteræ , de quibus mentio facta est paulo ante . Firmum itaque remanet , antiquam esse consuetudinem , ut Canonizationes , quæ Romæ fiunt in ecclesia & cum solemnitatibus & pompis ecclesiasticis , fiant in basilica Vaticana , & exceptis nonnullis , quæ supra fuerunt indicatæ , omnes in eadem ecclesia factas fuisse . Nec id ex datis bullarum comprobatur : sed ex his , quæ in ipsiſ bullis narrantur : mentio quippe functionis expletæ in basilica Vaticana rotundis litteris habetur in bullis Canonizationum SS. Bernardini , Catharinæ Senensis , Bonaventuræ , Francisci de Paula , Bennonis , Antonini , & passim in aliis ; ita ut , omnibus simul collectis , nullus videatur relictus dubitandi locus de veritate earum rerum , quæ fuerunt expositæ .

## §. III.

*De diebus, quibus peragitur solemnitas Canonizationum, & de pluribus Sanctis unica solemnitate canonizandis.*

4 **T**empore summi Pontificis Leonis X. cum inter sacrarum cæremoniarum Magistros controversia exorta fuisset de die, quo solemnitas Canonizationis deberent expleri, deliberatum fuit, diem pendere a summi Pontificis arbitrio; uti legitur in Actis Paridis de Crassis cæremoniarum Magistri. Tempore quoque Gregorii XV. cum quæsitum fuisset in sacrorum rituum Congregatione, an plures Beati unica Canonizatione possent canonizari, affirmanter responsum fuit, ut mox videbitur: idemque Pontifex simul canonizavit BB. Philippum Nerium, Ignatium de Loyola, Franciscum Xaverium, Isidorum Agricola, Tereciam: tum autem Clemens X. BB. Cajetanum, Franciscum Borgiam, Philippum Benitum, Ludovicum Bertrandum, Rosam de S. Maria; Alexander VIII. BB. Joannem ab oppido S. Facundi, Paschalem Baylonium, Joannem de Deo, Laurentium Justinianum, Joannem a Capistrano; Clemens XI. BB. Pium V., Andream Avellinum, Felicem a Cantalicio, Catharinam Bononiensem; Benedictus XIII. BB. Thuribium, Jacobum Picenum, Peregrinum Latiosum, Joannem a Cruce, Franciscum Solanum, Aloysium Gonzagam, Stanislaum Kostkam, Agnetem a Monte Politiano. Omnes nempe hi Beati unica utique Canonizatione, at multiplici tamen solemnitate fuerunt inter Sanctos a Benedicto relati: impossibile etenim fuit octo Beatos unica solemnitate inter Sanctos referre. Idem Pontifex postea inter Sanctas retulit B. Margaritam de Cortona; deinde in separata Canonizatione B. Joannem Nepomucenum. Nec enim fuit Benedictus primus inter Pontifices, qui plures separatas, unam uno anno, alias annis subsequentibus, fecerit Beatorum Canonizationes, quique consequenter de anili fabula minime timuerit, qua fertur summos Pontifices, absoluta alicujus Sancti Canonizatione, cito ex hac vita discedere. Prætereundo quippe, quod san. mem. Clemens Papa XI. factæ Canonizationi prædictorum quatuor Beatorum superstes vixerit annos sere novem, pluribus eam fabulam impugnat Theophilus Raynaudus *oper. tom. 13. tit. de vitæ & mortis termino punct. 14. §. Alia apud aliquos fol. 218.* & argumentum quidem ipsum latius aptiusque persequitur Petrus Galesinius in *Actis Canonizationis S. Didaci part. 3. cap. 5.* ubi, loquendo de Sixti V. summi Pontificis desiderio peragendi dicti Sancti Canonizationem, hæc habet: *Non defuerant tamen, qui rem differri suadere conabantur nescio quibus rationibus, que inanes sunt, ne dicam aniles & superstitiosæ. Non enim verum est, neque cum pietatis officio consentaneum, quod vulgo dicunt, Pontificem brevi moriturum, ubi aliquem in Sanctorum numerum adscripserit. Immo contra perspicue manifestum fit exem-*

fit exemplis plurimorum Pontificum . Alexander III. Pontifex in Sanctorum Confessorum ordinem anno 1165. Bernardum Claravallensem retulit ; postea tamen vixit annis quindecim , cum alios etiam quatuor , & in iis præsertim Thomam Cantuariensem anno 1174. in Beatorum Martyrum numero adscripserit . Idem affirmare licet de Gregorio IX. Pontifice , qui annis postea tresdecim obiit , quam B. Dominicum Ordinis Predicatorum Auctorem & Parentem in Sanctis annumerarat , cum Seraphicum Franciscum etiam , & item alios quatuor deinceps in eorumdem numerum posuerit . Res ex Pontificiis annalibus in promptu est , ac propterea rationes multe sunt , quæ liquido constant : ideo jam nihil attinet , cur pluribus demonstretur .

## §. I V.

*De ordine , quo Sancti nominari debent , quando plures simul canonizantur .*

5 **Q**Uando accidit , ut non una , sed plures Canonizationum causæ sint absolutæ , ita ut . approbatis tum virtutibus , tum miraculis , & præmissis omnibus præmittendis , nihil aliud desit , quam sollemnis declaratio , quæ dicitur Canonizatio juxta præsentem Ecclesiæ disciplinam & usum , Beati omnes , quorum causæ jam sunt absolutæ , simul canonizantur ; uti colligitur ex sequenti decreto sacre Congregationis rituum edito die 3. Januarii 1622. *Hæc Congregatio fuit facta de mandato S. S. D. N. Gregorii videlicet XV. ad exquirendam sententiam Congregationis , an expediat quinque simul canonizare , nempe B. Isidorum , B. Ignatium , B. Franciscum Xaverium , B. Tereciam , & B. Philippum Nerium ; licet , antequam inchoaretur Congregatio , venerit P. Dominicus Carmelita Discalceatus , qui Pontificis nomine dixit , mentem Sanctitatis suæ esse canonizare supradictos Beatos simul uno eodemque die , ac propterea agendum esse in Congregatione solum circa modum . Sacra igitur Congregatio censuit , si Sanctissimus jam deliberavit istos quinque canonizare , melius esse , illos canonizare simul uno eodemque die , quam parvum tempus interponere inter unum & alium , etiamsi tempus esset unius anni .*

6 Posito itaque , quod plures Beati simul canonizentur , dubitari contingit de ordine , quo illi debeant nominari . In Canonizatione quippe quinque Sanctorum facta a Gregorio XV. sine ulla profecto quæstione processum fuit per ordinem antiquitatis ; ita ut , licet Sancti Philippus , Ignatius , & Franciscus essent ex Clero Seculari ( eo sensu , quo id accipiendum declarat Cardinalis de Luca *Miscellan. Ecclesiast. discurs. xxx.* ) fuerit tamen primo loco nominatus S. Isidorus , utpote antiquior : sed temporibus Clementis X. summi Pontificis , qui simul canonizavit Sanctos Cajetanum , Franciscum Borgiam , Philippum Benitium , Ludovicum Bertrandum , & Rosam , pia illa exorta porro est controversia super ordine retinendo in eorum nominum prolatione .

tionem. De ea actum fuit in sacrorum rituum Congregatione, & celeberrimus Jureconsultus Jo. Baptista de Luca, qui fuit postmodum ad Cardinalitiam dignitatem evectus, sensit, congruentius esse, ut juxta ordinem hierarchicum prius exprimerentur nomina SS. Cajetani, & Francisci de Clero Sæculari ordine antiquitatis inter eosdem servato, deinde cum eodem antiquitatis ordine exprimerentur alia duo reliquorum de Clero Regulari, uti desumitur ex ejus discursu 40. in miscell. Eccles. Et hanc utique sententiam amplexa fuit sacrorum rituum Congregatio, quemadmodum colligitur ex sequenti decreto: *Sacrorum rituum Congregatio censuit, in expressione nominum quinque Beatorum, qui canonizandi sunt, servandum esse ordinem hierarchiæ Ecclesiasticæ; & si plures sint eodem ordine, præferatur dies mortis: & ideo in casu, de quo agitur, ponatur primo loco Cajetanus, secundo Borgia, tertio Benitius, quarto Bertrandus, & quinto Rosa, si Sanctissimo visum fuerit: Hac die 29. Novembris 1670. Et, facto de prædictis verbo cum Sanctissimo per me Secretarium, Sanctitas sua annuit; die 6. Decembris 1670.*

7 Huic decreto Patres tum Ordinis Prædicatorum, tum Servorum B. Mariæ Virginis reclamarunt, humillime instando, ut tantum attendi deberet tempus obitus Beatorum juxta morem antiquiorem: sed sacra Congregatio stetit in decisio, declaravitque, præcedens decretum intelligi debere absque præjudicio principis loci de jure aut consuetudine competentis tum Ordini Prædicatorum, tum Ordini Servorum, in omnibus & quibuscumque actibus, & functionibus publicis & privatis; sicut ex hoc alio percipitur decreto: *Cum sacrorum rituum Congregatio declaraverit sub die 29. mensis Novembris, ita etiam annuente Sanctissimo die 6. mensis Decembris proxime præteritorum, in futura proxima Canonizatione servandum esse ordinem hierarchiæ Ecclesiasticæ, nempe antecedere debere primò illos status Clericalis, secundò illos status Regularis, & tertio inter plures ejusdem ordinis attendendum esse tempus mortis: Attamen, supplicantibus tam PP. Ord. Prædicatorum, quam Servorum B. Virginis, tantum attendi debere tempus mortis, quo Beati abdormierunt in Domino, juxta stylum hætenus servatum; & auditis illis de statu Clericali, eadem Congregatio sacrorum rituum, stando in decretis declaravit, prædictum decretum intelligi debere sine præjudicio præcedentia tam PP. Prædicatorum, quam Servorum B. Maria Virginis quomodolibet in omnibus & quibuscumque actibus & functionibus publicis & privatis de jure ac ex consuetudine hætenus competentis: Hac die 24. Januarii 1671. Et, facta de prædictis relatione Sanctissimo per me infra scriptum Secretarium, Sanctitas sua annuit; die 26. ejusdem mensis Januarii & anni 1671.*

8 Hujus autem functionis fundamentum constitutum fuit in quadam congruentia inter Ordines Ecclesiæ militantis, per quam Clerici Sæculares, quamvis recentiores, præcedunt Regularibus, licet antiquioribus. Quin immo, cum PP. Ord. Prædicat. vim facerent in Apostolicis Constitutionibus S. Pii V. & Clementis VIII. juxta quas ipsi primatus debetur super omnes alios Ordines Mendicantes, & responsum fuerit, hæc privilegia

respicere quidem primatum quoad Ordines Mendicantes, minime vero quoad Ordines Monachicos; in hoc rerum themate, si illi, qui ex Clero Sæculari sunt, Monachis præcedunt, juxta ea quæ fuerunt definita in celebri causa principis loci inter Monachos S. Benedicti Congregationis Cassinensis, & Canonicos Regulares S. Augustini Congregationis Lateranensis apud Tamburinum *de jur. Abbat. tom. 1. disput. 25. quæst. 1. per tot.*; potiori jure ipsi illi, qui de Clero Sæculari sunt, tum Mendicantibus, tum aliis omnibus de Clero Regulari præcedere debent; ex regula, *Si vinco vincentem te, multo magis vinco te*: quod recte adnotavit Cardinalis de Luca *cit. discurs. 40. n. 10. in miscell. Eccles.* Allegata & paulo ante relata decreta confirmationis robur obtinuerunt in decreto edito a SS. Decessore N. Clemente Papa XII. *die 17. Aprilis an. 1737.* & sic post typis impressum primum hujus Operis tomum. Sed, cum occasione Canonizationis ab eodem postmodum peractæ SS. Vincentii a Paulo, Joannis Francisci Regis, & SS. Julianæ de Falconeriis, & Catharinæ Fliscæ Adurnæ excitatum fuerit dubium, quis primo loco nominandus esset, num B. Vincentius a Paulo, an B. Joannes Franciscus Regis; Dominus Ludovicus de Valentibus Fidei Promotor, a nobis sæpe in hoc Opere cum laude commemoratus, scripturam Sanctitatis suæ exhibuit. Porro in ea exposuit quidquid a nobis supra dictum est, servandum esse videlicet ordinem hierarchicum in re de qua nunc agitur; sed perpendendum proposuit, an Patres Societatis Jesu, quorum Instituto B. Joannes Franciscus nomen dederat, utpote admissi ad privilegia Mendicantium, dicendi essent de Clero Sæculari, an Regulari. Præterea addidit esse perpendendum, an qualitas Fundatoris Congregationis Missionis competens B. Vincentio tanti posset esse roboris & momenti, ut in ejus sequelam primus locus esset eidem assignandus, & non B. Joanni Francisco, qui non fuit Fundator Religionis Societatis Jesu. A Sanctitate sua deputata fuit Congregatio, editumque decretum in Canonizatione peragenda prædictorum Beatorum, semper in posterum observandum; videlicet servandum esse ordinem hierarchiæ Ecclesiasticæ, sed, si inter plures ejusdem status & ordinis unus reperiatur, qui sit Fundator alicujus Religionis, Congregationis, Societatis a sancta Sede approbatæ, hic aliis præferatur, qui qualitatem Fundatoris non habent, licet ante mortui essent: En monumenta & decreta: *Promossa in occasione della passata Canonizzazione de' quattro Santi Vincenzo a Paolo, Gio: Francesco Regis, Giuliana Falconieri, e Caterina da Genova, quella controversia altre volte accaduta, e specialmente l'anno 1670. sopra l'ordine da osservarsi nel nominarli, ad istanza e supplica del Promotore della Fede, il quale è per ragione del suo impiego, e come incaricato con ispecial biglietto di Segreteria di stato a dover seprantendere alla disposizione della solenne funzione della Canonizzazione, si stimò in obbligo con sua scrittura umiliare a nostro Signore lo stato di detta controversia, colle ragioni, che potevano alle parti vicendevolmente competere; la Santità sua si degnò deputare una congregazione particolare per la risoluzione della già detta controversia, con il seguente rescritto.*

Die 13.



Die 13. mensis Aprilis 1737.

**S**ancitissimus benigne annuendo petitis, pro resolutione controversa, de qua in precibus, super ordine tenendo in expressione nominum Beatorum in proxima futura Canonizatione canonizandorum, deputavit Congregationem Reverendiss. DD. Cardinalium Pico, Zondodari, Spinula, Gentili, Guadagni, cum interventu, & voto DD. Patriarchae Hierosolymitani sac. rit. Congregationis Secretarii, Archiepiscopi Amaseni, & Promotoris Fidei, cum facultatibus necessariis & opportunis, decernere & terminare ut petitur, quibuscumque in contrarium non obstantibus. Et ad Fidei Promotorem pro executione tamquam Iudicem delegatum.

N. Cardinalis Corfinus.

Loc. † Sigilli.

Dalla qual Congregazione radunatafi il dì 16. del mese di Aprile ne emanò il di contro decreto, successivamente confermato ed approvato da nostro Signore il seguente giorno 17. di detto mese di Aprile.

## D E C R E T U M.

**C**um sacrorum rituum Congregatio sub die 29. Decembris anni 1670. annuente san. mem. Clemente X. demandaverit, in expressione nominum Beatorum, qui canonizandi sunt, servandum esse ordinem hierarchiae Ecclesiasticae, nempe antecedere debere primò illos status Clericalis, secundò illos status Regularis, & tertio inter plures ejusdem ordinis attendendum esse tempus mortis, prout clarius subinde declaravit alio simili decreto diei 24. Januarii subsequenter anni 1671. ab eodem Pontifice similiter approbato. Cumque occasione proxima futura Canonizationis dubitatum fuerit de ordine servando in exprimendis nominibus B. Vincentii a Paulo Sacerdotis Fundatoris Congregationis Missionis, & Societatis puellarum de Charitate, & B. Joannis Francisci Regis Sacerdotis Profess. Societatis Jesu; Congregatio particularis sacrorum rituum, a SS. D. N. deputata, hoc suo decreto statuit & mandat, servari memorata decreta, cum hac tamen declaratione, quod, si inter plures ejusdem status & ordinis reperiaturs unus, qui sit Fundator alicujus Religionis, Congregationis, Societatis, aut alterius hujusmodi Instituti sive Clericalis, sive Regularis a S. Sede approbati, praefertur aliis qui hanc qualitatem Fundatoris non habent, licet ante in Domino obdormiverint. Ideoque in casu de quo agitur, primo loco nominetur Vincencius a Paulo, secundo Joannes Franciscus Regis, si Sanctissimo E'co. Die 16. Aprilis 1737.

Factaque per me Fidei Promotorem de praedictis SS. D. N. Clementi XII. relatione, Sanctitas sua decretum istud praedictae sacrae Congregationis particularis confirmavit & approbavit & in posterum servari mandavit. Die 17. Aprilis ejusdem anni 1737.

L. de Valentibus S. Fidei Promotor.

Q 9 2

Huc

Huc referri possunt quæ a nobis dicta sunt in 2. part. lib. 4. cap. 6. num. 8. & seqq. de Fundatoribus sacrorum Ordinum. Quid autem dicendum esset, si inter Beatos canonizandos ejusdem status & Ordinis aliquis reperiretur, qui esset Fundator alicujus Religionis, aut Instituti a sancta Sede Apostolica approbati, qui non esset Clericus, aut Sacerdos? Esset ne hic præferendus alteri non Fundatori, qui Clericus esset, aut Sacerdos? Porro crederem, hunc illi esse præponendum: & de facto in Canonizatione Sanctorum celebrata a san. mem. Alexandro VIII. primo loco fuerunt nominati B. Joannes de Capistrano, & B. Joannes de S. Facundo, & post eos B. Joannes de Deo, licet Fundator Ordinis Fratrum infirmis in hospitalibus infervientium, habita ratione temporis mortis ipsorum; nonnisi quia B. Joannes de Deo nec Clericus fuit, nec Sacerdos; & alii duo sacerdotali charactere fuerunt insigniti.

## §. V.

*De Indulgentiis, quas summi Pontifices elargiri consueverunt occasione solemnium Canonizationis.*

**I**N epistola Leonis III. de Canonizatione S. Suuiberti legitur, eundem Pontificem obtulisse spirituales Indulgentias cunctis Fidelibus celebrantibus festum S. Suuiberti, & ad Divina in eodem festo facta consequentibus. Verum, cum epistola hæc apud plerumque ex alibi dictis apocrypha habeatur, si fides præstanda est Domino Phœbeo olim docto Secretario Congregationis sacrorum rituum in sua dissertatione infra memoranda, ad Honorium III. pius mos referri debet Indulgentias concedendi in solemnibus Sanctorum Canonizationibus. Cum enim inter Sanctos annumeraret B. Laurentium Episcopum Dublinensem, relaxavit viginti dies de injunctis poenitentis omnibus illis, qui vere poenitentes & confessi ad ecclesiam S. Mariz de Augo, ubi corpus ejus requiescit, in die solemnitatis ejusdem gloriosissimi Confessoris, vel intra octavam, cum devotione accessissent, ejus orationum suffragia petitori; quemadmodum legitur in bulla Canonizationis. Quamquam, cum ante Canonizationem B. Laurentii idem Honorius inter Sanctos retulisset B. VVillelmum Bituricensem Archiepiscopum, & litteras dedisset ad universos Christifideles, quæ typis impressæ sunt in novo codice Canonizationum pag. 51. & in eis quidem hæc habeantur: *Universis, qui ad solemnitatem translationis ejus ipso die, quo transferetur, & etiam infra octavas cum devotione convenerint, quadraginta dies de injunctis sibi poenitentis relaxamus, omnibus, qui ad ejusdem translationis solemnitatem futuris annis ipso translationis die reverenter accesserint, eandem Indulgentiam concedentes; inferri ex his posse videtur, quod, quatenus concedendarum Indulgentiarum usus occasione solemnium Canonizationum sit Honorio III. attribuendus, fieri id tamen non debeat propter Canonizationis*

zationem B. Laurentii, sed ratione potius Canonizationis B. VVillelmi Bituricensis. Continuatores porro Bollandiani in cit. dissert. 20. num. 9. ita subdunt: *Gregorius IX. in Canonizationibus S. Antonii de Padua .... & S. Dominici ecclesias, ubi quiescunt, similiter visitantibus annum unum indulgit; & max S. Elisabeth adscribens Sanctorum catalogo annum unum & quadraginta dies. Deinde Innocentius IV. infra quindenam sequentem festum S. Petri Martyris visitantes ecclesiam ejus voluit quadraginta dies lucrari; sed Clemens IV. rursus tempus restrinxit ad dies infra octavam; Indulgentiam vero ampliavit, & statuit dies centum intuitu S. Hedwvigis a se canonizate. Magis eandem gratiam extendit Callistus III. in litteris de S. Vincentii Ferrerii Canonizatione a Pio II. expeditis, quando in die sexto concessit septem annos & totidem quadragenas; quibus Sixtus IV. in Canonizatione S. Bonaventura adjecit Dominicis singulis per annum dies centum. Cœpto sic semel augeri annorum numero, Leo X. ad corpus S. Francisci de Paula assignavit quadraginta annos & totidem quadragenas; ac denique Hadrianus VI. in Canonizatione S. Bennonis solemnitati ejus presentibus Indulgentiam plenariam dedit. At veremur tamen, ne totum id re vera subsistat: quandoquidem in bulla Canonizationis S. Francisci de Paula, postquam Leo Papa X. narravit, se in ejus Canonizatione Missam celebrasse, subjungitur (in cit. cod. pag. 210.) Et ita Missam ipsam ad finem usque cum solitiis caeremoniis juxta Ordinarium Apostolicum illic debite terminavimus, Indulgentiamque plenariam omnibus Officio hujusmodi tunc assistentibus devote concessimus, ac etiam in loco sepulture ejusdem S. Francisci de Paula in depositionis sue die, videlicet secunda Aprilis, hujusmodi perpetuo duraturam quadraginta annorum, totidemque quadragenarum Indulgentiam annuatim condonavimus. Hodie demum summi Pontifices plenariam elargiuntur Indulgentiam omnibus utriusque sexus Christifidelibus, qui confessi & sacra Communione refecti, vel propositum habentes intra hebdomadam confitendi, & sacram Eucharistiam recipiendi solemniter interfunt Canonizationi Sanctorum; tum autem Indulgentiam septem annorum ac totidem quadragenarum visitantibus natali eorum die ipsorum sepulcra; uti legitur in Actis Canonizationis sæpe memoratis collectis a Justiniano Chiapponi pag. 212. & pag. 233.*

## §. VI.

*De Processione, quæ fit in solemnî Canonizatione.*

10 **O**ccasione solemnî Canonizationis solemnî item instituitur processio. Cardinalis Ostiensis in comment. ad cap. Audivimus. de Reliq. & veneras. Sanctor. sub num. 5. meminit conventus Cleri, & populi una cum summo Pontifice, & Cardinalibus: Conveniunt Papa, & Fratres, & totus Clerus, & populus. Cardinalis Jacobus Cajetanus in suo Ordine Romano typis impresso apud Mabillon. musæi Ital. tom. 2. sermonem habens

bens de accessu Papæ ad templum, in quo fit Canonizatio, ait *cap. 115. pag. 422. Occurrit ei processio Cleri illius ecclesie*. Auctor, qui rituum formulis præerat in aula Pontificia anno 1347. apud Raynaldum *ad dictum annum sub num. 28.* processionem non omittit, quæ fiebat, non ante, sed post peractam Canonizationem. Petrus Amelius Urbani V. Sacrista & Poenitentiarius Gregorii XI. in Ordine Romano pariter impresso apud Mabillon. in *musæo Ital. tom. 2.* sic habet *cap. 153. pag. 536. Tunc incepta fuit processio*, (pronuntiata videlicet sententia Canonizationis) & omnes tenebant *faculas suas accensas in manibus, quilibet in ordine suo; & duo Patriarchæ ibant cum Cardinalibus*. Item Dominus Papa subtus pallium; sed milites portabant extra pallium tortitia Papa accensa: & sic ivimus per totam Capellam usque ad aliam Capellam; & reversi fuimus processionaliter ad magnam Capellam. Processionis tamen inititutæ ante Canonizationem verba facit Volaterranus in Canonizatione S. Bonaventuræ sub Sixto IV. apud Raynaldum *ad ann. 1482. num. 48. Tum Papa descendit in basilicam processionaliter cum baldachino; in porticu ei obviam iverunt Religiosi Orbis, & Clerus ipsius ecclesie S. Petri*: quibus utique consimilia sunt ea quæ leguntur in diariis Paridis de Crassis de Canonizatione S. Francisci de Paula, atque in sæpe citato libro sacrarum cæremoniarum *sect. 6. cap. 1. Intimetur etiam Clero Orbis, ut summo mane conveniant supplicantes in porticu ecclesie S. Petri. Processionis insuper ante Canonizationem peractæ, necnon ordinis ejusdem accurata adest descriptio in Actis Canonizationis S. Didaci collectis a Petro Galefinio part. 3. cap. 14. & 15. Clemenisque VIII. in bulla Canonizationis S. Hyacinthi §. 23. (in *allat. cod. pag. 256.*) sic inquit: Ipsa Dominica in Albis (dies enim erat habitæ ab ipso Canonizationis) illuxit: Nos, & iidem Cardinales, necnon Patriarcha, Archiepiscopi, & Episcopi, qui in Capellam nostram Pontificiam nobiscum ad id convenerant, sacris vestibus induti, hymno Ave Maris Stella ad honorem Beatissimæ Virginis Maria, cujus opem tunc maxime invocandam duximus, inchoato, eodemque illo ab ejusdem Capellæ nostræ Cantoribus ad finem usque deinceps decantato, aliisque etiam Romana Curia Prelatis, & Officialibus, familiaribusque nostris una cum ceteris totius Ecclesiastici Secularis, & Regularis Ordinis viris longo pioque ordine præeuntibus, omnes cum ardentibus cereis ad illius gloriam, qui sua luce & splendore calos complet, ex palatio nostro Apostolico summa cum celebritate processimus ad basilicam Principis Apostolorum tunc magno undique ornamentorum apparatu instructam. Hodie etiam solemnitas Canonizationis initium ducit a processione. Qui vero magnificentiam ejusmodi processionum, & earum ordinem plenius edificere cupit, consulere potest Acta jam citata Petri Galefinii, necnon Peniæ de Canonizatione S. Didaci, Acta ejusdem Peniæ de Canonizatione S. Raymundi, Acta Grattarolæ de Canonizatione S. Caroli Borromæi, Acta Andreæ Azuar de Canonizatione S. Thomæ de Villanova, Acta Cappelli de Canonizatione S. Francisci Salesii, & SS. Petri de Alcantara, ac Mariæ Magdalenæ de Pazzis, Acta demum Justiniani Chiapponi*

de Canonizatione solemniter perfecta a san. mem. Clemente XI. Sanctorum quatuor sæpe memoratorum Pii V., Andreæ Avellini, Felicis de Cantalicio, & Catharinæ de Bononia, in quibus ad amussim & singillatim omnia referuntur, quæ ad processionem ipsam pertinere possunt. Hic enim solum addidisse fas sit primò, quod candelarum & funalium cereorum distributio, quæ hodie multis in hac processione fit, & signanter singulis Officialibus Curie, Præsulibus, Episcopis, & Cardinalibus, facta aliquando fuit omnibus, qui Canonizationi interfuerunt, teste Joanne Longino in Canonizatione S. Stanislai Episcopi Cracoviensis apud Bollandianos ad diem 11. Maji tom. 2. pag. 260. ubi sic legitur: *Omibus autem rite perfectis, Cantico Te Deum laudamus a summo Pontifice (Innocentio IV.) inchoato & a Clero universo ad finem expleto, facta est & generalis candelarum in homines utriusque sexus qui convenerant distributio adeo liberalis & prodiga, ut illiusmodi liberalitatem singuli testarentur se nullo unquam tempore vidisse, sed nec ab ætate defluxa audisse. Quod quidem nunquam deinde factum est propter timorem sane probabilem maximæ confusionis. Secundo, quod in processione deferretur vexillum cum imagine ejus Beati, qui est canonizandus, & plura utique seruntur vexilla, si plures Beati sint illi, qui debent unico actu canonizari. Consuetudo autem vexillum deferendi initium habuisse videtur a citata Canonizatione S. Stanislai Episcopi Cracoviensis: de ea enim sic ait Jo: Longinus apud Bollandianos loc. cit. In ipsa Canonizationis (B. Stanislai Episcopi Cracoviensis Martyris) & pronuntiationis sua articulo, Innocentius Papa consistente adhuc in cathedra, vexillum de rubro colore & puniceo contextum Pontificalem personam habens pro insigni, in alto pendens Angelico gestatum ministerio apparuit, a pluribus Christianidelibus, quibus id clementia Divina revelare voluit, non sine admiratione conspectum; rubro colore sanguinis effusionem significans, & Pontificali persona Beatissimum Stanislaium apertissime figurans; ad quæ notavit Papebrochius: eo miraculo præbittum exemplum ejusmodi vexillum exponendi in Canonizatione notorum Sanctorum. Et vexillum quidem ipsum in Canonizatione S. Francisci de Paula delatum fuisse a P. Generali Minimorum medio inter Oratorem Hispaniæ, & Oratorem Portugalliæ, testatur Paris de Crassis in sæpe alleg. diariis. Phœbeus vero ex notis Cardinalis Baronii ad Martyrologium Romanum animadvertens, gestatam fuisse per urbem Constantensem S. Rochi imaginem pompa solemnī & omni populo comitante, putat, ab hoc facto usum vexillorum in Canonizationibus, solemnemque in eis processionem suam originem duxisse. At, cum id contigerit, ut alibi dictum est, ad arcendam pestiferam luem, quæ per totam urbem grassabatur, cumque Concilii Constantiensis Patres, qui prædictas preces & supplicationes indixerunt, tunc sibi nomen & auctoritatem universalis Concilii falsò arrogarent; verisimile idcirco esse videtur, vexilli delationem in solemnitate Canonizationis causam & originem nequaquam habuisse a gestatione imaginis S. Rochi, sed a prædicta potius apparitione imaginis in vexillo depictæ, quæ*

quæ contigit in Canonizatione S. Stanislai. In sacrorum porro rituum Congregatione olim decernebatur & præscribebatur forma pingendi Beatum in vexillo seu vexillis pro Canonizatione: ita quippe actum est in Canonizatione S. Caroli Borromæi, teste Mucantio Secretario Congregationis sacrorum rituum in Actis dictæ Canonizationis ab eo descriptis, uti legitur fol. 85. Dictum est nempe in *vexillo seu vexillis*, cum non unum, sed plura comparantur pro unoquoque canonizando vexilla; quorum alterum e templi Vaticani fornice pensile manet ad perennem rei memoriam, alterum vero, Canonizatione expleta, quando primum festum Canonizati fit in ecclesia Ordinis, quem Sanctus, si fuerit Regularis, professus est, vel nationis, ex qua ortum habuit, ad eandem deferretur ecclesiam. Processio demum, quæ instituitur in hac vexilli delatione, ad amusim describitur a Chiappono in sæpe memoratis Actis Canonizationis. Quocirca hic tantum operæ pretium erit asserere ea, quæ leguntur in Cæremoniæ inedito Capituli & Cleri basilicæ Vaticanæ composito a Michaele Angelo Matthæjo ejusdem basilicæ Canonico, in cujus cap. 27. quod inscribitur: *De modo tradendi vexilla Sancti canonizati*, sic habetur: *Vexilla Sancti canonizati delata in Canonizationis processione, in nostra basilica remittuntur, quorum unum e templi fornice pensile ad maximam rei memoriam perennat, & alterum eorum, vel plura sisto die Sancti canonizati Religioni, vel Concivibus traduntur. Statuta igitur die, ab hebdomadario Canonico una cum quatuor Ministris pluvialibus indutis, etiamsi diei solemnitas non exigat, cantantur solennes Vesperæ ad altare Sanctorum Apostolorum. Vesperis expletis, omnes in choro sedent. Interim ordinatur processio ante præfatum altare transitura. Sancti canonizati vexillum seu vexilla deferunt ejusdem Sancti Regulares, vel Conciives, vel Confratres, quibus chorum ingredientibus, omnes assurgunt. Canonici celebrans stans accipit cordulas e vexillo pensiles, quæ in singulis vexillis sunt quatuor, & eas Religiosis paratis tradit. Deinde noster chorus præ manibus facem gestans ordinatim procedet ad ecclesiæ atrium, ubi sistit hinc inde, & transeuntibus vexillis, omnes genuflectant. Canonicus vero paratus, traditis cordulis, & descendens vexillis, una cum Ministris genuflectat, & postmodum in Sacrarium redeat. Post hæc jam scripta & primò edita, anno 1737. uti supra dictum est, facta fuit a SS. Decessore Clemente Papa XII. sollemnis Canonizatio Sanctorum supra memoratorum. Processioni Sanctitas sua non interfuit medicorum consilio; sed ejus loco interfuit Em. Cardinalis Rufus Archiepiscopus Ferrariensis, pluviali indutus & mitra pretiosa ornatus, utpote senior inter Cardinales Episcopos præsentis, quique etiam postmodum solemnem Missam celebravit.*

## §. VII.

*De solemnibus Canonizationis actibus juxta ritum antiquiorem.*

11 Cardinalis Ostiensis in cit. cap. *Audivimus. de Reliq. & venerat.* SS. de ipsa solemnibus Canonizatione loquens sic scribit num. 5. *Flexis genibus fit devota oratio, & cantatur Veni Sancte Spiritus, vel alius hymnus, sive antiphona conveniens. Surgit Papa ab oratione, & definit illum, de quo agitur, Sanctum esse, & Sanctorum catalogo adscribendum, & tamquam Sanctum esse venerandum, & festum suum colendum tali die. Cantatur Te Deum laudamus.*

12 De Canonizatione S. Petri Cælestini facta a Clemente V. & versibus descripta editis apud Bollandianos ad diem 19. Maji tom. 4. pag. 479. hæc habentur:

*Dixerat, & surgens, nobis adstantibus, inquit,  
Proclamatque, Veni replens pia corda Creator  
Spiritus, & genibus stravit se in pulvere, flexis  
Quoque aliis; surgitque iterum: cui vertice mitram  
Imposui dextra minimus Levita, sed Ordo  
Quippe dabat. Stetit inde, chorus quoad cantica complet &c.*

*Hæc ubi perfectum sumpsere exordia finem,  
Assavitque Deus volitis, firmumque petitis  
Judicium; sublimis Apex depromere votum  
Inchoat: Eterni ad Patris, Natiq; coævi,  
Flamini æterni ( quibus una potentia, summa,  
Omnipotens ) laudem, Maria Virginis alma,  
Et Petri Paulique Ducum, Michaelis, & omnis  
Militia cælestis opem, fideique salubris*

*Incrementa sacra; Divo munimine fulti,  
Sanctorum Petri, Pauli, nostro quoque fulti,  
Consilioque Patrum, vestrisque suavis, inquit:  
Nos Fratrem Petrum, quem de Murrone vocatum  
Fama docet, celebrisque ciet super æthera tolli,  
Sanctorum thalamo, meritis suadentibus altis,  
Sancimus dignum adscribi, justumque Piorum  
Scribimus hunc numero, statuentes undique plebem  
Huic obitus celebrare diem, & devotius omnem  
Confessoris ei festum persolvere cœzum &c.  
Dixit, & inde Pater jubilans in cantica surgit,  
Teque Deum laudamus, ait, vocisque sonora  
Hand decor emulcet pavonis imagine: cuncti  
Id peragunt, latique canunt, versumque sequentem*

Tom. I.

R r

Levita

*Levita ad levam residens, Clerusque vicissim  
Respondet. Tunc summus Apex Collectam & in alto  
Fudit, & expleto nostrum sibi funditur amen.  
Confiteor, Levita dehinc, thalamisque reverenter  
Compono excelsis Apicem; nomenque Beatum  
Militis ascripti memorant . . . . .*

13 In Ordine Romano Cardinalis Cajetani apud Mabillon. *musæ Ital.*  
tom. 2. sequentibus verbis solemnitas ipsa Canonizationis enarratur cap. 115.  
pag. 422. & seq. *Flexis genibus sit devota oratio, & Papamet debet incipere,  
cantando Hymnum Veni Creator Spiritus; quo incepto, genuflectit, & in fine  
primi versus surgere debet, & continuatur totus hymnus ab omnibus aliis can-  
tando; quo hymno cantato, si Domino Papa placet, Diaconus Cardinalis a dexteris  
Pape assistens dicit Flectamus genua, & Dominus Papa & ceteri alii basse  
& secreta genibus flexis orant; & devota oratione facta, post morulam, Dia-  
conus Cardinalis, qui est a sinistris, dicit Levate; & tunc omnes surgent:  
quibus levatis, Dominus Papa, tenendo mitram in capite, definit publice, illum,  
de quo agitur, esse Sanctum, & Sanctorum catalogo adscribendum, & tamquam  
Sanctum esse ab omnibus venerandum &c. quam definitionem facere poterit ipse  
D. N. Papa, ut sequitur: Ad honorem Dei omnipotentis Patris, et Filii, et Spi-  
ritus Sancti, et exaltationem Fidei Catholica, ac Christiana Religionis augmentum,  
auctoritate ipsius Dei omnipotentis Patris, et Filii, et Spiritus Sancti, Beatorum  
Apostolorum Petri et Pauli, et Nostra de Fratrum nostrorum consilio, decerni-  
mus ac definimus, bone memorie N. Sanctum esse, et Sanctorum catalogo  
adscribendum, ipsamque dictorum Sanctorum catalogo adscribimus, statuentes, ut  
ab universalis Ecclesia anno quolibet in die tali festum ipsius et Officium, sicut  
pro uno Confessore, si sit Confessor, vel sicut pro uno Martyre, si sit Martyr,  
devote & solemniter celebretur. Et, si Domino Papa placuerit, poterit addere  
ista verba: Insuper, eadem auctoritate, omnibus vere poenitentibus & confessis,  
qui annis singulis ad sepulcrum ejusdem in die tali devote acceperint, unum an-  
num & quadraginta dies, accedentibus vero annis singulis infra octavam dicti  
festi ad sepulcrum ipsius quadraginta dies de injunctis sibi poenitentis misericordi-  
ter relaxamus. Quibus verbis per dictum Papam prolatis, ipse Dominus Papa,  
mitra deposita, incipit cantando psalmum Te Deum laudamus, quem ceteri  
cantando proseguuntur; quo finito, Diaconus Cardinalis a sinistris Papa assistens  
dicat versiculum Ora pro nobis Beate N. alleluja, & ceteri respondent Ut  
digni efficiamur gratia Dei, alleluja. Si vero hujusmodi solemnitas fuerit  
a Septuagesima usque ad Pascha, in predicto versiculo mittitur alleluja. Dein-  
de Dominus Papa cantando dicat Dominus vobiscum, & responso Et cum  
Spiritu tuo, dicat Oremus, & postea orationem, qua competat illi Sancto,  
finiendo ipsam orationem Per Christum Dominum nostrum, & respondeatur  
Amen. Sed, ipsa oratione finita, dictus Diaconus Cardinalis a sinistris Papa assi-  
stens dicat Confiteor &c. ut moris est; & locis debitis, scilicet immediate post  
Apostolos, faciat mentionem de dicto Sancto. Qua confessione finita, Dominus  
Papa*



*Papa dat Indulgentiam gratiosam septem annorum & septem quadragenarum ; & data Indulgentia per D. N. Papam , ac mitra eidem deposita , facit absolutio- nem & dat benedictionem more consueto , dicendo Precibus & meritis &c. faciendo mentionem loco suo de Sancto canonizato .*

14 Ipsissima verba extant apud Auctorem , qui rituum formulis præ- erat in aula Pontificia anno 1347. ut habetur apud Raynaldum *ad annum prædictum num. 39.* & eis consimilia quoque sunt , licet magis compendia- ria , quæ leguntur in Ordine Canonizationis anni 1494. formis impresso *tom. 3. collect. Concilior. Britan. pag. 636.*

§. VIII.

*De nonnullis aliis juxta ritum antiquiorem Canonizationis ad ejusdem actum pertinentibus .*

15 **A**liquando etiam publice recitata fuerunt miracula a Deo pa- trata intercessione Beati , qui inter Sanctos referebatur ; ut colligitur ex monumento Canonizationis S. Laurentii Archiepiscopi Dublinensis factæ ab Honorio III. apud Bessin in *collect. Conciliorum provin- cia Rhotomagensis part. 2. pag. 47. Factoque silentio* ( loquitur de summo Pon- tifice Honorio ) *de B. Laurentio brevem sermonem faciens , testimonia de eo in audientia omnium iterum legi præcepit .* Lectis igitur ab Episcopo Cardinali Ni- colao prædicto dictis testimoniis , sicut ipse per totam fere noctem laborando exce- perat & fecerat adnotari , omnes , qui audire , mirati sunt & gavis , quippe qui per depositionem eorum inter cetera miracula meritis B. Laurentii septem au- dierunt mortuos suscitatos . Item in Canonizatione S. Antonii Lusitani , tes- tatur VVadingus in *annal. Minor. tom. 2. pag. 280.* lecta fuisse e suggestu miracula ejus intercessione patrata . Gregorius IX. qui inter Sanctos re- tulit Antonium , inter Sanctos pariter antea retulerat B. Franciscum Ordinis FF. Minorum Institutorem ; & in hujus etiam solemnitatis celebra- tione Octavianus Cardinalis Diaconus Tituli SS. Sergii & Bacchi , miracu- la quæ fuerunt approbata , populo enuntiavit ; ut in *vita ejusdem S. Fran- cisci ex annalibus VVadingi deprompta* narrat Tiburtius Navarrus *lib. 4. cap. 17.* In basilica Assiliensi Innocentius IV. ut visum est , Canonizationem peregit B. Stanislai Martyris ; & Pontificis jussu Cardinalis Cajetanus Urfinus , qui ad Pontificatum postea evehctus Nicolai III. nomen assumpsit , vitam , ge- sta , martyrium , miracula rite probata recitavit ; quemadmodum legitur in hitoria Conventus Assiliensis diligenter exarata a Francisco Maria An- gelo a Rivortorto *lib. 1. tit. 23.* Denique ut cetera prætereantur , Clemens V. legi publice fecit Acta in ipsa die Canonizationis S. Petri Cælestini , teste eo , qui illam Canonizationem verbis descripsit apud Bollandianos *ad cir. diem 19. Maji pag. 479. tom. 4.*

*Post jubet , ut referes contexta labantia Scriptor ,*

R r 2

Et

*Et vero sermone legat tam culmine gesta,*

*Quam post, quamque prius . . . . .*

16 Eorum quoque Beatorum, quos inter Sanctos referebant, corpora summi Pontifices occasione Canonizationis elevari mandarunt; aut ipsimet, si corpora erant in loco, in quo fiebat Canonizatio, debita cum reverentia & honore elevarunt. Sanctus Leo IX. canonizavit B. Gerardum Episcopum Tullensem, & in bulla extant hæc verba. (*in cit. cod. Canoniz. pag. 7.*) *Cujus Sancti venerabile corpus per Nos ipsos cupimus transferre, et digno honore digno loco in altari proprio collocare. Et sane post paucos menses corpus beatum elevavit et collocavit; ut habetur etiam apud Pagi juniorem in Breviario Roman. Pontif. tom. 1. pag. 516.* Alexander III. inter Sanctos retulit B. Thomam Cantuariensem, & in bulla hæc leguntur (*cod. cod. pag. 16.*) *Quoniam igitur dignum est, et vobis plurimum expedit, ut sanctum corpus ejus cum ea, qua decet, reverentia & honore condatur, discretioni vestra Apostolica auctoritate mandamus, quatenus corpus ejus devote et reverenter, facta solemnī processione, aliquo solemnī die, congregato Clero et populo, in altari honorifice recondatis, aut ipsum in aliqua decenti capsā ponentes, prout convenis, elevetis in altum. Quibus quidem similia habentur etiam in bullis Canonizationis BB. Bernuwardi Episcopi, & Joannis Gualberti factæ a Cælestino III. Canonizatio demum S. Francisci fundatoris Ordinis Minorum celebrata est in civitate Assisienti a Gregorio IX. testatur autem Krantzius lib. 4. Saxonia cap. 4. Papam de folio descendisse, & cum Cardinalibus sanctum corpus levasse de tumulo, mira omnium alacritate; quod ipsum narratur a Navarro in vita dicti Sancti lib. 4. cap. 17. Porro sancti ejusdem Francisci corpus, quod, si non omnium, Principum saltem virorum oculis per aliquam temporis intercapedinem aliquando expositum fuit, hortatore S. Jacobo de Piceno, a Sixto IV. summo Pontifice anno 1486. ex oculis hominum sublatum est; repleto ambitu, per quem ad ecclesiam inferiorem basilicæ Assisientis, ubi corpus illud servabatur, erat accessus, repletaque scala, per quam ad eandem erat descensus, denso aggere ex lapidibus & cæmento compacto; uti desumitur ex allegata historia Conventus Assisientis tit. 42.*

17 Alia plura ad antiquiorem ritum pertinentia cumulari possent, sed de his infra opportunius loquemur; & alibi quoque tractabitur de protestatione, quæ olim ante Canonizationes a summis Pontificibus emittebatur.



## §. I X.

*De solemnī actū Canonizationis juxta recentiorē & præsentem ritum.*

18 **I**uxta recentiorē & præsentem ritum postquam summus Pontifex, qui solemnī memoratæ interest processioni, Vaticanam basilicam ingressus est, solium conscendit, in quo sedens ad obedientiam excipit Cardinales, Episcopos Assistentes, & non Assistentes, Abbates, & Pœnitentiarios: absoluto obedientiæ ritu, alter ex Magistris sacrarum cæremoniarum ad imum solii gradum ducit Procuratorem delegatum ad postulandam Canonizationem una cum Advocato Consistoriali, qui ejusdem Procuratoris nomine petitionem exponere consuevit. In Canonizatione S. Didaci, Cardinalis Deça procuratorio Regis Hispaniarum nomine pro ea supplicavit: pro Canonizatione S. Caroli Borromæi ipse Regis nomine supplicavit Cardinalis Taverna: ejusdem insuper Regis nomine supplicavit Cardinalis Columna pro Canonizatione S. Thomæ de Villanova: pro Canonizatione autem S. Francisci de Sales nomine Regis Christianissimi supplicavit Dux de Criqui ejus apud Sedem Apostolicam Orator: in Canonizatione SS. Petri de Alcantara, & Mariæ Magdalenæ de Pazzis, Imperatoris, & Regis Catholici nomine supplicavit Cardinalis Rospi gliosus: in Canonizatione demum peracta a san. mem. Clemente XI. Cardinalis Hannibal Albanus ejus ex fratre nepos, & basilicæ Vaticanæ Archipresbyter, Regum, Magnatum, civitatum, & Ordinum Regularium procuratorio munere sanctus est; & Marcellinus Coirus tunc Consistorialis Advocatus, nomine dicti Eminentiss. Cardinalis instanter petiit, ut a Sanctitate sua Sanctorum catalogo adscriberentur BB. Pius V., Andreas Avellinus, Felix a Cantalicio, & Catharina de Bononia. Huic petitioni respondet Præsul a Secretis Brevium ad Principes, & pro summo Pontifice dicit, orandum esse, ut in arduo faciendæ Canonizationis negotio suum Dominus præbeat adjutorium. Canuntur deinde litanie Sanctorum; postea Advocatus Consistorialis iterum nomine Procuratoris ad postulandam Canonizationem deputati pro eadem exorat, iterumque Secretarius Brevium nomine Papæ respondet, iteratas & ferventiores preces esse Deo fundendas. Post hanc secundam postulationem canitur hymnus *Veni Creator Spiritus*; eoque absoluto, Advocatus Consistorialis ad tertiam procedit petitionem: tunc autem Secretarius Brevium mentem aperit Papæ de Canonizatione faciendâ, & Papa sententiam proferit, in qua decernit & definit, Beatum, aut Beatos esse Sanctorum catalogo adscribendos. Summi Pontificis sententia excipitur Procuratoris nomine ab Advocato Consistoriali, qui, Sanctitati suæ gratiis actis, petit, ut ipsa decernere dignetur litteras Apostolicas super Canonizatione. Huic postulationi Papa respondet *Decernimus*: tum ab eodem Advocato rogantur

tur Protonotarii, & Notarii, ut unum vel plura instrumenta conficiant ad perpetuum rei memoriam; & antiquior quidem Protonotariorum præsentium hæc profert verba *Vobis testibus*; vocans scilicet in testes eos, qui stant in area solii Pontificii. Canitur tandem hymnus *Te Deum laudamus*: postea in oratione fit mentio Beati, aut Beatorum canonizatorum, quorum pariter meminit in confessione, quam canit Diaconus Evangelium lecturus in Missa deinde cantanda, de qua infra. Summus denique Pontifex dat absolutionem & benedicit, facta quoque commemoratione Beati, aut Beatorum, quos in catalogum Sanctorum paulo ante adscripsit.

19 Hæc est solemnis rituum series, juxta quam expletæ fuerunt a multo tempore Canonizationes; uti deduci potest ex Canonizatione S. Bonaventuræ facta a Sixto IV. descripta a Volaterrano, & formis impressa apud Raynaldum *ad an. 1482. num. 49.* ex Canonizatione S. Francisci de Paula facta a Leone X. de qua Paris de Crassis in  *suis diariis*, & Raynaldus *ad an. 1519. num. 81.* ex libro sacrarum cæremoniæ edito sub eodem Leone X. ubi *sess. 6. cap. 2.* sic habetur: *Procurator cause instanter petit a Pontifice nomine Procuratorio, & nomine Principum &c. pronuntiari & declarari Beatum N. in Sanctorum catalogum adscribendum, & ut sanctum venerandum a Christianidelibus*: atque ex Actis Canonizationum S. Raymundi, S. Didaci, S. Francisci Salesii, S. Thomæ de Villanova, SS. Petri de Alcantara, ac Mariæ Magdalenæ de Pazzis, & SS. Pii V., Andreæ Avellini, Felicis a Cantalicio, & Catharinæ de Bononia.

20 In appendicibus exhibebuntur nonnullæ responsiones, quibus Præfules a Secretis Brevium ad Principes exceperunt Procuratorum postulationes: interea vero de formula sententiæ, quæ in actu Canonizationis a summo Pontifice profertur, agendum, quæ quidem concepta est, ut sequitur:

21 *Ad honorem Sanctæ & Individuæ Trinitatis, ad exaltationem Fidei Catholice & Christianæ Religionis augmentum, auctoritate D. N. J. C.; Beatorum Apostolorum Petri & Pauli, ac Nostra, matura deliberatione præhabita, & Divina epe sæpius implorata, ac de venerabilium Fratrum nostrorum S. R. E. Cardinalium, Patriarcharum, Archiepiscoporum, & Episcoporum in Urbe existentium consilio, Beatos Pium V. Pontificem, Andream Avellinum, & Felicem a Cantalicio Confessores, ac Catharinam de Bononia Virginem; sanctos, & sanctam esse decernimus & definimus, ac Sanctorum catalogo adscribimus: statuentes, ab Ecclesia universali illorum memoriam quolibet anno die eorum natali, nempe Pii die quinta Maji inter sanctos Confessores Pontifices, Andrea die decima Novembris, & Felicis a Cantalicio die decima octava Maji inter sanctos Confessores non Pontifices, & Catharinæ die nona Martii inter sanctas Virgines non Martyres, pia devotione recolere debere. In nomine Patris, & Fi filii, & Spiritus sancti, Amen.*

22 In hujus sententiæ a san. mem. Clemente XI. editæ formula nihil dicitur

dicitur de Officio & Missa in honorem Sanctorum canonizatorum : eique consimilis sane est formula sententiæ prolata a summo Pontifice Alexandro VII. in Canonizatione SS. Thomæ de Villanova, & Francisci Saleſii; necnon a Clemente IX. in Canonizatione SS. Petri de Alcantara, ac Mariæ Magdalenæ de Pazzis, ut ex Actis impressis percipi potest. In libro contra sacrarum cæremoniæ Archiepiscopi Corcyrensis formula habetur sententiæ in Canonizatione proferendæ; in qua utique dicitur, Officium in honorem Canonizati esse celebrandum; consimilique formula usi sunt summi Pontifices Sixtus V. & Clemens VIII. in Canonizatione SS. Didaci, & Raymundi, ut habetur ex Actis a Penia collectis; & consimilis etiam fuit sententia prolata a summo Pontifice Urbano VIII. in Canonizatione S. Andreæ Corsini, quemadmodum legitur apud Lezan. *consult. 2. num. 6. oper. tom. 4. Statuentes, ut ab universali Ecclesia anno quolibet in die obitus dicti Andreæ festum & Officium ipsius, sicut pro Confessore Pontifice, devote & solemniter celebrentur*. Porro, si antiquiora percurrantur monumenta, in Ordine Romano sæpe citato Cardinalis Jacobi Cajetani apud Mabillon. narratur, quod duobus Cardinalibus olim a Papa in Consistorio secreto committebatur, ut componerent Lectiones, Responsorialia, Antiphonas, & Orationes pro Officio Beati canonizandi. Verum, non obstante sententia, in qua decernatur, Officium esse recitandum in honorem Canonizati in Ecclesia universali, & quod majus est, non obstante ipsa Canonizationis bulla, in qua hoc ipsum statuatur; cum necessarium præterea sit pro Officii recitatione in Ecclesia universali, ut aliud accedat tractu temporis decretum Congregationis sacrorum rituum a summo Pontifice approbandum, juxta ea quæ inferius dicuntur; sane formula sententiæ, in qua omittatur Officii recitatio, magis apta esse videtur.

## §. X.

*De Missa a summo Pontifice celebranda in solemnii  
Canonizatione Sanctorum.*

23 **S**I antiquiora Canonizationum monumenta consulamus, pleræque procul dubio occurrent Canonizationes Sanctorum, in quibus nulla sit mentio Missæ a summo Pontifice ea occasione celebratæ. De Canonizatione etenim S. Udalrici Episcopi Augustani facta a Joanne XV. in Synodo Romana nihil aliud habetur, nisi post lectam atque auditam narrationem eorum, quæ de dicto Udalrico Luitolphus Augustæ Episcopus congesſerat, fuisse Udalricum inter Sanctos Confessores adscriptum. De Missa quoque a summo Pontifice Alexandro III. celebrata in Canonizatione S. Eduardi Regis Angliæ nullum habetur vestigium. Ejusmodi pariter sunt exempla Canonizationum factarum S. Francisci a Gregorio IX., & S. Petri Martyris ab Innocentio IV. De prima namque Albertus Krant-

Krantzius lib. 7. *Metrop. cap. 45.* & lib. 8. *Saxon. cap. 4.* sic scribit : Papa Gregorius veniens Assisum, in conspectu maxime multitudinis, quæ devotionis gratia eò confluit, Beatum Franciscum canonizavit his usis verbis : Ad laudem & gloriam omnipotentis Dei Patris, & Filii, & Spiritus Sancti, & gloriose Virginis Mariæ, & SS. Apostolorum Petri & Pauli, & ad honorem Ecclesiæ Romanæ, Beatissimum P. Franciscum, quem Dominus glorificavit in celis, debito in terris obsequio venerantes, de consilio Fratrum nostrorum & aliorum Ecclesiæ Prælatorum in catalogum decrevimus Sanctorum adnotandum, & festum diem obitus ejus celebrandum. Statim Cardinales Te Deum laudamus incipiunt, & populi voces laudes Christi excipiunt. Papa de solio descendit, & cum Cardinalibus sanctum corpus de tumba levavit. De secunda vero sic ait Lentinus Patriarcha Hierosolymitanus apud Surium ad diem 29. Aprilis tom. 2. pag. 365. Ubi ( sermo est de Innocentio IV. ) perspicue cognovit, samam vincti rerum veritate, majoraque comperisset, quam ad ipsum perlata fuerant, de communi consilio Cardinalium & Prælatorum omnium, qui per id tempus apud Sedem Apostolicam residebant v. l. l. kalendas Aprilis, nondum exacto post Martyrium anno primo, illum Perusii in platea ecclesiæ FF. Dominicanorum, adstante ipsi Cleri, plebisque, itemque Religiosorum, Nobilium, ac Procerum multa frequentia, aliis ubertim stentibus præ gaudio, aliis Deum magna voce laudantibus, universis denique mirifice tripudiantibus, & solemnî ritu diem festum celebrantibus, cum mirabili cereorum ardentium multitudine, & eximio sacrarum vestium apparatu, sanctorum Martyrum catalogo statuit adscribendum.

24. Hæc, & alia plura fuerunt erudite congelta a Domino Phœbeo Archiepiscopo Tarlensi & olim Secretario Congregationis sacrorum rituum in sua dissertatione typis impressa post Acta Canonizationis sanctorum Petri de Alcantara, & Mariæ Magdalænæ de Pazzis; ut ostenderet, non esse de essentia Canonizationis, ut Missa a summo Pontifice tunc celebraretur, licet in magnum decus tantæ rei cedat, si eam ipse celebret, & licet Pontifices eam celebrare consueverint, quando non fuerunt legitime impediti : Ex iis, quæ hæcenus diximus, certum redditur, Sanctorum Canonizationem perfici solo Pontificis Christi Vicarii iudicio & sententia super sanctitate & gloria defuncti, ex testimonio sanctitatis morum & veritatis signorum, non vero Missæ Pontificiæ sacrificio; quinvis id in Sancti honorem maxime cedat, & Pontifices celebrare, cum per valetudinem licet, consueverint. Invocatio siquidem Sancti canonizati, etiam non celebrante Pontifice, ab eomet omnium primo de more præmittitur Missarum solemnium post hymnum Te Deum laudamus. Quæ porro omnia recentioribus etiam auctoritatibus & exemplis confirmari possunt; tum, quia Panvinus in suo tractatu MS. de præstantia basilicæ Vaticanæ lib. 6. cap. 18. expresse ait, si Papa celebrare non potest, celebrare aliquem Cardinalem pro ipso, Et, si non posset, aliquis Cardinalis celebret pro eo; tum, quia in Canonizatione SS. Petri de Alcantara, & Mariæ Magdalænæ de Pazzis Missa fuit coram summo Pontifice Clemente IX. solemniter celebrata a Cardinali Barberino sacri Collegii Decano;

tano; tum etiam, quia Alexander Papa VIII. Missam pariter non celebravit in Canonizatione SS. Laurentii Justiniani, Joannis a Capistrano, Joannis a Sancto Facundo, Joannis de Deo, & Paschalis de Baylon: cum primus ex dictis Pontificibus ægritudine, alter senio, quod ægritudini æquiparatur, laboraret: & late prosequitur Dominus Cardinalis Petrus ad Constit. Apostol. tom. 5. in notis ad Constit. 6. Pii II. num. 9. & seqq.

25 At, si prædicta absint impedimenta, congruum omnino est, sicut etiam Phœbeus in citata admisit dissertatione, ut, peracta Canonizatione, solemnna Missæ celebrentur a summo Pontifice: primo, quia Alexander Papa III. qui in adscriptionem Sanctorum albo virorum, qui virtutibus & miraculis præstarent, novum ordinem induxit, Missam celebravit in Canonizatione S. Thomæ Cantuariensis; uti colligitur ex codice Vaticano MS. de vita ipsius Alexandri his verbis: *In die Purificationis B. Mariae, convocatis Episcopis, et Abbatibus, Campanie apud Signiam ad honorem ipsius specialiter Missarum solemnna celebravit*: secundo, quia Cardinalis Ostiensis in cap. *Audivimus. de Reliq. et veneras*. SS. verba faciens de ritu Canonizationis ait: *Cantatur Te Deum laudamus, et celebrat Missam idem Papa in honorem ejusdem Sancti*: tertio, quia in Canonizatione S. Petri Cælestini facta a Clemente V. idem summus Pontifex Missam celebravit, teste Auctore, qui dictam Canonizationem carmine exposuit apud Bollandianos loc. cit.

*Signataque manu turba, prædicit aperte  
Se Petri memorem, celebris solemnna Missæ  
Festa impleturum, verbis et facta repensat.  
Nam celebrat solemnns Apex, et canduit albis.*

26 Quarto, quia de solemnni Missa a Papa celebranda in Canonizatione Sanctorum, testimonium perhibetur in superius allato Ordine Romano Cardinalis Cajetani apud Mabillon. loc. cit. & in opere Auctoris, qui rituum formulis præerat in aula Pontificia anno 1347. apud Raynaldum ad an. prædictum sub num. 39. Quinto, quia Bonifacius Papa IX. ut alibi dictum est, qui Canonizationem S. Birgittæ explevit in Capella sacri palatii, Missam vero propter infirmitatem celebrare non potuit, descendit die sequenti ad basilicam Vaticanam, in qua ipsam postea solemniter celebravit cum omnibus cæremoniis, quæ adhiberi consueverunt in Missa, quæ canitur a Papa occasione Canonizationis; teste Petro Amelio in suo Ordine Romano similiter impresso apud Mabillon. cit. tom. 2. in quo habentur hæc verba cap. 153. pag. 537. *Ista die Papa non potuit dicere magnam Missam de Sancta causa infirmitatis, sicut debebat; sed in crastinum celebravit, ubi istum ordinem tenuit. Dominica ergo die, octava mensis Octobris, bono mane, post parvam Missam, Dominus Papa indutus cum pluviali & mitra cum perlis consistoriali descendit ad ecclesiam S. Petri cum omnibus Cardinalibus, duobus Patriarchis CP. scilicet & cum Prelatis, & toto Clero; & in porta ecclesie venerunt ei obviam omnes Canonici S. Petri cum Cruce, pluvialibus, pavilione, & campana*

Tom. I.

S f

pro-

processionaliter cantando Te Deum laudamus, duxerunt eum ad majus altare; & facta aliqua oratione ante altare, recessit ad cathedram, ubi consueverunt Romani Praefules induere se, & sedendo Cardinales, & omnes Praelati venerunt ad reverentiam, & ipse voluit, quod cantaretur Tertia. Missa fuit de S. Brigida cum commemoratione de Dominica. Tunc primo ego incipi de mandato sedere inter Cardinales Episcopos. Processit Missa ordine suo. Item post Evangelium Diaconus a sinistris dixit Confiteor, & dicto Credo in unum Deum: & post Offertorium Papa sedebat super bassam cathedram cum scabello ante regias ferreas Papae, ubi lectum fuit Evangelium, versa facie ad sedem, in qua fuit indutus. Tunc Domini Commissarii tres Cardinales de Canonizatione istius Sanctae exierunt de sacristia S. Petri cum oblationibus suis. Sexto, quia non solum Leo Papa X. in Canonizatione S. Francisci de Paula Missam celebravit, sicut eruitur ex bulla Canonizationis; verum etiam sub eodem Pontifice editus fuit liber sacrarum caeremoniarum ab Archiepiscopo Corcyrensi, ubi sect. 6. cap. 2. dicitur: *His finitis Pontifex incipit Tertiam, et accipit sandalia; vel, si magis placet, dimissa Tertia, accipit paramenta omnia Pontificalia, et canit Missam solitis caeremoniis, vel de Sancto, vel, si aliqua solemnitas esset, cantet de die cum commemoratione de Sancto; et, si non possit, aliquis Cardinalis celebret pro eo.* Septimo, quia subsequenter urgent summorum Pontificum exempla; Hadriani videlicet VI. qui Missam celebravit in Canonizatione S. Antonini, & S. Bennonis, ut ex bullis habetur; & Gregorii XV. qui Missam pariter celebravit in Canonizatione S. Terefix, & SS. Ignatii, Isidori Agricolae, ac Francisci Xaverii, ut ex bullis pariter Canonizationum defumitur. Postremo, quia praesto sunt novissima exempla san. mem. Clementis XI. & san. mem. Benedicti XIII. qui solemnem Missam celebrarunt in Canonizationibus Sanctorum ab ipsismet perfectis. Tantum itaque addidisse fas sit, quod, cantata a summo Pontifice Missa in basilica Vaticana, vel occasione Canonizationis, vel in aliis festis, Cardinalis basilicae Archipresbyter una cum duobus Canonicis sacrario praefectis ad Sanctitatem suam accedit, eique offert presbyterium, seu viginti quinque denarios signatos signo veterum Pontificum, prolatis his verbis: *Beatissime Pater, Capitulum et Canonici hujus sacrosanctae basilicae Sanctitati vestrae consuetum offerunt presbyterium pro Missa bene cantata; ut habetur in Actis Canonizationis collectis a Justiniano Chiapponi pag. 236.* quibus consonant ea, quae habentur in Caeremoniali MS. basilicae Vaticanae composito a Michaele Angelo Matthaeo ejusdem Canonico lib. 1. cap. 26. ubi sic legitur: *Expleta Missa summi Pontificis, duo Canonici Sacristae majores Archipresbytero exhibeant loculum vigintiquinque denarios antiquae monetae continentem. Archipresbyter loculum suscipiens offerat summo Pontifici pro Missa bene cantata. Quod servatur, quandocumque in nostra basilica Pontifex celebrat.*

27 In Canonizatione S. Didaci novum altare constructum est, ut in eo Sixtus V. summus Pontifex, dum Didacum inter Sanctos referret, sacra mysteria perageret. Totum erat ex nuce contignatum, & super eo alterum



alterum altare portabile quadratum, longitudinis & latitudinis duorum palmorum, adjectum erat ex fortissimo quodam lapide Africano variis coloribus excisum. Cumque altare juxta consuetudinem relinquendum esset Canonici S. Petri, hi dono ipsum dederunt Oratori Catholice Majestatis, ut ad eam in Hispaniam transmittendum curaret: cui quidem, cum ad Regem adducendum foret, Pontifex multas sacras contulit Indulgentias, & quibusdam sacris viris, ut in eo celebrare possent, facultatem concessit; ut ex litteris Apostolicis memorati Pontificis expeditis die 20. Augusti anno 1588. desumitur, & ut late refert Penia in *Actis Canonizationis S. Didaci*, consentiente etiam VVadingo in *annal. Minor. to. 13. pag. 321*. In Canonizatione facta a SS. Decessore N. Clemente Papa XII. Sanctitas sua nec Missam celebravit, nec Missa a Cardinali Ruso celebratae interfuit, uti supra dictum est, utpote senio & variis ægritudinibus laborans. Vectus ergo Sanctissimus in sede gestatoria sub baldachino, locum Canonizationis peragenda ingressus est, dum sacrum Collegium Cardinalium ad eundem locum perveniret. Sedens in folio, juxta morem, exceptit obedientiam Cardinalium: consuetæ instantiæ factæ sunt, nec desuerunt responsiones Prælati a Secretis Brevium ad Principes: & ab eodem Sanctissimo prolata est Canonizationis sententia.

## §. X I.

*De Oblationibus, quæ fiunt in Missa, quæ celebratur occasione Canonizationis.*

28 **S**Ive summus ipse Pontifex Missam celebret post expletam Canonizationem, sive Missa celebretur a Cardinali, eodem Pontifice præseate, semper fiunt oblationes, & semper in Missa conceduntur Indulgentiæ.

29 De hisce oblationibus sic loquitur Angelus Rocca olim Præfectus Apostolici Sacrarii in *tract. de Canonizat. SS. tom. 1. oper. pag. 143*. ubi agit de cæremoniis observari consuetis in ipsa Canonizatione: *Tertia Officio expleto, Missa sacrum vel de Sancto canonizato, vel de illa diei solemnitate, si qua in die Canonizationis eveniat, solemniter ac Pontificio ritu cum commemoratione Sancti canonizati decantatur. In Offertorio autem tres S. R. E. Cardinales, qui in Canonizatione iudices olim fuerunt, hoc est, primus Episcopus, primus Presbyter, ac primus Diaconus sacre rituum Congregationis, & Principis alicujus Canonizationem postulantis Oratores item tres, aut unus, vel aliquis Cardinalis in Oratoris locum a Papa electus, offerunt ea omnia, quæ in Missa Canonizationis offerri solent, mysteriis plena. Primus Cardinalis offert duos cereos, & satis quidem magnos: primus autem Oratorum, vel aliquis in Oratoris locum Cardinalis cereum unum, duasque turtures vivas in canistello aurato inclusas. Secundus Cardinalis duos offert panes prægrandes, unum auratum, alterum argenteum*

tum : Orator, vel aliquis in Oratoris locum Cardinalis alterum offert cereum, duasque columbas albas vivas in canistello item argentato inclusas. Tertius Cardinalis duos cados offert exiguis vini plenos, unum auratum, alterum argentatum : Orator, vel Cardinalis in Oratoris locum tertium offert cereum, & canistellum variis pictum coloribus, vivisque aviculis diversi generis plenum. In memoriam itaque antiquæ consuetudinis, juxta quam post examen Auditorum Rotæ tres eligebantur pro causæ discussione Cardinales, Episcopus scilicet, Presbyter, & Diaconus, tres hodie etiam pro faciendis oblationibus eliguntur sacrorum rituum Congregationis Cardinales in dictis Ordinibus constituti; & si plures Sancti unica Canonizatione canonizentur, tot Cardinales Episcopi, tot Presbyteri, & tot Diaconi, quot sunt Sancti canonizandi, faciunt oblationes; & si tot Cardinales Episcopi non adsint, quot sunt Sancti canonizandi, Cardinales Presbyteri locum subingrediuntur Cardinalium Episcoporum : quod contigit in Canonizatione quatuor Beatorum facta a san. mem. Clemente XI. in qua tres Cardinales Presbyteri loco trium Cardinalium Episcoporum, qui non aderant, fecerunt oblationes.

30 De significatione oblationum, quæ fiunt in Missa Canonizationis, specialiter egerunt Angelus Rocca *loc. cit.* Joannes Baptista Marus in sua diatriba de mystica rer. significat., quæ in SS. Canonizat. ad Missarum solemniam summo Pontifici offerri solent, Petrus Ruissius a Visitatione Ordinis Minimorum S. Francisci de Paula in suo discursu hac de re edito, Franciscus Viction. ejusdem Ordinis in tract. de Canonizat. SS., Penia in notis ad vitam S. Raymundi lib. 3. cap. 42. observat. 2. Justinianus Chiapponus in dissertatione typis excusa post Acta Canonizationis SS. Pii V., Andreæ Avellini, Felicis a Cantalicio, & Catharinæ de Bononia, Pater Memmius in tract. de Canonizat. SS. : quod vero attinet ad apparatus pro his oblationibus, & quoad eos, qui comitantur tum Cardinales, tum Oratores, qui ad dictas accedunt oblationes faciendas, consuli possunt Acta formis impressa præteritarum Canonizationum sæpe allegata.

31 Nobis liceat in præsentia aliqua tantum adnotasse de hujusce ritus antiquitate. In Ordine nimirum Romano Petri Amelii apud Jo. Mabillon. *loc. cit.* hæc leguntur de oblatione facta in Missa solemnī, quam Bonifacius IX. celebravit in basilica S. Petri die sequenti Canonizationem S. Birgittæ : Domini Commissarii tres Cardinales de Canonizatione istius Sanctæ exierunt de sacristia S. Petri cum oblationibus suis. Primo Dominus de Francia cum duobus magnis tortitiis accensis coopertis de auro, obtulit; osculando pedem, & manum. Secundo Dominus Anglicanus cum duobus panibus coopertis cum tobaletis, & armis, & scudetis S. Brigide, & trium Cardinalium Commissariorum; & osculatus est pedem, & manum Papa. Tertio Dominus Barenfis cum duobus magnis bacilibus de vino, & malvatico, quæ vocantur Romæ scyphi deaurati, & cum armis, & scudetis Domina, & Cardinalium prædictorum; & osculatus est pedem, & manum Papa. Ultimo venerunt quinque Procuratores istius Sanctæ

eum *Advocato*, & quilibet obtulit unam magnam candelam de una libra cere albe, modicum laboratam cum rosis, & floribus, viridis, alba, et rubea. Item unum parvum canisirellum, totum depictum de colore viridi, in quo fuerunt due columbe albe, et due turtures.

32 In superius allato Ordine Canonizationis Sanctorum anni 1494. (tom. 3. collect. Concil. Britannia pag. 639.) extant sequentia: Primus Commissarius Cardinalis offert duos panes magnos auripelle crocei, et duos auripelle albi coloris coopertos, et super quolibet panum predictorum debet esse una mappula tele finissima longitudinis octo palmorum. Secundus Commissarius Cardinalis offert quatuor barilia vini simili dumtaxat auripelle cooperta, nec crede vacua. Tertius Commissarius Cardinalis offert quatuor magnos cereos ponderis librarum decem cere communis pro quolibet Oratorum, Procuratorum, sive Sollicitatorum Canonizationis. Primus offert unum canistrum depictum, in quo erunt aliqui columbi albi, quorum unus saltem evolare possit. Secundus eorundem offert alterum similem canistrum plenum vitis aviculis; et tam primus, et secundus ex predictis Oratoribus, Procuratoribus, vel Sollicitatoribus, quam alii ex eis, quotcumque fuerint, offerre debet cereum unum librarum sex cere communis pro singulo. In eodemque etiam libro verba fiunt de vexillo Promotoris Canonizationis ante Offertorium deferendo: Si Dominus, qui facit fieri Canonizationem, habeat vexillum, fieri debes, et ante Offertorium gestari.

33 In libro denique sacrarum caeremoniarum Archiepiscopi Corcyrensis sect. 6. cap. 2. sic describitur ordo oblationis: Dum cantatur Credo, tres Cardinales Commissarii descendunt ad portam inferiorem suggestus, et ordinant Offertorium; et debito tempore, antequam Papa lavat manus in sede eminenti, veniunt ordinate: Et primus, idest Episcopus Cardinalis offert duos magnos cereos, et cum eo primus Orator offert cereum suum, et canistellum deauratum cum duabus turturibus. Tum Presbyter Cardinalis offert duos magnos panes cum mappulis, et secundus Orator cereum suum, et canistellum argentatum cum duabus columbis albis. Ultimo Diaconus Cardinalis offert duo vasa vini, et tertius Orator suum cereum, et canistellum diversorum colorum cum variis aviculis. Cardinales osculantur genu, alii pedem summi Pontificis. Proceditur deinde in Missa, ut alias.

34 In modo allegato sacrarum caeremoniarum libro nihil dicitur de columbo, qui evolare possit, de quo aliqua dicta fuerunt in Ordine Canonizationis anni 1494. Post eadem itaque tempora mos invaluit, quod, dum offerebatur quasillus, in quo diversi generis aviculæ reticulo inclusæ continebantur, caeremoniarum Magister abscondebat reticulum, quo exitus prohibebatur, & aviculæ huc atque illuc celerrimis pennis evolabant; uti legi potest in Actis Canonizationis S. Didaci descriptis a Petro Galefio, & a Francisco Penia, in Actis Canonizationis S. Hyacinthi exaratis a F. Seraphino de Cracovia, & in Actis Canonizationis S. Caroli Borromæi collectis a Marco Aurelio Grattarola. Abscessionis vero reticuli, ut aviculæ evolarent, nullum fit verbum in Actis Canonizationis S. Raymundi

mundi collectis ab eodem Francisco Penia, nec in Actis Canonizationis S. Thomæ de Villanova editis ab Andrea Afnar, nec demum in Actis Canonizationis S. Francisci Salesii, & SS. Petri de Alcantara, ac Mariæ Magdalænæ de Pazzis editis a Cappello. Neque postea in sepe memorata Canonizatione quatuor Sanctorum facta a san. mem. Clemente XI. ulla reticuli abscissio facta est: ponderatum siquidem sapienter fuit, & nullum in ea excogitari posse mysterium, & ipsam non esse in libris sacrarum cæremoniæ præscriptam, & initium habuisse a facto nonnullorum Magistrorum sacrarum cæremoniarum, qui morem prædictum fortasse induxerunt, ut altantem populi multitudinem exhilararent; quod procul dubio non est ad rem, de qua tunc agitur, opportunum, cum potius sit a sacrosanctæ functionis cæremoniis omnino alienum. Quocirca nec in Canonizatione facta a SS. Decessore N. Clemente Papa XII. facta est ulla reticuli abscissio; & oblationes factæ sunt, licet nec Sanctitas sua Missam celebraverit, nec Missæ interfuerit; factæ, inquam, sunt ipsi summo Pontifici, juxta consuetum morem, dum tamen canebatur a Musicis *Te Deum*, post prolatam Canonizationis sententiam: & hoc tempore præcipue factæ sunt, quia Sanctissimus nec poterat Missam celebrare, nec ei interesse, & ad suas ædes redire volebat.

## §. XII.

*De Oblatione turturum, columbarum, et avium omiſſa a sancta memoria Benedicto XIII. in Sanctorum Canonizationibus ab eo factis.*

35 **D**E hac omiſſione sic loquitur Justus Fontaninus Archiepiscopus Ancyranus in sæpe citato codice Canonizationum (in notis ad literas Bonifacii IX. scriptas Clarissis Urbanis S. Laurentii in Panisperna super Canonizatione S. Birgittæ): In hac cæremonia, post consuetas ex veterrima Ecclesiæ disciplina panis, vini, et cera oblationes de more summo Pontifici factas, columba, et turtures primum vise arbitrio Petri Amelii Pontificii Sacristæ. . . Hac tamen avium oblatio in domo Dei facta displicuit summo P. N. Benedicto XIII. cumque accepisset, eam quoque displicuisse vener. mem. Cardinali Josepho Mariae Thomasio sacrorum rituum peritissimo; prætereaque idem Sanctissimus Pontifex eam esse minime consonam reperisset sanctiori Ecclesiæ discipline, quam summe cultus, hujusmodi avium oblationem fieri noluit in solemnī Canonizatione octo Sanctorum, quam habuit in basilica Vaticana sub finem elapsi anni 1726. et initio hujus anni 1727. Re vera, si ad antiquiora Ecclesiæ monumenta, & ad ea a nobis non adeo remota manum admoveamus, inveniemus, oblationes in Missæ sacrificio fieri consuevisse, & etiam nunc fieri rerum tantum ad sacrificium ipsum pertinentium, ideoque panis, vini, & ceræ: una quippe pars harum oblationum in materiam sacrificii adsumebatur, secunda pro cunctis benedicebatur, & alia pars in usus ministrorum, & pauperum cedebat.

cedebat. In celebri etiam quaestione, quam viri doctissimi agitaverunt, quali scilicet Ecclesia Latina ab initio usa sit pane in Missa, azymo ne, an fermentato, cum vir eximie doctrinae Jacobus Sirmondus in *singulari de Azymo disquisitione* fermentatum in Ecclesia Latina ab initio praevaluisse docuerit, quem etiam pie memorie Cardinalis Bona rer. liturgic. lib. I. cap. 23. secutus est, ea potissimum cum ratione, quod, si olim Eucharistia ex populi oblationibus consecrabatur, ex quibus, quod supererat, sacrorum ministrorum, pauperum, & viduarum usibus inserviebat, id non nisi de pane fermentato, quo pauperes & viduae vescabantur, intelligi possit: Mabillonius quidem, & Martene, alique viri eruditione praestantes Sirmondo hac in re adversantur; sed non nisi quia duplicem dicunt in Ecclesia factam fuisse oblationem, unam ante Missam, aut ante Evangelium, in qua Fideles panem fermentatum, vinum, ceram, & aliud quodcumque in supplementum Sacerdotum, & egenorum; alteram, in qua panem azymum, & vinum ad consecrationem offerebant, cujus quod supererat ab Archidiacono servandum tradebatur custodi, ut privatis diebus praesto esset celebrantibus, cum Dominicis tantum diebus a viris & mulieribus praedictae fierent oblationes. Harum porro mos oblationum perduravit usquequo saeculo VIII. initium datum est elemosynae pecuniariae, quam Fideles Presbytero elargiuntur pro celebratione & sacrificii applicatione: etsi adhuc etiam supersunt nonnulla oblationis panis, vini, & cere, quae in Missa offeruntur, vestigia; in Missa videlicet, quae celebratur in Episcoporum consecratione, atque in benedictione Abbatum, & Abbatissarum, sicuti legi potest in Pontificali Romano: & item hodie in Metropolitana ecclesia Mediolanensi, juxta praescripta in Missali Ambrosiano, duo senes tres hostias offerunt, & vas vino repletum, & duae matronae longaeve similem faciunt oblationem, primi pro viris, secundae pro mulieribus, teste Macro in *suo vocabulario Ecclesiastico in v. Oblatio*. Ad quae quidem qui plura scire cupit de hisce oblationibus, & de earum coarctatione ad vinum, panem, ceram, & ad ea, quae sacrificio inserviunt, consulere poterit Mabillonium in *praefat. 1. ad sac. III. §. 6. Christianum Lupum tom. 5. ad can. 13. v. Concilii Romani*, Martene *tom. 1. de antiq. Eccl. ritib. pag. 309. & fusius pag. 379. & seqq.* Claudium de Vert. in *explicatione caeremoniarum tom. 1. cap. 2. pag. 122. & seqq.* Thier de *superstit. tom. 2. pag. 508.* itemque opus de *sacris oblationibus altaris* a P. Francisco Berlendo Clerico Regulari Theatino editum Venetiis anno 1733. & tandem Petrum Morettum Canonicum S. Mariae Transtiberim in sua omnibus numeris absoluta lucubratione de *ritu dandi presbyterium*, nobis dicata, & typis Romanis impressa anno 1741. *part. 1. sect. 1.* ubi late agit de oblationibus quae fiebant a Fidelibus, quarum nonnullae applicabantur ad usum sacrificii, aliae ad alios; ubi etiam ostendit primi generis oblationes fuisse de rebus usui sacrificii aptis, puta pane, vino, & aqua. His itaque innixus monumentis *san. mem. Benedictus XIII.* nec in octo memoratis Canonizationibus, nec in aliis

in aliis duabus, quas subinde solemniter peregit, oblationem fieri permisit turturum, columborum, & avium: sed & addebat, proscriptam fuisse avium, & animalium oblationem in canone tertio inter eos, qui Apostolici dicuntur. Quamvis autem oppositum esset, lactis, & mellis oblationem vetitam in canone Apostolico, fuisse permissam in canone tertio Concilii Carthaginienfis anni 397. ipsemet subdebat, id ex speciali ratione fuisse pro die Paschæ admissum; dicta quippe die lac, & mel infantibus recens baptizandis juxta antiquum morem infundendum speciali benedictione benedicebatur: *Lactis, & mellis specialiter benedicendi oblatio, ut in sacramentis Corporis, & Sanguinis Domini nihil offeratur, quam quod ipse Dominus tradidit, hoc est panis, & vinum aqua mixtum; primitia vero, seu lac, et mel, quod uno die solemnissimo in infantum mysterio solet offerri, suam tamen habeant propriam benedictionem, ut a sacramento Domini Corporis, et Sanguinis distinguantur.* Concludebat denique, se regulæ generali velle adhærere, nec ab ea se posse recedere, nulla speciali urgente circumstantia, nec ullo existente antiquioris Ecclesiæ documento, quod recessum ab ipsa regulâ suaderet. In Canonizatione tamen facta a SS. Decessore N. Clemente Papa XII. mos oblationis turturum, columbarum, & avium reumptus est. Omnia autem & singula, quæ de prædictâ Canonizatione scripsimus, hausimus ex fideli relatione ad nos ab Urbe absentes transmissa die 24. Augusti anni 1737. ab Joanne Baptista Gamberuccio Amaseno Archiepiscopo, primo Magistro cæremoniarum apud summum Pontificem, singulari nobis amicitia juncto, & in sacris ritibus longe peritissimo.

## §. X I I I.

*De summi Pontificis panegyrica oratione in honorem  
Beati inter Sanctos referendi.*

36 **Q**uod sermo, seu concio haberetur a summo Pontifice in Canonizatione Sanctorum, testimonium perhibet Cardinalis Ostiensis in cap. *Audivimus. de Reliq. et venerat.* SS. his verbis: *Et facit sermonem summus Pontifex processum recitans et probata.* Consentient autem cetera monumenta: de Clemente etenim V. sic canit Auctor, qui versibus exaravit Canonizationem ab eo factam S. Petri Cælestini apud Bollandianos ad diem 19. Maji tom. 4. pag. 479.

*Hincque ait: exulta, laudaque Sion, quia magnus,  
Magnus, et exulta; medioque tui, quia Sanctus  
Israel. Haud prisca sit nobilitate resurgens  
Murro genus, pectusve sciens doctrinae magnum  
Hunc facit: in silvis verum experientia cautum  
Longa facit. Siquidem facti suffragia Iusto  
Huic detrant: sed magnus erat, grandisque Beatum*

*Vita*

*Vita dedit, zelusque calens servare per omnes,  
 Et pietas, humilisque modus, vincensque superba  
 Simplicitas, mentisque nitor, subtractaque munda  
 Paupertas, miranda sui districtio virtus;  
 Hæc magnum fecere virum, celoque sacrandum,  
 Si Deus annueris. Nobis miracula clarent,  
 Et Fratres novere palam, discussit et illa  
 Longa dies, magnusque labor . . . . .*

37 In Ordine Romano Cardinalis Jacobi Cajetani apud Mabillon. loc. cit. sic legitur: *Papa, prout de camera venit, scilicet cum pluviali rubeo et mitra aurisrigiata cum perlis, vadit ad cathedram eminentem ante altare cum scabello paratam, et ibi sedendo facit sermonem, mitram tenendo in capite, ut est moris, processum recitando & probata. Quæ pariter verba habentur apud Auctorem, qui rituum formulis præerat in aula Pontificia anno 1347. apud Raynaldum ad dictum annum num. 38. Porro, licet Bonifacius Papa IX. Canonizationem fecerit S. Birgittæ in Capella sacri palatii prope S. Petrum, Missam vero eadem die non celebraverit, sed die sequenti descenderit ad basilicam Vaticanam, in qua cum omnibus solemnitatibus Missam ipsam celebravit, uti supra dictum est; eademmet nihilominus Canonizationis die sermonem habuit de prædicta S. Birgitta, teste Petro Amelio in Ordine Romano apud Mabillon. cit. tom. 2. pag. 536. Et factò silentio, & luminariibus accensis, Papa, tenendo mitram in capite, fecit collationem & sermonem suum sub isto theinase: Viduam ejus benedicam, & florebit super ipsam sanctificationis mea. In Ordine quoque Canonizationis tom. 3. collect. Concil. Britan. pag. 636. hæc extant: Et facias sermonem summus Pontifex, processum recitans & probata. Tum autem in libro sacrarum cæremoniæ Archiepiscopi Corcyrensis sect. 6. cap. 2. ita subditur: Pontifex, oratione facta ante altare, ascendit eminentem sedem, & accipit Cardinales, & Prelatos paratos ad reverentiam. Qua facta, descendit, et super aliam sedem sibi ante altare paratam sedet, versus renes ad altare, ubi facit sermonem, referens, quæ gesta sunt, et vitam ac miracula Sancti summarie et in genere. Demum hortatur omnes, ut secum pariter Domino pias preces fundant. Illustre insuper concionis habitæ a Joanne XXII. in honorem S. Thomæ Aquinatis, quem inter Sanctos retulit, ex antiquissimo MS. Tolosano monumentum publici juris factum est ab erudito viro Antonino Bremond ex Familia Prædicatorum tom. 2. Bullar. sui Ord. pag. 163. num. 22. Denique sermonis habiti in Canonizatione S. Catharinæ Senensis a Pio Papa II. argumentum prostat in ipsa bulla Canonizationis; sicuti habitorum ab Innocentio VIII. in Canonizatione S. Leopoldi Marchionis Austriæ, a Leone X. in Canonizatione S. Francisci de Paula, atque ab Hadriano VI. tum in Canonizatione S. Bennonis, tum in Canonizatione S. Antonini, ex earumdem Canonizationum bullis probatio desumitur. Introducta vero temporibus subsequen-  
 Tom. I. T t noni-*

nonizatione supplicanti respondeat, Pontifices ut plurimum a concionando abstinuerunt. Idcirco F. Severinus de Cracovia in Actis Canonizationis S. Hyacinthi ait, primæ pro Canonizatione petitioni Silvium Antonianum a secretis Brevium ad Principes tam longa nomine Sanctitatis suæ respondisse oratione, ut per illam Pontifex solitum de Canonizatione & de Canonizando sermonem obiisse videretur; quemadmodum legi potest pag. 386. & seqq. eorumdem Actorum. Sanctæ tamen memoriæ Clemens XI. qui ut plurimum in solemnibus Missis, quas celebrabat certis anni festis, homiliam habebat, laudabilem hunc ipsum morem retinuit in Missa, quam celebravit occasione Canonizationis quatuor Sanctorum, Pii V., Andreæ Avellini, Felicis a Cantalicio, & Catharinæ de Bononia; & hæc utique ipsa edita est tum inter ceteras egregias ejusdem Pontificis homilias, tum in Actis memoratæ Canonizationis sæpe allegatis, a Justiano Chiapponi collectis.

## §. X I V.

*De Bulla Canonizationis.*

38 Juxta ea, quæ in superioribus dicta sunt, prolata a summo Pontifice extrema sententia de Canonizatione, Advocatus Consistorialis humillime instat pro expeditione bullæ, & summus Pontifex respondet *Decernimus*. Olim, antequam bulla expediretur, celebrari minime poterat festum Canonizationis; uti colligitur ex decreto Congregationis sacrorum rituum edito in causa S. Francisci de Sales die 5. Augusti 1665. in quo ex speciali gratia concessum fuit, ut ante bullæ expeditionem Moniales SS. Visitationis civitatis Annesinæ celebrare possent solemnia Canonizationis dicti Sancti. Cum vero, facta Canonizatione, aliquando contingat, ut, retardata bullæ expeditione, moriatur Pontifex, qui Beatum inter Sanctos retulit; aliquis tunc ex ejus Successoribus proprio nomine, memoratis tamen sui Antecessoris gestis, memorataque Canonizatione ab ipso facta, procedit ad bullæ expeditionem, cujus initium esse consuevit: *Rationi congruit, & convenit honestati, ut ea, quæ de Romanis Pontificis prudentia processerunt, licet, ejus superveniente obitu, litteræ Apostolicæ non fuerint confecta super illis, suam consequantur efficaciam*. Primum hujus rei exemplum puto fuisse illud Gregorii XI. qui B. Elzearium de Sabrano in Gallia Narbonensi Aufosii Dynastam & Ariani in Apulia Comitum, sanctorum Confessorum canonis per Urbanum V. Pontificem maximum olim adscriptum fuisse promulgavit, expeditis litteris Apostolicis, *Rationi congruit &c.* Hunc postea morem subsequenter Pontifices passim amplexi sunt; & sanctæ quidem memoriæ Benedictus XIII. suo nomine expediri jussit Canonizationum bullas, quæ non fuerant expeditæ sub illis Pontificibus, qui Beatorum Canonizationes expleverant, ita ut sola desit bulla



bullæ Canonizationis S. Elisabethæ Reginae Portugalliae, ut in superioribus dictum est. Porro, etsi in bullis Canonizationum exponitur vita, exponuntur miracula, nec omittitur quicquid in causa juxta ordinem judicialem factum est; Honorius tamen Papa III. sanctorum Confessorum Pontificum canoni adscripsit B. VVilhelmum Bituricensem Archiepiscopum in Gallia Aquitanica, sed in bulla *quæ est in nov. cod. Canoniz. pag. 50.* abstinuit a singulari virtutum & miraculorum recitatione hisce de causis: *Qua, tum quia vobis nota sunt, tum quia pro sui multitudine non possunt sub brevitate narrari, presenti pagina non duximus inferenda; melius æstimantes, scripturo gloriosam ejus historiam universa relinquere, quam, paucis auctoritatem bullæ nostræ appositione præstando, eam reliquis quodammodo derogare.* Verum, cum subsequentes Pontifices ab Honorii more recesserint, ampliores idcirco Canonizationum bullæ sub eis prodierunt; præterquam sub san. mem. Benedicto XIII. qui voluit, ut bullæ Canonizationum, quæ in suo Pontificatu expediebantur sive Canonizationes a se factæ essent, sive ab aliis Pontificibus, breves essent, utque pauca tantum in eis attingerentur de vita, de miraculis, & de earum cursu judiciali; eo potissimum innixus fundamento, quod omnia narrari non possent, ne bullæ excrescerent in immensum; quodque, si forte aliqua in bullis ipsis omitterentur, in quibus utique propter sui amplitudinem videri possent omnia exponenda fuisse exposita, ansa præberetur asserendi, quæ essent omiſſa, veritate carere. Præter bullas Canonizationum aliæ quoque litteræ a summis Pontificibus vel ad universæ Ecclesiæ, vel ad unius nationis Præsules, aut ad aliquem Religiosorum cœtum, aut ad nonnullos Principes scriptæ sunt peractam Canonizationem indicantes, & eos ad cultum Beati inter Sanctos relati excitantes. Sic nempe factum fuit ab Alexandro III. post Canonizationem S. Thomæ Cantuariensis & S. Bernardi, a Cælestino III. post Canonizationem S. Joannis Gualberti, ab Honorio III. post Canonizationem S. VVilhelmi Bituricensis, a Gregorio IX. post Canonizationem SS. Francisci & Antonii, ab Innocentio IV. post Canonizationem S. Petri Martyris, a Joanne XXII. post Canonizationem SS. Ludovici Tolosaris & Thomæ de Aquino: quarum quidem epistolarum collectio habetur in sæpe citato codice Canonizationum, & ultima etiam ex ipsis edita est tom. 2. Bullar: Ord. Predicatorum pag. 164.

In Appendicibus porro exhibebitur compendiaria relatio omnium cæremoniæ adhibitarum in Canonizatione quinque Sanctorum facta a Gregorio XV. quæ pro hujusce capitis complemento esse poterit.

## CAPUT XXXVII.

*De Actibus cultus servus Dei post Beatificationem deferendis.*

**U**T eo, quo decet, ordine in hoc argumento procedamus, necesse est aliqua attingere, antequam ad ulteriora transitus fiat, de quibusdam appellationibus, seu titulis, circa quos nonnullæ aliquando excitantur quæstiones: sunt autem SERVUS DEI, VENERABILIS DEI SERVUS, BEATUS, SANCTUS.

2 Incipiendo ergo a titulo *servi Dei*, qui usurpatur tum in scripturis, quæ in sacrorum rituum Congregatione exhibentur, tum in ejusdem sacræ Congregationis decretis, sciendum utique est, ipsum aliquando fuisse Abbatibus impertitum, seu potius Abbates dicta servorum Dei appellatione fuisse comprehensos, uti desumitur ex Synodo Sueffionensi anni 744. *can. 10. col. 1934. tom. 3. collect. Harduin. Si quis contra hoc decretum, quod viginti tres Episcopi cum aliis Sacerdotibus, vel servis Dei una cum consensu Principis Pippini, vel Optimatum Francorum consilio constituerunt, transgredi, vel legem irrumpere voluerit, vel despexerit; judicandus sit ab ipso Principe, vel Episcopis, vel Comitibus, & componat secundum quod in lege scriptum est, unusquisque juxta ordinem suum. Cujus Concilii verba sic interpretatus est Petrus de Marca in suo tract. de concord. Sacerd. & Imper. lib. 6. cap. 24. num. 3. Vox illa vel apud media ætatis scriptores æquivalere conjunctioni et. Itaque, cum legis in hoc canone, vel Episcopis, vel Comitibus, intelligendum est, & Episcopis, & Comitibus; Item, Sacerdotibus, vel servis Dei, id est & servis Dei, hoc est Abbatibus. Sciendum præterea, hodie etiam apud Græcos titulo *servi Dei* appellari quemcumque baptizandum, cum forma Baptismi apud eos sit hæc: Baptizatur servus, vel serva Dei N. in nomine Patris, & Filii, & Spiritus Sancti. De hujus autem formæ validitate numquam illis Latini litem intendere, quia Eugenius IV. summus Pontifex in institutione Armeniis data (tom. 9. collect. Concil. Harduini col. 438.) ubi dixit formam Baptismi esse istam: Ego te baptizo in nomine Patris, & Filii, & Spiritus Sancti, addit etiam: Non tamen negamus, quin & per illa verba, Baptizetur talis servus Christi in nomine Patris, et Filii, & Spiritus Sancti; vel, baptizatur manibus meis talis in nomine &c. verum perficiatur Baptisma. Et concordant Acta Concilii Londinensis habiti anno 1556. sub Cardinali Reginaldo Polo Legato pro Angliæ reformatione, sicut habetur tom. 18. biblioth. Pontif. pag. 353. ubi hæc extant verba decreti: Forma autem est, Ego te baptizo in nomine Patris &c. Non tamen negamus, quin & per illa verba: Baptizetur talis servus Christi in nomine Patris, et Filii, et Spiritus Sancti; vel Baptizetur manibus meis talis in nomine Patris, et Filii, et Spiritus Sancti, verum perficiatur Baptisma. Quoniam, cum principalis causa, ex qua Baptismus virtutem habet sit S. Trinitas, instrumentalis autem sit Minister, qui tradit*

tradit exterius sacramentum; si exprimitur actus, qui per ipsum exercetur Ministrum cum sancta Trinitatis invocatione, perficitur sacramentum. At, quidquid sit de titulo, siue nomine *serui Dei* ratione modo indicata explicato, quod tamen attinet ad rem, quam nunc tractamus, titulus *serui Dei*, iuxta consuetudinem Congregationis sacrorum rituum, illis tantum tribuitur, de quorum agitur Beatificatione; iidemque sic communiter appellantur in scripturis Postulatorum, in animadversionibus Fidei Promotoris, in suffragiis DD. Consultorum, atque EE. Cardinalium, necnon in decretis sacre Congregationis; siue agatur de signatura commissionis, hoc est de causæ introductione, siue de validitate processuum, siue de fama in genere, seu denique de virtutibus, aut miraculis. Quodque notabilis est, citra ullam læsionem decretorum generalium Urbani VIII., *serui Dei* appellantur omnes illi, qui cum sanctitatis laude decesserunt, siue eorum effigies cum aliqua inscriptione edantur, siue eorumdem vitæ typis mandentur.

3 Porro ad ornatum materiæ addidisse fas sit, tum in veteri, tum in novo Testamento illos præcipue dictos fuisse *Dei seruos*, qui eximiis virtutibus floruerunt. Sic enim Esdræ lib. 2. cap. 9. v. 14. legitur: *Et sabbatum sanctificatum tuum ostendisti eis, & mandata, & ceremonias, & legem præcepisti eis in manu Moysis serui tui*; sic psalm. 77. v. 70. *Et elegit David seruum suum, et suscitavit eum de gregibus ovium*; sic psalm. 131. v. 10. *Propter David servum tuum, non avertas faciem Christi tui*; sic in prima epistola B. Petri Apostoli cap. 2. v. 16. *Quasi liberi, et non quasi velamen habentes malitiae libertatem, sed sicut servi Dei*; sic denique, ceteris omisiss, in Apocalypsi B. Joannis Apostoli cap. 7. v. 3. *Nolite nocere terræ, et mari, neque arboribus, quoad usque signemus servos Dei nostri in frontibus eorum*. Confert & illud S. Joannis Chrysostomi hom. 1. in epist. S. Pauli ad Rom. tom. 9. oper. pag. 429. ubi, illustrando prima illa Apostoli verba: *Paulus, servus Jesu Christi*, vocatus Apostolus, segregatus in Evangelium Dei, ait: *Christi verò servum se non sine causa dixit: multi namque sunt servitutis modi: alius secundum creationem de quo dicit: omnia servantur tibi; itemque: servus meus Nabuchodonosor, opus namque opifici servum est. Alius modus est a fide de qua ait: Gratia autem Deo, quia servi eratis peccato, obedistis autem ex corde in quam traditi estis doctrina formam, & liberati a peccato servi facti estis iustitia. Alius a vita instituto, de quo ait: Moyses servus meus mortuus est: quamquam & Judei omnes servi erant; sed Moyses in primis ex vita instituto splendebat. Quoniam igitur Paulus omnibus servitutis modis servus eras, dignitatis maxima loco ponit illud, servus Jesu Christi. Huc tandem referri possunt ea, quæ in historiis Ecclesiasticis leguntur de titulo Universalis Episcopi, qui, licet de jure soli Romano Pontifici debeatur, ut habetur in dictatu S. Gregorii VII. can. 2. (apud Christ. Lupum tom. 4. Synod. general. et provinc. pag. 344.) Quod solus Romanus Pontifex jure dicatur Universalis; ob modestiam tamen a S. Gregorio Magno fuit in ejus locum pro se, & Successoribus suis subrogatus*

gatus hic alius, *Servus Servorum Dei*, hoc est eorum, qui Fide, morum integritate, & Christianarum virtutum exercitatione Domino Deo nostro dulci inserviunt servitute; juxta illud S. Augustini in *psalm.* 99. num. 7. et 8. col. 1075. tom. 4. oper. *Servum te charitas facias, quia liberum te veritas fecit. Si manseritis (inquit) in verbo meo, vere discipuli mei estis, et cognoscetis veritatem, et veritas liberabit vos. Simul es & servus, et liber. Servus, quia factus es; liber, quia amaris a Deo, a quo factus es .... Noli servire cum murmure; non enim id agunt murmura tua, ut non servias, sed, ut malus servus servias. Servus es Domini, libertus es Domini; non te sic queras manumitti, ut recedas de domo manumissoris tui. Servite Domino in jucunditate. Plena erit illa et perfecta jucunditas, cum corruptibile hoc induerit incorruptionem, et mortale hoc induerit immortalitatem.*

4 Servus itaque Dei, ut vidimus, dicitur ille, qui moritur cum fama sanctitatis; *Venerabilis* autem *Dei servus* ille vocatur, cujus sanctitatis fama judiciali jure probata est, veluti adnotavit Blasius a Purificatione in tract. de adoratione disput. 8. dub. 5. §. 3. num. 67. Sciendum est autem, nomine venerabilium virorum nos intelligere eos, de quibus insignis fama sanctitatis eorum loquatur, ita ut non sufficiat qualibet opinio, quod virtutibus et miraculis clauerint: & ita quidem, stricte loquendo, venerabiles *Dei servi* sunt illi, secundum consuetudinem Congregationis sacrorum rituum, in quorum Beatificationis & Canonizationis causis commissio introductionis signata est; non signatur enim commissio, nisi judiciali more contiterit ex processu auctoritate ordinaria confecto de fama sanctitatis & miraculorum. Dictum est nempe, stricte loquendo, venerabiles *Dei servos* appellari illos, in quorum Beatificationis & Canonizationis causis commissio signata est: quandoquidem, late sumpto hoc titulo cohonestati aliquando fuerunt in historiis, etiam Romæ typis impressis, plerique viri cum sanctitatis laude defuncti, præsertim vero qui, dum viverent, characterē Episcopali, aut sacerdotali fuerant insigniti, etsi nunquam causæ Beatificationis, aut Canonizationis ipsorum fuerint introductæ, vel fuerit signata commissio, nisi longe post editas de ipsorum gestis & virtutibus historias; quemadmodum demonstrari posset pluribus exemplis, si id opportunum judicaretur: comprobari autem potest auctoritate Cardinalis Baronii, qui ad an. 731. num. 26. loquens de titulo *Venerabilis*, quo Beda insignitus est, & de quo mox habebitur sermo, sic ait: Porro ista quidem vel ex eo saltem erroris redarguuntur, quod ejusmodi titulus, *Venerabilis*, communis aliqui Presbyteris omnibus, incognitis Majoribus fuisse videtur, qui eundem Bedam non isto, sed alio titulo nominarunt.

5 Beda igitur Presbyter Anglicanus nomen *Venerabilis* habet in Martyrologio Romano ad diem 27. *Maji*; ad quem locum hæc scribit Cardinalis ipse Baronius in notis: Hunc ab aliquibus inconsulte nimis putatur ob id, quod *venerabilis* dictus reperitur a nonnullis, sanctum dici non debere. Sane quidem sanctitatis titulo ornaverunt eum Majores. Ab illudino clarissimo viro in  
areo-

areopagitici Bedæ sanctus Presbyter dictus habetur. Marianus Scotus scriptor non ignobilis, qui ante quingentos annos vixit, lib. de sexta ætate, anno Dom. 678. hæc ait: Sanctus Bedæ Presbyter Anglicus Computator his temporibus clarus habetur. Aniles autem nonnullæ fabulæ referuntur de titulo Venerabilis, quo Bedæ fuit decoratus. Petrus etenim de Natalibus in catalogo Sanctorum lib. 5. cap. 55. narrat, Bedæ discipulum, ipso defuncto, voluisse titulum sepulcro imponere; cum vero, incepto leonino carmine: *Hæc sunt in fossa*, finire vellet, *Bedæ Sancti, vel Presbyteri ossa*, nec metrum stare posset, & aliud quidem vocabulum eidem minime occurreret, tædio affectum somno denique correptum fuisse, tum expergesfactum mane in tumulo Angelicis manibus insculptum sequens carmen reperisse: *Hæc sunt in fossa Bedæ venerabilis ossa*. Sed hanc narrationem irridet Trithemius lib. 2. de viris illustr. Ord. S. Bened.; & argumentum ipsum latius persequitur Card. Baronius in notis ad Martyrol. Rom. ad cit. d. 27. Maji. Quocirca Bollandiani in vita Bedæ ad dictam diem 27. pag. 718. tom. 6. ita de ejus titulo Venerabilis locuti sunt: Factus Angliæ splendor singularis pietate & eruditione, cognomen Venerabilis est adeptus, eo potissimum, quod ipsius homilia in Ecclesia recitarentur, cum aut adhuc viveret, aut certe necdum esset catalogo Sanctorum inscriptus; si tamen antiquus iste titulus est, de quo, propter vetustiorum Scriptorum silentium, merito dubitas Baronius; majori etiam merito rejiciens aniles fabellas, quæ tali appellationi occasionem dedisse finguntur, nec dignæ sunt hoc loco referri. Iis consentit Magister Richardus Ord. Prædicat. dum viveret, sacri palatii Apostolici Magister & Consultor Congregationis sacrorum rituum, qui sub Urbano VIII. una cum aliis doctis viris plurimum laboravit pro correctione Breviarii Romani, in suo opere de litanis Beatiss. Virginis; eumque sequitur Episcopus Sarnellus in sua epist. 1. tom. 2.

6 Cognomine insuper Venerabilis aliquando summi Pontifices, aliquando Episcopi, aliquando Principes Catholici, aliquando etiam Martyres vindicati fuerunt appellati. Quoad summos Pontifices, id comprobatur ex Synodo Romana sub Hilario Papa, (tom. 2. collect. Harduin. col. 799.) *Presidente viro venerabili Hilario Papa in basilica B. Maria: & ex alia Synodo Romana sub Bonifacio II. (cit. tom. col. 1111.) Presidente venerabili viro Papa Bonifacio*. Quoad Episcopos ostenditur id ipsum in Collatione prima Carthaginensi Catholicorum cum Donatistis cap. 62. (tom. 1. cit. collect. col. 1072.) ubi Marcellinus Judex Episcopos alloquens ait: *Illud autem est, quod per vestram venerabilitatem scire desidero*. Quoad Principes Catholicos, res est comperta ex epistola Hadriani I. adversus Elipandum, (ejusdem collect. tom. 4. col. 865.) quæ lecta fuit in Synodo Francofordiensi anni 794. in qua sermonem habendo de Caroli Magni zelo adversus Hæreticos, ait: *Dilectissimus Filius noster, & spiritualis compater Dominus Carolus Magnus & venerabilis Princeps*. Quoad Martyres tandem vindicatos argumentum desumitur ex Constitutione Marciani Imperatoris, in qua obsecutus Concilio Chalcedonensi, quod Flavianum Patriarcham decreverat tam-

tamquam Martyrem esse colendum, & revocans Constitutionem Theodosii, qui Aulicorum potentia irretitus, edicto publico proposito, Concilium Ephesinum sub Dioscuro habitum, & Flaviani damnationem approbaverat, subdit : (*cit. collect. Harduin. tom. 2. col. 675.*) Ergo, quoniam venerabilis recordationis Flavianus tanto ac tali decoratus est testimonio .... aboleatur illa Constitutio, qua sceleratorum subreptione post obitum sanctæ memoriæ Flaviani adversus eum lata cognoscitur. In jure item civili Ecclesiæ, nosocomia, orphanotrophia, & alia id genus dicuntur domus venerabiles, ut habetur in l. 22. *Sancimus, res ad venerabiles Ecclesias, vel xenones, vel monasteria, vel orphanotrophia &c.* et in l. 23. *C. de sacrosanct. Eccles.* ubi : *Sancimus, si quis aliquam reliquerit hereditatem, vel legatum, vel fideicommissum, vel donationis titulo aliquid dederit vel vendiderit sive sacrosanctis Ecclesiis, sive venerabilibus xenonibus &c.* Leges etiam veneranda dicuntur in l. 1. *C. de bonis, qua liberis : Cum veneranda leges vetuerint &c.* Veneranda quoque dicitur respublica in l. *Quo reipublica ff. de injuriis* : & demum veneranda appellatur senectus, hoc est cultu digna atque veneratione, in l. *Semper ff. de jure immunit.* Quæ tamen dicta sint extra rem, cum præsentis capitis argumentum ad titulum *Venerabilis* restringatur intra terminos consuetudinis Congregationis sacrorum rituum.

7 Tituli porro *Beati* & *Sancti* nonnumquam promiscue adhibentur. Ecclesia namque Deiparam Virginem Mariam interdum *Sanctam* appellat : *Sancta Maria, succurre miseris ; Sancta Maria, ora pro nobis* : interdum appellat *Beatam* ; *Concede, nos famulos &c. et gloriosa Beata Maria semper Virginis intercessione &c.* Quo referri potest & id, quod legitur in confessione : *Confiteor Deo omnipotenti, B. Maria semper Virgini, B. Michaeli Archangelo, B. Joanni Baptista, SS. Apostolis Petro et Paulo, et omnibus sanctis* ; atque id etiam, quod habetur in *can. Non nos Beatum Petrum, dist. 40.* Utque cetera prætereantur, tum in Martyrologiis, tum in singulis sere paginis codicis Carolini summi ipsi Pontifices Petrum Apostolorum Principem, Hilarium, Candidum, Chrysogonum, Silvestrum, Augustinum, aliosque hujus meriti Cælites nequaquam *sanctos* appellant, sed *beatos* : quemadmodum erudite de more adnotavit Justus Fontaninus in sua dissertatione *de S. Petro Ursoleo num. 25.* Verum, juxta consuetudinem sanctæ Sedis, & Congregationis sacrorum rituum, *Beatus* dicitur ille Dei servus, qui Beatificationem obtinuit, sive formalem, sive æquipollentem ; *Sanctus* autem ille, qui fuit canonizatus alterutro ex modis supra explicatis. In sacris litteris Deus dicitur *Sanctus*, uti constat *ex 1. Reg. cap. 2. v. 2.* *Non est Sanctus, ut est Dominus* : Deus etiam vocatur *Sanctus Sanctorum* ; & ipsa Ecclesia de Deo dicit : *Tu solus Sanctus.* Deus enim Sanctus est substantialiter, ita ut in eo vox *Sanctus* ejus substantiam significet, idest sanctitatem per essentiam, seu sanctitatem essentialem, secundum doctrinam Theologorum cum D. Thoma 1. *part. qu. 13. art. 2.* Et hac quidem de causa Dei sanctitas est ordinis superioris, cum a se ipso sanctitatem habeat : creaturæ

ereaturæ autem sanctæ sunt ex accidenti, & in eis non est idem sanctitas, ac essentia, sed sanctitatem habent participatam, sortuitam, & quæ ex sua ratione deficere potest; adeo ut, cum indeficiens sit in Comprehensoribus, seu Beatis, id tantum sit causa status eorundem. Christus quoque in sacris litteris appellatur *Sanctus Sanctorum*, & de eo pariter dicitur *Daniel. cap. 9. v. 24. Et ungatur Sanctus Sanctorum*. Est scilicet Christus *Sanctus Sanctorum*, & quatenus Deus est, & quatenus homo est: quatenus nempe Deus est, sicuti modo explicavimus; quatenus autem homo est, primo quia ex Spiritu Sancto conceptus fuit, unde Gabriel dixit Mariæ Virgini *Luc. cap. 1. v. 35. Spiritus Sanctus superveniet in te, & virtus Altissimi obumbrabit tibi; ideoque, quod nascetur ex te Sanctum, vocabitur Filius Dei*; secundo, ob unionem personalem Verbi Divini cum natura humana; tertio, quia caput est totius Ecclesiæ, accepitque sanctitatem non solum pro se, sed etiam pro omnibus & ad omnes transfundendam, fuitque causa exemplaris & meritoria omnis sanctitatis; quarto, quia habuit gratiam ingentiam, seu, ut ajunt, habitalem sanctificantem, summam, & quasi infinitam, continentem omnem vim & efficaciam gratiæ: non enim ad mensuram dedit Deus ei Spiritum, ut ait Joannes *cap. 3*; denique Sanctus est Christus super omnes, quia non est factus Sanctus ex non Sancto, sed semper fuit Sanctus ab initio. Olim demum in ipsis sacris litteris Christiani appellati fuerunt *Sancti*. Apostolus quippe ad Romanos Christianos scribens ait *cap. 1. v. 7. Omnibus, qui sunt Romæ, dilectis Dei vocatis Sanctis*; & *cap. 15. v. 21. Proficiscar in Jerusalem ministrare Sanctis*; item *epist. ad Philip. cap. 4. v. 22. Salutans vos omnes Sancti*; demum *cit. cap. v. 21. Salute omnem Sanctum*. Apud Lucam pariter in *Actis Apostolor. 26. v. 10. legitur: Multos Sanctorum ego in carceribus inclusi*; & ibidem *cap. 9. v. 32. Factum est autem, ut Petrus, dum pertransiret universos, deveniret ad Sanctos, qui habitabant Lydda*. Omnes tandem, qui in gratia Dei moriuntur, & vitam consequuntur æternam, *Sancti sunt*, & *Sancti* nuncupari possunt. Præsens vero inspectio eos tantummodo respicit, qui juxta communem Ecclesiæ intelligentiam eminentiori, dum viverent, & probatori fulserunt morum sanctitate, & post obitum gratia miraculorum claruerunt: quique idcirco in catalogum illorum relati sunt, quos veneratione & cultu præ aliis dignos Ecclesia judicavit. De *Divi* nomine nullum a nobis fit verbum, cum illud non Ecclesiasticum, sed profanum sit: quocirca venerabilis Dei servus Cardinalis Bellarminus in recognitione suorum librorum *sub initio to. 1. hæc habet: Ego enim nunquam probavi vocem Divus, vel Diva, cum de Sanctis agitur*; tum quod eam vocem apud Latinos veteres Patres non inveniam; tum quod apud Ethnicos Divi nomen Diis tantum tribui soleat. Itaque ubicunque in libris meis lector inveniet *Divum*, sciat, vel mihi imprudenter excidisse, vel, quod sæpius accidit, me scripsisse *Beatum*: Sed typographi ubi legerint *B. quod Beatum significat*, illud in *D. mutarunt, & sic ex Beato Divum effecerunt*.

8 His explicatis, in eo, quod attinet ad actus cultus exhibendos Dei servis post eorum Beatificationem, nulla videtur aptior regula excogitari posse, quam ut, si sermo sit de Beatis, qui sunt in antiquissima & immemorabili cultus possessione, illi actus eis exhibeantur, qui per longissimum & immemorabile tempus, cum scientia & tolerantia Ordinarii, aut Sedis Apostolicæ præfati eidem fuerunt. Urbanus enim VIII. in suis decretis protestatus est, se nullum velle præjudicium afferre horum Beatorum cultui, quemadmodum late suo loco explicabitur, & doctè atque latissime ostendit bon. mem. Fatinellus de Fatinellis, vir, dum viveret, amicitia nobis conjunctus, & aulæ Romanæ Præsul utriusque Juris peritissimus *tom. 2. resp. 3. num. 6.* Si vero verba sint de servis Dei beatificatis ex Indulto sacræ Congregationis rituum, aut summi Pontificis, non alii poterunt erga eos haberi venerationis actus, quam qui in Indulto ipso nominatim designantur, quorumve in posterioribus Indultis facta est recens concessio antiquiorem innovans cultum. Id autem clarius fiet exemplis. Scribentes de materia Beatificationis & Canonizationis quærent, quo tempore fieri cœperint servorum Dei Beatificationes a Romanis Pontificibus. Circa quam quidem quætionem, si ea intelligenda sit de Beatificationibus, hoc est de cultu ab Episcopis decreto in suis diocesis in honorem alicujus Dei servi sive Confessoris, sive Martyris, implorata pro actus approbatione & confirmatione summi Pontificis auctoritate, salvo tamen & integro Episcopali jure de cultu ipso in suis diocesis concedendo ad eorum decus, de quorum virtutibus, & miraculis, aut gloriosa pro Christo morte certiores facti fuerant; refumi poterunt ea, quæ in superioribus fusc dicta sunt de Pontificæ auctoritatis interventu in cultu decernendo sive pro universali, sive pro particularibus Ecclesiis: sed, si eadem quæstio versetur circa Beatificationes factas a Romanis Pontificibus, postquam Sedi Apostolicæ harum causarum cognitio & decisio privative delata est, Baillet in *presat. ad vitas SS. part. 2. num. 99.* ait, Beatificationes a summis Pontificibus fieri cœpisse, cum mos introductus est protrahendi in longiora tempora Canonizationes; alii autem putant, Beatificationis initium referendum esse ad tempus summi Pontificis Gregorii X. qui concessit, ut corpus B. Luchesi processionaliter deferri posset, ut in superioribus pariter visum est.

9 Verum, utcumque hæc sint, ad Alexandri III. summi Pontificis tempora referenda utique esse videntur ex alibi dictis hujusce Beatificationis initia; ad ea videlicet tempora, circa quæ cessavit ut plurimum jus Episcoporum decernendi cultum servorum Dei in suis diocesis, quod est idem, ac dicere, beatificandi. Prodest enim apprimè exemplum supra recensitum cultus ab Alexandro concessi erga B. Guillelmum a Malavalle; ita ut, cum viderimus, ejusdem quoque Alexandri tempore Paschalem III. Antipapam corpus elevasse Caroli Magni, mirum profecto sit, juris canonici Interpretes in *commentariis ad cap. Audivimus. de Reliq.*

& ve-



& venerat. SS. explicantes differentiam inter Beatificationem, & Canonizationem, meminisse quidem elevationis corporis Caroli Magni, at silentio tamen præteritis gesta Alexandri III. erga B. Guillelmum.

10 Alexandri III. Successores plures alias deinde expleverunt servorum Dei Beatificationes, in quibus modo indulserunt unam cultus speciem, modo aliam. Quocirca scite dictum est, Beatificationem esse facultatem, ut in aliquo ut plurimum speciali loco Dei servus per publicam aliquam venerationem colatur appellatione Beati; hoc est vel per celebrationem diei festi in ejus honorem, vel per ejus commemorationem in Divinis Officiis, aut per recitationem Officii & Missæ de Communi celebrationem, aut per ejusdem Officii cum particularibus lectionibus recitationem, Missæque celebrationem, juxta placitum summi Pontificis concedentis unum, vel plura, sive omnia simul. *Matta de Canonizat. SS. part. 1. cap. 2. num. 15. & Castellin. de certit. glor. SS. cap. 2. punct. 1. num. 2. atque in tract. de dilat. Canoniz. in animadvers. general. num. 2. pag. 76.*

11 Hinc videmus, Honorium III. permisisse Molisimensibus, ut Robertum Abbatem Molisimensem fundatorem Ord. Cisterc. tamquam Sanctum in sua ecclesia venerantes, ejus apud Dominum suffragia fideliter implorarent, sicuti ex illius litteris Apostolicis supra citatis apud Bollandianos *tom. 3. Aprilis pag. 668.* Gregorium X. veluti supra dictum est, concessisse, ut corpus B. Luchesi processionaliter deferri posset, quemadmodum est apud eosdem Bollandianos *ad diem 28. Aprilis*: Eugenium Papam IV. insigni miraculo permotum intercessione tunc servi Dei, nunc sancti Andreæ Corsini patrato, solemnem instituisse in civitate Florentina processionem, in qua ejus corpus delatum est; & celebrari jussisse in ecclesia Carmelitarum solemnem Missam de SS. Trinitate, teste Petro Andrea de Castaneis in *vita dicti Sancti*: Leonem X. Religiosis Ord. Frem. S. Augustini indulgisse, ut in suis templis & sacellis depictam venerari possent imaginem B. Veronicæ de Binalco, sicut ex ejus litteris Apostolicis apud Bollandum *tom. 1. mensis Januarii pag. 839.* Netinis vero in Sicilia concessisse, ut festum celebrare possent in honorem B. Conradi Placentini, juxta documentum relatum apud VVadingum *tom. 8. pag. 67.* & juxta alia in superioribus exposita; Minoribus item Observantibus concessisse, ut in ecclesia sui Ordinis, in qua colebatur magna veneratione Jacobus de Marchia, nunc inter Sanctos relatus, qualibet die post Completorium, aut alia hora diei, prout Guardiano pro tempore existenti visum fuisset, processionaliter ad ejusdem Jacobi sepulcrum accedere possent, cantando hymnum cum versiculo & oratione in ejus honorem, uti constat ex illius Pontificis litteris Apostolicis typis impressis in vita memorati S. Jacobi edita Romæ occasione Canonizationis ejusdem anno 1726. concessisse deum, ut in civitate & territorio Mantuano in primis, & secundis Versperis, & aliis Divinis Officiis fieret commemoratio B. Hofannæ de Andreamis Monialis Ordinis de Pœnitentia S. Dominici, sicut infra etiam di-

ceetur : sanctum Pium Papam V. consimilem fecisse concessionem Abbatissæ , ac Monialibus monasterii S. Mariæ Magdalensæ civitatis Albæ Ordinis S. Dominici pro B. Margarita de Sabaudia olim Marchionissa Montis Ferrati, necnon Monialibus monasterii civitatis Perusinæ sub Invocatione B. Columbæ de Reate Ord. S. Dominici in honorem ejusdem Beatæ, quemadmodum ex litteris Apostolicis , aliisque monumentis habetur apud Castellanum *de certis. glor. SS. pag. 486. et 487.* Summum denique Pontificem Paulum V. anno 1605. benigne indulsisse, ut imago Stanislai Kotskæ, nunc inter Sanctos relati, exponi posset in templo supra ejus sepulcrum una cum votivis donariis, & addita lampade ardente ad sacra ejus lipsana; idque pariter præstitisse erga Aloysium Gonzagam, qui jamdiu & ipse Sanctorum albo est adscriptus; uti late probatum fuit in processibus confectis super eorum Canonizatione, atque ut narratur in compendio vitæ, virtutum, & miraculorum, necnon Actorum in eorum causis ex Secretis Congregationis sacrorum rituum edito, cum ipsæ eorundemmet causæ essent in sacro Consistorio proponendæ.

12 Sed plura sane volumina edenda essent, si referri deberent concessiones omnes hujusce generis factæ a Romanis Pontificibus; & eo magis, si aliæ essent superaddendæ de Officio, ac Missa recitandis, & celebrandis in honorem Beatorum. Veruntamen huc usque adducta sufficere debebunt, ut ostendatur, modo unius modi, modo alterius, modo plurium fieri a Romanis Pontificibus concessionem in Beatitatis Indultis. Quod si nunc unius quidem, nunc autem alterius modi, nunc plurium in dictis Indultis fit concessio; nemo est, qui non videat, usum concessioni debere esse concordem, atque adeo usum ipsum magis amplum nequaquam esse debere, quam sit concessio, cum legitimus sine concessione esse non possit.

13 Confirmatur id ipsum ex decreto sacræ Congregationis rituum. In Congregatione quippe generali habita die 5. Octobris anni 1652. ut adnotatur in regeſtis, declaratum fuit, non esse permissum Religiosis, etiamſi sint Soc. Jesu, excedere in cultu Beatorum limites verbales Brevium, in quibus illi declarati fuerunt Beati; præsertim vero, cum agitur de celebratione Missarum & recitatione Officiorum. En verba decreti: *Sacrorum rituum Congregatio die 5. Octobris 1652. censuit et declaravit, si Sanctissimo D. N. placuerit, non potuisse, nec posse tam Seculares, quam Regulares cujuscunque Ordinis, & Instituti, etiam Soc. Jesu, excedere limites verbales Indultorum Sedis Apostolicæ super Beatificationibus, præsertim in celebratione Missarum & Officii cum Octavis, nisi hoc expresse Sedes Apostolica eis indulserit: & facta relatione per me Card. Cornelium Episcopum Albanensem 16. Decembris 1652. Sanctitas sua approbavit, & sic, ut præmittitur, servari mandavit.* In Congregatione etiam habita die 19. Februarii 1658. coram felicis recordationis Alexandro VII. sicuti etiam adnotatum est in regeſtis, statutum fuit, Beatis titulum Sancti tribui non posse, & eorum capita radiolis quidem, sed non diademate posse ornari. Anno tandem 1659. & anno sequenti

sequenti 1660. ab eodem Pontifice Alexandro VII. prævio consilio Congregationis sacrorum rituum, edita sunt decreta super cultu Beatis necdum canonizatis præstando, una cum quibusdam declarationibus ad eademmet decreta; quæ omnia operæ pretium esse existimavimus in præsentī capite integre referre.

## D E C R E T U M

*Super cultu Beatis adhuc non canonizatis præstando, a sacrorum rituum Congregatione ordinaria habita coram SS. D. N. Alexandro Papa VII. emanatum.*

**A**D aures Eminentiss. Patrum Congregationis sacrorum rituum plures deveniunt, qui patrantur, Indulgentiarum excessus in materia præstationis cultus Beatis adhuc non canonizatis.

Quamobrem eos eliminare, ac, ne in futurum inducantur, providere studentes, ad infra-scripta deveniunt decreta &c.

I. Quod eorundem Beatorum imagines, etiam non principaliter, & uti supplices appositæ, simulacra, picturæ, tabellæ, aut scripturæ eorum præclara gesta representantes aut referentes in ecclesiis, sacraliis, & oratoriis quibuscumque, & præsertim in quibus Missæ sacrificium, vel alia Divina Officia peraguntur, inconsulta Sede Apostolica, nullo pacto exponantur.

II. Quod, ubi indultum fuerit per Sedem Apostolicam, imagines, simulacra, pictasque tabellas in ecclesiis poni & coli posse, in pariete tantum, non autem super altari collocandi facultas tributa censeatur.

III. Quod si concessa fuerit per eandem Sedem Apostolicam altarium erectio, non tamen ob id Missam, & Officium de prædictis Beatis celebrandi, vel recitandi facultas tradita presumatur; etenim specifica & expressa concessio super his præcedere debet.

IV. Ubi in uno loco cultus fuerit concessus, non extendatur, inconsulto Pontifice, ad alium locum, quavis alia concurrente auctoritate.

V. In locis, ubi Beatos prædictos ab omnibus coli permissum fuit, non inde publica Officii recitatio permittitur, sed tantummodo privata; nec satisfactoria præcepto recitationis, nisi quoad illos, quibus Sedes Apostolica de hoc indulserit.

VI. Missæ pariter, quæ fuerint indultæ certis personis, nempe Presbyteris Regularibus, vel Secularibus alicuius loci, vel monasterii, seu Presbyteris alicuius ecclesiæ servitio præcipue addictis, a consuetibus Sacerdotibus quavis dignitate, etiam Cardinalatus, insignitis minime celebrentur.

VII. Dies festi in Beatorum eorundem memoriam non celebrentur, nisi speciali Indulto Apostolico provisorio fuerit.

VIII. Eorundem nomina in kalendaris non apponantur, nisi illius tantum loci, earumque personarum, in quo, & a quibus cultus cum Officio & Missa celebretur.

IX. In

IX. In quibusvis ecclesiasticis precibus, etiam in oratorii privatis recitandis, particularia eorundem suffragia non apponantur, vel recitentur.

X. Publicis in precibus, præter indultas & a Sede Apostolica approbatas, iidem Beati non invocentur.

XI. Eorundem Reliquia in processionibus minime circumferantur.

Sacra tamen Congregatio præsentibus declaratione & iussione remove non intendit cultum Beatis per communem Ecclesia consensum, vel per immemorabilem temporis cursum, aut per Patrum, virorumque sanctorum scripta, vel temporis centum annorum metam excedentis scientiam, ac tolerantiam Sedis Apostolica, aut Ordinariorum hætenus præstitum, ac certis modo & forma ab eo tempore eis exhibitum. Verum, si a centum annis citra cultus huiusmodi aliqua ex parte constiterit auctus & extensus, eo casu sacra eadem Congregatio eundem in pristinum reduci iubet; prout quemvis cultum extra casus prædictos ad expressa tantum verbaliter in Apostolicis Indultis omnino revocari mandat, sub poenis &c.

Firmis quoque remanentibus decretis, nempe, ne Beati in Patronos eligantur, ne eorum natalitia cum Octavis celebrentur, & aliis quibuscumque a sacra Congregatione hætenus emanatis, qua præsentis decreto renovantur.

His autem Sanctissimo relatis, et in Congregatione sacrorum rituum ordinaria habita coram Sanctitate sua per Eminentiss. et Reverendiss. D. Card. Sacchetti accurate perlectis, mature discussis, Sanctitas sua ea approbavit, et pro omnimoda eorundem observatione mandavit, typis imprimi, ad valvas affigi, et publicari, ut, elapso tempore sex mensium a die publicationis eorundem, omnes et singulos afficiant et arceant, ac si omnibus et singulis eadem exhibita, vel personaliter præsentata, intimata, seu notificata fuissent. Indultisque locorum Ordinariis, ut auctoritate Sedis Apostolica possint, immo debeant Saculares, et Regulares quoscumque, quantumvis exemptos, etiam Societatis Jesu, S. Antonii Viennen. et S. Joannis Hierosolymitani, ac reliquos omnes speciali expressione indigentes, etiam sub censuris compellere.

Cumque aliqui nulli subdantur Episcopo, qui eos, si exceßerint, coercere valeat; eo casu a Sedis Apostolica Nuntiis, si aderint, sin minus ab Archiepiscopis, in quorum provinciis, vel ab Episcopis Romano tantum Pontifici subjectis, intra, vel prope quorum diocesis limites eorum ecclesia, vel monasteria sita fuerint, samquam a Sede Apostolica delegatis ad huiusmodi decretorum observationem prædicti omnino cogantur: Die 27. Septembris 1659.

## DECLARATIO DECRETI

Super cultu Beatis adhuc non canonizatis præstando.

**A**llatis ad sacrorum rituum Congregationem dubiis circa observationem, et intelligentiam decreti super cultu Beatis adhuc non canonizatis præstando editi die 27. Septembris 1659. et publicati 3. Februarii præsentis anni 1660.

Primo: An, ubi indultum fuerit, ut Missa de aliquo Beato celebretur, liceat  
ejus

*eius imaginem, et simulacrum super altari exponere, necnon votivas tabellas ibidem appendere.*

*Secundo: An s. Dies festi in Beatorum honorem non celebrentur, extendatur ad festa devotionis.*

*Tertio: An Indulta recitandi Officium cum Octava, vel sine Octava, et celebrandi Missam de Beatis fuerint revocata per dictum decretum sacra Congregationis.*

*Quarto: An in ecclesiis, in quibus Officium, et Missa de Beatis recitari, ac respective celebrari possunt, liceas eorum Reliquias exponere.*

*Quinto: An Episcopi Regulares, qui ex Indulto Sedis Apostolica gaudent privilegiis sue Religionis, de quibus sunt capaces pro eorum conditione, possint de Beatis sue Religionis recitare Officium, & in propriis Cathedralibus Missam celebrare & altare Beatis prædictis erigere.*

*Sacrorum rituum Congregatio respondit*

*Ad primum affirmative,*

*Ad secundum negative,*

*Ad tertium pariter negative,*

*Ad quartum affirmative,*

*Ad quintum negative*

*Die 17. Aprilis 1660.*

## C A P U T XXXVIII.

*De actibus cultus Beatis post Canonizationem exhibendis.*

**S**eptem sunt honores, sive actus cultus, qui Beatis in Sanctorum album relatis deferuntur. Primus est, quod Canonizati inscribuntur in catalogo Sanctorum; hoc est definitur & præcipitur, ut ab omnibus Christifidelibus publice habeantur & dicantur Sancti. Secundus est, quod invocantur in publicis Ecclesiæ precibus, & in aliis orationibus, quæ sunt nomine totius Ecclesiæ: nec enim licet pro eis orare; quocirca alibi ex Innocentio III. *in cap. Cum Martha. de celebrat. Missar.* animadversum est, quod, quando in aliquibus orationibus continetur, *prosit, vel proficiat huic Sancto, vel illi talis oblatio ad gloriam et honorem;* hæc, & similia debent intelligi, ut oblatio ad hoc prosit, ut magis magisque a Fidelibus glorificetur in terris. Ita pariter, cum in Officio Syriaco, in Liturgia Nestorii, & in Canone Æthiopum primum Sancti, postea defuncti commemorantur, quibus omnibus Presbyter quietem precatur, animadvertendum est, quod, quatenus in aliis Liturgiis, & Officiis duæ illæ commemorationes distinctæ sunt & divisæ, ita ut in prima, quæ est Sanctorum, Sacerdos a Deo postulet, ut illorum exemplo Fideles ad virtutem accendantur, & precibus obtineant, quod petunt; in secunda autem commemoratione, quæ est mortuorum, Presbyter a Deo precetur, ut eis

ut eis peccata dimittat, atque præmia æterna concedat; & inter has quidem duas commemorationes veteres codices exhibent Diaconi preces vel integras, vel primis tantum vocibus designatas; verisimile admodum est, errore librariorum factum fuisse, ut duæ illæ commemorationes, demptis Diaconi precibus, in unam coaluerint. Consulatur Renaudotius *Liturg. Orient. tom. 1. pag. 505. et 528. et tom. 2. pag. 98. 99. 327. 332. 633. 645.* Tertius est, quod in eorum memoriam, honorem, & gloriam templa & altaria eriguntur, & Deo dicantur. Quartus, quod tum sacrificium Missæ in eorum honorem solemniter offertur: quapropter Actione decima Concilii Chalcedonenfis (*tom. 2. collect. Harduin. col. 519.*) inter ceteras adversus Ibam propositas accusationes oppositum fuit, quod die Martyrum natali vinum non præparaverat pro sacrificio, & pro distributione, quæ populo fieri debebat. *Non est datum vinum ad sacrificium altaris, ad sanctificationem, & populi distributionem, nisi admodum exiguum & vitiosum ac lutosum & quasi eo tempore vindemiatum; ut ex hoc cogerentur, qui deputati fuerant ministrare, de taberna sex omnino insectos comparare sextarios, qui nec sufficerent: tum Officium, seu Horæ canonicæ publice in ecclesiis cantantur, exempli gratia, si sit Martyr, Officium de Martyre, si Confessor, de Confessore, si Virgo de Virgine; ideoque Patres Concilii Tridentini sess. 22. de sacrificio Missæ cap. 3. sic locuti sunt: Et, quamvis in honorem & memoriam Sanctorum nonnullas interdum Missas Ecclesia celebrare consueverit, non tamen illis sacrificium offerri docet, sed Deo soli, qui illos coronavit; unde nec Sacerdos dicere solet, Offerro tibi sacrificium, Petre, vel Paule, sed Deo, de illorum victoriis gratias agens eorum patrocinia implorat, ut ipsi pro nobis intercedere dignentur in calis, quorum memoriam facimus in terris.* Quintus est, quod dies festi in eorum anniversariis ad eorum memoriam celebrantur. Sextus, quod pinguntur eorum imagines additis quibusdam radiis, seu lumine, & cum scuto, seu diademate in signum gloriæ, quam habent in cælis, juxta doctrinam D. Thomæ in suppl. 3. part. quest. 96. art. 1. in corpore. Septimus denique honor est, quod eorum corpora, & Reliquiæ publice honorantur, & pretiosis thecis & capsis includuntur: uti late, septem hos honores recensendo, prosequuntur communiter Auctores, & signanter Cardinalis Bellarminus to. 2. lib. 1. de SS. beatif. cap. 7. Ceparius in directorio Canonizar. SS. lib. 1. cap. finali, Rocca de Canonizar. SS. cap. 38. Joannes Garzias in tractatu de Canonizar. SS. cap. 12. atque alii passim.

2. Quærenti autem primo, quis sit catalogus Sanctorum, in quo describitur Beatus, qui inter Sanctos refertur; vt nonnulli putant, responderi utique posset, catalogum illum esse Romanum Martyrologium. Verum responsum istud minime subsisteret, cum ex alibi videndis multorum simpliciter Beatorum nomina descripta sint in Martyrologio Romano. Quamobrem aptior videtur esse responsio data a Francisco Bivarío in commentar. ad chronicon M. Maximi in S. Joanne Eremita ab oblivione vindicato §. 4. ubi sic loquitur: *Nunc illud manifesta consecutione infero, quod erat in*  
votis,

*votis, scilicet Romanum Martyrologium tot Beatorum, & Sanctorum mixturis compactum nequaquam esse illum Sanctorum catalogum, cujus in eorundem Canonizatione fit mentio, utpote in quo soli rite Canonizati locum habeant; ut omit- tam, per accidens valde se habere ad Canonizationis essentiam, quod catalogus ille scriptus, vel excusus extet, necne; quamvis enim scriptus nunquam extitisset, aut in oblivionem hominum semel scriptus veniret, seu casu, aut sponte rumpere- tur, manerent nihilominus Sancti Sanctorum catalogo adscripti. Ergo neusiquam materialis, sed mentalis in corde & mente Ecclesie catalogus, in quo Sancti, cum canonizantur, adscribuntur, constituendus est; ut ea locutio nihil aliud sonet, quam numerum Sanctorum, quos ipsa Ecclesia, summo habito delectu, universis Fidelibus colendos supremis honoribus proponit.*

3 Quæres secundo, an omnium Beatorum, qui inter Sanctos, & Can- onizatos referuntur, recitandum sit Officium & Missa celebranda, ut in- dicari videtur in quarto cultus actu supra memorato. Porro huic quæsito responderetur, hodie vix contingere posse, quod aliquis Beatus inter Sanctos referatur, in cuius honorem Missa non celebretur, aut Officium non reci- tetur in determinatis aliquibus locis saltem de Communi. Cum enim, juxta præsentem disciplinam, non procedatur ad Canonizationem, nisi præcesserit Beatificatio aut formalis, aut æquipollens; & in Brevibus qui- dem Beatificationum formalium hodie semper detur facultas Missam cele- brandi & Officium recitandi in honorem Beati in definitis aliquibus lo- cis, idque ipsum sere semper fiat post Beatificationem æquipollentem, ut alibi constabit, maxime vero, quando causa properat ad Canonizationem; hinc est, quod modo monuimus, hodie scilicet vix posse contingere, ut in honorem Beati inter Sanctos relati in peculiaribus quibusdam locis mi- nime Missa celebretur, aut Officium recitetur.

4 Quocirca, ut in prædicto quæsito locus sit rationabili dubitationi, illud est intelligendum de Missæ celebratione & Officii recitatione in uni- versali Ecclesia, sive ad libitum, sive de præcepto: tum vero quæsito sic explicato respondebitur, Beatum inter Sanctos relatum sane in universa Ecclesia esse colendum, atque in ejus honorem in universa similiter Eccle- sia posse erigi templa & altaria; sed neque Missam in ejus honorem in uni- versa ipsa Ecclesia esse celebrandam, neque Officium esse recitandum, nisi id summus Pontifex indulgeat, vel præcipiat per decretum peculiare & separatum tum a sententia definitiva Canonizationis, tum ab ipsa Canoni- zationis bulla, etiamsi in utraque vel indultum quidem esset, vel esset præ- ceptum, ut Missa celebraretur & Officium recitaretur in ipsamet Eccle- sia universa.

5 Aliquid circa rem, de qua nunc agimus, supra tetigimus, cum in Canonizationis sententia versaremur. Reliquum igitur in præsens est, ut id ipsum demonstretur quoad ipsas Canonizationum bullas. Quo tamen in negotio prænoscere opus est, nonnullas esse bullas Canonizationum, in quibus nulla sit Officii mentio, sed solum præcipitur, ut memoria Sancti

affectu piissimo & devotione fidelissima colatur, ejusque dies anniversaria solemniter celebretur; nonnullas autem esse, in quibus fit utique mentio Officii, sed ex facultate tantum, non ex præcepto; alias demum Canonizationis bullas reperiri, in quibus præcipitur celebratio Missæ & præcipitur recitatio Officii in Ecclesia universali. Ad primam classem pertinent bullæ Canonizationum SS. Udalrici, Petri Episcopi Anagnini, Hugonis Episcopi Gratianopolitani, Henrici, Eduardi Regis Angliæ, Bernardi, Thomæ Cantuariensis, Ubaldi, Joannis Gualberti, Homoboni, Laurentii Archiepiscopi Dublinensis, Francisci, Antonii de Padua, Dominici, Elisabeth, Petri Martyris, Stanislai, Edmundi, Claræ, Richardi, Hedviggis, Ludovici Regis Franciæ, Petri de Morono, Ludovici filii Caroli Regis Siciliæ, Thomæ Episcopi Herfordiensis, Thomæ de Aquino, Ivonis, Nicolai de Tolentino, Bernardini Senensis, Vincentii, Catharinæ Senensis, Francisci de Paula, Thomæ de Villanova, Francisci de Sales, Petri de Alcantara, Rosæ Limanæ. Ad secundam classem attinent bullæ Canonizationum SS. Terefiæ, Philippi Neri, Ignatii Loyolæ, Francisci Xaverii. Ad tertiam tandem spectant classem bullæ Canonizationum SS. Birgittæ, Bonaventuræ, Bennonis, Antonini Archiepiscopi Florentini, Didaci, Hyacinthi, Raymundi, Franciscæ Romanæ, Caroli Borromæi.

6 At, siue in bulla Canonizationis mentio fiat Officii & Missæ per verba permittentia, siue per verba præcipientia, hoc unum certum est, id non sufficere, ut in Ecclesia universali Officium recitandum sit, utque Missa debeat celebrari: novum enim requiritur decretum, ut prædictorum executio fuscipi possit, sicuti sacrorum rituum Congregatio respondit apud Gavantum *in comment. ad rubricas Breviarii Rom. sect. 2. cap. 2. num. 30.* & quemadmodum in significatione concessionis per verba permittentia adnotavit Pasqualig. *de sacrif. novæ Legis tom. 1. quest. 268. num. 5. Quia, quando Pontifices in bullis Canonizationum concedunt, quod de Sancto canonizato recitari possint Officium et Missa, intelligunt quoad habilitatem, non quoad actum; declarans enim, esse talem, ut possit ipsi talis honor et cultus deferri &c.* Consuetudo autem & observantia declarat, quod, haud obstantibus bullis Canonizationum, etiam necessaria est specialis concessio Officii, ut recitari possit; veluti in significatione concessionis factæ per verba præcipientia late prosequitur Lezana *consult. 2. num. 5. et 6. tom. 4. oper. ubi, postquam retulit sententiam supra memoratam a summo Pontifice Urbano VIII. prolatam occasione Canonizationis S. Andreæ Corsini, hæc habet: Præmittendum secundo, quod nec de Sanctis canonizatis fieri potest Officium aut celebrari Missa sine novo decreto sacra Congregationis distincto a bulla seu decreto Canonizationis &c. non obstante, quod in bullis Canonizationis concedi solent generaliter facultas celebrandi Officium eorum quolibet anno in die obitus ipsorum, prout in instrumento Canonizationis S. Andreæ Corsini &c. Ratio vero hujus est, quia, quamvis ex vi decreti seu bullæ Canonizationis concedatur generaliter cunctis*



*cunctis facultas celebrandi Officium et festum Sancti canonizati, non tamen præscribitur ritus, quo celebrari debeat, an scilicet sub duplici, semiduplici &c. nec id exprimitur in rubricis Breviarii; et propterea necessarium est novum Papa decretum de tali ritu, quia, juxta cap. Gloriosus Deus. de Reliq. et venerat. Sanctorum, solus Papa potest unum Sanctum præ aliis extollere, ac proinde facere decretum de tali ritu . . . et ita praxi receptum est in tota Ecclesia, cum constet. non fieri generaliter ab omnibus Officia de Sanctis omnibus canonizatis, sed solum de aliquibus.*

7 Hinc, licet in bulla Canonizationis S. Bennonis, uti supra visum fuit, mentio fiat Officii & Missæ pro Ecclesia universali, & quidem per verba præcipientia; in Ecclesia nihilominus universali nec dictum Officium recitatur, nec Missa celebratur, non nisi quia secundarium illud decretum non fuit adhuc a Sede Apostolica obtentum. Hinc, etsi in bulla Canonizationis S. Antonini Archiepiscopi Florentini, ut in superioribus pariter monitum fuit, mentio fiat concessionis Officii & Missæ per verba præcipientia; ideo tamen tum Officium, tum Missa in Ecclesia universali recitatur, & celebratur, quoniam sacrorum rituum Congregatio die 17. Augusti 1687. concessit, ut posset Officium ipsum recitari & celebrari Missa sub ritu semiduplici ad libitum in Ecclesia universali juxta rubricas Breviarii & Missalis Romani ab omnibus utriusque sexus Christianis fidelibus tum Sæcularibus, tum Regularibus, qui ad Horas canonicas tenentur; quam postea concessionem die 2. Aprilis 1707. ampliavit, indulgendo, ut Missa, & Officium in Ecclesia universali celebraretur, & recitaretur sub eodem ritu semiduplici de præcepto. Similia contigerunt in recitatione Officii & celebratione Missæ ad honorem S. Didaci: quamquam enim in bulla Canonizationis, ut etiam supra dictum est, mandatum fuit, ut in Ecclesia universali fieret recitatio Officii, fieretque Missæ celebratio, per longum tamen temporis spatium post Canonizationem elapsam minime fuit in Ecclesia ipsa universali recitatum Officium, vel in honorem ejusdem S. Didaci Missa celebrata; sed, ut contenta in eadem Canonizationis bulla, inque alia simili Clementis VIII. ex sententia possent succedere, opus fuit, iterum ad sacram Congregationem confugere, quæ sane annuit petitis anno 1680: quemadmodum colligitur ex sequenti decreto: *‘Piis precibus Majestatis Catholicae Sereniss. Hispaniarum Regis per suas litteras SS. D. N. D. Innocentio Papa XI. porrectis per Excellentiss. D. Marchionem de Carpio ejusdem Majestatis Catholicae Oratorem, & per Sanctitatem suam ad sacrorum rituum Congregationem remissis, & in ea relatis ab Eminentiss. & Reverendiss. D. Card. Columna, instante pariter Rev. P. Petro Espovin Procuratore Generali Ord. Minor. de Observ. nomine sue Religionis, eadem sacra Congregatio benigne inclinata, pro concessione Officii & Missæ S. Didaci Confessoris Ordinis præfati. censuit, posse apponi in Calendario Breviarii & Missalis Romani sub ritu semid. de præcepto Officium, & Missam in posterum recitandam ac respective celebrandam quotannis die 13. Novembris in festo dicti Sancti ab omnibus*

et singulis utriusque sexus Christianis tam Secularibus, quam Regularibus, qui ad Horas canonicas obstricti sunt, in Ecclesia universali de Comm. Conf. non Pont., vigore Constitutionum Sixti V. in ejus bulla Canonizationis, et Clementis VIII. sub datum 26. Martii 1595. necnon mandavit, ut lectiones propria pro secundo Nocturno examinentur ab Eminentif. et Reverendis. D. Card. Casanate, non obstantibus animadversionibus Reverendis. Fidei Promotoris, si Sanctissimo D. N. placuerit: Hac die 7. Decembris 1680. Et, facto de predictis verbo cum Sanctissimo, Sanctitas sua benigne annuens, sensum ejusdem sacre Congregationis approbavit et confirmavit, die 19. Julii 1681. Neque dissimile est exemplum de S. Carolo Borromæo, in cujus quoque Canonizationis bulla præcipitur, ut Officium recitetur & Missa celebretur in ejus honorem: hæc quippe omnia nunc profecto efficiuntur, sed in sequelam decreti sacre Congregationis editi die 27. Septembris 1659. Ad preces sacri Eminentif. et Reverendis. Cardinalium Collegii SS. D. N. in Congregatione sacrorum rituum ordinaria habita coram Sanctitate sua mandavit, ut Officium S. Caroli Borromæi S. R. E. Presbyteri Cardinalis et Archiepiscopi Mediolanensis, de Comm. Conf. Pont., quod san. mem. Paulus V. ad libitum indulget, et san. mem. Innocentius X. ex præcepto sub ritu semiduplici recitari præcepit, in posterum ab omnibus Christianis, qui ad Horas canonicas tenentur, sub ritu duplici pariter ex præcepto recitetur, ac in Breviario Romano sub eodem ritu apponatur: Die 27. Septembris 1659. Denique, in sententia ab Urbano VIII. prolata in Canonizatione S. Andreæ Corsini licet præceptum fuerit, ut in Ecclesia universali fieret celebratio Missæ & recitatio Officii, fateamur tamen oportet, concessionem istam per longum temporis intervallum suo caruisse effectu. Anno namque 1666. sacrorum rituum Congregatio lectiones proprias et Orationem approbavit, atque permisit, ut ejus Officium recitaretur in Ecclesia universali sub ritu semiduplici ad libitum; tum die 31. Augusti 1697. gratiam ampliavit, ritum elevando a semiduplici ad libitum ad semiduplicem de præcepto; & tandem ad duplicem, ex decreto edito die 3. Januarii 1731. Hæc nimirum omnia plene demonstrant, quod, si in bulla Canonizationis fiat concessio Officii & Missæ per verba permittentia, si per verba præcipientia, semper juxta normam et consuetudinem sacre Congregationis necesse est, ut novum accedat ejusdem decretum auctoritate summi Pontificis confirmatum, in quo decernatur, Officii recitationem & Missæ celebrationem esse sub hoc, aut illo ritu in Ecclesia universali administrandas. In bullis autem Canonizationum SS. Pii V., Andreæ Avellini, Felicis a Cantalicio, et Catharinæ a Bononia, necnon in tot aliis expeditis sub Benedicto XIII. Sanctorum si ve a se ipso, si ve ab aliis Pontificibus Antecessoribus suis canonizatorum, nulla fit mentio Officii & Missæ. Id nempe ipse obtinui, dum Promotoris Fidei munereungebar: quia, licet vera sint omnia, quæ in superioribus adducta sunt, nemo tamen est qui non videat, Apostolici instituti ignaris errandi occasionem alioquin suppeditari posse; celebrandi videlicet Missam, aut Officium

Officium recitandi in ejus Sancti honorem, in cujus utique honorem nec Missa esset celebranda, nec Officium recitandum, sub obtentu facultatis seu præcepti in bulla Canonizationis contenti.

8 Quæres tercio, an præceptum præstandi cultum Canonizato tamquam Sancto, & instar cultus qui aliis Sanctis desertur, necnon recitandi in universa Ecclesia Officium & celebrandi Missam in honorem alicujus Sancti canonizati, comprehendat simul cum Ecclesia Occidentali etiam Orientalem. Verum pro absoluta responsione nonnulla prænotanda esse videntur. Et primum quidem, etiam ante schisma Græcorum aliquam inter Orientalem, atque Occidentalem Ecclesiam fuisse in sacra Liturgia differentiam, præcipue vero quoad Divinorum Officiorum recitationem, & Sacramentorum administrationem; quemadmodum ostendunt Petrus Arcudius de concord. Eccles. Occid., & Orient. in Septem Sacramentor. administratione, Leo Allatius de Eccles. Occid., atque Orient. perpetua consensione, Isaac Habertus in Pontific. Eccles. Græca, Jacobus Goar in Rituali Græcorum, Morinus de sacr. Eccles. Ordinaz., Martene de antiq. Eccles. ritibus.

9 Secundum, summos Pontifices, quoties, abjurato schismate, Græci ad unitatem reversi sunt, sedulam certe operam navasse, ut errores abjicerent, & Sedi Apostolicæ subderentur, at nulla tamen facta reprobatione rituum & consuetudinum, dummodo periculum animarum non inducerent, nec derogarent honestati Ecclesiasticæ; ut habetur in Concilio Lateranensi sub Innocentio III. & in epistola Innocentii IV. ad Episcopum Tusculanum Apostolicæ Sedis Legatum in regno Cypri, de quibus in Conciliis (collect. Harduin. tom. 7. col. 27. et 363.)

10 Tertium, reliquos semper fuisse Græcos in sua antiqua consuetudine Missas & Divina Officia celebrandi, uti legitur in binis Constitutionibus summorum Pontificum Leonis X. & Clementis VII. præfixis Pontificali Græcorum Isaaci Haberti; necnon sub Pontifice Clemente VIII. approbatum fuisse Breviarium Græcorum, quod dicitur Anthologium, prævio rigido examine, & in Urbe typis Vaticanis editum fuisse anno 1598.

11 Quamvis, similia contigisse quoad ritum Syriacum Maronitarum; sicut colligitur ex Constitutione Eugenii IV. (collect. CC. Harduin. tom. 9. col. 1044.) tum ex Constitutione Gregorii XIII. quæ est 91. Bullar. tom. 2. & in qua quidem permittitur, ut in ecclesia Collegii Maronitarum Urbis Missæ & alia Divina Officia etiam Arabico, vel Chaldaico idiomate celebrentur; tum autem multo magis ex approbatione eorum Breviarii facta a summis Pontificibus Paulo V. Gregorio XV. & Urbano VIII. quod pariter fuit editum in Urbe anno 1624. Card. Octavius Bandinus in sua epistola ad Jo. Petrum Patriarcham Antiochenum Maronitarum, quæ est præfixa Officio simpliciter septem dierum hebdomadæ ad usum Ecclesiæ eorumdem Maronitarum, historiam refert & exquisitas diligentias adhibitas pro correctâ editione prædicti Breviarii; meminit quoque aliorum librorum Ecclesiasticorum ad usum ejusdem Ecclesiæ editorum sub summis Pontifici-

titicibus Pio V. Gregorio XIII. & Clemente VIII. hoc est Officii, seu exequiarum Defunctorum, & Missalis Chaldaici juxta ritum Ecclesiae nationis Maronitarum; quorum primum typis impressum fuit Romae anno 1585. alterum vero in eadem Urbe anno 1594. : typis porro sacrae Congregationis de propaganda Fide sub Innocentio X. anno 1647. facta est nova editio supradicti Breviarii, & anno 1666. sub Alexandro VII. perfecta est editio partis hiemalis, & partis aestivae, quibus titulus inest: *Officia Sanctorum juxta ritum Ecclesiae Maronitarum*.

12 Quintum, morem eundem servatum fuisse in repetitis, quae contigerunt, unionibus Armeniorum, Copticorum sive Aegyptiorum, Abyssinorum sive Aethiopum, Nestorianorum, Chaldaeorum. Quapropter sacra Congregatio de propaganda Fide in decreto edito die 3. Aprilis 1669. sic de ritu Armeniorum locuta est: *Quoniam ritus Armenorum unionum pluries a Sede Apostolica approbatus & confirmatus fuit, sacra Congregatio mandavit, ne aliqua mutatio aut innovatio in eodem ritu contra praedictam unionem ex quavis causa fiat absque expressa Sedis Apostolicae licentia*. Quippe, ut cetera fileantur, in unionem, quae anno 1239. facta est sub Gregorio IX. & de qua apud Galanum tom. 1. conciliat. Eccles. Armen. cum Rom. part. 1. cap. 25. pag. 375. Pontifex approbavit rationabiles Armeniorum consuetudines a tempore B. Silvestri, & S. Gregorii Catholici ejusdem regni Episcopi, easque Apostolica auctoritate confirmavit: & ad normam quidem decreti sacrae Congregationis de propaganda Fide responsum fuit anno 1716. & anno 1718. a sacra Congregatione SS. Inquisitionis quaesitis Euthymii Archiepiscopi Graeci Tyri & Sidonis, qui nonnullos Graecorum ritus immutaverat. In unionibus nempe & reconciliationibus supradictarum nationum Orientalium in more positum fuit, earum populos in communionem recipere cum omnibus ritibus suis, repudiatis modo erroribus Fidei, aut universali disciplinae contrariis. Sicque, cum anno 1720. habita fuisset Synodus provincialis Rhutenorum in civitate Zamoscae, praesidente Hieronymo Grimaldo Archiepiscopo Edesseno Nuntio Apostolico, actumque fuisset de illius confirmatione per Sedem Apostolicam concedenda; san. mem. Benedictus XIII. praevio consilio Congregationum tum sacri Concilii Tridentini, tum de propaganda Fide, Synodum ipsam approbavit & confirmavit; necnon edixit in Urbe anno 1724. addita in confirmatione clausula, quod per eandem confirmationem nihil derogatum esse censeretur vel Constitutionibus Romanorum Antecessorum Pontificum, vel decretis Conciliorum generalium emanatis super ritibus Graecorum, quae semper in suo robore permanere deberent.

13 Postremum, summos Pontifices, licet improbandam esse censuerint consuetudinem introductam, per quam Graecis Latino ritu & Latinis Graeco ritu facultas dabatur celebrandi Missam & recitandi Officium Divinum, uti colligitur ex *Constit. 21. S. Pii V. (Bullar. nov. tom. 4. part. 2.)* in ipsa tamen Urbe, Sacra ab Orientalibus fieri juxta suum ritum, servatis servan-

servandis, voluisse. Non solum enim Clemens VIII. in sua *Constit.* 34. (*Bullar. tom. 3.*) decrevit, Romæ habendum esse Episcopum Græcum Catholicum, qui Græcos Episcopis Latinis Italiæ & insularum adjacentium subiectos ab Episcopo Græco ad Sacra ordinari volentes, cum illorum dimissoriis ad id tantum concedendis ritu Græco ordinaret; sed Divina etiam Officia & Missæ celebrantur juxta proprium ritum publice & palam in ecclesia Collegii Græci, atque in ecclesia Collegii Maronitarum. Præterquamquod supra memoratus Benedictus Papa XIII. die 6. Decembris 1725. ad avertendos abusus, qui irrepsent occasione, qua Sacerdotes Orientales ad ceteras Urbis ecclesias passim accedebant Missas in eis celebraturi, constituit, id illis non esse permittendum, nisi prævia licentia Cardinalis Urbis Vicarii, qui eam nequaquam pro omnibus, sed pro aliquibus tantum ecclesiis indulgere consuevit; nisi Missam celebrent aut in ecclesia subterranea, aut in aliquo remoto altari (experientia quippe teste deprehensum fuit, ex hominum multitudine curiositatis causa confluentium scandala aliquando & irreverentias contigisse) & nisi suas Sacerdotes celebraturi secum habeant sacras vestes, hostiam, atque ministrum, qui Orientali ritu sciat Missæ inservire.

14. Hisce præmissis, ut redeamus ad dubii solutionem; distinguendum esse videtur inter præceptum in Canonizatione contentum de Sancto colendo in universa Ecclesia, & præceptum de recitando Officio, Missæque in ejus honorem celebranda: siquidem alterum ab altero est separabile ex supradictis, & multi sunt Canonizati, qui non habent Officium ac Missam in universa Ecclesia. Primum autem præceptum juxta nonnullos pertinet ad Fidem, ut infra videbitur, & juxta omnes ejus violatio periculum induceret animarum, aut saltem Ecclesiasticæ derogaret honestati. Quocirca, cum Romanus Pontifex utriusque Ecclesiæ, Orientalis scilicet, atque Occidentalis, caput sit, eidemque utraque Ecclesia subiecta sit, & in supra recensitis unionibus Orientalium cum Sede Apostolica imposita illis fuerit obligatio errores abjiciendi, & se conformandi ad Romanam Ecclesiam in his, quæ respiciunt universalem disciplinam, necnon in his, quorum violatio periculum induceret animarum, & Ecclesiasticæ derogaret honestati; sequitur, teneri Orientales colere tamquam Sanctum quemcumque Dei servum, vel Beatum, quem summus Pontifex canonizando refert in Sanctorum catalogum, idemque omnino peccatum, quod patraretur ab homine Occidentali si Sanctum a Papa canonizatum non haberet pro Sancto, & non coleret tamquam Sanctum; committi quoque ab homine Orientali, si Sanctum a Papa canonizatum pro Sancto minime haberet, & tamquam Sanctum minime coleret, aut tamquam Sanctum coleret, quem summus Pontifex censet Sanctum non esse.

15. Secus porro se habet res quoad secundum præceptum recitandi Officium & celebrandi Missam in honorem Sancti canonizati. Eodem quippe Orientales nequaquam comprehenduntur, nisi id expresse a sum-

mis

mis Pontificibus mandetur, juxta definitionem habitam die 4. Julii 1631. relatum apud Verricellum *de Apostol. Mission. quasi.* 83. & 84. pag. 204. & seq. Subditi quatuor Patriarchatum Ecclesiarum Orientis non ligantur novis Pontificiis Constitutionibus, nisi in tribus casibus; primo, in materia dogmatum Fidei; secundo, si Papa explicite in suis Constitutionibus faciat mentionem & disponat de prædictis; tercio, si implicite in eisdem Constitutionibus de eis disponat, ut in casibus appellationis ad futurum Concilium &c. Ita fuit concorditer responsum in quadam Congregatione d. Cissimorum virorum die 4. Julii 1631. habita super dubio Missionariorum Orientis in palatio Eminentiss. Pamphilii postea Innocentii X. Quatenus vero responderetur, Orientales propter universitatem verborum implicite præcepto comprehendendi, imbecillitas responsionis illi-co appareret, Missalia, Officia, Breviaria in Urbe edita pro eorum usu & a summis Pontificibus approbata respiciendo; in quibus nimirum Missæ & Officia præscribuntur in honorem præcipue Sanctorum, quos Officio & Missa colebant ante schisma, nullo facto verbo Sanctorum postea canonizatorum, quibus indultum est, ut in eorum honorem Officium recitaretur & Missa celebraretur in universa Ecclesia. Addi possunt expressæ permissiones in unionibus factæ de celebratione Solemnium, Missarumque, & Horarum canonicarum recitatione juxta antiquam Orientalem consuetudinem; nihil obstante, quod secundum decretum Eugenii IV. in unione Armenorum, & secundum instructionem Clementis VIII. obligantur Armeni, & obstringuntur Græci viventes in diocæsis Episcoporum Latinorum ad observantiam festorum de præcepto Ecclesiæ Latinæ. Eugenius quippe IV. in citata unione Armenorum præscripsit, ut se conformarent ad Ecclesiam universalem Latinam & Græcam in celebratione festorum Nativitatis Domini die 25. Decembris, Circumcisionis Domini die 1. Januarii, Purificationis Beatissimæ Virginis die 2. Februarii, Annuntiationis die 25. Martii, Nativitatis S. Joannis Baptistæ die 24. Junii, nulla alia facta mentione ceterorum rituum, in quibus a Græcis & Latinis differabant, uti videri potest apud Harduinum *rom. 9. Concil. col. 441.* Memorata autem instructio Clementis VIII. quæ respicit Græcos in diocæsis Episcoporum Latinorum habitantes, mandat utique, ut festa Latinorum observent, hoc est Missam audiant, & abstinere ab operibus servilibus; at minime tamen ut Missam celebrent & Officium recitent in honorem Sanctorum, qui a Latinis coluntur.



## CAPUT XXXIX.

*De differentiis inter Beatificationem, & Canonizationem.*

<sup>1</sup> **S**I noster sermo continuari deberet enarratione specierum cultus, qui juxta familiarem Sedis Apostolicæ disciplinam exhibetur Canonizatis, exhiberi autem nequit servis Dei tantummodo Beatificatis; a proposito præsentis aberraret, & hic exponeret ea, quæ aliis in locis hujus Operis nobis exponenda esse videntur. Satis ergo interim erit ea indicasse, quæ in superioribus dicta sunt; quia nunc oportet ad alia transitum facere, hoc est ad discrimen, quod intercedit inter Beatificationem, & Canonizationem.

<sup>2</sup> Putant nonnulli, Beatificationem, & Canonizationem promiscue fumi posse, teste Garzia *in tract. de Canonizat. SS. pag. 3.* Alii Canonizationem distinguunt in universalem, & particularem; universalem nempe, per quam cultus in universa Ecclesia, particularem vero, per quam in particularibus Ecclesiis alicui exhibetur: qua quidem distinctione admissa, non desunt, qui Beatificationem dicunt esse particularem quamdam Canonizationem. Ita Casalius *de veter. sacr. Christ. ritib. cap. 69.* & Auditores Rotæ in relatione S. Ludovici Bertrandi *in princ. §. Unde merito.* Nec est omittendum nonnullos velle, vel absolute canonizatos esse dicendos quotquot judicio Episcopali juxta antiquam Ecclesiæ disciplinam cultum obtinuerunt; vel eos saltem canonizatos dici debere particulari Canonizatione, quæ tunc solum erat usu recepta.

<sup>3</sup> Verum, ne confuse procedamus, si loquimur de antiquiori Ecclesiæ disciplina, clara est ex alibi dictis differentia inter Beatificationem, & Canonizationem. Episcopale namque præceptum de cultu exhibendo erga aliquem Dei servum diocesis fines non excedebat; vel, siquidem extendebatur ad alias Ecclesias, & sic paulatim ad universam Ecclesiam, accedente tacito, aut expresso summi Pontificis assensu, cultus ab Episcopo præceptus, qui antea non erat nisi Beatificatio, Canonizationis deinde robur obtinebat. In quo rerum themate nemo est qui non videat, differentiam inter Beatificationem, & Canonizationem juxta antiquiorem Ecclesiæ disciplinam constitutam fuisse in primordiali Episcopi præcepto de cultu coarctato, & in ejus extensione ad universam Ecclesiam, accedente (uti dictum est) tacito, aut expresso Romani Pontificis assensu.

<sup>4</sup> Major difficultas habetur quoad differentiam inter Beatificationem, & Canonizationem, si porro de eadem differentia loquamur post delatum tum Beatificationis, tum Canonizationis judicium ad Sedem Apostolicam. Primum enim, hoc tempore inspecto, dicendum esse videtur, Beatificationem nunquam dici posse particularem Canonizationem; quia plures extant Apostolicæ litteræ Romanorum Pontificum, in quibus nonnulli

### 354 DE SERVORUM DEI BEATIFICATIONE

Dei servi inter Beatos recensentur, & in eorum honorem indulgetur, ut festum fiat. Officium recitetur, ac Missa celebretur, sed additis tamen hisce clausulis: *Licet canonizatus, aut canonizata non sit*; veluti in Brevi Beatificationis tunc Beatæ, nunc Sanctæ Agnetis de Monte Politiano expedito a Clemente VII. anno 1532. five: *Dummodo propter præmissa canonizatus, aut canonizata non censeatur*; sicuti in Brevi Julii II. per quod beatificavit B. Notkerum Balbulum apud Bollandianos *ad diem 6. Aprilis tom. 1. pag. 603.*; in Brevi Beatificationis expedito a Leone X. tunc Beatæ, nunc Sanctæ Elisabeth Reginæ Portugalliæ; in alio Clementis VII. cum inter Beatos retulit Hyacinthum Confessorem nunc Sanctorum catalogo adscriptum, uti videri potest apud Raynaldum *ad an. 1527. num. 105.* tum in alio ejusdem Clementis, cum Beatitatis honores indulgit servis Dei Petro de Luxemburgo, & Ludovico Alamando Cardinali Arelatenfi, cujus meminerunt Raynaldus *ad ann. 1450. num. 20.* & Dionysius Sammarthanus *Gallia Christi. tom. 1. in Ecclesia Arelatenfi col. 584.* quodque editum fuit a Bollandianis *ad diem 2. Julii tom. 1. pag. 491.* & apud Jo: Launojum *oper. tom. 5. part. 1. in epist. 11. ad Ludovicum Marasium*; & in pluribus demum aliis, quæ congeri possent, exemplis, nisi hæc indicasse sat esset, ut ostendatur, juxta recentiorum Ecclesiæ disciplinam Beatificationem nunquam appellari posse particularem Canonizationem: si enim sic vocari potuisset, vel supradictæ clausulæ non fuissent appositæ ad Beatificationum Brevia, vel, si quidem appositæ fuissent, id factum esset cum additamento indicante Canonizationem universalem, & non absolute atque simpliciter Canonizationem.

5 Doctores postea de Beatificatione & Canonizatione tractantes juxta præsentem Ecclesiæ disciplinam tradunt, Beatificationem esse actum, quo summus Romanus Pontifex indulgendo permittit, aliquem Dei servum coli posse in aliqua provincia, dioecesi, civitate, aut religiosa Familia cultu quodam determinato, ac Beatorum proprio, usquequo ad solemnem ejus Canonizationem deveniatur. Ita Scacch. *de not. & sign. sanctitat. sect. 11. cap. 1. pag. 826.* Castellin. *de certitud. glor. SS. cap. 2. pun. 1. num. 2.* Penia *in sua dissertat. de cultu SS. num. 10. apud Pignasell. tom. 5. consult. 38.* Canonizationem autem dicunt esse summi Pontificis sententiam definitivam, qua decernit, aliquem antea inter Beatos recensitum in Sanctorum catalogum esse referendum; & coli debere in toto orbe Catholico atque in universa Ecclesia cultu illo, qui ceteris Canonizatis præstatur. Ita Innocent. *in cap. Audivimus num. 1. Ostien. num. 2. Abbas num. 5. Antonius a Butrio num. 4. Joannes Andreas num. 2. Zabarella num. 4. de Reliq. & venerat. SS. Pirhing. ad eundem titulum Decretal. §. 1. num. 2. S. Antoninus in 3. part. summa Theol. tit. 22. cap. 5. §. 5. Venerabilis Dei servus Card. Bellarminus de Sanctorum beatit. lib. 1. cap. 7. Silvester in summa, v. Canonizatio, num. 1. Angelus in summa, eod. verbo, Pavin. in relatione causa S. Bemaventura in principio, Rocca de Canoniz. SS. cap. 3. Castellan.*

in co-



in eodem tract. quest. 1. principali, Castellin. de certit. glor. SS. cap. 3. punct. 50. Maucier. de monarchia Ecclesie 2. part. lib. 4. cap. 7. in principio, Phoebeus in sua dissert. typis impressa post Acta Canonizationis S. Petri de Alcantara, & S. Mariae Magdalene de Pazzis pag. 330. Cardinalis de Lauræa in 3. lib. sent. tom. 3. disp. 6. art. 3. num. 44.

6 Hinc Beatificationem in pluribus differre a Canonizatione docent, propterea quia ex dictis consequitur, quod Beatificatio sit actus præcedens & præparatorius, Canonizatio vero actus præparatus & extremus; quod Beatificatio permissionem, Canonizatio præceptum cultus importet; quodque in Beatificatione cultus coarctetur intra aliquam provinciam, diocesim, civitatem, aut religiosam Familiam, in Canonizatione autem extendatur ad universam Ecclesiam: Gonzal. in cap. Audivimus num. 6. de Reliq. & venerat. SS. Contelor. de Canonizat. SS. cap. 2. num. 5. & seqq. Dominicus a SS. Trinitate in suo tract. de summo Pontifice cap. 18. §. Notandum. biblioth. Pontif. tom. 10. Baldell. Theolog. moral. tom. 2. lib. 3. disp. 12. n. 18. Lupus in notis ad Concilia tom. 3. pag. 568. Bordon. controver. 13. num. 1. & seqq. & num. 13. & 14. Garzia de Canoniz. SS. pag. 34. num. 3. & 4. & pag. 35. num. 1. & seqq. Gravina de Cathol. præscriptionibus, in continuat. 2. part. tom. 4. tit. de infallibilitate Papa in Canonizat. dubit. 1. in append. Blasius a Purificatione in tract. de adorat. disp. 8. dnb. 2. §. 2. Diana in edit. coord. tom. 1. tract. 6. resolut. 17. num. 1. et seqq. Scacch. de not., et sign. sanctit. sect. 1. cap. 8. pag. 97. Matta de Canonizat. SS. part. 1. cap. 2. num. 11. Lezana consult. 1. num. 49. Pignatell. consult. 63. num. 1. tom. 4. Joannes a S. Thoma in 2. 2. D. Thoma quest. 1. disp. 9. art. 2. num. 2. Gujet de sessis propriis SS. lib. 2. cap. 19. qu. 11. §. Quod ergo attinet; Rabaudi in suis exercit. Theolog. tom. 2. exercit. 3. cap. 1. §. 1. vers. 5. Non est; Gavard. in sua Theolog. exantiq. tom. 6. quest. 2. de Baptismo art. 8. §. 3. num. 46. Schiara in suo Pontific. propugnac. art. 26. §. 1. sub num. 3. Anaclet. tom. 3. ad tit. Decretal. de Reliq. et venerat. SS. §. 1. num. 5.

7 Affertiones itaque modo expositæ communem utique contrituere videntur Scriptorum opinionem; sed ei tamen adversatur P. Matthæus ex Familia Minor. Obser. Consultor Congregationis sacrorum rituum, in sua practica ad causas Beatificat. & Canonizat. in quest. proem. cap. unic. num. 7. & seqq., ubi probare conatur, cultum præcipi non solum in Canonizatione, verum etiam in Beatificatione, atque adeo Beatorum cultum, excepta concessione Officii & Missæ, ad universam Ecclesiam protendi: quamquam recenti huic Auctori respondet P. Jo: Baptista Memmius Societatis Jesu in suo tractatu de sacro ritu Canonizat. SS. Romæ edito anno 1726. cap. 1. Nos vero, ut tuto pede incedamus, necessarium esse existimamus ad Apostolicas Romanorum Pontificum litteras manus admovere, ex quibus, quid in hac re sentiendum sit, sine ulla dubitatione dignosci facile poterit.

8 Afferunt nimirum Doctores supra citati, Beatificationem non importare expressum summi Pontificis præceptum, sed permissionem tantum  
Y y 2 strictius

strictius infra explicandam, ut aliquis Dei servus cultum habere possit : & sane assentimur, ex regula id verum esse ; sed & contendimus, aliquando cultum simpliciter Beatorum non modo permissum, verum etiam fuisse præceptum. In litteris namque Apostolicis Sixti Papæ IV. de quibus infra, & in quibus Dei servus Jo: Bonus Ord. Erem. S. Augustini Beatificationem consequitur ; item in litteris Apostolicis Leonis Papæ X. in quibus Philippus Benitius, Margarita de Cortona, & Jacobus de Marchia inter Beatos referuntur, datur profecto facultas eos colendi in determinatis aliquibus locis *absque incurfu alicujus idololatriæ, aut infamiae nota, vel conscientia scrupulo, & donec aliter a Sede Apostolica demandatum fuisset* ; qui videlicet loquendi modus non ad præceptum, sed ad permissionem tantum referendus esse videtur, sicut & alius ille loquendi modus, quo in posterioribus Beatificationum Brevibus iidem Romani Pontifices uti sunt : *Apostolica auctoritate licentiam & facultatem concedimus & impartimur* ; sive, *auctoritate Apostolica tenore præsentium indulgemus* : uti legitur in Brevibus Beatificationum Andreæ Avellini, Francisci Borgiæ, Cajetani, Joannis de Deo, Josaphati Martyris, Francisci de Sales, Petri de Arbus, Rosæ Limanæ, Pii Papæ V., Francisci Solani, Joannis Francisci Regis, Hyacinthæ de Marefcortis, Joannis de Prado, Fidelis a Sigmaringa, Vincentii a Paulo, & Petri Forerii. Sed, ne temere videamur asseruisse, cultum simpliciter Beatorum fuisse a Romanis Pontificibus aliquando præceptum, præsto sunt exempla alia tum antiquiora, tum recentiora. Alexander Papa III. Martino Episcopo Grossetanensi supplicanti pro Canonizatione B. Guillelmi Eremitæ a Malavalle in Tuscia respondit, veluti in superioribus vidimus, se ejus preces tempore opportuno exauditurum : *Et interim mandavit eidem* (verba sunt Innocentii Papæ III. in suis litteris Apostolicis editis a Guillelmo de Vvaba Presbytero Societatis Jesu in vita prædicti Guillelmi, pag. 326. & iterum typis impressis in novo cod. Canonizat. pag. 644.) *ut in anniversario pro Divini nominis gloria, & ejusdem Sancti memoria Officium Confefforis solemniter celebraret, & in sua diœcesi faceret solemniter celebrari. Ideoque & Nos* (subdit Innocentius) *Fraternitati tuæ* (litteræ datæ sunt ad Episcopum Grossetanensem) *per Apostolica scripta mandamus, quatenus & tu Prædecessoris nostri mandatum in majori ecclesia exequaris, & diœcesanis tuis nunties exequendum.* Leo Papa X. inter BB. Virgines recensendo Hofannam Virginem Tert. Ord. Præd., nedum concessit, sed & mandavit, ut die ejus natali fieret in civitate & territorio Mantuano in primis, ac secundis Vesperis, necnon in Matutinis, atque aliis Divinis Officiis ejus commemoratio : *In civitate & districtu Mantuano, sicut in natali aliarum SS. Virginum solet fieri & celebrari, ut commemoratio libere & licite fieri possit, concedimus, & a quibuscumque Sacerdotibus, Religiosis, & aliis Christifidelibus fieri mandamus.* Clemens Papa IX. in suo Brevis expedito die 2. Januarii 1669. per quod, prævia derogatione Apostolicarum Constitutionum, quibus prohibetur, Beatos nondum canonizatos eligi in principales Patronos regno-

rum

rum, provinciarum, & civitatum, elegit in Patronam principalem civitatis Limanæ, & totius regni Peruviani Rosam Limanam tunc simpliciter Beatam, sic statuit quoad cultum: *Ipsiusque Beata Rose festum in universo regno huiusmodi de Patrona principali ab omnibus utriusque sexus Christianidelibus illic degentibus de precepto servari, & sicut alia festa de precepto, celebrari, ejusque Officium ab universo Clero tum Sæculari, tum Regulari de principali Patrona juxta rubricas Breviarii Romani inibi recitari, auctoritate & tenore præfatis mandamus.* Summus denique Pontifex Clemens X. eodem præcipiente modo processit, declarando eandem B. Rosam ante Canonizationem in principalem Patronam omnium & singularum provinciarum, regnorum, insularum, & regionum Continentis totius Americæ, Philippinarum, ac Indiarum; & Stanislaum Novitium Societatis Jesu tunc tantummodo Beatificatum in principalem Patronum regni Poloniæ, magni ducatus Lituaniæ, & adjunctarum provinciarum renuntiando, voluit, ut coleretur cum omnibus & singulis prærogativis, quæ principalioribus Patronis ejusdem regni & ducatus competeant, quibusque tunc colebantur SS. Adalbertus, alter Stanislaus, alique principales Patroni ejusdemmet regni atque ducatus: quemadmodum desumitur ex ejus litteris Apostolicis expeditis die 8. Januarii 1674.

9 Dicunt quoque, uti vidimus, Doctores, cultum Beatorum intra aliquam provinciam, diocesim, civitatem, aut religiosam Familiam coarctari; idque observatum certe fuit in omnibus fere Beatificationibus huc usque factis: at exemplum tamen non deest de concessione cultus pro universa Ecclesia in honorem alicujus simpliciter Beatificati. Sixtus quippe Pontifex IV. qui in Beatificatione servorum Dei Berardi, Petri, Othonis, Accursii, & Adjuti Ordini FF. Minor. concessit, ut Fratres in eorum honorem Officium recitarent & Missam celebrarent, quemadmodum habetur in diplomate 73. formis impresso in citato novo codice Canonizationum, referens porro inter Beatos memoratum Joannem Bonum, ei cultum detulit in universa Ecclesia: *De Fratrum nostrorum consilio & assensu, auctoritate Apostolica concedimus, quod ipse B. Jo: Bonus, ut pie inter Sanctos in superna patria collocatus, ad laudem & Divini nominis, & Altissimi gloriam, qui in calis habitat & humilia respicit, sine hesitatione & conscientia scrupulo, vel canonis Divini incursum possit pro Beato in omnibus & singulis civitatibus, terris, & locis, ac monasteriis, & ecclesiis venerari, & ad eum, ut Beatum, preces porrigi, & suffragia ejus implorari, donec aliud per Nos, vel Sedem prædictam fuerit solemniter ordinatum: quæ scilicet verba Sixtini sunt diplomatæ apud Raynaldum ad an. 1250. num. 51. Clemens pariter Papa X. antequam ad solemnia Canonizationis S. Rosæ Limanæ deveniret, die 27. Augusti 1670. per suas litteras Apostolicas in forma Brevis indulxit universo Clero Sæculari, ac Regulari per totum terrarum orbem, ut de B. Rosâ Missam celebrare posset per anni circuitum sive ex voto, sive ex libera devotione, juxta rubricas Missalis Romani.*

10 Ajunt præterea Doctores superius allegati, Canonizationem esse summi Pontificis sententiam definitivam, qua præcipiendo, exhibitionem cultus decernit. De hoc vero nequaquam dubitandum esse videtur: verba quippe præcipientia in omnibus Canonizationum bullis inveniuntur; sicuti videri potest in bullis Canonizationum SS. Udalrici, Simeonis Monachi, Simeonis Syracusani, Godeardi, Sturmii, Henrici, Joannis Gualberti. His consentiunt aliæ bullæ, ubi sic legitur: *Inter Sanctos, & electos honorari præcipimus &c. Memoriam inter Sanctos de cetero fieri censemus, & anniversarium ipsius diem solemniter celebrari constituimus &c. Apostolica Sedis auctoritate catalogo Sanctorum scribi mandavimus*: bullæ videlicet Canonizationum SS. Hugonis, Bernardi Abbatis, Thomæ Cantuariensis, Homoboni, Laurentii Archiepiscopi, Antonii Lusitani, Dominici, Francisci de Assisio, Elisabeth Viduæ, Petri Martyris, Stanislai Episcopi, Ludovici Regis Franciæ, Petri de Morono, Ludovici Episcopi Tolosani, Thomæ Episcopi Herfordienfis, Thomæ de Aquino, Ivonis Presbyteri, Nicolai de Tolentino, Bernardini Senensis, Bonaventuræ, Ubaldi: itemque recentiores Canonizationum bullæ per verba ista; *Statuimus, definimus, pronunciamus*; quemadmodum desumi potest ex bullis Canonizationum SS. Francisci de Paula, Leopoldi Austriæ Principis, Bennonis Episcopi Misnensis, Hyacinthi Poloni, Raymundi Barcinonensis, Caroli Borromæi, Philippi Nerii, Ignatii Loyolæ, Francisci Xaverii, Thomæ de Villanova, Francisci Salesii, Petri de Alcantara, Rosæ Limanæ, & passim ex aliis subsequenti-bus. Etsi enim in nonnullis antiquioribus bullis habeantur verba hortati-va: *Universtatem vestram rogamus, monemus*: alia tamen non desunt præcipientia: *Per Apostolica vobis scripta mandantes*; sicuti colligi potest ex bullis Canonizationum SS. Geraldii, Chunegundis, Vultani, Guillelmi Briocensis, Francisci de Assisio, & ex aliis.

11 Ajunt postremo prædicti Doctores, cultum in Canonizatione extendi ad universam Ecclesiam. Id pariter re vera subsistit; cum in omnibus Canonizationum bullis præcipiatur, Canonizatum ab omnibus & in universa utique Ecclesia pro Sancto habendum esse; in nonnullis vero Canonizationum bullis præterea demandetur celebratio Officii universæ ipsi Ecclesiæ; in aliis celebratio festi universæ similiter Ecclesiæ; in aliis, ut in Ecclesia universali ædes sacræ & altaria ædificentur, in quibus incruentum Deo sacrificium offeratur. Quamvis enim nonnulla Canonizationum diplomata particularibus aliquibus personis inscripta sint, & signanter illa SS. Udalrici, Simeonis Monachi & Eremitæ, Nicolai Peregrini, Petri Anagnini, Godeardi, Hugonis Gratianopolitani, Sturmii, Henrici Imperatoris, Eduardi, Thomæ Cantuariensis, Bernardi, Bernuwardi, Joannis Gualberti, Geraldii, Homoboni, Chunegundis, Guillelmi, Laurentii Dublinensis, Guillelmi Eboracensis, Stanislai, Clare, Hedviggis, Ludovici; attamen prætermittentes, quod pleraque etiam ex antiquioribus data sunt ad universos Christianifideles, vel ad universos Archiepiscopos, Episco-  
pos,

pos, Abbates, Priores, Archipresbyteros, Archidiaconos, Decanos, & alios Ecclesiarum Præsules ad quos pervenissent, uti sunt illa SS. Geraldii, Theobaldi, Virgilii, Ludovici filii Caroli II. Regis Siciliæ, Nicolai de Tolentino, Francisci de Assisio: vim in eo ponimus, quod in diplomatibus seu bullis, quæ ad particulares ipsas personas datæ sunt, cultus, qui præcipitur, non coarctatur in eis, vel in determinatis aliquibus locis, sed denuntiatur particularibus ipsismet personis, quæ forte pro Canonizatione supplicaverant, Beatum inter Sanctos fuisse relatum, ejusque factam fuisse Canonizationem, ut fidentius & alacrius se ejus precibus, atque intercessioni commendarent. Alexander III. inter Sanctos solemniter retulit Eduardum Angliæ Regem: litteris autem datis ad Episcopos per Angliam constitutos, ait (in nov. cod. Canoniz. pag. 15.) *Quia igitur decet honestatis vestra prudentiam eum pie colere & toto studio venerari, quem auctoritate Apostolica venerandum vestra postulavit devotio, & colendum &c.* Sed quod citra ullam controversiam ostendit, in Canonizationibus præcipi cultum, & præceptum respicere universam Ecclesiam, est sententia, quæ a summo Pontifice tanta solemnitate in Canonizatione profertur: *Sanctum, aut Sanctam esse decernimus & definimus ac Sanctorum catalogo adscribimus; quæ profecto sunt verba præcipientia: Statuentes, ab Ecclesia universali illius memoriam quolibet anno pia devotione recolere debere; en verba iterum præcipientia, & quæ universalem Ecclesiam respiciunt.*

12 Omnia igitur in unum colligentes ratum habemus primò, (ex regula loquendo) Beatificationem esse cultus permissionem, & aliquando posse importare cultus præceptum, constitutum tamen per actum directum ad sententiam definitivam non adhuc prolatam, sed, accedentibus novis circumstantiis, proferendam, & in nonnullis particularibus locis coercitum. Quocirca præceptam Innocentii III. supra relatum de Officio celebrando in honorem B. Guillelmi dioecesis tantum Grossetanam respexit; certumque est, fuisse explicatum per actum, qui postremam & definitivam de Canonizatione sententiam expectabat, uti colligitur ex diplomate ejusdem Pontificis (cit. cod. pag. 644.) *Ex litteris Fraternitatis tuæ accepimus, quod, cum bon. mem. Martinus Prædecessor tuus olim ad sel. record. Alexandri Prædecessoris nostri præsentiam accessisset, supplicavit eidem, ut B. Guillelmum Sanctorum adscriberet catalogo venerandum. Idem vero Prædecessor noster exauditorium se proces ipsius promisit tempore opportuno. Procedit iisdem terminis mandatum Leonis X. in honorem B. Hofannæ, utpote coercitum intra dioecesis Mantuanam, & explicatum pariter per actum non extremum, nec ultimo decretorium. Post enarrata quippe merita Beatæ, sibi per extrajudiciales probationes, uti tunc in more positum erat, patrefacta, summus Pontifex supplicationem exponit Isabellæ Estensis de Gonzaga Mantuæ Marchionissæ pro prædix. Beatæ Canonizatione porrectam, cui sic respondet: Cum itaque Isabella Marchionissa non dubitans, animam dictæ Hofanna Virginis, ob ejus vitam castissimæ & integerrimæ actam, in caelesti choro*  
aeterna

*aterna gloria perfrui, miro teneatur desiderio, ut ipsa Hofanna per Nos canonizetur, & in catalogum sanctarum Virginum referatur, quare Nobis super hoc humiliter supplicari curavit: Nos igitur tum prædicto ejusdem Marchionissæ desiderio satisfacere, tum etiam, si res ita esse comperiat, ut eidem Hofanna pro meritis suis etiam a mortalibus in hoc saculo debitus honor & cultus impendatur, efficere cupientes, hujusmodi supplicationibus inclinati, discretioni vestra per præfentes committimus & mandamus, ut de religiosa & integerrima vita, ac de piis & sanctis operibus d. c. Hofanna, ac de miraculis ex ejus meritis & intercessionibus, ac de factis vos diligenter informetis, & Nobis referatis; ut scilicet postmodum Nos de præmissis certam notitiam per hujusmodi relationem habentes eandem Hofannam cum Dei & sanctæ Apostolicæ Sedis benedictione canonizemus, et in catalogum sanctarum Virginum referamus; et interim &c. Per eandemque etiam viam incedunt exempla S. Rosæ Limanæ, & S. Stanislai Novitii Societatis Jesu, cum ante Canonizationem quidem prodierint, sed judicio pro solemnî ipsa Canonizatione introducto.*

13 Compertum habemus secundò (ad regulam item loquendo) Beatorum cultum coarctari sane intra aliquam provinciam, diocesim, civitatem, aut religiosam Familiam; at aliquando tamen posse ad universam Ecclesiam extendi, citra tamen legem præcepti, sed per modum simplicis facultatis, & per actum minime extremum, nec ultimo definitivum. Quapropter in supra citato diplomate Sixti IV. de cultu B. Jo. Boni non solum insunt verba permittentia & facultatem facientia, verum etiam alia verba superadduntur, quæ extremam determinationem necdum prolatam expectant: *Donec aliud per Nos, vel Sedem Apostolicam fuerit solemniter ordinatum;* quod ipsum dici debet de allegata concessione Clementis X. pro cultu tunc Beatæ, nunc Sanctæ Rosæ Limanæ; quippe quæ facta fuit, dum adhuc sub judice esset Canonizationis causa.

14 Tertiò denique comprobatur est, Canonizationem esse summi Pontificis sententiam ultimo definitivam, qua cultus præcipitur in universa Ecclesia. Idcirco ultima differentia inter Beatificationem, & Canonizationem minime quidem constituenda erit vel in permissione cultus, vel in ejus coarctatione ad personas, aut locos particulares, quæ in Beatificatione habeatur, secus ac in Canonizatione; sed in extrema & definitiva de sanctitate sententia cultum aliis Sanctis debitum in universa Ecclesia per Canonizationem, nequaquam vero per Beatificationem præcipiente.



## C A P U T X L.

*In quo explicatur Sedis Apostolica permissio,  
qua per Beatificationem habetur.*

**C**Um duplex sit permissio alia scilicet approbans, alia suspendens; approbans utique illa est, quæ sibi vindicat locum in Beatificatione, sive loquamur de Beatificatione formali, sive de æquipollenti. In Beatificatione quippe formali, ut alibi visum est, præcedit examen una cum approbatione virtutum, seu martyrii, atque miraculorum: in Beatificatione autem æquipollenti, cum constiterit sive de fama virtutum, martyrii, aut miraculorum, sive de antiquitate cultus cum scientia & tolerantia Ordinarii, vel Sedis Apostolicæ, sive de Indultis præcedentibus Romanorum Pontificum, aut sacræ Congregationis, servatur cultus in eo statu, in quo est, necnon ut plurimum per novas concessionem augeatur: quæ profecto omnia ostendunt, permissionem esse approbantem, minime vero suspendentem. Permissio postea suspendens ea est, per quam, habita notitia cultus erga aliquem Dei servum ab antiquo tempore exhibiti, quique adhuc exhibetur in aliqua diocesi, aut provincia, Sedes Apostolica, licet ad ejus remotionem, ne populorum tumultus excitet, minime procedat; explicite tamen, vel implicite protestatur, se eum non approbare: & ideo, si sermo quidem sit de ista permissione, difficile admodum videtur, ex eadem posse Beatificationem produci.

2 Res tota duobus exemplis illustrabitur; altero de cultu Luciferi Callaritani; altero de cultu Raymundi Lulli. Unicuique, qui historiam Ecclesiasticam e limine salutaverit, notum est quid Lucifer egerit pro Fide Catholica in Concilio Mediolani coacto anno 355. Exilii etenim poenam sustinuit, & Confessoris nomen obtinuit. Extant etiam libri ab eo conscripti adversus Constantium Imperatorem, & ad ipsum Imperatorem transmissi; omniaque ejus opera edita fuerunt a Jo. Tillio Episcopo Meldensi anno 1568. & sunt inserta tom. 4. bibliot. PP. pag. 181. Porro, cum Constantio Julianus successisset; & deleta lege exilii, Lucifer una cum S. Eusebio Vercellensi a Thebaide, ubi exilium patiebantur, regressus fuisset; quia non interfuit Concilio Alexandrino, in quo nonnulla de pace Ecclesiæ & de admittendis in communionem Episcopis, qui ab errore Arianorum resipuerant, statuta fuerunt, ejus nomine a Diacono, quem ad Concilium legaverat, ea subscripta fuerunt. Dum autem Antiochiæ morabatur, ea spe ductus, ut dissidentium partes componi possent, Paulinum Presbyterum in Episcopum dictæ civitatis consecravit; etsi hinc potius dissensiones auctæ fuerunt, per annos deinde octoginta quinque continuatæ. Non potuit S. Eusebius, qui ex eadem pacis causa Antiochiam properaverat, factum Luciferi approbare; ideoque, quamvis minime

Tom. I.

Z z

publice

publice improbasset, Lucifer nihilominus ab ejus communione discessit; ea adhuc vigente ambiguitate, an ad graviora etiam progressus sit, & an ante obitum ad Ecclesiae unitatem redierit. Summatim hæc omnia & perspicue legi possunt in histor. Eccles. Fleury lib. 5. num. 29. to. 4. & in histor. Eccles. eruditi P. Ignatii Hyacinthi Amat de Gravefont to. 1. collog. 2. ad sec. 4. pag. 116. Quod autem attinet ad antiquiores, Socrates & Sozomenus referunt (histor. Eccles. lib. 3. cap. 9. & lib. 5. cap. 13.) Luciferum ipsum Ecclesiae sensui semper adhæsisse, at ejus sectatores ab Ecclesia utique se separasse, & schisma Luciferianum statuisse. Sulpitius contra Severus Luciferum ait (lib. 2. hist. sac. cap. 45.) habuisse sensum contrarium sensui S. Hilarii, adeoque condemnasse Episcopos Concilii Ariminensis; se segregasse ab eorum communione, qui illos post erroris satisfactionem receperant; S. Ambrosius subdit libr. 1. de excessu Satyri num. 47. tom. 2. oper. col. 1127. Luciferum se separasse a nostra communione; item S. Augustinus ep. 185. al. 50. tom. 2. oper. ait lumen charitatis amisisse, & in tenebras schismatis cecidisse: Sanctus autem Hieronymus in dial. adv. Lucifer. col. 194. tom. 2. oper. quamvis ejus intentionem excuset, non testatur tamen, eum schisma deseruisse; & licet post obitum Luciferum appellet Beatum, quaestio adhuc habetur, an hæc denominatio civilitati potius sit attribuenta. Adeo nempe gravis est hæc de Lucifero Calaritano controversia, ut eam P. Mabillonius in catalogo difficultatum histor. Eccles. sec. 1v. in fine tract. de stud. Monast. recensere operæ pretium judicaverit. Cardinalis insuper Baronius ad an. 362. num. 225. obitum Luciferi deflet, & de eo loquens hæc habet: *Quanta vero ejus esset æstimatio & laus in Ecclesia Dei, vel ab uno Hieronymo discere; qui, licet post ejus obitum & pro defensione Catholica veritatis de ipso agens, reverentius tamen antea vitam merita viri & percelebre nomen, vim vix sibi satis inferre valuit, ut in eum exerat stylum; sed, quem veritas acuit, reverentia mox obtudit, ut pro maledictione benedictionem inferat, cum Beatum appellet, atque, ut licuit, tandem excuset.* Post mortem porro Cardinalis Baronii ecclesia quædam subterranea in civitate Calaritana reperta est anno 1615. S. Lucifero dicata; tum autem anno 1623. ejus corpus inventum est sanctitatis indicii non destitutum, necnon miracula tunc etiam a Deo patrata ad ejus sanctitatem patefaciendam referuntur: de quibus omnibus fuse agunt Bollandiani ad diem 20. Maji tom. 5. in vita S. Luciferi cap. 8. & cap. 10. & Spondanus ipse ad an. 362. num. 48. testatur, ad se delata fuisse authentica monumenta de reperta ecclesia, de corpore invento, & de miraculis subsecutis; additque, quod, si hæc contigissent, vivente Cardinali Baronio, haud gravate sententiam de infelici morte Luciferi revocasset. Verum tantum abest, quod ex prædictis cessaverit controversia de Lucifero, ut ea potius inter Eruditos novas vires assumpserit. Suspiciantur quippe nonnulli, neque ecclesiam repertam fuisse dicatam Lucifero isti Calaritano, neque corpus inventum esse corpus ejusdem; sed ecclesiam dicatam fuisse alteri Lucifero Episcopo pariter Calaritano, qui



in Vandalica persecutione Confessor, vel Martyr mortuus est. Ita nimirum sentiunt Natal. Alex. *fac. 4. cap. 3. art. 13.* & Baillet *in vita Luciferi ad diem 20. Maji.* Alii vero dicunt, discipulos schismatis Luciferiani Lucifero tamquam sancto cultum adhibuisse, qui, etiam extincto schismate, forte continuatus fuit, & ad avertenda maiora mala ab Episcopis toleratus; sed tandem cessasse; postmodum vires resumpsisse post antiquam ecclesiam inventam prope urbem Calaritanam: at hæc tamen non sufficere pro legitimo cultu, cum ejus nomen, nihil obstantibus omnibus prædictis, in Martyrologium Romanum usque adhuc insertum non sit. Quæ quidem videri possunt apud Tillemont. *tom. 7. in notis ad Luciferum, nota 4.* Duo præterea Archiepiscopi Sardi suas hac in re sententias editis voluminibus aperuerunt: Turritanus scilicet contra Luciferum, Ambrosius autem Machinus anno 1639. pro Lucifero pugnavit, & opus obtulit Urbano Papæ VIII. cui nempe Machino Bollandiani strenue adhæserunt, nihilque de eadem causa intactum reliquerunt. Alia denique sorte plura pro Lucifero haberentur, si liber pro ipso Lucifero inceptus ab erudito Canonico Nurra fuisset ad umbilicum perductus & typis impressus: plura quippe in Urbe pro sanctitate Luciferi cumulerat; sed, antequam opus absolveret, Florentiæ mortuus est; cujus porro labores ad summum Pontificem Clementem XI. ab Archinto nunc Nuntio Florentiæ Apostolico transmissi, inter codices insignis bibliothecæ ab eodem Pontifice relictæ, si diligenter perquirantur, fortassis reperientur. Quantum tamen spectat ad cultum Luciferi tanquam Beati, si vera essent exposita a nuper allegatis Bollandianis *cap. 10.* (scilicet anno 1641. sacram Congregationem Inquisitionis Romanæ sub gravibus poenis silentium controversiæ imposuisse, & decrevisse, cultum Luciferi servandum in eo statu, in quo erat) hinc scientia, & tolerantia, & sanctæ Sedis permissio derivari possit sufficiens pro cultu limitato, & consequenter pro Beatificatione.

3 Sed, si integra facti series recte perpendatur, difficile admodum erit tuto asserere, Luciferum Calaritanum habendum esse tamquam Beatificationem. Enimvero, cum inter Archiepiscopos Calaritanum, & Turritanum super cultu & sanctitate Luciferi dissensiones ac similitudines fuissent exortæ, sicuti modo diximus; delata earum cognitione ad tribunal Inquisitionis Hispanicæ, earum examen ad Sedem Apostolicam, ad quam de jure pertinebat, subinde revocatum fuit. Cum autem summus Pontifex Urbanus VIII. re mature discussa in tribunali supremæ universalis Romanæ Inquisitionis, habita potissimum ratione scandalorum, quæ ex acri disputatione de sanctitate & cultu Luciferi derivabantur, prohibuerit omnibus ac singulis disputare, & scripto, vel typis sanctitatem & cultum prædictum aut impugnare, aut defendere, statutis poenis adversus repugnantes, atque addita protestatione, se non intendere aliquid declarare sive pro sanctitate, sive contra sanctitatem Luciferi, sed velle, eam manere in statu, in quo reperiebatur; non videtur permissio & tolerantia talis fuisse,

qualis ex supradictis esse debet, ut Beatificationem importet : & eo minus, quia, excitata indagine super intelligentia primi decreti, idem summus Pontifex clarius & apertius mentem suam explicavit, veluti ex sequentibus ipsis decretis plene desumitur.

Die 30. Decembris 1638. a Nativitate. Lecto memoriali Archiepiscopi Calaritani, quo instat, causam vertentem in hoc sancto Officio inter ipsum, & Archiepiscopum Turritanum circa venerationem Luciferi olim Archiepiscopi Calaritani non cognosci in tribunali S. Officii Hispaniarum, ad quod habuit recursum dictus Turritanus, sed in hoc S. Officio, in quo est incepta causa; EE. DD. mandarunt, scribi Nuntio Apostolico Hispaniarum, qui procurret, ut Inquisitor generalis Hispaniarum desisset a cognitione huiusmodi causa; cujus cognitio spectat ad sanctam Sedem.

Die 20. Junii 1641. Sanctissimus providere volens, ne jurgia & dissensiones oriantur inter dioecesanos Archiepiscopatus Calaritani, et Turritani, ceterosque insulae Sardiniae incolas, occasione prætensa sanctitatis, cultus, et venerationis Luciferi olim Archiepiscopi Calaritani, utque cessent scandala, quae hactenus in Dei offensam occasione praedicta irrepere, habita mature deliberatione et auditis votis EE. DD. Cardinalium contra haeticam pravitatem generalium Inquisitorum, praecipit omnibus et singulis cuiusvis Ordinis &c. et aliis quibuscumque tam Ecclesiasticis, quam secularibus personis cuiusvis status, ne in posterum, donec a Sanctitate sua, vel sancta Sede fuerit aliter ordinatum, audeant super praedicti Luciferi prætensa sanctitate, cultu, ac veneratione publice tractare, disputare, vel altercare, illamque neque scripto, nec typis impugnare, aut defendere. Contra facientes autem eadem Sanctitas sua, si seculares sint, excommunicationis ipso facto incurrere; Ecclesiasticos vero tam seculares, quam regulares &c. suspensionis a Divinis, ac privationis vocis activae & passivae respectivae, aliisque poenis arbitrio Sanctitatis suae infligendis subiacere voluit. Per huiusmodi tamen provisionem eadem Sanctitas sua circa prætensam Luciferi sanctitatem, vel e contra aliquid declarare seu decidere non intendit; sed vult, eam remanere in statu, in quo reperitur. Volens & decernens pro observatione praesentis decreti, quod contra huiusmodi transgressores, etiam Regulares, tam Episcopi, & Praelati, alique Ordinarii locorum, quam haetica pravitatis Inquisitores procedant, & in eos severe animadvertant.

Die 17. Octobris 1647. Lecto memoriali aliquot devotorum Christifidelium, quo supplicatur, declarari, an vigore decreti san. mem. Urbani VIII. emanati die 20. Junii 1641. ne aliquis auderet super Luciferi olim Archiepiscopi Calaritani prætensa sanctitate, cultu &c. publice tractare &c. neque in scriptis impugnare &c. sub poenis &c. donec a sancta Sede Apostolica fuerit aliter ordinatum, possit, vel non, in ecclesiis Officium, Missa solemnis, vel privata, & illius imago exponi populo veneranda & adoranda, & sine scrupulo ista facere ad laudem & gloriam dicti Luciferi, & praecipue in dioecesibus & provinciis, ubi nondum fuerunt exposta, nec venerata &c. Sanctissimus dixit, non licere.

4 Sequitur examen cultus erga Raymundum Lullum. Nam Arturus in

in Martyrologio Franciscano ad diem 29. Julii Martyrium ob Fidei Christianæ prædicationem Raymundo ipsi a Saracenis inflictum, ejus corporis delationem ad insulas Baleares, & demum cultum, qui pia Fidelium veneratione Majoricæ eidem exhibetur, commemorat. Sed, ut bene perpendatur, an inter Beatos Raymundus sit recensendus, satis profecto non est, publici cultus antiquitatem demonstrare, scientiamque & tolerantiam Episcoporum; si suspicio legitima habeatur de sensu Sedis Apostolicæ potius adverso, quam favorabili cultui prædicto. Extat nempe Gregorii XI. solemne judicium de libris a Raymundo Lullo conscriptis, & de nota erroris & hæresis manifestæ, qua ducenti eorumdem articuli damnati sunt, quemadmodum videri potest apud Nicolaum Eymericum in *directorio Inquisitorum* 2. part. *quest.* 9. & *quest.* 26. ubi bullam Gregorii interferit. Asserere autem, Gregorianum diploma fuisse a prædicto Eymerico confictum, vel errores cujusdam Raymundi Lulli de Tarraga ab eodem Gregorio XI. condemnatos fuisse, Raymundo Lullo, de quo nunc est quæstio, falso adscriptos, ut pluribus prosequitur Theophilus Raynaudus in *opere de bonis, & malis libris tom.* II. *partit.* I. *erotem.* 10. *num.* 246. nulla verisimilitudine niti videtur. Primo enim Eymericus fuit vir gravis & egregie de Religione Catholica meritis, ita ut temerarium omnino sit, ejusmodi viro impingere bullæ Pontificiæ fictionem, quemadmodum optime adnotavit Raynaldus *ad ann.* 1372. *num.* 35. præsertim vero, cum idem Eymericus Inquisitoris munere tunc temporis fungeretur, & ex ejus relatione librorum judicium Pontifex assumpserit; præterea adversus proscriptos errores libellum ille composuerit Cardinali S. Angeli oblatum, atque hujus ope Clementi VII. Antipapæ relatum, sicuti colligitur ex codice bibliothecæ Colbertinæ quem exhibet Balutius in *notis ad vitas Paparum Avenionen.* col. 1115. *tom.* I. Deinde, utcunque sit, utrum Gregoriana bulla in Pontificiis regestis nunc adsit, necne, hoc unum certum esse videtur, posito etiam defectu bullæ in regestis, validum desumi non posse argumentum pro ejus confictione, quando causa probabilis suppetit perditionis ejusdem; quæ sane in hypothesi nostra minime deest, cum bulla, de qua nunc agimus, edita fuerit anno VI. Pontificatus Gregorii; regestum autem hujusce anni deperditum hercle fuerit, occasione translationis Sedis Apostolicæ a civitate Avenionenſi ad Urbem eodem tempore factæ, veluti animadvertit Graveson *histor. Eccles. colloq.* 3. *pag.* 92. *tom.* 5. Item, quando pro veritate bullæ validissima habentur argumenta; atque hæc pariter ea super re non deficiunt, cum & exemplar authenticum reperitur in Ordinis Prædicatorum Romano archivo, & autographum Gerundæ asservetur, & Gregoriana ipsa Constitutio in archivis Barcinonis, Tarraconis, & Valentiniæ anno Domini 1376. quo scilicet lata est, fuerit adscripta; quibus quidem sine ulla dubitatione probatur, minime confictam fuisse: confictam quippe Antifites tam celebrium civitatum inter monumenta suarum Ecclesiarum servari passi non fuissent juxta ea, quæ ad rem solide deducuntur

tur ab erudito viro F. Antonino Bremond Ord. Præd. tom. 2. *Bullar. in notis ad Gregorianam Constitut.* ibi plene relatam. Demum, si Raymundus de Tarraga, & Raymundus Lullus bene in Apostolicis Constitutionibus invicem distinguuntur. Raymundus etenim de Tarraga de Judaismo ad Christianam Fidem conversus nomen dedit Religioni FF. Præd. tum propter nonnulla capita hæresim sapientia carceribus Barcinonensis Inquisitionis mancipatus anno primo Gregorii Papæ XI. hoc est anno 1371. luit poenas errorum, non quos scripserat, sed quos publicaverat & prædicaverat; *publice tenet, asserit, et prædicat doctrina sua sacrilega & perversa*; constructo adversus eum processu a Nicolao Eymerico Inquisitore in provinciis Tarraconensi, & Cæsaraugustana, atque ab Archiepiscopo Tarraconensi. Contra alter Raymundus, qui Lullus appellatur (quæ certe appellatio in diplomatibus Pontificiis nunquam alteri tribuitur Raymundo, qui semper de Tarraga denominatur) civis fuit Majoricensis, & multos libros conscripsit, *se in regnis eisdem invenisse volumina diversorum librorum in vulgari scriptorum a quodam Raymundo Lullo cive Majoricensi editorum, in quibus, ut ipsi Inquisitori videbatur, multi continebantur errores & hæreses manifesta*; nec unquam carceribus inclusus, librorum tamen & errorum suorum damnationem tulit, edita anno 1376. a Gregorio XI. Constitutione post librorum examen factum a Nicolao Eymerico, & subsequenter resumptum a Petro Card. Ostiensi, & plusquam viginti Magistris in sacra Theologia, ut evidenterprehenditur ex Constitutionibus Pontificiis evulgatis in 2. tom. cit. *Bullar. Ord. Præd. pag. 268. pag. 270. et pag. 289.* Proinde uniuersum facile patet, & Gregorianam Constitutionem non fuisse sanctam, & errores Raymundi de Tarraga Raymundo Lullo fuisse adscriptos: idque eo magis, quia tum sæculo decimo sexto, tum initio sæculi decimi septimi notum est quid definitum fuerit in sacra Congregatione Indicis, atque in Congregatione SS. Inquisitionis habitæ coram summo Pontifice Paulo Papa V. de operibus Raymundi Lulli, teste Card. Albitio in tract. de *inconstancia in Fide cap. 40. a num. 143. ad nu. 152.* ubi omnia tunc gesta exponit. Scio equidem, inter Eruditos varium esse iudicium de sanctitate Lulli: pro ea quippe strenue pugnant Antonius Belluer Canonicus Majoricensis in *apologia Lulli*, Jo. Sequi in *ejus vita*, Salesles tom. 2. de SS. Inquisitione, VVadingus in *annal. Minor. ad ann. 1315. num. 8. tom. 6.* Atque eruditus P. Jo. Baptista Sollierius ad diem 30. Junii tom. 5.: contra eam autem scribunt Bzovius ad an. 1312. num. 18. et seqq. tom. 14. Echard de *Scriptor. Ord. Præd. ad sac. iv* in F. Niclao Eymerico tom. 1. Eymericus in *directorio Inquisitionum loc. cit.* Jacobus Galterius in *tab. chronographica sac. 13. cap. 5.* Graveson loc. cit. Sed rationes hinc & hinc adductæ efficere saltem debent, ut unusquisque prudens & Sedi Apostolicæ obsequens de Raymundi Lulli sanctitate iudicium suspendat, usquequo Sedes eadem Apostolica decernat quid sentiendum sit, sicut ipse etiam VVadingus loc. cit. num. 9. libenter admittit. Quamobrem merito Petrus Franciscus de Rubeis egregius olim Fidei Promotor

motor P. Provinciali Belgii Ord. Præd., qui quæſiverat, an dictus Raymundus pro Sancto & Martyre haberi poſſet, reſpondit, eum nec poſſe dici, nec haberi pro Sancto, aut Martyre; veluti ex ejus ſuffragio colligitur typis impreſſo apud Card. Albitium *loc. cit.* In quo proinde rerum themate, quidquid ſit de cultu, atque ejus antiquitate una cum Episcoporum Majoricensium tolerantia, nunquam fortaſſe dimiſſa majorum timore malorum, memoratus Raymundus Lullus inter Beatificatos recenſeri non poſteſt.

## C A P U T XLI.

*In quo nonnulla indicantur de Sedis Apoſtolica definitiva ſententia, que in Canonizatione perferitur.*

**I** Nutilis proſecto res eſſet, aliquid adjungere de ſummi Pontificis definitiva ſententia, per quam in Canonizatione pronuntiat, Beatum eſſe Sanctorum catalogo adſcribendum, & tamquam Sanctum in univerſa Eccleſia colendum; ſi pro Sanctis, & Canonizatis, etiam poſt delationem cauſarum Canonizationis ad ſummum Pontificem, illi tantum haberentur, qui, prævia proceſſuum conſtructione, ſervataque forma judicii in ſuperioribus expoſiti, per ſententiam ipſam definitivam a ſummo Pontifice prolatam, adhibitis ſupra pariter enuntiatis cæremoniis, in Sanctorum catalogum adſcribuntur. Verum, cum æquipollens quædam Canonizatio introducta fuerit, & adhuc vigeat poſt tempora prædicta, per quam videlicet ſummus Pontifex aliquem Dei ſervum in antiqua cultus poſſeſſione exiſtentem, & de cujus heroicis virtutibus, aut martyrio, & miraculis conſtans eſt Hiſtoricorum fide dignorum communis aſſertio, & continuata prodigiorum fama non deficit, jubet in univerſa Eccleſia coli per Officii ac Miſſæ recitationem & celebrationem determinato aliquo die, nulla accedente formali ſententia definitiva, nullis præmiſſis judicialibus proceſſibus, nulliſque conſuetis cæremoniis adhibitis; operæ pretium eſt, aliqua hic ſuperaddere de hiſce Canonizationibus æquipollentibus: quæ ut recte percipiantur, per exempla exponere opportunum ducimus.

## §. I.

*De S. Romualdo.*

**N** Arrat, ut etiam alibi dictum eſt, S. Damianus in *ult. cap. vita S. Romualdi*, ſummum Pontificem anno quinto poſt illius obitum Monachis impertitum fuiſſe ſacultatem ſupra ejus corp. is altare conſtruendi: Poſt quinquennium vero a ſancti viri obitu, data Monachis ab Apoſtolica

*folica Sede licentia, ut supra venerabile corpus ejus altare construerent.* Dilegentius tamen adhibitis, ut Indultum reperiretur, tum in archivis Vallis Castri, quo in loco sanctum corpus sepultum remansit spatio annorum 400. tum in archivis Fabriani, ad quam Urbem facta fuit ejusdem corporis translatio, nunquam inventum est. A Monachis præterea Camaldulensibus Guillelmus Card. Sadoletus interrogatus fuit, an in archivis Apostolicis ullum extaret monumentum Canonizationis S. Romualdi: ipse autem respondit, adeo manifestam & illustrem fuisse ejus sanctitatem, ut sine consuetis cæremoniis cultus ejus fuerit in universam Ecclesiam receptus; quemadmodum refert Fortunius in *opuscul. de translatione S. Romualdi, & in 2. part. histor. Camald. lib. 1. cap. 32.* Censet vero Card. Baronius *ad an. 1027. num. 13.* S. Romualdum fuisse canonizatum erectione altaris super ejus corpus a Sede Apostolica post quinquennium ab obitu concessa; ejusdemque Canonizationem desumit etiam ex epistola S. Petri Damiani *ad Henricum Archiepiscopum Ravennatem*, in qua testatur, nonnullos suo tempore cultum habuisse tamquam Sanctos, & veluti tales fuisse recognitos, qui tamen Ordines ab Episcopis simoniaci receperant, necnon super eorum corporibus erecta fuisse altaria, atque oblata sacrificia, uti suere Romualdus Camerinenfis, Amicus &c.

3 Sed prætermittentes, admodum difficile esse, ut epistola S. Petri Damiani, loquens de S. Romualdo Camertino, intelligatur de S. Romualdo, de quo nunc agimus (quippe qui, licet sepultus sit in diocesi Camertina, Camers tamen non erat; nec ulla probatione evincitur Ordines suscepisse ab Episcopo simoniaco: ita ut verisimilius sit, eamdem epistolam interpretandam esse de alio Romualdo Episcopo Camerte, qui prædictis temporibus floruit) majorem difficultatem in eo statuimus, quod facultas Monachis data a Sede Apostolica construendi altare super corpus S. Romualdi, Canonizatio potius, quam Beatificatio, ut nobis videtur, appellari velit. Beatificatio nempe potius est, non solum quia verba concessionis modo relata sonant facultatem, non præceptum; verum etiam quia particularem coetum Monachorum, minime vero universalem Ecclesiam respiciunt. Quapropter, cum ejus cultus non extenderetur ultra fines provinciarum Piceni, Umbriæ, & Tusciæ, legimus apud eundem S. Petrum Damianum *lib. 6. epist. 30. ad Theuzonem Monachum*, in quadam disceptatione, ut fides dictis adstrueretur, nomine S. Romualdi in testimonium veritatis a Monachis vocato, responsum fuisse a disceptantibus, in testimonium esse adhibendos alios Sanctos, de quorum sanctitate & cultu in universa Ecclesia nulla esset dubitatio; Romualdo posthabito, cujus sanctitatem & cultum ignorabant, utpote ad solos Monachos, aut determinatas provincias coarctatum, uti communiter fit in Beatificatione, non vero extensum ad universam Ecclesiam, quemadmodum in Canonizatione consuevit: *Cumque super quodam disceptationis articulo S. Romualdus in testimonium duceretur, presto quesitum est, utrum ipse Romualdus aut tunc extiterit Sanctus*

*Sanctus vel nunc sit in paradiso receptus; & licet contra fidem totius Ecclesie nostrarum provinciarum hac de sancto viro questio moveretur, ad adstruendam tamen partis nostra sententiam, illos in testimonium Sanctos adscrivimus, quorum celeberrima & vetus opinio etiam apud plebes quoslibet & ignaros mutare non possit. Leonem videlicet, atque Gregorium.*

4 Quid ergo dicendum erit? Dicine idcirco poterit, S. Romualdum non esse canonizatum? Minime vero. Nam probatum est utique, eum fuisse a Sede Apostolica post quinquennium ab ejus obitu tantummodo beatificatum; tum notum est, ejus cultum initio etiam sæculi xvi. fuisse coercitum intra Monachos, & Eremitas Camaldulenses, ita ut servus Dei Paulus Justinianus Institutor Congregationis PP. Erem. Camald. S. Romualdi, quæ dicitur Congregatio Montis Coronæ, Monachis Cassinensibus propterea suaserit, ut in suis ecclesiis religiosum cultum exhiberent erga S. Romualdum, qui Ordinem monachicum tot virtutum exemplis illustraverat, uti narrat Abbas Camaldulensis Augustinus Romanus Fiori in *vita servi Dei Pauli Justiniani lib. 3. cap. 29.* sed & compertum est, paulo post eum fuisse a Clemente Papa VIII. canonizatum Canonizatione æquipolenti, omiſſis quibuscumque judicialibus probationibus, prætermiſſisque consuetis cæremoniis; cum heroicæ illius virtutes, continuatus per tot sæcula cultus, assidua miraculorum patratio, ceteris omnibus præteritis, exposcerent, ut ejus cultus præceptive per universam Ecclesiam extenderetur, in quo nimirum Canonizationis natura consistit. In Bullario Romano extat Constitutio Clementina in ordine 32. tom. 3. in qua de consilio Congregationis sacrorum rituum Pontifex jussit, ut a quibuscumque personis Ecclesiasticis Sæcularibus, & Regularibus ubique terrarum existentibus die 7. Februarii sub ritu duplici Romualdi Officii recitaretur; transposito scilicet hujus S. Viri sexto a die 19. Junii, qua mortuus est, ad diem 7. Februarii, qua solemnitas ejusdem corporis translatio facta est, ne illustrium Martyrum Gervasii, & Protasii cultus imminueretur, quippe quorum festum celebratur prædicta die 19. Junii, & ne a Missali Romano eorum Missa subtraheretur, cum proprium habeat Introitum a S. Gregorio compositum in memoriam pacis eadem die initæ inter Romanos, & Longobardos, ut in *comment. prævio ad vitam S. Romualdi num. 27. ad diem 7. Februar. ex Gavanso* plene referunt Bollandiani.

## §. I I.

*De S. Norberto.*

5 **S**anctus Norbertus Præmonstratensis Ordinis Institutor & Episcopus Magdeburgensis obiit anno 1134. ut adnotavit Siebertus in *chronicis ad an. prædictum*, utque sequitur Card. Baronius in *notis ad Martyrol. Rom. ad diem 6. Junii*. Admirabilis ejus vita conscripta fuit ab Hugone.  
Tom. I. A a a ne,

ne, qui fuit ipſius ſucceſſor in gubernio monaſterii Præmonſtratenſis, vel certe a Canonico Præmonſtratenſi juxta mandata & inſtitutiones Hugonis, quemadmodum Baillet in *tab. crit. ad eandem diem 6. Junii* admittit. Porro teſtatur Surius, ſe nescire, an Norbertus vir ſanctiſſimæ vitæ adhuc ſit inter Sanctos relatus. Caſtellinus autem in *traſt. de certis. glor. SS. pag. 441.* ait, eum in Sanctorum numerum ſolemniter eſſe relatum; ſed ignorari, per quem Pontificem id factum ſit. Joannes vero Le Paige *lib. 2. bibliot. Præmonſtr. part. 2. cap. 43.* ait, ipſum anno 1214. fuiſſe ab Innocentio III. ſolemni ritu inter Sanctos adſcriptum. Quia tamen tot alia Canonizationum factarum ab eodem Pontifice authentica diplomata ſuperſunt, at hoc quidem de Canonizatione S. Norberti minime invenitur, & contemporanei deſunt Auctores fide digni peractam ipſam Canonizationem teſtantes, merito Bollandiani *ad diem 6. Junii in comment. præv. ad vitam S. Norberti §. 1.* dubitant de facti veritate. Miræus in *chronico Præmonſtrat. ad an. 1582.* cum a Gregorio XIII. aſſerit fuiſſe canonizatum; Narrat enim, edito a Jo. Molano Uſuardi Martyrologio cum indiculo Sanctorum Belgii, ſcriptiſque a Molano in eodem indiculo ſequentibus verbis: *Norbertus Sanctenſis Fundator Ord. Præmonſtrat. et Archiep. Magdeburgenſis, nondum eſt catalogo Sanctorum inſcriptus, haud propter inopiam meritorum, quæ ampliffima habuit, ſed, ut opinor, quia id Ordo a Romana Sede petere neglexerit; Ordinem ipſum a memoratis verbis Molani excitatum confuſiſſe ad Card. Philippum Boncompagnum ſuum apud ſanctam Sedem Protectorem; tum ſub ejuſdem Cardinalis præſidio neceſſaria documenta, & ſignanter in bibliotheca Vaticana ſcriptum ampliſſimum a multis retro annis ad ſolem nem Norberti Canonizationem adornatum, inventa fuiſſe; quibus quidem diligenter excuſſis, Gregorius XIII. Canonizationis diploma expedivit. Aſſentiuntur etiam Bollandiani *loc. cit. num. 2.*, ubi Canonizationem ad eundem referunt Gregorium. Veruntamen, cum Gregorii diploma virtutes quidem & miracula recenſeat S. Norberti, ejuſque nomen in pluribus Martyrologiis uſu Catholicæ Eccleſiæ receptis deſcriptum & adnotatum utique teſtetur; ſed tamen indulgeat Ordini tantum Præmonſtratenſi die 6. Junii ſub ritu duplici in ejuſdem honorem Officii celebrationem cum Octava, uti conſtat ex eodem diplomate relato apud citatos Bollandianos, & apud Emanuele Rodericum in *Conſtitut. 17. typis impreſſa in ejus collect. privileg. & Indult. Apoſtolic. tom. 2.*, tutum proſecto non erit, S. Norberti Canonizationem in diplomate Gregoriano conſtituere, quod, utpote conceptum verbis facultatem ſonantibus, & in ſolo Ordine Præmonſtratenſi coercitum, ſolius videlicet Beatificationis vim poteſt obtinere. Quibus proinde præmiſſis, canonizatus ſane dicendus erit S. Norbertus, ſed Canonizatione æquipollenti ſubſequenter facta ab Urbano VIII. & a Clemente X. quorum ille ejus feſtum inſeruit Breviario & Miſſali Romano de præcepto colendum ritu ſemiduplici, hic autem in decreto expedito de conſilio Congregationis ſacrorum rituum die 7. Septembris 1672. ſtatuit,*



statuit, sub ritu duplici ejus Officium in posterum recitandum de præcepto ab omnibus Christianis tum Sæcularibus, tum Regularibus utriusque sexus, qui ad Horas canonicas tenentur. Ex notissima quippe sanctitate, & undique coruscante miraculorum fama, cultuque jam ad universum Ordinem Præmonstratensem per diploma Gregorianum extenso, existimarunt memorati Pontifices, finem negotio esse imponendum, atque adeo cultum esse S. Norberto in universa Ecclesia decernendum aliorum instar Sanctorum, qui fuerunt Ordinum Regularium Fundatores, quique similem cultum habent in universa itidem Ecclesia.

## §. III.

*De S. Brunone.*

6 S. Sanctus Bruno Fundator Ord. Carthusianorum mortuus est anno 1101. juxta adnotata a Card. Baronio in *notis ad Martyrolog. Rom. ad diem 6. Octobris*. Ejus vita scripta fuit a Francisco de Puteo Priore primariæ Carthusiæ, & a Petro Blomevenne Priore Carthusiæ Colonienfis; ex quibus duobus scriptis composita est ea ejusdem vitæ relatio, quæ extat apud Surium *ad diem 6. Octobris*. Cardinalis autem Baronius *loc. cit.* refert, S. Brunonem fuisse a Leone X. canonizatum; quin & ejus Canonizatio verbis describitur apud Surium *loc. alleg. pag. 99.* Narrat enim Baillet *ad dictam diem* ante prædictum Pontificem cultum hujus S. Viri fuisse neglectum propter infortunium, quod in monasterio Carthusianorum Calabriæ universus Ordo passus fuerat, ita ut alii ejusdem Ordinis Religiosi extra dictum monasterium degentes ad suum S. Fundatorem preces privatim tantum, non publice funderent. Verum, quomocunque id sit, nullo certe pacto dici posse videtur S. Bruno a Leone X. canonizatus; sed ejus æquipollens Canonizatio eximiiis tanti viri meritis, præclarissimi Ordinis fundationi, continuatæ insignium miraculorum famæ, cultusque conceptioni primum quidem universo Carthusianorum Ordini a Leone X. factæ, postea toti Ecclesiæ ad libitum a Gregorio XV. innixa, assignanda videtur summo Pontifici Clementi X. ut ex sequenti decreto colligitur: *Enixis precibus SS. D. N. Clementi Pape X. porrectis per E. D. Card. Nidardum nomine Sereniss. Hispaniarum Regina, quibus Sanctitati sue supplicabatur, ut dignaretur concedere, quod Officium S. Brunonis Confessoris Fundatoris Ord. Carib. hætenus ab Ecclesia universali sub ritu semiduplici recitatum (supple ad libitum) in posterum sub duplici recitaretur ab omnibus utriusque sexus tam Sæcularibus, quam Regularibus, qui ad Horas canonicas tenentur; & remissis a Sanctitate sua ad sacrorum rituum Congregationem, eadem ad relationem E. D. Card. Sfortia censuit, prædictam gratiam concedi posse, si eidem SS. D. N. visum fuerit: die 3. Martii 1674. Et, facta de prædictis Sanctissimo relatione per me Secretarium, Sanctitas sua benigne annuit: die 14. ejusdem mensis Martii & anni 1674.*

A 2 2

7 Ne

7 Ne autem temere asseruisse videamur, S. Brunonem nequaquam a Leone X. canonizatum fuisse, sicuti communis fert existimatio, sed tantum fuisse beatificatum, tum ejus Officium fuisse pro universa Ecclesia concessum a Gregorio XV. ad libitum; operæ pretium fore arbitramur, hic inferere documenta ex archivo majoris Carthusiæ Gratiopolitanæ authentico ritu desumpta.

Antonius miserat. Div. Tit. S. Praxedis S. R. E. Presbyter Cardinalis Papiensis, necnon totius Ord. Carthusiensis Protector, universis & singulis presentes nostras inspecturis & lecturis salutem in Domino sempiternam. Cum ex nostro protectionis officio, benevolentiaque, ac pietate, qua universo Carthusiensis Ordini prædicto afficimur, hodie ad pedes SS. D. N. Leonis Divina providentia Papa X. præsentavimus venerabiles Religiosos viros DD. Matthæum Bononia, Ludovicum Mantua, Jacobum Neapolis, & Hugonem S. Crucis in Urbe ejusdem Carthus. Ord. domorum Priores; Et tam nos, quam Religiosi prædicti plura de laudibus, præconiis, ac vitæ sanctitate B. Brunonis Confessoris ejusdem Ord. Carthus. primi Fundatoris ac Institutoris Sanctitati suæ retulissimus & exposuissimus; qui Vir Beatus, declinante Christiana militia, & propter iniquitatis abundantiam Charitate plurimum frigescente, tamquam dux strenuus ad resistendum hostibus novum in Ecclesia instruxit & instauravit exercitum, & in vineam, quam Dominus sua dextera plantaverat, jam vitiorum vepribus & spinis obstatam veluti solertissimus Paterfamilias, tot fideles conduxit operarios, ut uberiores in dies ex ea fructus sanctæ Ecclesiæ proveniant, & odorem suavitatis proferat & sanctitatis; ipsius namque B. Confessoris multiplex doctrina, vitæ castigatissima, innocentia, ac munditiæ exemplum plurimos generans sanctæ adoptionis filios, generatque, & nutrit in dies incessanter; cujus meritis Ordo præfatus exornatur, & comprobatur miraculis, & assidue, quasi de virtute in virtutem, crescit, rigans montes de superioribus suis, & de fructu operum suorum satiatur terra. Idcirco nos una cum præfatis Prioribus ab eodem D. D. N. venerabilium virorum Francisci de Puteo moderni Generalis, aliorumque Priorum, & universorum Monachorum, Monialium, Conversorum, & personarum dicti Ordinis nomine humiliter supplicavimus, ut pro omnipotentis Dei gloria, qui in suorum exultat veneratione Sanctorum, ac Beati prædicti Confessoris honore, illiusque evidentissimis sanctitatis operibus, signisque virtutum, quibus in carne positus claruit, & ad calos evocatus perpetuo splendet, proque tam præclari Ordinis decore de Apostolica munificencia & benignitate sub sexta Octobris die, qua die, posita carnis sarcina, idem B. Bruno Confessor ad perpetuam evolavit gloriam, festum quotannis in ejus memoriam, ac solemne Officium dignis in Domino laudibus & honoribus celebrandi, & commemorationem ejusdem ceteris diebus faciendi licentiam concedere dignaretur; quarevis idem B. Bruno Confessor non reperiat aliter canonizatus per summos Pontifices Prædecessores suos, ut moris est. Qui præfatus SS. D. N. Papa asserens, se jamdudum de laudibus ac sanctitate ejusdem B. Confessoris plurima intellexisse, arbitratus, dignum esse ac consonum rationi, ut, quem Deus in hoc sæculo tantis donis & gratiis insignivit, assumptum in calis magis ac  
magis

magis venerandum, & cui viventi dederat cor Omnipotens ad precepta & legem vite & discipline, eidem nunc apud thronum Divina gloria existenti impendatur in terris debita devotionis obsequium; huiusmodi nostris, & prefatorum Priorum supplicationibus libenter annuens, dictis D. Francisco moderno ac pro tempore Generali existenti, & aliis Prioribus, Monachis, Monialibus, Conversis, ac personis dicti Ordinis, in ipsius Ordinis duntaxat domibus, & eorum Ecclesiis seu Capellis festum prædictum solemniter colendi & devotione debita celebrandi, præfati que Brunonis corpus & memoriam dignis in Domino laudibus prosequendi & venerandi, Officiumque conveniens in honore ipsius B. Confessoris agendi & decantandi, necnon commemorationem singulis diebus faciendi, ex tunc & de cetero in perpetuum cum Dei benedictione licentiam viva vocis oraculo nobis facto benigne ac favorabiliter concessit pariter, ac indulgit; non obstante, quod idem B. Bruno Confessor non inveniat aliter canonizatus, ut supra: præsentibus quoque ibidem Reverendis. in Christo Patri D. D. Laurentio Pusio Tituli Sanctorum Quatuor Coronatorum S. R. E. Presbytero Cardinale, & Rev. P. D. Francisco Armellino Camera Apostolica Clerico. Quare, ne apud quemquam de huiusmodi concessione possit aliquod dubium suboriri, præsentibus manu propria subscriptas, et nostri soliti sigilli appensione munitas confici iussimus, et per nostrum quoque Secretarium subscribi fecimus in fidem, robur, et testimonium præmissorum et veritatis. Datum Rome in Apostolico palatio die 19. Mensis Julii anno 1514. Pontificatus vero D. N. an. II. Antonius Card. S. Prædix Protektor manu propria. Antonius Testa Verulanus.

Anno Domini 1515. Capitulum generale Ord. Carthus. celebratum die 7. Maji, et sequentibus, insequendo tenorem bullæ Canonizationis S. Brunonis, hanc promulgavit ordinationem.

Cum SS. D. N. D. Leo Divina providentia Papa X. et modernus nobis, et Ordini nostro sua gratia dederit et concesserit licentiam et auctoritatem, ut in singulis domibus dicti Ord. nostri, et harum Ecclesiis seu Capellis possimus festum B. Brunonis Patris nostri solemniter colere, et devotione debita celebrare, ejusque corpus et memoriam dignis in Domino laudibus prosequi et venerari, et Officium conveniens in honorem ipsius agere et decantare, necnon commemorationem singulis diebus de eo facere, et alia, prout in desuper consecutis litteris plenius continetur: Propterea, ne tantam gratiam neglexisse videamur, ad Dei et ejusdem Patris nostri laudem et honorem, Ordinis incrementum, et nostram subditorumque nostrorum salutem, consolationem, et pacem, dictarum litterarum mentem et tenorem insequentes, volumus et ordinamus, quod de cetero annis singulis, perpetuis futuris temporibus, die 6. mensis Octobris, quo die idem Pater noster carne solutus beata fuit immortalitate vestitus, festum prædictum in omnibus et singulis domibus sociis Ordinis nostri prædicti, et earum Ecclesiis seu Capellis in honorem, et sub nomine et vocabulo ejusdem B. Brunonis Confessoris cum candelis solemniter celebretur, et ab omnibus Prioribus, Monachis, et Conversis, et aliis personis dicti Ordinis nostri veneratione debita colatur, ejusque corpus et memoria dignis in Domino laudibus veneretur, fiatque et decantetur die sexta Octobris de eo solem-

ne Officium cum 12. lectionibus, capitulo, et responsorio, et ceteris caremoniis, quæ in festis solemnibus candelarum solent observari, in hunc videlicet, qui sequitur, modum. Ad primas Vesperas antiphona &c.

Coangustabatur sere inter Carthusienses Divi Brunonis celebritas, donec per totum orbem Christianum promulgata est a Gregorio XV. Pont. Max. Tale autem decretum a sacra rituum Congregatione pro festo S. Brunonis sub ritu semiduplici primum emanavit, quod hic subjicimus.

Die 19. Novembris 1622. Indultum S. Brunonis. Supplicationi a D. Bernardo Gazio Ord. Carthuf. Procuratore Generali sacra rituum Congregationi porrecta eadem Congregatio, communi Illustrissimorum R. P. assensu, inclinata, habita etiam SS. D. N. confirmatione, festum S. Brunonis ejusdem Ordinis Fundatoris die 6. Octobris, quæ in celum evolavit, in Missali ac Breviario Romano reponi, et Officium de eo semiduplex ab omnibus ubique Fidelibus recitari, concessit. Illi enim inter Sanctos præcipue universalem Ecclesiæ venerationem expostulare videntur, qui sacrarum Familiarum Institutores militanti eidem Ecclesiæ nunquam interitura suffragia reliquerunt. Sign. Franciscus Maria Cardinalis a Monte. Locus † sigilli. Joannes Baptista Rinuccinus Secretarius.

Anno 1623. Supra memoratus Gregorius Papa præcepit, ut die 6. Octobris omnes Sæculares, et Regulares ubique terrarum sub semiduplici ritu recitent Officium S. Brunonis Confessoris Fundatoris nostri, necnon in Breviario, Missali, et kalendaris in posterum imprimendis festum ejusdem S. Brunonis describendum statuit. Breve autem est hujusmodi.

Gregorius Papa XV. Ad perpetuam rei memoriam. Dominè nostri Jesu Christi, qui servos suos æterna gloria præmio donat in celis, vices, quamquam immeriti, gerentes in terris, ex adjuncto Nobis Pastoralis officii debito procurare tenemur, ut eorundem servorum Christi debita veneratio in dies magis promoveatur, et laudetur Dominus in Sanctis suis. Quamobrem Fidelium quorumlibet, præsertim vero sub suavi Religionis jugo, Altissimo famulantium votis, quæ peculiarem Sanctorum hujusmodi cultum et venerationem respiciunt, libenter annuimus, prout conspicimus in Domino salubriter expedire. Supplicationibus itaque dilecti Filii D. Bernardi Gazii Ord. Carthuf. Procuratoris Generalis Nobis humiliter porrectis inclinatis, de venerabilium nostrorum S. R. E. Cardinalium sacris ritibus præpositorum consilio, quod de cetero, perpetuis futuris temporibus, festum S. Brunonis ejusdem Ordinis Fundatoris die 6. Octobris, quæ in celum evolavit, in Missali et Breviario Romano reponi, Officiumque de eo semiduplex ab omnibus ubique Fidelibus recitari libere et licite possit et valeat, Apostolica auctoritate, tenore præsentium concedimus & indulgemus. Quocirca venerabilibus Fratribus Patriarchis, Archiepiscopis, Episcopis, ceterisque Ecclesiarum Prelatis in universo terrarum orbe constitutis præcipimus et mandamus, ut in suis quibusque Ecclesiis, provinciis, et diocesis præsentibus nostras litteras solemniter publicari, et ab omnibus Ecclesiasticis personis Sæcularibus, & quorumvis Ordinum Regularibus omnino observari faciant, non obstantibus constitutionibus & ordinationibus Apostolicis, ceterisque contrariis quibuscumque. Volumus autem, ut præsentium transumptis,

*sumptis, etiam impressis, manu alicujus Notarii publici subscriptis, & sigillo alicujus persona in dignitate Ecclesiastica constituta munitis eadem prorsus fides adhibeatur, qua presentibus adhiberetur, si forent exhibita, vel ostensa.*

*Datum Roma apud S. Petrum sub annulo Piscatoris die 17. Febr. 1623. Pontificatus nostri anno III. S. Card. S. Susanna. Ita est, Silvester Spada Illustrissimi & Reverendissimi D. Card. Vicarii Notarius. Locus † sigilli.*

*Concordat cum originali; in cujus rei fidem subscripsi de mandato Reverendi Patris Fr. Ambrosii Crollet Scriba ejusdem Reverendi Patris & Capituli generalis Carthusia, hac die 14. Octobris 1723.*

§. I V.

*De S. Petro Nolasco.*

8 **S**anctus Petrus Nolasco Fundator Ord. B. Mariæ de Mercede Redemptionis Captivorum mortuus est anno 1256. Fertur fuisse a Benedicto XII. seu XIII. illegitimo Pontifice inter Sanctos relatus; ut inquit ipse Baillet *in vita ejusdem S. Petri ad diem 31. Januarii*. Putant tamen alii, eum fuisse canonizatum ab Urbano VIII.: quin immo Bollandus *ad diem 29. Januarii pag. 990.* testatur, se ob oculos habuisse orationem panegyricam (*Lima formis excusam anno 1632.*) compositam a P. Mastriglio Duran Provinciali Peruviano Societatis Jesu, cum festa impetratæ Canonizationis peragerentur a Religiosis Ord. B. Mariæ de Mercede. Sed, si authentica documenta perpendantur, & insimul advertatur, nullum peractæ a Benedicto Canonizationis verum documentum superesse, & multo minus aliud documentum extare subsequentis alicujus approbationis ab aliquo alio legitimo Pontifice factæ, sicuti contigit in Canonizatione S. Birgittæ, de qua in superioribus sermo habitus est; unusquisque facile deprehendere poterit, de Canonizatione quidem S. Petri Nolasco non esse dubitandum: at id tamen intelligendum de Canonizatione æquipollenti facta ab Alexandro VII. ita exigentibus sancti viri meritis, aliisque concurrentibus circumstantiis in hujusmodi negotio a Sede Apostolica considerari solitis. Summus namque Pontifex Urbanus VIII. prævio consilio Congregationis sacrorum rituum, die 11. Octobris 1628. Ordini utique indulgit, ut celebrare posset festum hujus Sancti cum Officio & Missa de Comm. Conf. non Pont. juxta rubricas Breviarii & Missalis Romani, quemadmodum habetur in ejus Constit. 14. *in Bullar. Ord. B. M. de Mercede*; verum non nisi tempore Alexandri Papæ VII. ejusque auctoritate intercedente, prævio similiter memoratæ sacre Congregationis consilio, Sancti ejusdem nomen repositum fuit in Martyrologio Romano, quod contigit anno 1655. cum anno superiori 1654. precibus Regis Hispaniarum idem Pontifex mandasset, ut Officium S. Petri cum lectionibus propriis jam revisis & approbatis, & Missa reponerentur in Breviario ac Missali

fali Romano sub ritu semiduplici pro universa Ecclesia de præcepto omnes tum Sæculares, tum Regulares, qui ad Horas canonicas tenentur, altringente, sicuti legitur in ejusdem Pontificis decretis *in alleg. Bullar.* inveniendis. Hunc porro ritum Clemens Papa X. ad enixas preces Reginæ Galliarum die 23. Julii 1672. a semiduplici ad duplicem elevavit, ut ex ejus decreto habetur *in cit. Bullario.*

9 Ad hæc omitti non potest monumentum pertinens ad cultum ejusdem S. Petri, quod editum fuit in l. bro P. Marci Salmeron Magistri Generalis Ord. B. Mariæ de Mercede Redemptionis Captivorum, cui titulus, *Monumenta historica*; qui quidem liber conscriptus est idiomate Hispano, vulgatus autem anno 1646. Monumentum hocce compendium est cujusdam processus ab Ordinario post obitum Sancti constructi super ejus sanctitate, tum transmissi ad Alexandrum IV. summum Pontificem anno 1260. qui cum anno sequenti ex hac vita migraverit, eo uti pro Canonizatione non potuit. Instrumentum postea autographum repertum fuit in civitate Barcinonensi anno 1626. & exhibitum, quando actum est de concessione Officii, & de scriptione nominis in Martyrologio. Juridica autem monumenti recognitio facta quoque est anno 1721. coram Ordinario Barcinonensi, cujus exemplar authenticum servatur in Conventu S. Hadriani de Urbe. Hic porro habes ejus transumptum.

*Transumptum authentici documenti Actorum S. Petri Nolaschi, anno 1260. confecti, & asserti in archivio Conventus Barcinonensis, Ordinis B. Mariæ de Merc. Redem. Captiv., super cujus legalitate confectus fuit processus juridicus coram Ordinario Barcinonensi anno 1721. ut constat ex authentico transumpto totius processus, assertivo in archivio generali Conventus S. Hadriani de Urbe, in quo hæc habentur, quæ summam referemus.*

Die quarta Decembris 1721. vocato Josepho Francisco Fontana Notario publico Actuario, ac etiam Rev. Doctore Promotore fiscale Curia Barcinonensis, necnon Joanne Fabrer, et Isidoro Colomer testibus coram Illustre D. Dominico Pisferrer Presbytero, Doctore, Vicario Generali, & Officiali illius diocesis provinciali &c. comparuit P. Magister Fr. Emmanuel Marianus Ribera prædicti Ord., uti Procurator, petens, ut accederet ipse Vicarius Generalis cum D. Promotore &c. ad archivium Conventus ad compulsanda diversa monumenta &c.

Deinde ipse D. Vicarius Generalis cum dicto P. Magistro, & cum Promotore fiscali, Notariis, Peritis, & Collationario, & testibus egressus a Curia accessit ad archivium, quod ad longum describitur, in quo archivio repertum fuit vetus instrumentum in pergamento, quod ad longum describitur, & incipit, in Christi nomine. Noverint universi, quod an. D. 1260. idibus Madii in presentia mei Petri de Bages Notarii &c. & in fine post subscriptiones Fratrum, Canonicorum, & Notarii legitur: addito super lineam vigesimam tertiam, Maria. In calce ejusdem instrumenti aliqua pendent cerea sigilla, valde jam trita, & ex sui maxima antiquitate paululum discrustata, continentia gravata tum & Sanctorum imagines, tum & scuta Regii Ord. B. Mariæ de Mercede, pendentia ex lineis cordulis, jam a sua albedine extenuatis. Post

Post longissimam relationem omnium actorum, audito in omnibus Promotore fiscali, die decima sexta ejusdem mensis & anni, invenitur in predicto processu, quod ventum fuit ad examen juridicum predicti instrumenti, quem recognoverunt Josephus Ferran Notarius peritus, & Marianus Rondo Notarius peritus, qui seorsim recognoverunt predictum instrumentum cum subscriptionibus & sigillis, & declararunt, esse legitimum, reddendo in omnibus causam scientie. Reque prorsus examinata, respondit tandem Promotor fiscalis, quod nihil habebat opponendum. Inde predictus D. Vicarius Generalis processit ad pronuntiandam sententiam, qua late in dicto processu reperitur, tam super dicto instrumento, quam super alio, quod simul fuerat examinatum, & tenor sententie est. „ Audito Rev. „ Decretore Promotore fiscali nihil habente exponere, auscultatisque Notariorum „ peritorum relationibus, necnon Rev. P. Archivista responsione, ceterisque „ omnibus & singulis attendendis attentis, tenore presentium, & auctoritate „ qua fungimur, dicimus, decernimus & declaramus, quod duo prefata instru- „ menta sunt antiquissima & de annis in illis assignatis; hoc est, unum signatum „ per Raymundum de Ulmo de anno 1219. & alterum clausum per Petrum de „ Bages de anno 1260., suntque pariter legitima, legalia & authentica, & alias „ in nihilo suspecta, nec vitiosa, immo omni fide digna, & admittenda in quolibet „ foro & ad quodcumque genus probationis, tam judicialis, quam extrajudicia- „ lis, prout cum presente admittimus, & nostram super his interponimus aucto- „ ritatem & decretum desuper quomodolibet necessarium & opportunum, neque „ hic subscribimus manu propria: Dominicus Piferrer Vicarius Generalis & „ Officialis.

Tenor predicti instrumenti de anno 1260. sub fol. 41.

**I**N Christi nomine. Noverint universi, quod an. D. 1260., Idibus Maii, in presentia mei Petri de Bages Notarii publici Barchinona, & per totam Terram & dominationem Illustrissi. D. Regis Aragonum, auctoritate ejusdem, & testium infracriptorum ad hoc specialiter vocatorum & rogatorum, Ven. & religiosus vir Fr. Guillelmus de Bas, Dei gratia Magister Generalis Ord. S. Maria de Mercede Captiv., & reliqui infrascripti Fratres ejusdem Ord. personaliter comparuerunt rogantes & petentes, ut quadam testimonia, que hoc eodem anno auctoritate & jussu Reverendissi. D. Arnaldi, nunc Episcopi Barchinonensis confecta sunt de visa admirabili Ven. Petri Nolasci ejusdem Ordinis primi Magistri Generalis, in Romana limina ad SS. D. N. Alexandrum Divina providentia Papam IV. mitti debent, ne forte illis casu aliquo amissis, tantarum rerum memoria fraudarentur, dignaremur earum ad summam quandam reductarum publicum instrumentum cum illis omnibus concordans conficere, signatumque tradere, quatenus possit in archivo dicta Religionis ad futuram memoriam assevari. Nos igitur eorum petitioni obtemperantes, qua potuimus, brevitate ex prefatis testimoniis, qua sequuntur, hoc desumpsimus.

Fuit Ven. Petrus Nolasco natione Gallus, ortus prope Carcasenam in parochia  
Tom. I.

Bbb

S. Pa-

S. Pauli, ex nobilibus parentibus. In cunabulis vagienti examen apum mellis favum in dextera ejus manu fabricavit. Infantulus quosvis cernens egenos, donec ipsis esset succursum, amarè stehat; puerulus propriis manibus, quæ comparare poterat, illis donabat: orbatus parentibus, ut Albigensum haresim, quæ in Gallia viget, effingeret, vendito patrimonio Cathaloniam perdivites petiit; voluit autem prius Virginem Mariam de Montserrat visitare: cui nocte quadam oranti, demon, ut a proposito amoveret, apparuit, qui persistentem videns reliquit. Impleto voto Barchinonam venit, ubi coepit, quæ ex patria attulerat, misericorditer consummare. Vexabatur anxie pro captivis, ad quos redimendos quinquies abiit Valentiam, et semel Majoricam: inde quater propriis sumptibus trecentos ferme qualibet vice liberavit; bis autem adjutus Fidelium elemosynis eduxit, quos potuit. Qui aliis tam dives fuit, sibi omnino fuit panper, ut nec domum, nec lectum proprium haberet, sed humi jacebat, ut facilius orationi vacaret. Multas multorum persecutiones sustinuit, eo quod juvenes ad tam pium opus induceret: bis quotidie prolixè vacabat orationi: virginitatis votum, quod puer fecerat, perpetua castitate servavit. Propterea, quamvis multi nobiles viri suas cuperent ei filias in matrimonium dare, ipse, omnibus contemptis, calibatum amavit; disciplinas frequentissime recipiebat. Captivorum sic erat charitate accensus, ut plures eum audierint dicentem: omnino cupere, se in illorum pretium vendere; quod, nisi a Rege esset impeditus, fecisset. In die Parasceves Passionem Domini meditantis visio accidit, quæ videbat olivam plenam fructibus & plures homines, qui illam conabantur abscindere, cui calius mandatum est, ut illam servaret; ipse vero tunc nihil horum intellexit, donec eodem anno, qui fuit millesimus ducentissimus decimus octavus, quarto nonas Augusti deliberanti in solitudine secedere, cum de hoc Deum orando consuleret, apparuit B. Virgo Maria, & precepit, ne in solitudinem discederet, sed potius fundaret novam Religionem, in qua posset pro captivis suam exercere charitatem, illos redimendo, et quod ipse primus habitu albo vestiretur, quæ Religio nuncuparetur Religio B. Mariae de Misericordia, seu de Mercede de Captivis. Collato consilio cum Rege Jacobo, et D. Raymundo de Pennafort, responderunt, sibi idem esse mandatum; et quarto Idus Augusti eodem anno in ecclesia S. Eulalia, quæ est Cathedralis civitatis Barchinonensis institutus est Ordo prædictus solemniter coram Rege Illustriss. et D. Berengario Episcopo, et D. Raymundo, et reliquis Canonicis, et cuncto populo. Ab hoc anno usque ad annum vigesimum quartum redemit quadringentum sexaginta ex Granata, Valentia, et Alcaria, inter quos multi infantes et semina multa. Cum duo homines illum occidere decrevissent, domum venerunt; ille a Deo de periculo admonitus, obviam illis exiit, et blande alloquens, ad virtuosam vitam convertit, quod accidit anno vigesimo in mense Madio. Circa annum vigesimum primum multum laboravit, ut quosdam Nobiles regni inter se graviter dissidentes concordaret: idem Regem comitans in Casarangustra civitate fecit. Desideravit, ut ejus Ordo ab Apostolica Sede approbaretur, ad quod Fr. Raymundus Pennafort jussu Regis Romanam Curiam visitavit, et confirmationem Ordinis a D. N. Gregorio Papa IX. Petrus impetravit, anno Pontificatus ejus VII. 16. kal. Februarii. Frequen-

tissimus



tissimus in canonicis Horis erat in choro, præsertim ad Matutinas media nocte cantandas. Quadam autem nocte Angelos in choro reperit, mediamque inter illos B. Mariam, omnes similiter Matutinas cantantes, quibus ipse lætissimus interfuit. Sæpe a Rege oblatos honores, tanquam a Religioso alienos, recusavit. In honore magno ab omnibus fuit habitus; et quanto erant viri nobiliores, tanto plus illum venerabantur. Multa prophetico spiritu prædixit; inter quæ Illustriss. Regi Jacobo suadens, ut Valentiam obsideret, victoriam adepturum promisit. Durante civitatis obsidione sacram imaginem B. Maria del Puig sub cymbalo in terra sepultam, caelesti claritate admonitus, reperit. Instituit nocturnam benedictionem dormitorii, multi autem Fratres B. Virginem sæpe viderunt illud benedicentem. Omnes egenos, et agrotos resciebat, et curabat, ad quod domum edificavit. Cum ad altare Virginis de Pietate oraret, cum esset multum desiderans visitare sanctorum Apostolorum Petri et Pauli loca, S. Petrus crucifixus illi apparuit, et dixit: Ecce ego ad te venio, quia tu ad me venire non potes. Vitas Sanctorum legens, suam judicans omnino disparem, timebat, se ad caelestia non perventurum: tunc illi Dominus ostendit civitatem Hierusalem caelestem multis portis apertam, et dixit: Fili, in domo Patris mei mansiones multe sunt. Numquam in lecto dormiebat; et sic cilicio, disciplinis, et jejuniis erat infirmatus, ut fere stare, aut ambulare non posset. Ad procurandam pro captivis eleemosynam, multisies totam Hispaniam pedibus suis ambulavit; multa in itinere mirabilia faciebat, ut infirmos curaret. Sic captivorum libertatem procurabat, ut etiam, quæ ad sustentandos Fratres erant necessaria, venderet; & cogitanti illi, si in hoc Domino placeret, apparuit Dominus, dicens: Nolite timere, pusillus grex, quia complacuit Patri vestro dare vobis regnum, vendite quæ possidetis, et date eleemosynam. Tempore suo liberati sunt duo millia septingenti decem et octo captivi, quorum ipse octingentos nonaginta fere personaliter septies facta redemptione liberavit. Reliquos vero per alios Fratres duodecies missos; præter tres, in quibus spoliati sunt Fratres, & occisi. Ipse cum esset in Africa spoliatus, volens in Hispaniam venire, ut novam pecuniam colligeret, impositus in navi, sine velo & remigio Valentiam venit, cum prius flagellatus fuisset, & socium suum Petrum Amerinum in pignus reliquisset. Quando sciebat alicubi captivos esse afflictos, quos liberare non poterat, veniens in spiritu consolabatur & in fide roborabat; sicut illorum testati sunt eum vidisse multi. Cum Federicus Imperator Italiam opprimeret, ad publicam poenitentiam totam civitatem Barchinonensem ad orationem commovit. Regem Francia Ludovicum invisit, et eum admonuit, ut Hierusalem civitatem a Turcis liberaret. Cum jam ob senium & corporis laboribus extenuati infirmitatem, non posset media nocte Matutinis interesse, ab Angelis in chorum portabatur. Nolit titulo Magistri Generalis, quo ab Apostolica Sede fuit honoratus, pro humilitate uti; sed dicebatur minister, & servus hospitalis captivorum. Onus gubernationis suis humeris majus judicans, sæpe renuntiare tentavit, sed a Fratribus fuit impeditus. Sed tandem anno quadragesimo octavo, ætate & infirmitate gravatus officium renuntiavit, & reliquum vite tempus soli Deo dedit, contemplationibus vacans. Frequenter cum B. Maria Virgine, & custode Angelo colloquebatur. Morti jam

proximus vifitavit corpus Ven. Raymundi, quem ipfe ad Ordinem receperat, & ei, accepto loco, in quo erat, ab Ecclefia Celfonenfi monafterium adificandum curavit. Ab ipfo Raymundo de inftante morte certior factus Barchinonem redit, & ibi in morbum incidit, in quo a Chriſto & B. Maria eſt confortatus, & humiliter receptis Sacramentis, omnes Fratres ad ſe vocavit & eos de religioſa perfectione admonuit, præſertim de charitate erga captivos. Poſtea, cum iſſalimum, Conſitebor tibi, Domine, in toto corde meo, devotiſſime diceret, ad illa verba, redemptionem miſit Dominus populo ſuo, animam Deo reddidit, in cujus morte multa miranda contigerunt. Obiit autem in vigilia Natalis Domini hora media noctis, anno Domini milleſimo ducentefimo quinquageſimo ſexto, multos filios in ſuo Ordine relinquens, & ex Maomethana ſecta ad fidem Chriſti multis converſis. Corpus ejus inſepultum per tres dies remanſit, propter concurrentem popululum, donec a Fratribus noctu ſepultum eſt, multis mirabilibus operatis. Hac ſunt, quæ ego præſatus Petrus de Bages publicus Notarius ex ſupradictis testimoniis & inſtrumentis deſumpſi, in quorum fidem & testimonium præſens publicum inſtrumentum conſeci, a dicto Ven. Magiſtro Generali & reliquis Fratribus appenſis figillis roboratum.

Ego Fr. Guillelmus Ba: Magiſter Generalis ſi † gnum appoſui

Ego Fr. Bernardus de Corbaria ſigil † lum appoſui

Ego Fr. Pontius de Solanes ſigil † lum appoſui

Ego Fr. Jacobus de Apiaria ſigil † lum appoſui

Ego Fr. Petrus de Amerio ſi † gnum appoſui

Ego Fr. Bernardus a Sancto Romano ſigil † lum appoſui

Ego Fr. Joannes de la Es ſigil † lum appoſui

Ego Fr. Pontius de Verellis ſigil † lum appoſui

Ego Fr. Joannes Jonovini ſi † gnum appoſui

Si † gnum Petri Presbyteri & Canonici

Si † gnum Terrari de Minorifa Canonici

Si † gnum Raymundi de Fontaneto Canonici teſtium.

Si † gnum Petri de Bages Notarii publici Barchinonenſis, qui hæc ſcribi feci, & clauſi die & anno, quo ſupra: addito ſuper lineam vigefimam tertiam, Maria.

Locus ſex ſigillorum ſereorum ex cordulis nunc pendentium †. †. †. †. †. †.

Locus trium cordularum & ſerici, ex quibus tria antea pendebant ſigilla. †. †. †.

Facta igitur exemplatione dictorum duorum inſtrumentorum, illico dictus D. V. G. præcepit mihi præ. & inſcripto Notario Actuario, & Jacobo Sayos Notario Collationario, quatenus exemplaria binorum relatorum inſtrumentorum in Actis præſentis proceſſus tranſumptorum bene, fideliter, & legaliter collationaremus cum ſuis originalibus, poſteaque relationes ſaceremus de tali collatione. Et ſtatim ipſam nobis præceptam collationem fuimus executi coram eodem Illuſtriſſi. D. Vicario Generali, Rev. Promotore ſicali, teſtibusque ſupra adhibitis, ipſis videntiſque et auſcultantiſque.

## IN NOMINE DOMINI. Amen.

**N** Overint universi & singuli presentes visuri, lecturi, legique pariter audituri, suprascriptum instrumentum confectum super vita S. Petri Nalajco, & appositum in pede restrictus & summarii Actorum factorum super legalitate processus ut supra fabricati, fuisse & esse de verbo ad verbum desumptum, extractum, et exemplatum ex publico et authentico documento eorundem Actorum in liberculum reductorum constantem ex paginis centum viginti tribus chartulatis, & coopertum charta pergamena, subscripto & publicato per D. Iosephum Franciscum Fontanam Apostolica, & Regia auctoritatibus Notarium publicum Barcinonae litteris legalitatis aliorum duorum publicorum Notariorum ejusdem civitatis munito sub data diei 2. Julii 1722., mihi Notario publico infra scripto exhibito per Reverendiss. P. Fr. Didacum Tellium Ord. B. Mariae de Mercede Redemptionis Captivorum, sacrarum Congregationum Indicis, & rituum Consultorem, qui idem publicum documentum in liberculum ut supra redactum asseruari asseruit in archivio generali Ven. Conventus S. Hadriani de Urbe ejusdem Ordinis; factaque per me Notarium exacta & diligenti collatione suprascripti instrumenti cum dicto publico & authentico documento mihi &c. ut supra exhibito, illud in omnibus & per omnia, nihilo penitus variato, seu immutato, concordare, meliori semper salva collatione; dictum autem liberculum antedictus Reverendiss. P. Fr. Didacum Tellium originaliter penes se retinuit ad dictum archivum generale Conventus S. Hadriani de Urbe reportandum: In quorum fidem &c. Roma &c. hac die vigesima prima Aprilis 1733. Indictione XI. Pontificatus autem Sanctissimi in eodem Christo Patris & D.N.D. Clementis Divina providentia Papae XII. anno III.

Ita est Lucius Ansonius Nerius Romanus Civis, & publicus  
 L. \* S. & causarum Curia Capitollii Apostolica auctoritate Notarius &c.

**N** Os ad praesens Camera Alma Urbis Conservatores  
 Universi &c. Fidem facimus atque testamur, suprascriptum D. Lucium Antonium Nerium fuisse & esse publicum, authenticum, legalem, nostraeque Curia Capitollii Notarium fide dignum, ac talem, qualem se supra fecit, scripturisque suis tam publicis, quam privatis in Iudicio. & extra plenam semper adhibitam fuisse, & de praesenti indubiam adhiberi fidem. In quorum testimonium &c. Datum Roma ex palatio nostro Capitolino hac die vigesima prima Aprilis 1733.

Pro D. Secretario nobilis collegii DD. Curia Capitollii Notarium  
 L. \* S. Carolus Marcus Tullius de mandato &c.

§. V.

*De S. Raymundo Nonnato.*

10 **S**anctus Raymundus Nonnatus, qui habitum Ordinis B. Mariæ de Mercede Redemptionis Captivorum recepit a S. Petro Nolasco, quique dignitatem Cardinalitiam obtinuit a Gregorio IX. ex hac vita migravit anno 1240. Ferunt quoque nonnulli, eum fuisse canonizatum a Benedicto XII. seu XIII. illegitimo Pontifice, tum in Concilio Constantensi Canonizationem fuisse approbatam, atque a subsequentibus legitimis Pontificibus nunquam revocatam. Ita nempe habet Baillet *in ejus vita ad diem 31. Augusti num. 3.* & eodem fere modo res exponitur in catalogo Magistrorum Generalium Ord. B. Mariæ de Merc. *typis impresso ante Bullar. ejusdem Ord. §. 1. num. 9. & 10.* Pater autem Jo: a S. Felice *in supplemento ad flores SS. Ribadeneira ad diem 31. Augusti in vita S. Raymundi, testatur*, nonnullos in ea esse opinione, ut credant, cultum fuisse in ejus honorem concessum a Gregorio IX. Sed, cum peracta per Benedictum Canonizatio fidei Philippi Guimeræ innitatur, memoratus Baillet *in tab. crit.* merito de eadem suspicatur: etsi de S. Raymundi æquipollenti Canonizatione a Romanis Pontificibus facta dubitandum esse nequaquam videtur, si Romanorum ipsorum Pontificum constitutiones, atque decreta in citato Bullario relata legantur. Urbanus etenim Papa VIII. prævio consilio Congregationis sacrorum rituum, anno 1626. indulgit Ordini recitationem Officii de Communi & Missæ celebrationem. Alexander Papa VII. die 20. Octobris 1655. benigne annuit ad preces Card. Virginii Urfini Diaconi ecclesiæ S. Eustachii, ut in ea festum celebrare posset S. Raymundi cum Officio & Missa de Communi, eo quod ferebatur; Sanctum ipsum fuisse ejusdem Diaconie Titularem, dum Cardinalitio honore frueretur. Ejus nomen sub eodem Pontifice descriptum fuit in Martyrologio Romano. Sub Alexandro quoque Papa VII. sacrorum rituum Congregatio lectiones & Orationem propriam recitandas a Religiosis Ord. B. Mariæ de Mercede approbavit. Clemens Papa IX. recitationem Officii & Missæ celebrationem sub ritu semiduplici ad libitum ad universam propagavit Ecclesiam die 13. Augusti 1669. Innocentius denique Papa XI. die 10. Martii 1681. ritum de semiduplici ad duplicem elevando, recitationem Officii & Missæ celebrationem præceptive universæ Ecclesiæ demandavit.



§. VI.

## §. V I.

*De SS. Joanne de Matha, & Felice de Valois.*

11 **S**ANCTI Joannes de Matha, & Felix de Valois Fundatores Ordinis SS. Trinitatis Redemptionis Captivorum virtutibus & miraculis illustres ex hac vita decesserunt, iste anno 1212., ille anno 1213. Traditum autem est, eos in Sanctorum album per solemnem Canonizationem ab Urbano IV. fuisse relatos. Ferrarius enim Gallus in suis chronicis scriptis anno 1269. & usque adhuc ineditis ita loquitur: Anno 1262. Urbanus Generalis Ecclesie Antistes sanctissimus Felicem, & Joannem Mathensem Fundatores Ord. SS. Trinitatis in catalogo Sanctorum numeravit kalendis Maji; Antonius Lupianus Zapata examinatus in processu confecto super cultu immemorabili, de quo infra, dixit, se anno 1635. propriis oculis vidisse processum, in quo testis asserebat, authenticam bullam Canonizationis legisse occasione asportationis quarundam scripturarum, quam fecerunt Religiosi SS. Trinitatis Redemptionis Ord. Captivorum ab Hispaniis in Gallias; Joannes de Figueras in chronicis editis anno 1645. loquens de ministerio totius Ordinis, quod fuit delatum Alando Theologiae Doctori anno 1262. inter cetera de eodem hæc habet: *Ejus solertia S. Joannes de Matha, & Felix Valesiensis Ordinis Institutores ab Urbano IV. Trecanico Christiani orbis Antistite in Apotheosim Sanctorum relati fuerunt apud Urbem Veterem anno 1263. die 4. Octobris; concordantque Georgius Jo: Scotus lib. 1. cap. 1. Gulielmus Spina Benedictinus in histor. de adventu Religionis in Angliam centur. 1. cap. 8. pag. 209. Trajanus Matthejus in histor. manuscripta de eorum visa, Tamajus in Martyrolog. Hispan. tom. 6. ad diem 21. Decembris, Joannes a S. Felice in supplem. ad flor. SS. Ribadeneira in visa S. Joannis de Matha.*

12 Verum, quod attinet ad Urbanum IV. cum solum supersit documentum authenticum Canonizationis solemniter ab eo factæ B. Richardi Cicestrensis in Anglia Episcopi, de quo in novo codice Canonizationum pag. 97. bulla autem Canonizationis memoratorum Sanctorum nec inveniat, nec unquam fuerit reperta, licet maximis adhibitis diligentibus perquisita, non videtur, tuto asseri posse, eos per solemnem Canonizationem fuisse ab Urbano IV. in Sanctorum album relatos; & multo minus, cum eadem formalis Canonizatio dicto innitatur & fidei memorati Antonii Lupiani Zapatæ, quem insignem fuisse falsitatem inventorem & propagatorem, confictoremque historiarum, privilegiorum, & bullarum, sibi assumpto titulo Notarii Apostolici, & etiam aliquando Monachi Benedictini, latissime ostendunt Nicolaus Antonius in biblioth. Hispan. veter. tom. 1. lib. 6. cap. 22. num. 460. & 472. Clar. mem. Card. de Aguirre tom. 1. Concil. Hispan. dissert. 9. excursu 11. num. 140. & num. 145. & tom. 2. dissert. 3. excursu 3. num. 33. & 34. Jacobus Antonius del Monaco in suo libro de calumnia

*nia in prologo ( qui liber formis impressus fuit in civitate Neapolitana an. 1715.)*  
 ac Jo: Galpar Roig Ord. S. Francisci de Paula in suo libro *Barcinone typis excusso an. 1684. §. 1. pag. 2.* Neque enim ipse Ordo SS. Trinitatis Redemptionis Captivorum de assertionem prædicta securus visus est; quando non multis ab hinc annis eorumdem Sanctorum causam pro solempni impetrandæ Canonizatione introduxit. Expedita quippe, sicuti in more est, commissione, constructoque processu super eorum cultu immemorabili, Cardinalis Urbis Vicarius die 31. Julii 1665. sententiam protulit, consistere de casu excepto a decretis Urbani VIII. & de cultu per tempus immemorabile præstito in honorem sanctorum ipsorum Joannis, ac Felicis; atque adeo anno 1670. annuente summo Pontifice, ac prævio consilio Congregationis sacrorum rituum, eorum nomina fuerunt descripta in Martyrologio Romano. De antiquitate nimirum cultus nulla poterat esse dubitatio; cum in processum confectum compulsus fuerit antiquum Breviarium Ecclesiæ Meldensis cum hymno proprio dictorum Sanctorum una cum antiquissimo Breviario in Belgio reperto pro regnis Angliæ, Scotiæ, & Hiberniæ cum lectionibus propriis eorumdem. Præterquamquod Franciscus de S. Augustino Macedo Minor. Observ. Religiosus horum Sanctorum merita, & cultus antiquitatem persequitur in eorumdemmet vita. Post approbationem porro cultus immemorabilis impetratæ fuerunt plures concessionem Officii & Missæ sub ritu duplici ad libitum. Quapropter, prædictis, aliisque circumstantiis rite ponderatis, prævio consilio Congregationis sacrorum rituum, Innocentius denique Papa XII. Joannem, ac Felicem æquipollenti Canonizatione inter Sanctos retulit, elevando ritum a duplici ad libitum ad duplicem de præcepto, atque adeo jubendo, ut Officium eorum in universa Ecclesia recitaretur; ut ex sequenti decreto sacre Congregationis desumitur: *Posse concedi censuit, ut Officium SS. Joannis de Matha, et Felicis de Valois dicti Ord. Fundatorum hæcenus in voto sere orbe Catholico sub ritu duplici minori ad libitum ex pluribus concessionibus Apostolicis recitatum, in posterum singulis annis sub eodem ritu duplici minori in diebus eorum festorum ab omnibus tam Secularibus, quam Regularibus utriusque sexus, qui ad Horas canonicas tenentur, et in Ecclesia universali de præcepto recitetur, si Sanctissimo Domino nostro placuerit: diebus 27. Martii, et 15. Maji 1694. Factaque deinde Sanctissimo Domino nostro per me Secretarium relatione, Sanctitas sua benigne annuit; die 19. ejusdem mensis Maji, et anni 1694.*

## §. V I I.

*De S. Margarita Scotorum Regina.*

13 **S**ancta Margarita Scotorum Regina mortua est anno 1093. Ejus vita edita fuit a Surio ad diem 10. Junii tom. 3. & scripta est a Turgotto Episcopo, ut in notis Jo: Molani ad Martyrologium Usuardi ad diem 16. Novem-

*Novembris*. Fertur autem, eam fuisse ab Innocentio IV. canonizatam. Sed hanc opinionem irreperisse probabile est ex insigni miraculo, quod sub eodem Pontifice contigisse Scriptores Scoti apud Raynaldum *ad an.* 1249. *num.* 11. narrant. Cum etenim fieret beati corporis translatio, & capfam argenteam deferentes ad Malcolmi Margaritæ mariti sepulcrum devenissent, omnes immobiles repente constitere; donec, monente venerabili sene Spiritu Divino afflato, Margaritam, quæ marito vivo semper reverentiam exhibuerat, nolle eidem mortuo ipsam denegare, ideoque nunquam permissuram, se deportari ad locum, quo sui corporis Reliquiæ erant transferendæ, nisi maritus humo effossus ejus lateri adjungeretur; facta effossione, utriusque ossa mira deinde facilitate translata fuere ad locum, qui pro solis ossibus Margaritæ fuerat præparatus. Sed, cum ex his, quæ sub Innocentio IV. contigerunt, inferri legitime nequeat formalis ipsa Margaritæ Canonizatio; eo vel magis, quia, promota a Scotis petitione pro formali eadem Canonizatione obtinenda, Innocentius Papa VIII. nonnullis demandavit Præsulibus, ut Apostolica auctoritate processum conficerent super illius virtutibus & miraculis, uti colligitur ex sensu epistolæ memorati Pontificis apud citatum Raynaldum *ad annum* 1487. *num.* 26. & *seqq.* necesse est idcirco, æquipollenti insistere Canonizationi, pro qua certa non desunt argumenta. Fuit namque Margaritæ nomen descriptum in Martyrologio Romano, ejusque festum, quod die 10. Junii celebrabatur, translatum fuit ad diem 8. Julii, quo sub ritu semiduplici ad libitum Officium recitabatur in universa Ecclesia, primo quidem cum lectionibus de Communi secundi Nocturni, deinde vero cum lectionibus etiam propriis, quæ fuerant antea approbatæ & concessæ soli regno magnæ Britanniæ; veluti liquet ex decreto a sacrorum rituum Congregatione edito sub Innocentio XI. die 21. Januarii 1679. qui illud approbavit die 1. Februarii ejusdem anni. Post hæc Innocentius Papa XII. die 15. Septembris 1691. Officii, & Missæ recitationem, & celebrationem sub ritu semiduplici de præcepto haberi voluit ab universo Clero Sæculari, ac Regulari in tota Ecclesia: tum autem die 21. Februarii 1693. idem festum sub ritu pariter semiduplici de præcepto in diem 10. Junii, qua die descriptum est nomen S. Margaritæ in Martyrologio Romano, restituit.



## §. VIII.

*De S. Stephano Hungaria Rege.*

14 **S**ancti Stephani Hungariæ Regis nomen descriptum erat in Martyrologio Romano ad diem 20. Augusti. Ejus vita conscripta fuit a Caruitio in regno Hungariæ Episcopo, a quo quidem quæ narrantur, licet ipse non fuerit contemporaneus Stephano, plurimis nihilominus validissimis fulciuntur adminiculis: edita autem fuit a Surio *ad eandem diem tom. 4.* sed factis in ea quibusdam mutationibus, ut ornatiores apparerent. In eadem porro refertur, S. Stephani corpus, elapsis ab ejus obitu annis quadraginta quinque, fuisse sub Ladislao Rege Hungariæ, summi Pontificis auctoritate intercedente, elevatum. Verum, utcumque sit de elatione ista, & utrum ea simplicem Beatificationem, an formalem Canonizationem importaverit, quod adhuc sane incertum est, cum neque de substantia, neque de ejus modo constet; de sancti tamen Stephani sanctitate, & ejus æquipollenti Canonizatione nullus superest dubitandi locus ex decreto summi Pontificis Innocentii XI. edito die 23. Novembris 1686. In hoc enim, postquam fuit expositum, antea in Ecclesia universali ejus Officium recitari consuevisse sub ritu simplici, ad enixas preces Imperatoris Leopoldi mandatum est, ut in posterum de præcepto sub semiduplici ritu ab omnibus, qui tenentur ad recitationem Horarum canonicarum, recitaretur; assignata nempe Officio ipsi 2. die Septembris (ad quam similiter diem, ut & ad 15. Augusti, qua Sanctus obiit, facta tunc est ejus nominis in Martyrologio Romano translatio) in perpetuam memoriam insignis & gloriose victoriæ ab armis Christianorum obtentæ contra Turcas, ope Divina, in expugnatione propugnaculi Budensis, sedis olim ejusdem Sancti.

## §. IX.

*De S. Venceslao Duce Bohemæ.*

15 **S**anctus Venceslaus Dux Bohemæ & Martyr mortuus est an. 929. ejusque nomen descriptum est in Martyrologio Romano *ad diem 28. Septemb.*, ac in Martyrologio Atonis *ad eandem diem in Append. Card. Baronius in notis Auctores atque Historicos refert de ipsius Martyrio & miraculis loquentes*: ejus autem vita extat apud Surium *ad cit. diem tom. 5.* & Æneas Sylvius in *histr. Bohem. cap. 15.* sic de eodem habet: *Ipsum autem Venceslaum multis miraculis claruisse, atque inter sanctos Martyres ab Ecclesia receptum tradunt.* In Dania etiam fuerunt Deo O. M. in honorem S. Venceslai dicata templa. Æquipollens vero ejusdem Canonizatio initium



tium sumit ab anno 1670. tempore Clementis Papæ X. qui, ad enixas preces Leopoldi Romanorum Regis in Imperatorem electi sibi porrectas per Cardinalem de Hassia, die 26. Julii 1670. indulgit, ut ejus Officium in posterum recitaretur in Ecclesia universali sub ritu semiduplici ad libitum, atque Breviario Romano apponeretur sub eodem ritu recitandum die 28. Septembris ab omnibus, qui ad Horas canonicas tenentur, Sæcularibus, ac Regularibus utriusque sexus; tum autem die 29. Novembris ejusdem anni, ad preces Matthæi Ferdinandi Episcopi Pragæ, Orationem & lectiones proprias in sacrorum rituum Congregatione revisas atque probatas pro universa ipsamet Ecclesia ratas habuit, retento tamen semper ritu semiduplici ad libitum. Sed, cum ritus sive semiduplex, sive duplex ad libitum importare nequeat Canonizationem æquipollentem, quia non infert præceptum, juxta ea, quæ in superioribus dicta sunt; perfecta ideo Canonizatio æquipollens S. Venceslai constituenda est in decreto edito tempore Pontificatus Benedicti XIII. die 14. Martii 1729. quo nimirum statutum fuit, prædictum Sanctum esse colendum in universa Ecclesia cum Officio utique semiduplici, at de præcepto.

## §. X.

## De S. Gregorio VII.

16 **S**anctus Gregorius Papa VII. mortuus est an. 1085. Post decursum annorum 45. ab ejus obitu ejusdem vita conscripta fuit a Paulo Bernriedensi Canonico Regulari, & extat apud Bollandianos *ad diem 25. Maji pag. 140. tom. 6.*; in *Actis SS. Ord. S. Bened. sac. 6. part. 2.*; Et *tom. 3. Scriptorum rer. Italic.* quos alias a nobis cum laude memoratus Ludovicus Antonius Muratorius collegit, ordinavit, & præfationibus auxit; ubi *cap. 111.* adhuc plura de illius sanctitate ac miraculis releruntur. Olim Helias, (verba sunt prædicti Pauli apud cit. Bollandianos) ex mortalium cohabitatione transiturus dimisit Helisæo pallium suum prophetici muneris instrumentum; similiter & Gregorius ex hac mortali vita migraturus transmisit Anselmo, (qui erat Episcopus Lucensis) Pontificalis insignis potestatis, videlicet mitram capitæ sui: hoc nimirum Deo cooperante, ut, sicut ille prophetia per pallium hereditavit prærogativam, ita & iste sacerdotalem per mitram obtineret eminentiam. Nempe eo usque processit similitudo, ut, sicut Helisæus per pallium Helia virtutum signa demonstraverat, ita & Anselmus per mitram Gregorii quadam magnalia exhibuerit. Nam, ut de pluribus unum magis divulgatum proferamus, Rev. Mantuana Præful Ecclesiæ Ubalduus multis jam annis gravissime spleneticeus, & toto corpore ulceratus, præsertim in cruribus, sic ut vix quomodolibet stare posset, vix etiam jacere, vel sedere, qui & multa in Medicos erogaverat, nihilque profecerat, apposita eadem mitra ubi major ingruerat dolor, pristina redditus est sanitati. Eum quoque ante mortem miraculis claruisse, scribit

Lambertus Schafnaburgensis ad an. 1077. ( inter Scriptores rerum German. Pistorii tom. 1. pag. 247. ) Signa etiam & prodigia, quæ per orationes Papa frequentius fiebant, & zelus ejus serventissimus pro Deo & pro Ecclesiasticis legibus, satis eum contra venenatas detractorum linguas communiebat. Miracula vero ejus obitum, eodem intercedente, secuta testatur Ordericus Vitalis part. 2. hystor. Eccles. lib. 8. pag. 677. ubi loquitur de ejus tumulo: Meritis ejus, fidei petentium miraculorum copia divinitus ostensa est: nam leprosi de aqua, unde corpus ejus ablutum fuerat, petierunt, quæ consecuta fideliter loti sunt, & opitulante Deo, protinus mundati sunt. Presbyter item Poenitentiarius in vita S. Anselmi, apud Bollandianos ad diem 18. Martii cap. 5. num. 25. & 26. tom. 2. relata sanitate, cui Ubaldus Mantuanus Episcopus, uti supra, fuit miraculo restitutus, ait, Gregorium fuisse miraculis insignem in vita & post obitum: Beatissimus itaque talis ac tantus Magister miracula fecit multa vivens, ac mortuus. Denique eum Confessorem, & Martyrem obiiisse, dicit Hugo Flaviniacensis in chronico apud Labbè tom. 1. biblioth. MSS. pag. 232.

17 Nota insuper sunt illustria gesta summi Pontificis S. Gregorii VII. Ecclesiasticorum etenim dominiorum, quæ investituras dicimus, abusus tanto temporum decursu, tantaque sæcularium Principum auctoritate obfirmatos evellit; simoniam fere ubique grassantem extirpavit; calibatum Clericorum pæne ab interitu revocavit: ita ut mirum esse non debeat, si Principum, & aliorum multorum invidiam contra se concitaverit. Notæ sunt quoque calumniæ tum Hæretici Berengarii, tum Bennonis Cardinalis schismatici tanto viro impactæ; adeo ut bene adverterit Mabillonius in prefat. ad sec. 6. part. 2. Ord. S. Bened. §. 7. num. 77. nullam fidem habendam esse sive Bennoni Gregorii hosti infensissimo, sive Berengario, qui toties fidem datam violavit, & in tuenda hæresi perseveravit. Notæ sunt demum celebres apologiæ pro S. Gregorio VII. compositiæ. Sanctus namque Anselmus Lucensis Episcopus supra memoratus singularem pro ejus defensione librum edidit adversus Guibertum Antipapam ( biblioth. Pontif. tom. 4. ): Beatus Petrus Damiani lib. 1. epist. 7. ad Nicolaum II. eum sanctissimi ac purissimi consilii virum appellat: Desiderius Abbas, qui Gregorio ipsi sub Victoris III. nomine successit, ( lib. 3. dialog., apud Mabillon. in Ait. SS. Ord. Bened. sec. 4. part. 2. pag. 453. ) eum Christi Ecclesiam verbis simul, & exemplis illustrasse, scribit. Inter acerrimos adhuc innocentiae Gregorii defensores merito recenseri potest Card. Baronius in suis annalibus, utpote in quos res ejus gestas per singulos annos ex Scriptoribus maxime coævis, ex Conciliis sub eo habitis, & ex regeſto epistolarum ipsius in undecim libros distincto bene deduxit. Pro eodem assumpto pugnat Card. Bellarminus in suis controversiis, & signanter lib. 4. de summo Pontifice cap. 13. tom. 1. controverſ. Jacobus quoque Gretſerus in sua illustri apologia quinquaginta Historicos adducit, qui suis scriptis gesta Pontificis Gregorii proponunt, & invicto argumentorum robore defendunt; adeo ut idem Gretſerus in examine myſter. Plessaani pag. 318. tom. 7. oper. exultans ita loquatur: Quis Benno, &

Sige-

Sigebertus Gregorii VII. calumniatores, si conferantur cum tot sanctissimis & doctissimis Scriptoribus a parte Gregorii VII. stantibus, quorum in apologia pro eodem Pontifice quinquaginta protulimus, recitatis eorum verbis; ex quibus nonnulli interea integri in lucem venerunt, ut Paulus Bernriedensis, & Gerochus, seu Gerhohus Reicherpergensis; ut taceam præclara illa antiquorum monumenta, qua in defensionem Gregorii VII. jam olim scripta, nuper ex tenebris eruit vir clariss. D. Sebastianus Tengenagel J. U. D. Cæsareus Viennæ Bibliothecarius, quorum fulgore tam priscorum, quam recentium in Gregorium VII. convicia adeo obnubilantur, ut jam non nisi a nocturnis, ululis, vesperilionibus, & nycticoracibus, & si qua sint alia hujus generis caliginis patientes, lucis impatientes aves, conspiciantur? Gretserum Soc. Jesu scriptorem sequitur Franciscus D'Enghiel Ord. Præd., cum in opere satis elaborato auctoritatem Sedis Apostolicæ pro Gregorio Papa VII. vindicaverit adversus Natalem Alexandrum ejusdem Ordinis Theologum, qui in *histor. Eccles. sæc. xi.*, ubi de Gregorio agit, usque adeo suæ professionis se oblitum exhibuit, ut hac sola de causa, quemadmodum adnotarunt Bollandiani *ad diem 25. Maji in comment. prævio ad vitam Gregorii VII. §. 1.*, meruisse potuerit gravissimam suorum librorum proscriptionem. Nec inter egregios S. Gregorii VII. defensores omitti ullo modo potest Eminentiss. F. Vincentius Ludovicus Gotti Ord. Præd., utpote qui, post assertam Catholicam veritatem in insigni opere adversus Jacobum Piceninum, in 3. part. colloquiorum Theologico-Polemicorum coll. 10. & 11. vindicias Gregorii VII. strenue exaravit; sicuti postea inter assiduos Cardinalitæ dignitatis labores eximium opus Theologiæ Scholasticæ Dogmaticæ juxta mentem Divi Thomæ Aquinatis, antequam dignitate ipsa insigniretur inceptum, prosecutus est magno sane Litteratorum plausu, atque adeo nobiscum communis Patriæ, suique Religiosi Ordinis decore.

18 Paulo ante memorati Bollandiani, Gregoriani cultus antiquitatem desumunt ex gestis Anastasii Papæ IV. qui, post sexaginta annos ab obitu Gregorii, picturis exornans absidem, & altare sacelli S. Nicolai, in Urbe a Callisto II. ædificatum, Gregorium VII. æque ac Sanctos alios, ipsamque beatissimam Virginem, depingi fecit cum titulo Sancti, & diademate orbiculato circa caput ducto; quin etiam iidem Auctores absidem, & altare ænea tabula expressum dederunt in *Append. ad 1. part. cons. de Rom. Pontif. pag. 208.*; quod etiam adnotavit Fleury *histor. Eccles. lib. 63. tom. 13. pag. 453.*

19 Sacellum hoc S. Nicolai ædificatum in Patriarchio antiquo Lateranensi adhuc manet, commutato licet Patriarchio in ædem collegii Pœnitentiarum sacrosanctæ basilicæ Lateranensis. In eodem autem sacello etiamnum est altare, & pictura quidem adhuc permanet in abside altaris, sed aliquantum in parte inferiori immutata. In parte etenim superiori picturæ habetur imago beatissimæ Virginis Christum Dominum filium suum in sinu gerentis, duobus circumstantibus Angelis; quorum omnium

nium imagines diademate orbiculato apparent coronatæ; provoluti ad pedes Beatissimæ Virginis duo adsunt summi Pontifices vellibus Pontificalibus induti, & solo diademate quadrato insigniti: Pontifex a dextris genuflexus est Callistus Papa II. qui autem est a sinistris, Anastasius IV. sicut indicat inscriptio ibidem apposita: sub pedibus Beatissimæ Virginis leguntur hæc verba; *Præfides æthereis Virgo Maria choris*: in eadem item parte superiori picturæ Pontifex a dextris depictus est, stans, Pontificalibus ornamentis indutus, specie benedicens, mitram habens in capite, ac diadema orbiculatum circa caput; & hic est S. Silvester, ut indicat inscriptio: a sinistris vero alia est imago summi Pontificis stantis, sine mitra tamen, at cum solo diademate orbiculato circa caput, specie item benedicens; & hic est S. Anastasius, veluti etiam enuntiat inscriptio. Pars picturæ superior dividitur ab inferiori per quamdam lineam, super quam scripta hæc extant: *Subtulit hoc primo templum Callistus ab imo, Vir clarus late Gallorum nobilitate. Verum Anastasius potius culmine sacro Hoc opus ornavit, variisque modis decoravit.* In parte porro tabulæ inferiori habetur imago Crucifixi, ad cuius dexteram S. Dominicus, ad sinistram S. Franciscus stantes depicti sunt: super imaginem Crucifixi scriptum est; *Heu famulis Christus Crucifixus parce redemptis*: in eo picturæ latere, ubi est imago S. Dominici, hoc est a cornu Euangelii, stantes, & vellibus Pontificalibus induti, mitraque ac diademate orbiculato insigniti circa caput quatuor Romani Pontifices picti sunt; Sanctus videlicet Leo Papa III. S. Urbanus Papa II. S. Paschalis Papa II. S. Gelasius Papa II. uti præseferunt inscriptiones: in eo autem latere, ubi depictus est S. Franciscus, id est a cornu epistolæ, quatuor aliorum Romanorum Pontificum imagines conspiciuntur simili modo expressæ; Sancti scilicet Gregorii Papæ II. S. Alexandri Papæ II. S. Gregorii Papæ VII. S. Victoris Papæ III. quemadmodum pariter ex inscriptionibus desumitur.

20 Hic nempe est præfens picturæ status, sed vera & sincera facies abfedis antiqui ac venerandi Apostolici sacelli S. Nicolai Episcopi olim in Patriarchio Lateranensi extantis, & etiamnum existentis in ædibus collegii Poenitentiarie Apostolicæ hoc modo se habebat. Superior, inquam, picturæ pars non est ab eo tempore immutata: verum in parte ejusdem inferiori tunc aderat imago S. Nicolai Episcopi Myrensis stantis, & pedum manu gerentis; ad partem autem dexteram S. Nicolai, imagines adersit summorum Pontificum, hoc est sancti utique Leonis, sed Magni, tum S. Urbani Papæ II. S. Paschalis Papæ II. S. Gelasii Papæ II. ut ad sinistram aliarum summorum Pontificum, sancti scilicet Gregorii pariter Magni, S. Alexandri Papæ II. S. Gregorii Papæ VII. S. Victoris Papæ III. & omnes quidem hi Pontifices stantes depicti erant, vellibus Pontificalibus induti, populo benedicentes, cum mitra in capite, atque orbiculato diademate circa caput, tum ad uniuscujusque latus nomen scriptum erat cum titulo Sancti; ita sane testantibus Onuphrio Panvinio, Jo. Severano in libro

de septem Urbis ecclesiis, Constantino Cajetano in vita S. Gelasii II., Cardinali Raspono lib. 4. de basilica & Patriarchio Lateranensi cap. 12., Codice MS. Vaticano, sæpe laudatis Bollandianis ut supra, & Julio Lucenti Cisterciensi Abbate in opere de Episcopis Italia, ubi agit de Casinenfium Antistitum serie.

21 Si itaque tabula hæc, prout & antiquitus erat depicta, & partim etiam est recenter, sedulo perpendatur; fateri oportebit, initia cultus S. Gregorii VII. ad Anastasium IV. esse referenda. In eadem quippe ad pedes Beatissimæ Virginis provoluti apparebant, & apparent Callistus II. atque Anastasius IV. quorum primus sacellum ædificavit, alter instauravit & ornavit; quo nimirum modo depicti apparent in antiquis musivis ecclesiarum Urbis Pontifices, qui suas imagines exprimi voluerunt, dum viverent, in tabulis illius altaris, sacelli, aut ecclesiæ, quam ædificabant, vel instaurabant. Depictus enim hoc modo fuit Joannes VII. in altari, quod construxerat in basilica Vaticana; eodemque modo expressi apparent Pelagius II. in vertice fornicis S. Laurentii extra muros, & Honorius III. in porticu ejusdem templi, quemadmodum habetur apud Ciampinum de *edif. a Constant. construct.* cap. 4. pag. 75. tab. 23. list. E., & in veter. monim. tom. 2. cap. 13. tab. 28. pag. 102. col. 2. & pag. 103. col. pariter 2. In ipsamet autem basilica Lateranensi adhuc extat in testudine absidis musivo expressus Nicolaus IV. ejusdem absidis ædificator provolutus ad genua beatissimæ Virginis, & plurium Apostolorum, ut omnibus patet, & sicuti refert prædictus Card. Rasponus in *cit. oper. lib. 1. cap. 9. pag. 43.* Capita item Callisti, & Anastasii nequaquam orbiculata, sed quadrata diadematis vel coronæ figura sunt ornata: ea namque forma exornabantur capita Pontificum viventium, quorum imagines pingebantur, teste erudito Turrigio in *notis ad historiam Martyrii S. Theodori* pag. 307. in qua sic loquitur: *Quando poi volevassi m. strare, che la persona era vivente e dimorante in questa terra piena di travagli, imperfezioni, e soggetta alla mutabilità de' quattro elementi, si formava dietro alla testa una figura quadra; come si vede in molti mosaici, e pitture antiche di Papa Giovanni Quarto, e di Leme Terzo nel Laterano, di Leone Quarto in Santa Maria Nuova, di Giovanni Settimo in S. Pietro sotto le grotte, di Pelagio in S. Lorenzo fuor delle mura, di Giovanni Decimoterzo in pittura in S. Paolo, ed in altri luoghi.* Cui consentit Joannes Diaconus lib. 4. de vita S. Gregorii Magni num. 34. (tom. 4. oper. S. Gregorii col. 176.) & ex quo quidem bene locutus est Mabillonius in *mus. Ital. tom. 1. par. 1. pag. 229.* ubi tabulam explicando depictam in ecclesia S. Theodori Martiris, de quo supra, hæc habet: *Quod Pontifex & Rex ipse ibidem depicti sunt capitibus radiatis, id argumento est, eam picturam post eorum obitum factam fuisse. Nam viventes persone illustres, sicuti depingebantur, ad caput tabula quadrata similitudinem, quod viventes insigne est, præferabant, non coronam.*

22 Capita vero SS. Leonis, & Gregorii Magni, Gelasii II. Paschalis II. Urbani II. Alexandri II. Gregorii VII. & Victoris III. efficta apparebant

rebant, & partim adhuc apparent diademate circulato; quod utique est sanctitatis, & cultus Ecclesiastici argumentum. Sacrae scilicet Scripturae Interpretes hoc fuisse ostendunt ad illud *Apoc. cap. 2. v. 10. Esto fidelis usque ad mortem & dabo tibi coronam vitae*; atque ad illud *psalmi 64. v. 12. Benedices corona anni benignitatis tua*: necnon multa pro eodem assumpto comprobando colliguntur a Theofilo Raynaudo *tom. 13. in opere de pileo, & ceteris capitis tegminibus scilicet. 18.* Sed ad rem praesentem satis erit lectorem remittere ad notas alias citati Blanchini in *vitam Pelagii Papae II.* quo nimirum in loco musivum exhibetur ab eodem Pelagio II. constructum saec. vii. & adhuc integrum in basilica Laurentiana, ubi Sancti Petrus, & Paulus, Laurentius, & Stephanus figurati sunt orbe ducto circa caput. Turrigius etiam *loc. cit.* haec refert de Urbano Papa V. *Tal circolo facevasi già alle volte dipinto alla testa di qualche persona di bontà celebre; come oggi si vede alla figura di Papa Urbano Quinto in S. Francesco a Ripa, e già in S. Grisogono al sepolcro del Cardinale di Crema con lettere, Beatissimus Papa Urbanus Quintus. Si scorge anche il medesimo in S. Salvatore de Curte, dove il detto Urbano tiene avanti il petto l'immagini delle teste de i Santi Pietro, e Paolo, perche egli le collocò nel ciborio della chiesa Lateranense.* De Pontifice namque Urbano V. legitur, quod, facta ejusdem corporis translatione ab ecclesia Avenionensi, in qua fuerat primo sepultum, ad monasterium S. Victoris Massiliensis, cujus Abbas fuerat, & in quo quidem suam elegerat sepulturam, tanta & tam multiplicia Deus ad ejus intercessionem miracula patrare dignatus est, ut, inter Abbatem, & Aedituum exorta controversia, ad quem alterutrius pertinere deberent oblationes ea occasione factae, res anno 1374. per transactionem composita fuerit; qua nempe cautum fuit, emendos certos redditus assignandos Aedituo, oblationes autem cereae, auri, & argenti ad Abbatem spectare, & coenobium. Scriptores quoque passim de ejus sanctitate & miraculis testimonium dederunt. Item Valdemarus Daniae Rex Gregorio XI. supplicavit, ut eum in Sanctorum album referret; tunc etenim jam mos invaluerat formalis Canonizationis a summo Pontifice per definitivam sententiam impetrandae. Carolus praeterea Galliarum, & Ludovicus Siciliae Reges Petrum Olmarium Canonicum Aquensem Procuratorem ad Robertum Gebenensem in sua obedientia dictum Clementem VII. Avenione sedentem miserunt, ut ab eo solemnem Urbani Canonizationem obtineret; qui profecto, licet a Pagi, aliisque respondisse feratur, sibi per tempus non licere, in tam diro videlicet schismate, ad tam sanctum ac pium opus incumbere, re vera tamen, ne quid omitteret eorum, quae a legitimis Pontificibus fieri consueverant, juxta morem litteras dedit ad nonnullos de sua obedientia Praefules, ut auctoritate Apostolica processum conficerent super virtutibus & miraculis Urbani V. inter quae nonnullae mortuorum suscitationes recensebantur: sicut ex litteris memorati Pseudopontificis desumitur, quae, etsi eis rei exitus non respondit, insigni tamen Urbani virtutum & miraculorum famae satis prodesse dicendae

tendæ sunt, teste Raynaldo *ad an. 1381. num. 48.* ubi easdem litteras affert. Sorefinus quoque *in suo tract. de capitibus SS. Apostolorum Petri, & Pauli* nonnulla profert desumpta ex processu facto super hujus Pontificis Canonizatione, quem conservari testatur in bibliotheca Vaticana. Tandem nonnulla etiam cultus publici vestigia erga Urbanum in ecclesia S. Victoris Massiliensis adhuc extant; uti plene colligitur ex ejus vita descripta a Pagi juniore *tom. 2. par. 2. breviar. Rom. Pontif.* cui adstipulatur Spondanus *in continuat. annal. ad an. 1370. num. 5.* quemadmodum & de miraculis Urbani V. intercessione a Deo patratis plura habentur apud Massonium *in ejus vita*, atque apud Bzovium *ad annum prædictum*. Senator porro Philippus Bonarrocius nulli profecto in sacra & profana eruditione secundus *in observat. ad nonnulla fragmenta antiquorum vasorum vitreorum in cometeriis Urbis inventorum tab. 9. fig. 1. & 2.* de circum capita figurata ducto diademate affert illud Honorii Augustodunensis: *Lumina, qua circa capita Sanctorum in modum circuli depinguntur, designant, quod lumine eterni splendoris coronati fuerunt.* Idcirco vero secundum formam rotundi scuti pinguntur, quia Divina protectione, ut scuto nunc muniuntur. Idem post longam antiquarum picturarum observationem concludit, orbiculatam coronam circa Angelorum capita sæculi v. initio coepisse depingi, deinde in fine sæculi vi. eum pingendi morem fuisse ubique receptum, & ad Sanctorum denique imagines post sæculum vii. fuisse productum, uti videre est *pag. 65. & 66.*

23 Si ad ceteros subinde, quorum imagines in tabula Lateranensi depictæ erant, Pontifices attendamus, & de Alexandro quidem Papa II. primum loquamur; hic electus est anno 1061. ob vitæ sanctimoniam, eruditionem insignem, & peritiam Ecclesiastici regiminis. De eo plura habentur apud Leonem Ostiensem *lib. 3. cap. 21. (inter Scriptores rer. Ital. tom. 4. pag. 431.)* Bertoldus *in chron. Constantiensi ad an. 1061. (inter Scriptores Germ. Urstisi pag. 342.)* de eodem scribit: *Qui satis strenne Simoniacam hæresim destruxit, & Ministris altaris cum conjugibus coire juxta Canonum statuta cum excommunicatione interdixit, ipsosque laicos Clericorum incontinentium Officia audire per bannum prohibuit, sicque Clericorum incontinentiam satis prudenter refrænavit.* Ipsum hoc elogio ornat Guillelmus Pictaviensis *in gestis Guillelmi II. Ducis Normannorum, & Regis Anglia I. (inter Scriptores histor. Norman. Duchesnii par. 1. pag. 197.)* Tempore eodem sedebat in Cathedra S. Petri Rome Papa Alexander, dignissimus, cui obediret, quemque consuleret Ecclesia universa. Responsa etenim edebat iusta, salutariaque. Is Præsul Lucensis, cum altiorum gradum nullatenus appetere, violento plurimorum consensu, quorum apud Romanos tunc præcellebat auctoritas, ingenti Concilio assentiente, in eo locatus est primatus, quo Præfulum orbis terra caput existeret atque magister: electionem hanc sanctitate meruerat atque doctrina. Per eadem post ad ortum solis, & occasum effulgebat .... ubique per mundum potuit, iniquum corrigens, nulli concedens. Miracula ab eodem ante mortem edita describuntur a nuper citato Leone Ostiensi *lib. 3. cap. 36.* ubi ait: *Supradictus Papa Alexander Urbe*

egrediens venit ad hoc monasterium (loquitur de Cassinensi) qui a Desiderio honorifice susceptus, dum Abbatis cameram, qua juxta ecclesiam S. Nicolai constructa est, ingressus fuisset, demoniacus quidam, qui tunc illò advenerat ei factus est obvius; quem S. Pontifex ut vidit, orationem fundens ad Dominum, dixit ad demonem: *Præcipio tibi, immunde spiritus, in virtute Domini ut ex eas ab hoc homine, & vadas in illum locum ubi nec avis volat, nec vox hominum resonat, & sis ibi usque ad diem judicii.* Mirabilis Deus in Sanctis suis, qui invocantes se & de sua misericordia præsumentes velociter exardire dignatur! Nam demon ad ejusdem Pontificis præceptum hominem relinquens, cuncti qui aderant laudare cœperunt & benedicere Deum. Nec hoc tacendum videtur, quod omnipotens Deus per eundem suum famulum operare dignatus est. Nam, cum civitatem Aquinum pertransiret, claudam quamdam in itinere jacentem invenit, cujus infirmitati idem compatiens Pontifex, aquam de qua post Missarum solemnias suas manus abluerat, ei ad bibendum tradidit, quam mox ut in potum accepit sanitati reddita, gratias Deo referre permaximas cœpit. Hæc demum, atque alia sanctitatis & miraculorum testimonia congeruntur a Pagi juniore in ejus vita (breviar. Rom. Pontif. tom. 1.) qui proinde etiam miratur, ejusdemmet nomen in Martyrologio Romano adhuc inscriptum non esse.

24 Porro Victor III. summus Pontifex electus est anno 1086. Et si vero Hugo Abbas Flaviniacensis in suo chronico (tom. 1. biblioth. nov. MSS. Labbè pag. 234.) mortem Victoris III. hisce verbis describat: *Hic igitur consecratus ab Ostiensi Episcopo, cum Missas apud S. Petrum diceret, infra actionem judicio Dei percussus est; & quamvis tarde, cognoscens, se errasse, se ipse deposuit; & accitis Fratribus de Monte Cassino, qui secum aderant, præcepit, se illò deferri, & in Capitulo, non ut Papam, sed ut Abbatem, sepeliri;* Huic tamen Hugoni nulla fides habenda est, cum steterit a partibus Hugonis Archiepiscopi Lugdunensis, qui immoderato Pontificatus desiderio inflammatus ægre tulerat electionem Victoris, ejusque consecrationem, ut videre est in ejus epist. tom. 6. par. 2. collect. Concil. Harduin. pag. 1. qua nempe conviciis sanctissimum impetit Pontificem. Trithemius autem in chron. monasterii Hirsaugiensis ad an. 1087. pag. 83. oper. historic. par. 2. refert, Victorem insidiis Henrici Imperatoris mortuum fuisse, veneno in calicem, quod Sacrum celebraret, injecto. Ptolemæus quoque Lucensis histor. Eccles. lib. 19. cap. 13. (inter Scriptores rer. Italic. Muratorii tom. 11. col. 1078.) eum modo prædicto defunctum narrat; cum enim alii asserant, eum dysenteriae morbo sublatum, subdit: *Quod esse potuit ex virtute veneni administrati sibi per amicos Henrici.* Nonnulli igitur memorato Victori Martyris titulum dedere, eo quia ob Ecclesiae defensionem ab ejus inimicis veneno necatus dici possit. Sed, quomodocumque hoc sit, quod utique ex aliquorum suspicione Trithemius refert, Petrus certe Diaconus de viris illustribus coenobii Cassinensis cap. 18. (rer. Ital. tom. 6. col. 32.) insignes ejus virtutes mirabiliter extollit, tum etiam facti Benedictini ejus memoriam die 16. Septembris recolunt his verbis: *In monasterio Cassinensi obitus B. Victoris Papa III. sanctitate viva, &*

*mira-*



*miraculorum gloria clarissimi*. Sacra ejus ossa ex antiquo sepulcro ad sacellum B. Bertharii in ecclesia Cassinensi situm translata fuerunt anno 1515. ejusdemque sacelli ornamentis absolutis, anno 1666. ipsæ B. Pontificis Reliquiæ solempni pompa locatæ sunt ad partem dexteram altaris. Ejus insuper Officium cum lectionibus propriis a sacrorum rituum Congregatione approbatis sub ritu duplici celebratur in monasteriis Cassinensi, & Caveni, in civitate Beneventana, atque in civitate ac diocesi Vaccinensi.

25 Victori III. successit Urbanus II. cujus nempe etiam icon in tabula habebatur & habetur Lateranensi, quique in summum Pontificem electus est anno 1087. Hujus autem gloriosa facta minime opus fore ducimus hic recensere, sed tantum indicasse fas esse, nomen ejus in nonnullis Martyrologiis, & sacris Fastis Beati titulo esse insignitum. In Martyrologio videlicet Benedictino apud Mabillonium *sec. 6. Bened. part. 2. pag. 904.* hæc exarata sunt: *Die 29. Julii. Roma depositio B. Urbani Papa II. quondam Monachi Cluniacensis, Cruciata ad recuperationem Terra sanctæ auctoris, libertatisque Ecclesiastica defensoris acerrimi; qui, post multas ab Henrico Imperatore IV. acceptas injurias, post exilium, & pravas arumnas, aliaque id genus, tandem sanctitate clarus Confessor occubuit.* In menologio Benedictino 14. Kal. Augusti sic legitur: *Roma, Beati Urbani II. Pontificis Maximi de universa Ecclesia meritisissimi; ac plura alia adjiciuntur de ejus pro Ecclesia feliciter exantlatis laboribus.* Philippus etiam Ferrarius in *catal. SS. qui non sunt in Martyrol. Rom.*, de eo ad dictam diem sic ait: *Roma, Beati Urbani Papa II. qui sacrum bellum in Saracenos pro recuperandis Hierosolymis indixit. Res, inquam, illius gestæ memoria dignæ omni Scriptorum genere illustratæ, atque ab eorumdem temporum fidelissimis Auctoribus editæ fuerunt.*

26 Urbano Papæ II. successor fuit Paschalis II. cujus pariter imago extitit, & extat in sæpe memorata tabula Patriarchii Lateranensis. Electio ejus contigit anno 1099. Dum enim erat monachus Cluniacensis, ob morum honestatem notus factus S. Gregorio VII. inter Presbyteros Cardinales ab eo cooptatus est: mortuo autem Urbano, invitatus & reluctans (fugam etenim arripuit, cum se summum Pontificem electum agnovit) summi Pontificatus possessionem accepit, teste Pandulpho Pisano in *ejus vita, quæ extat inter Scriptores rer. Ital. tom. 3. ubi etiam refert pag. 355.* Albertum Episcopum Alatrinum per revelationem electionem ejus prænovisse: *Dum hæc Roma ageretur, Albertus Alatrinus Episcopus quidquid futurum per oraculum vidit. Religioso cultu quadam persona sibi apparuit, quæ interroganti, quis Domino Urbano succederet, respondit: Rainerius: (sic enim Paschalis ante Pontificatum appellabatur.) Ut quid? inquit. Propter fidem, & constantiam, elegit eum Dominus.* Ex Dodechino quoque Auctore contemporaneo narrat Card. Baronius ad an. 1100. fuisse cuidam Religioso revelatum, quod Paschalis Pontificatus partim placidus, partim vero turbulentus esset futurus, sicuti deinceps comprobavit eventus.

Felix quippe in afferendis Ecclesiæ juribus faustumque fuit ejus Ecclesiasticum gubernium usque ad annum 1111. sed eodem hoc anno Romam adveniens Henricus inter Reges Germaniæ V. inter Imperatores autem IV. fide fracta, per dolum & fraudem Paschalem cum Episcopis, & Cardinalibus, ceterisque ex omni ordine, necnon cum multis Proceribus custodiæ tradidit, dum pueri, juvenes, ac viri, qui cum floribus & palmis Henrico ipsi obviam processerant, aut spoliati, aut vincti, aut caesi sunt; nemine ex Germanis Episcopis factum hocce, præter Conradum Salisburgensem Archiepiscopum, improbante.

27 Pontifex ergo nudatus sacris vestibus, Clericique, ac laici captivi funibus vincti abducti sunt. Cumque pro concedendæ liberationis pretio Henricus urgeret, ut dominiorum Ecclesiasticorum possessionem dandi, quam *Investituram* vocamus, a Gregorio VII. aliisque Pontificibus damnatum privilegium sibi concederetur; Paschalis vero se ad mortem paratum ostenderet, ne quid adversus Ecclesiasticam libertatem indulgeret; & captivos quidem omnes in ejus, ut de sententia proposita dimoveretur, conspectum ad necem produci jussos nihil permotus ad mortem ipsam opetendam hortatus esset; horum tandem precibus & lacrymis flexus, quod sua causa non fecisset, id aliena fecit, & Henrico concessit, ut Episcopos, atque Abbates anulo ac virga in possessionem mitteret, utque hi sic missi ab Archiepiscopo, cui essent subjeti, consecrarentur, ut demum ab Imperatore non missi a nemine consecrarentur; at duabus tamen additis conditionibus, altera scilicet, ut electio libera esset, altera autem, ut domini constitutio, atque adeo ipsa in ejus possessionem introductio sine simonia expleretur: sicut ex authenticis documentis refert Card. Baronius *ad an. 1111.*

28 Sic e carceribus egresso Paschali, criminationibus multis ampla via aperta est: quippe teste citato Orderico *lib. 10. pag. 762.* nonnulli assererebant, eum potius vincula, flagra, & mortem perpeti debuisse, quam aliquid contra jus & statuta Patrum, Potestati annuere sæculari. Non desuerunt tamen, qui factum defenderent. Quamobrem Ivo in *epist. 238.* ita scripsit: *Hunc excessum ejus non tantum non accusamus, sed, distante ratione, approbamus, si, imminente strage populi, paterna charitate cum non-nullo vulnere suo se tantis periculis voluit obicere, ut majoribus morbis posset sincera charitate subvenire.* Et profecto supra expositæ conditiones liberæ electionis ad Episcopatus, & Abbatias, atque exclusionis cujuscumque simoniæ in tradenda domini possessione per anulum & baculum, non modicum defensionis subsidium suppeditabant; cum S. Anselmus Lucensis Episcopus *lib. 2. apologet. pro Gregorio VII. (cit. biblioth. Pontif. tom. 4.)* contra Guibertum Antipapam eas specialiter designaverit causas, quibus inductus Gregorius VII. domini Ecclesiastici possessiones dandi facultatem proscripserat. Alii contra audacius ad ulteriora procedentes, privilegium Henrico concessum hæresis labe infectum judicarunt, ipsumque qui indulgit,

indulſit, tamquam hæreticum habendum eſſe cenſuerunt. Hujus nimirum ſententiæ fuit Guido Vienneniſis Metropoliſta, Paſchalis II. in Gallia Legatus, & deinde Romanus Pontifex, aſſumpto nomine Calliſti II. Illi adhæſerunt Jo. Lugdunenſis Archiepiſcopus, & Bruno Caſſinenſium Abbas Signinulque Epicoſopus, utpote cui in tertia Synodo Romana privilegium tamquam hæreſim continens, idque concedentem tamquam hæreticum denuntianti Jo. Cajetanus Epicoſopus fortiter obſtitit. Supra allegatus autem Ivo *epiſt. cit.* laicam domini Eccleſiaſtici conſtituendi facultatem hæreſim utique continere ſenſit, ſi in poſſeſſionem mittens putaret, ſe prædictis externis teſſeris ſpiritualem poteſtatem cæleſtis & Divini miniſterii concedere; ſecus vero, ſi ipſe mittens id in animo non haberet: concluſitque, conceſſionem eamſem ſine prava opinione non eſſe niſi alieni juris uſurpationem: *Si quis vero laicus ad hanc prorumpit inſaniam, ut in datione & acceptione virga putet, ſe tribuere poſſe ſacramentum, vel rem ſacramenti Eccleſiaſtici, illum proriſus judicamus hæreticum, non propter manuaſem inveſtituram, ſed propter præſumptionem diabolicam: ſi vero congrua volumus rebus nomina dare, poſſumus dicere, quod manualis illa inveſtitura per laicos facta alieni juris eſt pervaſio, ſacrilega præſumptio, qua pro libertate Eccleſiæ & honeſtate, ſalvo pacis vinculo, ſi fieri poteſt funditus abſcindenda eſt: ubi ergo ſine ſchiſmate auferri non poteſt, cum diſcreta reclamazione differatur.* Re enim vera, ſi domini iplius Eccleſiaſtici conſtituendi a laicis uſurpata facultas hæreſis absolute & ſimpliciter fuiſſet, non eam Gregorius VII. alique Pontifices in ſola Eccleſia Occidentali reprobaſſent, ſed eamdem reprobationem ad Eccleſiam etiam Orientalem, in qua illa vigeſat, ſine ulla dubitatione extendi voluiſſent.

29 In harum porro tribulationum medio Paſchalis Pontifex propriam culpam ingenuè agnoſcebat: Ille vero, (verba ſunt Orderici *loc. cit.*) *reprehenſiones Sophiſtarum, (eorum videlicet, qui doctiores eſſe putabantur,) patienter tolerabat, & aſſertiones eorum legitimas ac veraces eſſe allegabat.* In tertia item Synodo Romana ſic ille locutus eſt: *Feci, ut homo, quia pulvis ſum & cinis. Fateor, me male egiſſe; ſed rogo vos omnes, orate pro me ad Deum, ut indulgeat mihi.* Illud autem malum ſcriptum, quod in ſententiis factum eſt, quod pro pravitate ſua privilegium dicitur, condemno ſub perpetuo anathemate. Auctor præterea anonymus hiſtoriæ Pontificum, & Comitum Engoliſmenſium, ſcriptor ſæculi XII. *tom. 2. biblioth. Labbè pag. 259.* factam ab eo narrat oblationem de Pontificatu deponendo, deque aſſumendo habitu religioſo ad Pontianas inſulas; ſed oblationem iplam minime fuiſſe acceptatam. Hæreſis certe labem, ut habetur in Actis Concilii Lateranenſis vulgo II. *apud Harduin. tom. 6. part. 2. col. 1900.*, ſibi impactam fortiter repulit; cumque conceſſum antea privilegium aboleverit, glorioſa denique poenitentia, aliorumque inſignium operum patratiōe uſque ad obitum producta ita clareſcere potuit, ut & ejus imago in tabula Patriarchii Lateranenſis recte potuerit ab Anaſtaſio IV. collocari.

Pia

Pia profecto ejus mors ex Bibliothecario refertur a Card. Baronio *ad an.* 1118. *num.* 2. Et hæc ipsa huc usque adducta fufe legi possunt apud Sigonium *de regno Ital.* lib. 10. apud sæpe memoratum Card. Baronium *ad an.* 1112. apud Pagi juniorem *in vita Paschalis II.* apud Pagi seniore *ad an.* 1111. apud Fleury *in histor. Eccles.* lib. 66. apud Card. de Aguirre *in defensione cathedra S. Petri tract.* 1. *diff.* 11. apud P. Lupum *ad V. Concil. Rom. can.* 3. *part.* 5. & demum apud eruditum virum Ignatium Hyacinthum de Graveson Ord. Præd. *in histor. Eccles. sac.* 12. *tom.* 4. *part.* 2. *colloq.* 1. Postremo Bucellinus *in menol. Bened.* *ad diem* 18. *Januarii* eum appellat titulo Beati, atque ipsius egregia facta late persequitur *in annal. Bened.* *ad an.* 1118. *fol.* 244. & *in Aquila Imperii Benedictina* *fol.* 139.

30 Anno Domini 1118. mortuo Paschali II. in summum Pontificem electus est Gelasius II. cujus vita scripta fuit a Pandulpho ejus familiari, edita vero a Constantino Abbate anno 1638. Romæ cum prolixis commentariis (qua omnia extant inter Scriptores rer. Ital. editos a Cl. Muratorio.) Magna sunt, quæ Pontifex iste pro Ecclesia Dei sustinuit. Quæ enim a factione tantum schismatica passus est, memoratus Pandulphus sic exponit (tom. 3. *Scriptor. rer. Ital.* pag. 384.) *Papam per gulam accepit (nempe Cencijs Frangipanius) distraxit, pugnis calcibusque percussit, & samquam brutum animal intra limen ecclesiæ acriter calcaribus cruentavit, et latro tantum Dominum per capillos & brachia, Jesu bono interim dormiente, detraxit, ad domum usque deduxit, imibi catenavit & inclusit. Et rursus pag. 385. Sæva insuper jam per ripam Alemannorum barbaries tela contra nos mixta toxico jaciebat; imitabatur etiam nos intra aquas natantes privatum igne cremare, nisi Papam & nos in eorum manibus redderemus. Et tandem pag. 398. O quantus luctus omnium! quanta præcipue lamenta matronarum, quæ Papam solum tamquam scurram per campos, sacris pro parte vestibus revestitum, quantum equus poterat, fugientem videbant. Quocirca merito Card. Baronius *ad an.* 1119. n. 2. ita de Gelasio II. mortuo locutus est: *Post Martyres, qui, fuso sanguine, Martyrium consummarunt, haud facile inter Romanos Pontifices aliquem quis invenerit, qui breviori vite tempore majora sit passus, ob idque præclarioræ corona donandus, atque celebrioribus fueris præconiis celebrandus. Asperissimas scilicet porro fugiens persecutiones in Galliam se recepit, ubi, Synodo collecta, Ecclesiæ periculis prospexit; postea Cluniacum profectus aliquando se se in virtutum palæstra cum Dei famulis ibi degentibus exercuit; donec, pleuritide correptus, sanctissime diem clausit extremum. Honorabilis idcirco ejus mentio habetur in Martyrol. monast. Arnoldi VVion (lign. vita lib. 3.), Et in Martyrol. Gallic. Andrea Saussaji *ad diem* 29. *Januarii*, etiamque in Menol. Bened. *ad eandem diem*, & apud Philippum Ferrarium tum in catal. SS. Ital. tum in catalogo SS. non existentium in Martyrol. Rom. Gelasii pariter imago depicta est in ecclesia cœnobii Montis Cassini cum diademate orbiculato, & titulo Sancti. Quin, dum munere fungebat Fidei Promotoris, agi cœptum est de Officio ac Missa in ejus honorem**

norem concedendis sub ritu duplici Capitulo ecclesiæ Lateranensis ; Capitulo basilicæ S. Mariæ in Cosmedin , in quod nempe multa beneficia & ante Pontificatum , & in Pontificatu ipso contulerat , necnon Ordini Monastico S. Benedicti : at petitio tamen nunquam fuit in sacra Congregatione proposita , ob id minime , quia de infelici rei exitu timeretur , sed ob alias utrique causas omnino disparatas , ut puta , mutationis personæ , quæ ratione muneris in negotium incumberebat . Munere enim Procuratoris , veluti Generalis alicujus Ordinis Religiosi , sive Gestoris negotiorum alicujus Capituli alii personæ delato , si opus ab antecessore inceptum a successore negligatur , id nequaquam ex proprii meriti defectu , sed ex Administratorum negligentia evanescit ; quemadmodum , experientia teste , sæpe vidimus re ipsa contingere .

31 In tabula Lateranensi depictæ quoque apparebant imagines SS. Leonis , & Gregorii Magni . Sed de horum sanctitatē , & cultu universam Ecclesiam complectente , utpote rebus usquequaque notissimis , inutile est verba facere . Inerant demum , & adhuc insunt in ejusdem tabulæ parte superiori imagines SS. Silvestri , atque Anastasii summorum Pontificum : & de his similiter nullum opus est habere verbum ; cum Silvestrum Beda , Ufuardus , Ado , & ceteri Latinorum , necnon Græci in Menologio , atque adeo Romana ipsa Ecclesia in Martyrologio Sanctum enuntient , & dies insuper , quo ejus nomen celebratur , inter seriatos enumeretur in *can. Pronuntiandum. de consecr. dist. 3. et in cap. Conquestus. de seriis* : de Anastasio autem , præterquamquod Beda quoque , Ufuardus , Ado , & Martyrologium Rom. ad diem 27. Aprilis Sanctum eum etiam exhibent , sanctus adhuc Hieronymus in *ep. 127. alias 16. ad Principiam col. 952. tom. 1. oper.* scribat , Romam ipsum diu habere non meruisse , ne orbis caput sub tali Episcopo truncaretur ; quibus nimirum verbis respexit ad Urbem post ejus obitum captam a Gothis . Quamquam , quæ de aliis Pontificibus Alexandro II. Victore III. Urbano II. Paschali II. & Gelasio II. in superioribus diximus , non perinde dicta sunt , atque asserere velimus , eos inter Sanctos & Canonizatos esse recensendos . Nec enim simplex *Sancti* denominatio , ut alibi demonstrabimus , nec imago in loco sacro depicta , & eo tempore ornamentis decorata , quibus Sanctorum imagines decorari consueverunt ; si ceteræ desint circumstantiæ , vel cultus scilicet ad universam Ecclesiam , sciente & approbante summo Pontifice , extensi , vel definitivæ sententiæ ab eodem prolatae de sanctitate & cultu in universa Ecclesia præstando ; sufficiunt , ut quis inter Sanctos , & Canonizatos sit recensendus : sed sufficiunt tantum supradicta , ut illi , quorum imagines , Romani potissimum Pontificis auctoritate , tali modo , cum tali titulo , & in tali loco expressæ sunt , haberi queant inter eos , quibus cultus aliquis in determinato loco permittitur ; qui porro cultus , nisi subinde augeatur juxta modum antea expositum , nec Canonizationem formalem , nec æquipollentem constituere potest .

32 Affirmamus autem , ex imaginibus , Romani potissimum Pontificis aucto-

auctoritate, tali modo, cum tali titulo, atque in tali loco depictis & collocatis inferri cultus permissionem in loco determinato: quia, ut observat Abbas Cajetanus in *comment. ad vitam Gelasii II. pag. 135.* loquens de tabula eadem Lateranensi, neque Callistus II. & Anastasius IV. imagines eo modo depictas, & eo titulo decoratas in sacello collocassent, neque eorum Successores, præsertim vero ii, qui per ducentos continuos annos in eodem sacello & altari Sacra celebrare, imagines ipsas ibidem retineri passi fuissent, nisi in animo habuissent indulgendi & permittendi cultum in eorum honorem, qui per imagines quidem ipsas exhibebatur. At, cum asseruerimus etiam cultum prædictum non constituere formalem, aut æquipollentem Canonizationem, nisi augeatur secundum ritum alibi expositum; ideo nec *formaliter*, nec *æquipollenter* dici poterunt canonizati Alexander II. Victor III. Urbanus II. Paschalis II. Gelasius II. sed æquipollenter tantum dici poterit canonizatus Gregorius Papa VII. aucto quippe ejus cultu per mox dicenda. Primò scilicet per ejusdem memoriam in Martyrologio Romano litteris consignatam tempore Gregorii XIII. tum retentam in nova ejusdem Martyrologii editione tempore Sixti V. facta. Secundò per concessionem Officii proprii in ipsius honorem factam Ecclesiæ & Clero civitatis Salernitanæ, prævio sacræ rituum Congregationis consilio, a Paulo Papa V. postquam sedente Gregorio XIII. ejus corpus post quingentos circiter ab obitu annos vestibus sacris amictum, & tere integrum in sua Metropolitana ecclesia, ubi sepultum fuerat, a Marco Antonio Columna Marsilio Bononiensi Archiepiscopo Salernitano fuit repertum; ut ex litteris Apostolicis fideliter relatis, aliisque certis monumentis narrant Bollandiani in commentario prævio ad vitam Gregorii VII. §. 2. *ad diem 25. Maji.* Tertiò per Officii extensionem ab eodem Paulo V. factam die 20. Novembris 1610. ad Capitulum & Clerum Senensem, & Suanensem. Quartò per aliam similem extensionem primum ad Patriarchalem ecclesiam Lateranensem, deinde ad Patriarchalem Vaticanam ecclesiam S. Petri, tum autem ad Patriarchalem Liberianam. Quintò per aliam item extensionem ad universum Ordinem S. Benedicti, necnon ad Religiosum Ordinem Vallumbrosanum, quem, dum viveret, singulari amore Gregorius fuerat profecutus; quemadmodum adnotarunt ipsi Bollandiani. Ultimò, in quo æquipollens potissimum, consistit Canonizatio, per decretum san. mem. Benedicti XIII. editum die 25. Septembris 1728. in quo mandavit, ut ejus Missa, & Officium in Breviario, ac Missali Romano apponeretur; utque in posterum die 25. Maji sub ritu duplici Missa ipsa celebraretur, & Officium recitaretur ab omnibus Christianidelibus tum Sæcularibus, tum Regularibus, qui ad Horas canonicas tenentur: & ita quidem, ut idem Pontifex in suis litteris Apostolicis, quibus die 19. Decembris 1729. irrita fecit mandata, edicta, & alia gesta quorundam Magistratuum, seu Officialium & Ministrorum secularium adversus decretum modò dictum extensionis Officii ad universos Christianos fideles;

fideles ; bene potuerit asserere , Officium hocce in plurimis Christiani orbis ecclesiis antea fuisse publice & solemniter recitatum ex Indultis suorum Antecessorum Romanorum Pontificum , Pauli scilicet V. Clementis X. Alexandri VIII. atque Clementis XI. Porro quæ dicta sunt de sacello S. Nicolai in Patriarchio Lateranensi , & de altari , atque pictura se habebant , sicuti expositum est , tempore quo facta est prima editio primi tomi hujus nostri Operis. Sed, cum deinde mutata esset facies universi ædificii Lateranensis tempore san. mem. Clementis XII. & area basilicæ fuisset dilatata & ampliata , & antiquum hospitium , in quo debebant PP. Poenitentiarum basilicæ , fuerit solo æquatum , & una simul dirutum sacellum cum celebri Triclinio Lateranensi , de quo sæculo præterito absolutissimum tractatum edidit Nicolaus Alemannus, necessarium existimavimus in altera Operis nostri editione hæc adnotare , ipsumque picturæ apographum ære expressum , quod forte fortuna invenimus , apponere ; admonentes nos id facere , ne quis legendo quæ scripseramus , & tamquam adhuc existentia fuerant a nobis descripta ; iis non repertis , crederet , nos aut deceptos fuisse , aut lectores voluisse decipere . Addidimus insuper , ne antiquarum sacrarum imaginum memoria periret , tum Triclinii , tum sacrarum imaginum instaurationem meditari tali arte , per quam antiquitatis damna repararentur . Tandem Deo adjuvante , reparationem hujusmodi perfecimus , & PP. Poenitentiarum hospitio aliò translato , pictura renovata fuit , adhibito Chalcographorum , & Antiquariorum labore , qui illam antequam dirueretur pluries delinearunt ; in cujus rei testimonium posita nunc legitur inscriptio :

## BENEDICTO XIV • P • M

SACRARVM ANTIQVITATVM  
VINDICI PROVIDENTISSIMO

QVOD

ORATORIO DIVI NICOLAI  
PROPE TRICLINIVM

A SVMMIS PONTIFICIBVS  
CALLIXTO II • ET ANASTASIO IV

EXTRVCTO AC REPARATO

ATQVE ÆDIBVS FRATRVM FRANCISCANÆ FAMILIÆ

FIDELIVM EXOMOLOGESI DESIGNATORVM

QVARVM AMBITV ORATORIVM IPSVM CONCLVDEBATVR

Tom. I.

E e e

AD SPATIA AREÆ LAXANDA  
 SEDENTE  
**CLEMENTE XII** P M  
 SOLO ÆQVATIS  
 S A C E L L V M  
 ET VETERES IN EO PICTVRAS  
 TVM CHALCOGRAPHORVM INDVSTRIA  
 TVM ANTIQVARIORVM LABORE  
 PLVRIES DELINEATAS  
 AC PRIVSQVAM DISIICERENTVR  
 COLORIBVS ELEGANTER EXPRESSAS  
 AD PRISCVM EXEMPLAR  
 RENOVARI IVSSERIT  
 ET VETVSTISSIMA CVLTVS  
 DECESSORIBVS SVIS  
 IAMDIV EXHIBITI MONIMENTA  
 RELIGIOSE SERVARI CVRAVERIT  
**ANNO MDCCXLVI**

Sed ut diximus, jam ab antiquo statu pictura fuerat in aliquibus figuris mutata. Nunc ergo in tertia nostri Operis editione utile judicavimus eam diligentius describere. Quod eo magis necessarium visum est, quod pictura prout erat antiquitus, non exacte usquequaque expressa est. Eam primus exhibuisse videtur Constantinus Cajetanus post commentarios in Gelasii vitam cum hac subjecta epigraphē: *Apostolicum veneranda memorie monumentum, quod etiamnum extat in abside Oratorii Sancti Nicolai Episcopi quinque abhinc seculis a B. Callisto PP. II. a fundamentis extructi intra Lateranense Patriarchium, nunc solo equatum, has ut vides Sanctorum summorumque Pontificum imagines representans; idque nunc tandem a Reverendissimo P. D. Constantino Abb. Cajetano ad majorem Romane Sedis Apostolicae gloriam e tenebris erutum, ac commentariis illustratum: ex Cajetano eandem repræsentarunt Papebrochius in propylæo in append. ad Paschalem II. & Muratorius tom. 3. Scriptor. rer. Italic. pag. 417. Non defuit, qui imposturæ argueret Cajetanum: quare apologiam pro eo scripsit Joannes Marius Crescimbeni in libro inscripto: *Stato della basilica di S. Maria in Cosmedin* a pag. 207. de Cajetani*



jetanī ipsius persona & hoc monumento fufe loquens. Tandem D. Julius Lucenti Cisterciensis Abbas de *Episcop. Ital.* eandem picturam nonnihil tamen a proposita per Cajetanum diversam dedit, cui subiecta legitur hæc inscriptio: *VERA & sincera facies absidæ antiqui, venerandique Apostolici Oratorii S. Nicolai Episcopi, olim in Patriarchio Lateranensi extantis, & etiamnum existentis in Collegio Penitentiariæ Apostolicæ, representans SS. summos Pontifices quos ibi expressit Calistus Papa II. instauravit Anastasius IV. & subinde (cujus arbitrio ignoratur) GELASII, PASCHALIS, URBANI II. & VICTORIS III. inibi recenti superinducto pennicillo, nomina immutata conspiciuntur in primum Cælestinum, itemque Gelasium, Paschalem, & Calistum. Sacrum hoc monumentum, SANCTITATIS prefatorum Pontificum ad majorem Dei, & sanctæ Apostolicæ Sedis gloriam sub auspiciis Eminentiss. D. Cardinalis BENEDICTI PAMPILLII ejusdem Patriarchii Archipresbyteri, & sui Ordinis Prosectoris restituit, & illustrat R. P. D. Julius Lucenti Cisterciensis Abbas in opere de Episcopis Italia, ubi agit de Castensium Antistitem serie; sibi stipulantibus Homophrio Panvinio, & Joanne Severano in libris de septem Urbis Ecclesiis, & Reverendiss. Abbate Constantino Cajetano, in vita S. Gelasii II., Cardinali Eminentiss. Ruffino lib. 4. de Patriarchio Lateranensi atque codice MS. Vaticano, aliisque digna nota Scriptoribus.* Ex his verbis ne ansa detur calumniandi Cajetanum, idem Crescimbenius loc. cit. animadvertit bis eandem picturam instauratam post Panvinium, & Severanum, qui ejus meminere, idest post annum 1630. In prima restauratione mutatus est titulus duorum, vel trium illorum Pontificum, qui antiquitate exesus erat. His restitutus est a Cajetano, ut ipse indicat in commentariis ad vitam Gelasii II. pag. 136. In secunda restauratione nomina Victoris III. Gelasii II. Paschalis II. Urbani II. permutata fuerunt in nomina Calisti I. Gelasii I. Paschalis I. Hanc ergo alteram picturæ illius depravationem emendavit Abbas Lucenti. Fatendum est tamen non omnino eandem picturam, uti erat, vel Cajetanum, vel Lucentium exhibuisse; præsertim cum primus adeo vicinas Pontificum figuras representavit, & nomina eorum illorum imaginibus supposuit; alter cum ad latius suum cujusque Pontificis nomen per syllabas, non per litteras singulas singulis imminentes; vel cum migras eorum aliquas trina corona redimitas aut multum ornatas descripsit. Ut igitur exactam picturæ hujus, qualis olim erat, descriptionem proponamus; juvat adducere verba Grimaldi, quæ extant etiam apud Floravantem Martinellum in *Roma ex Ethn. Sacr.* pag. 380. Sic enim ait loquens de Oratorio S. Nicolai: *Hoc Oratorium, sive adicula pulchra & longa cum tecto ligneo imbricato retro apsidem Aula Leoniana scribit Panvinius suo tempore esse totam depictam: nunc ..... tota est alba, præter apsidem, cujus sacras imagines coloribus refricarunt. In apsidis testudine est imago Deiparæ Virginis Imperatricis similis illi, quæ est in sacello Altenpsiano in basilica Transiberina; tenet crucem, filium sinu gestat, hinc inde duo Angeli virgas tenentes coronam habent in capite. Ad pedes Deiparæ Callistus II. cum planeta, & pallio, ac quadrato diademate habet rotundam albam barbam pulchroque aspectu.*

*aspectu in dextris : in sinistris autem Anastasius IV. cum planeta & pallio & quadrato diademate pariter prostratus . In ipsa testudine a dextris S. Silvester Papa cum planeta , & pallio cum libro , & dextra benedicens cum tiara unius corona ; a sinistris est S. Anastasius cum pallio Pontificali , & rotundo diademate . In zophoro apsidis legitur hæc mutilata inscriptio ( corruperunt litera ex pictura , ac spatia literarum notavi ) est autem huiusmodi .*

SVSTVLIT HOC PRIMO TEMPLVM CALIXTVS AB IMO  
VIP. . . . . LATE GALLORVM NOBILITATE  
PRÆSIDET ÆTHEREIS PIA VIRGO MARIA CHOREIS  
. . . . . PAT CVLMINE  
HOC OPVS ORNAVIT , VARIIS MODIS DECORAVIT .

*In parte Euangelii sunt hi summi Pontifices pictura inepta , planeta & pallio induti cum orbiculari diademate & tiara unius corona ad parietem hemicycli, sinistra tenens librum , dextera benedicunt pollice cum annulari conjuncto , S. Leo Papa , S. Paschalus Papa cum barba alba septuagenarius , S. Gelasius Papa cum barba quinquagenarius , S. Celestinus Papa etiam quinquaginta annorum . In latere epistola S. Gregorius Papa , S. Alexander Papa II. senex annorum 77. barba alba rotunda, extenuata facie, S. Gregorius Papa VII. annorum 50. S. Callistus Papa senex valde , non habet regnum , nisi tantum orbiculare diadema ; & hoc quia fuit ante S. Silvestrum , qui primus regnum portavit . Ita erat in zophoro columnarum majorum veteris basilica Vaticana a S. Lino usque ad S. Silvestrum , orbicularia diademata habebant . In singulis sunt dicta nomina Sanctorum . Hæc Grimaldus . Hujus vero nobilis monumenti , præter laudatos Panvinium , Severanum , Cajetanum , Rasponum , meminit etiam Ciampinus de sacr. adific. a Constantino M. constructi pag. 20. Ciacconius in Gelasio II. tom. 1. col. 945. Marraccius in Pontific. Marian. cap. 44. & ex eo bene se probasse Gelasium II. ut Sanctum habendum defendit cit. loc. Crescimbenius : quod nos etiam facimus pro Gregorio VII. quod nimirum ejus effigies tali loco ad altare , in quo Missarum incruenta mysteria & a subsecutis Pontificibus , & ab aliis Presbyteris usque ad hoc tempus celebrata sunt , depicta fuerit & insignita sit diademate illo orbiculato sive nimbo ut olim vocabatur . Licet enim antiquis temporibus Imperantium etiam capitibus imponeretur ut ex Servio Gisbertus Cuperus lib. 2. observ. cap. 16. narrat , & nonnulla monumenta indicant ; tamen , ut nunc solis Sanctis qui cultum in Ecclesia obtinent , affigitur , ita etiam sæculo illo quo positum fuit ; ut bene hoc dicendi sint Auctores supra relati docuisse .*







*Exemplum Picturæ Absidis antiqui Oratorii S-NICOLAI  
Episcopi in Patriarchio Lateranensi, qualis olim extabat,  
priusquam area, quæ ante Lateranensem  
Basilicam diffunditur, amplificaretur.*





## De S. Gertrude Islebien. Virgine.

33 S Anctæ Gertrudis Islebienfis in Saxonia Monialis & Abbatiffa Monialium in cænobio Rodardensî, ac deinde Helpedenfî, sive Helffedenfî, Ord. S. Benedicti Congregationis Hirsaugiensis reformatæ Cluniaci, quo anno ad superos migraverit, variis varia scribentibus, non est omnino certum.

34 Jodocus Coccius in thesauro Catholico eam floruisse ait anno 1280. Possëvinus, Cave, Oudiu lib. de Scriptarib. Eccles. pag. 554. Arnoldus VVion in lieno vitæ lib. 5. cap. 89. Maximilianus Sandæus in trolog. myst. pag. 655. & Hippolytus Mar racci in liliis Marianis pag. 179. mortuam faciunt anno 1290.; Jo: Baptista Riccioli in chronol. reform. tom. 4. pag. 233. & Laurentius Cremen. in prefat. ad vitam & libros S. Gertrudis floruisse scribunt decennio post, nimirum anno 1300. immo alii apud Crementium ipsum mortuam affirmant ipso anno 1300.; Antonius vero Maria Bonuccius, vir candidis moribus, mihi olim carissimus, in hujus Sanctæ vitæ, quam postremus omnium edidit Romæ anno 1710. part. 1. cap. 1. hæc habet: *Concordando con tutti, che il suo felice transito fu nel 1311. dobbiamo asserire, che nacque nel 1240. &c.* qui porro sint hi omnes in hoc concordēs, non exprimit.

35 Joannes Landspergius Carthusianus, qui Sanctæ vitæ & revelationes primus edidit (nam quæ antea, nempe anno 1390. a Lamberto Luxonio scripta fertur, quod sciam, non est edita) in epistola apologetica, quam ei præfixit, auctor est, B. Gertrudis revelationes per quamdam Sanctimonialem anno 1289. scribi cœptas. Ac deinde in vita lib. 1. cap. 3. divinitus Gertrudi monstratus dicitur, eodem quo novus Imperator electus est die, Adolphus Nassavius Rodulphi Austriaci Successor: electus autem est die 7. Januarii 1292. Atque hunc eundem annum Gertrudi ipsi supremum ponit lectio sexta Officii, nuper, ut dicemus, Ecclesiæ concessi. Sic enim habet: *Anno Domini millesimo ducentesimo nonagesimo secundo decessit: cum Officium Ordini ejus antea indultum, & a clar. mem. Cardinali Bona relatum, mortis annum sileat omnino.*

36 Landspergii demum editor Tilmannus Bredenbachius, in epistola nuncupatoria, quam Colonia dedit 17. Decembris 1578. prope finem asserit: *Libros a S. Virgine Gertrude ante annos pene trecentos partim conscriptos, partim a consodali ejus exceptos, & ante annos quadraginta per Joannem Landspergium Carthusianum &c.* Unde discimus, eos a Landspergio primum editos fuisse anno 1538. Qui vero Landspergium ipsum typis Venetis Etruscum fecit, deditque anno 1568. Vincentius Bondius in epistola, quam Sanctæ revelationibus præmisit, hæc scribit: *Il R. P. Gio: Landspergio Mo-*

naco della Certosa, il quale dopo cinquecento anni di tempo ch' erano state nascoste, venendo quasi miracolosamente a luce, ebbe carico di ridurle tutte insieme &c. Qui si calculus constaret, Alexandro III. ejusque Decretali antiquiorem Gertrudem haberemus.

37 Sed & quas reliqui omnes Gertrudi huic Germanæ tribuunt revelationes, Martinus Antonius del Rio, vir ceteroqui eruditissimus, *disquisit. magic. lib. 4. cap. 1. quest. 3. sect. 4.* eas illi abjudicare visus est, Nivel-lensi Gertrudi tribuens his verbis: *Birgitta longe antiquior Pipini Ducis Brabantia filia, S. Gertrudis anno 664. revelationes quoque suas collegit.* Qua ille in re profecto est singularis. Quemadmodum & in serendo de ipsis ejusdem Sanctæ revelationibus judicio, non singularis modo, sed audax ac plane temerarius, immo & piarum aurium offensior fuit Oudin: qui cum (*in suppl. ad Bellarminum de Scriptoribus Ecclesiasticis*) scripsisset opus istud devotioni mulierum aptissimum; postquam deinde a Religione discessit, elogio auctarium hoc audacius fecit (*de Scriptor. Eccles. tom. 3. pag. 237.*) *Opus istud devotioni mulierum cerebro laborantium aptissimum.*

38 Quarto post Gertrudis mortem sæculo primus illi a Sede Apostolica cultus obvenit 7. Octobris 1606. Officium de ipsa Monialibus S. Joannis Evangelistæ civitatis Liciensis, juxta formam Breviarii Romani, & de consensu Episcopi, per decretum sacræ rituum Congregationis indulgente; ac similiter deinceps 20. Junii 1609. Monialibus Conceptionis B. Virginis civitatis Mexicanæ sub ritu duplici; & 19. Decembris 1654. Monachis & Monialibus Ord. S. Benedicti Congregationis Cassinensis sub ritu duplici ad libitum; & 6. Junii 1663. Congregationi Olivetanæ ad instar Cassinensis, & quatenus adesset in Breviario Monastico Benedictino; & 13. Septembris 1670. Monachis & Monialibus Benedictinis Portugalliæ sub ritu duplici; & 17. Junii 1673. Monachis & Monialibus Benedictinis Hispaniarum; & 23. Septembris 1673. Monialibus Humilitatis de Urbe; & 2. Decembris 1673. iisdem, sed cum lectionibus propriis; & 13. Januarii 1674. Monachis & Monialibus Ord. S. Benedicti cum propriis lectionibus, hymnis, capitulis, responforiis, antiphonis, & oratione, sub ritu duplici; & 4. Augusti 1674. Monialibus S. Benedicti in Campo Martio.

39 Officio his Indultis impetrato, actum est anno 1677. de B. Gertrude in Romanum Martyrologium inferenda: ac bon. mem. Archiepiscopus Myrensis Bottinius tunc Fidei Promotor, in suis oppositionibus non tacuit, quod de illius Canonizatione, immo nec etiam de Beatificatione (*saltem formali*) nullum daretur documentum. Sed manu ejus deinde hoc annotatum invenio: *Post scripta, fuit obsecurum Breve Indulgentia plenaria in die festo Beata, quod est multum; quia juxta decretum sel. record. Alexandri VII. non conceditur similis Indulgentia, nisi previa descriptione in Martyrologio: et hodie (quidquid esset ante dictum decretum) passim negatur. At dixerunt Officiales Secretaria, quod in eorum libris reperitur descripta ista B. Gertrudis la magna, tanquam*



taquam digna hujusmodi cultu. Itaque nomen ejus Martyrologio adjectum est hoc decreto: *Sacra rituum Congregatio; referente Eminentiss. et Reverendiss. D. Cardinali Columna, instantiam factam nomine Ord. Benedictini per P. Magistrum D. Ildephonsum Mier Procuratorem Generalem Congregationis Vallisole-tanae Ord. S. Benedicti Hispaniarum supplicantem pro appositione S. Gertrudis Virginis, ut dicitur, la magna, predicti Ordinis in Martyrologio Romano, cum elogio & verbis approbandis, respondit: Apponatur in Martyrologio absque elogio: Hac die 22. Januarii 1678. Sed postea indultum est, ut cum hoc elogio in-scriberetur: 17. Novembris in Germania S. Gertrudis Virginis Ordinis S. Be-nedicti, qua dono revelationum clara extitit.*

40 Die tandem 20. Junii 1738. instante per S. Clementis Cardinalem Albanum Serenissimo Rege Poloniae, eodemque Duce Saxoniae, in qua S. Gertrudis patria Islebium est, sel. record. Clemens XII. in posterum singulis annis die 17. Novembris festo ejusdem Sanctae assignata Officium ejus, ad formam tamen Breviarii Romani redigendum, ab omnibus utriusque sexus tam Sacularibus, quam Regularibus, qui ad Horas canonicas tenentur, sub ritu dupli-ci, servatis tamen rubricis, recitari, & Missam celebrari indulsit, ac in Breviario & Missali Romano imprimi mandavit.

41 Verum animadverso postmodum, eam diem 17. Novembris S. Gre-gorio Thaumaturgo a primis usque Ecclesiae saeculis sacram esse, incon-veniens omnino visum est, ut is qui montes etiam loco moverat, loco ipse suo moveretur, ac Virgini Episcopus & Doctor locum daret; praesertim cum non annus modo, sed neque dies mortis ejus certa sit, nullo Histori-corum eam exprimente; Landspergio autem lib. 3. dumtaxat innuente, illam obiisse paulo post festum S. Lebuini, quod die 12. Novembris in Ger-mania celebratur. Itaque Officio ad formam Romani Breviarii redacto, prodiit decretum illud approbans, simul & diem alium Virgini assignans, in hanc formam: *URBIS ET ORBIS. Supra scriptam Orationem & lectio-nes secundi Nocturni proprias S. Gertrudis Virginis Ord. S. Benedicti ab Emi-nentiss. & Reverendiss. D. Cardinali S. Clementis diligenter revisas atque exa-minatas, sacra rituum Congregatio ad instantiam Serenissimi Regis Poloniae beni-gne approbavit, ut singulis annis die 15. Novembris pro festo ejusdem Sanctae assignata, ab omnibus utriusque sexus Christianis tam Sacularibus, quam Re-gularibus, qui ad Horas canonicas tenentur, in ejus Missa & Officio sub ritu duplici minori a Sanctissimo Domino nostro sub die 20. Junii 1738. Ecclesia uni-versali concessa recitari debeant, si Sanctissimo Domino nostro visum fuerit: Die 9. Martii 1739. Factaque deinde per me Secretarium de predictis eidem San-ctissimo Domino nostro relatione, Sanctitas sua benigne annuit: Die 19. ejusdem mensis & anni 1739.*

*De Ecclesiastico iudicio, quod in Beatificationem interponitur, utrum videlicet sit infallibile, & ad Fidem Catholicam pertinens.*

**P** Utant nonnulli, utique pie credendum esse, summum Pontificem minime errare in Beatificatione, at id tamen non esse certum de Fide: Gonzal. in cap. *Audivimus* num. 6. de Reliq. et venerat. SS., Scacch. de not. et sign. sanctis. sect. 1. cap. 8. pag. 97. Et in suo opere MS. de natura, quidditate, antiquitate, cultu, et quibusdam aliis annexis ad Beatificationem, et Canonizationem spectantibus sect. 3. cap. 4. Franciscus Victon. in tract. de Canonizat. SS. cap. 14. Arauxo decis. moral. tract. 3. quasi. 23. §. 1. num. 2. Ibi quippe, postquam docuit, certum esse de fide, summum Pontificem errare non posse in Canonizatione, transiens postea ad Beatificationem, & animadvertens, in ea non contineri definitivam sententiam, sicuti continetur in Canonizatione, subdit: *Quare neque tanta certitudine est certum, quod in ea actione Papa nentiquam possit errare*: & concordat P. Ceparius in directorio MS. Canonizationis SS. lib. 2. cap. 3. ubi sic loquitur: *Illud tamen addam valde etiam notandum, quod, licet cultus, qui datur Beatis tam canonizatis, quam non canonizatis (hoc est simpliciter beatificatis, ut ex contextu colligitur) sit ejusdem speciei, tamen in aliqua parte est etiam diversus: nam cultus, qui exhibetur servis Dei jam defunctis nondum canonizatis; oritur ex pia tantum et probabili opinione, quam habemus, de eorum sanctitate, & ex humana fide cum certitudine quadam tantum morali, quod fruuntur eterna felicitate; at cultus, qui tribuitur Sanctis jam a Sede Apostolica approbatis & canonizatis, oritur ex certa & infallibili notione & existimatione, quam habemus, de eorum sanctitate & gloria sempiterna; quæ infallibilis cognitio causatur in nobis ab approbatione & definitione Ecclesia, quod hic, vel ille sit Sanctus, de qua definitione nemini licet dubitare &c. ita ut, qui de hoc dubitaret, posset jure interrogari, quid sentiat de Fide Catholica: tum sequitur Card. Albitius in tract. de inconstancia in Fide lib. 1. cap. 40. num. 205. & addi potest Bivarius in comment. chronici Marci Maximi in S. Joanne Eremita ab oblivione vindicato §. 2. num. 3.*

2 Alii probabile dicunt, eadem certitudine asserendum esse, Papam errare non posse in Beatificatione, quemadmodum nec in Canonizatione; atque ideo utrumque iudicium, tum Beatificationis scilicet, tum Canonizationis, ad Fidem pertinere: Bordoni de Canonizat. SS. contro. 13. n. 16. Lezana consult. 1. num. 59. Castropalao tom. 1. tract. 4. de Fide disp. 1. punct. 5. §. 5. num. 4. Blasius a Purificatione in tract. de adorat. disp. 8. dub. 4. §. 1. Matthæucc. in tract. de Officiali Curia cap. 47. num. 3.

3 Neque defunt, qui assentiuntur quidem, de Fide non esse, Papam errare non posse in Beatificatione; at immunitatem tamen ab errore ita esse certam

certam autumant, ut oppositum rejici velint tamquam temerarium, scandalosum, & errori proximum: Amicus in *curfu Theol. tom. 4. disput. 7. sect. 4. num. 98.* Arriaga in *curfu Theol. tom. 5. disput. 9. sect. 6.* Silveira *opusc. 2. resolut. 15. quest. 3. & quest. 4. num. 21.* Verricell. in *quest. moral. tract. 8. quest. 25. num. 3.* Trulleng. in *Decalog. tom. 1. lib. 1. cap. 9. dub. 5. num. 5.* Turrianus in 2. 2. *tom. 5. disput. 17. num. 6.* Diana in *edit. coord. tom. 9. tract. 5. resolut. 19. & resolut. 20.* Del Bene de *inquisit. tom. 2. dubit. 254.*

4 Denique Joannes a S. Thoma in 2. 2. *disput. 9. art. 2.* docet, Pontificem *practice* errare nequaquam posse in Beatificatione, ita ut temerarius profecto & scandalosus foret, qui negaret, cultum esse Beatificato exhibendum; *speculative* tamen circa veritatem sanctitatis, *ex vi solius* Beatificationis, errare posse, cum judicium in Beatificatione intercedens minime excedat latitudinem certitudinis moralis & maximæ probabilitatis, unde oppositum non esset censura dignum. Et quia citatus Auctor adhibuit illa verba, *ex vi Beatificationis præcisè*; pro eorum intelligentia subiungit, a temeritatis nimirum nota immunem eum futurum non esse, qui de cultu dubitaret exhibendo erga Dei servum a summo Pontifice beatificatum, si quidem assensus superveniret totius Ecclesiæ, aut majoris partis Fidelium, sique multitudo miraculorum non deesset facta in Beatitatis confirmationem, & per longum tempus continuata: quam etiam Joannis a S. Thoma opinionem refert, & sequi videtur Dominicus a SS. Trinitate in *biblioth. Pontif. tom. 10. pag. 496.*

5 Verum non placet hæc Joannis opinio aliis superius memoratis Auctoribus; qui nempe, ut vidimus, tradant licet, non esse de Fide Pontificem errare non posse in Beatificatione; ejus tamen sunt sententiæ, ut velint, eum qui asserat Pontificem errasse vel errare posse, haberi pro temerario & scandaloso. Quare & ab eadem Joannis a S. Thoma opinione novissime recedit Rabaudi *exercit. Theolog. tom. 2. exercit. 3. cap. 1. §. 3. pag. 157.* Porro autem, cum varii sint modi Beatificandi, non desunt, qui volunt, eodem minime modo castigandos esse, qui unum vel alterum Beatitudinis gradum infirmant: sed graviori interim censura plectendos illos, qui tamquam possibilem astruunt errorem de illis Dei servis, qui titulum Beatitatis ex concessione Apostolica obtinuerunt una cum Officio & Missa; veruntamen ita, ut id non habeatur tamquam de Fide, aut tamquam Fidei proximum, juxta ea quæ habentur apud Gravinam in *tract. de præscript. Carol. 2. partis tom. 4. dubit. 1. in append. pag. 368.*

6 Hæc utique sunt Scriptorum placita. Nobis vero sententiam nostram nunc relaturis, ut de antiquiori ritu primum dicamus, cum quidquid olim ab Episcopis agebatur in cultu decernendo tum pro Martyribus, tum pro Confessoribus, Beatificationis metas minime excederet, difficile admodum videtur, tuto asseri posse, totum id ab erroris labe immune aut fuisse, aut semper esse debuisse; tum quia nullum particularis Episcopi judicium unquam fuit in Ecclesia Dei habitum pro *infallibili*, tum

Tom. I.

F ff

etiam

etiam quia, nonnullos ex eis hac ipsa in re fuisse deceptos, certum est ex historiis.

7 Plura sane exempla id comprobantia alibi narrabuntur; sed interea satis erit in memoriam revocasse, quæ leguntur in vita S. Martini scripta a Sulpitio Severo cap. 11. quæque in superioribus etiam exposita sunt: *Sed, ut reliquas virtutes ejus, quas in Episcopatu egit (loquitur Auctor de S. Martino) aggrediar, erat haud longe ab oppido proximus monasterii locus, quem falsa hominum opinio velut conspiciis ibi Martyribus sacraverat. Nam & altare ibi a superioribus Episcopis constitutum habebatur. En Beatificatio facta a præcedentibus Episcopis. Sed Martinus non temere adhibens incertis fidem. ab his qui majores natu erant, Presbyteris vel Clericis flagitabat, sibi nomen Martyris, vel tempora passionis ostendi, grandi se scrupulo permoveri, quod nihil certi constans sibi Majorum memoria tradidisset. Cum aliquamdiu ergo a loco illo se abstinuisset, nec derogans religioni, quia incertus erat, nec auctoritatem suam vulgo accommodans, ne supersticio convalesceret; quodam die, paucis secum adhibitis Fratribus, ad locum pergit. Deinde super sepulcrum ipsum astans oravit ad Dominum, ut, quis esset, vel cujus meriti, sepultus, ostenderet; tum conversus ad levam vidit, prope assistere umbram sordidam, trucem. Imperat, nomen, meritumque ut loqueretur. Nomen edicit, de crimine confitetur, latronem se fuisse, ob scelera percussum, vulgi errore celebratum; sibi nihil cum Martyribus esse commune, cum illos gloria, se poena retineret. Mirum in modum vocem loquentis, qui aderant, audiebant; personam tamen non videbant. Tum Martinus, quid vidisset, exposuit; jussisque, ex eo loco altare, quod ibi fuerat, submoveri, atque ita populum superstitionis illius absolvit errore. Suffragatur Socrates in hist. Eccl. lib. 7. cap. 14. ubi, postquam retulit turbas concitatas a Monachis Nitriæ adversus Præfectum Orestem, testatur, Ammonium Monachum, qui Præfecti caput lapide in seditione percusserat, ad Præfectum adductum esse; Præfectum autem, sicuti leges postulabant, palam de eo questionem exercere, tormentisque afflictere, dum extremum spiritum ederet. Quæ res non diu post ad Imperatorum aures perlata est; quin etiam Cyrillus eandem rem illis, sed omnino aliter expositam, per litteras significavit. Corpus quoque Ammonii Cyrillus ipse capit, atque in ecclesia quadam recondit; at non Ammonii, sed Thaumasi nomine nuncupavit. Deinde, cum in ecclesia magnitudinem animi illius, perinde ac si grave certamen pro pietate sustinuisset, laude & prædicatione extulisset, jussit, Martyrem appellari. En Beatificatio. Verum, qui modestiores erant etiam ex ipsis Christianis, Cyrilli studium erga Ammonium minime approbarunt: nam exploratum habebant, Ammonium non in tormentis interiisse, ne Christum negare cogeretur, sed temeritatis suæ poenas dedisse. Quocirca Cyrillus ipse illud facinus silentio paulatim perire passus est.*

8 Delato postea beatificandi jure privato ad Sedem Apostolicam, sive ad Romanum Pontificem, reminisci opus est, duplicem ex supradictis dari Beatificationis speciem, hoc est formalem, & æquipollentem:

tum

tum Beatificationem formalem esse illam, in qua, ratis habitis virtutibus, aut martyrio, necnon signis seu miraculis, Pontifex indulget, ut Dei servus Beatus appelletur, atque in determinato aliquo loco colatur, & ut plurimum quidem cultu Officii ac Missæ in ejus honorem; Beatificationem autem æquipollentem eam esse, in qua, rata habita fama virtutum, aut martyrii, & signorum seu miraculorum, necnon ratis sive cultu immemorabili cum scientia & tolerantia Sedis Apostolicæ, aut Ordinarii; sive cultus introductione, aut continuatione ex permissione præcedentium Pontificum, Congregationisve sacrorum rituum juxta modum alibi explicandum, vel ex Patrum virorumque sanctorum scriptis, vel ex communi Ecclesiæ consensu; summus Pontifex sententiam Ordinarii, aut Delegati approbantem præstitum cultum confirmat. Urbanus etenim VIII. qui exhibitionem publici cultus severe prohibuit erga eos, qui non fuissent a Sede Apostolica canonizati, aut beatificati, eos tamen ab hac lege exceptit, qui aliquo ex modis prædictis cultum obtinuerunt.

9 Ducto itaque a facilioribus initio, id est a Beatificatione æquipollenti, probabile quidem videtur, summi Pontificis judicium in ea non esse *infallibile*, nec ad Fidem pertinere; sed & certum est, a nota temeritatis immunem eum non esse futurum, qui ipsum errasse contenderet in hoc, aut illo casu, & cultum reprobaret, quem Pontifex ipse approbavit. Nam non modo judicium summi Pontificis in hac æquipollenti Beatificatione non est præcipiens, cum indulgens tantum sit atque permittens, sed nec etiam terminale est atque extremum: in quo profecto rerum themate concipi nequit, illud esse *infallibile*, & multo minus ad Fidem pertinere. Accedit, quod, nisi ante æquipollentem Beatificationem discussæ fuerint approbatæque virtutes in gradu heroico, aut nisi discussum fuerit approbatumque martyrium, quemadmodum re ipsa sæpe contingit, cum opus sit, ut post eam judicium instituatur super ipsis virtutibus, aut super martyrio; possibile est, ut virtutes ipsæ, aut martyrium minime approbentur, prout oportet, ratione scilicet ad Canonizationem habita, ita ut causa in eo statu remaneat, in quo est. Si ergo post approbatum casum exceptum, indultamque Beatificationem æquipollentem pendet ut plurimum judicium de virtutibus heroicis, aut de martyrio, quod idem est, ac de re substantialiter requisita ad irrevocabilem cultus concessionem; sequi videtur, antecedens permittens judicium nunquam haberi posse pro *infallibili*, aut de re ad Fidem pertinente. Consueverunt quoque ipsi Romani Pontifices responsum sacræ Congregationis super cultu immemorabili, hoc est super Beatificatione æquipollenti, nedum semper ore tenus confirmare, verum etiam id aliquando efficere per litteras Apostolicas in forma Brevis. Cum autem hisce litteris Apostolicis de more inferatur hæc clausula; *salva tamen in præmissis auctoritate Congregationis eorundem Cardinalium*, uti colligitur ex Brevibus approbantibus cultum immemorabilem Beatorum Joannæ filiz Alphonsi V. Regis Lusitaniz, Petri Armengaudii,

Gregorii X., Luciae Narniensis, Andreae de Comitibus expeditis per summos Pontifices Innocentium XI. Clementem X. & Innocentium XIII. nec non passim ex pluribus alibi memorandis; servatio hæc auctoritatis Congregationis sacrorum rituum ostendere videtur, eisdem Pontifices re vera cognovisse, iudicium cultum permittens nec esse *infallibile*, nec ad Fidem pertinens; cum sacrae Congregationi liberum relinquant, nihil obstante approbatione indulgente ac permittente, novis supervenientibus fundamentis, ab eodem recedere. Uno verbo, iudicium in Beatificatione æquipollenti intercedens innititur famæ, innititur antiquitati, innititur ut plurimum fundamentis, seu Indultis cultus quidem non sine magna ratione, attamen causa judiciali jure non cognita, factis: præterea non est præcipiens, sed permittens; non extremum, sed tantummodo ad finem conducens; ab iisdem demum Romanis Pontificibus non apparet haberi tamquam *infallibile*, aut tamquam ad Fidem pertinens. Quæ nimirum omnia simul juncta, licet temeritatis notæ eum non eximant, qui assereret, Romanum Pontificem errasse in hac vel illa Beatificatione æquipollenti (nec enim ex erroris possibilitate valet illatio ad ipsum errorem, nec sine temeritatis nota licitum est venerabili Romani Pontificis iudicio refragari, etsi tantum permittenti, quippe quod tot adhibitis diligentis prolatum est) sufficere tamen posse videntur, ne id asserens tamquam hæreticus sit habendus; atque adeo apta videri possunt ad ostendendum, summi Pontificis iudicium in Beatificatione æquipollenti non esse *infallibile*, neque pertinens ad Fidem.

10 Beatificationis porro formalis iudicium gravius certe est iudicio Beatificationis æquipollentis. Non absolvitur enim, nisi constet ex processibus de virtutibus, aut de martyrio, & de signis seu miraculis, quæ sunt substantialia requisita Canonizationis; quin & in summorum Pontificum Apostolicis litteris ea deest clausula jus servans Congregationis sacrorum rituum. Sed, quamvis ex hoc inferri possit, temeritatis, aut gravioris theologicæ censuræ nota esse afficiendum, qui auderet asserere Romanum Pontificem in hac vel illa formali Beatificatione errasse; aut contenderet, non esse Beato exhibendum cultum eo in loco, in quo Papa indulget, ut exhiberi queat: concludi tamen certo non potest, vel ipsum formalem Beatificationis iudicium esse *infallibile*, aut ad Fidem pertinere; cum semper sit permittens, nunquam præcipiens, & ad finem utique conducatur, sed non sit extremum; & ut plurimum cultus per id concessus intra particularem aliquam provinciam, civitatem, vel Religiosam familiam sit coarctatus. Multo autem minus id concludi potest, cum ex supra relatis habeamus, fere usque ad tempora summi Pontificis Clementis IX. expleta licet Beatificatione formali, iterato examini subijci consuevisse ea omnia, quæ jam ante formalem ipsam Beatificationem examinata fuerant & approbata, ut transitus fieret ad Canonizationem. Signum quippe hoc est, formalis Beatificationis iudicium habitum non esse ut *infallibile*, aut tam-

tam-

tamquam pertinens ad Fidem. Et si vero nova consuetudo fuerit subinde introducta, ut in transitu a Beatificatione formali ad Canonizationem minime instituitur recens examen de virtutibus, aut martyrio, vel de signis seu miraculis jam approbatis, sed quæstio tantummodo reducat ad nova signa vel miracula, quæ post Beatificationem supervenerunt; quomodocunque sit, utrum id sufficiat, necne, ut iudicium Beatificationis formalis habeatur pro *infallibili*, aut tamquam ad Fidem pertinens, hoc saltem certum est, etiam hodie, absoluto iudicio formalis Beatificationis, necnon miraculorum, quæ post obitum supervenerunt, non solum in Congregatione generali sacrorum rituum proponi dubium; an tuto deveniri possit ad Canonizationem; verum etiam, eodem dubio favorabiliter resoluta, de tota causa iterum agi, id est tum de virtutibus & martyrio, tum de miraculis, in Consistoriis, in quibus suffragium fertur ab omnibus S.R.E. Cardinalibus, atque Episcopis Romæ commorantibus, necnon aliis ad Urbem hanc ob causam vocatis. Quæ, cum profecto cæremonialia non sint, sed substantiam iudicii respiciant, nec, nisi invocato Dei omnipotentis auxilio, peragantur, ostendere aperte videntur, Beatificationis iudicium neque ab ipsis Romanis Pontificibus haberi ut *infallibile*, aut tamquam quid ad Fidem pertinens. Addendum, quod ex alibi referendis, cum in sacrorum rituum Congregatione ordinaria actum alias fuisset, an in honorem Beatificatorum vel Beatificatione æquipollenti, vel formali essent in posterum concedendæ lectiones propriæ secundi Nocturni in Officio Divino; nonnulli dixerunt, minime esse concedendas, eo quia Beatificatio erat actus revocabilis; alii autem censuerunt, concedi posse, non obstante, quod Beatificationis iudicium non esset *infallibile*, nec ad Fidem pertineret: quibus nempe confirmantur ea, quæ modo dicta sunt, quæque paucis enuntiantur tom. 2. Operis Theologici Patris Silvestri Mauri Societatis Jesu, qui Theologiam Romæ per multos annos magna cum laude docuit, ubi lib. 7. quæst. 140. num. 17. ita loquitur: *An sit de Fide, eos, qui solum fuerint Beatificati, esse in calo, minus est exploratum apud Auctores. Conveniunt, esse ita certum, ut sine temeritate negari non possit. At multi negant, id esse de Fide. Ratio est, quia, ut aliquid sit de Fide, debet esse definitum. Sed summus Pontifex sententiam definitivam pronuntiat tantum in Canonizatione, cujus forma est: Decernimus ac definimus, talem esse Sanctum, ac Sanctorum catalogo adscribendum. In Beatificatione autem non pronuntiat sententiam definitivam, sed solum concedit titulum Beati, & cultum quemdam non universalem in tota Ecclesia, sed limitatum ad certa loca, certasque personas; ac deinde, antequam procedat ad Canonizationem, facit novas diligentias, quasi res adhuc non sit omnino explorata. Cum autem aliquid jam est certum certitudine Fidei, est omnino exploratum, ac non debet fieri ulterior inquisitio. Hunc sequitur ex eadem Societate P. Jo. Baptista Riccioli in tract. de immunitate ab errore in Sanctorum Canonizatione, quem quidem tractatum dicavit summo Pontifici Clementi IX. ubi lib. 1. cap. 6. num. 3. hæc habet: *Quaritur octavo,**

*fit ne*

#### 414 DE SERVORUM DEI BEATIFICATIONE

*fit ne de Fide, eos, qui a Sede Apostolica beatificati tantum sunt, sed nondum canonizati, esse Sanctos, & in gloria? Respondetur negative cum omnibus fere Doctoribus... recensitis, qui de hoc puncto tractant. Licet enim ego quoque cum multis censam, hanc quoque declarationem Pontificiam esse infallibilem, & Spiritum Sanctum assistere Papæ, ne in hoc negotio, quod per se magnum est, & ad Fidem, Religionemque Christianam suo modo pertinet, erret; non existimo tamen, eorum sanctitatem & gloriam certam esse de Fide, quia non est declarata a Sede Apostolica per ultimam sententiam definitivam, nec universa Ecclesia mandatum, ut colatur tamquam Sanctus, sed solum alicui civitati, provincia, aut Ordini Religioso permissum, ut ejus imago exponatur, & limitato cultu honoretur, prohibendo, ne ulterius procedatur, donec illa persona canonizata fuerit.*

11 Videnda nunc argumenta eorum, qui contra putant, aut certum scilicet, aut saltem probabile, Romani Pontificis judicium in Beatificatione esse *infallibile*, & ad Fidem pertinere. Afferunt itaque, Romani Pontificis *infallibilitatem* in Canonizatione tamquam rem certam atque exploratam a Scriptoribus recipi; qui idcirco, si de Beatificatione minime loquuntur, docere velle videntur, se eandem Canonizationis nomine voluisse comprehendere, atque adeo idem judicium de utraque esse ferendum. Addunt, Pontificem in Beatificatione sapissimè indulgere, ut Missa in honorem Beatificati celebretur: cum autem Missæ sacrificium nomine totius Ecclesiæ offeratur, hinc inferunt, si in hac cultus concessione judicium Papæ non esset *infallibile*, sed errare posset; *infallibile* non esse, & errare posse in re ad universam Ecclesiam pertinente. Subdunt, nequaquam percipi posse, quomodo Pontifex, dum aliquem Dei servum Beatorum numero adscribit, minime sibi proponat, eum esse in cælo & cum Christo regnare. Item, exclusa *infallibilitate*, periculum instare, ne damnatus loco justi colatur; & ne is error ad universam extendatur Ecclesiam, cum Beatificatum unusquisque possit publice Beatum appellare, & publice venerari. Demum, cum judicium Papæ sit *infallibile* in approbatione alicujus particularis Instituti, seu Religiosæ familiæ; multo magis *infallibile* sit oportet in Beatificatione, licet Beatificatio ipsa non habeatur tamquam res, quæ universam respiciat Ecclesiam.

12 Omittimus argumentum, quod desumitur ab assertione eorum, qui nullam facientes distinctionem inter Beatificationem & Canonizationem docent, judicium Papæ esse in Canonizatione *infallibile* & ad Fidem pertinere; nemo enim est qui non videat, illud mole sua ruere, tum quia Auctores, qui aliquid non asserunt, non possunt haberi pro asserentibus; tum quia alii jam supra allegati non desunt, qui utique distinguunt inter Beatificationem & Canonizationem, in prima minime existimant, judicium Papæ esse *infallibile*, quod *infallibile* profecto & etiam ad Fidem pertinet in secunda recognoscunt. Omittimus pariter aliud argumentum, quod eruitur ex cultu Beatorum ad universam Ecclesiam extenso: coercitus quippe re vera est intra certos ac definitos locos, sicuti supra vidimus, absque



abſque eo quod extenſio ad univerſam Eccleſiam deduci valeat ex titulo Beati, quo Beatificatus in univerſa ipſa Eccleſia appellari poteſt; titulus namque Beati in univerſa Eccleſia competens Beatificato, nihil aliud, ſubſtantialiter ac ſevere loquendo, importat, quam ſinceram piamque publici cultus ad Dei ſervi honorem in determinato aliquo loco a Romano Pontifice conceſſi notitiam; qui, licet in alio publice exhiberi non poſſit, privatim tamen, ac laudabiliter ubique exhibetur & exhiberi poteſt, ut alibi demonſtrabitur. Cetera porro omnia ex adverſo expoſita argumenta continuo ceſſare videntur ex præcipua illa animadverſione in ſuperioribus producta, quod ſcilicet iudicium Papæ in Beatificatione non eſt præci- piens, ſed indulgens atque permittens; de cujus nempe eſſentia non eſt, ut ſit *infallibile*, cum certum eſſe ſufficiat, non quidem certitudine *infallibilitatis*, aut Fidei, ſed ea tantum morali certitudine, qua Pontifex prudenter & ſapienter agit, indulget atque permittit: in quo propterea rerum themate minime urget nos contentio de *infallibilitate* in approbatione particularis alicujus Ordinis Religioſi, cum approbatio hujusmodi Ordinum non nuda duntaxat ſit permiſſio, ſed definitio ſummi Pontificis, qua nimirum decernit, regulam, quam approbat & confirmat, nihil continere Evangelicæ perfectioni repugnans.

13 Ad rem oppido facit exemplum conceſſionum, quibus ſummi Pontifices ſolvunt homines a matrimoniis ratis, ſed non conſummatis, aliarumque conceſſionum ſolventium continentia annexa regulæ, ac profeſſioni monaſticæ. Fiunt quippe aliquando hujusmodi conceſſiones, nec tamen ex eis deducitur, certum eſſe de Fide, poſſe Pontifices ſolvere homines a matrimonio rato, ſed non conſummato, atque a voto continentię annexo profeſſioni monaſticæ: adverſantibus videlicet Theologis etiam magni nominis qui poſt eaſdem conceſſiones etſi exiſtiment, prædictam poteſtatem Romanis Pontificibus nullo modo competere, non tamen putant, ſe ulli Pontificiæ definitioni reſragari; utpote cum ſciant, eos in iudicio permittente ac ſolvente minime definire, eiſdemque fatiſ eſſe, ſi pro ſe certam certitudine morali habeant ſententiam propriæ poteſtati ſaventem. Quare Cardinalis Capiſuechius, poſtquam *contro. 11.* late docuit, non poſſe Eccleſiam ſolvere continentia ſolemniter annexa Profeſſioni monaſticæ exemplis ſolutionum a Romanis Pontificibus conceſſarum, reſpondet §. 3. *Pontifices ſecutos eſſe opinionem Canoniſtarum id poſſe fieri aſſerentium, & ipſis Pontificibus viſam probabiliorem.* Hinc, quamvis ſummus Pontifex aliquem Dei ſervum Beatorum catalogo adſcribens nedum ſibi proponat, verum etiam pro certo habeat, eum in cælis eſſe & cum Chriſto regnare, & hac de cauſa publicum cultum in ejus honorem indulgeat; non tamen ſequitur, ut tamquam de Fide certum ſtatuat ac definiat, prædictum Beatum in cælis eſſe: veluti, ponderata Sixti IV. Conſtitutione (quæ incipit, *Grave nimis, tit. de Reliq. & venerat. SS. inter Extr. comm.*, ubi ſeſtium, Indulgentias, & alia concedit in honorem Conceptionis immaculatæ

latæ B. Mariæ Virginis, de qua infra) docet P. Seraphinus Capponi a Porrecta Ordinis Prædicat. in 3. part. *Divi Thomæ quasi. 27. art. 2.* alique. Scilicet ad ea omnia prudenter peragenda sufficit moralis certitudo; quemadmodum bene prosequitur P. Theophilus Raynaudus *oper tom. 7. de retinendo titulo Immaculate Concept. B. Virginis §. 8. num. 32. & 33.* Neque enim, si Gregorius XV. dixit, velle se, ut omnes octavo Decembris festum & Officium peragerent sub nomine Conceptionis, sumpta, prout ea vox tunc sonabat, hoc est pro prima Virginis animatione, eamque conceptionem proposuit pro objecto cultus religiosi & laudabilis erga Deiparam pietatis, consequens est, ut definiverit tamquam ex Fide certum, quod prima Virginis animatio fuerit labis originaria experta & immaculata. Nam ad statuendam conceptionem sic acceptam pro objecto cultus sufficit, ut Pontifici visum sit pium ac probabile, quod B. Virgo semper labe caruerit, ejusque prima animatio fuerit immaculata; & hoc est, in quo adversarii vel ultro cecutiunt, vel obturatos habent oculos, quibus perspiciant, quando definitur, cultum alicujus persone esse licitum & religiosum ac pium, non idcirco statui, ut ex Fide certum, quod persona, cui cultus decernitur, sit sancta & collucens gratia sanctificante; potest enim religiose ac pie coli ex sola certitudine morali, aut ex prudenti & probabili judicio, quod sit cultu digna. Eidem adhæret Natalis Alexander in *hisor. Ecclæs. sac. 2. dissert. 16. §. 21.* ubi ait: Ecclesia tamen, decernendo, ut non amplius sub Sanctificationis, sed sub Conceptionis nomine illa Deipara solemnitas celebraretur, & singulare quoddam Officium probando, quo immaculata recolitur conceptio, in eam se magis propendere partem ostendit, qua immaculatam opinatur. Pietatis ergo sit Ecclesia sequi propensionem, & Deipara Virginis conceptionem immaculatam predicare .... sed officii est ultra non progredi, cum Ecclesia questionem illam nondum finierit, nec immaculatam Deipara Virginis conceptionem, ut dogma Fidei, credendam proponat.

14 Respicit nempe Theophilus Raynaudus. & una cum eo Natalis ad cultum beatæ Mariæ Virginis, ut singulari privilegio a peccato originali in sua conceptione servatæ: super qua quidem re plures prodierunt Romanorum Pontificum Constitutiones Sixti videlicet IV. S. Pii V. Pauli V. Gregorii XV. Alexandri VII. & Clementis XI., quæ in unum collectæ legi possunt in notis ad Guillelmum Estium *tom. 2. editionis Neapolitane anni 1720. pag. 8.* & ex quibus utique clare desumitur unanimitas eorum propensio erga sententiam, quæ B. Virginem Mariam a peccato originali servatam in sua conceptione adstruit atque confirmat. Favet quoque communis, ut ita dicam, Fidelium sensus; teste Petavio *tom. 6. Theol. dogm. lib. 14. cap. 2. num. 10.* ubi sic loquitur: *Movet autem me, ut in eam sim partem propensor, communis maxime sensus Fidelium omnium, qui hoc intimis mentibus, atque defixum habent, & quibus possunt, indicis officisque testantur, nihil illa Virgine castius purius innocentius, alienius denique ab omni sorde ac labe peccati procreatum a Deo fuisse; tum vero nihil cum inferis, & horum rectore diabolo, adeoque cum qualicumque Dei offensa, & damnatione commune unquam habuisse.* Attamen, cum usque adhuc nulla prodierit Ecclæs

clēsiae definitio de immaculata Virginis conceptione, ipsique Romani Pontifices in allegatis Constitutionibus protestati fuerint, se prædictam quæstionem nequaquam voluisse per earum rerum concessionem definire, Theophilus ipse Raynaudus, & cum eo simul Natalis loc. *supra cit.* infert, cultum, festum, & alia quæcumque sancita in honorem Virginis, ut in sua conceptione ab originali peccato servata, minime prodesse, ut eadem servatio habenda sit tamquam certa certitudine Fidei.

15 Affert insuper Pater Theophilus loco alleg. exemplum festi Assumptionis beatissimæ Virginis Mariæ: *De Assumptione, quatenus spectat præcedere Virginis anastasin, & corporis jam rediitvi sublationem in calum, idem dicere liceret; nec enim est Fide certum, quod B. Virgo sit eo modo assumpta in calum, ut ex multis Doctoribus ostenditur in diptychis. Et tamen ea Assumptio est religiosissimum anniversaria solemnitatis objectum. De eodem scilicet festo ita loquitur S. Bernardus tom. 1. oper. epist. 174. ad Canonicos Lugdunenses num. 3. Accepi jam ab Ecclesia, illum diem cum summa veneratione recolendum, quo assumpta de seculo nequam, calis quoque intulit celeberrimorum festa gaudiorum. Gregorii præterea Turonensis, Andreæ Hierosolymitani, Gregorii Magni Romani Pontificis, Ildefonsi Toletani Episcopi, Joannis Damasceni, Fulberti Carnotensis Episcopi, Petri Damiani, Bernardi Abbatis assertiones præclare ostendunt, beatissimam Virginem placida morte terris ereptam in cælos statim assumptam fuisse. Piæ & religiosæ sententiæ de assumpto in cælos Virginis corpore, rationes item Theologicæ suffragantur petiæ ex dignitate Matris Dei, ab excellenti virginitate, ab insigni supra homines omnes, & Angelos sanctitate, ex intima cum Christo Filio conjunctione & consensione, ex Filii in Matrem dignissimam affectu. Denique, quod caput est, si Ecclesia non modo assumptam in cælum Virginem celebrat die 15. Augusti, & aliis sequentibus, sed etiam homilias SS. Joannis Damasceni, & Bernardi legendas Fidelibus tradit, quæ eam corpore simul & anima assumptam disertissimis verbis affirmant, de ejus auctoritate ac suffragio neutiquam dubitandum esse videtur. Dei Ecclesia (verba sunt Cardinalis Baronii in notis ad Martyrol. Rom. ad dictam diem) in eam partem propensor videtur, ut una cum carne assumpta sit in calum. Nam in hujus diei celebritate illas sanctorum Patrum homilias legendas tradidit, quibus eadem de ejus assumptione affirmantur. His nihilominus minime refragantibus, nulla adhuc Ecclesiæ prodiit definitio de B. Maria Virgine corpore & anima in cælum assumpta, definitio nempe id reponens inter articulos Fidei; quemadmodum præter Theophilum docet Dominicus Soto in 4. sent. dist. 43. quæst. 2. art. 1. ubi hæc habet: Jam vero temporum curriculo opinio hæc, aut credulitas, quod in corpore & anima fuerit in calum assumpta, plurimum inolevit. Nondum tamen inter Fidei articulos crediti necessarios relata est, quamvis sit plenissime credendum: nam & in Collecta illius festi ait Ecclesia, quod nexibus mortis deprimi non potuit; & sequitur Melchior Canus lib. 12. de loc. Theol. cap. 10. Ut beatam Virginem non esse in calos cum corpore assumptam: quod licet*

Tom. I.

G g g

Fidei

#### 418 DE SERVORUM DEI BEATIFICATIONE

*Fidei minime adversum fit, sed quia communi Ecclesie consensui repugnat, petulanti temeritate diceretur &c.* Neque pro definitione habentur ea, quæ ex festo, cultu, ceterisque modo ponderatis desumuntur.

16 Argumentatur hinc igitur sæpe recensitus Theophilus Raynaudus loc. cit. nisi jure potiori, saltem pari, nullam de Fide, sed moralem tantummodo sanctitatis certitudinem in publico eo cultu contineri, qui Apostolica auctoritate erga Canonizatos, & Beatificatos exhibetur. Et sane, utcunque sit de ejus assertione quoad argumentum Canonizationis, in qua nedum præceptum universam respiciens Ecclesiam, verum etiam definitiva de sanctitate continetur sententia, de quo quidem articulo in sequentibus tractabitur; non ita tamen facile ejusdem dicta quoad Beatificatos rejici possunt, cum in Beatificatione desit definitiva sententia, & cultus intra certos locos sit coercitus: Ac, ut præcudamus disputationes non necessarias, saltem de his, qui Beatificati duntaxat dicuntur, certum est, eos pie ac religiose coli, quamvis nemo dixit, eorum caelestem gloriam Fide Divina esse tenendam. Similia sunt ea, quæ habentur apud Dominicum a SS. Trinitate in tract. de summo Pontifice Rom. (tom. 10. biblior. Pontif. pag. 496.) ubi, postquam sibi opposuit, Divum Thomam ex celebratione festi nativitatis beatissimæ Virginis certo colligere, eam sanctam fuisse ante suam nativitatem; ideoque firmissimum sanctitatis argumentum desumendum esse ex festi celebratione, quæ sit Sedis Apostolicæ auctoritate in honorem Beatificatorum, ita subdit: Respondetur, festum aliquod ab Ecclesia dupliciter celebrari posse; uno modo simul cum judicio positivo, aut assensu universali Ecclesiæ absolute de sanctitate illius, cujus festum celebratur; alio modo ex mera duntaxat concessione, vel permissione sine tali judicio vel assensu. Ubi primo celebratur modo, sicut fit in Canonizatione, inde optime insertur sanctitas alicujus; & ita S. Thomas loc. cit. ex celebratione absoluta Ecclesiæ circa nativitatem Virginis ejus intulit sanctitatem: secus autem, si secundo solum agatur modo; inde enim tantum sequitur, quod talis celebritas non sit reprobanda, ut ex eodem Divo Thoma diximus. Sic autem se habet Beatificatio, in qua non habetur judicium Ecclesiæ definitivum, sed permissio duntaxat, nec adhuc semper est respectu universalis Ecclesiæ, sed aliquarum solum in ea personarum. Et, licet Ecclesiæ etiam universalis celebret, si tamen specialem habeat declarationem, quod non intendit oppositam damnare opinionem, sicut fit in celebratione festi immaculate Conceptionis, ex tali adhuc celebratione cum hujusmodi declaratione non arguitur cum omnimoda certitudine sanctitas illius, cujus festum agitur.

17 Denique, quia magnum ex adverso constituitur momentum in concessione Officii & Missæ, quæ fit in Beatificatione, nemo est qui ignoret, Missæ sacrificium offerri quidem nomine Ecclesiæ; attamen, cum oblatio fiat Deo in honorem Beati, nil etiam obitare, quin fiat oblatio in honorem ejus, qui Beatus habetur, licet ejus beatitas certa non sit certitudine Fidei, sed certitudine tantum morali. Fuit nempe opinio nonnullorum Pontificii juris peritorum, Beatificatum a Canonizato differre, eo quod

quod in honorem Canonizati Officium recitatur, ac Missa celebratur, quæ minime sunt in honorem Beatificati: ita Malvetius de *Canonizat. SS. dub. 1. num. 19.* (*inter tract. magnos tom. 13. pag. 97.*) Cassaneus in *catal. gloria mundi part. 3. confid. 46.* Contel. de *Canonizat. cap. 2. num. 10.* Qua sorte de causa olim Romani Pontifices Missam & Officium concedentes in honorem Beati pro determinato aliquo loco protestabantur, se per eadem nequaquam intendere, Beatum ipsum canonizare. Sic enim in B. Norkero Balbulo honore Missæ decorando 20. Decembris 1512. Julius II. *Volumus autem, inquit, quod ex his &c. dictus Norkerus propterea Canonizatus, aut alias approbatus non censeatur:* sic in B. Margarita de Cortona 8. Februarii 1515. Leo X. *Volumus autem, quod propter præmissa dicta B. Margarita Canonizata non censeatur:* & in B. Philippo Benitio 24. Januarii 1516. *Volumus autem, quod propter præmissa præfatus Philippus in catalogo Sanctorum adscriptus, seu Canonizatus publice minime censeatur:* sic in B. Laurentio Justiniano 18. Julii 1524. Clemens VII. *Volumus autem, quod propter præmissa catalogo Sanctorum adscriptus minime censeatur:* in Beata autem Agnete Virgine Ord. Præd. anno 1532. *Licet, inquam, Canonizata non sit:* & in B. Hyacintho 15. Junii 1530. Ita tamen per hoc, quod dictus Hyacinthus Canonizatus, & catalogo Sanctorum adscriptus nullatenus censeatur: tum in B. Raymundo 3. Julii 1542. *Ac si esset Canonizatus:* sic denique in B. Guillelmo Eremita Siclensis 27. Junii 1537. *Volumus autem, quod dictus Guillelmus propter præmissa Canonizatus non censeatur.* Verum ab aula postmodum recessit opinio, quod Canonizatis Officium ac Missa concedantur, non autem Beatificatis: ideoque prædicta clausula non amplius inseritur Beatificationum Brevibus. Merito scilicet opinio hæc ab aula recessit, cum in honorem Beatificatorum passim fiat Indultum Officii ac Missæ: ideoque merito Romani Pontifices opportunum, aut necessarium non amplius esse existimarunt, memoratam clausulam Brevibus Beatificationum inferere, cum ex concessione Officii ac Missæ perspectum omnibus esse viderint, minime valere argumentum ad Canonizationem, atque adeo ad *infallibile* & irrevocabile sanctitatis iudicium de eo, ad cujus honorem fit in Beatificatione ipsa Officii ac Missæ concessio. Quod ut clarissime ostendatur, præponendum est ex alibi dicendis, factam fuisse non semel, aut bis, sed sæpissime concessionem Officii & Missæ in honorem Beatificationum Beatificatione tantum *æquipollenti*; postquam videlicet definitum est, utique constare de cultu immemorabili, sed antequam facta sit discussio virtutum, aut Martyrii, & signorum sive miraculorum. Quare, quemadmodum nemo est, qui dicere audeat, *infallibile* esse iudicium sanctitatis in memorata Beatificatione *æquipollenti*; pendente nimirum adhuc iudicio super substantialibus sanctitatis requisitis; ita unusquisque facile dignoscere poterit, concessionem Officii ac Missæ in honorem Beati nequaquam *infallibili*, sed morali solummodo sanctitatis certitudine esse posse sine ulla absurditate sufficienter innixam.

## CAPUT XLIII.

*De Ecclesiastico iudicio, quod interponitur in Sanctorum Canonizationem, utrum sit infallibile.*

<sup>1</sup> **H**ic ante omnia operæ pretium esse censemus adnotare, præsentem controversiam partim quidem a celebri ea differre, sed partim etiam cum eadem convenire, quæ tantis scilicet animorum motibus agitata est de *infallibili* summi Pontificis iudicio in doctrina Fidei, & morum, de ejusdem iudicii *infallibilitate*, atque auctoritate absque eo quod dependeat a consensu Ecclesiæ, deque necessitate intellectum eis subjiciendi, sub hæresis nota adversantibus imposita, eis, inquam, quæ tamquam de Fide a Romano Pontifice declarata sunt, & declarantur. Notum quippe est, complures profecto insignes ex omni tribu, & lingua, & populo Doctores stare pro *infallibilitate* Romani Pontificis ex Cathedra docentis in materia Fidei & morum, eumque recognoscere tamquam supremum in Ecclesia Judicem, a cujus definitionibus impium sit & hæreticum resilire; attamen nonnullos ex eis docere, hanc *infallibilitatem* minime ipsi competere in Canonizatione Sanctorum, nec eum hæreticum futurum, qui dubitaret de sanctitate alicujus Beati inter Sanctos, per solemnem licet Canonizationem, relati. Item animadversione dignum est, quod Auctores, qui nec *infallibile*, nec de Fide putant Romani Pontificis iudicium in Fidei morumque materia, nisi accedat universalis Ecclesiæ consensus, qui que idcirco *infallibilitatis* & potestatis de Fide decernendi prærogativam admittunt, & admittere tenentur in generalibus Conciliis legitime congregatis; cum potissimum tamen contra Romani Pontificis *infallibilitatem* argumentum in Canonizationis materia ex eo desumatur, quod prædictum iudicium innititur testibus humanis, qui fallere possunt & falli, atque id quidem ipsum locum sibi vindicet etiam in Canonizationibus factis in Conciliis generalibus legitime congregatis; *infallibilitatem* propterea, quam denegant Romano Pontifici in Canonizationibus, denegare quoque coguntur generalibus Conciliis. Quod & bene præcognitum fuit a Jacobo Almaino Parisiensi Doctore in expositione circa decisiones M. G. Occam super potestate summi Pontificis, quæst. 1. cap. 16. tom. 2. operum Joannis Gersonii col. 1072. ubi propositæ quæstioni, an Concilium possit errare, respondet: Concilium errare non potest in questione juris. De Sanctorum Canonizatione dubium est, quia factum est. Et ex his nimirum evincitur, præsentem de Canonizatione controversiam partim differre ab illa modo enuntiata de *infallibilitate* summi Pontificis generaliter in decretis Fidei & morum. Conveniunt postea partim duæ hæ controversiæ, tum quia denegantes Romano Pontifici *infallibilitatem* in decretis Fidei & morum, id ipsum potiori jure docere tenentur in materia

teria Canonizationum, quæ ab ipso factæ sunt & fient, tum quia admit-  
tentes infallibilitatem Romani Pontificis in decretis de Fide ac moribus,  
plura ex eo deducere possunt argumenta pro infallibilitate pariter in Cano-  
nizationum materia.

2 Hisce præmissis, tum autem initio ducto ab examine, utrum summi  
Pontificis iudicium in Canonizatione sit infallibile, ut deinde transitus fiat  
ad ponderandum, an hæc ipsa infallibilitas de Fide sit, ita ut nedum imp-  
pius ac temerarius, sed & hæreticus censendus esset, qui de sanctitate  
dubitaret, aut sanctitati refragaretur alicujus inter Sanctos per Canoni-  
zationem a Romano Pontifice relati; unico sane, ut ita dicam, ictu utra-  
que quæstio resoluta dici posset auctoritate summi Pontificis Sixti V.  
quem sic loquentem in ultimo Consistorio habito pro S. Didaci Canoni-  
zatione refert Galestinus in *Actis ejusdem part. 3. cap. 12. Tum Pontifex ...*  
*e folio concionem habuit sententiarum Divinarum pondere gravissimam, doctrina*  
*ubertate eruditissimam, omnique argumentorum majestate & sapientia admiratione*  
*maxime decoratam. Qua in concione a rei, qua agebatur, magnitudine exorsus,*  
*primò de potestate Pontificis auctoritateque Ecclesia, qua a Deo tradita est, illu-*  
*minante divineque dixit. Tum demonstravit & sacris Litteris, & rationibus ex*  
*intima Theologia de promptis, omnique argumentorum genere, Romanum Pontifi-*  
*cem, verum Successorem B. Petri Apostolorum Principis, pro quo oravit Christus*  
*Dominus, ne ejus fides deficeret, eundemque verum caput Ecclesia, qua est firma-*  
*mentum & columna veritatis, quaque a Spiritu Sancto regitur ac gubernatur,*  
*in Sanctorum Canonizatione errare & falli non posse. Idque non modo piè, sed*  
*in necessario, & certissima fide credendum affirmavit omnibus summis rationibus*  
*divinitus in medium allatis; cum illud etiam perspicue manifestum sit, Ecclesia*  
*Pontificisve decreta certa & firma esse, que ad Fidem, aut morum disciplinam*  
*pertinentia certis & firmis principiis fundamentisve innitantur. Pluribus cum*  
*eam in sententiam dixisset ad hora spatium concionem duxit, quam cuncti, qui*  
*interfuerunt, summa attentione atque admiratione audierunt. At, quia respon-*  
*deri posset, assertiones Sixti Pontificis ab eo prodiisse, tamquam a privato*  
*Doctore, uti re vera sic prodiisse, dicendum esse videtur; ceterorum id-*  
*circo Doctorum sententias ea, qua fieri poterit, diligentia enarrabimus.*

3 Prima itaque sententia est Glossæ in cap. unic. in v. *Sedis Apostolica: de*  
*Reliq. & venerat. SS. in 6. ubi Auctor ejus admittendo possibilitatem erro-*  
*ris in Canonizatione, in eo esse sensu videtur, Papam in eadem non esse in-*  
*fallibilem. Eam autem sequuntur Innocent. in cap. 1. num. 4. ibique Ostien.*  
*num. 10. v. Quid si Ecclesia errat: de Reliq. & venerat. SS. & Felin. in cap. Venerabili*  
*num. 2. de testibus. Adhæret etiam ei Cardinalis Cajetanus Ponti-*  
*ficiæ auctoritatis aliquin assertor & vindex in tract. de Indulgent. adversus*  
*Lutherum ad Julium Medicum cap. 8. ubi ait: Prasumitur enim de jure pro*  
*Judice semper, nisi manifeste appareat error; & supponens, ex causa legitima da-*  
*tam tantam Indulgentiam, veritatem predicat, sicut absque falsitate predicat ta-*  
*lem Sanctum, supponens illum rite Canonizatum. Ita quod dato, quod iste Cano-*  
*nizatus*

nizatus non esset Sanctus, sed damnatus; Ecclesia doctrina, aut predicatio non esset mendax, aut falsa. Quia hæc non pertinentia ad Fidem non intelliguntur affirmari & predicari, nisi cum grano salis, hoc est, stantibus communiter præsumptis. Præsumis enim Ecclesia Canonizationem rite factam, & similiter Indulgentiam rite datam, & sic prædicat, Indulgentias valere quantum sonant. Sed; sicut potest intervenire error humanus in Canonizatione alicujus Sancti (ut S. Thomas dicit) ita potest intervenire error humanus in collatione Indulgentiæ. Si quis autem putet, Romanum Pontificem non posse errare in istis particularibus actionibus .... putet quoque, ipsum non esse hominem. Assentitur quoque Vincent. Baron. Theolog. moral. parte altera disp. 11. sect. 2. §. 2. Augustinus demum de Ancona, sive Augustinus Triumphus de potestate Ecclesiæ. quest. 14. artic. 4. ubi agit de Sanctorum veneratione; postquam docuit, quod duplex judicium datur de homine, primum nempe secundum præsentem justitiam, alterum autem juxta æternam sententiam; atque adeo quod in priori judicio potest quis esse irreprehensibilis coram hominibus, sed reprehensionem merens coram Deo; quodque in secundo judicio nihil invenitur reprehensionem merens, & culpabile sive per Deum, sive per hominem; sic ad rem concludit: Papa ergo, canonizando aliquem Sanctum, secundum præsentem justitiam non errat, quia sic credit, eum esse Sanctum, ut informationem recipit secundum allegata & probata sibi. Dicit autem Augustinus in quadam epistola ad Severum Abbatem epist. 35. commendantem eum de sanctitate, & scientia: Qui enim sic credit, ut loquitur, etiamsi falsa loquatur, fideliter loquitur; qui autem non credit, quæ loquitur, etiamsi vera loquatur, infideliter loquitur. Quantumcumque ergo Papa non vera approbet, canonizando vel approbando aliquem Sanctum, ex quo fideliter & vere approbat secundum informationem sibi factam, non errat: & id ipsum repetit quest. 17. art. 4. Ad primum ergo est dicendum, quod aliter judicat Deus, & aliter homo; quia Deus judicat judicio interiori habens pro teste ipsam hominis conscientiam, juxta illud ad Roman. 2. Testimonium reddente illis conscientia ipsorum, & inter se invicem cogitationum accusantium, aut defendentium. Ideo Deus in suo judicio non fallit, neque fallitur. Sed homo judicat judicio exteriori, habens pro teste operum exteriorum evidentiam: ideo potest falli, & fallere. Ecclesia ergo non errat, canonizando aliquos Sanctos; quia non canonizat, eos esse Sanctos judicio Divino secundum determinatam sententiam, sed judicio humano secundum præsentem justitiam; secundum quem modum Sancti sunt, hominum reputatione & veneratione. Hujus scilicet gravissimi Auctoris sententiam, etsi prima facie favorabilis videatur infallibilitati Romani Pontificis in Canonizatione, re vera tamen talis non est: cum ex ea ad summum desumatur, Romanum Pontificem minime mentiri, nec simulare, quando aliquem Dei servum Sanctorum fastis adscribit; cum quo utique stare potest, ut definiat de eo quod verum non est, ideoque materialiter mentiatur; quemadmodum bene animadvertit P. Ceparius in suo directorio M.S. Canonizat. cap. 6. quo in loco, recitata Augustini Triumphii opinione, hæc subdit: Non possum



non mirari, hunc aliquin virum doctum non advertisse, se tantum his suis rationibus probare, Papam non mentiri, nec simulare, sed id, quod sentit & credit, definire, siue id quod definitur sit verum, siue non; quod est dicere, non mentitur formaliter, licet materialiter possit mentiri, & per consequens errare.

4 Pugnans vero pro summi Pontificis infallibilitate ceteri mox referendi. Dux nempe omnium est S. Thomas quodlib. 9. art. 16. ut infra latius exponetur. Porro cum S. Thoma consentiunt, admittendo similiter summi Pontificis infallibilitatem, Doctores, qui de Canonizatione scripserunt, Troilus Malvetius in tract. de Canonizat. SS. pag. 101. num. 48. inter tract. magn. tom. 14. Contelor. de Canonizat. SS. cap. 10. per tot. Jo: Antonius Garzias de Caralaps in tract. de Canonizat. SS. §. 13. & plurib. seqq. Angel. Rocca de Canonizat. SS. cap. 39. tom. 1. oper. Castellan. de Canonizat. SS. quest. ultim. per tot. Scacc. de not. et sign. sanctit. sect. 1. cap. 8. pag. 97. Pavin. in relat. cause Canonizat. S. Bonaventura part. 2. art. 9. per tot. Matta de Canonizat. SS. part. 4. cap. 30. per tot. Castellin. de certitud. glor. SS. per tot. & signanter cap. 5. punct. 8. et cap. 6. Auctor anonymus de Canonizatione ad Cardinalem Montis Regalis cap. 4. et cap. 5. Virgilius Ceparius in director. MS. Canonizat. SS. part. 1. cap. 6. per tot. Victon. in tract. de Canonizat. Gallico idiomate conscripto a cap. 15. usque ad cap. 23. Riccioli Societatis Jesu Theologus in tractatu, cui titulus: immunitas ab errore tam speculativo, quam pratico definitionum Sedis Apostolicæ: in quo latissime hanc sententiam tuetur, & ab objectis vindicat.

5 Pontificiæ ipsi infallibilitati in Canonizationis judicio suffragantur juris Canonici Interpretes, Fagnan. in cap. Venerabili. a num. 10. usque ad fin. et signanter num. 39. de testibus. Gonzal. in cap. Audivimus. sub num. 6. de Reliq. et venerat. SS. Covarr. variar. resolut. lib. 1. cap. 10. num. 13. Penia in addit. ad Eymericum in director. Inquisit. 2. part. quest. 17. §. Ad hæc, et §. Qui autem. Mascard. de probation. concl. 252. num. 57. Barbof. jur. Ecclesiast. univers. lib. 1. cap. 2. num. 42. et seqq. Card. Tusc. practicab. conclus. in v. Canonizatio concl. 41. num. 5. et seqq. Card. Albit. de inconstant. in Fide cap. 40. num. 205. Anaclet. ex Ordine Minorum S. Francisci Reformatorum provincie Bavarie in Jus can. tom. 3. ad tit. Decretal. de Reliq. et venerat. SS. §. 1. num. 8. atque Eminentiss. Card. Petra docte de more, ac latissime id ipsum confirmat in comment. ad Constit. Apostol. tom. 2. in notis ad Constitut. 1. Alexandri III. num. 17. et seqq. Quodque præcipue notatu dignum est, sententia ipsa de summi Pontificis infallibilitate in Canonizatione juxta doctrinam S. Thomæ propugnatur ab omnibus Theologis tum ejusdem S. Thomæ, tum Scoti discipulis; quibus etiam ceteri, qui dicuntur Neoterici, unanimes subscribunt.

6 Inter Thomistas namque prædictæ adhærent sententiæ Joannes de Neapoli quodlibet. 11. S. Antoninus in summa Theol. 3. part. tit. 12. cap. 8. §. 2. Bannez in 2. 2. Divi Thomæ quest. 1. artic. 10. dub. 7. conclus. 2. Jo: a S. Thoma in 2. 2. Divi Thomæ quest. 1. disput. 9. art. 2. sub tit. de certitud.

Can-

*Canonizationis*; Silvester in *summa* in verb. *Canonizatio* num. 2. Tabiena in *summa* in v. *Canonizatio*; Summa Armilla in v. *Canonizatio* num. 111. Ambrosius Catharinus in *opusculis* de certa SS. gloria lib. 1. tum §. Status ergo primum; tum subsequentibus reliquis, quibus liber ille concluditur; Lucarinus in *controver.* Thomist. concl. 30. Gravin. 2. part. praescript. Catholicar. tom. 4. dub. 1. in *append.*, et *quasi.* 5. art. 2. Melchior Canus de loc. Theologic. lib. 5. cap. 5. *questi.* 5. art. 3. concl. 3. pag. 161. et pag. 165. Ferr. de virtut. Theolog. tom. 1. tract. de Fide *quasi.* 13. §. 2. num. 4. et §. 5. et 7. Marchelius de capite visibili Ecclesia dub. 4. pag. 740. (biblioth. Pont. tom. 9.) Blasius a Purificat. in tract. de adorat. disput. 8. dub. 4. per tot. Bzovius de Pontifice Rom. cap. 32. Dominicus a SS. Trinitate in tract. de summo Pontifice Rom. cap. 18. §. Quinta conclusio pag. 493. (in biblioth. Pontif. tom. 10.) Rabaudi disput. Theolog. tom. 2. exercit. 3. cap. 1. pag. 144. et plurib. seqq. Joannes Syrus in tract. de Fide, syntag. 12. *questi.* 6. *append.* 2. §. 2. Natal. Alexander hislor. Eccles. fac. 14. differt. 17. in schol. tom. 4.

7 Inter Scoti autem discipulos Franciscus Aretinus, dictus de Pitigianis, in *summa* speculat. & moral. super 3. sentent. Scot. distinct. 25. art. 5. Frassen. in suo Scot. Academ. ubi de effectibus & praexcellentiis Gratia sanctificationis, in solutione oppositionis sexta num. 10. Pont. in curs. Theolog. disp. 28. *quasi.* 1. concl. 10. Macedo in schol. Theolog. schol. 19. cap. 2. & cap. 4. Angelus Petrica a Sonnino in lib. de militans. & triumphant. Eccles. lib. 12. disput. 2. conclus. 2. Guarnier. in suo tomo de Eccles. triumphant. lib. 2. cap. 3. §. 2. Cordub. *questi.* Theologic. lib. 4. *questi.* 12. Bordon. de blasphem. cas. 22. num. 5. & par. 3. variat. resolut. resolut. 113. Card. de Lauræa to. 1. de Fide disput. 6. art. 3. num. 120. & num. 125. Pater a Panormo meritissimus olim sacre rituum Congregationis Consultor scrutin. doctrinarum, cap. 2. art. 13. num. 137. & subseqq., & cap. 3. art. 14. num. 34.

8 Demum inter Neotericos Ven. Dei servus Card. Bellarminus lib. 1. de SS. beatit. cap. 9. Andreas Duvallius in 2. 2. D. Thoma tract. 4. de summo Pontifice part. 2. *quasi.* 7. Suarez in defens. Fidei Catholica adversus Anglic. sect. error. lib. 2. cap. 8. & tract. 1. de Fide disput. 5. sect. 8. num. 8. Valquez in 1. 2. D. Thoma disput. 165. cap. 9. Gregor. de Valentia tom. 3. disput. 1. *questi.* 1. de objecto Fidei punct. 7. §. 41. Arriaga tom. 5. cursus Theolog. tract. de Fide disput. 9. sect. 5. num. 27. 28. & subseqq. Fagundez in tract. de quinque precept. Eccles. lib. 1. cap. 4. num. 31. Azor. instit. moral. par. 2. lib. 5. cap. 7. Platel. in synopsis totius curs. Theolog. part. 3. cap. 1. §. 4. num. 148. ubi pro eadem sententia stantes assert S. Bonaventuram, Amicum, & alios etiam; Maucler. de monarch. Eccles. 2. par. libr. 5. cap. 7. Castropol. oper. moral. tom. 1. tract. 4. de Fide disput. 1. punct. 5. §. 4. num. 2. Del Bene de offic. Inquisit. tom. 2. dubit. 253. Diana oper. moral. in edit. coordin. tom. 9. tract. 5. resolut. 15. 16. 17. & 18. Lezana consil. 1. num. 59. Pasqualig. in addit. ad Lauret. de Franch. num. 1253. Joann. Viguer. libr. 1. instit. Theolog. de virtut. Fidei num. 104. Veran. in regul. Fid. Catholic. cap. 2. §. 7. num. 4. P. Lupus in Concil. general. & pro-

*Et provincial. tom. 3. pag. 573. & Lamindus Pritanius de ingentorum moderatione lib. 1. cap. 17. Sed tamen ritus iste ab Apostolica Sede eo nunc peragitur accurato diligentique studio, ut pie credendum sit, nullum ea in re (hoc est in Canonizatione) errori locum fuisse, aut deinceps futurum.*

9 Sententia porro hæc communi prædicto plausu recepta sequentibus potissimum innititur fundamentis. Primum est, quod fieri nequit, ut a summo Pontifice universa Ecclesia ad errorem inducatur in his, quæ ad mores spectant: sed id utique contingeret, seu contingere posset, si posset falli in Canonizatione; utpote quæ nihil aliud sit, quam publicum Ecclesiæ judicium de vera sanctitate, & gloria alicujus hominis defuncti. Argumentum hoc est D. Thomæ quodlibet. 9. quæst. 7. art. 16. ubi sic loquitur: *In Ecclesia non potest esse error damnabilis; sed hic esset error damnabilis, si veneretur tamquam Sanctus, qui fuit peccator, quia aliqui scientes peccata ejus crederent, hoc esse falsum & si ita contingeret, posset ad errorem perducì; ergo Ecclesia in talibus errare non potest.* Id ipsum autem præ ceteris supra allegatis bene explicat Melchior Canus de loc. Theolog. lib. 5. cap. 5. concl. 3. Multum refert ad communes Ecclesiæ mores scire, quos debeas religione colere. Quare, si in illis erraret Ecclesia, in moribus quoque graviter falleretur. Nec differt, diabolus colas, an hominem condemnatum. Atque, si Ecclesia abstinentia legem rogaret, quæ vel rationi, vel Evangelio adversa esset, turpiter ab illa profectò erraretur. Turpiter ergo etiam errabis in doctrina morum, si legem ferat de colendo Deo, quem colere, si Divus non est, & cum ratione, & cum Evangelio pugnat. Eique concordant textus in can. 57. & in can. 58. 11. quæst. 3. cum in primo hæc habeantur: *Si quis dixerit justum injustum, & injustum justum, abominabilis uterque apud Deum est. Similiter, qui Sanctum dicit esse non Sanctum, & rursus non Sanctum asserit Sanctum, abominabilis apud Deum est; & in altero: Si quis hominem, qui Sanctus non est, Sanctum esse crediderit & Dei cum junxerit societati, Christum violat.* Quatenus vero diceretur, id ipsum sibi locum vindicare etiam in Beatificatione, absque eo quod hinc inferatur Pontificis in eadem infallibilitas; replicatio tamen præsto esset ex dictis in Capite præcedenti, cum Beatificatio ut plurimum non universalem, sed particulares respiciat Ecclesias, insuper facultatem, non præceptum importet, demum non sit supremum, & ultimum judicium de sanctitate Beati, atque adeo possibilitas erroris speculative non pugnet cum permissione, sicuti cum præcepto, & præsertim quidein cum præcepto Ecclesiæ universalem respiciente, ac minime sejuncto ab extremo supremi Legislatoris judicio.

10 Secundum fundamentum in eo residet, quod judicium illud est infallibile, quod a Spiritu Sancto dirigitur, ne erret: quamobrem, cum summi Pontificis in Canonizatione Sanctorum judicium a Spiritu Sancto, ne erret, utique dirigitur, de ejus infallibilitate non videtur esse dubitandum. Doctrina hæc quoque est Divi Thomæ quodlibet. alleg. Cum enim hæc sibi objecisset: *Nullus enim potest esse ita certus de statu alicujus, sicut ipsemet*

de se; quia quæ sunt hominis, nemo novit, nisi spiritus hominis, qui est in ipso, ut dicitur 1. Corinth. 2. Sed homo non potest esse certus de se ipso, utrum sit in statu salutis; dicitur enim Ecclesiast. 9. Nemo scit, utrum sit dignus odio, vel amore. Ergo multo minus Papa scit. Ergo potest in canonizando errare. Præterea, quicumque in judicando innititur medio fallibili, potest errare: sed Ecclesia in canonizando Sanctos innititur testimonio humano, cum inquirat per testes de vita & miraculis: ergo cum testimonium hominum sit fallibile, videtur, quod Ecclesia in canonizando Sanctos possit errare. Hæc, inquam, cum sibi objecisset S. Thomas, postea sic respondet: Ad primum ergo dicendum, quod Pontifex, cujus est canonizare Sanctos, potest certificari de statu alicujus per inquisitionem vite, & attestationem miraculorum, & præcipue per instinctum Spiritus Sancti, qui omnia scrutatur, etiam profunda Dei. Ad secundum dicendum, quod Divina providentia præservat Ecclesiam, ne in talibus per fallibile testimonium hominum fallatur.

11 Tertium constituitur in hoc fundamentum, quod cultus Sanctis delatus est quædam nostræ Fidei professio; unde necessario sequitur, quod judicium Papæ cultum præcipiens debeat esse infallibile. Et hæc etiam doctrina est Divi Thomæ in alleg. quodlib. ubi ita ad rem nostram loquitur: Respondeo, dicendum, quod aliquid potest judicari possibile secundum se consideratum, quod relatum ad aliquid extrinsecum impossibile invenitur. Dico ergo, quod judicium eorum, qui præsumt Ecclesie, potest errare in quibuscumque, si persone eorum tantum respiciantur. Si vero consideretur Divina providentia, quæ Ecclesiam suam Spiritu Sancto dirigit, ut non erret, sicut ipse promissit Joann. 14. quod Spiritus adveniens doceret omnem veritatem, de necessariis scilicet ad salutem; certum est, quod judicium Ecclesie universalis errare in his, quæ ad Fidem pertinent, impossibile est. Unde magis est standum sententie Papæ, ad quem pertinet determinare de Fide, quam in judicio profert, quam quorumlibet sapientum hominum in scripturis opinioni; cum Caiphas, quamvis nequam, tamen, quia Pontifex, legatur etiam inscius prophetasse Joann. 11. In aliis vero sententiis, quæ ad particularia facta pertinent, ut, cum agitur de possessionibus, vel de criminibus, vel de hujusmodi, possibile est, judicium Ecclesie errare propter falsos testes. Canonizatio vero Sanctorum medium est inter hæc duo: quia tamen honor, quem Sanctis exhibemus, quædam professio Fidei est, quæ Sanctorum gloriam credimus pie credendum est, quod nec etiam in his judicium Ecclesie errare possit.

12 Quamquam, cum de ejusdem S. Doctoris sententia dici possit, omnia virtutum opera, prout referuntur in Deum, esse quædam Fidei obtestationes, per quas nobis innotescit, Deum hujusmodi opera a nobis requirere, nosque pro iisdem remunerari, quemadmodum habetur 2. 2. quæst. 124. art. 5. posset etiam inferri, sicut in hisce virtutum actibus, & in his consequenter Fidei obtestationibus error contingere potest circa objecta materialia, ita & id ipsum possibile esse quoad cultum, quem Sanctis præstamus; non obstante, quod dicatur, & sit quædam Fidei nostræ obtestatio. Sed qui ita ratiocinaretur, bene perspectam minus haberet mentem

tem Angelici Præceptoris. In actibus enim Divinam Fidem protestantibus non semper requiritur veritas *speculativa* ex parte objecti materialis, sed *practica* non raro satis est, ita ut videlicet de eo prudenter existimetur; ubi in honore, quem Fideles exhibent & præstant Sancto canonizato, S. Thomas majus illud exigit, nempe ut Ecclesia profiteatur tamquam *speculative* verum, Sanctum ipsum esse in æterna gloria; siquidem dicit, id esse proximum gradui veritatis Fidei Catholicæ, ideoque pie credendum esse, quemadmodum colligitur ex verbis supra relatis.

13 Id autem ut funditus explicetur, animadvertere opus est, piam Fidem suos habere gradus. Quædam enim sic congruunt Religioni, ut sine ullo ejus incommodo Fides de iis abesse valeat, & adesse; puta, quod Divus Prosper fuerit, vel non fuerit Episcopus: alia vero sic ad Religionem pertinent, ut sine culpabili arrogantia rejici minime possint, ex. gr. quod beatissima Virgo fuerit in templo præsentata. Atqui his quidem Ecclesia non tribuit gradum veritatis indubitæ, quamvis aliter, saltem publice, docere non liceat; in his quippe duobus gradibus requiritur solum *practica* veritatis ratio, congruentia videlicet cum præscriptione prudentis rationis. Sed summus adhuc habetur gradus in hoc piæ Fidei genere, ad quem utique referuntur ea, quæ Ecclesia certo certius tenenda decrevit, quæque Pontifex omnino pariter tenenda declaravit; & talia sane sunt, quæ definitivo judicio a summo Pontifice pro recto totius Ecclesiæ regimine determinata sunt ac promulgata, inter quæ profecto est Sanctorum Canonizatio. Hic autem est ille piæ Fidei gradus, quem S. Doctor *in cit. quodlib.* indicat, cum ibi docet, ejusmodi Sanctorum cultum esse Fidei professionem de eorum gloria; Pontificiam in Canonizatione definitionem aßlatu Spiritus Sancti non destitui; & Ecclesiam Divinæ providentiæ ope protegi, ne in eodem rerum ordine erret.

14 Quartum fundamentum in eo positum est, quod ex supradictis, & alibi dicendis constat quidem, errorem accidisse circa cultum judicio particularium Episcoporum exhibitum erga nonnullos, qui Beati putabantur, dum re vera non erant; sed nullus huc usque in tot Sanctorum Canonizationibus per Romanos Pontifices factis error inventus est: ex quo nimirum a posteriori, ut ajunt, deducitur, summorum Pontificum judicium in Canonizationibus ex speciali Spiritus Sancti aßlatu atque auxilio infallibilitatis prærogativa potiri. Quocirca Ceparius in director. Canonizat. lib. 1. cap. 6. num. 21. subdit: *Si Papa in hoc posset errare, aliquando in hoc deprehensus fuisset aliquis error; at nullus unquam error in Canonizationibus Sanctorum hætenus fuit deprehensus.* Quis enim unquam sibi suadere poterit, Spiritum veritatis post tot diligentias, totque privatas & publicas preces in re adeo gravi summos Pontifices non esse servaturum ab errore? Ad rem hanc bene Canus de loc. Theolog. lib. 5. cap. 5. concl. 3. Ne igitur tantus error (loquitur de errore, qui in Canonizatione contingeret) in Ecclesia sit, Deus peculiariter providere credendus est, ne Ecclesia, quamlibet hominum

testimonia sequatur, in Sanctorum Canonizatione erret. Cujus peculiarissima providentia abunde magnum argumentum est, quod nunquam infirmata est Fides ab humanis testibus semel in hujusmodi judiciis suscepta; quod in casibus civilibus saepe accidit: itemque Pritanius de ingen. moderat. lib. I. cap. 17. Ceterum, si in his contingeret error, quem certe, modo rite peracta sit Canonizatio, contigisse nemo unquam ostendens; & contingere posse, difficillimum putamus &c. & clarius etiam aliis verbis supra relatis, nuncque iterum referendis: Sed tamen ritus iste ab Apostolica Sede eo nunc peragitur accurato diligentique studio, ut pie credendum sit, nullum ea in re errori locum fuisse, aut deinceps futurum. Non necessario igitur, sed tamen pie credendum est, ut inquit S. Thomas quodlib. 9. art. 16. quod nec etiam in his iudicium Ecclesia errare possit. Hac nobis aequissima, hac pia videtur sententia, & in hac ipsemet Sixtus IV. fuisse videtur, dum catalogo Sanctorum adscripsit B. Bonaventuram. Inquit enim in bulla: Confidentes, quod in hac Canonizatione non permittat nos Deus errare. Si vero his, quæ modo dicta sunt, opponatur, aliquos errores in Martyrologium Romanum aliquando irrepsisse, qui subinde correcti fuerunt, & pauca quædam menda etiam corrigenda superesse: qui id opponat, scire debet, nihil in eo esse commune cum re, de qua nunc agimus. In Martyrologio enim Romano inscripta quidem sunt nomina eorum, qui fuerunt solemniter per summos Pontifices canonizati, de quibus utique nullus error inveniri potest; sed inscripta quoque in eo reperiuntur aliorum nomina, qui in album Sanctorum nunquam a summis Pontificibus relati sunt, sed tantum vel formaliter, vel aequipollenter beatificati dici possunt sive per Romanos Pontifices, sive Episcoporum iudicio juxta antiquam disciplinam: circa quos quatenus aliquis error irrepsisset, vel adhuc permaneret (qui tamen nec irrepsit, nec adest quoad eos, qui inter Beatos a Romanis Pontificibus relati sunt, postquam ad eos delatum est jus privativum indulgendi Beatificationis honores) nemo est qui non videat, ex hoc ad rem præsentem nihil inferri posse. Aliquid nempe ex hoc argumento evinceretur, si descriptio in Martyrologio Romano, spectata sua natura & indole, Canonizationem formalem, vel aequipollentem importaret; etiam si qui sunt descripti, non fuissent antea vel formaliter, vel aquipollenter canonizati. At id nunquam probari poterit: nam ex alibi dicendis constabit, pertractatam alias fuisse in sacrorum rituum Congregatione questionem, Quid importet descriptio in Martyrologio, & utrum ad quamdam Canonizationis, an ad quamdam Beatificationis speciem referri possit; nec eam usque adhuc potuisse resolvæ.



## CAPUT XLIV.

*In quo repelluntur opposita iis, quæ dicta sunt in Capite precedenti.*

<sup>1</sup> **Q**Uæ promoventur oppositiones dictis in præcedenti, ad tria capita reduci possunt: ad eas videlicet, quæ a ratione; ad alias, quæ ab auctoritate; ad ceteras, quæ a factis ipsis Romanorum Pontificum deducuntur. Initio autem ducto a primo capite, opponitur, summum Pontificem scire non posse, an Canonizandus veram charitatem habuerit, & cum ea ex hac vita decesserit; eo quia citra Divinam revelationem nemo scire potest, semetipsum, vel alium habere, vel habuisse charitatem.

2 Confirmatur, cum ille idem, qui eleemosynas, jejunia, preces, pœnitentiam, & similia opera peregit, certo scire non possit, se esse in Dei gratia. Quare ait Apostolus 1. ad Corinth. 4. v. 4. *Nihil enim mihi conficius sum, sed non in hoc justificatus sum.*

3 Corroboratur assumptum, quia prædicta opera sunt communia bonis, & malis. Fieri etenim possunt & bene, & male. Præterquamquod miracula ex alibi dicendis non sunt indubitatum sanctitatis signum: item de virtutibus & miraculis asserta deponunt testes, qui fallere possunt, & falli: demum, quod is, qui a summo Pontifice canonizatur, virtutibus excelluerit, & post obitum miraculis claruerit, non est jus, sed factum. Quæ quidem omnia suadere videntur, iudicium Pontificis in Canonizatione infallibile esse non posse. Nam, quatenus persugium adhuc haberi vellet ad assatum Spiritus Sancti, reponitur, si minime deficiat auxilium Spiritus Sancti in Canonizatione, iudicium Papæ in hujusmodi definitione esse iudicium ex Cathedra prolatum, atque adeo definitionem esse de Fide: quod tamen non ita facile a Doctoribus etiam, qui stant pro infallibilitate Pontificis in Canonizatione, docetur, ut in Capite sequenti videbimus.

4 Verum, etiam admissio, quod citra revelationem Divinam nemo scire valeat, odio ne, an amore dignus ipse sit; admissio pariter, quod, qui facit opera, quæ ipsi bona ac meritoria videntur, certo scire nequeat, an talia quoque sint coram Deo; admissio, quod gratia miraculorum, quæ fiunt in vita, sit gratia gratis data, quæque idcirco potest esse communis & bonis & malis; adhuc admissio, quod testes humani fallere possint, & falli; demum, quod aliquo modo Canonizatio ad factum pertineat; hinc tamen non inferitur, iudicium Papæ in Canonizatione non esse infallibile: primo, quia summus Pontifex, antequam ad Canonizationem procedat, diligenter inquirat in virtutes & miracula; quamobrem, licet a priori scire non possit, an Canonizatus sit in æterna gloria, a posteriori tamen id potest apprehendere: deinde, quia idem Pontifex ad Canonizationem procedit, non præviis tantum miraculis in vita patratis, verum

rum etiam, potissimumque præviis miraculis post obitum Canonizandi ejus intercessione factis; in quo scilicet rerum themate ex alibi dicendis miracula sunt indubitata signa sanctitatis: postremo, quia nonnullæ utique res indifferentes sunt, nec ullum habent nexum cum materia Fidei, vel morum spectantium ad universalem Ecclesiam, sed & aliæ sunt, quæ ejusmodi nexum habent; ideoque, quamvis Romanus Pontifex in factis primi generis nonnumquam falli possit, secus tamen dicendum est in factis secundi generis; inter quæ porro Canonizatio recensetur, quemadmodum adnotarunt Ricciolius in *tractatu de immunitate ab errore in Canonizat. SS. lib. 1. cap. 5. num. 8.* & Dominicus a SS. Trinitate de Rom. Pontifice cap. 18. (*biblioth. Pontific. tom. 10. pag. 494.*) . Ad hæc omnibus prædictis objectis unica eaque solidissima responsione satisfacit, si dicatur, quidquid ex materiæ & testium qualitate pro fallibilitate desumitur, plene submoveri ex Divina providentia, & Spiritus Sancti præsentia, quæ Pontificem in re adeo gravi, & universam Ecclesiam respiciente ab errore servat. Hæc nimirum doctrina est D. Thomæ in *cit. quodlibet.* ubi inquit: *Dicendum, quod Pontifex, cujus est Sanctos canonizare, potest certificari de statu alicujus per inquisitionem vite, & attestationem miraculorum, & præcipue per instinctum Spiritus Sancti, qui omnia scrutatur, etiam profunda Dei; tum autem in responsione ad primum, & in responsione ad secundum, ubi subdit: Quod Divina providentia præservat Ecclesiam, ne in talibus per fallibile testimonium hominum fallatur.* Conveniunt ceteri de materia scribentes, ut puta prædictus Dominicus a SS. Trinitate, Azor. *instit. moral. part. 2. lib. 5. cap. 6.* & quotquot demum in superioribus allegati sunt pro Romani Pontificis infallibilitate: quorum tamen verbis, aut locis indicandis superfedemus, nedum quia obvii sunt, verum etiam quia nos ipsi, qui tot annorum spatio munus Fidei Promotoris sustinuimus, nostris, ut ita dicamus, oculis vidimus Divinum eundem Spiritum Romano Pontifici assistentem in definiendis Canonizationis causis; in aliquibus namque ex eis, quæ felicissimo cursu progrediebantur, repente difficultates antea nunquam præcognitæ excitatæ sunt, quæ prædictum felicem cursum retardarunt; in aliis contra quædam promotæ difficultates, quæ insuperabiles videbantur, suadebantque, silentium esse illis imponendum, ex monumentis insperato repertis miræ facilitate sublata sunt, atque ideo causæ ipsæ ad suum optatum finem pervenerunt. Quod autem attinet ad ultimum objectum, quod, si non deficit assensus Spiritus Sancti in Canonizatione, judicium Papæ in definiendo, hunc, aut illum esse sanctum, erit judicium ex Cathedra prolatum, & definitio erit definitio de Fide; Doctores, qui pugnant pro infallibilitate, sed putant, non esse de Fide, hunc, vel illum sanctum canonizatum esse in æterna gloria, respondent, definitionem utique Pontificis Canonizantis esse ex Cathedra; cum non solum a Pontifice ex Cathedra loquente prodeant definitiones Fidei, verum etiam definitiones, ac leges totæ Ecclesiæ communes, & bonum ejus universale respicientes, quia nempe sum-



mus Pontifex nedum est Doctor, sed & Pastor, eique Spiritus Sanctus afflitit, non modo ut definiat res Fidei, sed ut Ecclesiam quoque gubernet; at hinc tamen nunquam posse deduci, definitionem ejusdem, cum aliquem Beatum in Sanctorum numerum refert, esse proxime de Fide. Subdunt enim, Pontificem tunc solum de Fide definire, quando definit aliquid, quod antea continebatur aut in sacra Scriptura, aut in Traditionibus Apostolicis: cumque, hunc, aut illum esse Sanctum, neque in Scriptura contineatur, neque in Traditionibus Apostolicis, idcirco concludunt, definitiones Pontificis Canonizantis, etsi munitas afflatu Spiritus Sancti, de Fide, saltem proxime, non esse.

5 Transeunt nunc ad oppositiones, quæ ab auctoritate desumuntur, jam supra vidimus, Glossam in cap. unic. in v. *Sedis Apostolica: de Reliq. & venerat. SS. in 6.* statutz refragari opinioni. En scilicet ejus verba: *Esi Ecclesia in Canonizatione erraret, quod non est credendum, licet accidere posset, nihilominus preces in honorem talis, acceptæ & grata sunt.* Cumque magna sit auctoritas Glossæ juxta Baldum, Cinum, & alios, de quibus apud Fagnanum in cap. *Ne innitatis num. 352. de Constit.* prima idcirco ex auctoritate oppositio in recitatis Glossæ verbis haud immerito constituitur. Adidit porro sacrorum Canonum dispositio in cap. *Sicut. de test., & attest.* ubi dicitur, revocandam esse sententiam Ecclesiæ, si constet, eam fuisse latam secundum assertionem corruptorum testium; tum in cap. *A nobis 28. de sent. excomm.* in quo sic legitur: *Nos igitur consultationi tue breviter respondemus, quod judicium Dei veritati, qua non fallit, nec fallitur, semper innititur; judicium autem Ecclesiæ nonnunquam opinionem sequitur, quam & fallere sepe contingit, & falli: propter quod contingit interdum, ut, qui ligatus est apud Deum, apud Ecclesiam sit solutus; & qui liber est apud Deum, Ecclesiastica sit sententia innodatus.* Demum objicitur illud S. Augustini: *Multorum corpora venerantur in terris, quorum anima cruciantur in inferis.*

6 Facile autem est his omnibus respondere. Glossa quippe magnam certe tenet auctoritatem, at non tamen tantam, ut ab ea aliquando non liceat recedere; præsertim vero, cum plures in Glossis juris Pontificii inveniantur errores, de quibus late Nicolaus Peguletus in tract. *probabilitatis cap. 10.* cui titulus, *Errores plurimi Glossæ Canonica.* Citati postea textus ad facta particularia referuntur, quæ nullam habent connexionem cum materia Fidei, & morum universalem Ecclesiam respicientium, cum in illis possibile sit errare Romanum Pontificem, sed minime in ista. Quapropter D. Thomas loc. cit. ait: *In aliis vero sententiis, qua ad particularia facta pertinent, ut, cum agitur de possessionibus, vel de criminibus, vel hujusmodi, possibile est, judicium Ecclesiæ errare propter falsos testes.* Illud denique S. Augustini, quatenus effectum prædictum in ejus Operibus reperitur, de quo huc usque non constat, nonnulli exponunt de Ethnicis, & Gentilibus, quorum corpora superbissimis sepulcris sunt inclusa. Ita Viguer de Fide §. 3. versic. 4. Alii illud intelligunt de Christianis

nis reprobis, qui honorificis decorantur epitaphiis, licet in inferis cruciantur: sic Rocca de Canonizat. SS. cap. 42. tom. 1. oper. Nonnulli id volunt explicandum esse de Martyribus Hæreticorum, præsertim vero Donatitarum: ita Card. Bellarminus tom. 1. contro. lib. 1. de SS. beatit. cap. 9. Ceteri denique sustinent, illud esse accipiendum de Reliquiis, quæ putantur esse Reliquiæ Sanctorum, & cultum habent, licet Sanctorum Reliquiæ vera non sint: ut docte de more Covarr. tom. 2. oper. variar. resolut. lib. 1. cap. 10. sub num. 13. Quod autem posteriori loco ex Augustino refertur, etsi vere ejus Auctoris nomine censendum sit, quod negamus, nihil contrariam opinionem juvare videtur: non enim dixit Augustinus, multa corpora eorum, qui ab Ecclesia canonizati fuerunt, nos falso venerari, cum eorum anima in inferis cruciantur; sed nos multa corpora in terris venerari, quæ existimamus eorum, qui ab Ecclesia fuerint in Sanctos, & Divos relati, cum tamen vere eorum non sint, sed potius hominum damnatorum, qui in inferis cruciantur, forsitan infidelium, scilicet piratarum, aut latronum, qui ab humanis discessere publico apud omnes depravata vite testimonio: & tamen fallis nos non equidem Ecclesiæ iudicium, sed rerum vicissitudo, ex qua Christiana respublica tot bellis Maurorum, Turcarumve tyrannide oppressa has illusiones patitur circa Sanctorum corporum venerationem. Censet sane Ecclesia venerandum & colendum, ut Sanctum, D. Hieronymum; at non ita decrevit proprio iudicio, corpus hoc, quod nos Divi Hieronymi esse existimamus, vere corpus illius esse. Sic etiam definiit, maxima veneratione Joannem Baptistam colendum esse; non ex hoc sequitur, iudicio Ecclesiæ certum esse, caput hoc, quod putamus esse Divi Joannis, procul dubio illius esse; forsitan enim alterius est. Quod si & hoc Ecclesiæ, prævia cognitione & diligenti examinatione, censeret, dicendum quidem esset, non permissurum Deum O. M., summum Pontificem in hoc falli, nosque ejus iudicio decipi. Et tamen constanter asserimus, venerationem exhibendam esse, in hoc dubio, his Reliquiis, quæ vel ex communi Christianorum opinione, vel tacito Prælatorum consensu, Sanctorum esse censentur. Nam, etsi in hoc error posset contingere, is præsumendus non est in re adeo gravi & ad Religionem pertinente.

7 Facta Romanorum Pontificum examinanda super sunt: inter quæ primum, fuisse aliquando a Romanis Pontificibus non processurum consecutionem, sed ipsam causæ Canonizationis definitionem prudentiæ & arbitrio nonnullorum delegatam; quod factum profecto non fuisset, si secum ipsi reputassent, suum in Canonizatione iudicium esse infallibile. Infallibilitas quippe oritur ab afflatu Spiritus Sancti, qui ipsis quidem, non autem aliis, licet eorum nomine agentibus, adesse dicendus est.

8 Re vera scribentes de Canonizatione Sanctorum docent, non posse summum Pontificem alteri committere definitionem causæ Canonizationis, cum infallibilitas nequeat a dignitate Pontificali, cui est annexa,ungi: Marchesius de capit. visibili Ecclesiæ disput. 3. dub. 4. §. 2. pag. 739. (biblioth. Pontif. tom. 9.) Ricciolius in cit. oper. lib. 1. cap. 6. quest. 1. Eminentiſſimus Cardinalis Petra in comment. ad Constit. Apostol. tom. 1. pag. 533. col. 1. & ante

& ante hos Alphonsus de Castro in tractatu de justa Hereticorum punitione tom. 2. cap. 6. col. 45. ubi propositæ quæstioni an Papa possit alicui committere potestatem censendi de Fide &c. negatione respondet, allato exemplo causarum Canonizationis, quas nunquam Romani Pontifices alteri commiserunt definiendas. En ejus verba: Si Papa posset potestatem definiendi de Fide in quemquam alium transferre, ad eundem modum posset etiam Canonizationem Sanctorum alicui committere. . . Nam, si id, quod majus est, videlicet Fidei definitionem, Papa potest committere alteri, multo melius poterit committere id, quod minus est, videlicet Canonizationem Sanctorum. Hoc autem nullus sana mentis concedet, cum sit perpetua consuetudine Ecclesia damnatum. Nam, etsi multa ad Canonizationem prævia & exacta Papa aliis committat per illos exequenda, ut puta vitæ inquisitionem, testium examinationem; ipse tamen filius summus Pontifex sententiam profert, illum declarans fuisse Sanctum, & velut talem catalogo Sanctorum illum adscribens. Nec unquam ab ipsis Ecclesia primordiis ad hoc usque sæculum fuit auditum, ut Papa alicujus Sancti Canonizationem Legato suo committeret.

9 Nobis vero, ut recto ordine procedamus, duo perpendenda esse videntur; primum videlicet, an hæc delegatio vere unquam facta sit; alterum autem, quatenus etiam facta fuerit, quid porro ex ea ad rem, de qua nunc agimus, inferri valeat. Ducto itaque initio a prima positione, prætermitti utique debent causæ Beatificationum, quas vidimus aliquando per summos Pontifices, etiam post delatum ad eos jus privativum beatificandi, nedum quoad confectionem processuum, verum etiam quoad eorum deliberationes Episcopis commissas; cum hic & nunc quæstio sit, non de Beatificationis, sed de Canonizationis causis. Prætermitti quoque debet Canonizatio B. Eneconis, de qua in superiori cap. 8. num. 10. cum ex ibi adductis tantum colligi possit, cultum fuisse quidem ei solemniter delatum a Petro Episcopo Burgenſi, sed in executionem Canonizationis jam decretæ ab Alexandro II.: sicut in mandatis acceperat a beato Papa Alexandro. Quocirca Bollandiani ad 1. diem Junii pag. 120. ponderantes Indulgentiam a Gregorio XIII. concessam visitantibus Capellam ejusdem S. Eneconis, sic ex Yopez locuti sunt: Gregorius XIII. per expressum Breve Capellam ejus visitantibus, tamquam Sancti a suis Prædecessoribus canonizati, Indulgentias largitur pro prima Junii. Ejusdem rationis est Actus Clementis III. erga B. Stephanum Auctorem Ordinis Grandimontensis: postquam enim plenam habuerat ille notionem vitæ, meritum, & miraculorum istius (plenus instructi de vita, meritis, & conversatione, qua supradictus vir sanctus asseritur floruisse, & quod multimodis miraculorum indicibus Divina voluit pietas eum illustrare) ipsum inter Sanctos retulit, & negotii executionem commisit Legato Apostolico: Hujus executionem negotii dilecti Filii nostri Joannis S. Marci Presbyteri Cardinalis Apostolica Sedis Legati duximus arbitrio committendam, per Apostolica illi scripta mandantes, ut ad locum vestrum accedens, & convocatis adjacentium illarum partium Episcopis, ceterisque viris religiosis, ipsum

*inter Sanctos auctoritate, qua fungimur, Nos denunties adscripsisse, & per ipsius merita Redemptoris suffragia decrevisse cum reliquorum Sanctorum interventionibus postulanda.*

10 Actibus, inquam, hisce sepositis, qui subsequuntur, examinandi sunt; nempe primum ille Benedicti Papæ VIII. qui scribens Bonifacio Marchioni, post audita opera & miracula intercessione B. Simeonis Eremitæ in cœnobio Padolironensi agri Mantuani patrata, interrogationi sibi propositæ, an liceret ecclesiam constituere, & ejus corpus in illa collocare, sic respondet: *Si ira coruscet miraculis, ut vester homo nobis asseruit, adificate ecclesiam, collocate in ea eundem, juxta quem altare consecrari rogare, in quo Reliquiæ antiquorum Sanctorum recondantur cum sacratissimo Corpore D. N. J. C. & sic demum Divina mysteria celebrentur.* Alter est Urbani II. qui, accepta miraculorum recitatione intercessione B. Nicolai Peregrini Tranenſis a Deo factorum, ita in Concilio statuit: *Nos igitur causam ipsam eidem Fratri nostro Bizantio, (videlicet Archiepiscopo Tranenſi, qui miracula recitaverat) commisimus, de ejus nimirum probitate ac scientia nihil hesitantes, ut, quod ei, revelante Domino, visum fuerit, maturiori deliberatione constituat ad laudem & gloriam illius, qui gratuita misericordia famulos suos mirifice gratificare consuevit.* Tertius denique Clementis III. est, qui pariter, auditis miraculis intercedente B. Othone Episcopo Bambergensi patratis a Deo, ita scripsit Episcopis Merseburgensi, atque Eistettensi: *Discretionis vestre per Apostolica scripta mandamus, quatenus de vita ipsius & miraculis diligentius inquiratis, qua Nobis fuerunt per multorum litteras indicata. Et, si non inveneritis aliquid, quod obsistat, ipsum Canonizatum, auctoritate freti Apostolica, solemniter & publice nuntietis; anniversarium diem sui transitus facientes, & publice nuntiantes, ad honorem Dei, & ipsius beati viri memoriam, solemnem haberi: qui nimirum omnes Actus habentur in novo codice Canonizationum pag. 3. 9. et 24.*

11 Ad eorum itaque sedulum examen descendentibus, & primum quidem ad ejus, qui ad Simeonem Monachum & Eremitam in cœnobio Padolironensi spectat, occurrit Arnoldus VVion in ligno vite part. 2. lib. 3. pag. 238. referens, Simeonem ipsum fuisse canonizatum a prædicto Benedicto Papa VIII. Connumeratus est in numerum Sanctorum a Benedicto Papa VIII. petente ac rogante Illustrissimo Duce, & Marchione Bonifacio Tedaldi filio: tum cl mem. eruditus P. Benedictus Bacchini in hist. monasterii S. Benedicti Padolironis lib. 1. pag. 31. hæc habens: *Il santo corpo fu da' Monaci consolatissimi di tal perdita posto in loco decente, e separato; dove occorrendo frequentissimi i miracoli, quasi subito cominciarono a ripensare Bonifacio, e Richilda di procurarne la Canonizzazione, che secondo que' tempi consisteva nel concedere il sommo Pontefice, che s'erigesse sopra il sepolcro à chiesa, ò altare, su cui si celebrassero i sagrosanti misterj dell'Eucaristia. Passarono per tanto a Roma per tale effetto con le credenziali, e con necesary dispacej mandati dal Duca Bonifacio alcuni Monaci del suo monastero di S. Benedetto &c. Passati in questo modo a Roma, ed esposte*

esposte al sommo Pontefice con le suppliche del loro Principe le maraviglie, che Dio si degnava operare a gloria del suo Santo, e verificata la grandezza delle di lui virtù, ed il maraviglioso delle sue penitenze, ottennero il favorevole referitto, con cui canonizzato S. Simeone, si concesse al Duca Bonifacio di far fabbricare una chiesa dedicata in di lui onore, e quivi sopra il suo corpo di far consagrar un'altare. Nempe, quatenus huc usque relatis fides adhibenda sit, nihil ex ipsis inferri potest ad suadendum, fuisse Marchioni, aut alteri cuicumque commissam definitionem causæ Canonizationis B. Simeonis. Probata quippe & vera ostensa fuerunt coram Benedicto Papa VIII. probanda & vera ostendenda, verificata la grandezza delle di lui virtù, ed il maraviglioso delle sue penitenze: postea idem Pontifex Canonizationis decretum protulit, ottennero il favorevole referitto; eoque Marchioni tantum indultum fuit, ut curare posset, ædificari ecclesiam, & in ea Simeonis corpus collocari. Multo autem minus quid inferre licet, cum in monumento modo memorato, Indulti videlicet Marchioni concessi a Benedicto, habeantur hæc verba, *nuper sanctificati*; utpote quibus antecedens ostenditur ejusdem Simeonis Canonizatio.

12 Tametsi, ut veritati obsequamur, responsio hæc suis non caret, & quidem magnis, difficultatibus; tum quia verba prædicta, *nuper sanctificati*, præferunt recentem obitum servi Dei Simeonis Monachi & Eremitæ, qui nempe cum fama sanctitatis paulo ante mortuus erat; tum quia accessus Monachorum ad Sedem Apostolicam, ac Marchionis petitio ex monumento supradictò sane optime deducuntur, sed neque ex eo colligitur, editum fuisse a Benedicto Canonizationis decretum, nec ullum aliud exhibetur monumentum, unde ipsam decreti editionem liceat comprobare. Quamobrem aptior esse videtur responsio, si dicatur, Simeonem a Benedicto VIII. nequaquam canonizatum, sed tantum beatificatum fuisse; sicuti, bene perpenso allegato diplomate, probat Scacch. de not. & sign. sanct. scđ. 10. cap. 5. pag. 813. Hic autem Simeon non fuit canonizatus, quamvis dicatur in ea epistola, *nuper sanctificati*. Est phrasis illius temporis, qua significabatur, aliquem Dei famulum pie ac sancte obiisse... Id ipsum ex verbis ejusdem epistolæ colligitur, in qua summus Pontifex solum concedit, ut cadaver prædicti servi Dei prope altare, non autem sub altari, collocetur; ita ut Reliquiis Sanctorum antiquorum, & de more illius ætatis cum sacratissimo Corpore D. N. J. C. altare consecratur. Si autem ille Dei servus Canonizatus extitisset, Pontifex in ea epistola non diceret, altare consecrandum cum Reliquiis antiquorum Sanctorum: nec ecclesiam ad ejus honorem consecrari concedit Pontifex, sed, quod liceat prædicto Marchioni aliquam ecclesiam ædificare, & demum in ea collocare corpus Dei servi, quod erat quoddam Beatificationis genus. Ne vero vel hoc ipsum Beatificationis genus, re non cognita, suspicari possimus commissum fuisse arbitrio & prudentiæ Marchionis, manus admovenda est ad epistolam S. Leonis IX. relata apud VVionium loc. cit. pag. 239. scriptam Episcopo Mutinensi; ex qua scilicet nedum eruitur præcedens examen

Sedis Apostolicæ, sed Beati etiam corporis elatio Apostolicæ auctoritatis ope perfecta: *Leo Episcopus servus servorum Dei. Venerabili Mutinensi Episcopo salutem, & Apostolicam benedictionem. Mirabilis Deus in Sanctis suis, gloriosus, & mitis, magnæque misericordia, & super malitiam prestabilis, multorum Fidelium ut vera comperimus relatione, centupla remuneratione donavit sancti sui Confessoris meritum, & gloriam Simeonis Reverendissimo Abbati S. Benedicto, cui exhibeatur honor, adjuncto sibi socio Simeone Monacho & Eremita & Diacono. Mantuanus Episcopus novam ibi consecrabit ecclesiam, cui volumus, ut exhibeas honorificentiam, s. interesse te volumus huic consecrationi, & hujus corporis elevationi, & altare in ejus honore consecratur, quem Deus summa virtutum clarificavit dignitate. Amen.*

13 Simili adhuc responsione satisfieri posse videtur exemplo Urbani II. Beati nimirum Nicolai Peregrini Tranensis meminerunt David Romhæus in *catal. de Sanctis regni Neapolitani*, Ferrarius in *catal. SS. Ital. ad diem 2. Junii*, & Petrus de Natalibus lib. 5. cap. 78. Vita ejus, ac miracula scripta fuerunt ab Adelpherio, qui ea dicavit Bisantio seniori Archiepiscopo Tranensi, quo quidem Ecclesiam Tranensem gubernante, hoc est anno 1098. Nicolaus ex hac vita decessit. Historia quoque translationis corporis ejusdem Nicolai, quæ facta est anno 1143. sub Bisantio juniore Archiepiscopo pariter Tranensi, conscripta fuit ab Amando Diacono. Monumenta demum ista typis impressa sunt tom. 7. *Ital. sac. Ferdinandi Ughelli col. 900.* Sed, ut ad propositum accedamus, certum utique est, petitionem Bisantii junioris pro obtinenda Nicolai Peregrini Canonizatione fuisse promotam in Concilio Romano tunc temporis coacto coram Urbano II. ut ex verbis monumenti supra allegati, ex novo codice Canonizationum desumpti pag. 9. *Cum, largiente Domino, nuper cum magna Episcoporum, Abbatumque frequentia synodale Concilium ageremus, venerabilis Frater noster Bisantinus vestra civitatis Archiepiscopus venerabilis viri Nicolai, (qui apud vos Peregrinus cognominatur) nonnulla miracula coram universo Concilio scripto edita recitavit, & eundem Dei hominem auctoritate nostra in Sanctorum catalogo adnumerari instantissime postulavit.* Attamen, cum Urbanus II. causam commiserit eidem Archiepiscopo Bisantio, juxta verba antea relata, commissio ipsa ita explicanda esse videtur, ut sit referenda ad ejusdem Archiepiscopi potestatem, ideoque ad solam Beatificationem secundum consuetudinem tunc vigentem; ita nempe, ut sensus ejus sit, noluisse Urbanum annuere petitioni Canonizationis, sed, remisso ad Archiepiscopum negotio, hujus jurisdictionem excitasse, ut scilicet, re maturius considerata, suo jure uteretur, & sic ad Beatificationem procederet.

14 Explicatio hæc duabus fovetur circumstantiis; quarum altera est, quod, teste Amando, Archiepiscopus Bisantius ad suam Ecclesiam reversus nihil aliud fecit, quam ecclesiam ædificare in honorem Nicolai: nec enim Apostolica auctoritate ejus cultum extra suam diocesim, vel provinciam dilatavit, nec ejusdem cultus prolatio, sive extensio ex Urbani diploma-

plomate erui potest, cum inscriptum tantum sit *Clero, & Ordini, Nobilibus, & Plebi Trani consistentibus*. Amandus nimirum, post narratum atque in suam historiam insertum Urbani diploma, sic refert gesta ab Archiepiscopo ( *apud cit. Ughel. col. 902.* ) : *Prædictus autem Archiepiscopus in suam reversus Ecclesiam cum missione Apostolica, & benedictione comitante, in B. Nicolai Peregrini honore incepit ecclesiam; tanti viri veneratione dignum existimans, ut, qui jam in celo a Deo sedem receperat, ab hominibus quoque in terra Oratorii mereretur honorem, in quo suppliciter postulantibus mitis adesset. In cujus fundamentis primum lapidem cum benedictione constituit, ut & suam devotionem ostenderet, & populi desideria incitaret. Altera autem defumitur ex aliis Actibus Urbani II. quippe qui, ut supra vidimus cap. 8. num. 12. cum Sanctarum catalogo adscripserit Godolevam Virginem, sententiam protulit in Concilio, & Episcopo Tornacensi commisit sancti corporis elevationem; tum petentibus Canonizationem servi Dei Gulgosi respondit, similes non admitti postulationes, nisi testes adfint, qui miracula suis oculis visa attestentur, & universæ Synodi accedat assensus: in quo proinde rerum themate nemo facile credet, eundem Urbanum voluisse integram Canonizationis Nicolai Peregrini causam Archiepiscopo Tranenſi committere.*

15 Quod demum attinet ad Canonizationem B. Othonis Episcopi Bambergensis factam a Clemente III. Clemens utique delegavit Episcopis Merseburgensi, atque Eistettenſi, ut, ulterioribus adhibitis diligentis, in vitam ac miracula Othonis inquirerent; tum autem, quatenus nihil, quod obfisteret, invenirent, eum promulgarent auctoritate Apostolica Canonizatum; sed ita quidem minime Canonizatio, at Canonizationis tantum promulgatio illis commissa dicenda est: uti recte adnotavit Ricciolius in opere *sæpe cit. lib. 1. cap. 6. num. 1.* *Nec obstat, quod Clemens III. ut refertur in chronico Bambergensi, per litteras datas anno 1189. videatur commisisse Episcopis ejus regionis Canonizationem S. Othonis Episcopi Bambergensis; re vera enim iis tantummodo commisit inquisitionem ulteriorem de iis, ob quæ, si vera erant, decrevit, Canonizandum esse, & purificata conditione, promulgandi Canonizationem a se sub conditione decretam. Verba enim Clementis sunt hæc: Discretionis vestre per Apostolica scripta mandamus, quatenus de vita ipsius & miraculis diligentius inquiratis, quæ nobis fuerunt per multorum litteras indicata; & si non inveneritis aliquid, quod obfistat, ipsum Canonizatum, auctoritate freti Apostolica, solemniter & publice nuntiatis. Non dixit, canonizetis. Consentunt epistolæ ejusdem Clementis III. ad Bambergenses relatæ in cod. Canoniz. pag. 25.: clarius autem res tota aperitur a Monacho Ebboſne in lectionibus post vitam S. Othonis apud Bollandianos ad diem 2. Julii tom. 1. pag. 455. num. 151. ubi sic legitur: Anno igitur Dominica Incarnationis 1189. Clemens III. Romana Sedis Antistes eorum, qui hujus negotii auctores extiterant, attestations recepit, habitoque Fratrum, qui præſentes erant, consilio, sanctissimum Confessorem Dei Othonem Sanctorum catalogo adnumerandum decrevit. Eo igitur canonizato executionem translationis venerabilibus Episcopis Fratribus suis*

*fuis delegavit . Proinde anno a dissolutionis sue tempore quinquagesimo Apostolici executores mandati suo reverenter functi sunt officio .*

16 Colligitur ergo ex hucusque dictis, nullo niti fundamento id, quod a nonnullis asseritur, definitionem scilicet causarum Canonizationis aliquando fuisse a summis Pontificibus commissam Episcopis . Et si, quatenus etiam id ipsum verum esset, atque re quidem ipsa subisteret, nihil ex eo tamen deduci posset adversus summi Pontificis *infallibilitatem* in Canonizatione Sanctorum . Nec enim unquam ratum, firmum, irrevocabile, & *infallibile* fuisset prædictorum Commissariorum Apostolicorum iudicium, nisi confirmatio tacita, vel expressa summi Pontificis accessisset . Quærunto Doctores tractantes de sacris Conciliis & eorum auctoritate, an Concilium generale indictum a summo Pontifice prærogativa *infallibilitatis* potiatursine ejus confirmatione; & negando respondent . Quærunto item, quid dicendum sit de eodem Concilio auctoritate Papæ indicto, si eidem interveniant ipsius Legati, & decretis consentiant; tum respondent, *infallibilitatem* decretorum existere ex subsecuta summi Pontificis confirmatione, uti post Cardinales Cajetanum, & Turrecrematam videri potest apud Melchiorem Canum *de loc. Theolog. lib. 5. cap. 5.* nisi forte Pontifex Legatis antea commississet, ut aliquid in Concilio decerneretur; tunc quippe ad normam institutionis edito decreto, etiam ante Apostolicam confirmationem de ejusdem decreti *infallibilitate* nequiquam esset dubitandum . Certe Pius Papa IV. Legatis suis, qui Concilio Tridentino intervenerant, per litteras significavit, se adeo libertati Concilii favere, ut etiam de rebus Sedi Apostolicæ reservatis liberam permitteret Concilio definitionem; tametsi res erant, nedum de disciplina, verum etiam de Fide, cum non tam emendationem morum, quam hæresum confutationem respicerent . Nec enim, teste Melchiore Cano *loc. cit. pag. 151.* qui Tridentino ipsi interfuit Concilio, missi ad id fuerunt Legati cum institutione questionum definiendarum; nimia quippe erat earum multitudo, ac varietas: *Constat, summi Pontificis Legatos non solere ad Concilium accedere, ubi questio de Fide agitata est, nisi instructos prius & monitos de Ecclesia Romana Fide circa ea, quæ sunt in Concilio finienda . Solere, inquam, non item oportere . Nam Legati in Concilium Tridentinum non potuere commode de questionibus differendis ante instrui, quoniam erant propemodum infinitæ: sed cetera sere Concilia ad unam, aut alteram Fidei tractandam causam coacta sunt, ideoque Legati de Apostolica Ecclesia Fide prius instructi accesserunt . Concilium autem sane decrevit, quæ in Domino decernenda existimavit; sed antiquarum Synodorum vestigiis insistentibus in ultima sessione supplicavit prædicto summo Pontifici pro omnium a se decretorum confirmatione: & , edita utique bulla, Pius omnia confirmavit; bulla, inquam, quæ inserta est in Bullarium Romanum, necnon ad calcem nonnullarum editionum sacri ejusdem Tridentini Concilii . Nempe exemplum hoc probe demonstrat, commissionem causarum Canonizationis, quatenus etiam facta fuisset, Pontificiæ *infallibilitati**



*litas* nequaquam obfistere potuisse, instante videlicet necessitate Apostolicæ confirmationis subinde obtinendæ aut expresse, aut saltem tacite; id est eodem saltem modo, quo in superioribus dictum est, Beatificationes ab Episcopis factas ad Canonizationis gradum antiquioribus temporibus aliquando pervenisse per extensionem cultus ad universam Ecclesiam, intercedente tacito Romanorum Pontificum consensu.

17 Reliquum est, ut extremo perpendamus, an expositæ infallibilitati Romani Pontificis in Canonizatione Sanctorum obitent ea, quæ habentur in *sape cit. lib. sacrar. caremon. Archiepiscopi Corcyrensis*, ubi sic legitur *sect. 6. cap. 2. Pontifex, antequam pronunties, consuevit protestari in hanc formam &c. Antequam ad pronuntiationem veniamus, protestamur publice apud vos presentes, quod per hunc actum Canonizationis non intendimus aliquid facere, quod sit contra Fidem, aut Ecclesiam Catholicam, sive honorem Dei.*

18 Albertus Fabricius vir heterodoxus in *sua bibliogr. antiquar. cap. 8. num. 25.* ex hac nimirum infert *protestatione*, Romanos Pontifices confessos fuisse, in Canonizationibus Sanctorum falli posse. Adhæret Natalis Alexander *dissert. 27. sec. IV.* Acrius adhuc id ipsum urgetur a Joanne Launojo in *epistolis suis (oper. tom. 5.) & signanter lib. 1. epist. 5. ad Raymundum Formentinum, & lib. 3. epist. 1. ad Jo. Gerbassium, & epist. 7. ad Christophorum Favvæum, demum lib. 6. epist. 14. ad Ludovicum Maresum animadvers. 5.* acrius, inquam, id iste urget, cum ipsum non pudeat, summum Pontificem cum Sorbonicis Baccalaureis hac de re comparare. Relata siquidem *protestatione*, ita subdit *cit. epist. 5. num. 25. Hæc protestatio reapse quoad præcipua capita convenit cum ea, quam Baccalaurei Facultatis nostræ suis actibus theologicis præmittunt, et in humana infirmitatis subsidium assumunt, parati corrigere, si quid correctione dignum ederent, et in medium proferrent. Immo, ablegata jam tunc pertinacia, et ardenti cognoscenda & tuenda veritatis desiderio, correcti censentur. Sic Pontifices summi per protestationem istam significant, se sibi minime tribuere non errandi privilegium, quod Christus Ecclesiæ suæ, et eam representanti Concilio pollicitus est. Temerarium profecto, & contumeliosum in Christi Vicarium dictum, quod a solo Launojo proferri poterat, utpote Romanorum Pontificum & Sedis Apostolicæ hoste apertissimo, ex quo ipsius opuscula a sacra Indicis Congregatione fuerant merito proscripta; quemadmodum bene advertit pius Auctor tractatus de libertatibus Ecclesiæ Gallicanæ lib. 3. cap. 11. num. 9. ubi sic loquitur: Hæc nunc sufficiant, ut, qui Launoii opera legunt, præsertim ejus epistolas, quæ omnes, paucissimis exceptis, contra Pontificiam auctoritatem tendunt, agnoscant in styli acrimonia censura suis opusculis iniuste dolorem (fuerunt enim prohibita ejus opuscula a sacra Congregatione Indicis) in argumentis frequentius ab eo tractatis, ac fere in omnibus ejus epistolis jurium sanctæ Sedis extenuandorum studium, in probando argumentorum plerumque negativorum debilitatem, aut conjecturarum argutias; atque ita non ei plus fidei tribuant, quam obtinere ejus probationes mereantur.*

19 Pro oppositionis autem rejectione nonnulli dicunt, nunquam a Romanis Pontificibus enuntiatam protestationem factam fuisse; utcumque id scriptum fuerit a citato Auctore libri sacrarum caeremoniarum. Sed hoc, ut ingenue fateamur, non videtur re vera subsistere; primò, quia teste Petro Amelio in *Ordine Romano*, ut infra videbimus, Bonifacius Papa IX. eandem emisit protestationem in Canonizatione S. Birgittæ; secundò, quia in cit. lib. *sacr. caerem. pag. 52.* aperte dicitur: *Pontifex, antequam pronuntiet, consuevit protestari in hanc formam; quod invenimus seroatum a multis Pontificibus; tertio, quia Paris de Crassis in suis diariis exponens necessaria pro Canonizatione S. Francisci de Paula ait, inquirendum esse, an Papa vellet protestari ante omnia, prout aliquando dubitatum est de huiusmodi protestatione facienda, vel aliter providere vellet.* Censent alii, protestationem fuisse introductam, eo quod Pontifices aliquando quodammodo cogebantur ad Canonizationes faciendas; uti in prædicto libro sacrarum caeremoniarum Archiepiscopi Corcyrensis loc. cit. legitur: *Sunt tamen aliqui clarissimi viri, qui dicunt hoc introductum ex quadam causa, qua nunc cessat, quia Papa tunc quodammodo cogebatur ad canonizandum quemdam contra suam opinionem, & propterea protestabatur.* Verum huiusce vis nullum adest vestigium: Reges etenim, Magnates, & Communia semper quidem summis Pontificibus supplicarunt pro aliquibus Dei servis referendis in album Sanctorum; nunquam vero traditum est, Pontifices fuisse coactos, vel importunis illorum precationibus adactos quemquam Dei servum, seu Beatum contra propriam voluntatem in eodem Sanctorum albo descripsisse. Alii asserunt, protestationem factam fuisse a nonnullis Pontificibus timidæ conscientiæ, quippe qui suam ignorabant potestatem; hincque interunt, temporibus subsequenibus alios Pontifices a protestatione ipsâ abstinuisse, eo quia perfectam postea suæ infallibilitatis notitiam assecuti fuerunt; uti ratiocinatur Gonzal. in cap. *Audivimus sub num. 6. de Reliq. & venerat. SS.* At hæc etiam responsio minime æqua videtur, quandoquidem protestatio infallibilitati non obstat, ut infra demonstrabimus: in quo propterea rerum themate nemo est qui non videat, percipi haud posse, quomodo Romani Pontifices protestationem quidem fecerint, quando ignorabant suam infallibilitatem; ab eadem autem abstinuerint, cum suæ intallibilitatis cognitionem sunt assecuti. Alii tandem existimant, consulto omisam fuisse a Romanis Pontificibus protestationem in libris ritualibus indicatam; quippe quod nunc Canonizationes præcedunt adeo exquisitæ diligentæ, necnon ejusmodi probationum pondera, ut pie credendum sit, Deum non esse permitturum, ut summus Pontifex erret in cultu Sanctorum universali Ecclesiæ proponendo; quemadmodum argumentatur Penia in notis ad vitam S. Raymundi lib. 3. cap. 41. observat. 2. Sed & id minime quæstioni satisfaciens videtur; quandoquidem a Romanis Pontificibus semper, omnique tempore fuerunt adhibitæ in Canonizationibus Sanctorum exquisitæ diligentæ, prout circumstantiæ temporum exigebant; ita ut

ita ut percipi nequaquam possit, quomodo ratione auctarum diligentiarum, quia sic circumstantiæ temporum voluerunt, fuerit omiſſa protestatio. Præterquamquod Canonizationis iudicium minime innititur hominum testimoniis, qui sane, non obſtantibus quibuscumque diligentis, ſemper fallere poſſunt & falli; ſed innititur præſentiæ Spiritus Sancti, juxta doctrinam D. Thomæ *cir. quodlib. 9. art. 16.* quo ſcilicet poſito, incongruum omnino apparet, propter augmentum diligentiarum Pontifices abſtinere voluiſſe a ſepe memorata proteſtatione.

20 His igitur omnibus omiſſis, dicendum eſſe videtur primò, aliquando utique proteſtationem a ſummo Pontifice factam eſſe; ſecundò non deſſe illi congruam declarationem, ita ut ex ea nihil inferri poſſit adverſus Romanorum Pontificum infallibilitatem in Canonizatione Sanctorum; denique conſuetudinem recte introductam fuiſſe, ut ab ea proteſtatione abſtinerent. Quod etenim aliquando a ſummis Pontificibus prædicta proteſtatio facta ſit, id deſumitur ex his, quæ dicta ſunt, necnon ex aliis, quæ infra dicentur. Quod vero eadem proteſtatio ſuam habeat congruam declarationem, oſtenditur. Pontifex proteſtando, per actum Canonizationis non intendere aliquid facere, quod ſit contra Fidem & Catholicam Eccleſiam, ſive honorem Dei, nullatenus veretur, ſe in Canonizatione errare poſſe. Verborum ſenſus hic rectus & legitimus eſſe videtur: Proteſtor, me non decernere cultum Sanctis, qui Deo debetur, eſſe impendendum; quod quidem eſſet contra Fidem, & Eccleſiam Catholicam, & contra honorem Dei: & proteſtatio hoc modo declarata, ſimilis eſt proteſtationi ſeptimæ Synodi, in qua Patres declararunt, ſe Sanctorum imaginibus colendis latriam non aſſerere ſoli Deo debitam. Fuit hoc indicatum a Cardinali Petra *ad Conſtitut. Apoſtolicas tom. 2. in notis ad Conſtit. 1. Alexandri III. ſub num. 22.* Sed clariſſime prædicta innititur explicatio bullæ Canonizationis S. Udalrici editæ a Joanne XV. quam Mabilionius, ut alibi vidimus, primum indubitatæ fidei monumentum ſcribit de Canonizatione a Papa impetrata. En verba bullæ *in nov. cod. Canoniz. pag. 2. Communi conſilio decrevimus, memoriam illius (idelt S. Udalrici) affectu primo & devotione fideliffima venerandam, quoniam ſic adoramus & colimus Reliquias Martyrum, et Confeſſorum; ut eum, cuius Martyres, et Confeſſores ſunt, adoremus. Honoramus ſervos, ut honor redundet in Dominum, qui dixit: Qui vos recipit, me recipit; ac proinde nos qui fiduciam noſtra juſtitia non habemus, illorum precibus ac meritis apud clementiſſimum Deum jugiter adjuvemur.* Si igitur, ne populus in cultu Sanctis deſerendo erret, Pontifices de ſervanda Catholica veritate, ac Dei honore tuendo proteſtati ſunt; quid habet id, quæſo, commune cum timore, quem dicuntur Pontifices habuiſſe, errandi in Canonizatione Sanctorum, opinando, ſe in eo iudicio falli poſſuiſſe? Succedit alia declaratio undequaue independens ab ea, quæ huc uſque expoſita eſt. Porro proteſtatio nihil aliud erat, quam præcatum Deo a Pontifice ſuſa, ne ipſe eum ſineret in errorem incidere;

Tom. I.

K k k

&amp; id

& id deprehenditur ex his, quæ habentur in antiquioribus monumentis, ad quæ Archiepiscopus Corcyrensis se retulit. Cardinalis nimirum Otienſis in cap. *Audivimus* sub num. 5. de Reliq. & venerat. SS. sic ait; *Facit sermonem summus Pontifex, processum recitans & probata, inducens populum ad orandum, quod Deus non permittat, ipsum errare in hoc negotio.* Auctor quoque, qui versibus descripsit Canonizationem S. Petri Cælestini factam a Clemente V. ita alloquentem Pontificem ipsum inducit apud Bollandianos ad diem 19. Maji tom. 4. pag. 479.

*Vos ergo rogate,*

*Nosque oraturos cognoscite, quod Deus adsit  
Omne bonum tribuens, perfectum quodque rependens;  
Nec tantis errare sinat sponsamque redemptam  
Sanguine, sed nostros miseratus dirigat actus.*

Cardinalis Cajetanus in *Ordine Romano* apud Mabillon. tom. 2. mus. Ital. describens ritum Canonizationis hoc modo ait cap. 115. pag. 422. *Finito vero sermone hujusmodi, Dominus Papa pradicet, se oraturum, et hortetur alios, ut orent, ut supra; scilicet, quod Deus non permittat, eum errare in hoc negotio.* Hæc eadem verba leguntur apud Auctorem, qui rituum formulis præerat in aula Pontificia anno 1347. apud Raynaldum ad dictum annum num. 39. De Canonizatione S. Birgittæ facta a Bonifacio IX. sic effatur Petrus Amelius in *Ordine Romano* apud Mabillon. in cit. tom. 2. *Completo sermone, et facta admonitione, ut omnes deberent Deum rogare, quod non permetteret, eum errare; protestatione etiam facta, quod ipse non intendeat facere contra sacrosanctam Romanam Ecclesiam; surgens de sede, deposita mitra, incepit, cantando: Veni, Creator Spiritus.* Jacobus Volaterranus, qui Canonizationem S. Bonaventuræ enarravit, cujusque opusculum est typis impressum apud Raynaldum ad ann. 1482. num. 48. sequentia adhibet verba: *Facta reverentia, ponitur alia sedes ante altare, ita ut Papa vertat renes ad altare, et ibi sedet et facit sermonem, referens quæ gesta sunt, et vitam, ac miracula Canonizandi summarie; et in fine hortatur omnes, ut orent Deum, ne permittat, errare Ecclesiam suam in hoc negotio; ipse quoque identidem dicit, se oraturum.* Non dissimilis demum est modus loquendi in *Ordine Canonizationis anni 1494.* (tom. 3. collect. Concil. Britan. pag. 636.) *Et facias sermonem summus Pontifex, processum recitans et probata, inducens populum ad orandum, quod Deus non permittat eos errare in hoc negotio.* Sed & concordant monumenta ipsi Archiepiscopo Corcyrensi contemporanea. Etenim in bulla Canonizationis S. Francisci de Paula (in nov. cod. Canoniz. pag. 209.) compendio commemoratis vitæ ejusdem meritis, & miraculis, Leo X. asserit, rogasse omnes, qui aderant in Consistorio, ut suis orationibus ac jejuniis Ecclesiam Dei juvarent, ac, ne eam Altissimus modo aliquo in hujusmodi Canonizationis officio errare permetteret, instanter orarent. In bulla Canonizationis S. Bonaventuræ (cit. cod. pag. 192.) Sixtus IV. dicit, se in triduum orationes jejuniaque indixisse, ut Deus omnipotens ipsi, quod factum optimum in hac re esset, ostendere

*ostendere dignaretur, nec pateretur, Ecclesiam suam militantem errare, quæ se triumphanti conformare studeret.* Clemens autem VII. in bulla Canonizationis S. Antonini (*ibidem* pag. 229.) quæ Canonizatio facta fuerat ab Hadriano VI., narrat, eum in triduum preces & jejunia indixisse, *ut Deus omnipotens ipsi Hadriano Prædecessori, quod factu optimum in hac re foret, ostendere dignaretur, nec pateretur, militantem Ecclesiam suam errare, quæ se triumphantis conformare consueverat.* Quapropter, si monumenta omnia nihil aliud sonant, quam precem, quæ in Canonizatione Sanctorum a summis Pontificibus effundebatur, ne Deus ipsos lineret labi in errore; sequitur, protestationem de non inducendo errore in Ecclesiam, de qua nonnulli loquuntur, nihil aliud re vera fuisse, quam precationem Deo fusam, ut ipse assistere dignaretur, ne summus Pontifex in errorem incideret. Porro, quod ex eadem prece nihil inferri possit adversus Romanorum Pontificum infallibilitatem in Canonizatione Sanctorum, clarissimum profecto id esse videtur; quia, si infallibilitas iudicii innititur aflatui Spiritus Sancti, tantum abest, ut precatio Deo fusa, ne sinat Romanum Pontificem in errorem labi, obstet ejus infallibilitati, ut eadem sit potius præsidium usquequaque necessarium ad impetrandum aflatum ipsum Spiritus Sancti, ideoque & ad infallibilitatem obtinendam. Nec enim inconueniens putari debet, ut a Deo petamus id, quod certo certius scimus, ipsum facturum esse; cum exemplum extet Christi Domini, qui *Joann. 17.* se clarificari petiit, uti recte docet S. Thomas 3. *part. quæst. 83. art. 4. ad septimum*, ibique Magister Porrecta in *comment.*, & Magister Soto in 4. *sens. dist. 13. quæst. 2. art. 4. ad septimum*. Præclara quoque sententia S. Gregorii Magni *tom. 2. oper. lib. 1. dialog. cap. 8.* ubi hæc habet: *Ea quæ sancti viri orando efficiunt, ita prædestinata sunt, ut precibus obtineantur ... quatenus postulando mereantur accipere quod eis omnipotens Deus ante sæcula disposuit donare.* Præterquamquod, sicuti etiam nunc ante Canonizationes summi Pontifices preces effundunt atque adeo indicunt, & nemo tamen est, qui ex his precibus putet, eos dubitare de sua infallibilitate; quocirca ad rem bene subdit P. Ricciolius in opere sepe cit. *lib. 1. cap. 3. num. 6.* *Neque huiusmodi fiduciæ obstant orationes, jejunia, & elemosyna præmitti a Pontificibus solita, ne Altissimus Ecclesiam suam modo aliquo in hoc Canonizationis officio errare permittat; sicut non obstant infallibilitati absolutionis, aut consecrationis Hostia preces præmitti solita a legitimo Sacerdote, si forma debita supra materiam idoneam utatur, nec oratio repugnat fiduciæ de infallibili impetratione, aut fiduciæ orationi.* Ita ex precatione supra recensita inferri minime poterit, Pontifices dicto modo orantes aliquam de sua infallibilitate dubitationem habuisse. Tandem, quod recte introducta fuerit consuetudo, ut Pontifices ab eadem precatione instar protestationis abstinere, demonstratur, tum quia ea poterat esse offendiculi occasio iis, qui indolem & naturam ejusdem protestationis ignorabant; tum etiam quia, si summi Pontifices preces fundunt & publicas pariter preces indicunt pro Divina ope impetranda,

petranda, utque Deus suum lumen ipsis infundat, ne in errorem labantur; protestatio de voluntate non inducendi errorem in Ecclesiam, utpote virtualiter, ut dicitur, in prece contenta, est impune ac prudenter omissa; idque eo magis, cum plebs Fidelium hodie satis edocta sit de cultu qui Deo, & de cultu qui Sanctis præstandus est.

21 Sed his etiam præteritis, ponamus denique protestationem, de qua huc usque locuti sumus, minime precationem fuisse, sed veram animi summi Pontificis declarationem, qua nempe profiteretur ipse, canonizando Beatum, se non intendere, aliquem errorem in Ecclesiam inducere; adhuc tamen non apparet, quomodo ex hoc actu inferri possit, summos Pontifices admisisse, se in actu Canonizationis esse posse errori obnoxios. Non enim summi ipsi Pontifices solum emittebant dictam protestationem, verum etiam ad ulteriora progrediebantur: hoc est adhibitis licet omnibus humanis diligentibus, indictis precibus, emissis quoque per semetiplos ad Deum obsecrationibus, ut quemcumque dignaretur avertere ab actu errorem, suam quidem adhuc per actum publicum humanam patefaciebant imbecillitatem; & se tamquam homines privataeque personas, citra Spiritus Sancti præsentiam, falli posse, publice protestabantur (quatenus, inquam, protestatio accipienda sit eo modo, quo ab opponentibus explicatur) ut sic videlicet per humilitatis viam ad prærogativam infallibilitatis a Deo sibi in actu universam Ecclesiam respiciente promissæ ascendere mererentur, utpote non in semetipsis, sed in præsentia Spiritus Sancti memoratam constituentes infallibilitatem. Sed &, exclusa subinde quacumque formidine, sententiam porro proferebant non conditionalem, verum absolutam, atque ad universam Ecclesiam pertinentem: declarabant quippe, statuebant, definiebant firmiter tenendum, Beatos, qui a se canonizabantur, esse reponendos in Sanctorum catalogo, & esse in universa Ecclesia colendos, imposita quoque refragatoribus anathematis poena; uti colligitur ex formulis Canonizationum plene cumulatis a P. Ricciolio in opere saepe citato lib. 1. cap. 2. & a nobis pariter alias relatis. Uno verbo, oppositum argumentum ex protestatione deductum momento non careret, si Pontifices, emissa protestatione, ac protestationi ipsi inhærentes sententiam deinde tulissent conditionalem: sed secus est, quando, respectu habito ad propriam humanam imbecillitatem, protestationem emiserunt; habito autem ad præsentiam Spiritus Sancti, sententiam tulerunt. Nimirum hoc est illud, quod expresse docet S. Thomas in cit. quodlib. 9. quæst. 7. art. 16. verbis supra relatis, & hic iterum referendis: Dicendum, quod aliquid potest judicari possibile secundum se consideratum, quod relatum ad aliquid extrinsecum impossibile invenitur. Dico ergo, quod iudicium eorum, qui præsumt Ecclesia, potest errare in quibuslibet, si persona eorum tantum respiciantur. Si vero consideretur Divina providentia, quæ Ecclesiam suam Spiritu Sancto dirigit, ut non erret, sicut ipse promissit Joann. 14. quod Spiritus adveniens doceret omnem veritatem, de necessariis scilicet ad salutem;

certum

certum est, quod iudicium Ecclesie universalis errare in his, quæ ad Fidem pertineant, impossibile est. Unde magis est standum sententia Papæ, ad quem pertinet determinare de Fide, quam in iudicio proferri, quam quorumlibet sapientium hominum in Scripturis opinioni. Concludamus itaque, protestationem infallibilitati non obesse, aut quia inducta est, ut error a populo averteretur; aut quia fuit precatio ad Deum, ne sineret, Pontificem canonizantem labi in errorem; vel demum quia sententia definitiva respectum habet ad Spiritus Sancti assistentiam, & protestatio præcedens, quatenus habenda esset pro vera & legali protestatione, respectum habet ad humanam Romani Pontificis tamquam privatæ personæ imbecillitatem. Præter supra relata, perpenſa memorata protestatione temerarie, uti diximus, opposita a Launojo, ad rem subdit bon. mem. Matthæus Petitdidier in *tract. Theol. de Papæ infallib. cap. 15. §. 3.* verba, quæ ex Gallico idiomate in Latinum translata sonant, ut sequitur: Doctor Launojus nobis opponit, quod quidam summus Pontifex ante Canonizationem cujusdam Sancti protestatus est, quod in hoc actu non prætendebat aliquid facere contra Fidem; ex quo infert, quod hic Papa se recognovit errori subiectum &c. Sed in eo, quod attinet ad hoc caput, videre facile est, quod ex declaratione a Papa emissâ, quod videlicet non intendebat aliquid facere contra Fidem, non recte infertur, quod se capacem reputabat proponendi universæ Ecclesie aliquem errorem, tamquam aliquem Fidei articulum: quemadmodum recte concludi non deberet, Concilium œcumenicum posse universæ Ecclesie aliquem errorem proponere, tamquam Fidei articulum, ex quo dixisset, se non prætendere aliquid statuere contra Fidem. In Conciliis generalibus similes preces funduntur: Non nos pasiaris perturbatores esse iustitiæ, qui summam diligis aequitatem, ut in sinistram nos ignorantia non trahas: quemadmodum legitur apud Cardinalem Jacobum Cajetanum in Ordine, qui observatur in celebratione Concilii generalis, (ex ejus Ordine Romano apud Mabillon. tom. 2. mus. Ital. pag. 394. ut & inter Concilia Harduini tom. 10. col. 21.) habetur, Cardinalem de Monte Præsidentem Concilii Tridentini prædictis verbis orasse. Ideo, sicuti asserentes, Concilium generale esse infallibile, etiam citra Romani Pontificis auctoritatem, non tamen putant, ex prece modo dicta ullum infallibilitati Concilii illatum præjudicium; ita id ipsum concedere tenentur in Canonizatione Sanctorum, subsistere videlicet summi Pontificis infallibilitatem, etiamsi ante Canonizationem Pontifices oraverint, & orent, ne in errorem perducantur: quod a nobis postremo loco additum est, ut quatenus alicui ex ceteris protestationis declarationibus ea magis placeat, quæ docet protestationem nihil aliud fuisse, quam precationem, possit hoc ipsum ulteriori argumento comprobare. De prædicta protestatione aliqua habentur in *scrutinio doctrinarum cap. 30. art. 14. num. 61.* P. Joannis Antonii a Panormo, nobis, dum viveret, amicitia juncti, & Consultoris Congregationis sacrorum rituum, quæ concordant cum his quæ in superioribus de eadem protestatione dicta sunt.

## CAPUT XLV.

*An sit de Fide, summum Pontificem errare non posse in Canonizatione Sanctorum; & an de Fide sit, Canonizatum esse Sanctum.*

**I**uxta adducta in superioribus communis est Theologorum, & juris Pontificii peritorum sententia summum Pontificem errare non posse in Canonizatione Sanctorum; sed de eo, quod attinet ad propositam controversiam, an hoc videlicet de Fide sit, & an de Fide sit, canonizatum a Papa esse Sanctum, inter eosdem adhuc disputatur. Quocirca Sylvius *contro. lib. 4. quest. 2. ars. 14. pag. 367.* hæc habet: *Ceterum, qua certitudine sit tenendum, Pontificem non posse in Canonizatione Sanctorum errare, non prorsus liquet.* Nonnulli enim, qui tractatus ediderunt de Canonizatione Sanctorum, nedum strenue pugnant pro *infallibilitate* Papæ, sed eam etiam ad Fidem referunt; Contelorius nimirum, Rocca, Castellanus, Ceparius, Auctor tractatus de Canonizatione ad Cardinalem Montis Regalis. Alii contra admittunt quidem, ponuntque *infallibilitatem*, at putant tamen, id non esse de Fide, nec pariter esse de Fide, canonizatum esse Sanctum. Poterit id nempe unusquisque facile deprehendere, si Theologorum, & juris Canonici Interpretum auctoritates antea allegatas *infallibilitati* ipsi faventes in ipso, ut dicitur, fonte recognoscere velit: quamquam & nos aliquas hic referemus, eum qui plures quærat, ad loca supra indicata remittentes.

2 Negant itaque, hæc esse de Fide, Joannes a S. Thoma in 2. 2. D. Thoma tom. unic. disp. 9. art. 2. pag. 158. quo in loco quærens, *utrum in Canonizatione, et Beatificatione Sanctorum summus Pontifex errare possit*, relatis circa hoc variis sententiis, hanc addit: *Tertia sententia media est, esse quidem certum, Papam errare non posse in Canonizatione Sanctorum, & esse dignum censura, qui oppositum diceret; non tamen esset hæreticus, sed temerarius, impius, et scandalosus, immo et proximus errori, aut sapiens hæresim.* Hæc sententia communior est apud Recentiores &c. Quibus utique idem suffragatur Joannes docens, determinationem de æterna gloria alicujus personæ applicate & peculiariter non esse determinationem doctrinæ; & ideo non esse directæ de Fide, sed reductivæ.

3 Antonius Cordubensis in *questionario Theologico lib. 4. qu. 12. pag. 317.* Non certo hæreticum, aut sapiens hæresim, sed valde probabiliter hæreticum, aut certe impium, et contra probabilitatem, et pietatem Fidei est dicere, quod Ecclesia, idest Papa, vel Concilium generale, in Canonizatione Sanctorum errare potest.

4 Ludovicus a Paramo de origine, et progressu Officii S. Inquisit. lib. 3. quest. 5. num. 184. pag. 679. Non haberet plus auctoritatis definitio illa, quam habet Canonizatio Sancti, in qua quamvis sit certum, non posse Papam errare, non tamen est adeo certum, ut sit de Fide.



5 Franciscus Suarez de tripl. virt. Theol. de Fide disp. 5. sect. 8. num. 8. pag. 104. Non licet Fidelibus dubitare de gloria Sancti canonizati; id enim sub præcipua obligatione præcipiunt Pontifices in ipsa Canonizatione: ergo oportet, ut illi præcepto non possint subesse error; alias deficeret Deus in re maxime necessaria Ecclesia, quod est contra providentiam, & promissiones ejus: & ideo, quamvis hac illatio non sit de Fide, censeo, esse satis certam, & contrariam esse impiam ac temerariam.

6 Gabriel Vasquez in 1. 2. tom. 2. disput. 165. cap. 9. num. 94. pag. 147. Ut definiat (summus nempe Pontifex) hunc hominem, aut illum sancte vixisse, non habet principium aliquod de Fide, nempe aut Scripturam, aut Traditionem, sed solum humanum testimonium; & ideo Pontifex non censetur de Fide definire, quamvis habeat assistentiam Spiritus Sancti, ne erret; ac proinde temerarium est negare id, quod ipse in Canonizatione decernit.

7 Rabaudi exercit. Theol. tom. 2. exercit. 3. cap. 1. n. 2. proposit. 2. pag. 148. Non est per se, & immediate de Fide illum, quem Ecclesia canonizavit, esse in gloria.

8 Dominicus a SS. Trinitate tract. de summo Pontifice cap. 18. concl. 6. pag. 494. (tom. 10. biblioth. Pontif.) Non est de Fide, quod summus Pontifex, generalique cum illo Concilia gaudeant privilegio infallibilitatis in Canonizatione Sanctorum, ita ut, qui hæc negaret, statim pro heretico habendus esset. Idque probat pag. 495. quia, si Canonizatio Sanctorum .... non est materia ex Fide definibilis, non pertinet ad Fidem, quod Ecclesia, vel summus Pontifex in ea definienda sit infallibilis. Canonizationem autem Sanctorum non esse materiam ex Fide definibilem, variis argumentis evincit.

9 Vincentius Ferre tract. de Fide quest. 13. §. 5. pag. 415. (tom. 20. biblioth. Pontif.) Dico tertio: non est immediate de Fide, hunc hominem canonizatum esse vere Sanctum & in celo regnare.

10 Dominicus Maria Marchesius de capite visibili Ecclesia dub. 4. §. 2. pag. 741. (tom. 9. biblioth. Pontif.) Sequitur, non solum istam propositionem, Sanctus N. canonizatus est in cælo, non esse de Fide; sed nec etiam istam, Sanctus rite canonizatus est in cælo.

11 Dominicus Bannes in 2. 2. S. Thome quest. 1. art. 10. §. Dubitatur præterea septimò: an summus Pontifex possit in Canonizatione Sanctorum errare .... Sed dicit aliquis: Quare non damnamus hæresim sic asserentes? Respondetur; nos sequi in hac censura communem Theologorum sententiam, præsertim D. Thome in quodlibet. 9. Verumtamen, quia proximis temporibus fuerunt Heretici, qui Ecclesiam in Sanctis canonizandis irriterent, atque negarent ejus auctoritatem & infallibilitatem, propterea recentiores Theologi merito decernunt, hæresim sapere Lutheranorum, asserere; Ecclesiam in alicujus Sancti Canonizatione falsam fuisse, etiamsi auctoritas canonizandi non negetur.

12 Salmanticenses in cursu Theolog. tom. 7. tract. 17. de Fide disput. 4. de Rom. Pontifice dub. 2. §. 3. pag. 198. Hæc propositio; Omnis homo rite canonizatus, & acceptus ab Ecclesia in numerum Sanctorum est Sanctus & existit in gloria  
(ex

## 448 DE SERVORUM DEI BEATIFICATIONE

(ex qua subjuncta Canonizatione, & acceptatione Ecclesie insertur, Sanctum Isidorum esse vere Sanctum & existere in gloria) non est immediate de Fide.

13 Theophilus Raynaudus in heteroclitis spiritualibus sect. 3. punct. 1. pag. 249. tom. 15. Quanta porro sit certitudo, qua his Ecclesiasticis in sortem Sanctorum allectionibus ingeneratur, sub iudice lis est, praesertim quoad maxime solemnem conscriptionem, sive Canonizationem .... Meam hac de re sententiam expressi in epilegomenis ad coronam auream subnot. 2. veris. 8. ubi negavi, esse Divina Fide certum, quod qui Canonismo honestatus est, sit celo illatus & Sanctus.

14 Contra, de Fide esse, summum Pontificem falli non posse in Canonizatione Sanctorum, & de Fide esse, Canonizatum esse Sanctum, latissime docent & probant Angelus Maria Verricellus in quest. moral. & legal. tract. 8. quest. 24. pag. 404. Respondetur affirmative, nempe de Fide credendam esse gloriam Sancti Canonizati; qui & id pluribus persequitur.

15 Lucas Castellinus de certit. glor. SS. cap. 3. punct. 48. pag. 210. Canonizatio Sanctorum communeratur inter illa, quae Fidei sunt; quod etiam tradit cap. 4. punct. 3. 4. & seq. pag. 252. & seq.

16 Rodericus de Arriaga in disp. Theol. in 2. 2. D. Thoma tract. de Fide disput. 9. sect. 5. num. 27. pag. 137. Definitio illa de sanctitate Henrici, seu Canonizatio illius est de Fide. Igitur ex his omnibus modis loquendi tot Pontificum colligo (quidquid aliqui in contrarium dicant) Papam in Canonizationibus non solum errare non posse, sed id esse de Fide.

17 Adamus Tannerus Theolog. scholast. tom. 3. disput. 1. de Fide quest. 4. dub. 7. num. 290. col. 284. Sed & firmiter credendum, Canonizationem Sanctorum a Pontifice factam esse infallibilem, ita ut sit de Fide, vere Sanctos, ac Beatos esse eos, qui a summo Pontifice canonizati sunt.

18 Aloysius Turrrianus in 2. 2. D. Thoma disput. 16. dub. 3. Tertio dicendum est, probabilem esse sententiam asserentium, de Fide esse, Pontificem non posse errare in Canonizatione Sanctorum.

19 Gregorius de Valentia commentariorum Theolog. tom. 3. disput. 1. quest. 1. punct. 7. §. 41. col. 253. Quamvis enim testimonia, quae pro alicujus hominis sanctitate afferuntur, sint humana, idcircoque natura sua fallibilia; tamen posito, quod Pontifex illis inducatur tandem ad pronuntiandum, quempiam Sanctum, atque Beatum jam esse, certa Fide credendum est, testimonia illa (quatenus in genere saltem probant, pie atque sancte quemquam ex hac vita excessisse) vera esse, & hominem ejusmodi ex eorum esse numero, quos per revelationes Scripturae generales in communi constat, Divina gratiae beneficio consequi aeternae vitae Beatitudinem &c.

20 Alphonsus a Castro de justa Haretic. punis. cap. 6. tom. 2. col. 45. Sanctorum Canonizatio, ut B. Thomas docet, res est quodammodo ad Fidem spectans. Cui B. Thoma sententia quodammodo favent verba, quae summus Pontifex dicit in Canonizatione alicujus Sancti, quae posita sunt in libro sacrarum Ecclesiae caeremoniarum, & sunt, quae sequuntur: Ad honorem Sanctae, & individuae Trinitatis &c. Haec verba dicit Papa, cum aliquem canonizat. In quibus id est adver-

tendum,

tendum, quod ait, talem Canonizationem fieri ad exaltationem Fidei Catholicae.

21 Sed & undique petitis argumentis hanc ipsam sententiam tuetur Ricciolius in saepe cit. oper. & cl. mem. Cardinalis de Lauræa in 3. lib. sent. tom. 3. disput. 6. art. 3. totus est in probando, inter materialia Fidei Theologicae objecta reponi ac reputari debere, quod Sancti ab Ecclesia canonizati, id est declarati tales, nempe amici Dei, eum videntes, eoque fruentes, vere sint tales: & Maurus Theol. tom. 2. lib. 7. quest. 140. num. 17. docet, de Fide esse, eos, qui sunt canonizati, esse Sanctos atque in æternum beatitudine fructuros.

22 Fundamentum porro primæ sententiæ constituitur in auctoritate D. Thomæ in saepe cit. quodlib. 9. quest. 7. art. 16. ubi, postquam docuit, non posse summum Pontificem errare in his, quæ attinent ad Fidem; posse autem errare in aliis sententiis, quæ ad peculiaria facta pertinent, sic tandem, ut alibi retulimus, de Canonizatione Sanctorum concludit: *Canonizatio vero Sanctorum medium est inter hæc duo; quia tamen honor, quem Sanctis exhibemus, quadam professio Fidei est, qua Sanctorum gloriam credimus, pie credendum est, quod nec etiam in his iudicium Ecclesia errare possit*. Rursus idem S. Doctor 2. 2. quest. 11. art. 2. habet, hæreticum formaliter dici, qui negat aliquid directe pertinens ad Fidem; hæreticum autem virtualiter & argutive esse, qui negat aliquid, quod evidenter inferitur ex Fidei principiis. Pariter 2. 2. quest. 1. art. 1. tradit, Fidem non assentiri alicui, nisi quia est a Deo revelatum. Demum 1. part. quest. 1. art. 8. ait, nostram Fidem revelationi Apostolis, & Prophetis factæ inniti, qui canonicos Libros scripserunt, minime vero revelationi, si quæ aliis Doctoribus facta sit. Quocirca, si juxta doctrinam Angelici Præceptoris Canonizatio est quid medium inter res Fidei, & res pertinentes ad causas particulares; si tantum pie creditur, summum Pontificem esse in Canonizatione infallibilem; si secundum ipsum ratio formalis, seu objectum quo Fidei est prima veritas in dicendo, auctoritas nempe Dei dicentis; si denique pro Fide non sufficit quæcumque revelatio, sed necessaria est revelatio Apostolis, & Prophetis facta; concludunt primi, de Fide juxta doctrinam S. Thomæ non esse, quod Papa sit infallibilis in Canonizatione, & quod Canonizati sint Sancti, hoc est visione beatifica fruantes; cum nec Deus revelaverit, Beatum a Papa Canonizatum esse in æterna gloria, nec id contineatur in Divinis Scripturis, nec in Traditione: ita ut declaratio a summo Pontifice facta in Canonizatione, talem quemdam esse Sanctum & colendum in universa Ecclesia, nunquam directe, sed tantum *reductivè* ad Fidem pertineat propter connexionem, quam habet cum propositionibus illis, quibus, Divina Scriptura duce, Sanctorum gloriam profitemur; quibusque, Fide duce, credimus, esse in Ecclesia potestatem Sanctos canonizandi. In quo rerum themate, inquirunt, haud immunis a Theologica censura censendus est, qui negat Papæ infallibilitatem in Canonizatione, & multo minus, qui Sanctum esse negat eum, qui a Papa canonizatus est; at formalis ta-

## 450 DE SERVORUM DEI BEATIFICATIONE

men hæreticus non erit, cum ad hæresim formalem constituendam necesse sit, ut error directe tendat contra Fidem; ut constat ex doctrina Divi Thomæ supra citata, cum qua concordat Textus in *cap. super quibusdam: de verb. significat. & in can. Hæretici 24. quest. 1.*

23 Addunt hanc eandem sententiam sequentes, ea quæ nec implicite, nec *virtualiter* sunt revelata, ita ut certo & evidenter valeant erui ex propositionibus proxime revelatis, non posse nunc ab Ecclesia reponi inter dogmata Fidei. Cum autem declaratio sanctitatis alicujus, quam facit summus Pontifex in solemni Canonizatione, pendeat ex syllogismo, cujus minor propositio, quod ille videlicet sancte obierit, ex humanis tantum testibus comperta est Pontifici; proinde inferunt, alicujus Sancti peculiariter sumptam Canonizationem posse tamquam non certam ex Fide proponi; non tamen hinc posse deduci, quod liceat alicui impune cultum negare Sancto a summo Pontifice in album Sanctorum relato, vel quod id pugnet cum Romani Pontificis *infallibilitate* communiter in Canonizatione recepta, & cum speciali Spiritus Sancti præsentia ea in re universam Ecclesiam respiciente: tum quia, sicuti nequit quis impune negare cultum patriæ Holitiæ per sacerdotem consecratæ, & quæ in sacrificio Missæ in altum tollitur, licet de Fide non sit, Holitiam, quæ colenda proponitur, consecratam esse & Corpus Christi continere; ita neque quis poterit impune negare cultum dulciæ Sancto canonizato, quamvis de Fide non sit, eum esse Sanctum atque beatifica visione fruentem: tum quia, etsi libenter admittatur, summum Pontificem in rebus Fidei & morum esse *infallibilem*, atque *infallibilitatem* proficisci ex afflatu Spiritus Sancti; non omnia tamen, quæ declarat in materia Fidei, & cum præsentia Spiritus Sancti, *infallibilia* licet sint, ita dici debent articuli Fidei, ut, qui nonnihîl negaverit, hæreticus continuo sit censendus. Propositionum, instant, damnatarum non una eademque est censura, cum varii videlicet sint hujus gradus, & variæ notæ. Quamobrem in Concilio Constantiensi, examinatis erroribus VVicleffi, & Joannis Hus, nonnulli fuerunt castigati tamquam manifesti hæretici; nonnulli tamquam erronei, nonnulli sicuti scandalum præbentes, ac blasphemî, alii ut pias aures offendentes, alii veluti temerarii ac seditiosi; & in Constitutionibus pariter S. Pii V. & Gregorii XIII. latis contra Michaellem Bajum nonnullæ ex propositionibus ejusdem designantur tamquam suspectæ, aliæ vero in bulla *Unigenitus* sancti Clementis XI. captiosæ nuncupantur. Nempe, cum hæresis nota inuratur propositioni, quæ proxime adversatur Fidei Catholicæ item proxime revelatæ, uti loquitur schola, & late prosequuntur Salmantic. *tract. 17. de Fide disput. 9. de infidelitate dub. 4. §. 2.* vel hæresis sit ejus, qui Fidem professus pertinacem habet errorem ei veritati manifeste contrarium, quæ Catholica certo sit, juxta ea, quæ habentur apud Melchiorum Canum *de loc. Theol. lib. 12. cap. 7. pag. 357.* Ex his principiis quemadmodum ostenditur, unam eandemque propositionem particularem in materia dogmat-

tis,

tis, aut morum a Pontifice definitam semper esse *infallibilem*, non autem semper esse de Fide; ita demonstrari creditur, sententiam negantem, pariter esse de Fide, hunc, aut illum Canonizatum esse re vera Sanctum, Divinaque visione frucentem, minime repugnare summi Pontificis *infallibilitati*, sed & bene congruere cum præsentia Spiritus Sancti eum dirigentis in negotio tam arduo *reductivè* ad Fidem pertinente, atque universam Ecclesiam respiciente.

24 Fundamentum vero eorum, qui docent oppositum, esse videlicet de Fide, quod summus Pontifex sit *infallibilis* in Canonizatione Sanctorum, quodque ab eodem Canonizatus sit Sanctus, Divinaque visione fruatur, sequentibus constat argumentis. Primo siquidem dicunt, hæreticum esse, qui assereret, Pontificem in condendis legibus toti Ecclesiæ communibus errare posse: cumque Pontifex, aliquem canonizando, universæ Ecclesiæ præcipiat, ut eum colat tamquam Sanctum atque in cælo regnantem, hinc concludunt & volunt, ut qui negat, Pontificem esse *infallibilem* in Canonizatione Sanctorum, hæreticus sit. Addunt, posse Pontificem, & Ecclesiam definire tamquam certa Fide tenendum id, quod inferatur ex duabus propositionibus præmissis, quarum altera de Fide sit, altera autem *moraliter* evidens: ideoque, cum sit de Fide, eum, qui in observantia legis & mandatorum perseveraverit, saluum fore æternæque fructuum beatitudine: ex processibus autem factis in Canonizationibus evidens sit *moraliter*, Canonizandum perseverasse usque in finem in observantia mandatorum, virtutesque morales exercuisse in gradu heroico, necnon miraculis post mortem claruisse; subdunt, summos ergo Pontifices, postquam ex his duabus præmissis deduxerunt, Canonizandos esse Sanctos æternæque beatitudine fruentes, bene potuisse definire, id certa Fide tenendum esse: prout re vera definivisse dicendum est, si ponderentur Canonizationum bullæ, in quibus dixerunt, & dicunt & decernunt, Canonizatum esse Sanctum, idque fideliter ac firmiter esse tenendum. Ad ulteriora hinc progredientes, admittunt utique id, quod a Deo revelatum non est, saltem implicite, esse non posse Fidei objectum; sed & docent, in sacra Scriptura delineatas esse qualitates seu virtutes eorum, qui salvandi sunt & cum eo regnaturi, ut habetur *Matth. 5. vers. 19. item cap. 7. & cap. 12. & rursus Matth. 19. vers. 17. & vers. 29. & cap. 24. vers. 46.* tum *Joann. 12. vers. 25. & iterum Joann. 17. quin & psalm. 14.* David sibi metipsum sic interroganti, *Domine, quis habitabit in tabernaculo tuo, aut quis requiescet in monte sancto tuo?* sibi inquam, ex Spiritus Divini afflatu hæc respondet: *Qui ingreditur sine macula, & operatur justitiam; qui loquitur veritatem in corde suo; qui non egit dolum in lingua sua, nec fecit proximo suo malum, & opprobrium non accepit adversus proximos suos; qui jurat proximo suo, & non decipit; qui pecuniam suam non dedit ad usuram, & munera super innocentem non accepit: qui facit hæc, non movebitur in æternum.* Porro contendunt, per hæc Deum implicite revelasse omnes, qui salvandi sunt, eos videlicet, qui conditio-

nibus illis, virtutibus nempe, præditi fuerint usque in finem. Unde deum argumentantur, summum Pontificem, positis diligentis & probationibus virtutum ac miraculorum alicujus servi Dei jam defuncti, judicantem, eum esse unum ex illis implicate revelatis salvandis & cum Christo regnaturis, atque adeo salvatum & regnantem esse, non uti judicio pure naturali, & ratiocinatione mere Theologica; sed, cum in hoc judicio formando intendat, eum præceptive proponere in universa Ecclesia colendum, specialem habere influxum seu illuminationem Spiritus Sancti, quæ solet instinctus seu afflatus appellari; & certo atque *infallibiliter* cognoscere, eundem Dei servum fuisse virtutibus præditum, & illis miraculis claruisse, quæ ejus intercessione facta probantur, ideoque unum ex his, quos regnatorios Deus impliciter revelaverat. Volunt itaque sic sentientes, majorem propositionem esse revelatam, minorem ex ratiocinatione Theologica deduci, ejusque veritatem cognosci a Papa per instinctum Spiritus Sancti; & proinde conclusionem, ut dependentem a majori explicate revelata, atque a minori per instinctum inspirata, dici posse & debere objectum Fidei.

25 Legi de his potest Cardinalis de Lauræa *loc. cit.* ubi tandem post plura ita concludit: *Ego non quæro, an sit de Fide, quod Papa non possit errare in Canonizatione, sed quæro, an sit de Fide, quod Canonizatus sit Sanctus; & dico esse; & ipsimet S. Thomas, & discipuli, aliique sequentes id etiam affirmare videntur: quia, licet negent, esse de Fide, quod Papa non possit in Canonizatione errare, tamen consentunt, quod honorare Sanctum canonizatum est confessio Fidei, qua creditur gloria illius Sancti. Ergo, quod sit Sanctus & in gloria, etiam per eos est objectum Fidei; & hac est mea controversia. Si autem prefati Doctores dignarentur considerare hoc aliud motivum, quod ego forte primus adduxi, quod scilicet Papa canonizans non utitur solo instinctu, tamquam principaliori causa inducente ad canonizandum & proponendum Ecclesie Canonizatum, ut debito obsequio & honore veneretur, habeaturque pro Sancto, sed utatur Theologico discursu habente majorem propositionem revelatam, scilicet, Beati mites, qui persecutionem patiuntur &c. & Ubi ego sum, illic erit & minister meus; minorem vero naturalem, nempe cognitionem virtutum & miraculorum testamentum, esse unum ex illis, quos in iis universalibus revelavit Deus; cujus quidem minoris veritatem Papa cognoscit per instinctum: conclusio, ut dependens a majori explicate revelata, & a minori revelata seu inspirata per instinctum, majori ratione dici potest & debet objectum Fidei, quam si dicatur, Papam uti solo instinctu, & non aliqua alia propositione revelata, ut huc usque visi sunt loqui Auctores; & tamen dixerunt, de Fide esse, quod Canonizatus sit Sanctus, & sit confessio Fidei eum venerari.*

26 Hæc nimirum sunt fundamenta eorum, qui putant, esse de Fide, quod summus Pontifex sit *infallibilis* in Canonizatione Sanctorum; quodque de Fide sit, Canonizatum esse Sanctum Deique visione fruentem; etiam eum ipsi etiam bene cognoscant, nullam de his latam hactenus fuisse definitivam

nitivam sententiam, multosque Doctores Catholicos ac pios in contrariam abire opinionem, hæreticum idcirco formalem negant futurum eum, qui diceret, de Fide non esse aut Papam in Canonizatione *infallibilem*, aut Canonizatum ab eo esse Sanctum atque in cælis cum Christo regnare. Fagnanus nempe in 2. lib. *Decretal. ad cap. Venerabili: de testib.* latissime probat, Ecclesiam in Canonizatione Sanctorum errare non posse; sed & n. 39. hæc habet: *Tertia opinio asserit ita credendum ex necessitate salutis, & sic damnat primam opinionem tamquam hæreticam* (eam videlicet, quæ admittit, Ecclesiam errare posse in Canonizatione Sanctorum) *quod plane durum videtur, cum habeat sectatores primarios Canonistas, & doctissimum Cajetanum, & articulus nondum sit ab Ecclesia definitus.* Quin & ipsemet P. Ricciolius, postquam in sepe cit. opere nedum *infallibilitatem* summi Pontificis in canonizando, verum etiam de Fide esse, Canonizatum ab eo esse Sanctum, conquisitis undique argumentis demonstravit, tandem lib. 1. cap. 6. num. 6. sic scribit: *Quaritur sexto, an foret hæreticus, qui negaret actu positivo sanctitatem persona a Sede Apostolica canonizata? Respondeo negative: quia tolerantur adhuc in Ecclesia Doctores illi, qui juxta opinionem cap. 1. relatam negant, esse infallibilem absolute definitionem Papa in Canonizatione Sanctorum; & relati in secunda opinione ita infallibilem putant, ut non putent, aut non dicant, esse de Fide.*

27 Videtur igitur nobis utraque opinio in sua probabilitate esse relinquenda, usquequo Sedis Apostolicæ judicium prodeat: quia scimus quidem, de Fide esse, quod Sancti sunt colendi, uti definitum est in Conciliis generalibus *Chalcedonens.*, *Nican.* II. *actio.* 6., & *Tridentin. sessio.* 25. scimus item, de Fide esse, venerationem eorum Reliquiis esse exhibendam; scimus, sententiam a summo Pontifice prolatam in Canonizatione Sanctorum esse definitivam, necnon ad universam Ecclesiam pertinere, & errori juxta superius dicta esse non posse obnoxiam ob specialem Spiritus Sancti afflatum; insuper scimus, in Concilio Constantiensi (tom. 8. collect. *Hard. col.* 301.) inter ceteros Joannis VVicleffi errores hunc etiam condemnatum fuisse, *Augustinus, Benedictus, Bernardus damnati sunt, nisi poenituerint de hoc, quod habuerunt possessiones, & instituerunt, & intraverunt Religiones, & sic a Papa usque ad minimum Religiosum omnes sunt hæretici*; scimus denique, anathematis poenam impositam illis fuisse, qui declarationi sanctitatis, seu Canonizationi alicujus refragarentur, veluti legitur in bulla Canonizationis B. Udalrici (nov. cod. Canoniz. pag. 2.) expedita a Joanne XV. in Concilio Lateranensi: *Si quis interea, quod non credimus, temerario ausu contra ea, quæ ab hac nostra auctoritate pie ac firmiter per hoc privilegium constituta sunt, contraire tentaverit, vel hæc, quæ a Nobis ad laudem Dei pro reverentia jam dicti Episcopi statuta sunt, refragari, aut in quoquam transgredi sciat, se auctoritate B. Petri Principis Apostolorum, cujus vel immeriti vices agimus, anathematis vinculo innodatum.* Quæ quidem anathematis poena Hæreticorum propria esse videtur, ut habetur in cap. *Cum Christus*, & in cap. *Ad abolen-*

*abolendam: de Hæreticis.* Neque solum hæc omnia scimus, verum etiam libentissime admittimus, ea non parum prodesse sententiæ docenti, esse de Fide, quod Canonizatus sit Sanctus & sit in æterna gloria: attamen, cum agatur de dogmate Fidei statuendo, Sedis Apostolicæ matris & magistræ ceterarum Ecclesiarum, summique Pontificis, ad quem privative pertinent Fidei definitiones, iudicium expectandum esse censemus, antequam hæresis nota inuratur oppositam sententiam sequentibus. Eo autem magis id censemus, cum tot viri docti & Pontificiæ auctoritatis intrepidi assertores, atque adeo *infallibilitatis* summi Pontificis nedum in Fidei ac morum definitionibus, verum etiam in ipso Canonizationis actu defensores, Sanctorum quidem cultum, Reliquiarumque venerationem inter Fidei dogmata recenseant; sed insimul asserant, de Fide non esse, hunc, aut illum Canonizatum esse Sanctum; pariterque de Fide non esse, huic, aut illi Reliquiæ venerationem esse exhibendam: fateantur sane corde & animo, obtemperandum esse sententiæ Papæ definienti, hunc, aut illum esse Sanctum; sed una sustineant, eandem definitionem non proxime, verum *reductivè* tantum ad Fidem spectare: respuant profecto damnatum errorem VVicleffi, sed hæresim ejus rejiciant in causas, quas affert: summos tandem Pontifices dicant, recte potuisse & posse anathematis poenam imponere debitam negantibus obedientiam Canonizationis bullæ, absque eo quod hinc inferatur hæresis; cum pro poena anathematis alicui infligenda satis sit, si is proferat propositionem male sonantem, pias aures offendentem, blasphemam, de hæresi suspectam. Quocirca videmus, san. mem. Clementem XI. in famigerata bulla *Unigenitus* (*Bullar. nov. to. 10. par. 1.*) per quam centum & unam propositiones condemnavit, etsi non omnes tamquam hæreticas, sed aliquas tamquam de hæresi suspectas, schismati faventes, erroneas, & hæresi proximas, anathematis tamen poena omnes infectatum fuisse sequentibus verbis: *Mandantes omnibus utriusque sexus Christianis Fidelibus, ne de dictis propositionibus sentire, docere, ac predicare aliter præsumant, quam in hac eadem nostra Constitutione continetur, ita ut quicumque illas, vel illarum aliquam, conjunctim, vel divisim docuerit, defenderit, ediderit, aut de eis etiam disputative, publice, aut privatim tractaverit, nisi forsitan impugnando, Ecclesiasticis censuris, aliisque contra similia perpetrantes a jure statutis poenis ipso facto absque alia declaratione subjaceat.*

23 Itaque, ut tantæ quæstioni finem denique imponamus; si non hæreticum, temerarium tamen, scandalum toti Ecclesiæ asserentem, in Sanctos injuriosum, faventem Hæreticis negantibus auctoritatem Ecclesiæ in Canonizatione Sanctorum, sapientem hæresim, utpote viam sternentem Infidelibus ad irridendum Fideles, assertorem erroneæ propositionis, & gravissimis poenis obnoxium dicemus eum, qui auderet asserere, Pontificem in hac, aut illa Canonizatione errasse, huncque, aut illum Sanctum ab eo canonizatum non esse cultu dulci colendum; quemadmodum assentiuntur etiam illi, qui docent, de Fide non esse, Papam esse *infallibilem*



bilem in Canonizatione Sanctorum, nec de Fide esse, hunc, aut illum Canonizatum esse Sanctum. Melchior quippe Canus *de loc. Theolog. lib. 5. cap. 5. pag. 165.* sic loquitur: *Qui Fidem in his, hoc est Canonizationibus, Ecclesia detrahunt, eos non hereticos quidem, sed temerarios, impudentes, irreligiosos esse credimus.* Theophilus pariter Raynaudus in *corona aurea Rom. Pontificis pag. 153. tom. 10. oper.* ita fatetur: *Igitur, quod alicui decernatur Canonismus, non facit ex Fide certum, quod talis sit cælo illatus & potius beatitudine. Tamen nemo sanus refragabitur, quin vere pronuntiatum sit a S. Bonaventura, referente Catharino lib. 1. de certa Sanctorum gloria, fore incredibilissimum & horribilissimum ambire de vera beatitate Sancti Canonismo donati & vindicati. Sed aliud est, rem esse de Fide, ita ut absque injuria auctoritatis Divina per Ecclesiam proposita negari non possit. Item Scacch. de notis, & signis sanctitatis sect. 1. cap. 8. pag. 97. ait: Et tanti ponderis est iste Canonizationis actus, ut, qui cultum Canonizato negaret, de hæresi suspectus haberetur. Prætanus demum de ingen. moderat. lib. 1. cap. 17. post multa concludit: Quare a suspitione hæresis ille non absit, atque intolerandam & poenis dignam temeritatem, ac impudentiam præferat, qui rite Calitum catalogo adscriptos explodat, & in iis, ut ajunt, canonizandis Ecclesiam re ipsa, & Romanum Pontificem errasse dicas. Suspicionem hæresis memoravi, non autem hæresim formalem.*

## CAPUT XLVI.

*De Expensis, qua fiunt tum in pertractandis causis Beatificationis, & Canonizationis, tum in Solemnitate, hoc est cum in Beatorum, aut Sanctorum numerum aliqui Servi Dei, vel Beati referuntur.*

**V**ulgatissima est, præsertim vero apud exterarum nationes, querela, Pontificum ærarium divitiis redundare superfluis, eisque ex universi Christiani orbis contributionibus, quas tamquam intolerabiles traducunt, conflatis; atque adeo Romanos dedecere Pontifices tantam divitiarum copiam, quippe quæ ut plurimum in amplificanda nepotum patrimonia nimia profusione erogatur.

Porro facile est re ipsa hisce respondere querelis. Norunt enim omnes, qui Pontificii ærarii notitiam habent, quam id exhaustum sit, & non modico æri alieno ad subveniendum Christianæ Reipublicæ contracto obnoxium. Oporteret sane, id, uti prædicant, divitiis redundare, quemadmodum prolixa oratione prosequitur Aeneas Sylvius in sua apologia ad Martinum Mayer quæ extat in commentariis Jo. Gobbolini ubi post multa sic concludit pag. 742. *Liquet igitur meo judicio, quando id auctoritatibus & rationibus probatum est, Romanam Ecclesiam divitem esse oportere, neque divitias ad voluptatem requiri, sed ad tria tantum; ad statum honestum & dignitatem convenientem tenendum, ad alendos pauperes, & Ecclesias manutenendas, ad coercendos malefactores, qui Fidei sinceritati officiunt.* Inquit nempe Salomon Eccle-

*Ecclesiast. c. 7. 12. & 13. Utilior est sapientia cum divitiis, & magis prodest... sicut enim protegit sapientia, sic protegit pecunia: tum autem sacris Litteris & Regum, & Machabæorum testatum est, in Dei templo magnam auri atque argenti vim, ingentemque thesaurum ad necessitates fuisse reservatum. Cum igitur vis hæc deficiat, nec reditus ex terris summo Pontifici pleno jure subjectis pro eorum onerum complemento, quæ sancta Sedes subit & subire tenetur, sufficiant; quid mirum, si ex bullarum præcipue expeditione, & potissimum quidem in Episcopatum, Abbatiarum, & Beneficiorum collatione, novum aliquod subsidium petatur; quod porro ceteris omnibus redditibus junctum, sic etiam nec divitem facit Romanum Pontificem, nec eum vel ipsi ferendo oneri parem constituit? Decimæ scilicet decimarum in veteri Lege summo Sacerdoti a Levitis debebantur, & benignum pariter subsidium Episcopo indigenti persolvitur; Romano autem Pontifici universæ Ecclesiæ clavum tenenti, & re vera indigenti, minime subveniatur, ne suprema dignitas vilescat, neve, urgente necessitate, cessare cogatur a tot laudabilibus operibus, quæ quotidie præstat pro Christianæ reipublicæ tutela? Hisce tamen devicti argumentis Joannes ipse Gersonius, & Cardinalis Petrus de Alliaco, etsi exactioni Annuorum non admodum favorabiles, ingenue admiservunt, eorum solutionem permanere debere, usquequo alio modo posset Romani Pontificis indigentis subveniri; ut ex eorum testimoniis plene relatis insert Thomassinus *de benef. tom. 3. lib. 2. cap. 58. num. 8. & seqq.* Nec profusa nonnullorum Pontificum erga nepotes liberalitas magis opprobrenda est; aut quia id olim fiebat ut plurimum citra ullum Cameræ Apostolicæ incommodum, per assignationem videlicet Ecclesiasticorum reddituum, ut puta Abbatiarum, Beneficiorum, Romanæque Curie Officiorum, quæ quidem, si non in nepotes, in alios collata fuissent; aut quia san. mem. Innocentius XII. *in Constit. 28. (Bullar. nov. tom. 9.)* statuit, Romanum Pontificem nepotibus, & consanguineis inopia laborantibus debere pro sua conscientia subvenire, eorundemque paupertatem eodem omnino modo sublevare, quo pauperum extraneorum egestati opitulari fas est; præterea taxavit moderatam quantitatem Ecclesiasticorum reddituum per eum nepoti, hujus scilicet meritis ita exigentibus, ad Cardinalitiam dignitatem evehendo assignandam; & hanc utique Constitutionem Innocentianam, quotquot post ipsum Innocentium Pontificatum Romanum adepti sunt, ad amissum observarunt, atque adeo ad effectum perduxerunt.*

3 Hæc nimirum a nobis præmissa sunt, ut cursus præcludatur nonnullorum dictis, qui honestum, & congruum, & quodammodo necessarium existimarent, Beatificationum & Canonizationum expensas ab ærario Pontificio subministrari. Quia vero habentur alij, qui omnes hosce sumptus, licet omnino sint necessarii, ad Romanæ Curie referunt avaritiam; inter quos profecto principem locum meretur execrabilis Apostata Marcus Antonius de Dominis *de Repub. Ecclesiastica lib. 7. cap. 5. num. 58.* ubi ait :

ait: *Eos enim Papa canonizant, hoc est ferme deificant, quos ambitio Romana, quos avaritia deificandos suadet: & paulo post: Quantam vero vim pecunie Canonizatio requirat, novit Curia Romana, ita ut jam nisi magni Principes, aut ample civitates (novit hoc nuper Mediolanum) (sumptibus enim hujus amplissimæ civitatis paulo ante facta fuerat Canonizatio S. Caroli Borromæi) sumptus promoveant. Nec alii defunt, qui existimantes, infinitam prope modum pecuniam in hæc negotia erogari, utilius futurum esse prædicant, si ea argenti & auri summa in acquisitionem alicujus regni Infidelibus subiecti expenderetur, ex quibus utique est Guido Patinus tom. i. *epistol. pag. 603.* Operæ hinc pretium ducimus, in præsentī horum etiam dicta perpendere, ideoque de iis expensis, & earumdemmet ratione sermonem instituere.*

4 Paris de Crassius meus illustris concivis, & celeberrimus olim summi Pontificis cæremoniarum Magister in *suis diariis MSS.* in quibus agit de Canonizatione S. Francisci de Paula, testatur, se summo Pontifici Leoni X. interroganti, cur adeo magna fieret in Canonizationibus expensa, sic respondisse: *Dixi, hanc expensam sic amplam ideo ab Ecclesia, sive a Sede Apostolica, & a Pontificibus non solum tolerari, sed etiam quodammodo præcipi, ut, ex ea quasi impossibili, vel saltem dura, absterreantur Principes, & populi ad petendum, hujusmodi Canonizationes fieri.* Quod ut in Ecclesia Occidentali præsumptuum amplitudine futurum esse indicabat memoratus Paris, idem in Orientali similiter contigit Ecclesia, si fides præstanda sit Paulo Ricauto in *hisor. status præsentis Ecclesiæ Græcæ cap. 6. pag. 164. & seq.* apud Joannem Albertum Fabricium *bibliogr. antig. cap. 8. num. 25. §. In Orientali.* Refert namque, a schismatico & hæretico Patriarcha Constantinopolitano juridicas item agi inquisitiones, ac testes examinari de virtutibus & miraculis eorum, qui fama sanctitatis illustres hac vita discedunt, tum negotium excuti in Episcoporum Synodo, mortuumque subinde in Sanctorum album referri; sed id raro fieri propter magnam expensam ad eandem rem necessariam.

5 Verum enim vero prætermittimus, Beatificationum & Canonizationum difficultatem nequaquam petendam esse, aut peti ab expensarum magnitudine, sed utique a longo & rigido examine, quo causæ pertractantur; uti testari poterunt quotquot hujusmodi negotiorum expeditioni tamquam Postulatores in Romana Curia vacarunt, & quemadmodum plene desumitur ex his, quæ nonnulli inter ipsos scripta reliquerunt. Joannes etenim Longinus in vita S. Stanislai Martyris apud Bollandianos ad diem 7. mensis Maji pag. 257. tom. 2. hæc habet: *Ea difficultas utrum consulto ingesta fuerit, ut veritas de sanctitate Martyris patefceret ad liquidum, an, ut solet Romana industria ad res aliquas honestius repellendas difficultates injicere, huic quoque difficultatem præfatam injecerit, incertum habemus: cum quo concordat Jo. Cardinalis Cajetanus causæ S. Stanislai Relator in suis litteris ad Episcopum Cracoviensem apud Longinum loc. cit. pag. 259. ubi sic lo-*

Tom. I.

M m m

quitur:

quitur: Nos finaliter stupefacti de tanta congerie probationum non admissa, praeposito Procuratori diximus quasi parabolice: Necessarium habet Sanctus vester unum finaliter operari miraculum, quod discordantes in miraculis mirabiliter faciat concordare. Marcus etiam Aurelius Grattarola, qui ad Urbem accessit & Postulatoris officio functus est in causa Canonizationis S. Caroli Borromæi, in suo opere typis edito atque in superioribus sæpe allegato part. 1. cap. 43. postquam retulit exactissimas, quæ fiebant in causæ examine, diligentias a Cardinalibus Congregationis sacrorum rituum, ita subdit: *Nel che procedevano con tanto rigore, che io me ne lamentai più volte con essi loro, come di cosa, che avesse dell' eccessivo, e non usata nelle Canonizzazioni passate; ma mi lasciavano soddisfatto con rispondermi, che, trattandosi della Canonizzazione d'un Cardinale loro collega morto poco tempo innanzi, così conveniva fare, ed erano necessarie quelle grandi diligenze, acciocchè niuno potesse dire giustamente, che fossero proceduti coi rispetti umani: alla qual risposta non sapevo replicare.* Silentio scilicet interea præterimus quidquid de nostra sollerti in excitandis difficultatibus cura, dum Fidei Promotoris officium exercebamus, testatus est bon. mem. P. Daubenton Societatis Jesu Theologus in vita Gallico idiomate scripta B. Joannis Francisci Regis; in cujus quidem causæ pertractationem usque ad Beatificationem strenue incubuit, dum Romæ morabatur, ut in eadem vita edita Paris. an. 1716. pag. 329. & præterimus pariter, quæ habentur apud memoratos nuper Bollandianos ad diem 8. mensis Maji tom. 4. pag. 277. ubi, relatis nonnullis miraculorum instrumentis, sic ajunt: *Utrumque instrumentum mirifice facit ad cognoscendam evidentem summam illam maturitatem, gravitatemque judicii, qua in miraculis in ordine ad Canonizationes probandis utitur Romana Curia: tum etiam ad diem 2. Aprilis tom. 1. pag. 217. ubi: Ea nunc ( loquuntur de præsentī consuetudine Curiae Romanæ in Canonizationum causis ) in multis mutata adeo difficilem esse fecit Canonizationum obtinendarum effectum, ut ejus successus debeat censi miraculum pene majus, quam sint ea omnia, ob quæ aliquis judicatur mereri, ut in Sanctorum catalogum adscribatur.*

6 Postea stricte dicimus, necessariam profecto esse in pertractandis atque ad exitum perducendis Beatificationum & Canonizationum causis expensas; sed Romanos Pontifices earum moderationi studuisse, atque adeo non esse easdem ita amplas, ut solum Principes ac magnæ civitates eas explere valeant, sicuti Marcus Antonius de Dominis temere effutivit: quare & nonnullas tamquam superfluas jam fuisse eliminatas, &, quatenus aliquæ adhuc restent, quæ inter superfluas recenseri possint, earum similiter refectionem a Romanorum Pontificum æquitate desperandam non esse.

7 Blasius certe Ortizius Canonicus Toletanus Hadriani VI. ex Hispania in Italiam comes, &, quamdiu is vixit, ejus familiaris testatur, eum in Canonizatione SS. Antonini, & Bennonis vetuisse sumptus fieri: *Quamvis summa pecuniarum non exigua in ejusmodi Canonizationis actu tum in Pontificia*

*ficia familia toganda, tum in aliis impendiis soleat consumi, circumfpectiffimus tamen Papa tales sumptus quasi alienos a sanctimonia & puritate Canonizationis fieri vetuit: uti legitur apud prædictos Bollandianos in appendic. ad diem 2. Maji tom. 7. pag. 555.*

8 Pater autem Sebastianus a S. Paulo Ordinis Carmelitani Patrem Daniele Papebrochium Societatis Jesu Theologum, operis Bollandiani in modo citato tomo continuatorem, proinde accusavit tamquam affirmatorem, quod sumptus in solemnī Canonizatione fieri soliti sint alieni a sanctimonia & puritate ejusdem actus. Accusationi Daniel respondit, se Hadrianum Papam utique laudasse propter zelum bonum, modestiam, pietatem, æquitatemque intentionis in minuendis sumptibus Canonizationis; minime vero probasse rationem ab ipso allatam, quod iidem sumptus essent alieni a sanctimonia & puritate Canonizationis; additque, censere se multas & graves esse causas, quæ sumptus fieri solitos probent tamquam valde congruos; veluti ex ipsa ejusdem responsione *Antuerpia edita an. 1696. §. 141. & seqq.*

9 Sed, utcumque hæc sint, a nobis singillatim expensæ ipsæ ponderabuntur, ut de illis, quæ antea proposita sunt, probationis fundamentum desiderari non debeat. Interea vero non inopportuno esse videtur, quinimmo maxime opportuno ex Gallico in Latinum sermonem convertere, quæ post primam hujus nostri Operis editionem scripta sunt ab incognito Auctore in discursu dogmatico de SS. Canonizat. Paris. impresso an. 1739. pag. 65. *Expensæ si statuta fuissent, ut difficilior & exactior esset causarum discussio, prudentia laudanda esset: sed quis est qui ignorare possit, quod Commissarii accedentes ad locum ubi Sancti vixerunt, vel in quo miracula facta sunt, ut sumant informationes, multitudo testium examinandorum, multitudo scripturarum imprimendarum, honoraria solvenda negotiorum gestoribus, Congregationis Officialibus, magni festi celebratio, necessario immensas quodammodo requirunt expensas, ex quibus nullam Camera Apostolica percipit emolumentum, & quarum magna pars fit extra Urbem.*

# §. I.

*De Expensis, quæ fiunt in processuum constructione.*

10 **S** Tatuto in causis Beatificationis & Canonizationis ordine judiciali, tamquam ad rerum veritatem eruendam aptiore, nemo est qui non videat, & consiciendos esse processus tum auctoritate ordinaria, tum Apostolica, ut in superioribus visum est, & testes aliquando ab una ad aliam Urbem esse vocandos, & Judices ordinarios vel delegatos interesse debere, adesse quoque debere Fidei Subpromotorem, ut & Notariorum Scribarumque operam necessariam esse, atque adeo hæc & similia sine expensis fieri nequaquam posse. Sed ex centum hujus generis processibus

sibus nonaginta duo extra Urbem conficiuntur, & in eos quidem non modica pecuniæ summa erogatur: proindeque impensa non est superflua, & vel nulla prorsus, vel exigua solum ejusdem pars ad Urbem mittitur. Tantum itaque, quod attinet ad rem præsentem, onus esse debet Judicum ordinariorum vel delegatorum invigilare, ne quid præter necessitatem erogetur, utque loci, in quo processus fit, taxatio observetur: siquidem ex mox referendis non taxationem Judicis delegantis, sed delegati, in hujusmodi negotiis exequi solemne & æquum est.

11 Quod si aliquando processus in Urbe conficiuntur, sive agatur de processu ordinario per Cardinalem Urbis Vicarium conficiendo, sive de processu Apostolico auctoritate sacræ Congregationis construendo; tunc & Judices, qui hisce processibus interveniunt, gratis exhibent ministerium suum, & sacra Congregatio exactissimam taxationem præfinit, ad quam etiam Curia Cardinalis Vicarii se conformat; in qua nempe, unoquoque actu, aut quocumque conventu spectato, statuitur quid pro mercede laboris Notariis sit solvendum. Taxationis porro hujus viridis adhuc est observantia: quin & Notarius in adeptione ejus officii, interposito juramento, sic eam se observaturum spondet, ut, quatenus promissis & juramento ipsi non stare, consugientibus ad sacram Congregationem Postulatoribus, nedum sacra Congregatio eum ad observantiam cogat, sed inobservantiam etiam debitis poenis ulciscatur. Impressa autem dabitur in Appendicibus; ut ex ejus lectione unusquisque facile colligere possit, quam sit rationabilis & quam exigua; adeo quidem, ut lis aliquando fuerit excitata inter Postulatores, & Notarium, qui extra Urbem confecerat processum, petente videlicet ipso mercedem juxta taxationem loci, in quo factus fuit processus, utpote ampliorem; dum illi contendebant, observandam esse taxationem sacræ Congregationis, quippe quæ minor, & ideo sibi minus incommoda. Dissensio nimirum hujusmodi contigit in causa Florentina B. Julianæ de Falconeriis; in eaque sacra Congregatio constituit, nequaquam in constructione processuum remissorialium attendendam esse taxationem Notarii sacræ Congregationis, sed Curie Ecclesiasticæ, in qua processus fieret: uti desumitur ex decreto in dicta causa edito die 6. Martii, & die 18. Septembris 1706. cum æquum omnino sit, ut servetur taxatio loci, in quo processus constituitur, juxta Textum in cap. Statutum §. Notarium, ibique Glossam in V. Officium: de rescriptis: in 6.

12 Si vero processus extero idiomate confecti sint, quia, secundum alibi dicta, nedum adhibetur Interpres, sed etiam eligitur, qui factam interpretationem recognoscat, & si quidem opus sit, corrigat; in novissimis decretis san. mem. Innocentii XI. §. 4. sacra item Congregatio taxavit mercedem unicuique eorum persolvendam, & eam utique modicam. En verba decretorum: *Congregatio assignavit mercedem pro suis laboribus, nempe carolenum unum pro quolibet folio reducto, ita ut facies sit linearum 24. & li-*  
nea

*nea syllabarum* 16. Nimirum, cum *carolenus* sit quarta pars trium Juliorum Romanorum, de mercedis tenuitate non videtur esse dubitandum. Fidei quoque Subpromotor interest constructioni horum processuum, qui sunt in Urbe; eique, de more, pro quolibet conventu, qui ad multas horas producit, aureus unus persolvitur: quæ certe summa non est immodica, si temporis impendii, laboris, atque animi attentionis ratio habeatur.

## §. I I.

*De mercede Postulatoris, Procuratoris, Advocati, Medici,  
& Excusoris scripturarum.*

13 **P**ostulatores, severe loquendo, illi sunt, qui Beatificationis & Canonizationis causam promonent: exempli gratia, si aliqua civitas sui concivis, si Religiosus aliquis Ordo sui Religiosi, aut quodpiam Capitulum sui Canonici; aut Familia quæpiam sui affinis vel cognati, qui sanctitatis laude floruerit, causam Beatificationis & Canonizationis introducit atque prosequitur; civitatem ipsam, Religiosum Ordinem, Capitulum, aut Familiam qui repræsentant, quique Procuratorem ad eandem causam instituunt, veri sunt Postulatores. Verum, cum hi ad Urbem nec accedant, nec accedere possint, in more positum est, ut aliquis eligatur sive concivis, sive Religiosus, sive ex Canonicis, sive ex Familia, vel amicus Familiæ, cui necessaria creditur pecunia, quique in Urbe commorans pro negotii progressu, Procuratorum atque Advocatorum opera utitur: & hic etiam, ut supra electus, Postulatoris nomine appellatur.

14 Nulla porro quoad hosce Postulatores merces a sacra Congregatione statuta est; statuendam etenim reliquit arbitrio præficientium, & consensui præfectorum: sed cogitatum tantum aliquando est, ut infra patebit, de cautionibus adhibendis, ut pecunia ad eosdem missa fideliter erogaretur. Quod tamen spectat ad mercedem, de qua in præsentī habetur sermo, dum Promotoris munereungebar, facis providam quorumdam suspexi oeconomiam, qui aliquem Religiosum vel ad Urbem missum, vel in Urbe commorantem negotio præficientes, subministrata coenobio elemosyna pro alimoniis, & tenui quadam summa Religioso ipsi pro regularibus indigentis, superfluum hoc pacto & magnum sumptum evitarent alioquin necessarium, ut puta, si viri nobilis, si Canonici opera hac in re adhibeatur.

15 Itaque, ut hinc transeamus ad Procuratores, & Advocatos, taxatio utique pro eorum laboribus a sacra Congregatione est constituta, quæ habebitur in Appendicibus: sed & ipsa adeo tenuis est ac modica, ut Procuratores, & Advocati Urbis, qui patrocinium habent multarum aliarum

rum caufarum forenfium, caufis Beatificationis & Canonizationis patrocinari recufent, fcilicet quia honorarium non datur labori conveniens. Si vero Medici vocantur, ut iudicium fcripto ferant fuper miraculis, eorum profecto labor optat præmium: cum autem hoc præfinitum non fit a fagra Congregatione, licet ut plurimum non excedat præmium Advocatorum, præfinitum quidem efle videretur, ut iurgia & querimonie avertantur. Sanctæ demum memoriæ Alexander VII. taxationem publicavit in Appendicibus pariter inferendam, in qua decernitur, quid Excufori, quid Fidei Subpromotori pro fua revifione & fubfcriptione, quid Correctoribus pro fua correctione folvendum fit; cujus nempe & viridis eft adhuc obfervantia & adeo fcrupulofa ratio, ut & ipfas exprimat cujufcumque folii lineas & linearum litteras, quemadmodum legenti patebit.

## §. III.

*De mercede Promotoris, & Fidei Subpromotoris.*

16 **F**idei Promotor fuum in Urbe habet Subpromotorem, juxta ea, quæ alibi dicta funt. Fidei autem Promotori conftitutum eft a fummo Pontifice falarium, quod ei perfolvitur citra ullam Poftulatorum impenfam. Quando fcilicet officium Fidei Promotoris junctum erat officio Advocati Fifcalis, emolumentum Fifcalis advocationis erat merces utriufque officii. Sed, facta divifione muneris Fidei Promotoris a munere Advocati Fifcalis, fan. mem. Clemens XI. cum me conftituit Coadjutorem Proſperi Bottinii Archiepiſcopi Myrenſis Fidei Promotoris, portionem panis & vini, quæ ex palatio Apoſtolico perfolvebatur Fifci Advocato, perfolvendam decrevit Fidei Promotori, uti colligitur ex ejus Apoſtolicis litteris expeditis die 5. Maji 1708. in quibus fic legitur: *Cum omnibus & fingulis honoribus, oneribus, & facultatibus Promotoris hujusmodi officio de jure, uſu, et confuetudine competentibus, necnon portionis panis et vini ex palatio noſtro Apoſtolico ante hæc Advocato Fifci et Camera noſtra Apoſtolica dari ſolitis, quas pro tempore exiſtenti Promotori Fidei in poſterum assignamus. Poſtea in aliis Apoſtolicis litteris datis die 30. Aprilis 1714. ex emolumentis & ſalaris folvi ſolitis Advocato Fifci detraxit annuam ſummam centuſſum ſive ſcutorum trecentorum Romanæ monetæ ſolvendam Fidei Promotori: Dempta tamen ex ſalaris et emolumentis ejuſmodi annua ſumma trecentorum ſcutorum moneta, quam dilecto filio moderno, et pro tempore exiſtenti Promotori Fidei assignamus. Præter hæc emolumenta, cum Fidei Promotor ſcriptis exponat ſuas difficultates & animadverſiones, confuetudo obtinuit, ut aliquid a Poſtulatoribus ei perfolvatur cauſa compensationis expenſarum, quas ſubire tenetur, ut exempla fieri curet ſcripturæ ſuarum difficultatum atque animadverſionum, quam ut ipsis quidem Poſtulatoribus communiceſ, opus eſt. Quamquam & ſcio, tum Joannem Franciſcum de Ru-*  
beis,



beis, tum Prosperum Bottinium bon. mem. Fidei Promotores satis exiguam pecuniam eadem de causa recepisse. Quomodo deinde me ipse gesserim, dum eodem munere sungebar, testari poterunt ex Postulatoribus quotquot adhuc vivunt; necnon hujus rei probatio desumi poterit ex indicibus expensarum, quos fideliter Postulatores ipsi conscribunt, ut pecuniarum reddant rationem illis, qui eas ad ipsos miserunt.

17 Fidei porro Subpromotor sua habet pecuniaria emolumenta, quæ ipsi a Postulatoribus persolvuntur; ejus quippe salarium præfinitum est in decretis Urbani VIII. pag. 62. ubi hæc habentur: *Substituto Promotoris Fidei pro quolibet processu ab eodem Substituto examinando per Procuratores causarum persolvatur stipendium decem ducatorum*. Quod tamen Urbani decretum, ad avertendas contentiones, & expensarum multiplicationes, sic explicatum fuit in decretis novissimis san. mem. Innocentii XI. §. 10. *Et pro quolibet processu ab eodem Subpromotore examinando in quolibet dubio persolvatur ei stipendium decem ducatorum auri præscriptum in decretis generalibus pag. 62. cum declaratione tamen, quod, respectu processuum auctoritate Apostolica in specie, qui pluries ad diversum effectum examinari debent, dictum stipendium debeat pro tribus dubiis tantum; nempe prima vice, quando disputatur validitas, secunda vice, quando disputatur de virtutibus, seu de Martyrio, & causa Martyrii, & tertia vice, quando disputatur de miraculis; quamvis disputationes alicujus ex dictis dubiis pluries reiterari contingat, seu eadem dubia in diversas inspectiones pro faciliiori resolutione dividantur*.

18 Taxatio nempe hujus emolumenti, ut & aliorum quorumcumque in æstimatione Innocentiana statutorum, facta est, prævio consilio Congregationis, cui interfuerunt octo Cardinales sacris ritibus præpositi, Secretarius sacræ Congregationis, Fidei Promotor, Subpromotor, duo antiquiores ex collegio Patronorum sacri palatii Apostolici, auditis etiam Procuratoribus Generalibus Ordinum Regularium S. Dominici, S. Francisci, S. Augustini, & Societatis Jesu: sed, his etiam minime obstantibus, continuæ sunt disputationes & contentiones inter Postulatores, ipsumque Fidei Subpromotorem.

19 Aliquis ex Postulatoribus exempli gratia processum aliquando exhibet, in quo vel unus, vel duo, vel tres tantummodo testes sunt examinati asserta deponentes de virtutibus, aut Martyrio, & miraculis alicujus Dei servi, vel Beati, quique idcirco valde parvus processus est: & hoc utique in casu Postulator ipse conqueritur, se tribus vicibus pro adeo exiguo processu solvere debere decem aureos.

20 Quamvis enim responderi consueverit, ingentes etiam, necnon in plura volumina distinctos quandoque ad Subpromotorem deferri processus, pro quibus non exigit, nisi eandem decem aureorum summam; non proinde tamen querela cessat, subdente nimirum Postulatore, qui parvum detulit processum, ad se alios illos ingentes minime pertinere. In quo propterea rerum themate forte expeditet parvum aliquod statuere emolumentum

mentum pro unaquaque processus pagina ; tunc quippe modica summa perfolveretur ab eo , qui parvum , major autem ab alio , qui magnum deferret processum .

21 Interdum etiam contingit , Judicem ordinarium , vel Judices delegatos pro assequenda veritate alicujus facti , ne testes vocentur ad locum , in quo fit processus , quempiam subrogare , qui ipsorum testium in loco degentium examen excipiat . Fit itaque a Subrogato examen , idemque mittitur ad Delegantem , a quo inferitur in suum ordinarium , vel Apostolicum processum : quare & hinc oritur disputatio , utrum scilicet hujusmodi processus habendus sit pro unico , an tot sint processus , quot examina diversis in locis a diversis Judicibus facta sunt ex commissione ipsis injuncta a Judice ordinario , vel delegato .

22 Insuper in causis Beatificationis & Canonizationis non solum sunt processus remissoriales pro examine testium , verum etiam compulsores pro compellendis scripturis , ut puta instrumentis , chronicis , aliisque istiusmodi rebus . Si igitur processus compulsores sit a processu remissoriali sejunctus , habetur ille tamquam novus processus , & separatim quidem decem aureorum honorarium pacate persolvitur Fidei Subpromotori : tum vero difficultas urget , an id ipsum sit pariter observandum , cum in uno eodemque processu & testes examinantur , & jura compelluntur ; & item , sive processus compulsores sit remissoriali conjunctus , sive ab eodem sejunctus , an tot sint habendi processus compulsores , quot sunt jura compulsa , atque ex diversis eruta locis , hoc est bibliothecis , aut archivis .

23 Fit demum nonnunquam compulsio unius , aut plurium processuum auctoritate ordinaria confectorum in processum Apostolicum . Stipendium nempe decem aureorum jam fuit Fidei Subpromotori persolutum pro processu ordinario , antequam compelleretur in Apostolicum : attamen , facta processus aut processuum prædictorum auctoritate ordinaria confectorum in processum Apostolicum compulsionem , disputatio insurgit inter Postulatores , & eundem Fidei Subpromotorem , iteratum ne stipendium decem itidem aureorum solvendum sit pro processibus ipsis compulsiis . Contendunt videlicet Postulatores , iteratum stipendium non esse debitum , cum agatur de uno eodemque processu , cumque pro eo jam facta sit solutio honorarii a sacra Congregatione taxati : quare & addunt , expensam hanc fore intolerabilem , eo quia , præter primam solutionem factam pro ordinario processu , quando causa fuit introducta , præter solutionem repetitam , cum agitur de ejus validitate , tertia adhuc non deest , si ejusdem compulsio fiat , & de compulsionis quidem validitate quæstio sit instituenda ; non omisis porro reiteratis subsequenter solutionibus , si in dubio virtutum & miraculorum opus sit ad eundem processum ordinarium Apostolicam auctoritate compulsum manum admoveere : Contra autem excipit Fidei Subpromotor , sibi omnino statutam esse in decretis mercedem

cedem decem ducatorum auri pro quolibet processu ; & quidem primò , cum agitur de ejus validitate , secundò , cum de virtutibus , aut de Martyrio tractatur , tertio , cum res est de miraculis : item , processum ordinarium non esse processum auctoritate Apostolica compulsus , sed ab eo sane disferre ; processus etenim compulsorialis fit a Judicibus delegatis , minime vero a Judice ordinario ; atque adeo , viso perpensoque processu ordinario , superesse etiam laborem examinandi , an is rite fuerit compulsus , si auctoritate quidem Apostolica compellatur .

24 Verum enimvero , quamvis hæc similesque controversiæ ut plurimum amicabili compositione terminari consueverint , ubi scilicet aliquid a Fidei Subpromotoribus denique relaxatur ; expedire profecto videretur , ut sacrorum rituum Congregatio , quæ ad avertendas hujus generis disputationes accuratissimas constituit taxationes , explicatius adhuc decerneret , hincque novo decreto quæstionibus supra recensitis finem imponeret : quod pariter præstare deberet quoad aliam controversiam , quæ præterea viget inter eosdemmet Postulatores , ac Fidei Subpromotorem . Fidei nimirum Subpromotor scriptis exponit Fidei Promotori difficultates , quas invenire potuit involvendo & examinando processu , eas vero præsertim , quæ factum respiciunt ; ut Fidei ipse Promotor suas facilius exarare queat animadversiones & in facto & in jure , quæ Postulatoribus postea communicantur , ut parent responsiones . Fidei ergo Subpromotor aliquid exigit a Postulatoribus propter exscriptionem scripturæ , quam tradit Fidei Promotori , instar Procuratoris causæ , cui pro quolibet folio statutum est stipendium in taxatione sacræ Congregationis pro Advocatis , & Procuratoribus præscripta . De hac , inquam , Subpromotoris exactione aliquando Postulatores conquesti sunt : quocirca operæ pretium esset , ut sacra Congregatio etiam decerneret , fierine ipsa possit , tum quanta sit futura .

## §. I V.

*De propinis , seu sportulis , quæ olim solvebantur in Sanctorum Canonizationibus , & quæ hodie ex decretis Romanorum Pontificum sublata sunt .*

25 **P**ro incredibilibus laboribus , quos subire coguntur illi , qui suum consilium præstare debent Canonizationis causis , olim propina quædam , seu sportula eis solvebatur . In collectione Conciliorum Britannicæ ( tom. 3. pag. 636. ) extat Ordo Canonizationis Sanctorum sæpe memoratus anni 1494. ad cujus calcem indicantur expensæ , quæ fiunt in Curia Romana pro Canonizatione : earum autem primæ ; quæ est *Domino nostro Papa in aliquo , vel aliquibus auri , vel argenti usque ad valorem ducatorum centum* , subduntur istæ : *Tribus Commissariis Canonizationis in jocalibus*  
Tom. I. N n n vel

vel pecuniis usque ad ducatos centum nonaginta inter omnes. Pro vino domando eisdem ducata decem. Pro una propina vitulorum, pullorum, confectionum, & cere Papæ, & tribus Cardinalibus prædictis donandorum ducata 70. Item Paris de Crassis in suis diariis MSS. in quibus loquitur de Canonizatione S. Francisci de Paula, quæ celebrata fuit a Leone X., propinam commemorat Papæ, tribus Cardinalibus Commissariis; & duobus Rotæ Auditoribus perfolvendam; & Papæ quidem dicit ducatorum 225. quam tamen testatur non fuisse a summo eodem Pontifice receptam, tribus Cardinalibus Commissariis ducatorum 300., duobus Rotæ Auditoribus ducatorum 25. Instituta etiam sacrorum rituum Congregatione, atque ad eam accitis tum Cardinalibus, tum Consultoribus, mos invaluerat, ut nedum summo Pontifici, sed & cuique Cardinali, & Consultori propinæ solverentur; quæ omnino summam constituebant centussium monetæ Romanæ 3612. ut ex Actis in Beatificatione & Canonizatione S. Francisci de Sales collectis a Dominico Cappello, & typis editis plene defumitur, utpote in quibus singillatim omnes expensæ ab initio ad finem usque Canonizationis factæ computantur.

26 Tempore vero san. mem. Innocentii XI. sacrorum rituum Congregatio decrevit, ut in posterum nec propinæ, nec sportulæ solverentur; ideoque ingens labor sine præmio maneret; & quidem, facta hujus decreti relatione prædicto summo Pontifici, ipse non modo illud approbavit & confirmavit, sed etiam voluit, se eodem esse comprehensum, atque adeo Successoribus suasit, ut id ipsum efficerent. Quamobrem, cum substitutus fuerit Innocentio Alexander VIII. & cum ab eo utique facta fuerit nonnullorum Sanctorum Canonizatio, ipse san. mem. Pontifex novo confirmationis robore decretum Innocentianum communivit, & semetipsum pariter id complecti statuit: ab eo quippe tantum exemit Secretarium sacræ Congregationis, Fidei Promotorem, atque Subpromotorem. Ab illo porro tempore semper ita res processit, ut nunquam amplius facta fuerit sportularum seu propinarum solutio Papæ, Cardinalibus, Consultoribus sacræ Congregationis, sed Secretario duntaxat, ac Promotori; quorum singulis, utpote continuum laborem ferentibus, fit solutio aureorum centum, ut & lohge minoris summæ, aureorum videlicet quindecim, ni fallor, fit Fidei Subpromotori.

27 En verba decretorum: *Proposito in sacra rituum Congregatione, an expediat, quod in decretis Canonizationum tam factis, quam faciendis, in posterum non dentur, nec recipiantur sportula seu propina, sacra Congregatio unanimi voto censuit, omnino expedire; ac ideo decrevit, quod in posterum non dentur, nec ab ullo penitus recipiantur; quodque supplicetur Sanctissimo pro confirmatione: Die 15. Octobris 1678. Et, facta per me infra scriptum relatione præsentis decreti SS. D. N. Innocentio XI. cum ejus lectura, Sanctitas sua non solum laudavit, & approbavit, atque ab omnibus observari perpetuo mandavit, sed etiam se ipsam sub eo comprehensam esse voluit, & declaravit; ejusque Successoribus, ut idem faciant,*

faciant, insinuavit, eosque monuit: Die 15. ejusdem mensis Octobris, & anni 1678.

Joannes Baptista de Luca Auditor.  
Bernardinus Casalius Secretarius.

Die 15. Maji 1690. Facta relatione SS. D. N. Alexandro VIII. per Reverendiss. Archiepiscopum Myrensem Fidei Promotorem, & Reverendiss. Laurentium Fliscum sacrae Congregationis Secretarium de supradicto decreto, Sanctitas sua, sequendo exemplum san. mem. Innocentii XI. Prædecessoris, illud approbavit, seque pariter in eo comprehensam esse voluit: Declaravit tamen, minime in ipso comprehendi Promotorem Fidei, Secretarium, & Subpromotorem.

28. Hodie itaque Papæ, Cardinalibus, & Consultoribus nil aliud a Postulatoribus datur, quam tabula picta, repræsentans imaginem Beati, qui canonizatur: quod nempe tabulæ pictæ donum fit Cardinalibus, & Consultoribus; occasione Canonizationis; Cardinali autem Relatori, Secretario, ac Promotori non solum eadem occasione, verum etiam, cum introducitur causa, & cum servus Dei inter Beatos refertur. De hisce scilicet tabularum pictarum muneribus loquitur Jo: Baptista Rossius in suo clypeo castitatis pag. 100. ubi narrat, se convenisse venerabilem Cardinalem Bellarminum officii causa, qui ipsum sic allocutus est: *Pater, plerasque iconas eleganter e parietibus pendentes indigitans, videtur ne tibi ornatus hic, & copia imaginum sanctæ paupertati dissimilanea? Neganti, in eo quidem gradu, ac statu videri; atqui, inquit, aperiā tibi candide consilium meum &c. Imagines ista donaria sunt eorum, qui causas apotheseos virorum sanctitate insignium promerent, & meum patrocinium in earum procuracione deposcunt, gaudenque vehementer, quoties appensas ante meos oculos intuentur, tamquam æstimationis mee argumentum ipsis gratissimum, in quo multum momenti est ad caritatem mutuo conservandam; ut nihil interim dicam de affectu, quem excitari in meo corde sentio ex aspectu vultuum, & sacrorum mysteriorum, qua pictores omni artificio exprefere, ut pietatem coloribus exprimerent.*

29. De sportulis porro, seu propina Secretario, ac Fidei Promotori perfolvendis nonnullæ aliquando exortæ sunt controversiæ. Interdum quippe contigit, ut aliquis esset Secretarius sacrae Congregationis, aut Fidei Promotor, dum causa Canonizationis discutiebatur, eodem vero munere non amplius fungeretur, dum Canonizatio facta est, quo nimirum tempore propina perfolvitur; vel quia e vivis excefferat, vel quia ad aliud Romanæ Curie officium translatus erat. In hac, inquam, hypothefi quæri consuevit, cui propina debeat, id est num heredibus defuncti, aut antiquo Secretario, vel Fidei Promotori, an ei potius, qui horum officium exercebat, quo tempore solemnia Canonizationis expleta sunt. Quamquam enim nonnulli censuerunt, eo in casu duplicatam propinam esse a Postulatoribus perfolvendam, scilicet & antiquiori Officiali, aut ejus heredibus, & etiam novo; ego tamen in ipso facti eventu id fieri nequaquam permisi. Sanctæ memoriæ Clemens XI. ut sæpe reguli, me

constituit Coadjutorem Archiepiscopi Myrensis Prosperi Bottinii Fidei Promotoris, qui morbo apoplectico percussus, & nonagenario major officium exercere non poterat. Nonnulla nihilominus ipse peregerat in causis quatuor Sanctorum ab eodem Pontifice canonizatorum; reliqua vero a me ipso Coadjutore completa fuerunt. Cum autem ipse quidem amplius non esset in viventibus, quando Canonizatio perfecta fuit, ideoque quando fiebat propinæ solutio; ne duplicata eadem propina Postulatores onerarentur, sic res inter illius heredes, meque ipsum composita fuit, ut dimidium iis, dimidium mihi solveretur. Rursus, postquam exantlaveram omnes labores in causa S. Margaritæ de Cortona, placuit fan. mem. Benedicto XIII. me ad Cardinalitium honorem evchere. Vacavit idcirco Promotoris officium; quo deinde delato ad Dominum Cavalchinum Archiepiscopum Philipensem, solemniter Beata ipsa Margaritha in Sanctorum album fuit relata. Sed non fuerunt Postulatores adacti ad solutionem duplicatæ propinæ; una etenim & integra propina mihi soli, qui solus laboraveram, fuit soluta. Quamobrem Romanæ Curie obrectatores facile cognoscere poterunt, Sedis Apostolicæ Officiales esse viros honestos, nec esse, ut ipsi prædicant, sordida avaritia inquinatos; tum etiam sacrorum rituum Congregationem expensas utique in Canonizationibus admittere tamquam ut plurimum necessarias, sed ab earum superfuitate maxime abhorrere, ut adhuc latius ex sequentibus patebit.

## §. V.

*De solutione faciendâ sacrario basilicæ S. Petri in Beatificatione, & Canonizatione.*

30 **S**icut in superioribus vidimus, solemnia Beatificationis formalis celebrantur in basilica Vaticana: quare, præter expensas necessarias ad eandem orandam, & mercedem eis persolvendam, qui suas locant operas, nulla alia gravis fit solutio, quam ea, quæ continetur in mox referendo decreto; quæ porro duplicatur, quando fit Canonizatio.

31 **ALEXANDRINUM DECRETUM.** SS. D. N. Alexander Divina providentia Papa VII. prout summum tum dignitate, tum pietate Pontificem decet, ob singularem suam decoris domus Dei dilectionem præ ceteris sollicitus, ut basilica Vaticana, quo par est tanta molis, sacra etiam suppellectilis nitore resplendeat, sacristia ejusdem basilicæ sacras vestes, & sane ornatissimas, in Canonizatione S. Thomæ de Villanova adhibitæ præcipua sua munificentia, et in basilicam ipsam Vaticanam religione elargitus fuit: volensque præterea in futurum sacristia ejusdem indigentis identidem religiose consulere, mandavit, ne in posterum Secretarius pro tempore Congregationis sacr. rit. decreta Beatificationum, et Canonizationum, quæ ab ipsa Congregatione in fine causarum eduntur, in Acta sacra Congregationis referat, neque evulget, aut sub quovis prætextu Procuratoribus, et Postula-

*Postulatoribus causarum, vel aliis quibuscumque consignet, nisi docto, se Sacristis Majoribus prefata basilica consignasse sacram suppellectilem veri valoris aureorum mille pro Canonizando, quingentorum vero similium pro Beatificando; nempe in tot planetis, stolis, manipulis, ac burfis Corporalium, vel albis, et amictibus ad usum Missarum privatarum, quæ dietim in dicta basilica celebrantur, aut in tot palliis, et altarium linteaminibus pariter ad similem usum adhibendis. Et prædictis quidem arbitrio Sacristarum Majorum præstandis; quorum proinde cura Sanctitas sua demandavit, quæ magis pro tempore ecclesiæ servitium exiget, Procuratoribus causarum indicare, Secretarium vero sacre Congregationis, et Sacristas prædictos admonere, et, quod eadem festine implentur, invigilare. Ne autem hujusmodi decreti ignorantia præsumi possit, idem in Acta sacre Congregationis referri jussit; prout chirographum, seu verius supplicem libellum manu Sanctitatis sue firmatum ibidem inferri voluit. Die 27. Septembris 1659.*

32 Quia vero magna erat Postulatorum molestia in comparandis suppellectilibus ad normam decreti Alexandri VII., eodem annuente Pontifice, prædicto facilius modus est subrogatus; solvendi videlicet aureos quingentos in Beatificatione, & aureos mille in Canonizatione Canonicis basilicæ Aedituis, qui eos fideliter erogant in comparandam ipsam suppellectilem necessariam, necnon Capitulo reddunt rationes expensarum. Ideo in ejusdem basilicæ sacrario ad perpetuam rei memoriam erectus est lapis, in quo hæc verba leguntur:

## ALEXANDRO VII. PONT. MAX.

QVOD SINGVLARI EIVS MVNIFICENTIA VATIC. BASIL.  
SACRA SVPELLECTILE ABVNDANTER SIT INSTRUCTA  
AD ILLAMQ. CONSERVANDAM ET AVGENDAM APOST. DECRETO  
PERPETVO DVRA TVRV SVBSIDIVM SIT ATTRIBVTVM  
BENEFICII MAGNITVDINEM REFERENTES  
AC POSTERITATI TESTANTES  
POST ANNIVERSARIA SACRA SOLEMNI RITV INSTITVTA  
GRATI ANIMI MONIMENTVM  
CANONICI POSVERE.

33 Hujus porro solutionis æquitas bene perspecta est his, qui rerum Capituli basilicæ Vaticanæ cognitionem habent. Multorum equidem annorum spatio Theologi proventum in eadem insigni basilica obtinui; testari autem possum, mensam Capitularem esse multo ære alieno obstrictam, nec eam sufficienter sublevare potuisse, diminutis mensuris præstationibus unicuique Canonico assignatis; quin etiam, quod præcipuum est, non satis idoneum recepisse levamen ab eximia beneficentia ac liberalitate san. mem. Benedicti XIII. qui eam liberavit ab onere solutionis insignis debiti centussium monetæ Romanæ centum millium & ultra, eo in fabri-

fabricam basilicæ translatò. Inexplicabilis nempe est sacrarum suppellectilium consumptio, quæ propter intemperiem aeris Vaticani, & ob quotidianam tot Missarum celebrationem tum in templo, tum in sacrario contingit. Cum autem onus reparationis suppellectilium non ad fabricam, sed ad mensam Capitularem pertineat, & hæc quidem minime haberet, quomodo id ferre posset, provide idcirco Alexander Papa VII. supradictum edidit decretum: quod, etsi satis non sit, ut Capitulum ab onere reparationis penitus eximatur, prodest nihilominus intolerabilis expensæ diminutioni. Quatenus autem aliquis responderet, potuisse hoc onus ipsi fabricæ imponi; hic sciat oportet, nec fabricam ipsam opibus abundare, atque adeo eam pariter maximo ære alieno laborare: quandoquidem non modo ejus reditus erogantur in ornatum & conservationem amplissimæ basilicæ S. Petri, verum etiam, ut auxilium periclitanti reipublicæ Christianæ subministraretur. Quocirca in vita san. mem. Clementis XI. lib. 5. num. 3. postquam narratum est Turcarum bellum, quod instabat, & post exposita auxilia, quæ a provido Pontifice præparata fuerant, ut hiemali tempore adversus Turcas adessent, sic subditur: *Exploratum præterea habens, majorem reddituum partem tribunalis fabricæ Vaticana basilica ex pia per Christifideles conlata sibi provenire, eosque, juxta Romanorum præscripta Pontificum, in unam Christianarum regionum tutelam adversus hostium Fidei iniqua molimina erogandas ab eodem, ad alias conducendas naves bellicas, Pontificiarum anchoras numerum, et alienum trecentorum aureorum millium contrahi voluit ex annuis proventus dissolvendum. Hujusmodi scilicet subsidia iisdem de causis ab eodem fabricæ ærario ab aliis etiam Pontificibus desumpta sunt; sed ultimum Clementinum, de quo modo egimus, satis sit indicasse.*

## §. VI.

*De strenis, quæ nonnullis Officialibus Romana Curia persolvuntur.*

- 34 **J**uxta narrata in superioribus, pro Canonizationibus Sanctorum Advocati Consistoriales perorant in publico Consistorio, vel quando pileus traditur Cardinalibus recenter creatis, aut aliquis Legatus Regius publice admittitur, vel quando, expleta Canonizationis causa in publico pariter Consistorio, quod ab alio semipublico excipitur, virtutes ac miracula Canonizandi oratorio modo exponuntur. Verum, quia orationes prima illa occasione recitatæ ad Canonizationem minime sunt necessariæ, idcirco, licet in institutione pro iisdem orationibus supra relata dicatur, honoraria esse a Postulatoribus causarum persolvenda; re nihilominus ipsa etiam hodie in more est, ut Oratori quidem fiat aureorum decem solutio, non tamen a Postulatoribus, sed a Curia Criminali Gubernatoris Urbis: quippe quæ eandem solutionem faciebat, cum causarum criminalium fiebat propositio in sacro Consistorio, in quarum scilicet



cet locum subrogatæ deinde sunt Canonizationum causæ, quemadmodum similiter diximus. Secundo utique loco habitæ orationes in Canonizationibus necessariæ sunt: atque hinc Advocato Consistoriali peroranti dantur a Postulatoribus centussex centum; quorum fit distributio inter ceteros sacre Consistorialis aulae Advocatos, servata tamen ipsi Oratori magis conspicua summæ portione. Strenæ quoque persolvuntur cæremoniarum Magistris, qui haud exiguos perferunt labores & ante solemnitate, & in ipsa Canonizationis solemnitate. Præsul a Secretis Brevium ad Principes, qui nomine summi Pontificis in Consistoriis, & in ipsa Canonizatione respondet Postulatorum petitionibus; Præsul Secretarius sacri Collegii, qui gesta refert inter Acta Consistorii; Præsul expositor bullarum Canonizationis, & alii, qui partem capiunt de emolumentis bullarum; illi denique ex familia summi Pontificis; hi, inquam, omnes strenarum participes sunt, quarum nempe nonnullæ causam habent a labore, ceteræ a consuetudine. Si qua tamen nimietas in eis inesset, securi possunt esse Postulatores de moderatione obtinenda, quatenus suas afferant apud sacram Congregationem petitiones. Interea vero ipsis expedit, ad vitandas importunas pecuniam petentium molestias, aliquem virum gravem eligere, qui solvenda solvat, illos autem, quibus nihil debetur, dimittat. Ea sane semper consuetudo obtinuit quo tempore exercebam munus Fidei Promotoris, cum actum fuit de Canonizationibus peragendis. Ecquis enim sperare potest, in tanta hominum multitudine solum esse petituos, quibus utique quid debetur, non autem & allos, quibus nihil?

35 Præter strenas modo memoratas, consuetudo item invaluit dandi novam vestem nonnullis Officialibus, & Familiaribus Papæ, ut ipsa vide licet Canonizationis solemnitas augustior appareret. De his hæc habet Paris de Crassis: *Unicuique Cardinali præsentatur una cappa ex camelotto nova, & omnibus Officialibus Capella, Subdiaconis, Auditoribus, Clericis Camerae, Acolythis datur unum rocchetto novum, & unum superpelliceum. Item Clericis cæremoniarum, & Clericis Magistri Capella. Item duodecim Cubiculariis Papa dantur vestes cum capitiis de rosato. Item quatuor Camerariis Papa, ac duobus Assistentibus. Cubiculariis autem Papa omnia vestimenta nova de novo rosato. Item viginti Scutiferis Papa similiter vestes, diplodes, caligæ, & birræ. Item Parasfrenariis Papa viginti quatuor dantur diplodes, & vestes. Item omnibus Officialibus palatii datur respectivè in rosato panno, sicut in creatione novi Pontificis. Blasius etiam Ortizius familiaris Hadriani VI. supra citatus, loquens de summa pecuniarum, quæ impendebatur in Canonizationibus, eam memorat, quæ erogabatur in rogandam Papæ familiam. Insuper Marcus Aurelius Grattarola, qui in suo opere sæpe allegato omnia refert pertinentia ad Canonizationem S. Caroli Borromæi, nedum narrat par. 1. cap. 55. & par. 22. cap. 2. centum & sexaginta pauperes elemosynæ gratia fuisse novis vestibus indutos par. 2. cap. 2. necnon eadem de causa tribus diebus factam fuisse personis miserabilibus Urbis panis distributionem, verum*

verum etiam nonnullos Officiales, ac Papæ Ministros fuisse nova veste donatos: *Si diedero (le vesti) a diversi Uffiziali, e Ministri di sua Santità, per onorare una tal celebrità colla presenza di tanti Ministri Pontificj vestiti tutti a nuova livrea purpurea.* Index porro expensarum factarum in ea Canonizatione extat adhuc in bibliotheca Casanatensi Urbis, in quo hæc habentur: *Oltre alle sopradette propine e regaglie pagate in contanti alli suddetti Uffiziali, e Ministri del Papa, sono anche state date le infrascrutte vesti, e consegnate dal Depositario della Canonizzazione agl' infrascrutti Uffiziali.* Cum autem nec Cardinalium, nec omnium Officialium Capellæ, nec Subdiaconorum, nec Auditorum, nec Clericorum Cameræ, nec Acolythorum, nec Caudatariorum, nec Scutiferorum, vel Parasfreniorum Papæ ulla amplius mentio facta inveniatur; proinde colligere licet, moderationem expensarum factam fuisse, & largitionem vestium jam restrictam fuisse ad institutum subinde introductum, donandi videlicet Cubiculi Magistro calicem argenteum, calicem item argenteum Præfecto palatii Apostolici, vestes autem non personæ, sed officii proprias, Cubiculariis secretis Participantibus, Secretario Congregationis sacrorum rituum, Fidei Promotori, & nonnullis sacrarum cæremoniarum Magistris.

36 Inducto itaque more vestium distributionis, nullo postea negotio in vestium locum numerata pecunia subrogata fuit; atque adeo ex nonnullorum Postulatorum nimia liberalitate factum est, ut tot multiplicarentur pro ipsis vestibus pecuniæ solutiones, quot erant Sancti, qui canonizabantur, licet unica solemnitate fieret eorum Canonizatio: quin & aliquando eadem sorte effusæ liberalitatis de causa unico Officiali plura officia gerenti non tantum tot factæ sunt pro vestibus solutiones, quot erant Sancti Canonizandi, quamvis unica Canonizatione comprehenderentur, verum etiam tot factæ sunt, quot erant officia; perinde ac si non una esset persona, quæ plura officia administraret, sed plures; & non una, sed plures essent solemnitates.

37 Verum, delata hujus magnæ impensæ noticia ad san. mem. Innocentium XI. destinata fuit Congregatio nonnullorum Cardinalium, cui etiam interfuerunt Secretarius Congregationis sacrorum rituum, Promotor Fidei, & primus Magister cæremoniarum, pro ejus, necnon aliarum moderatione. Cumque ter Congregatio ipsa deinceps coacta esset, die videlicet 26. Julii 1680. die 9. Januarii 1682. & die 20. Julii 1690. deliberatum tandem fuit unicam omnino solutionem pro veste unicuique Officiali, & Papæ Familiari distributionem hanc ipsam participantem fieri debere, etiam si vel plures Sancti unica solemnitate canonizarentur, vel unus Officialis plura officia administraret; ut deprehenditur ex scripturis, quæ adhuc extant in nuper memorata bibliotheca Casanatensi Urbis. Nulla scilicet habita fuit consideratio præteritæ consuetudinis; quia, cessante speciali consuetudine, vel legitima conventionem, excepto casu piæ causæ ad terminos Textus in cap. *Ad Apostolicam: de Simonia*, voluntaria, antecedens,

dens, & facultatem præferens solutio, quamvis continuata multorum annorum spatio, apta non est ad inducendam vim in futurum, juxta cummulata a Lagunez de fructibus par. 1. cap. 15. §. 4. num. 3. & seqq.

38 Hujus porro sacre Congregationis deliberatio ad effectum penitus perducta fuit tempore san. mem. Clementis XI. Delato quippe examine ad plenam Congregationem sacrorum rituum, occasione Canonizationis ab eodem peractæ quatuor Sanctorum, coacta fuit ipsa Congregatio die 27. Septembris 1712. cui interfuerunt Eminentissimi Domini de Abdia, Ferrarius, Sacripantes, Tremoville, Fabronus, Priolus, Thomafius, Ptolemæus, Casinus, Bichius, Imperialis, Barberinus, & Hannibal Albanus, tum Carolus Collicola postea Cardinalis, sed tunc uti Protonotarius sacre Congregationis implens vices Secretarii Inghiramii ægotantis, & egomet ut Fidei Promotor; atque adeo communi unanimique omnium suffragio statutum est, plane unicam unicuique pro veste solutionem esse faciendam, etiam si plurium Sanctorum fieret Canonizatio, & unicus insimul Officialis plurium officia gereret. Sacre item Congregationis sententia a Pontificia confirmatione robur obtinuit, ejusdemque ad amissim executio perfecta fuit tum in prædicta quatuor Sanctorum, tum in alia octo Sanctorum Canonizatione facta a Benedicto XIII. veluti cognosci poterit ex nominibus ædis nummulariæ S. Spiritus, apud quam pecunia deposita fuit pro expensis earumdem Canonizationum, & in qua quidem unaquæque expensa fideliter est adnotata. Hujus scilicet facti series unicuique suadere poterit, Apostolicam Sedem redundantæ expensarum resistere potius, quam patrocinari, dummodo ad ipsam ejus notitia perveniat.

### §. VII.

*De apparatu basilica Vaticana, & de pretiosis vestibus Pontificalibus ad Canonizationis solemnitatem necessariis.*

39 **I**N solemnitate Canonizationis amplum fit tabulatum in basilica Vaticana, in quo nedum thronus Pontificius, verum etiam sedilia pro Cardinalibus, Archiepiscopis, Episcopis, Pœnitentiariis, Præsulibus, & Officialibus Romanæ Curie collocantur; cujus porro ligna, expleta solemnitate, traduntur Canonice ejusdem Vaticanæ basilicæ, qui eorum pretium instar chori distributionum inter se dividere consueverunt. Egregia Canonizandi facinora, & insignia miracula depicta per universam basilicam conspiciuntur; & horum pariter icones eidem basilicæ Capitulo, perfecta celeberritate, tribuuntur. Ingens funalium cereorum & candelarum accensarum numerus tabulatum, altare, Apostolorum Confessionem, & universum basilicæ ambitum circumdat; & item quidquid funalium eorumdem cereorum & candelarum post Missam reliquum est, ad modo dictum pertinet ejusdem basilicæ Capitulum: sed ita tamen, ut ho-

rum omnium pretium, adhibita debita proportione, participant etiam Beneficarii, necnon Clerici Beneficarii, qui choro interfunt. Insuper in solemnitate Canonizationis Romanus Pontifex ut plurimum Missam canit, sicut alibi dictum est, aut saltem Missæ assistit cantatæ: cumque a Postulatoribus pretiosæ suppellectiles, & integrum Pontificale ornamentum comparentur; altaris pallium, super quo sacrificium offertur, pro usu ejusdem altaris conservatur in sacrario basilicæ, ceteræ autem pretiosæ vestes pro Missa cantanda, & universum Pontificale ornamentum ad summum ipsum spectat Pontificem, qui id postea vel donat sacrario aut palatii Apostolici, aut S. Petri, vel ad aliam ecclesiam intra Urbem, aut etiam extra Urbem muneris titulo mittit. Paris nimirum de Crassis in allegatis diariis testatur, se, ut certum faceret Leonem X. Pontificalia ornamenta occasione Canonizationis cum magna recenter fieri impensâ, afferri curasse ex sacrario palatii *planetam*, & *impluvium* cum imaginibus S. Bernardini factas sub Nicolao V. qui eum inter Sanctos solemniter retulerat: & ita quidem in Bononiensi Metropolitana Ecclesia conservantur adhuc sacra indumenta, quibus usus est Gregorius XV. in Canonizatione a se facta plurium Sanctorum; utpote quæ ab eodem Ecclesiæ ipsi donata, cui plurium annorum spatio ut Archiepiscopus laudabiliter præfuerat.

40 Magna profecto est pro his omnibus perageandis & comparandis impensâ; sed Romani Pontifices ejus moderationi maximopere studuerunt, nedum rejecta nimia superfluitate & abundantia, verum etiam facta conjunctione plurium Sanctorum, quos unica Canonizatione comprehendere consueverunt: quo nempe in casu cum unum sit tabulatum, unica tantum Missa cantetur, funales cerei & candelæ non multiplicentur, facta, & miracula Canonizandorum sic depicta exponantur, ut ea unius ex Canonizandis in una tabula, alterius autem in alia tabula repræsententur, partitio propterea expensarum, quæ tunc fit inter plures Postulatores, easdem reddit tolerabiles. Neque enim inficiari quis poterit maximam esse expensarum moderationem, si & ad ea, quæ modo dicta sunt, sedulo advertere velit; & ad alia, quæ in superiori paragrapho relata fuerunt, de pretio videlicet unius vestis Officialibus & Familiaribus Papæ persolvendo, etiam si plures Sancti simul canonizentur. Paris de Crassis hæc refert de ornamentis, quæ comparabantur pro solemnitate Canonizationis: *Omnis requisita paramenta, vestimenta, ornamenta tam sacra, quam non sacra, emuntur & fiunt nova. Primo quidem solebant Papa donari octo & decem petia tela cortine tam pro camisiis, recchettiis, amictu, alba, mappis altaris, & mappulis; quam pro caligis rubeis una, aut dua petia de panno scarlato pro diploidibus etiam quatuor, aut sex petia ex serico damasco, & tabino, & ex veluto. Item vestes suffulta, sive foderata ex pellibus luporum cervorum, sive lyncum, & zebellinorum, & martorum, & similia. Item pro mappis, & mappulis viginti, aut viginti quinque tela ortigina; præter paramenta sacra omnia nova ex auro purissimo pertinentia ad processionem, ad Missam & ad actum non solum Pontificis, sed*

etiam

etiam pro persona cuiusque Cardinalis Commissarii &c. præter mitram Papa ex perlis mediocribus, & præter calicem cum patena, & ampullas, & candelabra novem argentea, videlicet septem pro altari, & duo pro credentia, ac etiam præter pallium altaris, & mappas, & pallium pulpiti pro Evangelio per Cardinalem cantando, & præter baldachinum novum, & alia, quæ regulariter & ordinario sunt preparanda pro complemento actus. At hodie sola sacra dantur a Postulatoribus ornamenta necessaria summo Pontifici celebranti, Diacono, ac Subdiacono tum Latino, tum Græco, & Presbytero assistenti; datur mitra pretiosa; datur calix cum patena aurea; dantur mappæ, & mappulæ; datur pallium altaris: sed nec candelabra novem argentea, nec alia supra recensita dantur in Sanctorum Canonizationibus.

41 Impensa pro tabulato, luminibus, & pretiosis suppellectilibus inter necessarias computatæ fuerunt & enumeratæ in Congregatione antea enuntiata, id est destinata pro moderatione expensarum, quæ sunt in Canonizationibus; & quidem merito. Majestas quippe solemnitati deesset, si tabulatum, ut de eo primum dicamus, non fieret, atque adeo sine eo pauci solemnitatem videre possent, & cæremonias, ritusque, quibus peragitur. Porro, ut alibi visum est, olim in Canonizationibus alta voce legebantur miracula Canonizandorum: sed, cum præ magna hominum multitudine nemo profecto esset, qui legentem audire posset; ut hominum pietati nihilominus satisfaceret, pictura, quæ ab omnibus videri potest, in lectionis locum ideo est substituta. Celebrantem vero Romanum Pontificem, aut Missæ adeo solemniter in tanta re assistentem, ecquis est qui asserere audeat, pretiosam dedecere suppellectilem; cum, serventibus etiam in Christianam Religionem Ethnicorum persecutionibus, pretiosa similiter suppellectili uteretur Ecclesia, teste S. Augustino lib. 3. contra Cresconium cap. 29. num. 33. tom. 9. oper. ubi hæc profert ex gestis Proconsularibus: Constantino Maximo Augusto, & Constantino Juniore Nob. Cæs. Coss. &c. Posteaquam perventum est in bibliothecam, inventa sunt ibi armaria inania. Ibi protulit Silvanus capitulatam argenteam, & lucernam argenteam. Antea quoque scripserat idem Augustinus: calices duos aureos, itemque calices sex argenteos ab eodem Silvano traditos; ut evinceret, eum persecutionis tempore fuisse traditorem. In libro itidem Pontificali, qui Anastasii nomine inscribitur, tom. 2. in Silvestro pag. 278., præter alia vasa aurea, & argentea ibi memorata, sic de eo legitur: Donavit patenam argenteam pensantem libras viginti .... scyphos argenteos duos, qui pensaverunt singuli libras denas .... amas argenteas duas &c. & pag. 307. Obtulit candelabra aurichalca septem ante altaria, quæ sunt in pedibus decem. Quin & alia plura ex eodem libro Pontificali desumpta, ad rem, de qua agimus, facientia, collecta legi possunt tom. 1. de liturg. Rom. Pontif. cap. 29. disquisit. de sac. ministris. eruditi viri Dominici Georgii Præfecti bibliothecæ Cardinalis Josephi Renati Imperialis. Quatenus autem aliquis subdere petulanter vellet, non dedecere urique pretiosam suppellectilem Romanum Pontificem celebrantem, im-

mo vero ei maxime convenire, sed ea uti posse, quam jam habet in sacratio sui Pontificii sacelli, sublata Postulatorum impensa; hæc tamen nimis audax objectio sua non careret responsione: nec enim habet prædictum sacrarium tot pretiosas vestes, quot sorte putatur habere. Habuit nempe, sed temporum injuria perierunt; & quotidie Ædituus sacri palatii aut antiquas restituere, aut novas ex palatii redditibus cogitur instaurare, ne desint necessaria. Præterquamquod, si id fieret, quod postulatur, non possent, expleta Canonizatione, Romani Pontifices planetam, calicem, & cetera Pontificalia ornamenta aliis ecclesiis, ut eorum mos est, dono dare.

42 Funalium denique cereorum, aliorumque luminum incensionem in adeo magna celebritate ille solum adversari poterit, qui cereorum usum tantum nocturno tempore censet in ecclesiam admittendum; sacra idcirco contempta antiquitate, cum Paulinus de S. Felice natal. 3. hæc habeat:

*Clara coronantur densis altaria lychnis,  
Lumina ceratis adolentur odora papyris:  
Nocte dieque micant; sic nox, splendore diei  
Fulget, & ipsa dies caelesti illustris honore  
Plus micat innumeris lucem geminata lucernis.*

43 Qui vero plura de hoc argumento addiscere cupit, legere poterit opera celeberrimorum virorum, qui, congesta undique sacra eruditione, argumentum ipsum solidissime pertractarunt; Ludovici videlicet Antonii Muratorii tom. 1. *anecd. dissert.* 16. quam rursus edidit in recensione operum ejusdem S. Paulini; Vincentii Ludovici Gotti amplissimi Cardinalis tom. 1. *de vera Ecclesia Christi* cap. 11. §. 6. num. 52. Auctoris demum anonymi tractatum Parisiis editum anno 1721. *de vera Ecclesia spiritu in usu sacrar. carem.* §. 11. pag. 80.

## §. VIII.

*De statuta contributione a quocumque Postulatore solvenda pro dissolvendo  
are alieno contracto in parandis splendidis aulais basilica  
Principis Apostolorum.*

44 **V** Aldenses, Henricianorum soboles anno 1160. a Petro Valdo ab inferis excitata, Galliam, Hispaniam, Angliam, Germaniam, & Italiam fœdarunt. Inter cetera autem eorum dogmata satis iniqua erat & illud, ornatum ecclesiæ esse peccatum, teste Fr. Rainerio Ord. Præd. tom. 25. *biblioth. PP.* pag. 266. cap. 5. Verum in Concilio Oxoniensi, quod habitum est anno prædicto, tum illud, tum alia eorundem dogmata fuerunt condemnata. Dicitur enim *psalm.* 25. v. 8. *Dilexi decorem domus tue, & locum habitationis gloriae tuae.* Cardinalis item Baronius vir æternum laudandus ad an. 57. & 58. ecclesias pluribus, iisque splendidissimis ac ditissimis ornamentis antiquitus refertas fuisse demonstravit: cumque Jo. Henricus

ricus Ottius Calvinista in libro, cui titulus, *examen perpetuum Historico-Theologicum in Cardinalis Baronii annales*, eum arrodere ausus esset, Baronium Muratorius strenue vindicavit *dissert. 16. supra citat.* Consuli quoque potest Joannes Tomæus Episcopus Bosnenfis in *oratione pro ecclesia ornamentis*.

45 Pio itaque spiritu ducti Romani Pontifices, templorum utique ornati universe prospexerunt: at a ciem tamen cogitationum suarum in basilicam Principis Apostolorum diligentius intenderunt; ut in arce videlicet Religionis, hoc est in Urbe, sacrum & conspicuum B. Petri templum erigeretur; idque non suum, nec cuiusque proprium, sed omnium Christianarum nationum commune, positum quippe in honorem ejus, & cui, & cujus Successoribus a Deo, ejusque Filio data est potestas super omnes gentes.

46 Templum prædictum egregia forma & magnitudine a fundamentis a Constantino ædificatum inter reliquas Urbis ecclesias magna subinde reparatione indigebat. Julius hinc Papa II. manum operi admovere tentavit. Leo X. & Hadrianus VI. variis occurrentibus impedimentis, non potuerunt perficere, quod fuerant meditati. Ceteris autem felicior Clemens VII. magnum opus aggressus est; cujus deinceps vestigiis plerique ex Successoribus instituerunt. Quare & Sixtus V. & Paulus V. & Urbanus VIII. & Alexander VII. tholum insignissimum construxerunt, basilicam amplificaverunt augustissimis porticibus exterioribus, & *Confessionem*, ut vocant, & sublime cathedræ altare ære instruxerunt atque ornarunt. Nimirum, etsi sciamus, Deum non in manufactis templis habitare, nec manibus humanis coli, aut aliquo indigere, uti legitur *Actuum 17. 25.* scimus etiam, voluisse magna auri profusione templum a Salomone fabricari 3. *Regum cap. 5. & 6.* Quidni ergo Romani Pontifices ex universis orbis subsidiis potuerunt laudabiliter templum omnium, ut diximus, nationum attollere, idque Deo dicare in honorem Petri Principis Apostolorum, necnon, ex iisdem subsidiis, ut pariter supra vidimus, aliquid aliquando desumere pro Christianæ reipublicæ bono & tuitione? Quapropter S. Ambrosius in libro de *Officiis relatus in can. Aurum: 12. quest. 2.* inquit: *Aurum Ecclesia habet, non ut servet, sed ut erogat & subveniat in necessitatibus &c. Nemo potest queri, quia captivi redempti sunt; nemo potest accusare, quia templum Dei ædificatum est.*

47 Nonnulla nempe supra tetigimus de eximiis subsidiis a san. mem. Clemente XI. pro Christianæ reipublicæ defensione inde suppeditatis, nunc autem aliquid indicandum est de liberalitate venerabilis Dei servi Innocentii XI. erga Viennam Austriæ, cum ab immani Turcarum Tyranno obsidione cingeretur: *Quis enim* (verba sunt Auctoris tractatus de libertat. Eccles. Gallic. lib. 6. cap. 11. num. 6.) *obsessa a Turcis Vienna, toti fere Ecclesia non metuebat exitum? Quis Othomanica potentia in Germaniam, Italiam, ac remotiores deinde provincias irrumpenti obstitisset, Christianis Principibus inter se concertantibus, nisi providentia summi Pontificis in se ipsum avari,*  
& in

*Et in Ecclesiam liberalissimi, suis consiliis, vigiliis, ac curis assiduus effusam thesauri sui largitionem adiunxisset; quo Principes ad communem Christiani nominis hostem repellendum armatos iuvaret, ac, cum propriis ipsum manibus pugnare non deceret, effusis pecuniis vinceret? & ante eum sulse scripserat Dominicus Berninus in suis memoriis historicis part. 2. pag. 65. & seqq.*

48 Porro, ut ad rem redeamus, aulæ Vaticani templi majestati congruentia adhuc deerant, quæ universam usquequaque basilicam ornamrent. Cum igitur Alexander Papa VII. conspicua summa æris alieni Fabricam S. Petri pro eis parandis gravasset, pro faciliiori postea ejus dissolutione statuit, ut in unaquaque Canonizatione, & pro unoquoque Canonizando centussium monetæ Romanæ sex millia eam in causam eroganda solverentur. Quia vero ex aliis Fabricæ redditibus, & partim etiam ex modo memoratis solutionibus subinde factum est, ut ære alieno Fabrica ipsa levata fuerit; quamvis aulæ etiamnum re vera perfecta non sint, & serica villosa desint auro intexta, quæ pro eorundem aulæorum complemento requirerentur, & quæ sane majorem exposcerent impensam; ab opere nihilominus perficiendo cessatum est, atque adeo exinde Romani Pontifices aut aliquando Postulatoribus omnino liberaliter summam prædictam condonarunt; aut, si eam quidem receperunt, diminutam tamen dari passi sunt, hoc est centussium tantummodo quatuor millium, vel etiam duntaxat trium millium; quam pecuniam in causas deinde pias, ut puta in alia ornamenta ejusdem Vaticani templi, aut aliarum ecclesiarum sive in Urbe, sive extra Urbem, impenderunt: ita ut aptari posse videantur Pontificibus Romanis, quæ S. Cyrillus Hierosolymitanus catechesi 14. num. 14. scribit de Imperatoribus, qui religionis gratia ecclesiam ornabant: *Hujus temporis Imperatores (substituunt: Romanos Pontifices) sanctam hanc, in qua sumus Salvatoris Dei resurrectionis ecclesiam (sufficit: has sanctas ecclesias, in quibus nunc sumus) argento indictam, & auro infuso distinctam extruxerunt, & pretiosis ex argento, auro, ac gemmis, domariis exornarunt.*

49 Ecclesia corpus est, sicuti scribit Apostolus ad Ephes. cap. 1. & 4. Fideles autem omnes sunt membra illius, ut habetur 1. Corinth. 12. v. 12. quare, si quid patitur unum membrum, compatiuntur omnia membra; & si gloriatur unum membrum, congaudent omnia membra, quemadmodum extat in eadem 1. epist. ad Corinth. 12. v. 26. Scilicet hinc fit, ut egenti Capiti, hoc est Romano Pontifici, ditiora membra largius debeant subvenire: quamobrem & ipse ceteris membris, hoc est aliis Fidelibus, & inferioribus Ecclesiis, inopia laborantibus valeat in omnem eventum ferre suppetias. Sic Christianis Hierosolymitanis magna pressis egestatè ceteri succurrerunt effusa cum liberalitate; quia secundum virtutem testimonium illis reddo, & supra virtutem voluntarii fuerunt, inquit Apostolus 2. ad Corinth. 8. v. 3. ideoque hunc modum ipse præscripsit v. 13. & 14. *Non enim ut aliis sit remissio, vobis autem tribulatio, sed ex aequalitate. In presenti tempore vestra abundantia illorum inopiam suppleat, ut & illorum abundantia vestra inopia sit supplementum, ut fiat aequalitas.*



50 Omnia itaque in unum redigendo, ex huc usque dictis unusquisque facile sibi suadere poterit, expensas utique esse necessarias ad pertractandas, atque ad exitum perducendas Beatificationum, & Canonizationum causas, sed & Romanos Pontifices earum moderationi studuisse ac studere, & plerasque immodicas ac superfluas, quæ paulatim irreperant, sublatas fuisse; atque adeo aliquas, quæ remanserunt, necessitati, ac solemnitati congruentes & debitas esse: quibus porro omnibus si insuper addatur, pecunias ut plurimum constari ex elemosynis, quæ universo ex orbe colliguntur, nec modicas eas esse, quæ a Romana pietate subministrantur, nulla profecto apparebit vis expensarum tanta, quæ tolerari non possit. Sæpe citatus Paris de Crassis ait, se legisse in libris Rabioli, & Augustini Patritii Magistrorum cæremoniarum, erogatam fuisse in Canonizationem S. Bonaventuræ summam ducatorum auri 27000. in libris autem ejusdem Augustini, & Joannis Burchardi, in Canonizationem S. Leopoldi erogatam fuisse summam ducatorum auri 25000. Item Dominicus Cappellus ad calcem Actorum Canonizationis S. Francisci de Sales, qui solus fuit inter Sanctos relatus ab Alexandro VII. indicem proferat expensarum, quæ fuerunt centussium monetæ Romanæ 31903. Verum, sublatis deinde ab Innocentio XI. sportulis, necnon aliis moderationibus subinde pariter introductis, si quidem una eademque Canonizatione plures Beati comprehendantur, expensa minime excedit summam centussium circiter 14000. Huc usque deducta a nobis scripta sunt, antequam fuermus ad summum Pontificatum evecti: cumque nonnulla dixerimus indecisa remanere, sacrorumque rituum Congregationis judicio nonnulla esse definienda, quæ ad expensas, quæ fiunt in Beatificationibus fervorum Dei pertinent, in ipso nostri Pontificatus initio manum admovimus ad novam expensarum taxam statuendam, quam & Deo dante, non sine magno labore statuimus in posterum observandam. Hæc datur in Appendicibus, & in ea, ut lector advertere poterit, superflua rescantur, incerta determinantur, æqua pro laborantibus contributio reservatur, nec aliquid operis magnitudini & magnificentiæ subtrahitur: quantitas autem illa scutorum, de qua superiori num. 48. quæque pro quolibet Canonizando in majori summa aliquando persolvebatur, redacta est in nova taxa ad quantitatem scutorum trium millium a Romano Pontifice expendendam in usum sacrarum Missionum, ob quam causam a nobis applicata est sacræ Congregationi de propaganda Fide, quæ sacris Missionibus præest.



## CAPUT ULTIMUM.

*De quibusdam cautionibus necessariis ad custodiam, & erogationem pecuniarum ex pia Fidelium largitate collectarum pro causis Beatificationis, & Canonizationis; deque nonnullis questionibus ad hanc eandem materiam pertinentibus.*

1 **A** Liquæ sunt Beatificationis, & Canonizationis causæ, pro quarum subeundis expensis nonnulli pii Fideles *loca montium*, aut aliam pecuniarum summam reliquerunt cum onere eam multiplicandi, vel certam pecuniam in monte Pietatis, aut in æde nummularia S. Spiritus Urbis deposuerunt; ut ex redditibus scilicet *locorum montium*, aut ex multiplicatione, necnon, si forte majores occurrant expensæ, ex venditione etiam, ac erogatione aut partis, aut totius capitis adimpleri posset, quidquid hac in re opus est. In harum nempe causarum numero recenseri poterunt causæ Canonizationis S. Thuribii, S. Julianæ, Beatiæ Alexii de Falconeriis, S. Francisci Solani, servi Dei Joseph a Cupertino, servi Dei Apparitii, & B. Hyacinthæ de Marefcottis.

2 Itaque quoad custodiam & erogationem pecuniarum modo prædicto a piis Fidelibus relictarum nihil, aut vix aliquid occurrit notatione dignum; cum totum negotium pendeat ab eorundem arbitrio, necnon a ratione, qua id ipsi vel inter vivos, vel in ultima voluntate constituerunt. Nimirum solum adnotasse fas sit, maximopere expedire, ut facto deposito pecuniarum aut in monte Pietatis, aut in nummularia S. Spiritus æde, vel *locis montium* comparatis, pii Fideles caveant, ne ulla unquam fiat impensa, multoque minus ulla unquam capitis erogatio sine notitia & subscriptione Fidei Promotoris, vel Subpromotoris. Cum enim causæ Beatificationis, & Canonizationis in longissimum tempus protrahantur, ideoque non sit impossibile, ut vel inter heredes, vel inter illos, qui sancto huic operi absolvendo præficiuntur, quis reperiat, qui debitam in expensis minime adhibeat diligentiam, ne dicam, fidelitatem; nullum proinde possibili huic infortunio aptius remedium inveniri potest, quam si nihil erogetur sine subscriptione Fidei Promotoris, aut Subpromotoris. Ordo certe iste præscriptus fuit, atque servatus quoad expensas, quæ factæ sunt in causa S. Thuribii. Nulla enim contigit erogatio pecuniarum, quæ non fuerit approbata a Fidei Subpromotore, cum ita sane cautum fuisset in earundem pecuniarum depositis, & occupationibus: tum ipsa etiam cautio præfinita & adhibita fuit in expensis factis pro causa Beatificationis B. Hyacinthæ de Marefcottis; nihil siquidem de eis persolutum fuit ad eandem pertinens causam, absque eo quod a me tunc Fidei Promotore subscriberetur & approbaretur, cum id jussisset vir amplissimus claræ memoriæ & qualibet laude major, Cardinalis

dinalis Galeacius de Marefcottis fedulus illius Poſtulator; qui videlicet, præter impenſas a principio cauſæ huc uſque factas, reliquam inſuper pecuniarum ſummam ſubminiſtravit, ut cetera fierent ad exitum uſque ejuſdem cauſæ neceſſaria.

3 Ea, inquam, quæ modo dicta ſunt, pendent, ut vidimus, a pia Fidelium voluntate. Quia vero non in omnibus Beatificationis, & Canonizationis caſſis ſingularis præſto adeſt perſona totam eam pecuniæ ſummam ſuppeditans, quæ pro cauſa requiritur, ſed pleræque ſunt cauſæ, in quibus ſumma pecuniarum conſtat ex eleemoſynis a pluribus diverſiſque perſonis ſubminiſtratis, quæ porro ad manus alicujus Poſtulatoris ex Religioſa quapiam familia deveniunt, ut pro ſua prudentia & arbitrio illas adminiſtret, prout exigit cauſæ neceſſitas; facta idcirco aliquando eſt diſcuſſio, ullus ne modus adinveniri poſſet, quo eleemoſynæ iſtæ caute cuſtodirentur, & fideliter erogarentur: nimirum, non quia Poſtultores, qui tunc in cauſas incumbabant, aliqua reprehensione vel minima digni unquam fuerint viſi; verum quia, cum tractu temporis aliquis eſſe poſſet cauſarum Beatificationis, & Canonizationis Poſtulator minus ſollicitus, aut cautus in erogatione pecuniæ, expedire viſum fuit, malum prævenire, regulam ſtatuendo generalem, & ad hanc ipſam rem opportunam.

4 De eadem itaque re actum fuit in ſacrorum rituum Congregatione ordinaria die 7. Auguſti 1694. & die 21. ejuſdem menſis & anni. Sanctæ hinc memoriæ Innocentius Papa XII. Congregationem particularem deſtinavit Dominorum Cardinalium Carpinei, Caſanatæ, Colloredi, & Albani poſſe ad ſummum Pontificatum eveſti: in qua quidem Congregatione habita ſubinde die 11. menſis Julii anni ſequentis 1695. cum ei præter dictos Cardinales interfuiffent etiam Secretarius Congregationis ſacrorum rituum, & Fidei Promotor, deliberatum fuit, ut Poſtultores ſexto quoque menſe conficerent indices expenſarum, eoſque pro obtinenda eorundem approbatione omnino traderent Cardinali cauſæ Relatori; ut hic, acceptis iſſdem indicibus, eiſque mature diſcuſſis una cum Secretario, & Fidei Promotore pro tempore, expenſas legitimas approbaret, inutiles autem & arbitrias rejiceret; utque in redditione rationis nullæ in poſterum habendæ eſſent expenſæ ipſæ non approbatæ, aut rejectæ. Die quoque 6. menſis Septembris anni 1696. iterum habita fuit eadem Congregatio, & in ea ſtatutum fuit, ut Secretarius Congregationis ſacrorum rituum a quocumque ex Poſtulatoribus, ſeu Procuratoribus cauſarum Beatificationis, & Canonizationis per juratum indicem ab iſſdem tradendum exquireret numerum certum pecuniarum, quæ pro unaquaque cauſa ad Urbem delatæ tunc aderant, & inſuper penes quas perſonas, ſeu depoſitarios, quibuſque conditionibus, cautionibus, & fidejuſſionibus tunc eſſent depoſitæ.

5 Sed non fuerunt poſtmodum hæc decreta publicata, & multo minus.

nus ad effectum perducta, eo quia forte deprehensum est primo, indicem ipsum pecuniarum, qui dandus dicebatur Secretario sacre Congregationis, dari a Postulatoribus, qui ut plurimum sunt Regulares, suis Superioribus; præterea, cautionem deponendi pecunias ipsas in sacro monte Pietatis, vel occupandi in *locis montium* notissimam esse, & sere ab omnibus adhibitam; demum, Superiores, quibus redditur ratio pecuniarum erogatarum, legendo expensarum taxationem jam typis impressam, nullo negotio dignoscere posse, utrum factæ expensæ iustæ fuerint, an arbitrarie: quo nempe in casu novorum decretorum editio superflua quodammodo videri potuisset. Verumtamen, etsi nunquam promulgata, operæ pretium existimavimus hic ea etiam indicare, ne quid intactum super sit, quod fuerit a sacrorum rituum Congregatione vel definitum, vel excogitatum in his, quæ ad præsens pertinent causarum Beatificationis, & Canonizationis argumentum.

6 Reliquæ igitur tantummodo sunt quæstiones quædam eadem super re identidem occurrentes; quarum prima in eo versatur, an, absque eo quod potestas data sit ab Apostolica Sede, permissum sit Capitulo, Monasterio, aut alii cuicumque loco Religioso alienare, vendere, aut obligare bona pro perferendis expensis ad aliquam Beatificationis, & Canonizationis causam necessariis, ubi scilicet Capitulum ipsum, aut Monasterium Procuratorem, vel Postulatorem constituerunt, ut illam suo nomine ageret. Affirmando quippe huic quæstioni respondit Rota *decif. 68. num. 18.* coram bon. mem. Anfaldo; tum quia expensæ huius generis sunt laudabiles, & finis, ad quem referuntur, decus respicit Ecclesiæ universalis, præter proprium & particulare; tum quia eadem expensæ sunt ob oculos Romani Pontificis, perinde quasi earumdem scientia approbationem continuo præferat, approbatio autem ab Apostolica Sede continuo datam potestatem. Attamen, quidquid de causa sit, cum in alienatione bonorum Ecclesiæ, & in alio quocumque pacto, per quod eorum dominium transferatur, aut super illis obligatio imponatur, causa utique prætermittenda, necessaria adeo sit ab Apostolica Sede facultatis impetratio, ut aliter contrahentes in anathema incurrant, juxta Textum in *cap. Ambitiosa: de reb. Eccles. non alien. inter extr. comm.*; proinde maximopere dubitarem, ne vel ipsæ supra relatæ alienationes fieri possent, absque eo quod ab Apostolica eadem Sede expressa obtineatur facultas; multo autem magis, quia minime valet argumentatio a modo, quo sunt expensæ, ante oculos scilicet Romani Pontificis, ad conflandæ pecuniæ, per quam sunt, approbationem, seu facultatem. Scit enim quidem summus Pontifex, causam Beatificationis, aut Canonizationis huius, vel illius servi Dei pertractari; virtutes ac miracula, antequam ad causæ approbationem deveniat, sedulo perscrutatur; atque adeo expensarum necessitatem haud ignorat: sed, cum ignoret, utrum expensæ ipsæ fiant ex elemosynis Fidelium, an ex peculiari quopiam legato, an potius ex venditione bonorum

rum ad aliquam Ecclesiam pertinentium, unusquisque facili negotio videre potest, approbationem Pontificiam vicem implentem potestatis ab Apostolica Sede expresse concedendæ in hoc rerum statu adhuc desiderari.

7 Secunda quæstio id respicit, an Procurator constitutus ab aliquo in causa Beatificationis, & Canonizationis nedum obligare possit bona constituentis pro necessariis expensis, verum etiam, urgente necessitate, comparare valeat pecunias fœnore, ut necessario adimplenda adimpleantur. Porro, hac in re omnino affirmative respondendum esse, nobis videtur: primo scilicet, quia Procuratori permixta dici debent ea omnia, quæ necessaria sunt ad rem mandatam gerendam; quomobrem dicitur, quod præpositus emendis mercibus obligat præponentem mutuanti pecunias eam ob causam, juxta Textum in l. *Finali. ff. de exercit. act.* idemque obligat pariter præponentem, si pecunias acceperit pro solvenda pensione tabernæ, juxta Textum in l. *Quicumque §. Tamen. ff. de instit. act.* Insuper autem, quia, cum perdifficile sit invenire, qui gratis pecuniam subministret, Procuratori intelligitur data facultas eam fœnore sumendi, ne opus sibi commissum sine exitu sit deferendum; ut apud Baldum *consil. 383. num. 5. lib. 3. Maltrill. decis. 204. Sanfelici. decis. 181. Rota coram Coccino decis. 1541. num. 8. & seq.* Quæ quidem omnia potiori adhuc jure sunt admittenda, quando in procuracionis mandato adsunt clausulæ hanc facultatem vel expressis, vel æquam virtutem præferentibus verbis Procuratori impertientes; quemadmodum hoc super Beatificationis, & Canonizationis argumento, confirmando præcedentes decisiones editas coram Emerix juniore, late respondit Rota in *Romana, seu Limana cambiorum 10. Decembris 1696. coram cl. mem. Cardinali La Tremoville*, quæ est *decis. 54. post Cardinalem Albitium de inconst. in judiciis, & in decis. 68. coram bon. mem. Anfaldo*: quæ ipsa & docte de more resumuntur, & bene explicatur ab Eminentiſſimo Cardinali Petra in *comment. ad Constitut. Apostol. 10.4. in notis ad Constit. 7. Joannis XXII. sess. unica num. 8. & seq. pag. 57. & 58.*

8 Tertia quæstio conspecta, an pecuniæ collectæ ex elemosynis Fidelium post Beatificationem, ut transitus fiat ad Canonizationem, erogari valeant in solutionem æris alieni Beatificationis occasione contracti, ita ut creditores super hisce pecuniis suum jus experiri valeant. Negatio autem præsto est, quandoquidem pecuniæ eo modo collectæ non sunt inter bona debitoris; cumque fuerint a Fidelibus datæ, ut a Beatificatione ad Canonizationem transitus fiat, nequeunt in alium usum converteri sine Sedis Apostolicæ concessione, juxta Textum expressum in *Clement. Quia contingit: tit. de relig. domib.* atque ut ad amussim respondit Rota in *Romana revocationis sequestri 4. Maji 1703. & in eam confirmante 15. Februarii 1704. coram bo. mem. Muto.*

9 Quarta quæstione inquiritur, quid faciendum sit de residuis elemosynis, quæ collectæ fuerunt, si forte illarum pars superſit, postquam absoluta est causa Beatificationis, & Canonizationis. Hac in re, quoniam

agitur de commutanda voluntate, confugiendum est ad Sedem Apostolicam; Apostolica autem Sedes commutationem indulgere debet pro usu proximiori voluntati illorum, qui eleemosynas ipsas suppeditarunt: ita namque Federic. de Senis *consil.* 175. *versic. Sed prædicta*, Riccius *decis.* 83. n. 5. part. 1. Sanchez *lib.* 4. *consil.* cap. 1. dub. 6. Amostaz. *de causis piis* cap. 14. num. 42. Barbosa *jur. Eccles. univers.* lib. 3. cap. 21. num. 59. simileque est id, quod habetur cap. 8. *Concil. Trid. sess.* 25. *de reformat.* ubi in materia nosocomiorum decessit, quod, si vel nullæ, vel perpaucae reperiantur personæ, quæ morbo laborent, pro quo nosocomium est institutum, istius proventus convertantur in alium usum proximiorum, & magis similem institutioni Fundatoris; uti recte adnotarunt Tusch. *lib.* 2. *de visit.* cap. 13. num. 24. Nicol. *institut. Canon. tit. de religiosis domib.* num. 5. Moneta *de commut. ultim. voluntat.* cap. 3. num. 82. & cap. 5. num. 327. Palma senior *consil.* 60. num. 21. Zypæus in *analys. juris Pontific.* lib. 3. tit. *de religiosis domib. consult.* 1. num. 14. Poterunt exempli gratia eleemosynæ, quæ collectæ fuerunt pro causa Beatificationis & Canonizationis, & quæ eadem absoluta, supersunt, interveniente Sedis Apostolicæ auctoritate, erogari in constructionem aut facelli, aut templi ad honorem Canonizati: id enim dici potest usus proximior & magis cohærens voluntati eorum, qui pecunias elargiti sunt; & eo utique modo in facti eventu definivit sacra Congregatio Episcoporum, & Regularium. Scilicet, cum Patres Observantes Reformati exposuissent, quod aliquæ supererant eleemosynæ ex illis, quæ fuerunt collectæ pro causa Beatificationis servi Dei Jacobi Illyrici; vulgo *de Biretto*, causa autem ipsa dici poterat absoluta, approbato quippe cultu immemorabili, aliud de ea fieri, aut ulterior ab ipsa progressus haberi minime poterat; prædicta sacra Congregatio die 17. Novembris 1713. audire voluit R. P. D. Secretarium sacre Congregationis rituum, tum die 1. Martii 1714. facultatem impertita est erogandi residuas eas eleemosynas in ædificationem facelli ad honorem ejusdem servi Dei erigendi.

10 Inter ceteros Regulares Ordines, qui causas promovere Beatificationis, & Canonizationis suorum Dei servorum, hoc est illorum, qui idem Institutum professi fama sanctitatis & miraculorum obierunt, Ordo Seraphicus FF. Minorum reperitur. Hoc itaque posito, quaeritur præterea, an S. Francisci Regulæ obstat eleemosynarum petitio pro faciendis expensis ad causas prædictas necessariis.

11 Ratio autem dubitandi oritur ex cap. 4. *Regula* eorundem Fratrum (inter opera S. Francisci pag. 31.) in quo legitur: *Præcipio firmiter Fratribus universis, ut nullo modo denarios, vel pecuniam recipiant per se, vel per interpositam personam; tamen pro necessitatibus infirmorum & aliis Fratribus induendis .... eo semper salvo, ut, sicut dictum est, denarios, vel pecuniam non recipiant.* Quamvis enim præscriptum in ipsa Regula fuerit extensum ad quasdam alias necessitates pro tempore occurrentes, seu etiam ingruentes, sicuti probat Textus in cap. *Exitit §. In alio quoque capitulo, & §. Et, quia oportet,*

oportet, de verbor. significat. in 6. concordatque alius Textus in Clementina Exivi §. Porro, tit. de verbor. significat. Cum etiam recursus ad amicos speciales expresse tantum in duobus casibus secundum Regulam concedatur, videlicet pro necessitatibus infirmorum, & Fratribus induendis; idque pie & rationabiliter, considerata necessitate vita, ad alias necessitates Fratrum pro tempore occurrentes, cessantibus elemosynis, seu etiam ingruentes saepe dictus Prædecessor noster duxerit extendendum: Attendant Fratres præfati, quod pro nullis causis aliis quam prædictis, vel similibus, in via, vel alibi recurrere licet eis ad amicos huiusmodi, seu sine dantes pecunias, seu deputati per ipsos, seu Nuntii, vel Depositarii, seu alio quovis nomine appellentur; etiamsi concessi per eandem declarationem modi circa pecuniam integre servarentur: hæc tamen, & his similia vera tantum, & probata sunt, quoad res vere necessarias, non autem & quoad voluntarias, uti bene ponderat Glossa ad dictam Clementinam in v. vel similibus, ubi: Necessariis, non voluntariis. Declaratur autem in dicto §. Porro, quod in iis, quæ sunt necessaria ad victum, vestitum, Divinum cultum, et spirituale studium, concessus est Fratribus usus necessariorum rerum; & hæc causa videntur generaliter omnes necessitates comprehendere. Tamen, quia quædam etiam sunt eis necessaria, quæ non præcise concernunt causas præmissas immediate, ideo hic adjecit, quod etiam hoc eis liceat pro causis similibus; ut, si, dum transiunt de loco ad locum ex causa Ordinis, non permittuntur in certo loco transire, nisi solvant pedagium: licet enim non debeant ad hoc cogi, tamen ex quo de sacro coguntur, licitum est eis acquirere per elemosynam, ut solvant, ne impediuntur per hoc, quod in via sequitur &c. Hinc igitur fit, ut rationabiliter dubitari possit, an juxta Regulam sit illis permittum quærere elemosynam pro causis Beatificationis, & Canonizationis; siquidem causæ hæc ipsæ voluntariæ, non necessariæ dicuntur.

12 Verum, his adhuc nihil obstantibus, concludendum est, minime adversari Regulæ S. Francisci Fratres prædictos, si pro expensis necessariis in causis memoratis elemosynas quærant. Primo nempe quia, cum licitum illis sit suasionibus & consiliis pecunias quærere pro aliis personis extraneis indigentibus, ac pro piis operibus perficiendis, etiamsi opera, quæ perficiuntur, ad ipsos non pertineant, sed sint prorsus aliena, absque eo quod ullum committant adversus Regulam peccatum, quin immo cum laude ac merito apud Deum; quemadmodum late docent ejusdem Regulæ explicatores, Sigenza in cap. 4. Regul. Minor. §. 18. Politius ibidem num. 27. Daniel Brinkner eodem loco num. 46. Sanctiorius de poenis cap. 4. pag. 153. jure potiori non agent contra Regulam Fratres ipsi Minores, si elemosynas quærant pro causis Beatificationis, & Canonizationis suorum servorum Dei: nam Beatificatio, & Canonizatio sunt opera piissima, & ad Religionis ac Fidei incrementum maxime pertinentia. Secundo, quia, cum pro Cruciatu strenue laboraverint SS. Bernardinus Senensis, Joannes de Capistrano, & Jacobus Picens, Beatus autem Bernardinus Felternensis plura peregerit pro erigendis montibus Pietatis adversus pravas Judæorum usuras;

cumque omnes hi viri pietate ac sanctitate celebres, etsi Ordinem Minorum professi fuerint, laudabiliter tamen ea præstiterint, quæ modo dicta sunt; signum evidentissimum id est, sine Regulæ offensione quæri posse eleemosynas pro efficiendis piis operibus, quæ nihil habent commune cum personis, statu, & officiis dictorum Fratrum; ideoque jure, ut diximus, potiori quæri etiam posse eleemosynas pro causis Beatificationis, & Canonizationis servorum Dei, qui idem Institutum professi sunt. Tertio, quia, cum hæc passim fiant, scientibus Romanis Pontificibus, puritatem Regulæ & statum Fratrum Minorum optime edoctis; percipi nequitiam potest, ipsis scientibus fieri, si Regulæ adversarentur. Quapropter a primo ad ultimum stat, non esse a Regula vetitum, Fratres Minores eleemosynas ab amicis percipere pro expensis, quæ necessariæ sunt in causis Beatificationis, & Canonizationis; velut optime ad rem concludit P. Augustinus Mattheucci sacre rituum Congregationis olim Consultor in opere cui titulus, *Schola paupertatis, sit. 5. consil. 1.*

13 Hæc, inquam, quoad facultatem quærendi eleemosynas. Quid autem dicendum erit quoad legatum vel domus, vel prædii, vel census, aut locorum montium, quod fiat Fratribus Minoribus, ut redditus, vel caput erogentur in expensas necessarias pro causis Beatificationis, & Canonizationis? Eritne ratum, an potius ad Fabricam S. Petri existimandum est id pertinere? Videntur scilicet hujus generis legata ad Fabricam esse referenda, sicuti legitur in *compendio privilegiorum ejusdem Fabricæ collectorum* a bon. mem. Vespignano pag. 25. *Omnia legata, & hereditates, donationes, & alias quascunque dispositiones ad, & in favorem FF. Capuccinorum, & Minorum Majoris Observantia, & quorumcumque aliorum Regularium, sive Clericorum Secularium, quibus ab Instituto Regula habere & possidere bona etiam in communi, prohibitum est; omnia legata, hereditates, & donationes necdum in vim Institutionis, sed etiam substitutionis, & fideicommissi eisdem facta, & factas ad dictam Rev. Fabricam spectare & pertinere, ac spectavisse & pertinuisse: sique privilegia & facultates ultra eorum litteralem sensum, consuetudine interpretativa, ita declarata & pronuntiata fuisse, prout etiam Nos ex nunc, prout ex tunc, declaramus & pronuntiamus.*

14 Additur, quod secundum Regulam S. Franciscei cap. 6. Fratres nihil sibi possunt assumere, non domum, non locum, non aliquam rem; quod ipsum pariter habetur in bulla 5. Honorii III. Bullar. nov. 10. 3. part. 1. Sunt enim incapaces annuorum reddituum, juxta Textum in Clementina Exvi: *de verb. significat.* sunt autem incapaces eorumdem annuorum reddituum, etiam si relictæ fuissent cum onere celebrationis Missarum, juxta definitionem sacre Congregationis relatam a Fagnan. in cap. Nimis prava num. 49. et num. 53. de excess. Pralator. Sunt tandem ipsi Fratres tantummodo capaces eleemosynarum manu collatarum, quæ sunt pro eadem Missarum celebratione, vetita quavis assignatione perpetua, cujus incapaces esse dicuntur: Sanchez ad præcepta Decalogi lib. 7. cap. 26. num. 49. Barbof. juris Eccles.



*Eccles. univers. lib. 3. cap. 27. num. 77. Adden. ad Buratt. decis. 756. num. 11. Pignatell. consult. 16. num. 7. et 8. tom. 3. Torr. de pactis futur. success. lib. 2. cap. 36. num. 75. Rota decis. 456. num. 15. coram Merlino, decis. 1219. num. 8. et decis. 1326. num. 8. coram Emerix juniore. Sudent ergo hæc omnia, Fratres Minores esse incapaces legati prædicto consimilis; & consequenter id quatenus fiat, ad S. Petri Fabricam pertinere.*

15 Verum enimvero, præmissis hisce minime refragantibus, rata adhuc & firma videntur esse legata prædicta, absque eo quod Rev. Fabrica S. Petri valeat de ipsis sibi jus aliquod arrogare. Posito quippe, quod redditus, & fors erogari debeant in expensas pro causis Beatificationis, & Canonizationis necessarias, ita ut nihil ad Fratres Minores pertineat; nihil est profecto in ejusmodi legato, quod adversetur severæ paupertati a S. Francisco constitutæ: si autem nihil paupertati adversatur, nequeunt ipsi Fratres eorumdem legatorum dici, & esse incapaces: ideoque, si quidem capaces sunt, cessat jus Rev. Fabricæ S. Petri. Neque omittendum est, quod exemplum annuorum reddituum cum onere celebrationis Missarum ad rem esse, aut cum proposito pugnare minus videtur; quandoquidem, cum eleemosynæ Missarum cedant in Fratrum subsidium, quando eleemosyna ipsa est perpetua, Fratres amplius non pendent ab incerto, contra Textum in cap. unico: *de Religiosis domib. in 6.*, ubi: *Quibus ad congruam sustentationem redditus, aut possessiones habere Professio, sive Regula qualibet interdicit, sed per quatum publicum tribuere victum soles incerta mendicitas. Cui consentit Glossa in cap. unico v. mendicantes, de excessibus Prælat. in 6. Quibus victum tribuis incerta mendicitas, & qui redditus, aut possessiones ex Regula, vel Constitutionibus habere non possunt.* Quocirca, cum neque caput, neque redditus legatorum, de quibus nunc agimus, cedant in subsidium Fratrum, sed semper hi pendeant ab incerto; etiam in hypothesi, ubi legata eadem sint ipsi Fratribus facta, nemo non videt, exemplum annui redditus pro celebratione Missarum nihil habere commune cum legato Relicto pro causa Beatificationis, aut Canonizationis expedienda.

16 Cum itaque ex dictis satis superque colligatur, non esse a Regula vetitum, ne Fratres Minores querant eleemosynas pro expensis ad causas Beatificationis. & Canonizationis necessariis; nec eosdem esse incapaces legati, puta domus, prædii, census, ut horum scilicet redditus, aut caput erogentur in res prædictas: operæ nunc pretium erit videre, apud quem pecuniæ relicte sint deponendæ, & quomodo sint custodiendæ, necnon utrum ex illis emi possint census, loca montium, atque similia, absque eo quod adversus ipsam S. Francisci Regulam quid committatur. Legitur namque in cap. Exiit: *de verborum significat. in 6. §. Ceterum, cum in eadem Regula sit sub præcepti distinctione prohibitum, ne Fratres recipiant per se, vel per alios denarios vel pecuniam ullo modo; idque Fratres in perpetuum servare cupiant, & velut injunctum necesse habeant adimplere, ne ipsorum puritas in hujusmodi observatione præcepti maculetur in aliquo; & ne Fratrum conscientia aliquibus aculeis*

*leis stimulentur; articulum istum propter detrahentium morsus profundius, quam nostri Prædecessores fecerint, assumentes, ac ipsum clarioribus determinationibus prosequentes, dicimus &c.* tum etiam copvenit Clementina Exivi §. *Veruntamen*, eod. tit.

17 Hisce nimirum positis, siquidem primum quæritur, apud quem pecuniæ sint deponendæ, & apud quem custodiendæ, facili negotio responderi posset, eas esse apud Syndicum Apostolicum deponendas; Fratres quippe strictioris Observantiæ utuntur Syndico Nicolai III. & Clementis V. apud quem deponuntur eleemosynæ, cujusque onus est eas erogare in Fratrum subsidium, ita tamen, ut penes dantem remaneant dominium, proprietatis, ac pecuniæ possessio, cum libera potestate eandem recuperandi, usquequo in rem constitutam sit conversâ, ut habetur *in sape cit. cap. Exiis, de verbor. significat. in 6. & in Clement. Exivi, eod. tit.*; ceteri autem Fratres Observantes utuntur Syndico Martini V. apud quem pecuniæ deponuntur, ita vero, ut earum dominium minime quidem penes dantem remaneat, sed transeat in jus Sedis Apostolicæ. Verum, quia citatæ summorum Pontificum Constitutiones Syndicos induxerunt tantummodo quoad conservationem pecuniarum in utilitates Fratrum convertendarum, ideo sequitur, cum iidem Fratres nequeant penes se conservare pecunias & eleemosynas, quas a piis Fidelibus collegerunt pro causis Beatificationis, & Canonizationis suorum Dei servorum, ne S. Francisci Regulæ adferrentur, eos curare posse, immo debere, ut illæ deponantur apud aliquam honestam personam, quæ fideliter eas conservet; sive hæc persona sit a Syndico sejuncta, sive sit ipse Syndicus, qui in hoc rerum statu duplicem induet figuram, alteram Syndici pro conservatione pecuniarum erogandarum in subsidia Fratrum, alteram depositarii & custodis pro pecuniis expendendis in causas Beatificationis & Canonizationis. Quod utique animadversum optime fuit in ipso rei eventu, uti desumitur ex sequenti decreto Congregationis particularis habitæ tempore san. mem. Innocentii XII. *Facta per Andream Pierium Subpromotorem Fidei, prout sub die 6. Septembris proxime præteriti 1696. habuerat in mandatis, relatione de statu causæ, seu causarum Limanæ B. Francisci Solani, & Mexicanæ Vener. servi Dei Sebastiani de Apparitio ad instantiam Postulatorum earundem, seu potius Syndici Generalis Religionis Minor. S. Francisci contra Equitem Silvam pro recuperatione pecuniarum penes ipsum Silvam depositarum coram Auditore Camera, sive ejus Auditore introducta, seu introductarum; Eminentiissimi Patres censuerunt & decreverunt, causas pecuniarum depositarum penes ipsum Equitem Silvam pro causis Canonizationum, nempe Limanæ B. Francisci Solani, & Mexicanæ Vener. servi Dei Sebastiani de Apparitio, non esse confundendas cum aliis creditis aliarum administrationum ratione Syndicatus Religionis Minorum S. Francisci ab eodem Equite exerciti, & mihi Secretario injungendum, quod de prædictis Auditorem Camera, sive ejus Auditorem certiorum redderem. Procedendo itaque secundum normam hujusce decreti, nemo est qui non videat,*

videat, unam eandemque personam modo quidem Syndici vices, modo vero Depositarii causarum Beatificationis & Canonizationis implere & exercere; ita ut a primo ad ultimum semper subsistat, pecunias collectas esse deponendas vel apud honestam personam, vel etiam apud Syndicum, atamen non tamquam talem, sed tamquam peculiarem Depositarium. Præterquamquod ipsæ pecuniæ, de quibus huc usque locuti fuimus, deponi quoque possent in sacro monte Pietatis; dummodo, data erogationis occasione, aut persona particularis speciatim electa, aut ipse Syndicus, non tamen quâ talis, sed quatenus peculiaris adminitrator, de illis decerneret.

18 Hæc de pecuniarum deposito satis. Nunc autem ad earumdem custodiam transeundo; si depositum factum sit in sacro monte Pietatis, nulla certe melior excogitari potest cautio pro securiori pecuniarum conservatione atque custodia. At, si pecunia apud peculiarem aliquam personam sit deposita, quandoquidem ea, instantibus & exorantibus Fratribus, fuit a piis Fidelibus subministrata, ut erogaretur in expensas necessarias ad Beatificationis & Canonizationis causas; tenentur dicti Fratres, saltem ex charitate, omnem & quaecumque operam præstare, ut eadem rite ac recte custodiatur. Sanctæ memoriæ Innocentius X. in sua *Constit. 12. Bullar. veter. tom. 5. pag. 460.* decrevit, ut eleemosynarum collectarum pro sanctis Palæstinæ locis duæ claves haberentur, quarum altera retineretur a Commissario eorumdem locorum, altera autem a Syndico: *De venerabilium Fratrum nostrorum S.R.E. Cardinalium negotio propaganda Fidei præpositorum consilio, Commissariis Terra sanctæ, ut ipsi tuto conscientia unam ex dictis duabus clavibus penes se retinere libere & licite possint & valeant, Apostolica auctoritate, tenore præsentium, concedimus & indulgemus.* Si itaque consimilis gratia a summo Pontifice obtineri posset, id est ut una clavis eleemosynarum collectarum pro causis Beatificationis, & Canonizationis retineretur a Postulatore, alia vero a Depositario, optime sane consultum dici posset rectæ ipsi pecuniarum conservationi: sed, cum adhuc hæc gratia obtenta non sit, onus est Fratrum sæpe Depositarium monere, ut se fideliter gerat juxta sæpe citatum Textum in cap. *Exiit: de verbor. significat. in 6. Possint etiam personam eandem exhortari ac inducere, quod fideliter in re commissa se habeat, & anima sue salutis in commissa sibi executione provideat.* Quod si Depositarius foro cedat, aut ejus decoctio immineat, vel de ejus fidelitate timeatur, Postulator causæ debet eum ab officio remove, atque adeo alium substituere, qui vel nomine piorum, qui eleemosynas dederunt, vel tamquam unus de populo instet coram Judice aut pro securitate pecuniarum, si ullæ quidem adhuc supersint, aut pro eorumdem recuperatione, si amplius non extent penes Depositarium jam exauctoratum; quemadmodum fuse docet supra citatus P. Augustinus Matthæuccius in sua *schola paupertatis tit. 5. consil. 3.*

19 Pro hujus tandem capituli absolutione nihil aliud restat, quam ut quæsito respondeamus, an ex prædictis pecuniis emi possint census, aut loca

*loca montium*. Sed, cum superius dictum fuerit, Fratres Minores esse capaces censuum, & *locorum montium* legatorum, quorum reditus, & caput erogentur in expensas faciendas pro causis Beatificationis & Canonizationis, suapte profecto argumenti vi sequitur, pecunias pariter ex eleemosynis collectas tuto impendi posse, si id ex prudentia exigatur, in emendis censibus, aut *loets montium*; dummodo in utroque casu, vel legati videlicet, vel acquisitionis per emptionem, omnia erogentur in causas prædictas, atque a peculiari persona seu administratore dispensentur.

## F I N I S .



EXCUDEBANT ROMAE  
NICOLAUS ET MARCUS PALBARINI  
ACADEMIAE CONIMBRICENSIS  
BIBLIOPOLAE ET TYPOGRAPHI ROMANI  
AD THEATRUM POMPEII  
ANNO CLD. ID. CC. XLVII. MENSE JULII  
SEDENTE  
BENEDICTO XIV. PONT. OPT. MAX.  
PONTIFICATUS EJUS  
ANNO VII.

ALT 1316.581









1105

